

Holy Bible

Aionian Edition®

Hset Hadròeh
Hre Bible

AionianBible.org
The world's first Holy Bible untranslation
100% free to copy and print
also known as " The Purple Bible "

Holy Bible Aionian Edition ®

Hset Hadröeh

Hre Bible

Language: Hre

Vietnam

Creative Commons Attribution ShareAlike 4.0 International, 2018-2025

Source text: eBible.org

Source version: 9/10/2025

Source copyright: Creative Commons Attribution ShareAlike 4.0

Baq Thi, 2024

Formatted by Speedata Publisher 5.3.10 (Pro) on 12/3/2025

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language

Translator resources at <https://AionianBible.org/Third-Party-Publisher-Resources>

Volunteer help and comments are welcome and appreciated!

Celebrate Jesus Christ's victory of grace!

Preface

Hset at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aīdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aīdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is *eternal*! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Hset at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEPBible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.

Table of Contents


NEW TESTAMENT

MATHIO'	11
MŌC	93
LUCA	144
JON	229
BÌAC YIANG HADRŌEH	294
RÔMA	377
I CORINHTO	416
II CORINHTO	453
GALATI	478
ÊPHÊSÔ	491
PHILIP	504
CÔLOSE	513
I TÊSALÔNICA	522
II TÊSALÔNICA	530
I TIMÔTHÊ	535
II TIMÔTHÊ	545
TIT	552
PHILÊMÔN	556
HÊBRU	558
JACO	586
I PHIERÔ	596
II PHIERÔ	607
I JON	614
II JON	624
III JON	626
JUÐE	628
MAHNO	631

APPENDIX

- Reader's Guide
- Glossary
- Maps
- Destiny
- Illustrations, Doré

NEW TESTAMENT



Mahaq Chuaq Jesus waiq khàn: "Waiq Baq! Ìh caqnaih da wì yiniq lui, majah qmang aih wì
ùh qnì rađeh broq cleq." Khoé èh, wì pàih panàih hu ngan maleq majah eo haq.

LUCA 23:34

MATHIO'

1 Xinoe da Jesus Christ, kon xau bùa Đawit, kon xau Apraham. **2** Apraham baq da Ysac, Ysac baq da Jacôp, Jacôp baq da Juđa xam wì oh haq. **3** Juđa baq da Pharê xam Sara, Thama aih miq wa haq. Pharê baq da Êch rôm, Êch rôm baq da Aram, **4** Aram baq da Aminađap, Aminađap baq da Na-ach son, Na-ach son baq da Sanh mòn. **5** Sanh mòn baq da Bô-ô, miq da haq aih Rahap, Bô-ô baq da Ôbet, miq da haq aih Ruto, Ôbet baq da Jêse, Jêse baq bùa da Đawit. **6** Đawit baq da Salômôn, miq haq aih mai Uri. **7** Salômôn baq da Rôbôam, Rôbôam baq da Abija, Abija baq da Asa **8** Asa baq da Jôsaphat, Jôsaphat baq da Jôram, Jôram baq da Ôxia. **9** Ôxia baq da Jôtam, Jôtam baq da Acha, Acha baq da Êxêchia. **10** Êxêchia baq da Manase, Manase baq da Amôn, Amôn baq da Jôsia. **11** Jôsia baq da Jêchônia xam wì oh haq, jò wì lam broq dìc ta Babilôn. **12** Jò khoe lam broq dìc ta Babilôn, Jêchônia baq da Sala thi-ên, Sala thi-ên baq da Xôrôbabê, **13** Xôrôbabê baq da Abi-ut, Abi-ut baq da Eliakim, Eliakim baq Axô. **14** Axô baq da Sađoc, Sađoc baq da Achim, Achim baq da Eli-ut, **15** Eli-ut baq da Elê-axa, Elê-axa baq da Mathan, Mathan baq da Jacôp. **16** Jacôp baq da Jôsep, ǒng Mari. Mari mangai ma hauang Chuaq Jesus, aih raq Christ. **17** Qmang aih, patep enh Apraham trùh Đawit, dìq dǒng jah moeq jàt pôn qnhòng; patep enh Đawit trùh jò lam broq dìc ta Babilôn hanoh jah moeq jàt pôn qnhòng; pang jò lam broq dìc ta Babilôn trùh Chuaq Jesus Christ, hadai jah moeq jàt pôn qnhòng. **18** Bìac ma hauang ka Chuaq Jesus aih rameh, Mari miq haq, khoe tèu bàu yōc Jôsep, mahaq

qnhòq acaq oe moeq qmang ti dabau, yàng aih haq khoe hadràp enh Yeang Hadròeh. **19** Jôsep ǒng haq aih mangai i manoh, ùh enh dôq haq pòq bàu qmèq, ta manoh haq khoe hèm ka cađac ma haq broq qmang leq ma ùh hìaq ta-uàng. **20** Mahaq, jò haq qnang hèm trùh trong aih, i moeq bình plình Chuaq trùh ti haq jò haq apô, doe ka haq: “Jôsep, kon xau Đawit, ìh apaq hòq ka yđc Mari broq mai, ma jah qmang aih kon haq ma hadràp qmat trùh enh Yeang Hadròeh. **21** Haq aih èh ma hauang loh moeq ngai kon calô, ìh yiniq am ka haq Jesus. Kon calô aih èh ma jah dèch dèh mangai loh khoe ka yiniq lui. **22** Rìm yiniq khoe loh qmang aih dôq xìt troeq bàu Boc plình ma thê bài mangai pajàu haq khoe noe: **23** “Kô oq, i mòeq ngai adrùh sriu chìuq hadràp, èh ha-uang mòeq ngai kon calô, Khoe aih wì yiniq ka haq Imanuli” (aih la Boc plình oe ti bèn). **24** Jò Jôsep khoe cadrat enh kùi, haq broq tiaq bàu bình plình Chuaq ma khoe thê, ahlài Mari broq dèh mai. **25** Mahaq ùh kùi oe ti da bau trùh jò Mari ha-uang mòeq ngai kon calô, haq hi yiniq ka kon aih la Jesus.

2 Jò Chuaq Jesus khoe ha-uang ta Bêtlêhem, gùng Juđê, qnhòng aih Hêrôt broq bùa, bài bõcsi oe gùng mahì loh, trùh ta Jêrusalem **2** bòch rameh: Bùa da mangai Juđa ma neo ha-uang oe taleq? Nhèn khoe hnoq halõng Haq oe pah gùng mat mahì loh, kô ìq nhèn majah khoe trùh đõeq kùh waiq haq. **3** Tàng bàu aih bùa Hêrôt xam dìq mangai oe ta Jêrusalem dìq jaq crè hamàih **4** Bùa creo ka bài broq cla craq pajàu xam mangai hnài ranenh ta aih, haq bòch: Christ kô ìq ha-uang taleq? **5** Wì padreo bàu: Oe ta bêtlêhem gùng Juđê majah qmang aih khoe i bàu

pajàu achìh rameh: **6** “Ìh, Bêtlêhem, gùng Juđê. Joq qnàng
ih ùh i yeo hamoq ka bài plài ma kàn ta gùng Juđê, Majah
qmang aih, enh ìh kô èh loh mòeq ngai broq Cla craq.
Haq aih ma wèq ban Isorali, aih mangai da au.” **7** Bùa
Hêrôt creo atùng ka bài bōcsi, bòch panhìn halõng khoe
loh jò leq. **8** Khoe èh bùa thê wì aih lam ta Bêtlêhem, rai
tanap: Pì drah lam beq, taboe chaq kon qyoh aih ma ro
haq, jò pì khoe hnoq, patìn ka au loq diq, dôq au hadai
trùh hu kùh waiq haq. **9** Khoe ka bàu bùa thê, wì loh
lam. Hatau, halõng wì haq ma khoe hnoq enh gùng mat
mahì loh, lam adroe ka wì haq trùh nòe kon qyoh oe men
waq yòng. **10** Wì aih hnoq halõng, manè oe i jaq cleq.
11 Jò khoe mùt ta hnem, hnoq kon qyoh xam Mari miq
haq, tajòe qmòe wì haq hacùn cràng ta haqneq đòeq kùh
waiq. Khoe aih qnoh deh hang canaq dèch am ka haq:
Wang, gahnàu, dàu xua thùm. **12** Khoe aih, jò apô Boc
plình doe ka wì haq apaq wìh hlài dèh ta Hêrôt, wì aih
hi tawìh trong qnoeq hu bròc dèh gùng. **13** Jò wì aih
khoe lam, i moeq bình plình da Chuaq trùh ti Jôsep, jò
haq apô, doe rameh: “Drah yòng beq, qnung kon qyoh
qmat hloe xam miq haq lam amot ta diac Êdip, oe ta aih
trùh jò leq au creo ka ìh, majah qmang aih kô èh bùa
Hêrôt chaq jêh đac kon qyoh qmat. **14** Jôsep drah yòng, jò
oe raq damang, qnung wa miq kon lam ta diac Êdip. **15**
Haq oe ta gùng aih trùh jò Hêrôt cachìt, dôq xìt ka bàu
Chuaq ma khoe thê dèh bài pajàu tapoch: “Au khoe creo
dèh ka kon loh enh diac Êdip.” **16** Bùa Hêrôt hnoq bài
bōcsi khoe qnùt rađeh, haq nòeh pi ka jaq, haq thê jêh ka
cachìt dõng qyoh calô pang baiq hanam dang loh oe ta

Bêtłêhem hloe xam dìq dǒng ka kon qyoh ta cròng aih.
Tiaq troq hì troq khê bài bōcsi ma khoe am haq loq. **17**
Qmang aih, khoe xít troeq bàu Jérêmi pajàu Boc Plình ma
khoe anoe: **18** “Wì tàng bàu breo, cajiah. Ta-oeh, hmoe
tagùng Rama Aih bàu Rachen hmoe dèh ka wì kon Mahaq
ùh dôq cabô alòng rađeh, majah qmang aih wì haq khoe
pi i. **19** Mahaq khoe ka bùa Hêrôt cachìt, i moeq bình
plình Chuaq trùh ti Jôsep jò haq apô, jò oe ta diac Êdip,
thê rameh: **20** “Drah yòng beq, qnung kon qyoh hloe xam
miq haq hlài tagùng Isorali, majah qmang aih mangai ma
chaq jêh đac kon qyoh qmat khoe cachìt.” **21** Jôsep drah
yòng, qnung kon qyoh xam miq haq wì hlài gùng Isorali.
22 Mahaq, jò tàng doe Achêla-u broq bùa thai dèh baq haq
aih Hêrôt, qnang wèq gùng Juđê, Jôsep loh ka crè pi hùa
hlài ta aih, qnah hòm Boc plình khoe anoe jò haq apô,
haq hi mùt ta gùng Galili, **23** lam rìh oe ta plài Naxaret.
Qmang aih khoe xít troeq bàu bài pajàu Boc Plình ma
khoe anoe adroe: “Wì creo ka Haq mangai Naxaret.”

3 Jò aih, Jon Baptit trùh tanèo hawit gùng Juđê hnài bàu
lem **2** rameh: “Drah loq raxach beq! majah qmang aih
diac plình trùh khoe haten” **3** Jon Baptit aih raq mangai
pajàu Êsai ma khoe anoe: “I bàu creo tanèo hawit: Drah
padon trong am ka Chuaq, Broq ma tamang trong da
Haq”. **4** Jon caxùnh eo broq enh xàc lôcđa, kèt caxy qnam
broq xam akia, acaq toq lìp xam diac xùt ta rôm wang. **5**
Jò aih, dìq dǒng ka mangai ma oe ta Jérusalem, xam dìq
dǒng mangai oe gùng Galili, hloe xam gùng trong cròng
diac Jôđan trùh dìq ti haq. **6** Jò wì khoe paqnoh dèh
yiniq lui, wì dôq haq broq baptem ka rađeh ta cròng diac

Jôđan. **7** Mahaq jò haq hnoq bac ngai nang noe Pharsi
xam mangai Sađusê trùh đòeq hu jah broq baptem, haq
doe: Bái nang noe bìh plöng meh, cabô hnài pì ma khoe
loq wia đeh ka kan noèh hì atìq meh? **8** Qmang qmat, thê
pì loh plì lem, dôq ùh hìa qngwan ka pì ma khoe loq
raxach, **9** èh apaq catèh: “Apraham aih kan cadraq nhèn,
majah qmang aih au doe ka pì, enh hmo kô, Boc plìngh
thê haq loh nang noe ka Apraham dua jah. **10** Manòeq kô,
chòng khoe roh đòeq jang xèm long, long leq ma ùh loh
plì lem, long aih èh kau hu bùh đac. **11** Da au kô, au yōc
diac broq baptem am ka pì, mahaq i Mangai ma trùh atìq
ka au, haq aih cwìang yeo haqnhèq ka au, au kô ùh tajì
ka jah broq mangai wê da haq jep. Haq aih èh ma broq
baptem ka pì xam Yiang Hadròeh xam ùnh. **12** Tì Haq wê
tõnh đòeq hu dè palem dèh qmau ta haneh, lênh qmau
Haq don đòeq ta hapom, manùh bùh ta ralùng ùnh ùh
pat.” **13** Jò aih, Jesus loh enh gùng Galili trùh ti Jon oe
ta cròng diac Jođan, dôq Jon broq ka rađeh baptem. **14**
Mahaq Jon hangah rameh: Au kô ma khòh dôq lìh broq
baptem ka rađeh, hagleq lìh majah trùh glòq ti au? Chuaq
Jesus padreo bàu: **15** Manòeq kô broq beq, bèn khòh broq
ma gêh geo trong taq atoq qmang qmat. Jon hi broq tiaq
bàu Chuaq Jesus. **16** Broq baptem bu khoe, Chuaq Jesus
loh khoe ka diac, tajòe qmòe diac plìngh tapèh, Chuaq
Jesus hnoq Yiang Hadròeh Boc Plìngh, tìah ka trù pan loh
jràp ta chac Haq. **17** I bàu enh plìngh doe: “Kô kon da au,
mangai au ma loq waq dèh, lem manoh au rìm trong.”

4 Khoe aih, Yiang Hadròeh qnung Chuaq Jesus mùt tanòe
gùng hawit, dôq kan kiac padô qnùt Haq. **2** Chuaq Jesus

apàm ka acaq pôn jàt hì, pôn jàt mang, khoe aih haq loh qmòe ka hrah. **3** Kan kiac trùh ajang Chuaq, haq doe: Tàng joq ìh kô kon Boc Plình, thê hmo kô wìa bênh beq. **4** Chuaq Jesus doe: “Khoe i bàu achìh rameh: Mangai rìh ùh xài canòm toq ka bênh, mahaq canòm rìm nà loh enh bàu Boc Plình”. **5** Kan kiac qmùt Chuaq Jesus tanòe plài hadròeh, atđc Haq nòe poc hnim kùh waiq, **6** rai doe: Tàng joq ìh kon Boc plình, caqnìh rađeh beq, ajoq khoe i bàu achìh rameh: “Chuaq thê bài bình plình wèq ìh: Wì aih hi dèch ìh ta xöng, Aih èh jènh ìh ùh i catoeh ka hmo”. **7** Chuaq Jesus doe: “Hadai i bàu achìh rameh: ìh ùh khòh ti qnhro ngan Chuaq aih Boc Plình ìh.” **8** Kan kiac atđc Haq ta wang haqnhèq hòm, patô ka Haq bài diac oe cröng taneh xam kan rahù ranhòm bài diac aih, **9** haq anoe: Tàng joq ìh kùn cràng kùh waiq enh ngèa au, bài diac qmat au am döng ka ìh. **10** Chuaq Jesus tapoch ka haq: “Satan wia ma khoe ka au beq, majah qmang aih i bàu khoe achìh: ìh ep kùh waiq Chuaq aih Boc Plình ìh, rai patìh toq ka haq raq. **11** Khoe aih Kan kiac hi lam, i bình plình trùh haten patìh ka Chuaq Jesus. **12** Jò Chuaq Jesus tàng doe wì khoe rùp clêh Jon, haq wìh hlài ta gùng Galili, **13** Haq ùh oe ta Naxaret, mahaq lam oe ta Cabênaum, haten diac raxìq, hatìa ka gùng Sabulôn, gùng Neptali. **14** Dôq xít troeq bàu pajàu Êsai ma khoe doe: **15** “Taneh Sabulôn xam Neptali, Oe ti trong loh ta diac raxìq, pah tau cròng diac Jodan, Aih gùng Galili mahaq ùh xài mangai Juda..., **16** Wì aih hangui tanòe clam cluiq, Khoe jah hnoq kan qngah kàn; Xam bài mangai ma hangui enh caqnàm qmù kan cachìt, Kan qngah kàn

khoe tōc ka wì aih.” **17** Pang aih, Chuaq Jesus hi lam hnài: “Loq raxach beq, diac Plình trùh khoe haten.” **18** Jò Haq qnang lam roc haqmai diac raxìq Galili, hnoq wa baiq ngai oh daq, Simôn (ma loq creo Phiero) xam oh haq Anrê, qnang tang hlàm ta diac raxìq, majah qmang aih wa aih dìq mangai ranang ka. **19** Haq doe ka wa: “Lam tiaq Au beq, au hu thê chôp lam tang hlàm mangai.” **20** Tajòe qmòe wa oh daq cađac hlàm, lam tiaq Jesus. **21** Lam yeo hangai ka aih, Jesus hnoq baiq ngai wa oh daq maqnoeq hòm, Jaco kon Sêbêđê xam oh haq aih Jon, qnang hmình hlàm taboang ti Sêbêđê baq wa haq, Chuaq hi creo ka wa. **22** Tajòe qmòe wa haq hi đòeq boang xam dèh baq wa haq, hu lam tiaq Chuaq. **23** Chuaq Jesus lam jàp gùng Galili, hnài roc hnim tagop, anoe bàu lem diac Boc Plình, rai broq brêh ka mangai yinìq ta gùng aih. **24** Qmang aih, yiniq haq wì hìa jàp jìa gùng Syri, wì aràng ka haq bài mangai ùh hrōc, mangai yinìq, mangai kiac pawè, ranhùa, mangai pen. Haq broq brêh dìq dōng ka wì aih. **25** Èh hòm, patep enh gùng Galili, Đêcabôlo, gùng Jérusalem, enh gùng Juđê, trùh hloe pah tau cròng diac Jôđan, wì ti adràc dabau bàc haraya lam tiaq Jesus.

5 Jò Chuaq Jesus hnoq mangai bàc, haq hi tōc ta wang, jò haq khoe hangui, bài mangai tiaq hòc thia haten ka haq. **2** Haq hi tapoch đòeq hnài wì: **3** Xôq ramot am ka bài mangai xalep ta manoh, majah qmang aih diac plình aih da wì haq! **4** Xôq ramot am ka bài mangai crò hmoe, majah qmang aih wì haq jah alòng! **5** Xôq ramot am ka bài mangai loq kèm, majah qmang aih wì haq jah taneh! **6** Xôq ramot am ka bài mangai pangot kan taq atoq, majah

qmang aih wì haq jah panàc! 7 Xôq ramot am ka bài mangai ma loq ha-och, majah qmang aih wì haq jah ha-och chau! 8 Xôq ramot ka bài mangai i manoh hliang hadròeh, majah qmang aih wì haq jah hnoq Boc Plình! 9 Xôq ramot ka bài mangai broq ka wì hatroq, majah qmang aih jah creo ka wì haq aih kon Boc Plình! 10 Xôq ramot am ka bài mangai lam tiaq trong taq atoq, chìuq dôq qmòe wì rùp rađeh, majah qmang aih wì haq jah waq diac Plình! 11 Xôq ramot am ka pì, jò wì hnap hnuq ka pì, rùp pani rai yōc trong dù capoch hađo ka pì, taiq pì tiaq au. 12 Drah lem bùi rai tadèch qmoè cliac manè, qmang aih kan baha pì oe ta Plình kàn haraya, majah qmang aih wì hadai khoe hmaq rùp bài pajàu yiang adroe ka pì qmang aih diq. 13 Pì kô boh da cröng taneh, mahaq tàng boh aih pi xang, aih èh yōc cleq broq dôq haq jah xang hlài, boh aih oe broq cleq ma oe wìa, ep hrôq đac enh gùng, èh wì hi jôiq đac enh caqnàm jènh. 14 Pì kô kan qngah da cröng taneh kô, mòeq toq plài broq ta wang, ùh jò leq i cleq jah hanàp đac haq. 15 Hadai qmang aih, ùh i cabô bùh đen ma đòeq enh qneq ka cađap, mahaq wì dèch đòeq nòe haqnhèq, dôq haq hu sreo qngah ka rìm ngai oe ta hnim. 16 Kan qngah pì drah sreo enh ngèa wì qmang aih diq, dôq wì jah hnoq bài kan lem enh pì, wì hu manè Baq bài pì oe ta Plình. 17 Pì apaq hèm au trùh đòeq hu raliang đac ranenh xam bài bàu pajàu; au trùh, ùh xài hu raliang, mahaq đòeq hu pagêh. 18 Au doe qnàng ka pì, jò plình cröng taneh kô oe raq, yac ka moeq teo, moeq pliang chù, ma yi qyoh oe ta ranenh dua ùh hnhung, dua waq ka gòm trùh hì rìm yiniq jah gêh. 19

Qmang aih, mangai leq raliang đac mòeq yiniq ma yeo qyoh dìq dōng ta bài ranenh kô, rai hnài wì qnoeq broq tiaq, mangai aih èh wì doe haq mangai yeo qyoh dōng oe ta diac plình, mahaq mangai leq wèq ranenh aih, rai hnài wì qnoeq broq tiaq, mangai aih èh wì doe haq mangai yeo kàn tanèo diac plình. **20** Majah qmang aih, au doe qnàng ka pì, tàng joq kan taq atoq pì ùh yeo haq nhèq ka kan taq atoq da bài thài hnài ranenh xam mangai Pharisi, pì ùh jah müt diac plình. **21** Pì i tàng bàu ma doe ka wì craq calah nèh: ìh ùh khòh jêh đac mangai, èh hòm cabô ma jêh đac mangai, haq aih ep pòq kan hadrah. **22** Yàng Au doe ka pì: “Waq toq cabô nòeh dèh ka oh daq, haq aih khoe wìa dôq ka wì tah hadrah ka haq, cabô hnap dèh ka oh daq: Raca, ep qnoh haq aih tanèo hadrah kàn dôq wì hu hadarh ka haq, cabô lech dèh ka oh daq: Ranhùa, haq aih khoe khòh dôq ùnh oe ta hwinh baxa haq. (**Geenna g1067**) **23** Aih ìq, jò leq pì aràng dèch ramènh tadreo tanèo prang, mahaq hmàng hlài oh daq i yiniq cleq ma ùh troq ka rađeh, **24** drah đòeq ramènh aih enh ngèa ka prang tawìh hlài broq hatroq ka oh daq ðeq, khoe hi lam dèch ramènh tadreo. **25** Jò ìh lam trong ti mangai tah hadrah ka ìh, drah hatroq hôi, tabeq haq qmùt ìh ta cwan hadrah, cwan aih aràng ìh ta cwan lình, qmang aih wì loq rùp clêh ìh, **26** Au doe qnàng ka ìh, ìh caqnaih oe thùuq moeq đùng dua ìh qnhòq jah loh enh aih.” **27** Pì tàng bàu cô: “Ùh dùh tango.” **28** Mahaq Au doe ka pì: “Mangai leq haqmiang mangai cadrì, ta manoh khoe hèm ùh wìa, haq aih khoe tango ta manoh. **29** Qmang aih tàng joq mat pah qma broq ka ìh loh kan yiniq lui, qngwia

khwēn cađac ma hangai ka ìh, dôq haq yac ka moeq qnah ta chac ìh pi tôm, aih dua ùh hnau dìq ka chac clìh ta hwinh. (Geenna g1067) 30 Tàng joq tì pah qma basrùq ìh broq yiniq lui, pot khwênh đac ma hangai ka ìh dôq haq moeq qnah ta chac ìh raliang, ùh hnau dìq ka chac clìh ta hwinh.” (Geenna g1067) 31 I bàu doe rameh: Tàng joq mangai leq cađac mai, ep achìh jàiq đòeq broq bò akang. 32 Mahaq au doe ka pì: “Mangai leq cađac mai, mahaq ùh xài taiq haq tango, mangai aih broq dèh ka mai loh mangai i tuiq tango, èh hòm, cabô yōc gùcadri wì cađac, haq aih hadai i tuiq tango.” 33 Pì tàng bàu doe ka wì craq calah nèh: ùh khòh loq hapah paqnùt, mahaq ajang Chuaq, ep wèq dèh bàu cla khoe hapah, 34 Mahaq au anoe ka pì rameh: “Ùh dùh hapah cadèh, apaq patô tröc hu hapah, aih xài gèq Boc Plình, 35 ùh dùh patô taneh hu hapah aih xài nòe Boc Plình roh jènh, ùh dùh patô Jérusalem hu hapah, aih xài plài Bùa kàn. 36 Ùh dùh patô dèh gàu hu hapah, majah qmang aih mòeq hadrang xàc gàu, cla pì broq dôq haq loh ka taboc loh ka gam dua ùh jah. 37 Mahaq pì ep doe rameh: “Joq joq, ùh ùh”. Bài bàu wì ma tapoch tam aih, dìq loh enh kiac dù. 38 Pì tàng bàu doe rameh: Mat am hlài mat, hanenh am hlài hanenh, 39 Yàng au doe ka pì: “Ùh dùh àu tablêq ka mangai dù, mahaq tàng i cabô tep taboc pah qma, pì tawìh am hloe ka wì taboc pah qngeo, 40 Tàng i cabô enh tah hadrah ka ìh đòeq chaq trong lêh yōc da pì eo đêq, dôq haq wì yōc hloe xam eo yōh enh gùng; 41 tàng i cabô thê pì lam moeq apot trong ti wì haq, pì lam baiq apot trong ti wì. 42 Cabô bòch pì cleq, am beq, cabô enh bòch đò da pì cleq,

apaq hwi đac ta qnoeq.” **43** Pì lah tàng wì doe qmang kô: Thê loq waq ka mangai haten hatia ka pì, git ka mangai tablêq ka pì. **44** Yàng Au doe ka pì rameh: “Thê loq waq ka mangai git ka pì, rai waiq khàn ka mangai ma loq rùp baxa pì. **45** Dôq pì jah broq kon Baq pì oe ta plinh, majah qmang aih Haq broq mat mahì tòc đòeq sreo ka mangai dù xam mangai lem, broq mè ka mangai lem xam mangai dù. **46** Tàng pì loq waq toq ka mangai ma loq waq ka pì, aih èh pì jah baha cleq? Bài mangai ma yđc thèq ma ùh hadai broq qmang aih? **47** Tàng pì đìh dèh toq oh daq, aih i crài cleq ka wì qnoeq? Bài wì enh gùng ma ùh hadai broq qmang aih? **48** Qmang aih, pì ep geo rìm trong qmang ka Baq pì oe ta plinh geo rìm trong.”

6 Rabiaq oq, apaq broq biac taq atoq cla rađeh enh ajang mat wì qnoeq waq ka wì hnoq. Tàng ùh meh, Baq pì oe ta plinh ùh baha ka pì cleq. **2** Qmang aih, jò pì tabàih, paq hlui taliaq enh ngèa dèh cla, troeq bài mangai toq ti patiah ma loq broq nòe hnim tagop, waq ka wì qnoeq hnoq rađeh. Joq qnàng Au doe ka pì, wì aih khoe jah qmòe dèh kan baha. **3** Mahaq jò pì tabàih, apaq dôq pah qngeo loq tì pah qma broq cleq, **4** dôq kan tabàih aih jah hlèp; Baq pì, aih Mangai xau hnoq tanèe hlèp, aih èh haq ma baha ka pì. **5** Jò pì waiq khàn, apaq broq qmang ka bài mangai toq ti patiah, wì haq enh toq yòng waiq khàn tanèe hnim tagop, tanèe trong lam, đòeq đìq ka phù cròng mangai hnoq đeh hra. Joq qnàng Au doe ka pì, wì aih khoe jah qmòe dèh kan baha. **6** Mahaq jò pì waiq khàn, mùt dèh ta bluàng, clòng qmang, khoe aih hi waiq khàn dèh ka Baq pì, oe ta nòe hlèp aih, Baq pì aih Mangai

xau hnoq tanòe dìq jaq hlèp, aih èh ma baha ka pì. **7** Jò pì waiq khàn, ùh dùh yōc bàu capoch lauq capoch clò ùh loh qmòe ranenh troeq wì enh gùng, majah qmang aih wì haq xoh đeh capoch bac aih i mangai tamàng. **8** Qmang aih, pì apaq top dua wì haq, Baq pì khoe loq pì qnang enh cleq adroe ka pì bòch Haq. **9** Qmang aih pì waiq khàn rameh: “Waiq Baq nhèn oe ta plình; Yiniq Baq jah hadròeh; **10** Diac Baq jah trùh; Manoh Baq jah gêh, oe ta crōng taneh tìah ka oe ta plình! **11** Am ka nhèn dahwèq acaq qnang lem ka hì kô; **12** Cađac da nhèn yiniq lui, qmang ka nhèn cađac ka mangai broq yiniq lui ka nhèn; **13** Paq dôq nhèn clìh ta kan padô qnùt, dèch nhèn claih enh kan dù! (Majah qmang aih: diac, kan itai, kan ranhòm, oe dìq ta Baq mòeq đòe.) **14** Majah qmang aih, tàng joq pì cađac yiniq lui mangai qnoeq ma broq ka pì, Baq pì oe ta plình hanoh cađac yiniq lui da pì. **15** Mahaq tàng joq pì ùh cađac yiniq lui wì qnoeq, Baq pì oe ta plình hanoh ùh cađac da pì yiniq lui. **16** Jò pì apàm ka acaq, apaq broq dèh mangò troeq bài mangai toq ti patiah, wì aih broq dèh ma haqnhuaq ta mùh mat, waq ka wì qnoeq loq ka wì haq apàm ka acaq, Joq qnàng au doe ka pì, wì aih khoe jah qmòe dèh kan baha. **17** Yàng jò ìh apàm ka acaq, xùt dàu ta gàu, qmùq mat. **18** Dôq wì qnoeq ùh hìaq loq pì qnang apàm ka acaq, mahaq toq Baq ìh mangai ma xau hnoq tanòe, aih èh haq ma hu baha ka pì. **19** Pì apaq don đòeq kùng hang oe crōng taneh, aih nòe i catia, i kan axiang loq broq haq om cađac èh mangai atùng loq kôch radua, chìa panàt hu yōc atùng, **20** mahaq ep don đòeq ta plình, nòe aih ùh i ka catia, ùh i kan axiang pa-om cađac,

ùh i mangai atùng chìa panàt, kǒch radua hu atùng. **21**
Majah qmang aih, kùng hang pì oe taleq, manoh cliac pì
hadai oe ta aih. **22** Mat aih đen da chac hamac. Tàng joq
mat ìh qngah lem, aih dìq ka chac pì jah qngah, **23** tàng
mat ìh ùh lem, dìq chac hamac ìh loh dǒng ka clam cluiq.
Qmang aih, tàng joq kan qngah oe ta ìh aih loh ka clam
cluiq, aih èh kan clam kô kàn dàng leq! **24** Ùh bô jah broq
hapõng ka baiq toq craq, majah qmang aih haq loq git
ka mangai kô èh loq waq ka mangai tau, ùh meh haq
padèch mangai kô, mahaq jù cađac magai tau. Pì ùh jah
rai broq hapõng Boc Plình rai broq hapõng Mamon. **25**
Aih ìq Au ma jah doe ka pì: “Apaq taiq kan rìh rađeh ma
lèt ka trong acaq ôq, hanoh apaq taiq chac hamac ma
hu lèt ka rađeh caxùnh cleq. Kan rìh ma ùh yeo kàn ka
dahwèq acaq, chac hamac ma ùh xài yeo kàn ka dahwèq
caxùnh? **26** Ngan chim oe ta tróc: haq ùh i rai adrech, ùh
i gat, hanoh ùh i don đòeq ta hapom aih dua Baq pì oe
ta plình ban haq. Pì ma ùh xài yeo canaq ùh hnau ka
chìm aih? **27** Qnah hòm, taqne pì qmat i ka cabô taiq
haq loq lèt ma broq ka rađeh jah halinh tam moeq ahyàc
ùh? **28** Dahwèq caxùnh pì lèt dèh? Haqmiang ngan bâi
riang tacreo oe ta gùng honh qmang leq, ùh i abroq, ùh i
caxênh brai, **29** mahaq au doe ka pì, yac ka bùa Salômôn
nhòm dàng leq, dua qnhòq lah caxùnh moeq blah eo leq
ma lem dàng bâi riang aih. **30** Pì qmat joq mangai biaq
manoh lùi, nhat oe tagùng, aih adrech hì kô oe rìh, hì da
èh bùh ta ùnh. Boc Plình dua am haq caxùnh lem qmang
aih, loq ka pì! **31** Qmang aih, pì apaq lèt đòeq hu doe: Bèn
acaq cleq? Ôq cleq? caxùnh cleq? **32** Majah qmang aih, wì

mangai enh gùng cadàu tiaq rìm yiniq aih, Baq pì oe ta plìnkhoe loq pì i yiniq waq ka bài trong aih. **33** Mahaq adroe dìq dõng, drah chaq diac Boc Plìnkh xam kan taq atoq da Haq òeq, bài yiniq aih èh, brì ka Haq baha tam ka pì. **34** Qmang aih, apaq lèt dèh ka hì da èh, hì da èh ðoèq da hì da èh. Kan xalep hì leq lap qmòe ka hì aih.

7 Pì apaq ti tah hadrah dèh ka wì qnoeq, dôq wì qnoeq hadai ùh hìa tah hadrah ka pì. **2** Pì tah hadrah ka wì qnoeq qmang leq, wì hanoh tah hadrah hlài ka pì qmang aih, pì dèch ka wì dàng leq wì dèch hlài ka pì dàng aih. **3** Hagleq pì hnoq khênh ta mat oh daq, mahaq ùh hnoq long tanòng ta mat cla? **4** Gleq ma hùa doe ka oh daq: Dôq au doeh khênh loh khoe ka mat ìh, yàng ta mat cla i qmòe long tanòng? **5** Wùih! Bài mangai toq ti patiah meh, angoe aih doeh long tanòng loh khoe ka mat cla òeq, khoe aih men xau hnoq ðòeq hu doeh khênh ta mat oh daq. **6** Apaq khwênh ka koq bài dahwèq hadroèh, apaq caqnìh ngòc enh ngèa ka chùa, beq haq jôiq cađac, khoe aih haq hwi hlài nhah glòq cla pì. **7** Bòch beq, aih èh hi jah, chaq beq, aih èh hi glàm, clôq qmang beq, aih èh qmang hi pèch. **8** Majah qmang aih, waq toq mangai leq bòch, mangai aih hi jah, mangai leq ti chaq mangai aih hi hnoq, mangai leq clôq qmang, qmang hi tapèch. **9** Taqne pì, i mangai leq jò kon bòch bênh mahaq pì am ka haq hmo? **10** Tàng ùh meh, kon bòch ka mahaq pì am bìh? **11** Qmang aih, qmèq troeq pì qmat, xôq oe loq am dèh ka kon yiniq lem, loq ka Baq pì oe ta plìnkh, Haq ma ùh am yiniq lem ka bài mangai leq creo bòch haqqmòh? **12** Qmang aih, trong leq pì ma enh wì qnoeq broq ka rađeh,

pì ep broq trong aih am ka wì, aih raq ranenh xam bàu pajàu. **13** Drah müt qmang ma chit, majah qmang aih qmang ma kàn xam trong ma anòh qnung trùh ta kan lùng pac. **14** Mahaq qmang qyoh, trong ùh anòh qnung trùh ta kan rìh, biaq ngai raq chaq ma hnoq. **15** Ngan oq, loq i bài pajàu patìah, bài mangai caxùnh caqmoc trìu lam trùh ti pì, mahaq enh dalam aih koq yiang toq ti kap hit. **16** Pì ngan plì ma canau ka haq. Aleq lah i cabô git plì nho tanòe xèm yila, git plì pōc tanòe xèm yila cađê? **17** Qmang aih, toq long lem men loh plì lem, long qmèq loh plì qmèq. **18** Long lem ùh jò leq loh plì qmèq, long qmèq hadai ùh jò leq loh plì lem. **19** Waq toq long leq ùh loh plì lem aih èh ep kau bùh cađac ta ùnh. **20** Aih èh, pì ngan plì haq men canau ka wì haq. **21** Ùh xài waq toq ka cabô hi creo ka au: Chuaq, Chuaq, aih dìq jah müt diac plình, mahaq toq magai leq ma broq tiaq manoh Baq au oe ta plình. **22** Hì aih èh i bàc mangai doe ka au: “Chuaq, Chuaq, ùh xài nhèn kô raq ma khoe hmaq canòm yiniq ĩh đòeq tapoch pajàu? Canòm ka yiniq ĩh đòeq drùh hnan kiac chóc? Canòm yiniq ĩh broq bàc trong halac qmòh? **23** Jò aih èh, au hi capoch hloh ka wì haq: “Wùih bài mangai broq trong dù meh, Au qnhòq lah qnì ka pì, drah wia khoe ka Au.” **24** Qmang aih èh, mangai leq tamàng rai broq tiaq bàu au anoe kô, haq aih tìah ka mangai rabiaq broq hnem ta cröng hmo talech. **25** Yac ka i mè dêh, i diac trùh, cayeo hlui, glàm caqnhùt hnem aih, dua ùh raliang, majah qmang aih haq khoe broq nòe hmo càn. **26** Mahaq mangai leq khoe tàng bàu au anoe kô yàng ùh broq tiaq, haq aih budàng mangai ratùt broq hnem ta

braih. **27** I mè dêh, diac trùh, cayeo hlui, glàm caqnhùt ta hnem aih, hi ralàih, raliang bac oe i jaq cleq. **28** Jò Jesus bu khoe ka anoe bàu aih, bài wì dìq jaq hamàih ka bàu haq hnài, **29** Majah qmang aih bàu haq hnài tìah gleq i cwìang, ùh xài troeq da bài mangai hnài ranenh.

8 Jò Chuaq Jesus loh enh bui wang, i bài mangai pi cajaq tiaq Haq. **2** I moeq ngai bacùn thia haten rai kùh haq, rai doe: Waiq Chuaq, tàng joq ìh ma waq, ìh broq au brêh. **3** Jesus hnhu tì bèq haq, rai doe: “Au waq, brêh beq.” Tajòe qmòe jò aih raq mangai bacùn jah brêh. **4** Chuaq Jesus tanap ka haq: “Ngan oq, ùh dùh anoe ka cabô, mahaq ìh lam patô rađeh ka bài pajàu kèn, rai dèch ramènh qmang ka Môise khoe hnài, hu panhìn ka wì aih. **5** Jò Chuaq Jesus müt ta plài Cabênaum, i moeq ngai cwan wèq lình trùh ti Haq, **6** rai creo dang: Waiq Chuaq, mangai hapõng au loh ka pen, kùi mòeq nòe ta hnim au, haq jìq pi cajaq. **7** Chuaq Jesus doe: “Au lam ta aih hu broq ka haq jah brêh.” **8** Cwan aih padreo bàu: Waiq Chuaq, au kô ùh tajì ka jah đìh ìh müt dèh ta hnim, mòeq nà bàu ìh tapoch raq, hapõng au hi jah brêh. **9** Majah qmang aih, au oe đeh enh qneq ka cwìang wì qnoeq, au hanoh i bài lình oe enh qneq ka au, au thê mangai kô: lam beq! haq aih hi lam. Thê mangai qnoeq: Drah trùh jang kô! mangai aih hi trùh, au thê dèh hapõng: Drah broq yiniq kô, haq aih hi broq. **10** Tàng bàu aih, Chuaq Jesus loh ka hamàih, haq doe ka bài mangai ma tiaq rađeh rameh: “Joq qnàng au doe ka pì, au qnhòq lah hnoq ta Isorali, i mangai leq i manoh lùi kèn qmang qmat. **11** Au anoe hloe ka pì, i bac ngai enh gùng mat mahì loh, enh gùng mat ma hì clìh,

trùh hangui acaq pajùm moeq aniang ti Apraham, Isac, Jacôp, tanòe diac plình. **12** Yàng bài kon cla diac aih, wì khwênh qnöh đac enh gùng tanòe clam cluiq, ta aih èh i toq kan crò hmoe, ta- oeh, cadrit hanenh. **13** Chuaq Jesus doe ka cwan aih: “Hlài beq, ìh jah tìah dèh ka manoh ìh ma khoe lùi aih.” Wop jò aih raq, mangai hapõng haq jah brêh. **14** Khoe aih, Chuaq Jesus mùt ta hñim Phiero, hnoq miq mai Phiero qnang kùi ta aniang, rai tõq tanget. **15** Chuaq Jesus yõc tì bèq mangai yinìq aih, kan tõq taqnget hi dìq, khoe èh haq aih hi yòng patìh ka Chuaq Jesus **16** Trùh xèq, wì aràng ka Chuaq Jesus bâc ngai kiac chõc pawè, Chuaq Jesus yõc bàu capoch drùh qnöh bài kiac aih, rai broq brêh dìq dõng mangai ùh hrõc. **17** qmang aih dôq xít troeq bàu Pajàu Êsai ma khoe anoe: Haq khoe doeh dõng kan yinìq bèn, Pòq wê kan ùh hrõc bèn. **18** Jò Chuaq Jesus hnoq bâc ngai oe dudan ka dađeh, haq thê tõc apah tau diac. **19** I moeq ngai hnài ranenh trùh ti Haq rai anoe: ìh lam taleq, au tiaq ta aih. **20** Jesus padreo bàu: “Bài chia i trom, chìm i pù, mahaq Kon Mangai ùh i qmòe ka nòe hu angèn gàu. **21** Mangai qnoeq hòm doe: Waiq Chuaq, ìh dôq au hlài catùh hanang dèh baq òeq. **22** Mahaq Chuaq Jesus doe ka haq: “Lam tiaq au, dôq da mangai cachìt catùh mangai cachìt.” **23** Khoe aih, Chuaq Jesus loh ta boang, bài mangai tiaq hõc hi tiaq haq. **24** Cadoe, ta diac raxìq loh bahùt kàn, diac lai laq yòng haqnhèq enh gùp qmòe boang, Mahaq Chuaq Jesus oe raq kùi. **25** Bài mangai tiaq hõc, thia haten padriù haq, wì doe: Waiq Chuaq! ìh dang nhèn diq, nhèn cachìt manòeq kô raq! **26** Jesus doe: “Bài mangai biaq manoh lùi, hagleq

pì ma yùq? Chuaq Jesus yòng tagàih ka cayeo xam diac raxìq, dìq baiq hi hatinh rangep hloe. **27** Dìq dǒng ka wì aih hamàih bòch dabau: Mangai kô ìq cabô? Jaq wa cayeo wa diac dua iu bàu Haq? **28** Jò Chuaq Jesus khoe trùh pah tau ka diac, haq hnoq baiq ngai i kan kiac oe ta chac, wa aih loh enh cadràng hanang tùh glàm Haq. Wa aih dù haraya, pi i cabô oe hùa lam pagat trong aih. **29** Wa cachech qmòe cadêh: Waiq Kon Boc Plình, bèn kô ìq ep cleq ka dabau, ajoq ìh trùh tacô, đòeq hu baxa nhèn adroe ka jò ùh xài? **30** Wop jò aih diq, i moeq calùh chùa qnang acaq. **31** Bài kiac bòch Chuaq Jesus rameh: Tàng joq ìh hnan nhèn loh, ìh am nhèn jah müt đeh ta bài chùa tau. **32** Haq thê bài kiac: “Drah lam beq! Bài kiac loh enh wa aih, hi müt hloe ta calùh chùa, tajòe qmòe jò aih dìq dǒng ka calùh chùa oe enh criang tawang clàm loh ta diac raxìq, cachìt dǒng ta diac. **33** Bài mangai ban chùa hi cadàu lam amot, müt taplài taqmon hlài bài yiniq wì haq hnoq, anoe hloe xam bìac wa baiq ngai kiac ma pawè ka wì tàng. **34** Dìq dǒng ka wì gùng aih loh tát Chuaq Jesus, jò wì bu hnoq haq, wì drah thê haq lam taqnoeq.

9 Chuaq Jesus loh tabooang wìh hlài pah tau diac raxìq, haq hlài dèh ta plài. **2** I wì tòng aràng ka haq moeq ngai pen kùi ta dra drah. Chuaq Jesus hnoq wì aih i manoh lùi, Haq doe ka mangai pen: “Ùh dùh yùq dèh kon, yiniq lui kon khoe jah caqnaih.” **3** Jò aih, i toq biaq ngai ma hnài ranenh oe ta aih, wì haq hèm ta manoh: Mangai kô capoch joq loq hanhèq. **4** Yàng Chuaq Jesus loq ka manoh wì haq hèm cleq, haq hi doe rameh: “Hagleq ta manoh pì majah hèm qmèq qmang aih? **5** Baiq nà bàu kô:

moeq aih doe “Dìq ka yiniq lui kon khoe caqnaih, tàng ùh meh doe drah yòng cadiang lam beq, maleq ma yeo hlàu ka tapoch? **6** Mahaq au waq ka pì loq Kon Mangai oe ta cröng taneh kô i cwìang đòeq caqnaih yiniq lui”. Khoe aih, Chuaq Jesus thê mangai pen: “Yòng beq, xùi da ìh dra drah qmat hlài ta hnem.” **7** Mangai pen padinh yòng hlài dèh ta hnem. **8** Dìq ka phù cròng hnoq kan halac aih, mangai leq mangai meh crè đeh hra, rai manè apôi Boc Plinh khoe am ka kon mangai cwìang itai qmang aih. **9** Jò Jesus lam khoe ka nòe aih, Haq hnoq moeq ngai yiniq haq Mathio qnang hangui tanòe hnem yốc thèq, Chuaq Jesus creo ka haq: “Drah lam tiaq au”, haq aih padinh yòng, lam tiaq Chuaq Jesus. **10** Yàng jò wì qnang hangui acaq ta hñim Mathio, i bàc ngai yốc thèq xam bài mangai ùh wìa trùh acaq moeq qmang ti Chuaq Jesus xam bài mangai tiaq hõc haq. **11** mangai Pharsi hnoq qmang aih, wì haq capoch ka bài tiaq hõc Chuaq Jesus: Hagleq mangai hnài da pì qmat majah hangui acaq pajùm ti bài mangai yốc thèq xam ti bài mangai ùh wìa? **12** Chuaq Jesus tàng bàu aih, haq doe ka vì: “Mangai tadêh ma i waq mangai broq jreо, mangai ùh hrõc ma waq ka mangai broq jreо. **13** Lam beq, rai boq ngan bàu kô anoe cleq: Au enh kan loq waq, au ùh ngèh trùh ramènh tadreo. Majah qmang aih, au trùh ta kô ùh xài đòeq creo ka bài mangai taq atoq mahaq đòeq creo ka mangai i yiniq lui.” **14** Jò aih, bài mangai tiaq hõc Jon lam chaq Chuaq Jesus, wì bòch: Hagleq nhèn xam bài mangai Pharsi apàm ka acaq, yàng da bài mangai ma tiaq hõc lìh aih ùh dùh apàm ka acaq? **15** Chuaq Jesus padreo bàu: “Jò cla kon õng oe

raq oe mòeq qmang ti wì bua haq lam acaq yiniang, wì aih mangò qmang leq ma wìa? Mahaq trùh hì leq wì hi qnung đac cla kon ǒng, jò aih èh bua haq ma apàm ka acaq. **16** Ùh i ka cabô yōc ahyah neo đòeq clep tanòe eo kùn, tàng joq broq qmang aih haqnech maneo aih èh haq tadùng hyah hloe ka blah eo, nòe hyah aih yeo qmèq tam. **17** Hadai qmang aih, ùh i mangai leq yōc alac neo ùc ta abôq akia dùnh, tàng broq qmang aih, abôq aih padah, alac aih ta-ùc, abôq aih hi raliang. Mahaq alac neo wì ùc ta abôq akia neo, aih èh ma hi jah wèq dìq baiq. **18** Jò Chuaq Jesus qnang tapoch qmang aih, i moeq ngai wèq hnem tagop qyoh cadiang mùt, hacùn cràng enh ngèa ka Chuaq Jesus rai anoe: Kon cadrì au neo pat, au canòm đeh ka ìh trùh, yōc tì bèq chac haq, aih èh haq jah rìh hlài. **19** Chuaq Jesus hi yòng lam, bài mangai tiaq hōc hadailam ti haq aih. **20** Hanoh jò aih diq, i moeq ngai gucadri, haq loh ka dahrôq mahim khoe jah mòeq jàt baiq hanam, thia haten enh rù bèq haqmai eo Chuaq Jesus. **21** Majah qmang aih, haq xan hèm yôt đeh ta manoh: Tàng joq au jah bèq đeh toq haqmai eo haq raq, au loq đeh jah brêh. **22** Chuaq Jesus wìh hlài, hnoq gucadri aih, Haq doe: “Ùh dùh yùq, toq cajap manoh oq! Manoh lùi da kon khoe broq kon jah brêh”, mangai cadrì aih jah brêh hloe jò aih raq. **23** Jò Chuaq Jesus trùh hnim mangai wèq hnim tagop, hnoq bài mangai hlui taliaq, hnoq wì broq ma tagruàng. **24** Haq doe ka wì: “Pì loh enh gùng beq, kon cadrì qyoh kô ùh i cachít, haq qnang kùi”. Tàng bàu aih wì do halê ka Haq. **25** Jò wì aih khoe loh dìq enh gùng, Chuaq Jesus thia carùp tì kon qyoh aih haq hi

yòng hangui. **26** Bìac kô, jàp cròng aih hìa đeh hra. **27** Chuaq Jesus loh enh aih, i baiq ngai ùh xau tiaq haq rai creo: Kon bùa Dawit! Ha-och ka ma diq. **28** Jò khoe mùt ta hním, wa aih trùh, Chuaq Jesus bòch wa haq: “Chôp lùi au jah broq am ka chôp trong chôp ma ngèh kô qmòh?” Wa aih padreo bàu: Joq ma lùi ìh broq jah. **29** Chuaq Jesus bèq mat wa aih rai doe: “Tiaq manoh chôp khoe lùi, chôp jah qmang aih.” **30** Mat wa haq jah xau hoq hlài. Chuaq Jesus yđc bàu panhet wa haq: “Ngan oq, chôp ùh dùh dôq cabô loq bìac kô!” **31** Mahaq, loh bu khoe enh hním, wa anoe yiniq Haq jàp jìa tagùng aih. **32** Jò qnang loh enh aih, wì aràng ka Chuaq Jesus moeq ngai làu i kiac oe ta chac haq. **33** Jò Chuaq Jesus khoe drùh qnoh kiac, mangai aih jah tapoch. Bìai phù cròng hamàih đeh hra wì ta anoe ka da bau: Qnhòq lah hnoq yiniq qmang kô tanòe Isorali. **34** Mahaq da mangai Pharsi doe: Haq qmat yđc cwìang enh cla craq kan kiac đòeq drùh kiac. **35** Chuaq Jesus lam rìm gùng, rìm plài, hnài roc hním tagop qyoh, anoe ka wì loq bàu lem diac Boc plinh, rai broq brêh bàc ngai yiniq, ùh hròc. **36** Jò Chuaq Jesus hnoq bài mangai bàc, ta manoh haq ha-och ka wì, majah qmang aih, wì nanxa, prah priang, tìah ka trùu ùh i ka mangai ban. **37** Haq doe ka bài mangai tiaq hòc rameh: Qmau kô bàc, mangai gat aih toq biaq, **38** Qmang aih, drah creo ka Cla craq qmau qnoh tam bình gat loh ta ruàng haq.

10 Chuaq Jesus creo ka moeq jàt baiq ngai tiaq hòc trùh ti cla haq, am ka wì cwìang drùh hnan kiac chòc jròng, rai broq brêh kan yiniq tòq, ùh hròc. **2** Kô hiniq moeq jàt bài ngai Tiaq cla: mangai baxèm aih Simôn, bèn loq xan creo

ka haq Phiero, xam Anrê (aih oh haq); Jaco kon Sêbêđê xam Jon oh haq, **3** Philip xam Bathêlêmi; Thôma, xam Mathio (mangai yōc thèq); Jaco kon Aphê, xam Thadê, **4** Simôn mangai Cana-an, xam Juđa Icariôt, mangai ma blòq Chuaq Jesus. **5** Aih raq, moeq jàt baiq ngai Tiaq cla, Chuaq Jesus thê wì loh lam rai tanap ka wì haq: “Apaq lam tanèo ùh xài mangai Juđa, ùh dùh mùt ta plài leq da mangai Samari. **6** Mahaq lam chaq bài kon trìu Isorsli ma khoe hnhung. **7** Jò lam ti trong pì anoe bàu kô: “Diac Plình trùh khoe haten”. **8** Broq brêh ka mangai ùh hrōc, broq ka mangai cachìt rìh hlài, broq ka magai bacùn jah brêh, drùh hnan kan kiac jròng. Pì khoe jah dech pì hadai am dech. **9** Ta caqnam pì ùh dùh catonh wê dèh ka wang, yac ka bac jèn hadai. **10** Lam ti trong ùh dùh wê ayôp, apaq racop baiq blah eo, yac ka jep hanoh qmang aih, apaq wê long ka nhra, majah qmang aih, yiniq da pì ma abroq khòh jah acaq. **11** Pì mùt gùng leq, plài leq pì ti chaq ngan mangai leq ma tajì ka đìh pì, khoe aih oe hñim wì haq trùh jò pì loh lam. **12** Jò pì mùt hñim leq, waiq kan catèm am ka hnem aih; **13** Tàng joq hñim aih tajì, kan catèm enh pì hi loh am ka wì haq, tàng joq ùh aih, kan catèm pì hlài ta cla pì. **14** Tàng mangai leq ùh đìh pì, ùh tamàng bàu pì, jò pì loh enh hñim aih, plài aih, drah hapùih blo ma top ta jèn pì. **15** Joq qnàng Au doe ka pì, trùh hì hadrah èh, gùng Sôđôm xam gùng Gômôro pòq kan hadrah yeo biaq ka wì aih. **16** “Au thê pì loh lam tìah ka trìu oe taqne calùh koq yiang. Qmang aih pì ep rabiaq qmang ka bìh, khun khauq tìah ka trù. **17** Pì ep hamang ngan oq, majah qmang aih èh wì rùp qnöh pì

tanòe hadrah, jêh pì roc hnim tagop qyoh, **18** Qnah hòm, taiq au kô èh wì majah rùp qnoh pì enh ngèa bài cwan bài bùa, đòeq pì yòng anoe enh ngèa ka wì haq hloe xam bài ùh xài mangai Juda. **19** Mahaq jò wì rùp pì, apaq lèt ka anoe qmang leq, anoe bàu cleq, gleq ma jah qmang aih, bàu leq ma troq ka anoe, trùh jò aih èh hi am ka pì. **20** Aih ùh xài cla pì pì capoch đeh ma joq qnàng aih Yiang Hadròeh Baq pì oe enh dalam ka pì capoch qnoh. **21** Daq rùp đèh oh, dôq wì jêh đac, baq rùp đèh kon dôq wì jêh đac, mangai kon yòng tablêq đèh ka miq baq, waq ka dìq baiq wa aih cachìt. **22** Jao yiniq au kô èh, dìq ka phù cròng majah tagit ka pì, mahaq mangai leq cajap manoh trùh lùch trùh gêh, mangai aih èh ma jah đèch. **23** Jò wì rùp pì ta plài kô, pì puplech lam ta plài qnoeq, joq qnàng au anoe ka pì, pì lam qnhòq jàp ka plài mangai Isorali, Kon mangai khoe trùh. **24** Mangai tiaq hốc ma lah yi ùh hnau ka mangai hnài, hapõng malah yi ùh hnau ka cla wì craq. **25** Mangai tiaq hốc jah dàng mangai hnài, hapõng jah dàng cla wì craq aih khoe wìa. Tàng joq wì khoe doe ka cla wì craq ta hnim aih Bênxêbun, loq ka mangai ta hnem. **26** Qmang aih, pì apaq yùq, ùh i cleq cadoç èh ma ùh ep paqnoh dõng, ùh i cleq bahlèp atìq èh ma ùh loq. **27** Aih ìq raq, bàu au anoe ka pì ta clam, drah anoe qnoh ta qngah, bàu pì tàng git ajang don, drah yòng ta kùa po hnim hu anoe qnoh. **28** Ùh dùh yùq đèh ka mangai jah jêh toq chac pì mahaq ùh jah jêh mahua yiang pì; ma khòh yùq aih Mangai jah broq hnhung xam mahua xam chac pì oe ta hwinh ùnh. (**Geenna g1067**) **29** Baiq toq chim prùch ùh xài wì hmaq tech moeq jèn bac raq

qmòh? Mahaq tàng joq ùh xài tiaq manoh Baq pì, qnhòq
lah i mòeq toq chim leq ma taclìh ta haqneq. **30** Xàc ta
gàu pì qmat hadai rènh khoe dìq. **31** Qmang aih, apaq yùq
cleq, pì yeo canaq ùh hnau ka chìm prùch. **32** Aih ìq raq,
cabô ràu trùh au enh ngèa ka phù cròng, au hanoh ràu
trùh haq enh ngèa ka Baq au oe ta plình; **33** Cabô hangah
đac au enh ngèa phù cròng, au hadai hangah đac haq enh
ngèa ka Baq au oe ta plình. **34** Apaq xoh au trùh đòeq
aràng kan catèm ta cròng taneh, au trùh ùh xài đòeq
aràng kan catèm, mahaq aràng chang aràng jaoq. **35** Au
trùh đòeq lah kon calô khoe ka baq haq, lah kon cadrì
khoe ka miq haq, lah kon mai khoe ka yaq haq; **36** qmang
aih, mangai oe ta hnim pì raq, ma tablêq hlài ka pì. **37**
Cabô loq waq dèh ka miq baq ùh hnau ka au, mangai aih
ùh tajì đòeq hu tiaq au, cabô loq waq dèh ka kon calô kon
cadrì ùh hnau ka au, mangai aih hadai ùh tajì ka tiaq au,
38 Cabô ùh xùi dèh long pagat đòeq tiaq au, mangai aih
hanoh ùh tajì ka tiaq au. **39** Cabô àu wèq dèh toq kan
rìh dèh cla, haq aih èh jah hnhung, mahaq cabô chìuq
cadac dèh kan rìh đòeq hu tiaq au, aih èh jah chaq hnoq
hlài dèh. **40** Cabô đìh pì, haq aih đìh au, cabô đìh au, haq
aih đìh Mangai ma khoe thê au. **41** Cabô đìh mòeq ngai
pajàu taiq mangai aih broq pajàu, haq aih jah kan baha da
mangai pajàu, cabô đìh mòeq ngai taq atoq, taiq mangai
taq atoq, aih èh haq aih jah kan baha ka mangai ta atoq.
42 Cabô chìuq am ka mòeq ngai kon qyoh taqne bài kon
qyoh kô, ôq moeq chròng diac hangeo, taiq mangai qyoh
aih broq mangai tiaq hốc au, joq qnàng au doe ka pì, kan
baha da haq aih èh ùh jò leq hnhung.

11 Khoe ka hnài dèh mòeq jàt baiq ngai tiaq hōc, Chuaq Jesus loh enh aih, lam hnài roc plài oe gùng Galili. **2** Jò Jon oe ta hnem tù, tàng wì anoe bài yiniq Chuaq Jesus Christ ma broq, haq thê dèh mangai tiaq hōc haq trùh ti Chuaq Jesus, **3** wì bòch: ìh kô raq ùh xài Mangai ma hu trùh tacô, nhèn ahìaq oe raq ep gòm mangai qnoeq ùh? **4** Chuaq Jesus padreo bàu: “Drah hlài beq, taqmon hlài ka Jon loq rìm yiniq pì ma khoe tàng, khoe hnoq: **5** Mangai ùh xau jah hnoq, mangai liap jah lam, mangai bacùn jah hreо, mangai clìc don jah tàng, mangai cachìt jah rìh hlài, mangai nanxa jah tamàng bàu lem. **6** Xôq ramot am ka mangai leq ùh hìaq catoeh ka au. **7** Jò wì aih khoe hlài, Chuaq Jesus men anoe trùh Jon dôq wì phù cròng ma tiaq haq loq: “Pì khoe lam ngan cleq tanòe hawit? Ajoq pì lam ngan long triang niaq cayeo hlui ùh xài? **8** Pì lam ngan cleq hòm? Pì lam ngan mangai caxùnh atàc eo lem ùh xài? Hatau! wì mangai ma caxùnh eo ranhòm oe ta hnìm bùa. **9** Pì lam ngan cleq hòm? Ajoq lam ngan mangai tapoch pajàu ùh xài? Joq, au doe ka pì, ùh hnau ka tapoch pajàu hòm. **10** Aih raq mangai ma khoe i bàu achìh trùh haq: “Au thê dèh mangai lam adroe ka Kon, Đòeq chônh taqmroq trong Kon lam.” **11** Joq qnàng au doe ka pì, dìq dōng taqne bài mangai huang loh enh gucadri, ùh i cabô yeo haq nhèq ùh hnau ka Jon Baptit, mahaq yac ka mangai dìq jaq hamoq oe tanòe diac plình, dua yeo haq nhèq ùh hnau ka haq. **12** Mahaq, patep enh hì da Jon Baptit trùh manòeq, diac plình glàm kan khech tát, mangai khech tát aih blah yōc diac plình. **13** Majah qmang aih, dìq dōng ka bài bàu

pajàu hloe xam hset ranenh ma khoe achìh trùh pang qnhòng da Jon raq. **14** Tàng pì enh waq ka loq, haq aih raq Êli, mangai ma ep trùh. **15** Cabô i don đòeq tamàng, tamàng beq!” **16** Au alìah nang noe kô ti cabô kô èh? Nang noe kô bu dàng kon qyoh ha qngui tanèo atech, creo dèh ka bua, **17** rameh: “Au khoe hlui taliaq ka pì, gleq pì ùh ti yòng cađoeq? Au khoe ti atoch, gleq pì ùh crò hmoe.” **18** Jon trùh ùh acaq, ùh ôq, pì doe: Kiac khoe caqnit don haq. **19** Kon mangai trùh, haq acaq, haq ôq, aih pì doe: Meh mangai plai toq ka acaq ôq, taqmùt toq ka mangai yōc thèq xam bài mangai ùh wìa. Mahaq, kan rabiaq ma joq qnàng aih jah hnoq ajang nòe yiniq broq **20** Taiq bài wì ma oe tanèo plài gùng Chuaq Jesus khoe broq bàc trong halac, ùh lòm raxach, Chuaq Jesus tapoch ka wì gùng aih: **21** “Habo ka pì, plài Côrasin, habo ka pì plài Betsaïda. Tàng joq bài kan halac khoe broq ta pì qmat aràng broq gùng Tyro, gùng Siđôn, baiq plài aih khoe yōc eo briang đòeq taqmàn rađeh, kui blo tanùh, raxach nèh haq raq. **22** Aih au doe ka pì, trùh hì hadrah, gùng Tyro, gùng Siđôn pòq kan hadrah yi biaq ka pì. **23** Gè kô èh, Cabênaum, gùng ma khoe jah atōc haq nhèq trùh ta plinh, kô èh jah caqnìh cađac trùh ta hwinh. Tàng joq bài kan halac ma khoe broq qne gè, aràng broq ka gùng Sôđôm, gùng aih oe raq trùh manòeq. (*Hadës g86*) **24** Mahaq au doe trùh hì hadrah èh, gùng Sôđôm èh jah hadrah yeo biaq ka gè. **25** Jò aih raq, Chuaq Jesus doe: “Baq! ìh broq Craq oe taplinh crõng taneh, au manèh apôi ìh, majah qmang aih ìh khoe cadoc bài yiniq kô ka bài mangai rabiaq, mangai loq, mahaq ìh patô am ka kon

qyoh jah loq. **26** Baq ôi, joq qmang aih raq, majah qmang aih ìh khoe hnoq bìac aih lem. **27** Rìm yiniq Baq khoe jao dǒng ka au, enh gùng ka Baq ùh i mangai leq canau ka Kon, enh gùng ka Kon ùh i mangai leq loq ka Baq. **28** Dìq dǒng ka mangai tagah lep, pòq trap, drah trùh ta au beq, au jah am ka pì padài. **29** Au i manoh khun alàng loq hamuan rađeh, drah taqmac wê long ech au, hōc tiaq au, aih èh mahua yiang pì jah padài. **30** Majah qmang aih long ech da au kô hlàu, tanòng da au kô hèu.

12 Jò aih, wop hì sabat, Jesus pùh pagat đùng ruàng, bài mangai tiaq hōc pangot wì haq git kaq hadròc qmau. **2** Mangai Pharisi hnoq qmang aih, wì lam doe ka Chuaq Jesus: Ngan meh, bài mangai tiaq hōc ìh, broq trong ùh lòh ta hì Sabat. **3** Mahaq Chuaq Jeus padreo bàu ka wì aih: “Ha bùa Đawit xam mangai lam tiaq haq khoe broq jò wì haq pangot, pì qnhòq hmaq đōc qmòh? **4** Aih ìq, bùa mùt ta hním Boc Plinh, yōc acaq bênh dèch ka Boc Plinh, bênh aih bùa xam mangai lam tiaq haq ùh khòh kaq, bênh aih đòeq toq ka bài pajàu. **5** Hìaq pì ùh i ngan ta hset ranenh, trùh hì sabat, bài pajàu oe ta hním kùh waiq, broq ùh troq tiaq ranenh hì aih aleq i tuiq cleq? **6** Au doe ka pì, ajang kô i moeq ngai yeo kàn ùh hnau ka hnem kùh waiq. **7** Tàng pì loq bàu kô anoe cleq: “Au tangèh ka manoh loq waq, ùh i ngèh trùh ramènh tadreo, qmang aih pì khoe ùh hìaq capoch habo đac ka bài mangai ùh i đeh yiniq lui cleq. **8** Majah qmang aih Kon mangai aih craq hì sabat”. **9** Lam khoe ka aih, Chuaq Jesus mùt tanòe hním tagop qyoh. **10** Ta aih i mòeq ngai, angwenh mòeq pah tì. I mangai bòch Chuaq Jesus: Hì Sabat akhòh broq

brêh ka mangai yinìq ùh? Majoq qnàng aih wì qnang chaq nen đòeq hu tah hadrah ka haq. **11** Chuaq Jesus tapoch ka wì: “Taqne pì qmat i ka mangai leq i mòeq toq kon triù, tàng hì Sabat haq taclìh ta ralōc, pì ma ùh dèch atōc haq? **12** Mangai ma ùh yeo kàn ùh hnau ka triù! Qmang aih hì sabat khòh broq trong lem. **13** Khoe aih, Chuaq Jesus doe ka mangai ngwenh tì: “Hnhu tì qmat” Haq aih qnhu dèh tì, tajòe qmòe tì pah kô lem hlài tiah ka tì pah tau. **14** Bài mangai Pharisi loh enh gùng, hatinh ka dabau chaq trong hu jêh cađac Jesus. **15** Chuaq Jesus loq qmang aih, haq lam đac taqnoeq, i bac ngai tiaq haq, haq broq dìq döng ka wì jah brêh. **16** Chuaq Jesus ùh lòh wì anoe am ka cabô loq ka haq. **17** Dôq xìt qmang ka bàu pajàu Êsai khoe anoe: **18** “Kô, hapõng Au ma khoe raih, Mangai Au ma dìq jaq loq waq, lem manoh au rìm trong. Au am Yiang Hadròeh au oe ti haq, Haq aih èh ma anoe qnoh bàu taq atoq am ka rìm diac. **19** Haq ùh tarahen, ùh dêh bàu, Ùh i cabô tàng bàu haq oe ti trong **20** Haq ùh plêh đac triang niaq khoe tagoh, ùh hlui đac đen khoe ten pat. Trùh jò Haq broq ka kan taq atoq jah blêq. **21** Rìm diac tangèh dìq anòe yiniq Haq.” **22** Jò aih i mangai aràng ka Chuaq Jesus mòeq ngai kiac caqnit don, ùh xau hnoq rai làu, Chuaq Jesus broq brêh ka haq aih loh ka jah tapoch jah hnoq. **23** Wì hamàih đeh hra, wì bòch dabau: Haq qmat ajoq kon xau bùa Đawit? **24** Mahaq bài mangai Pharisi hìa qmang aih wì doe: Haq qmat canòm ka Bênsêbun craq kan kiac đòeq drùh kiac. **25** Chuaq Jesus loq ka manoh wì, haq doe: “Moeq diac tàng joq cla haq hit lah rađeh, diac aih èh ùh khoe ka

raliang, mòeq plài, mòeq hnim tàng hit lah dabau aih èh pi oe dràng yòng. **26** Tàng joq Satan hnan Satan, aih ajoq haq hit lah dađeh, aih èh diac haq yòng qmang leq ma oe keo? **27** Tàng au canòm ka Bênsêbun đòeq hnan kan kiac, ha wì kon pì qmat èh canòm ka cabô đòeq drùh hnan kan kiac? Qmang aih, wì haq aih èh ma broq mangai hu hadrah bài pì. **28** Tàng joq au canòm ka Yiang Hadròeh enh Boc Plình đòeq drùh hnan kan kiac, aih diac Plình khoe trùh ta pì. **29** Qnah hòm, i ka cabô jah mùt ta hnim mangai dêh padren hu tablah yốc da haq aih kùng hang, ma baxèm aih ùh kàt cla haq adroe oèq? Ep kàt cla haq adroe khoe èh men jah blah yốc hang ta hnim haq. **30** Cabô ùh oe ti au, haq aih mangai tablêq ka au, cabô ùh taqmùt ti au, wì aih prah priang döng. **31** Qmang aih au doe ka pì, rìm yiniq lui pì xam bàu tapoch qmèq ka Boc plình, dìq döng èh oe jah paclaih, mahaq bàu tapoch troq trùh Yiang Hadròeh ùh jò leq jah paclaih. **32** Tàng cabô capoch tablêq ka Kon mangai, èh oe jah paclaih, mahaq cabô tapoch bàu tablêq Yiang Hadròeh, yac ka qnhòng kô trùh qnhòng atìq èh yiniq lui aih dua ùh jah caqnaih.

(aiōn g165) **33** Long lem èh loh plì lem, long qmèq plì hadai qmèq, ngan plì ma loq ka long. **34** Wùih! Bài adrech bìh plöng meh, pì qmat nang noe qmèq, broq qmang leq ma hloh bàu lem? Ta cliac khoe bình, men hloh bàu tapoch a hacùng. **35** Mangai lem ta dalam haq bình kan lem men jah tapoch hloh bàu lem, mangai dù ta haq bình kan dù majah tapoch hloh bàu dù. **36** Au doe ka pì, trùh ta hì hadrah, rìm ngai ep anoe qnoh döng dèh bàu rađeh ma khoe tapoch. **37** Majah qmang aih, ajang nòe bàu capoch

aih raq, ma hi jah creo ka ìh mangai taq atoq, hadai ajang
bàu tapoch aih raq ìh ep pòq kan baxa. **38** Khoe aih i
bài mangai hnài ranenh xam bài mangai Pharisi doe ka
Chuaq Jesus: Mangai hnài, nhèn enh hnoq ìh broq trong
halac. **39** Chuaq Jesus padreo bàu: “bài caxi noe dù, loq
tango kô, bòch ngan kan halac, ùh i kan halac leq am
ka pì hnoq enh gùng ka kan halac troeq pajàu Jôna. **40**
Majah qmang aih Jôna khoe oe ta cliac ka kàn piq hì piq
mang, hanoh qmang aih èh, Kon mangai hadai piq hì piq
mang oe ta taneh. **41** Trùh hì hadrah, wì ma oe ta Ninive
aih èh ma yòng hu hadrah ka caxi noe kô, ma jah qmang
aih wì haq tàng bàu pajàu Jôna hnài aih wì khoe raxach,
mahaq ajang nòe kô, i mòeq ngai yeo haqnhèq ùh hnau
ka Jôna! **42** Trùh hì hadarah, bùa Cadrì enh bè mahì tòc
èh ma yòng hu hadrah ka nang noe kô, majah qmang aih
bùa aih khoe trùh enh nòe hangai đòeq hu tamàng bàu
rabiaq enh nòe bùa Salômôn, mahaq anòe kô i mòeq ngai
yeo haqnhèq ùh hnau ka bùa Salômôn! **43** Jò kan kiac
khoe loh enh moeq ngai, haq lam tanèe croh crênh chaq
nòe padài, mahaq chaq ùh jah, **44** èh haq hi doe: Au wìh
hlài ta hnìm au ma neo loh, jò haq hlài, hnoq hnem dech
do, khwit khoe lem, khoe palauq qmòe ka alàng. **45** Haq
lam hèm, ahlài tam tapèh toq kiac qnoeq yeo dù ùh hnau
ka haq, hlài oe pajùm ta hnìm aih, mangai aih atìq èh yeo
hamoq ùh hnau ka adroe hèm. Bài caxi noe dù kô qmang
aih èh diq. **46** Jò Chuaq Jesus oe raq tapoch ka bài wì, miq
haq xam bài oh haq yòng enh gùng, enh capoch ka haq,
47 I mangai trùh doe ka Chuaq Jesus: Miq ìh xam bài oh
ìh yòng enh gùng, enh tapoch ka ìh **48** Haq padreo bàu:

“Cabô miq au, cabô oh au?” **49** Haq patô dèh bài mangai tiaq hōc rai doe: “Hacô miq au xam bài oh daq au!” **50** Majah qmang aih, mangai leq broq tiaq manoh Baq au oe ta plinh, aih raq oh daq calô, oh daq cadrì xam miq au.

13 Hadai hì aih, Chuaq Jesus loh enh hñim lam hangui ta kññh diac raxìq, **2** Wì phù cròng tagop ti dabau haraya dudan ka Haq, Chuaq Jesus ep loh hangui ta boang, dìq ka wì qnoeq oe ta go. **3** Chuaq Jesus yōc báç trong alìah hu hnài wì, Haq doe: “I moeq ngai lam rai adrech. **4** Jò haq rai adrech, i qnah ta clìh ti trong lam, chìm loh jôh dōng. **5** Moeq qnah taclìh tanòe raga, taneh toq biaq, catùh ùh jrùq, rênh plôh. **6** Mahaq jò mat mahì yòng sreo, ùh i ka riah hi loh ka croh. **7** Mòeq qnah taclìh nòe xèm yila, yila rai èh ray cràm bahlac haq jôq ta aih. **8** Mòeq qnah qnoeq hòm, clìh troq tanòe taneh lem, hi loh plì, mòeq pliang loh jah moeq hrinh, mòeq pliang jah tadràu jàt, mòeq jah piq jàt. **9** Cabô i don, tamàng beq! **10** Mangai tiaq hōc, thia ka haten bòch Chuaq Jesus: Gleq ìh ma jah yōc bàu alìah qmang aih dòeq tapoch ka wì? **11** Chuaq Jesus padreo bàu: “Majah qmang aih kan hlèp da diac plinh khoe am ka pì loq, mahaq bài wì tau aih ùh dôq ka wì haq loq.” **12** Majah qmang aih mangai leq ma khoe i aih jah am tam, aih èh wì hi i rah ùh dìq ùh dài, mahaq mangai leq ma ùh i, aih èh doeh yōc hloe yiniq haq ma khoe i. **13** Aih ìq au ma jah toq alìah ka wì haq, yac ka wì haq ngan dua ùh xau hnoq, hadràng don mahaq ùh tàng, tamàng mahaq ùh qnì cleq. **14** Qmang aih khoe xít ka bàu pajàu Êsai jò haq ràu trùh wì qmat: Pì hadràng don tamàng, mahaq ùh qnì cleq; Haqmiang

ngan mahaq ùh xau hnoq. **15** Majah qmang aih, manoh wì haq khoe cadoq; Don wì haq khoe trap, mat wì haq khoe tajip, Yùq dèh mat loq xau hnoq, don rađeh loq jah tàng, Manoh da đeh loq jah loq, rađeh loq wìh hlài, Èh au loq broq wì haq jah brêh qmòh. **16** Mahaq xôq ramot am ka bài pì mat jah hnoq, xôq ramot am bài pì, don ma jah tàng. **17** Joq qnàng au doe ka pì, i bàc mangai pajàu, bàc ngai taq atoq khoe ngèh ka jah hnoq trong pì hnoq, mahaq ùh jah hnoq, ngèh ka jah tàng trong pì ma jah tàng, mahaq ùh jah. **18** Pì tamàng bàu alìah mangai lam rai adrech aih anoe cleq. **19** Jò mangai leq tàng bàu lem diac plình, mahaq ùh lòm qnì qmòe cleq, aih kiac dù trùh ta qmiaq yōc yiniq ma khoe jah rai ta manoh haq, aih la mangai majah adrech clìh ti trong lam. **20** Mangai jah adrech clìh nòe taneh raga aih mangai bu tàng bàu, khoe lem bùi drah yōc huiq. **21** Mahaq ta manoh ùh i ka riah, rìh moeq hyàc raq, trùh jò glàm nanxa, khech tát, hi tacro. **22** Mangai jah adrech clìh nòe xèm yila, aih mangai tàng bàu, mahaq manoh hèm toq ka qnhòng kô, ònh toq trong padrōng kan, broq ka bàu aih ùh plôh ramot, hi loh ka ùh sròc. **(aiōn g165)** **23** Mahaq, mangai ma jah adrech clìh tanòe taneh lem, aih mangai loq tàng, haq aih jah loh plì, moeq pliang jah qmòe moeq hrinh, pliang qnoeq jah tadràu jàt, ma qnoeq jah piq jàt. **24** Chuaq Jesus alìah trong qnoeq hòm ka wì haq: “Diac plình tìah ka mangai yōc adrech lem loh rai dèh ta ruàng. **25** Mahaq jò dìq ka wì oe raq kùi, mangai tagit ka haq loh rai adrech nhat adròngh ta qmau aih, khoe aih hi lam đac. **26** Trùh jò qmau aih yòng kàn, loh hadròc, adròngh hadai ploah loh diq.”

27 Bài mangai patìh lam anoe ka wì craq ruàng aih: Wì craq, ma ùh xài ìh rai toq adrech lem ta ruàng ìh qmòh? ha nhat adrònhanh qmat loh enh leq? **28** Wì craq padreo bàu: Aih mangai tagit ka au ma broq. Bài hapõng doe: ìh alòh bài nhèn loh bùiq nhat aih loq ùh? **29** Wì craq padreo bàu: Hêq ùh dùh, yùq jò bùiq pì loq troq bùiq ataq qmau. **30** Dôq haq dìq baiq wa yòng hloe trùh jò gat, trùh jò gat i au tanap ka bài bình gat qmau rameh: “Adroe aih, pì bùiq nhat adrònhanh ðeq, cadop tang cadop hu bùh đac, qmau aih pì don ðòeq da au ta hapom”. **31** Chuaq Jesus yõc trong qnoeq hòm hu alìah tam ka wì: “Diac plình tìah adrech habài wì ma rai ta ruàng. **32** Adrech joq yi yêq dõng ka bài adrech qnoeq, mahaq jò hi jah honh, haq yeo kàn ka bài cachiq qnoeq, wìa qmòe long, jaq chìm mech lam broq pù ta hamenh haq”. **33** Chuaq Jesus patìah hòm ka wì: “Diac plình tìah ka blo alac, mangai cadrì ma yõc tah ta piq cađap dàc, hi trùh dèh jò dàc aih hi rieu dõng.” **34** Chuaq Jesus capoch ka wì phù cròng ma tiaq Haq toq xam bàu alìah, ùh i tapoch cleq haq ma ùh alìah ka wì. **35** Waq ka xít troeq bàu pajàu ma khoe anoe: “Au dahah bàu ðòeq tapoch alìah. Au hu paqnoh bài kan hlèp, patep enh jò broq plình cròng taneh.” **36** Jò khoe am wì hlài, Chuaq Jesus wìh mùt ta hním, bài mangai tiaq hõc trùh ka haten bòch haq: ìh anoe am ka nhèn loq bàu ìh ma alìah adrech nhat adrònhanh oe ta ruàng aih qmang leq. **37** Jesus padreo bàu: “Mangai rai adrech lem aih Kon mangai. **38** Ruàng aih cròng taneh kô, adrech lem aih kon diac plình, nhat adrònhanh aih kon kiac dù, **39** mangai tagit rai adrech nhat, aih kan kiac dù, hì gat qmau aih

hì pulùch da crõng taneh kô, bình gat qmau aih bình plình. (aiōn g165) 40 Tìah ka wì bùiq nhat adròn hình bùh ta ùnh qmang leq, hì crõng taneh kô dìq lùch qmang aih èh diq. (aiōn g165) 41 Kon mangai hi thê dèh bình plình hacom qnoh dõng bài mangai ma broq dua qmèq xam mangai broq dù loh khoe ka diac Haq. 42 Khwênh caqnìh wì aih tanèo hlõng ùnh, ta aih èh i toq kan crò hmoe rai cadrit hanenh. 43 Jò aih, bài mangai taq atoq ca-ah tìah ka qngah mahì oe tanèo diac Baq wì haq. Cabô i don, drah tamàng. 44 Diac plình tìah ka hang canaq catùh đòeq ta ruàng, i moeq ngai chaq hnoq, haq hi cadoc đòeq rai hlài rai lem bùi, tech dìq dõng dèh kùng hang, đòeq hu rot ruàng aih. 45 Diac plình hadai tìah ka mangai lam padro, chaq ngõc canaq. 46 Jò chaq khoe hnoq ngõc canaq, haq tech dõng dèh kùng hang đòeq rot pliang ngõc aih. 47 Diac plình hanoh tìah ka hlàm ma tang ta hlõng, hlech rìm yiniq ka. 48 Jò khoe bình ka tanang hlàm, mangai tang hi dèch hlàm atõc tago, khoe aih hangui ràih ma lem đòeq crài, èh tah ta tabõng, mahaq khwênh cađac dõng bài ma ùh wìa. 49 Trùh hì crõng taneh kô lùch, hanoh qmang aih diq: Jò aih, bài bình plình trùh đòeq lah bài mangai dù loh khoe ka mangai taq toq. (aiōn g165) 50 Khwênh caqnìh bài mangai broq dù ta tanùh ùnh, oe nòe aih i kan hmoe rai cadrit hanenh. 51 Pì atem bài bàu aih? Bài mangai tiaq hõc doe: Nhèn loq tàng. 52 Chuaq Jesus hi doe: “Dài qmang aih rìm ngai hnài ranenh, jò wì haq khoe hõc loq rìm trong tanèo diac plình, hi tìah ka wì craq hnìm qnoh dõng dèh bài hang neo xam hang dùnh loh enh gùng ka hapom. 53 Jò Chuaq Jesus khoe hêq ka

capoch ɓài bàu alìah aih, haq hi lam taqnoeq. **54** Haq hlài dèh gùng cla, mùt hnài tanòe hním tagop qyoh, wì hamàih đeh hra ka bàu haq, wì bòch dabau: Mangai qmat haq jah enh leq ɓài kan rabiaq xam kan halac qmang meh? **55** Haq qmat ma ùh xài kon mangai thòq broq long chàm qmòh? Miq haq ajoq Mari? Ɓài oh daq haq ajoq Jaco, Jôsep, Simôn, Jiu đe? **56** Ɓài oh cadri haq ma ùh joq oe taqne bèn kô? Enh leq haq majah ɓài yiniq qmang meh? **57** wì aih hi catoeh ka haq. Mahaq Chuaq Jesus doe ka wì: “Toq gùng cla, hnem cla raq ma hnoq mangai pajàu ùh loh cleq.” **58** Ta aih Chuaq Jesus ùh broq bàc kan halac, ma jah qmang aih ta aih wì ùh i ka manoh lùi.

14 Jò aih Hêrot (aih bùa yi enh qneq), hìa bàu wì anoe trùh Chuaq Jesus. **2** Haq doe dèh ka ɓài mangai ma tiaq ka jènh ka tì ti haq: Kô raq Jon Baptit, mangai cachìt rìh hlài men jah broq trong halac qmang aih. **3** Aih ìq rameh: Taiq Hérôdia, aih mai da Philip, oh cla haq, dài Hérôt majah rùp clêh Jon Baptit. **4** Majah qmang aih, Jon i tagàih ka bùa rameh: Bùa ùh jah yōc mangai cadri qmat broq mai. **5** Bùa enh jêh đac Jon, mahaq haq ùh hùa ka wì phù cròng, majah qmang aih phù cròng đìq doe Jon aih mangai pajàu kàn. **6** Wop hì acaq yiniang manè hì hauang ka bùa Hérôt, kon cadri da Hérôdia muaq taqne ɓài mangai trùh acaq yiniang, đìq jaq troq ka manoh bùa. **7** Jaq bùa mech chìuq hapah jò ma tèu bàu am ka kon cadri aih, waq toq kon mangai aih bòch cleq dua haq am. **8** Jao miq haq patùt, kon cadri aih hi bòch bùa: lìh yōc gàu Jon Baptit tah ta dòt kàn hu am ka au. **9** Bùa mangò ta manoh, yàng haq khoe troq hapah, qnah hòm i ɓài

mangai ma hangui acaq yiniang oe ta aih, bùa hi dôq kon
cadri aih jah troeq bàu haq bòch. **10** Bùa hi thê wì lam
jêh Jon tanòe hnim clêh. **11** Khoe aih wì yōc gàu haq tah
ta dòt kàn qnoh am ka kon cadri aih, haq aih hi aràng
dèh ka miq. **12** Atìq ka aih, mangai tiaq hōc Jon, lam yōc
hanang haq ahlài catùh. **13** Chuaq Jesus hìa qmang aih,
haq tōc ta boang wia taqnoeq, haq lam tanòe ma hawit.
Yàng jò wì phù cròng ma hi loq, wì loh enh bac plài, wì
lam jènh hu tiaq Haq. **14** Chuaq Jesus bu tōc enh boang,
hnoq bài mangai bac haraya harayùc, manoh haq tamèt
ka wì, haq broq brêh ka wì ma yinìq. **15** Trùh jò mat mahì
khoaq haqneq, bài mangai tiaq hōc, thia doe ka Haq: Tanòe
kô hawit, èh trōc hadai khoe ten clam, ìh am wì hlài beq,
dôq wì müt roc plài chaq rot dahwèq acaq. **16** Chuaq
Jesus doe: “Wì ùh i ep lam, pì qmat raq mangai ma ep am
ka wì acaq. **17** Mangai tiaq hōc doe: Tacô nhèn i padam
toq bênh xam baiq pliang ka raq. **18** Chuaq Jesus doe
“Aràng ka au tacô. **19** Chuaq Jesus thê wì hangui ta nhat,
khoaq aih, yōc padam toq bênh xam baiq pliang ka, Haq
qngoc ta plinh rai manè apôi, khoe èh goh bênh aih am
ka bài mangai tiaq hōc, mangai tiaq hōc ti aràng ka bài
wì. **20** Mangai leq mangai meh panac đeh hra, rah bênh ti
toch hlài bình jah moeq jàt baiq talênh. **21** Wì ma acaq ta
aih jah qnah ta padam muàn mangai, ùh rènh wì gucadri
xam kon qyoh. **22** Khoaq aih Chuaq Jesus drah bahôiq bài
mangai tiaq hōc loh ta boang chônh tōc pah tau, jò aih
haq oe tago hu ti am wì mangai bac hlài ta hnem. **23** Atìq
ka haq khoe am wì hlài, haq tōc ta wang moeq ngai đòeq
hu waiq khàn. **24** Jò aih, boang loh khoe trùh taqne diac

raxìq, glàm cayeo tát qngìa, i diac lai laq tep ta boang. **25**
Mahaq trùh jò pôn ta mang aih, Chuaq Jesus lam jènh ti
riang diac đòeq trùh ti bài mangai tiaq hốc. **26** Jò wì hnoq
haq lam ti riang diac, bài mangai tiaq hốc yùq crè wì doe:
Tau raq kiac chốc, khoe aih wì yùq pi cajaq wì breo wênh
dênh. **27** Mahaq Chuaq Jesus drah creo ka wì haq: “Pì
catèm beq hacô au, apaq yùq!” **28** Phiero doe: Craq au!
tàng joq ìh, ìh dôq au jah lam ti riang diac hu trùh ta ìh.
29 Chuaq Jesus doe: “Lam ta kô” Phiero cadiang loh enh
boang, lam ti riang diac đòeq thia ta Chuaq Jesus. **30** Yàng
jò haq hnoq cayeo hlui, haq loh yùq crè, haq hi hlòp ta
diac, haq drah breo cadêh: Craq au, dèch au diq. **31** Tajòe
qmòe Chuaq Jesus hnhu tì cadop tì haq, rai doe: “Wùih!
mangai biaq hrình manoh lùi, hagleq ìh ma toq ùh tùt
qmang qmat.” **32** Jò Chuaq Jesus xam Phiero khoe tőc ta
boang, cayeo hi hatinh. **33** Bài wì ma oe ta boang trùh
kùn cràng enh ngèa ka Chuaq Jesus rai doe: ìh kô joq
qnàng Kon calô Boc plình. **34** Jò khoe catech pah tau diac,
Chuaq Jesus xam mangai tiaq hốc lam ta gùng Génêsaret.
35 Wì gùng aih canau ka haq, drah thê mangai lam bahìa
jàp jìa ka bài gùng du danh ta aih, wì tòng qnàng bài
mangai yinìq trùh ka haq. **36** Rai bòch Chuaq Jesus am ka
bài mangai yinìq jah bèq đeh toq haqmai eo haq, qmang
aih waq toq cabô hi bèq eo haq, hi jah brêh döng.

15 Khoe aih, i bài mangai Pharisi xam bài mangai hnài
ranenh trùh enh Jérusalem hu bòch Chuaq Jesus **2** Hagleq
bài mangai tiaq hốc ìh ùh wèq bàu wì craq dùnh nèh, wì
haq ùh qnheo tì adroe ka acaq. **3** Chuaq Jesus padreo bàu:
“Ha pì, hagleq pì majah tiaq đèh bàu qmon loh qmòe ka

cadac ranenh Boc Plình? **4** Majah qmang aih Boc Plình i thê rameh: “Thê loq iu miq baq pì, èh bàu kô hòm: Mangai leq hnap dèh ka miq baq, haq aih ep cachìt. **5** Yàng da pì aih doe: Cabô doe dèh ka miq baq rameh: Dìq dǒng bài yiniq cleq au jah patìh ka miq baq, au khoe dèch dǒng ka Boc Plình, haq aih pi hìaq ep iu deh miq baq hòm. **6** Qmang aih, pì tiaq dèh bàu cla qmon mahaq cadac bàu Boc Plình. **7** Pì qmat joq mangai toq ti patìah! Ésai tapoch pajàu khoe troq jò haq ràu trùh pì rameh: **8** “Wì kô yōc toq hacùng bàu kùh waiq au; Yàng manoh cliac wì haq hangai ka au raya, **9** Bìac wì kùh waiq Au aih qngwan, Majah qmang aih wì haq hnài tiaq toq ranenh loh enh kon mangai.” **10** Khoe aih Chuaq Jesus creo ka bài wì mangai bàc ta aih, haq doe: “Thê pì tamàng rai loq tàng. **11** Ùh xài yiniq cleq mùt ta hacùng ma broq ka pì loh ka amùa, mahaq yiniq cleq loh enh bàu pì aih ma broq ka pì loh ka amùa”! **12** Bài mangai tiaq hốc thia haten ka Jesus wì bòch: ìh aloq bài mangai Pharsi tàng bàu ìh wì haq nòeh ka ìh. **13** Chuaq Jesus padreo bàu: Long leq Baq ta plình ma ùh i pìt, ep bùiq cadac **14** Dôq haq: Aih raq bài mangai ùh xau broq mangai qnung trong, tàng joq mangai ùh xau qnung mangai ùh xau, dìq baiq ka wa cìh ta ralõc. **15** Phiero hi doe: ìh anoe am ka nhèn loq đeh bàu alìah aih diq. **16** Chuaq Jesus bòch: “Pì ùh tem bàu aih qmòh? **17** Pì qnhòq qnì cleq ma mùt ta hacùng aih èh haq hi loh hloe tacliac, khoe aih ma ùh xài lam cadac tanòe hlèp qmòh? **18** Yàng bài yiniq cleq ma loh enh hacùng, aih dìq loh enh manoh cliac, bài yiniq aih ma broq ka pì loh ka amùa. **19** Majah qmang aih enh manoh

cliac ma loh bài kan dù, jêh đac mangai, tanqnong, loq tango, atùng, tapoch qmùt, tapoch hwang. **20** Bài yiniq aih ma broq amùa ka pì, mahaq acaq ùh i qnheo tì ùh i broq ka pì amùa. **21** Loh enh aih Chuaq Jesus mùt ta gùng Tyro xam gùng Sidôn, **22** I mòeq ngai gucadri Canaan oe gùng aih trùh ta Chuaq Jesus, haq creo ka Chuaq Jesus: Wì Craq! Kon bùa Đavit, ha-och ka au diq, kon cadrì au kiac pawè yôt haq, joq hamoq đeh hrình. **23** Mahaq Chuaq Jesus ùh tapoch moeq nà bàu. Mangai tiaq hốc lam haten, cali calo ka Chuaq Jesus: Ìh thê döng haq qmat hlài beq, ngan haq toq creo dang enh rù ka bèn meh! **24** Chuaq Jesus padeo bàu: “Au ma jah trùh tacô, aih đòeq hu chaq toq bài kon trùi Isorali ma khoe lam hwang.” **25** Mahaq mangai gucadri aih thia qmòe ka haten, kùh waiq Chuaq Jesus, haq doe: Wì Craq, ha-och ka au diq. **26** Chuaq Jesus padreo bàu: Ùh dùh yốc bênh kon acaq đòeq caqnìh ka koq. **27** Mangai gucadri aih doe: Joq qmang aih Wì craq, mahaq bài kon koq ti kaq đeh bài hanech bênh ma taclìh enh pra wì craq. **28** Chuaq Jesus hi doe: “Mangai gucadri meh! Ìh i manoh lùi kèn, yiniq aih èh ep loh tiah ka manoh ìh ma enh.” Wop jò aih raq kon cadrì haq jah brêh. **29** Enh aih Chuaq Jesus lam tiaq haqmai diac raxiq Galili, èh Haq hi tòc hangui tawang, **30** Jò aih i mangai pi ka jaq trùh ti haq, qnung bài mangai cwê, lua mat, lìu, mangai ngwênh xam bac ngai yinìq, đòeq wì aih ti jènh Chuaq Jesus. Chuaq Jesus broq ka wì aih jah brêh đìq döng. **31** Aih, wì hnoq mangai lìu hlöh tapoch, bài mangai ngwênh jah brêh, mangai liap jah cadiang lam, mangai ùh xau khoe jah qngah, wì hamàih đìq jaq, đìq ka

wì manè apôi Boc Plình da Isorali. **32** Chuaq Jesus creo dèh ka mangai tiaq hōc trùh ajang rađeh, haq doe: “Au ha-och ka wì kô, khoe piq hì wì haq oe ti au, manđeq kô pi i ka dahwèq hu acaq. Au ùh enh dôq wì haq hlài cliac dech, èh yùq wì haq loq hrah ti trong”. **33** Mangai tiaq hōc doe: Oe tanòe ma hawit qmang kô, ma i hlàu cleq ka chaq dahwèq acaq đòeq ka mangai bàc qmang qmat jah acaq ka panàc? **34** Chuaq Jesus bòch mangai tiaq hōc: “Pì i toq leq toq bênh?” mangai tiaq hōc doe: Tapèh toq bênh xam toq biaq pliang ka. **35** Chuaq Jesus thê bài wì mangai bàc hangui ta taneh. **36** Khoe aih, haq yđc tapèh toq bênh xam biaq pliang ka, manè apôi, goh bênh am ka mangai tiaq hōc, wì aih ti aràng axong ka bài mangai bàc tau acaq. **37** Mangai leq mangai meh panàc đeh hra, rah haq wì ti toch bình tapèh talênh. **38** Mangai acaq jah pôn muàn mangai, ùh rènh gucadri xam kon qyoh. **39** Khoe aih haq dôq wì hlài, èh haq hi loh tabooang, đòeq hu tōc tagg Magađan.

16 Bài mangai Pharsi xam mangai Sađusê trùh ti Chuaq Jesus đòeq qnhro haq, wì bòch Chuaq Jesus broq kan halac loh enh plình am ka wì haq hnoq. **2** Mahaq Chuaq Jesus padreo bàu: “Jò tróc ten xèq, pì doe: Tróc kô èh lem, majah qmang aih tróc gòh. **3** Yàng di sroq, aih pì doe: Hì kô èh i cayeo dêh, majah qmang aih hì kô tróc clam ùh dai gòh. Pì loq hadro ngan tróc qmang leq, lai q pì ùh qnì hadro ngan jò! **4** Qnang noe ngang dù, tango anang kô bòch ngan moeq yiniq cleq ma halac, mahaq ùh i kan halac leq enh gùng kan halac da pajàu Jôna.” Khoe aih Chuaq Jesus hi wia lam ta qnoeq. **5** Jò bài mangai

tiaq hōc tōc khoe trùh pah tau diac, ùh hmàng wê bênh.

6 Chuaq Jesus doe ka wì haq: “Rabiaq haq, wèq rađeh khoe ka blo da bāi mangai Pharsi xam mangai Sađusê.” **7** Mangai tiaq hōc hèm ta manoh rai hatuàng ti dabau: Kō jao bèn ùh hmàng wê bênh. **8** Chuaq Jesus loq qmang aih, haq doe ka wì: Joq bāi mangai biaq manoh lùi, hagleq pì ma hèm jao pì ùh i ka bênh? **9** Pì ma qnhòq loq, pì ma ùh hmàng padam toq bênh am ka padam muàn mangai acaq, rah haq pì toch bình jah toq leq rajo qmòh? **10** Ji laiq pì ma ùh hmàng tapèh toq bênh am ka pôn muàn mangai acaq, rah haq pì toch bình jah toq leq rajo? **11** Pì ma ùh tem? Ùh xài au enh anoe trùh bênh, mahaq pì ep ngan wèq rađeh khoe ka blo da mangai Pharsi xam mangai Sađusê. **12** Pang aih, mangai tiaq hōc hi tem bàu Chuaq Jesus, haq ùh i anoe trùh blo broq bênh, mahaq haq enh ràu trùh bàu mangai Pharsi xam mangai Sađusê ma hnài. **13** Jò Chuaq Jesus khoe mùt ta gùng Sêsarê Philip, haq bòch bāi mangai tiaq hōc rameh: Tiaq bàu wì ma anoe aih, Kon mangai kô ìq cabô? **14** Mangai tiaq hōc tèu bàu: Qnah ngai doe ìh kô Jon Baptit, qnah ngai doe Jérêmi, tàng ùh meh pajàu qnoeq. **15** Chuaq Jesus bòch: “Pì qmang leq? Pì doe au kô cabô.” **16** Simôn Phiero doe: ìh kô raq Christ kon Boc Plình rìh halinh. **17** Jò aih, Chuaq Jesus doe: “Simôn kon da Jôna, ìh qmat jah xôq ramot, mahnu kô ùh xài enh xech akia enh mahim am ka ìh loq, mahaq mahnu kô loh enh nòe Baq au oe ta plình. **18** Au hòm, au creo ka ìh: ìh kô Phiero, kô èh au dèch paqnàng dèh Tagop Hadröeh enh cröng hmo kô, bāi qmang kan cachìt ùh jò leq hlàt blêq haq. (Hadēs g86)

19 Kô èh au am ka ìh gahlòng diac plình, waq toq yiniq cleq ìh clênh padràng oe ta cröng taneh, yiniq aih hanoh clênh padràng ta diac plình, èh hòm yiniq cleq ìh pèch caqnaih oe ta cröng taneh, yiniq aih hanoh pèch caqnaih oe ta diac plình.” **20** Khoe aih haq ùh lòh mangai tiaq hốc doe ka cabô loq ka rađeh aih Christ. **21** Pang aih, Chuaq Jesus men anoe ka magai tiaq hốc loq kô èh haq ep tōc ta Jêrusalem, ta aih haq ep chìuq bàc kan xalep enh tì kōng bài gucraq, bài pajàu kàn xam bài mangai hnài ranenh, ta aih èh wì jêh cađac haq ka cachìt, trùh hì piq aih èh haq hi rìh hlài. **22** Phiero qnàng Chuaq Jesus lam takênh, haq tagàih: Ùh đòh Craq au, Boc Plình ma manaq taleq, bài yiniq aih ùh i trùh ti ìh. **23** Chuaq Jesus wìh hlài rai tapoch ka Phiero: “Wia loh oe enh rù ka au! Satan, ìh qnang broq kan catoeh ka au, tagàu ìh ùh i hèm trùh trong da Boc plình, mahaq hèm trùh toq trong da kon mangai.” **24** Chuaq Jesus doe ka bài mangai tiaq hốc: “Mangai leq enh tiaq au, ep tamùa rađeh, ep xùi dèh long pagat hu tiaq au. **25** Majah qmang aih, mangai leq enh döng dèh kan rìh, kan rìh aih èh hnhung, mangai leq jao au chìuq cađac qmòe rađeh, kan rìh mangai aih èh jah hlài. **26** Mangai leq jah dìq döng cröng taneh kô mahaq cađac hnhung dèh mahua yiang, aih jah cleq? Haq aih èh yōc cleq hu baxon yōc hlài dèh mahua yiang? **27** Majah qmang aih, kô èh Kon mangai oe ta qne kan ranhòm dèh Baq, pajùm ti bài bìngh plình đòeq hu loh cröng taneh, jò aih èh haq baha am ka tang ngai tiaq tang yiniq wì ma khoe broq. **28** Joq qnàng au doe ka pì: Taqne bài pì ma

yòng jang kô, i qnah ngai ùh cachìt adroe ka jah hnoq
Kon mangai trùh dèh enh diac haq.”

17 Tadràu hì atìq ka aih, Chuaq Jesus aràng Phiero, Jaco xam Jon oh Jaco, tiaq haq tòc ta wang haqnhèq. **2** Ta aih haq wìh wìa enh ngèa wì aih hadrò haq ka ah tìah ka mat mahì, eo haq tabòc tìah ka kan qngah. **3** Jò aih i Môise xam Êli trùh hatuàng ti Chuaq Jesus. **4** Phiero doe ka haq: Chuaq au! tanòe kô joq lem ka bèn oe, tàng troq ka manoh ìh, au broq piq toq hapom tacô, moeq ka ìh, moeq ka Môise, moeq ka Êli. **5** Jò haq oe raq tapoch, i kan yùc tabòc glàp döng bàì wì ma oe ta aih, i bàu tapoch loh enh yùc: “Hacô Kon calô Au, lem manoh Au rìm trong, thê tamàng bàu haq”. **6** Jò bàì mangai tiaq hòc, tàng bàu aih, haq cro bla op döng ta haqneq, wì dìq jaq crè. **7** Mahaq Chuaq Jesus lam haten, bèq wì haq rai doe: “Drah yòng beq! Ùh dùh yùq cadèh.” **8** Mangai tiaq hòc qngòc ngan hnoq moeq ngai Chuaq Jesus raq. **9** Jò wì haq loh enh wang, Chuaq Jesus ùh lòh wì haq “Yiniq pì ma khoe hnoq, ùh dùh anoe hlài ka cabô, gòm trùh jò Kon mangai rìh hlài enh cachìt”. **10** Mangai tiaq hòc bòch: Qmang aih hagleq bàì mangai hnài ranenh doe Êli ep trùh adroe? **11** Chuaq Jesus padreo bàu “Joq, Êli ep trùh đòeq hu palauq hlài rìm trong. **12** Mahaq au doe ka pì: Êli khoe trùh, wì ùh canau ka haq, mahaq wì tabroq ka haq tiaq dèh manoh cla. Kon mangai kô èh hanoh ep pòq kan xalep enh wì aih qmang ka haq aih diq. **13** Mangai tiaq hòc hi tem bàu haq, wì loq aih haq ràu trùh Jon Baptit.” **14** Jò Chuaq Jesus xam mangai tiaq hòc wìh hlài tanòe bàc ngai, i moeq ngai thia haten, hacùn cràng enh ngèa ka

Chuaq Jesus. **15** haq aih doe: Waiq Chuaq, ìh tamèt ka kon au diq, majah qmang aih haq loh ka jìq troq, jìq oe i jaq cleq, tacro yôt ta ùnh, cro yôt ta diac. **16** Au khoe qnàng haq trùh ti bài mangai tiaq hốc ìh, mahaq wì haqnauq ùh jah. **17** Chuaq Jeus padreo bàu: “Bài nang noe ùh i manoh lùi meh, au oe jah oe ti pì trùh pang leq? Au àt ka pì trùh jò leq? Aràng kon mangai qyoh aih tacô.” **18** Khoe aih Chuaq Jesus cwò kan kiac, kiac hi loh enh gùng ka kon mangai qyoh aih, pang aih kon qyoh aih jah brêh. **19** Mangai tiaq hốc thia haten ka Haq đòeq hu bòch: Hagleq nhèn drùh kiac aih ma ùh jah? **20** Chuaq Jesus padreo bàu: “Jao pì biaq manoh lùi: Au anoe joq qnàng ka pì, tàng joq pì i manoh lùi toq clong cachiq habài, pì thê wang kô: Qnhac enh kô tôt pah tau, haq hi qnhac rađeh, èh ùh i yiniq leq pì broq ma ùh jah. (I hset dùnh tam moeq brong) **21** Mahaq kiac qmang kô, tàng pì ùh waiq khàn rai apàm ka acaq, pì drùh haq ùh jah. **22** Jò Chuaq Jesus xam mangai tiaq hốc lam pajang gùng Galili, Haq doe ka wì: “Kon mangai kô èh mùt ta cadop tì wì. **23** Èh wì jêh cađac Haq, mahaq trùh hì piq, Haq hi rìh hlài. Bài mangai tiaq hốc mangò haraya. Chuaq Jesus am thèq **24** Jò khoe trùh ta Cabênaum, bài mangai yốc thèq ka hnem kùh waiq lam bòch Phiero: Mangai hnài da ìh qmat i am thèq ùh? **25** Haq padreo bàu: i. Jò Phiero mùt ta hním Chuaq Jesus khoe chônh bòch haq: “Simôn, ìh hèm qmang leq? Bài bùa oe ta cröng taneh kô yốc thèq cabô? Yốc da kon cla loq yốc da wì enh gùng? **26** Phiero doe: yốc da wì enh gùng. Chuaq Jesus doe: “Tàng qmang aih bài kon calô haq ùh hìaq ep am thèq. **27** Mahaq, đòeq bèn ùh hìaq broq

dua qmèq ka wì haq, ìh loh ta diac axai ka, rùp pliang ka ma kap axay adroe, wah hacùng haq, ìh hnoq mòeq hliac bac oe ta dalam. Aràng bac aih hu am thèq ka ba.

18 Jò aih bài mangai tiaq hốc thia haten ka Chuaq Jesus, wì haq bòch: Ta diac plình mangai leq ma yeo haqnhèq döng ka mangai qnoeq? 2 Chuaq Jesus creo ka moeq ngai kon qyoh, dôq haq oe ta qne bài mangai tiaq hốc. 3 Haq hi doe: “Tàng joq pì ùh tablòq hlài, dôq tìah ka kon qyoh kô, aih èh ùh i mangai leq jah mùt diac plình. 4 Qmang aih mangai leq pa haqneq rađeh troeq kon qyoh kô, haq aih èh ma yeo haqnhèq tanèo diac plình. 5 Èh hòm oe enh dalam ka yiniq au mangai leq ma chìuq đìh kon mangai qyoh kô, aih haq đìh au. 6 Mahaq, mangai leq broq ka moeq ngai kon qyoh qmang kô jò haq khoe lùi au cro ta yiniq lui, yōc apau hmo ma kàn taqmac ajang ranöng haq aih, khoe èh cadram caqnìh ta diac raxìq xan ka ùh hnau hòm. 7 Habo ka cröng taneh kô, majah qmang aih i bac yiniq broq ka kon mangai catoeh! Hiloq waq ka i kan catoeh, mahaq joq habo ka mangai broq kan catoeh ka wì qnoeq! 8 Tàng joq tì qnì jènh pì broq ka pì clìh ta yiniq lui, drah pot khwênh cađac ma hangai ka pì, yac ka tapot jènh tapot tì mahaq jah mùt tanèo kan rìh halinh, ma hnau ka oe tôm baiq jènh baiq tì mahaq wì hwênh caqnìh tabau ùnh moeq đòe. (aiōnios g166) 9 Tàng mat pì broq ka pì clìh ta yiniq lui, drah ngwia khwênh cađac ma hangai ka pì, majah qmang aih yac ka oe moeq apah mat raq mahaq jah mùt ta kan rìh halinh, dua ùh hnau ka oe tôm baiq pah mat mahaq clìh ta bau ùnh ta hwinh. (Geenna g1067) 10 Ngan oq! Apaq jù moeq ngai kon

qyoh leq oe taqne bài qyoh kô, majah qmang aih au doe ka pì, bình plình da wì haq qmat hnoq yôt hadrò Baq au, aih Mangai oe ta plình. **12** Pì hèm qmang leq? Tàng mangai leq i moeq hrinh toq trìu, yàng i mòeq toq lac hnhung, haq ma ùh đòeq đò hachìn jàt hachìn toq kon trìu oe ta wang đòeq hu lam chaq mòeq toq kon trìu ma khoe hnhung aih qmòh? **13** Joq qnàng au anoe ka pì, tàng joq haq chaq hi hnoq hlài, haq lem bùi ka kon trìu aih ùh hnau ka hachìn jàt hachìn toq kon trìu ma ùh hìaq hnhung tau. **14** Hadai qmang aih diq, Baq pì oe ta plình hanoh ùh enh dôq ka mòeq ngai kon qyoh leq oe taqne bài kon qyoh kô hnhung cađac. **15** “Tàng joq oh daq ìh troq loh yiniq ka ìh, tagàih ka haq jò moeq ngai ìh raq oe ti haq, tàng haq tàng bàu, ìh jah hlài dèh oh daq. **16** Tàng joq haq ùh tàng, ìh akhen tam moeq baiq ngai lam ti ìh, dôq bàu i baiq piq ngai wiang tamàng, aih èh rìm trong men loh ka kajap. **17** Tàng joq haq ùh tamàng bàu wì aih, aih ìh hi anoe ka Tagop Hadròeh, tàng joq haq dua ùh tàng bàu Tagop Hadròeh, aih hi ngan haq tìah wì mangai enh gùng tìah ka mangai yốc thèq diq. **18** Joq qnàng, au doe ka pì, waq toq yiniq cleq pì kàt rahnit ta crõng taneh kô, ta plình hanoh kàt rahnit. **19** Joq qnàng, au anoe tam ka pì, tàng joq baiq ngai taqne pì hi hatroq manoh ti dabau, yac ka waiq trong leq, Baq au oe ta plình dua am ka wa haq. **20** Majah qmang aih, tanèo leq i baiq piq ngai canòm hiniq au hu àng tagop ti dabau, ta aih au oe taqne wì haq”. **21** Phiero lam haten ka Chuaq Jesus, haq bòch: Chuaq au, tàng joq oh daq au loh yiniq ka au, aih èh au ep cađac ka haq aih toq leq yàng? Ajoq ta pèh

yàng ùh? **22** Chuaq Jesus padreo bàu: “Au doe ka ìh ùh xài tapèh yang, mahaq tapèh jàt yang tapèh”. **23** Qmang aih, diac plinh tìah ka bùa tau, enh hatinh dèh bac jèn ka bài mangai hapöng haq **24** Jò bùa bu ngan jàiq, wì qnàng ka haq moeq ngai pòq dòeh bùa moeq jàt muàn talàng. **25** Pàng haq aih pi i qmòe cleq hu caqnaih, wì craq thê tech cla haq, cadrì kon haq xam bài dahwèq haq, dòeq hu caqnaih dòeh. **26** Mangai hapöng aih hi bla op ajang jènh cla craq rai waiq dang: Wì craq, ìh qnhùa ka au da adia, au hu caqnaih döng da ìh! **27** Cla wì craq tamèt ha-och ta manoh, hi caqnaih haq hlài rai paclaih hloe dòeh ka haq. **28** Mahaq jò magai aih loh hlài, glàm moeq ngai bua haq ma hadai abroq qmoeq qmang ti haq, i pòq dòeh haq moeq hrinh đoniê, haq it ranöng dèh bua aih rai doe: Drah caqnaih da au dòeh beq! **29** Bua haq bla op haqneq, rai waiq dang: Ìh qnhùa ka au adia, i au caqnaih döng da ìh. **30** Mahaq haq aih ùh qmòe blinh, dua waq ka rùp clêh đac dèh bua ta hnem tù, trùh jò leq claih döng ka dòeh men waq hêq. **31** Bài bua haq hnoq qmang aih, wì mangò raya, lam taqmon dèh ka wì craq rìm yiniq ma khoe hnoq. **32** Cla wì craq creo ka mangai hapöng aih trùh rai doe: “Ìh qmat joq mangai hapöng ngang dù qnàng, au khoe cađac döng dòeh ka ìh, jao ìh waiq dang au. **33** Ìh ma ùh khòh loq ha-och dèh ka bua ma abroq moeq qmang ti ìh troeq au khoe loq waq ka ìh qmòh?” **34** Cla wì craq nòeh haraya, hataq haq aih ka mangai wèq hnim clêh mangai trùh jò leq haq claih döng dèh ka dòeh. **35** Tàng joq pì ùh dìq ka manoh caqnaih bài yiniq lui ka oh daq, aih èh Baq au oe ta plinh hanoh broq ka pì qmang aih diq.

19 Khoe ka hnài qmang aih, Chuaq Jeus loh enh gùng Galili lam trùh ta gùng Giudê, pah tau ka cròng diac Jôđan. **2** I mangai bac pi cajaq tiaq haq, haq broq brêh döng ka mangai ma ùh hröc yinìq ta aih. **3** Mangai Pharsi trùh ten đòeq hu qnhro haq, wì bòch: Yac ka qmang leq, qmang leq, tiaq trong ranenh, mangai calô akhòh cađac mai ùh? **4** Haq padreo bàu doe: “pì ma qnhòq lah ngan ta hset, jò baxèm Boc Plinh broq moeq mangai gucalô xam moeq mangai gucadri, **5** Haq i doe: Aih ìq, mangai calô ma jah talah dèh ka miq baq, hu hatop dèh ti mai, wa baiq ngai hi wìa moeq xech qmòh? **6** Pang aih, ǒng mai pi oe xài baiq hòm, mahaq moeq chac raq. Qmang aih, kon mangai ùh khòh lah bài mangai Boc Plinh ma khoe taqmroq”. **7** Wì bòch hòm: Tàng joq qmang aih hagleq Môise ma jah thê achìh jàiq ta cađac đòeq broq bò acang, khoe aih dôq mai haq lam? **8** Chuaq Jesus doe: “Jao pì cadoq manoh Môise majah lòh pì cađac mai, mahaq jò baxèm ùh i qmang aih. **9** Au anoe ka pì, tàng joq mangai leq cađac mai, mahaq ùh xài jao haq tango, đòeq hu lam yōc mai qnoeq, mangai aih loh mangai tango, èh hòm, cabô yōc cadrì wì ma cađac, mangai aih khoe i tuiq tango. **10** Mangai tiaq hōc doe: Tàng joq mangai gucalô ep broq qmang aih, hêq ùh yōc döng mai yi hnao hòm. **11** Chuaq Jeus doe: “Ùh xài rìm ngai dìq hlàt wê bàu kô, mahaq dôq toq ka mangai Boc Plinh ma khoe thê qmang aih. **12** Majah qmang aih, i qnah ngai ùh yōc mai taiq jò ha-uang haq khoe qmang aih raq, i qnah ngai, ùh yōc mai jao enh tì kòng kon mangai broq, hadai i qnah ngai nhet ka diac plinh, majah to broq ka rađeh dech. Mangai leq hlàt wê

bàu aih wê beq”. **13** Khoe aih wì aràng trùh ka Chuaq Jesus bài kon qyoh, dôq haq roh tì ta chac wì haq rai waiq khàn am ka wì haq, mangai tiaq hốc tagàih ka bài mangai ma aràng. **14** Mahaq Jeus doe: “Dôq kon qyoh jah trùh ti au, apaq tát wì haq, majah qmang aih diac plình aih da mangai leq ma tìah ka bài kon qyoh.” **15** Haq yốc tì bèq bòe kon qyoh, khoe aih haq loh lam. **16** Jò aih, i moeq ngai trùh bòch Chuaq Jeus: Mangai hnài, trong lem leq au ma ep broq đòeq hu jah kan rìh mòeq đòe? (**aiōnios g166**) **17** Chuaq Jesus bòch: “Hagleq ìh ma jah bòch au trùh trong lem? I moeq Ngai raq malem. Tàng joq ìh enh jah kan rìh halinh moeq đòe, ìh ep wèq bài ranenh”. **18** Haq aih bòch: Bài ranenh leq? Chuaq Jesus doe: “Bài ranenh kô: Apaq jêh đạc mangai, ùh dùh tango, ùh dùh atùng, ùh dùh wiang tapoch hwang, **19** loq iu loq camaih ka miq baq rai loq ha-och dèh ka mangai haten tìah ka cla ìh”. **20** Mangai radam aih doe: Au khoe wèq dìq dồng bài ranenh kô, oe i ranenh leq hòm? **21** Chuaq Jesus doe: “Tàng joq ìh enh waq ka geo gua, drah hlài tech dồng kùng hang ta hním đòeq hu am ka mangai pa, qmang aih èh ìh hi jah hang lem ta diac plình, khoe aih hi lam tiaq au”. **22** Mahaq jò mangai radam tàng bàu aih, haq loh lam rai mangò haraya, majah qmang aih haq i kùng hang bàc pi cajaq. **23** Chuaq Jesus doe ka mangai tiaq hốc: “Joq qnàng au doe ka pì, mangai padrõng müt diac plình joq xa haraya. **24** Au anoe hòm ka pì lõcđa müt trom jrùm yi hlàu ka mangai padrõng müt diac Boc Plình”. **25** Mangai tiaq hốc tàng bàu aih, dìq jaq hamàih, wì haq bòch: Qmang aih mangai leq majah dèch? **26** Chuaq Jesus ngan bài mangai

tiaq hōc: “Trong aih kon mangai broq ùh jah mahaq Boc plình broq trong leq dua jah”. **27** Phiero doe: Hacô, nhèn khoe cađac dìq dōng đòeq tiaq ìh, aih èh nhèn jah cleq? **28** Chuaq Jesus padreo bàu: “Joq qnàng au anoe ka pì, trùh jò rìm ka yiniq loh ka neo dìq dōng, aih jò Kon mangai hangui deh tagèq ranhòm cla haq, pì mangai ma khoe tiaq au hadai jah hangui ta moeq jàt baiq toq gèq, đòeq hu hadrah ka moèq jàt baiq xinoe Isorali. **29** Mangai leq taiq yiniq au loh qmòe ka cađac dèh oh daq calô, oh daq cadrì, xam kon, xam taneh ruàng, xam hnim, mangai aih èh jah hlài yeo bàc ùh hnau ka aih hòm, èh jah kan rìh halinh moeq đòe. (**aiōnios g166**) **30** Mahaq bàc ngai adroe loh ka atìq, bàc ngai atìq loh ka adroe.

20 Majah qmang aih, diac plình tìah ka wì craq ta hnim tau, bu padrèh qngah khoe loh lam, chaq mangai hu mùt abroq dèh ta wuàn plì nho, **2** Jò haq khoe òq ka baha mangai patih, mòeq hì mòeq đoniê, haq hi thê wì aih mùt dèh ta wuàn. **3** Qnah ta hachìn jò di sroq, haq aih lam hòm, hnoq bài mangai qnoeq, oe dech ùh i ka yiniq broq qnang yòng tanòe wì ma padro atech. **4** Haq doe ka wì aih: Pì mùt ta wuàn plì nho au beq, au baha pì ùh hìaq hamoq. **5** Wì aih hi drah lam. Jò qne hì trùh qnah ta piq jò, haq loh lam hòm, haq hadai broq qmang aih raq. **6** Canau khoe ta padam jò haq lam hòm, hnoq wì mangai qnoeq hòm yòng tanòe wì ti padro atech, haq hi bòch: Hagleq pì ma jah yòng ta kô xèq ka hì ùh dùh broq qmòe cleq? **7** Wì aih padreo bàu: Ùh i qmòe ka cabô creo ka nhèn broq. Haq doe ka wì aih: Pì hadai mùt ta wuàn au beq. **8** Trùh clam, cla wì craq wuàn nho doe ka mangai

ma wèq ngan wì abroq: Lam creo ka wì ma abroq hu caqnaih da wì haq kùng, patep enh mangai ma atìq dǒng, èh hi trùh mangai ma adroe. **9** Wì mangai ma abroq pang padam jò di xèq jah yōc moeq ngai moeq đoniê. **10** Èh bài mangai ma abroq enh jò baxèm trùh, hèm dèh canau đeh jah yeo bac, yàng èh hadai moeq đoniê. **11** Jò khoe yōc kùng baha, wì aih badrùt mamùc ka cla wì craq, **12** wì haq doe: Bài mangai ma atìq qmat broq moeq ahyàc raq, ìh baha ka wì haq taq atoq qmòe ka nhèn kô bài mangai ma abroq lep xèq ka hì rai catènh tòq. **13** Mahaq wì craq aih, anoe ka mòeq ngai taqne bài wì aih: È daq, au tình ka ìh ma i hamoq, ma ùh joq ìh khoe òq ka au moeq đoniê raq qmòh? **14** Hêq yōc da ìh kùng kan qmat khoe lam beq, au enh baha ka mangai ma atìq taq atoq qmang ka au khoe baha ìh diq. **15** Kùng hang cla, au ma ùh khòh broq tiaq dèh manoh cla qmòh? Ahìaq hnoq au rìh lem ka oh daq, mat ìh majah loh ka tajênh ùh xài? **16** Aih, mangai atìq loh ka adoe, mangai adroe loh ka atìq, aih qmang aih. **17** Jò Chuaq Jesus tōc ta Jérusalem, haq qnung dèh moeq jàt baiq ngai tiaq hōc raq lam tiaq rađeh, ti trong, haq doe ka wì: **18** “Beq, bèn tōc ta Jérusalem, Kon mangai kô èh, wì jah rùp am ka bài pajàu kàn xam bài mangai hnài ranenh, wì aih èh ma hatinh ka dabau hu chaq trong jêh đac haq. **19** Wì aih èh rùp haq am ka bài mangai ùh xài mangai Juđa, dôq wì aih do halê, blai, èh tiang đinh haq ta long pagat, trùh hì piq, haq hi rìh hlài”. **20** Khoe aih, i mai da Sêbêđê xam wa kon haq trùh haten ka Chuaq Jesus, hacùn cràng enh ngèa ka Chuaq Jesus đòeq bòch haq moeq hiniq. **21** Chuaq Jesus bòch haq: “Ìh enh bòch

cleq?” Mangai gucadri aih doe: ĩh am wa kon au kô mòeq ngai jah hangui pah qma ka ĩh, mòeq ngai jah hangui pah qngeo ka ĩh oe ta diac ĩh. **22** Chuaq Jesus doe: “Pì ùh qnì ka rađeh qnang bòch cleq, chrōng au ma ôq kô èh pì ôq ajah?” Wa aih padreo bàu: Ma ôq jah. **23** “Joq chôp kô èh ôq chrōng au mahaq hangui pah qma, pah qngeo ka au, aih ùh xài au am, nòe aih đòeq toq ka bài mangai Baq au khoe palauq adroe”. **24** Moeq jàt ngai tiaq hōc tau, tàng bòch qmang aih, wì haq nòeh ka wa oh daq aih. **25** Mahaq Chuaq Jesus creo ka wì trùh, haq doe: “Pì loq, bùa bài diac wì padit dôq wì qnoeq patih ka rađeh, bài cwan kàn yo dèh cwìang đòeq hu oe enh qnhèq ka wì. **26** Yàng pì kô ùh xài qmang aih, mahaq taqne pì mangai leq enh broq kàn, mangai aih ep broq hapōng pì, **27** mangai leq enh broq gàu, mangai aih ep broq dìc pì. **28** Qmang ka Kon mangai khoe trùh, ùh xài đòeq mangai qnoeq patih ka rađeh, mahaq đòeq cla rađeh patih ka wì, rai phùq dèh kaxènh broq maneh đòeq hu baxon yōc hlài bàc ngai. **29** Jò Chuaq Jesus xam mangai tiaq hōc loh enh plài Giêricô, i mòeq calùh mangai ra rawinh ti tiaq haq. **30** I baiq ngai lua mat oe kēnh trong, tàng doe i Chuaq Jesus lam pagat trong aih, wa aih creo cadêh: Waiq Chuaq, kon xau bùa Đawit, ha-och ka ma diq! **31** Wì lech ka wa aih, thê wa hatinh, mahaq wa aih creo yeo dêh hòm: Waiq Chuaq, kon xau bùa Đawit, ha-och ka ma diq! **32** Chuaq Jeus hi yòng, creo ka wa aih trùh, haq bòch wa: “Chôp enh au broq ka chôp cleq?” **33** Wa aih doe: Ma enh mat ma jah xau hnoq. **34** Chuaq Jesus ta manoh ha-och ka wa. Haq

bèq mat wa, tajòe qmòe wa jah xau hnoq, èh wa hi tiaq hloe Haq.

21 Jò Chuaq Jesus xam bài mangai tiaq hốc khoe ten trùh ta Jérusalem, khoe trùh ta Bêpha-giê, haq hi tòc ta wang Ôliu, khoe aih haq thê baiq ngai tiaq hốc. **2** Haq doe: “Chôp mùt ta plài enh ngèa ka chôp qmat, chôp hi hnoq moeq toq lùa kan wì khoe kàt xam kon haq, chôp caqnaih èh dùi aràng ka au tacô. **3** Tàng i cabô doe cleq, chôp doe ka wì Chuaq i yiniq waq ka baiq toq lùa kô, aih èh wì hi caqnaih ka chôp tiaq”. **4** Yiniq kô loh qmang aih đoèq xìt troeq bàu pajàu khoe anoe: **5** Anoe ka kon cadrì Siôn, Kô, bùa pì trùh ti pì, Khun khauq, oe enh cröng lùa Aih lùa kon, kan haq bac long ech. **6** Mangai tiaq hốc hi loh lam rai broq tiaq qmang ka bàu haq khoe tanap. **7** Wa dùi lùa kan xam kon haq, yōc dèh eo hlèch enh cröng lùa, khoe aih dèch Chuaq Jesus tòc hangui enh qnhèq. **8** Haraya cađac mangai yōc eo hlèch ti trong lam, mangai qnoeq hòm goh hamenh long xap ti trong. **9** Dìq ka wì ma lam adroe xam mangai lam atìq hadai creo ka dêh: Hôsana, Kon bùa Đawit! Khòh manè Haq mangai ma yōc Yiniq Chuaq đòeq trùh ti bèn! Hôsana oe tanèo ma dìq jaq haqnhèq. **10** Jò khoe mùt ta Jérusalem, dìq döng ka wì tagùng aih loh ka tagruàng tagràt, wì bòch dabau: Mangai kô iq cabô? **11** Mangai bac ta aih padreo bàu: Kô Chuaq Jesus, Mangai pajàu oe ta Naxaret, gùng Galili. **12** Chuaq Jeus mùt ta nòe hnem Kùh waiq, drùh qnoh dìq döng bài mangai padro ta aih, hacùp caböng bài mangai ti halih bac jèn, caqnhùt đac gèq bài mangai tech trù hangui. **13** Haq doe ka wì: “I bàu khoe achih, hnim au jah

creo hnim waiq khàn, mahaq pì broq hnim aih loh kòp atùng. **14** Jò aih, bài mangai ùh xau hnoq, mangai liap, trùh ti haq tanòe hnim kùh waiq, haq broq brêh dōng ka wì. **15** Mahaq bài pajàu kàn, bài mangai hnài ranenh hnoq kan halac haq khoe broq, èh wì tàng tam bàu kon qyoh cachech ta hnim kùh waiq: Hôsana Kon bùa Đawit! Wì plôh nòeh, **16** wì doe ka haq: ìh atàng bàu bài kon qyoh anoe cleq ùh? Chuq Jesus doe: “Au tàng. Pì qnhòq lah đoxic bàu kô ta hset hadròeh qmòh? Chuaq khoe jah bàu manè loh enh hacùng kon qyoh xam kon qyoh oe ùq qmòh?” **17** Khoe èh haq hi cađac wì aih haq mùt ta plài Bêthani, mang aih haq kùi ta aih. **18** Sroq èh, jò wìh hlài ta Jêrusalem, haq pangot. **19** Hnoq ti trong i moeq xèm long pōc, haq thia ka haten, yàng hnoq toq hla, haq cwò ka long pōc: Gè kô èh pi jò leq oe loh plì hòm! Long pōc croh qmòe jò aih raq. (**aiōn g165**) **20** Mangai tiaq hōc hnoq qmang aih, wì haq hamàih, wì bòch: Hagleq bu moeq hyàc long pōc ma khoe croh qmang qmat? **21** Chuaq Jesus doe: Joq qnàng! au anoe ka pì, tàng joq pì i manoh lùi ùh hìaq rangòt, ùh xài pì broq jah toq yiniq khoe broq ka long pōc kô, yac ka pì doe ka bui wang kô: Dèch caqnìh rađeh ta diac raxìq beq, yiniq aih broq dua jah. **22** Jò waiq khàn, pì yōc manoh lùi đòeq waiq khàn, yac ka pì bòch cleq, dua jah dōng dìq. **23** Jò Chuaq Jesus khoe mùt ta hnim kùh waiq, haq qnang hnài wì, i bài pajàu kàn xam bài gucraq mangai Juđa trùh bòch haq: ìh yōc cwìang enh leq ma hu broq qmang kô, cabô khoe am ka ìh cwìang kô? **24** Chuaq Jesus padreo bàu: “Au hanoh bòch pì mòeq yiniq, tàng joq pì tèu da au, au hanoh anoe

am ka pì loq au yōc cwìang enh leq ma broq bài yiniq kô.

25 Baptem da Jon aih loh enh leq? Loh enh diac plình loq
loh enh kon mangai?" Wì aih hatuàng ka dabau: Tàng joq
bèn doe loh enh plình, aih èh haq bòch bèn qmang aih
gleq pì ùh lùi? **26** Tàng bèn doe: Loh enh kon mangai,
aih bèn ùh hùa ka wì phù cròng, majah qmang aih dìq
ka phù cròng mangai leq mangai meh dìq doe Jon aih
pajàu. **27** Wì doe ka Haq: Nhèn ùh qnì. Chuaq Jesus doe ka
wì: "Au hadai ùh doe ka pì loq cwìang enh leq ma broq
bòe yiniq kô". **28** Pì hèm qmang leq? I moeq ngai tau,
haq i baiq ngai kon calô, haq doe ka mangai kon ramua:
Kon! hì kô kon lam broq ta wuàn nho oq. **29** Kon aih doe:
Òq baq, mahaq khoe aih haq ùh waq lam. **30** Khoe aih,
mangai baq lam ajang kon ma hatìa, hanoh doe qmang
ka adroe iq diq. Kon ma kô doe: Au ùh enh lam. Yàng
khoe ka aih haq hèm hlài, haq hi lam. **31** Taqne wa aih
ma leq ma broq tiaq bàu dèh baq?" Wì doe: Mangai ma
atiq. Chuaq Jesus doe ka wì aih: "Joq qnàng au anoe ka pì,
bài mangai ti yōc thèq xam bài gucadri ti taqnung tango
jah mùt diac Plình adroe ka pì. **32** Majah qmang aih Jon
khoe tiaq trong taq atoq lam trùh ta pì, mahaq pì ùh lùi
haq, yàng bài mangai ti yōc thèq xam bài mangai gucadri
ma taqnung tango aih khoe lùi haq, èh da pì hòm yac ka
khoe hnoq qmang aih, dua ùh waq raxach đòeq hu lùi
haq. **33** Pì tamàng tam bàu alìah qnoeq hòm. I moeq ngai
pìt wuàn nho, haq kèng canàng dudan, enh dalam haq
chìa moeq toq ralùng hu broq alac, èh haq broq moeq
toq hapom haqnheq, khoe aih haq am ka wì muàn pìt ta
axong, cla haq lam gùng qnoeq. **34** Trùh jò git plì, cla haq

thê dèh mangai hapõng trùh ta nòe bài mangai ma abroq ta aih, đòeq hu yõc dèh plì. **35** Bài mangai pìt nho rùp bài mangai hapõng aih, wì hwat mangai kô, jêh đac mangai meh, yõc hmo đàp mangai tau. **36** Cla wì craq, thê hòm bài wì hapõng ma qnoeq, yeo bac ka yàng adroe, yàng èh hadai wì tabroq ka bài hapõng kô tìah ka bài hapõng ma adroe diq. **37** Atìq dõng, cla wì craq thê dèh kon cla haq trùh ta wì aih, majah qmang aih haq hèm dèh ta manoh: Kon cla au kô, wì aih loq yi camaih. **38** Mahaq, jò bài mangai pìt nho hnoq kon aih, wì haq doe ka dabau: Kô raq mangai hu jah waq dõng kùng hang, beq bèn jêh đac hloe èh bèn hu blah yõc hloe hang haq. **39** Wì hi rùp mangai kon aih, qnoh enh gùng ka wuàn plì nho, jêh cađac hloe. **40** Qmang aih èh jò cla wì craq trùh haq broq ka bài mangai pìt nho kô qmang leq cadèh? **41** Wì padreo bàu: Cla wì craq aih trùh haq jêh palùng đac bài ngang dù aih, èh haq yõc hlài dèh wuàn đòeq am ka mangai qnoeq patìh acaq axon, aih la bài mangai waq toq hi trùh jò hi dèch am phàn da cla wì craq. **42** Chuaq Jesus doe: “Pì ma qnhòq đõc ta hset Hadròeh: Hmo bài mangai broq hnem khoe qnìh đac, khoe wìa hmo mùm hnim. Aih yiniq Boc Plình broq. Ma ùh joq kan halac enh ngèa bèn qmòh? **43** Aih au ma jah doe ka pì, diac Boc Plình jah doe yõc enh pì qmat èh đøèq hu am ka mangai qnoeq aih la bài mangai ma loh plì lem am ka diac aih. **44** Cabô ma taclìh enh crõng hmo aih èh, haq hech pòh dõng dìq, hmo aih clìh enh qnhèq ka cabô, mangai hadai hech loh blo”. **45** Bài mangai hnài ranenh xam mangai Pharisi tàng bàu aih, wì loq Chuaq Jesus tapoch ka wì haq; **46** wì chaq yiniq

hu rùp haq, mahaq yùq ka phù cròng, majah qmang aih
wì phù cròng khoe doe Chuaq Jesus aih mangai pajàu.

22 Chuaq Jeus aliah tam ka wì aih: **2** “Diac plình tìah ka
bùa tau, haq broq yiniang taqnèp dèh ka kon. **3** Bùa aih
thê dèh bài hapōng lam bahmàng ɓaàimangai ma khoe
jah akhen trùh acaq yiniang mahaq wì aih ùh waq trùh. **4**
Bùa thê hòm bài hapōng qnoeq lam rai tanap: Doe ka bài
mangai ma khoe jah bài akhen: Au khoe padon yiniang
yinàng ɓo xam jam ramaq au khoe bùh, cleq clài hadai
khoe padon đòeq, drah trùh hu hangui acaq yiniang.
5 Mahaq wì ùh do tamàng, mangai lam dèh hra trong,
mangai kô loh ta ruàng, mangai tau lam padro, **6** mangai
qnoeq hòm rùp hapōng bùa aih jêh cađac. **7** Bùa nòeh
haraya, thê bài lình jêh dồng bài magai dù aih, bùh hloe
plài wì haq. **8** Khoe aih, bùa doe dèh ka bài hapōng:
“Yiniang yinàng khoe padon, mahaq bài mangai ma khoe
jah akhen aih pi tajì ka acaq. **9** Manòeq, pì loh lam roc
halah trong, waq toq hnoq mangai leq, akhen ma đìq lam
acaq yiniang tacô. **10** Bài mangai hapōng lam jàp rìm
trong ta aih, tagop đìq mangai wì haq glàm, lem qmèq
ùh loe, ta hnim loh ka bìn bauq mangai hangui acaq
yiniang yinàng. **11** Bùa mùt ngan mangai acaq yiniang, ka
doe hnoq ta aih i moeq ngai ùh caxùnh eo yiniang. **12**
Bùa doe ka haq aih: Ủih daq, hagleq ìh mùt tacô ma ùh
caxùnh eo yiniang taqnèp? Mangai aih hatinh. **13** Bùa thê
ɓaàimangai hapōng: Kàt jènh tì haq qmat, khwênh qnoh
ta clam tau, tanòe ma toq crò hmoe rai cadrit haneng.
14 Majah qmang aih bac ngai jah creo mahaq toq biaq
ngai raq ma jah ràih. **15** Khoe aih, mangai Pharisi loh

enh gùng hatuàng ka dabau chaq trong hu bahlac Chuaq Jesus trong bàu tapoch. **16** Wì haq thê dèh mangai tiaq hōc taqmùt ti bòe bua da bùa Hêrôt lam bòch Chuaq Jesus: Mangai hnài, nhèn loq ìh kô joq qnàng, tiaq kan taq atoq ìh hnài trong Boc Plinh, ùh wiang enh cabô, majah qmang aih ìh ùh ngan da wì toq enh gùng. **17** Doe ka nhèn loq ìh hèm qmang leq: Am thèq ka Sêsa aih troq loq ùh? **18** Chuaq Jesus loq manoh wì haq qmèq, haq doe: “Wùih bài mangai toq ti patìah meh, hagleq pì ma bahlac dèh ka au? **19** Am au ngan hliac pì ma đòeq am thèq. Wì aih am ka haq mòeq đoniê. **20** Haq bòch: “Kô ìq qmù cabô, achìh kô achìh cabô. **21** Wì doe: Sêsa. Khoe aih Haq doe ka wì: “Padreo da Sêsa yiiniq cleq da Sêsa, padreo da Boc Plinh yiniq cleq da Boc Plinh. **22** Jò khoe tàng bàu aih, wì hi loh ka lui ta manoh. Èh wì hi lam. **23** Hanoh hì aih, mangai sađusê, aih bài ma mangai doe ùh i ka kan rìh hlài, lam haten ka Chuaq Jesus, wì bòch: **24** Mangai hnài ôi, Môise i anoe: Tàng joq mangai leq cachìt mahaq ùh i ha kon, oh haq aih ep yōc cadri dèh daq ma khoe hadrō aih. **25** Qmang aih nhèn i ta pèh ngai oh daq. Mangai daq ramua cachìt, mahaq qnhòq i kon, mai haq đòeq hlài dèh ka oh. **26** Èh mangai daq ma hatia, mangai daq ma atìq trùh mangai ma atìq dōng hanoh qmang aih diq. **27** Pu lùch, mangai gucadri aih hanoh cachìt. **28** Aih èh trùh jò rìh hlài, taqne wì tapèh ngai aih, mangai gucadri aih èh broq mai cabô? Majah qmang aih dìq dōng wì haq khoe yōc mangai cadri aih broq mai. **29** Chuaq Jesus doe: “Pì hèm ùh troq, majah qmang aih pì ùh qnì ka hset Hadròeh, èh hadai ùh qnì cwìang itai Boc Plinh

qmang leq. **30** Majah qmang aih, trùh jò rìh hlài, kon mangai ùh yōc mai, ùh yōc ǒng, mahaq bài mangai rìh hlài tìah ka bình plình oe ta plình. **31** Pì ma qnhòq ngan bàu Boc Plình anoe trùh kan rìh hlài da mangai cachìt: **32** “Au kô Boc Plình da Apraham, Boc Plình da Ysac, Boc Plình da Jacôp qmòh? Boc Plình ùh xài Boc Plình da bài mangai cachìt, mahaq Boc Plình da bài mangai rìh. **33** Tàng qmang aih, wì hamàih ka bàu Haq hnài. **34** Mangai Pharisi tàng doe Chuaq Jesus khoe broq ka bài mangai Sadusê pi jah hah hacùng, wì haq tagop dabau. **35** Taqne wì aih i mòeq ngai hnài ranenh bòch Chuaq Jesus bàu kô đòeq hu qnhro ngan haq: **36** Mangai hnài ôi, oe ta hset ranenh, ranenh leq ma yeo kàn dìq dǒng? **37** Chuaq Jesus padreo bàu: “Ìh ep dìq ka cliac, dìq ka mahua yiang, dìq ka manoh loq waq ka Boc Plình. **38** Aih ranenh angoe ma yeo kàn dǒng ka maqnoeq. **39** Ranenh ma atìq kô hadai qmang aih: Ìh ep loq waq ka mangai haten hatìa ka ìh tìah ka cla. **40** Dìq dǒng ka ranenh xam bàu pajàu dìq loh enh baiq ranenh aih. Christ kon xau Davit **41** Jò bài mangai Pharisi oe moeq qmang ti dabau, Chuaq Jesus bòch wì haq: **42** “Ràu trùh Christ, pì hèm qmang leq? Haq aih kon cabô?” wì doe: Kon bùa Đawit. **43** Haq padreo bàu ka wì aih: “Tàng qmang aih gleq bùa Đawit canòm ka Yeang Hadròeh, haq ma creo ka Christ aih Chuaq au, haq doe: **44** Chuaq doe ka Chuaq au, Hangui enh pah qma au, Trùh jò au roh bài mangai ma tablêq ka ìh enh qneq ka jèngh ìh? **45** Tàng joq jò aih Đawit khoe creo ka Haq aih: Chuaq au, aih haq broq kon bùa aih qmang leq?” **46** Pi i

cabô oe jah tèu mòeq nà bàu, èh hanoh pang aih, pi i
cabô oe hùa bòch haq cleq hòm.

23 Khoe aih Chuaq Jesus anoe ka bài mangai ta aih hloe
xam ka mangai tiaq hòc: **2** “Bài ngai hnài ranenh xam
mangai Pharisi dìq hangui tagèq Môise. **3** Qmang aih
pì ep broq tiaq rai wèq rìm trong wì haq khoe hnài pì,
mahaq apaq top dua wì haq, majah qmang aih wì haq ùh
broq tiaq dèh bàu đeh ma hnài. **4** Wì aih yōc kan trap,
kan tawac, taqmac ta plêh wì qnoeq, mahaq cla ùh wiang
poh moeq hadrang tì ta aih. **5** Rìm yiniq wì haq broq
aih đòeq toq ka mangai qnoeq hnoq, balet akia da wì
haq wê waq ka yeo kèn, cadrai eo waq ka yôh, **6** tanòe
acaq ôq wì haq enh toq hangui nòe ma rahù, ta hnim
tagop wì haq enh toq haqngui nòe yeo haqnhèq döng, **7**
enh toq mangai qnoeq kùp gàu ka rađeh taqne chòq, enh
ka mangai qnoeq creo ka rađeh Rabi! **8** Mahaq pì apaq
dôq wì qnoeq creo ka rađeh Rabi, majah qmang aih dìq
ka pì i mòeq Mangai hnài raq, dìq döng ka pì qmat aih
oh daq dabau. **9** Hadai qmang aih, oe ta cröng taneh kô
apaq creo ka cabô aih baq rađeh, majah qmang aih pì i
moeq ngai Baq raq, haq aih ta Plình. **10** Hadai paq đòèq
cabô creo ka pì mangai hnài, majah qmang aih dìq ka
pì i moeq Mangai hnài raq, aih Christ. **11** Mahaq taqne
pì mangai yeo kèn döng, haq aih èh jah broq hapöng
bài pì. **12** Mangai leq padèch rađeh ka haqnhèq, haq aih
èh jah caqnìh qnoh haqneq, hadai qmang aih, mangai
leq hamon rađeh ka haqneq haq aih èh jah padèch ka
haqnhèq. **13** Hađo ka pì, bài mangai hnài ranenh xam
mangai Pharisi, bài mangai patìah toq enh gùng! Majah

qmang aih pì clenq qmang diac plình enh ngèa wì qnoeq, pì qnhòq lah mùt ta aih mahaq tàng i mangai leq enh nùt aih pì tát đac. **15** Habo ka pì, bài mangai hnài ranenh xam mangai Pharisi, bài mangai patìah toq enh gùng! Pì lam jàp tadiac jàp tago đòeq adràc mangai tiaq trong da pì, jò adràc khoe jah pì broq ka wì aih wìa mangai ta hwinh yi hnau cla pì baiq yàng. (**Geenna g1067**) **16** Habo ka pì! bài mangai ùh xau broq mangai qnung trong, pì doe: Tàng i cabô patô hnim kùh waiq đòeq hu hapah, aih ùh troq cleq, mahaq tàng patô wang oe ta hnim kùh waiq đòeq hu hapah, aih èh ep hlac dèh ka bàu hapah aih. **17** Wùih! Mangai rai blùng rai lua meh, wang xam hnim kùh waiq ma broq ka wang aih jah hadròeh, maleq ma yeo kàn. **18** Pì anoe rameh hòm: Tàng mangai leq patô prang oe tahnim kùh waiq đòeq hu hapah, aih ùh troq cleq, mahaq tàng patô ramènh tadreo oe ta prang đòeq hu hapah, haq aih èh khoe hlac dèh ka bàu. **19** Wùih! mangai lua tau, ramènh tadreo, èh prang mabroq ka ramènh aih jah hadròeh, wa aih maleq ma yeo kàn? **20** Qmang aih mangai leq patô prang ta hnim kùh waiq đòeq hu hapah, aih haq patô xam prang xam ramènh oe ta prang aih, **21** mangai leq patô hnem kùh waiq đòeq hu hapah, aih haq patô xam hnim xam Mangai oe ta hnem kùh waiq aih, **22** mangai maleq hòm ma patô plình đòeq hu hapah, aih haq patô gèq Boc Plình xam Haq ma hangui tagèq aih. **23** Kan habo ka pì, bài mangai hnài ranenh xam mangai Pharisi, bài mangai patìah toq enh gùng! Majah qmang aih pì dèch ka Boc Plình moeq phàn moeq jàt cachiq bốc ha, cachiq xua thùm, cachiq thila, mahaq trong ma yeo

haqnhèq dìq dōng ta ranenh aih pì cađac, aih la kan taq toq, kan loq waq xam manoh ùh tablòq, aih bài yiniq pì ep broq, mahaq hadai ùh jah cađac bài yiniq tau. **24** Wùih! bài mangai ùh xau broq mangai qnung trong, pì doeħ đac pliang roe qyoh mahaq lonh yōc kan o lōcđa kaiq! **25** Haħbo ka pì! bài mangai hnài ranenh xam mangai Pharsi, bài mangai patiħah toq enh għung! Majah qmang aih, dòt doe pì haliang toq enh għung, yāng enh dalam binn bauq toq kan atung kan plai. **26** Wùih bài mangai Pharsi luu mat tau, baxxem aih xài haliang enh dalam adroe, khoe aih enh għung diq đòeq haq hanoh jah hreο. **27** Haħbo ka pì, bài mangai rabiaq trong ranenh xam mangai Pharsi bài mangai patiħah toq enh għung! Majah qmang aih pì tiħħie ka ralunga hanang, palàng taboc toq enh għung waq ka lem, mahaq enh dalam binn toq caxxen hanang xam bài kan truq traq. **28** Pì hanoh qmang aih diq, enh għung aih loh mangai taq atoq, mahaq enh dalam binn toq kan loq patiħah xam yiniq lui. **29** Haħbo ka pì! bài mangai hnài ranenh xam mangai Pharsi, bài mangai patiħah toq enh għung! Pì xħu hanang mangai pajàu, palàng hanang mangai taq atoq, **30** rai doe: Tàng joq benn hadai rih mħeq qnhòng ti wì kan cadraq nèh, benn ùh taqmüt ka wì haq đòeq hu broq ta-ùc mahim mangai pajàu. **31** Qmang aih cla pì panhìn rađeh kô joq qnàng caxi noe bài mangai khoe jēuh đac bài mangai pajau. **32** Qmang aih drah broq beq dôq haq binn dōng ka maneh kan cadraq ma khoe patep. **33** Wùih bài bħi, bài xi noe bħi plōng tau, broq qmang leq pì ma claiħ ka kan hadrah ta hwin. (**Geenna g1067**) **34** Dài aih raq, au ma jah khoe thê bài mangai pajàu,

bài mangai rabiaq loq, xam mangai hnài ranenh trùh ti
pì, taqne wì aih, i ngai pì jêh cađac, tiang đình wì haq
talong pagat, i ngai pì blai wì haq tanđe hnime tagop qyoh,
pì hadai ti hnan rùp wì aih enh gùng kô trùh gùng tau,
35 waq ka dìq dōng ka mahim ùh i đeh ka yiniq lui cleq
dahrôq jàp ta taneh, ta-ùc hlài ta pì, enh mahim Abên
mangai taq atoq trùh mahim Xachari, kon da Barachi,
mangai pì ma khoe jêh cađac ta adreo hnime kùh waiq
xam prang tadreo. **36** Joq qnàng au doe ka pì, dìq dōng
bài yiniq aih èh jah trùh ti caxi noe kô. **37** Jérusalem,
Jérusalem, ìh jêh đac wì mangai pajàu rai yōc hmo tèm
bài mangai au ma khoe thê wì trùh ta pì, khoe bàc yàng
au enh tagop bài kon ìh tìah ka ia kan creo deh kon trùh
hu àm ta caqnàm pananh, mahaq pì ùh waq. **38** Kô èh,
hnime pì cađac klui dōng! **39** Majah qmang aih, au doe ka
pì, kô èh pì pi hnoq au hòm, trùh jò leq pì ma hi doe: Xôq
ramot ka Mangai trùh enh dalam ka yiniq Chuaq!

24 Chuaq Jesus loh enh hnime kùh waiq, jò qnang lam ti
trong, mangai tiaq hōc trùh haten ka haq đòeq patô ka
haq hnoq kan ranhòm ta hnime kùh waiq. **2** Chuaq Jesus
bòch wì aih: “Pì i hnoq dìq dōng rìm yiniq taqmat ùh?
Joq qnàng au doe ka pì, kô èh pi i moeq pliang hmu leq
oe jah taraxon enh crōng hmo leq hòm, dìq ep clìh dōng
taqneq. **3** Jò Chuaq Jesus hangui ta bui wang Ôliu, mangai
tiaq hōc thia crài ti haq, wì doe: ìh anoe ka nhèn loq diq,
bài bàc aih jò leq ma trùh? Qnah hòm i kan halac cleq
mahnu jò ìh trùh, xam hì crōng taneh kô ma hu lùch.
(aiōn g165) 4 Chuaq Jesus padreo bàu: “Ngan oq, paq dôq
cabô padô pì. **5** Majah qmang aih bàc ngai patiah ka yiniq

au đeoq trùh doe: Au kô raq Christ, rai ti aluân bac ngai.

6 Èh pì tàng anoe trùh kan tajêh tablah, xam bàu tajêh tablah: drah wèq rađeh, apaq lèt, majah qmang aih bài yiniq aih ep trùh, mahaq kan atiq lùch qnhòq trùh. **7** Nang noe kô yòng tablêq ka nang noe tau, diac kô tablêq ka diac tau, bac nòe i kan pangot hrah xam taneh ralàng.

8 Mahaq bòe yiniq aih bu qnang baxèm kan habo. **9** Jò aih èh wì rùp tah pì ta kan nanxa hu jêh đac, rìm diac git ka pì ajang yiniq au. **10** Jò aih èh i bac ngai cađac manoh lùi rai blòq dabau rai git ka dabau. **11** Bac bòe mangai pajàu patìah plôh loh rai padô qnùt bac ngai. **12** Nah hòm taiq kan dù rai èh rai bac dài manoh loq waq da bac ngai majah hi loh ka rai èh rai hangeo. **13** Mahaq mangai leq cajap manoh trùh lùch trùh gêh, aih èh ma jah dèch. **14** Bàu lem da diac Boc plinh kô èh jah hnài jàp tnna cröng taneh, đòeq panhìn ka rìm diac. Jò aih èh kan lùch hi trùh **15** Jò pì hnoq kan amùa broq ka raliang nòe hadròeh, pajàu Đaniên khoe anoe trùh (cabô đốc khòh hmàng), **16** jò aih mangai leq oe gùng Jiuđê drah amot tòc ta wang, **17** cabô oe ta kùa po hñim, ùh dùh loh qnhon kùng hang ta hñim, **18** mangai leq oe ta ruàng, apaq wìh hlài ta hñim hu yoc eo. **19** Jò aih, joq hamoq qnàng ka mangai gucadri wê cliac xam mangai cadrì kon oe ùq! **20** Drah waiq khàn dôq pì ùh hìaq ep cadàu glàm jò ralìm, ùh hìaq glàm hì Sabat, **21** Majah qmang aih i kan nan no kàn, jaq enh jò baxèm i cröng taneh trùh hloe manòeq qnhòq hmaq i qmang aih, yac ka atiq kô èh dua pi i qmang aih. **22** Tàng joq bài hì aih ùh qnhùa hlài qnah, ùh i moeq ngai leq oe rìh, mahaq taiq i pì bài mangai ma

khoe jah ràih, bài hì aih ma khoe jah pot hlài qnah. **23** Jò aih, tàng joq i cabô doe ka pì: Ngan! hacô raq Christ, tàng ùh meh doe: Hatau haq, apaq lùi bài aih. **24** Majah qmang aih bac Christ patiah, pajau patiah trùh, broq bac kan halac, tàng majah wì aih trùh hu padô hloe pì aih mangai ma khoe jah ràih. **25** Ngan oq, au khoe chônh doe ka pì adroe. **26** Tàng i mangai leq doe ka pì: Hatau! Haq oe tanòe go hawit, pì apaq lam, tàng ùh meh wì doe: Hacô! haq oe trom hnem. ùh dùh lùi dèh. **27** Majah qmang aih tiah ka kan camlet cađah enh gùng mahì loh cadàu trùh apah mat mahì clìh, Kon mangai trùh hadai qmang aih. **28** Taleq i hanang jam om cachìt, bài cliang apùq dabau ta aih. **29** Kan nanxa ta hì aih bu khoe, mat ma hì tajòe qmòe loh ka clam, mat khê hadai pi qngah, bài halõng taclìh enh plinh, èh bài cleq clài ma oe ta plinh hanoh dalàc. **30** Jò aih èh ta trõc i kan bahian Kon Mangai loh, dìq ka mangai oe ta crõng taneh crò hmoe, jò wì haq hnoq Kon Mangai hangui tayùc, yõc dìq ka cwìang itai xam kan ranhòm kàn, đòeq loh ta qneq. **31** Haq thê deh bình plinh yõc bàu ken dêh đòeq hu tagop bài mangai haq ma khoe ràih loh enh pôn qngèa, enh caqnàm plinh kô trùh caqnàm plinh tau. **32** Manòeq, pì tamàng bàu alìah trùh long põc, jò hamenh nga bu plôh ramot, aih pì loq jò padrang khoe ten trùh. **33** Hadai qmang aih diq, jò pì hnoq bài yiniq kô, pì loq Kon mangai trùh khoe haten. Haq qnang yòng ajang trong qmang. **34** Joq qnàng au doe ka pì: nang noe kô èh ùh lùch, jò bài yiniq tau qnhòq trùh. **35** Plinh crõng taneh kô èh hnhung, mahaq bàu au anoe ùh jò leq hnhung. **36** Mahaq anoe trùh hì aih, jò aih,

ùh i cabô loq, yac ka bìnhanh plìnhanh oe ta plìnhanh, yac ka Kon hanoh ùh qnì, toq cla Baq raq ma loq dèh. **37** Qnhòng Nôe nèh qmang leq, jò Kon mangai hi trùh hanoh qmang aih. **38** Majah qmang aih adroe ka diac kàn, wì acaq, wì ôq, wì atōc ǒng mai, trùh hì Nôe mùt taboang, **39** wì haq ùh lòm qnì qmòe yiniq cleq hu lap trùh kô èh, trùh jò diac kàn trùh glua dìq dǒng, jò Kon mangai trùh hanoh qmang aih diq. **40** Hì aih, baiq ngai oe ta ruàng, moeq ngai jah dèch, moeq ngai đòeq hlài; **41** baiq ngai gucadri, qnang pêh qmau, moeq ngai jah dèch, moeq ngai đòeq hlài. **42** Qmang aih, pì ep hamang oq. **43** Thê pì loq qmang kô, tàng joq cla wì craq ta hnem khoe loq jò leq i mangai atùng trùh, aih ajoq haq hamang đòeq dôq mangai atùng ùh jah mùt dèh ta hnim. **44** Pì hadai ep hamang đòeq qmang aih diq, majah qmang aih Kon mangai trùh wop jò pì ùh ngèh ka haq trùh. **45** Mangai hapõng leq ma ùh ta blòq manoh rai khun rabiaq, wì craq ma khoe dèch haq broq mangai wèq hapõng qnoeq, đòeq hu am ka wì aih dahlwèq acaq troq jò. **46** Xôq ramot am ka haq aih, jò cla wì craq trùh hnoq haq broq qmang aih! **47** Joq qnàng au doe ka pì, haq aih èh wì craq dèch haq broq mangai wèq dìq dǒng kùng hang ta hnim. **48** Mahaq, tàng mangai hapõng qmèq, haq hèm dèh ta cliac: Jò leq wì craq men trùh, **49** aih èh haq hi jêh bài mangai hadai abroq moeq qmang ti haq, rai acaq ôq, taqmùt ti bài mangai bù ka alac. **50** Cla wì craq haq trùh troq hì haq ma ùh ùac, wop jò haq ùh hèm. **51** Cla wì craq jêh haq aih dahit dahoch rai alùh đòeq haq oe moeq qmang ti bài mangai patìah

toq enh gùng, tanèo aih i toq kan crò hmoe rai cadrit hanenh.”

25 Jò aih èh diac plinh tiah ka moeq jàt ngai adrùh sriu, wê ñen lam ñih cla kon õng. **2** Ta aih i padam ngai blùng, padam ngai rabiaq. **3** Da bài mangai blùng wê toq ñen mahaq ùh waq wê ñàu. **4** Da bài mangai rabiaq, wê ñen rai wê ñàu ta cabi. **5** Yàng kon õng xòe trùh, wì haq loh döng ka gù kùi pi hmàng. **6** Trùh qne mang i bàu creo: Kô cla kon õng! Loh ñih haq beq. **7** Khoé aih dìq döng bài guadrùh cadrat enh kùi rai palauq dèh ñen. **8** Bài mangai blùng doe ka mangai rabiaq: lah ka nhèn ñàu pì daq toq biaq diq, ñen nhèn khoe ten pat. **9** Ùh! wì aih padreo bàu, aih èh ma oe tàu ka nhèn xam ka pì. Xan pì cadàu lam tanèo wì ma atech, hu rot ònh ñàu ka cla pì, ma aih ùh hnau hòm. **10** Mahaq jò wì haq qnang lam rot ñàu, cla kon õng khoe trùh. Bài mangai guadrùh ma khoe gòm qmòe jang aih, jah mùt ti haq tanèo acaq yiniang, èh wì hi clenq qmang. **11** Khoé ka aih dùnh wì tau hi trùh diq, wì haq creo: Wì craq, wì craq, pèh ka nhèn qmang diq. **12** Mahaq haq padreo bàu: “Au doe jang ka pì, au ùh qnì ka pì.” **13** Aih èh pì ep hamang ðòeq, majah qmang aih pì ùh loq ka hì, hadai ùh qnì ka jò. **14** Qmang kô hòm, diac plinh tiah ka mangai padon lam hangai, haq creo dèh bài hapõng trùh hu jao dèh kùng hang ka wì aih. **15** Mangai kô haq am padam talàng, mangai tau haq am baiq talàng, mangai qnoeq hòm haq am moeq talàng, tiaq cabô leq hlàt dèh pang leq. Khoé aih haq hi lam. **16** Mangai ma khoe jah padam talàng, drah lam abroq jah tam padam talàng. **17** Hadai qmang aih, mangai ma jah

baiq talàng abroq jah tam baiq talàng hòm. **18** Mahaq da mangai ma jah moeq talàng aih loh lam, chìa moeq toq trom jrùq ta taneh hu catùh đòeq hang wì craq. **19** Atìq ka aih joq dùnh cla craq wì aih wìh hlài creo ka wì haq trùh đòeq hangui hatìngh trong bac jènh. **20** Mangai ma khoe jah padam talàng hi trùh, haq wê tam padam talàng qnoeq hòm rai doe: Wì craq, ìh khoe am ka au padam talàng, hacô au khoe broq jah tam padam talàng qnoeq hòm. **21** Cla wì craq doe ka haq: Wìa! Mangai hapõng jang lem dìq ka manoh, ìh khoe ùh tablòq manoh ka au enh trong qyoh, au dèch ìh broq mangai wèq yeo bàc hòm. Trùh ta kô đòeq beq jah lem bùi ti cla craq ìh. **22** Mangai ma khoe jah baiq talàng hanoh trùh. Haq doe: Wì craq ìh khoe am ka au baiq talàng, ngan kô au khoe jah tam baiq talàng hòm. **23** Cla wì craq padreo bàu ka haq: Wìa! mangai hapõng jang lem ùh talòq manoh, ìh khoe dìq manoh ka au enh trong qyoh, au dèch ìh broq mangai wèq yeo bàc hòm. Trùh ta kô đòeq jah lem bùi ti cla craq ìh. **24** Khoe aih mangai ma khoe jah moeq talàng trùh diq, haq doe: Wì craq, au loq ìh kô mangai ùh jah blià, gat tanèo ìh ùh rai, tagop toch nòe ìh ùh caqnìh; **25** aih ìq dài au yùq crè majah lam cadõc ka hlèp talàng ìh ta taneh. Ngan hacô hang ìh oe raq da ìh. **26** Cla craq haq padreo bàu “Ìh qmat, mangai hapõng ùh wìa waq rai aroh! Ìh khoe loq au gat tanèo au ùh rai, tagop toch tanèo au ùh i caqnìh? **27** loq qmang aih, xài ìh yõc hang qmat aràng tanèo wì padro bac, qmang aih jò au wìh hlài xài au jah yõc hlài xam xèm xam goe haq. **28** Hêq, yõc hlài talàng enh haq qmat am ka mangai ma khoe jah moeq jàt talàng

tau. **29** Majah qmang aih, am tam ka mangai leq ma khoe i, dôq haq jah bình bauq tàu tìa hloe. Mangai ma ùh i, qnhac ka haq i toq xit cleq dua doeh yōc hlài yiniq haq ma khoe jah. **30** Khoe aih mangai hapōng ma ùh wìa waq aih khwênh qnìh đac hloe tanòe clam cluiq, nòe i toq kan crò hmoe rai cadrit hanenh.” Bubi wa trìu **31** Jò Kon Mangai ma hi trùh enh plình, taqne kan ranhòm cla haq xam dìq ka bài bình plình lam tiaq haq, jò aih haq hangui dèh tagèq ranhòm cla. **32** Dìq dōng ka mangai tagop dìq enh ngèa ka haq, èh haq hi lah mangai kô loh khoe ka mangai tau tìah ka mangai ban trìu lah trìu loh khoe ka bubi. **33** Haq đòeq trìu oe pah qma, èh bubi haq đòeq pah qngeo rađeh. **34** Khoe ka aih Bùa hi doe ka mangai oe enh pah qma haq: “Trùh tacô, pì mangai ma khoe jah Baq au am xôq ramot, đòeq hu yōc diac plình khoe padon đòeq ka pì enh jò baxèm broq plình crōng taneh. **35** Majah qmang aih, jò au pangot pì khoe am ka au acaq, au croh ranōng, pì khoe am ka au ôq, Au mangai tamoe ùh canau, pì khoe đìh au mùt đìh ta hnem. **36** Au chac dech, pì khoe taqmàn au, au ùh hrōc yiniq, pì wèq au, wì clêh au pì trùh hmàih ka au. **37** Jò aih bài mangai taq atoq hi padreo bàu ka haq: Chuaq nhèn, nhèn lah hnoq ìh pangot jò leq ma am ìh acaq? Nhèn lah hnoq ìh croh ranōng jò leq ma i am ìh ôq diac? **38** Nhèn lah hnoq ìh broq tamoe jò leq ma hu đìh, ùh meh oe chac dech jò leq ma hu taqmàn. **39** Nhèn lah hnoq ìh ùh hrōc jò leq, lah hnoq wì clêh ìh jò leq ma i lam hmàih ka ìh? **40** Bùa hi padreo bàu: “Joq qnàng, Au doe ka pì, yiniq cleq pì khoe broq am ka mangai leq ma yi hamoq dōng oe taqne wì oh

daq au, aih pì khoe broq ka au.” **41** Khoe aih, haq doe ka wì ma oe enh pah qngeo haq: “Wia ma khoe ka au, pì qmat bái mangai jiāng ka ramòt, lam mùt tanòe ùnh ùh pat khoe palauq đòeq ka kiac dù xam bua da haq. (aiōnios g166) **42** Majah qmang aih au pangot, pì ùh dùh ka am au acaq qmòe cleq, au croh ranōng pì ùh dùh am qmòe ka au cleq hu ôq, **43** Au tamoe hangai, pì ùh đìh au mùt ta hním pì, Au chac dech, pì ùh taqmàn au cleq, au rai ùh hrōc rai oe ta hním tù, pì ùh wiang wèq au.” **44** Dìq ka wì wiang padreo bàu: Chuaq nhèn, nhèn lah hnoq ìh pangot, croh ranōng, ìh tamoe jò leq, ìh chac dech jò leq, yac ka ìh oe ta hním tù jò leq ma ùh patih ka ìh? **45** Bùa padreo bàu: “Joq qnàng au doe ka pì, yiniq cleq pì ma ùh broq am ka mòeq mangai ma yi hamoq dōng oe taqne wì kô, aih pì ùh broq ka au.” **46** Khoe èh, wì aih mùt tanòe baxa mòeq đòe, mahaq bái mangai taq atoq mùt tanòe kan rìh halinh mòeq đòe. (aiōnios g166)

26 Jò Chuaq Jesus khoe hêq ka hnài trong kô, haq doe dèh ka bái mangai tiaq hòc: **2** “Pì loq oe baiq hì hòm hi trùh ramèn Pan cwa, Kon Mangai kô èh wì rùp, wì tiang đinh haq talong pagat.” **3** Jò aih bái pajàu xam bái gucraq mangai Juđa, tagop dabau oe ta hním pajàu kàn, yiniq haq Caiphe, **4** wì aih hatinh ka dabau rùp Chuaq Jesus qmang leq ma hlèp đòeq jêh đac. **5** Mahaq jò ramèn aih ùh dùh yùq ka phù cròng loq tagruàng tagràt. **6** Jò Chuaq Jesus oe ta Bêthani, ta hním Simôn mangai bacùn, **7** I mòeq ngai gucadrì wê mòeq toq abôq ngõc, enh dalam tah bình dàu xua thùm canaq bac, haq thia haten yõc dàu aih pùc ta gàu Chuaq Jesus jò haq qnang haqngui

acaq. **8** Bâi mangai tiaq hōc hnoq qmang aih, wì nōeh haraya, wì doe: Hagleq ma loq racaih hrìn? **9** Dàu kô tech xài jah bac bac, yōc bac aih ajoq jah am ka mangai pa. **10** Chuaq Jeus loq qmang aih, haq doe ka wì: “Hagleq pì ma tapoch ka mangai gucadri kô? Haq khoe broq mōeq yiniq dìq jaq lem ka au. **11** Jò leq ma ùh i ka manga pa oe ti pì, mahaq ma xài jò leq pì xôq i au oe ti pì. **12** Jò haq pùc dàu kô ta chac au, aih haq khoe padon hu lòm chac au. **13** Joq qnàng au doe ka pì, Bâu lem kô jah anoe trùh pang leq ta crōng taneh kô, yiniq haq ma khoe broq ka au hì kô hadai jah anoe trùh đòeq hu hmàng trùh haq.” **14** Taqne moeq jàt baiq ngai tiaq hōc, i mōeq ngai yiniq haq Juđa Icariôt, lam tanđe bâi pajàu kàn **15** Haq bòch wì: Pì am ka au toq leq, tàng joq au rùp haq am ka pì? Aih wì hi am ka haq pi jàt catast bac. **16** Pang aih, Juda toq rap chaq jò hu rùp Chuaq Jesus am ka wì. **17** Hì baxèm ramènh acaq bênh ùh tah blo, bì mangai tiaq hōc thia haten ka Chuaq Jesus, wì bòch: ìh enh nhèn padon ka ìh acaq ramènh Pancwa taleq? **18** Haq padreo bàu: “Pì müt ta plài, glàm mōeq ngai, pì doe ka haq, Mangai hnài nhèn doe: Jò da au khoe ten trùh, au xam bâi mangai tiaq hōc au acaq ramènh Pancwa ta hním ìh.” **19** Mangai tiaq hōc broq qmang ka bàu Chuaq ma khoe thê, aih wì haq hi padon ramènh Pancwa. **20** Jò trōc khoe clam, Chuaq Jesus angèn nòe cađöng ti wì Moeq jàt baiq ngai. **21** Jò wì qnang acaq, haq doe: “Joq qnàng! Au doe ka pì, i moeq ngai taqne pì kô èh blòq au.” **22** Dìq dōng wì ta aih loh ka mangò, khoe ka maleq trùh maleq bòch haq: Chuaq au! ùh xài ìh doe au, ajoq? **23** Chuaq Jesus padreo bàu: “Mangai ma poh tì ta

chrōng kô ti au, aih raq mangai ma hu blōq au.” **24** Kon Mangai loh lam tìah ka bàu ma khoe achìh đòeq ka haq. Mahaq habo ka dađeh mangai ma blōq haq! Apaq hauang loh haq aih xan ka ùh hnau hòm. **25** Juđa mangai ma blōq Chuaq Jesus hadai bòch: Rabi! Joq qnàng ùh xài doe au ajoq èh? Chuaq Jesus padreo bàu: “Joq qmang ka bàu ìh khoe anoe.” **26** Jò qnang acaq, Chuaq Jesus yōc bênh, manè apōi, khoe aih goh bênh hnhu ka mangai tiaq hōc rai doe: “Yōc acaq beq, kô chac au!” **27** Haq yōc chrōng, manè apōi, khoe aih qnèp ka mangai tiaq hōc rai doe: “Dìq ka pì ôq beq! **28** Kô mahim au, mahim da kan tajao khoe dahrôq qnoph dôq bàc ngai jah claih enh yiniq lui. **29** Au doe ka pì, pang kô ta èh, au pi ôq diac plì nho kô hòm, trùh hì au ma hi ôq diac plì nho neo ti pì oe ta diac Baq au. **30** Khoe ka wì calêu bàu hset hadròeh, Chuaq Jesus xam mangai tiaq hōc tōc ta wang Ôliu. **31** Haq doe ka wì: “Mang kô dìq ka pì catoeh dōng ka au! majah qmang aih khoe i bàu achìh: Au jêh mangai ban, Aih èh bài trìu haq hi prah hapriang dōng. **32** Mahaq atìq ka au khoe rìh hlài, au lam mùt ta gùng Galili adroe ka pì.” **33** Mahaq Phiero doe: Yac ka rìm ngai tacro cađac dōng ìh, au dua ùh jò leq cro. **34** Chuaq Jesus padreo bàu doe: “Joq qnàng au doe ka ìh, mang kô raq adroe ka ia rōng, piq yàng ìh hangah đeh ùh qnì ka au”. **35** Dua Phiero doe: Yac ka au ep cachìt ti ìh, dua au ùh hangah rađeh ùh qnì ka ìh. Bài mangai tiaq hōc dìq capoch moeq bàu qmang aih. **36** Khoe aih Chuaq Jesus xam mangai tiaq hōc lam trùh moeq nòe, jang aih wì creo yiniq haq Getsêmanê, haq doe ka wì: “Pì hangui a kô, gòm au lam waiq khàn ajang tau.” **37** Haq qnung

Phiero xam baiq ngai kon calô Sêbêđê tiaq haq, khoe aih haq loh ka mangò, ùh catèm ta manoh. **38** Haq doe ka wì: “Ta mahua yiang au bình kan mangò trùh cachìt. Pì oe ajang kô hu wiang rìu ti au.” **39** Lam tam yi hangai ka aih toq biaq, haq bla-op hadrò ta taneh, rai waiq khàn: “Baq au, tàng loq jah, ìh dèch chrõng kô ma khoe ka au, hnoq anoe aih paq tiaq manoh au, mahaq tiaq manoh ìh.” **40** Khoe aih haq wìh hlài nòe bài mangai tiaq hõc hnoq wì aih khoe hliac dõng. Haq bòch Phiero: “Pì rìu ti au moeq jò dua ùh nui qmòh? **41** Rìu rai waiq khàn dôq pì ùh hìaq clìh ta kan padô qnùt. Mahua yiang aih enh haraya, mahaq chac aih ùh hlàt.” **42** Haq lam tam yàng baiq hòm rai waiq khàn: “Baq au, tàng joq chrõng kô ùh jah lah khoe ka au, dua au ep ôq, waiq manoh Baq ma enh jah gêh.” **43** Jò haq wìh hlài, haq hnoq wì kùi pi hmàng, majah qmang aih mat wì haq khoe tajìp đeh. **44** Haq cađac wì oe ta aih, lam tam mòeq yàng hòm đòeq hu waiq khàn yàng piq, yàng kô dua moeq bàu tìah baiq yàng adroe. **45** Khoe aih haq wìh hlài nòe bài mangai tiaq hõc, haq doe ka wì: “Pì oe raq kùi oe raq padài qmòh? Kô! khoe trùh jò, Kon Mangai kô èh wì rùp haq am ka bài mangai yiniq lui. **46** Yòng! beq bèn lam, hatau mangai blòq au khoe trùh. **47** Jò haq oe raq capoch, cadoe Juđa aih mangai hadai oe ta moeq jàt baiq ngai tiaq hõc, khoe trùh, pi cajaq bài mangai wê ranac, wê chang lam ti haq, aih la bài mangai enh hnìm pajàu kàn xam bài gucraq Juđa thê lam. **48** Mangai blòq Chuaq Jesus khoe tanap ka wì, haq doe: Au hìp cabô, pì rùp mangai aih raq. **49** Lam haten ka Chuaq Jeus, Juđa doe: Joq manè apôi qnàng,

Rabi, khoe aih haq hi hìp Chuaq Jesus. **50** Chuaq Jesus doe: “Ìh lam tacô hu broq cleq, drah broq beq” wì aih hi thia ka haten, rùp Jesus. **51** I moeq ngai oe mòeq qmang ti Chuaq Jeus hroe qnoph chang, jêh mangai hapõng bài pajàu, pot clìh moeq apah don haq aih. **52** Chuaq Jeus doe ka haq: “Qmùt hlài chang qmat ta caqnop, majah qmang aih mangai leq wê chang haq aih èh cachìt dèh ka chang. **53** Ìh ma xoh au ùh jah creo dèh ka Baq drah qnoph ka au loe moeq jàt baiq calùh bình plình qmòh? **54** Qmang aih, broq qmang leq ma xít tiaq bàu Hset hadròeh ma khoe achìh, yiniq kô ep loh qmang kô raq.” **55** Jò aih Chuaq Jesus doe ka wì: “Pì wê chang jaoq, long dùi lam rùp au tìah ka lam rùp mangai atùng. Rìm hì au haqngui hnài ta hnem kùh waiq gleq pì ùh rùp au? **56** Mahaq dìq ka yiniq kô loh qmang kô ðoèq hu pagêh ka hset hadròeh bòe pajàu ma khoe achìh.” Jò aih bòe mangai tiaq hõc ma hi cadàu qnìc ka haq. **57** Bài mangai rùp Chuaq Jesus qnung haq trùh hnem Caiphe, aih mangai pajàu kàn, bài mangai hnài ranenh xam bài gucraq khoe oe qmòe ta aih. **58** Phiero tiaq tayoeh enh hangai trùh ta hamlang hnem mangai pajàu kàn, haq thia hangui pajùm ti bài mangai wèq qmang mùt loh, ðòeq gòm ngan qmang leq ka dèh. **59** Jò aih bài pajàu xam dìq dõng ka wì oe ta hnem hadarh chaq trong tapoch patìah waq ka i nen jêh ðac Chuaq Jesus. **60** Yac ka i bàc ngai tapoch qmùt oe ta aih, mahaq dua wì chaq ùh lòh qmòe moeq yiniq cleq ðòeq broq nen, pulùch i baiq ngai trùh, **61** doe rameh: Mangai kô i doe: Au raliang ðac hnem kùh waiq Boc Plình khoe ka aih piq hì au hi paqnàng hlài. **62** Mangai pajàu kàn padinh yòng

bòch Chuaq Jesus: Bài wì qmat tapoch ka ìh qmang aih, ìh
ùh tapoch hlài qmoeq nà bàu cleq qmòh? **63** Mahaq dua
Chuaq Jesus hatinh. Mangai pajàu kàn doe hòm ka haq:
Au thê ìh patô Boc Plình rìh halinh mòeq đòe đòeq hu
hapah, anoe ka nhèn loq, ìh ajoq Christ kon BocPlình? **64**
Chuaq Jesus tèu bàu: “Wop qmang ka bàu aih, qnah hòm,
au doe ka pì: atìq kô èh pì hi hnoq Kon Mangai hangui
enh pah qma cwìang itai Boc Plình, haqngui ta yùc haq
loh taqneq.” **65** Mangai pajàu kàn hit dèh eo rai doe: Haq
khoe tapoch bàu pi hòq qmang aih, bèn oe ep gòm tam
cabô lam panhìn hòm? Pì khoe tàng bàu pi hòq aih, pì
hèm qmang leq? **66** Dìq ka wì wiang tèu bàu doe: Haq
qmat troq ka cachìt. **67** Wì cachôh ta hadrò haq, ramap
haq, i qnah ngai tep haq. **68** Rai doe: Aleq Christ, tapoch
pajàu beq, doe ka nhèn loq cabô jêh ìh? **69** Jò Phiero oe
raq hangui ta hamlang, i moeq ngai hapõng cadrì thia
haten, doe ka haq: ìh kô hanoh oe ti Jesus, mangai Galili.
70 Mahaq enh ngèa wì aih, Phiero hangah rađeh: Au ùh
qnì tàng qmòe ìh capoch cleq? **71** Jò loh atrong qmang, i
mangai hapõng cadrì qnoeq hòm hnoq haq, hi doe ka wì
ta aih: Mangai kô hanoh oe ti Jesus mangai Naxaret. **72**
Mahaq Phiero rai hangah rai hapah: Au joq ùh qnì qmòe
ka mangai aih. **73** Mòeq ahyàc hòm, bài wì oe ta aih doe:
Joq qnàng ìh hadai qmoeq bua ti wì aih, bàu tapoch ìh
khoe patô qnoh ìh. **74** Phiero tapoch brùaq rai hapah
cadêh: Au ma i loq ka haq aih. Draq drình hloe jò aih raq,
ia hi rõng. **75** Phiero hmàng hlài ka bàu Chuaq Jesus ma
khoe doe: Adroe ka ia rõng, piq yàng ìh hangah đeh ùh

qnì ka au. Khoe aih haq hi loh enh gùng rai lam rai hmoe ra-ua.

27 Trùh sroq èh, bài pajàu xam bài gucraq Juđa, hatinh ka dabau chaq trong tablêq ka Chuaq Jesus hu jêh đac haq. **2** Wì kàt aràng haq ka Philat mangai cla craq wèq dìq gùng aih. **3** Jò aih, Juđa mangai ma blòq Chuaq Jesus, hnoq wì khoe taqmòq yiniq lui ka Chuaq Jesus, rawòe ka rađeh khoe broq qmang aih, haq wê piq jàt cachêh bac aràng padreo hlài da bài pajàu xam bài gucraq, **4** haq doe: au kô khoe broq yiniq, majah qmang aih au khoe blòq cađac mahim ùh i đeh qmoè ka yiniq lui cleq! Mahaq wì aih doe: Aih ìq ep cleq ka nhèn? Lènh ka da ìh. **5** Juđa yōc bac aih khwênh qmùt ta hnim kùh waiq, khoe aih loh enh gùng, lam hanōc rađeh. **6** Bài mangai pajàu toch bac aih, wì haq doe: Bac kô ùh khòh tah tanòe bac hadròeh, majah qmang aih bac kô khoe padrinh. **7** Khoe aih wì hatuàng ka dabau yōc bac aih rot ruàng mangai thòq broq padrì abôq đòeq broq nòe catùh hanang mangai cachit lìq. **8** Aih ìq, trùh manòeq ruàng aih wì oe raq creo ruàng mahim. **9** Qmang aih ma khoe xít tiaq bàu pajàu Jérêmi ma khoe anoe: “Wì yōc piq jàt cachêh bac, aih bac caxènh mangai Israli qnöh ka Mangai wì haq ma tah hadrah, **10** wì yōc bac aih rot ruàng mangai thòq broq abôq padrì, wop qmang ka bàu Chuaq doe ka au.” **11** Jò Chuaq Jesus yòng enh ngèa ka cwan Philat, cwan aih bòch Chuaq Jesus: Ìh ajoq bùa mangai Juđa? Chuaq Jesus padreo bàu: “Joq qmang aih.” **12** Jò dìq dōng ka bài pajàu kèn xam bài gucraq wiang tah hadrah ka haq, haq ùh tèu moeq nà bàu. **13** Philat bòch haq: wì i bàc trong tah

hadrah ka ìh, ìh ma ùh tàng? **14** Mahaq Chuaq Jesus ùh
tèu moeq nà bàu, Philat loh ka dì qjaq hamàih. **15** Rìm
hanam trùh hì ramènh Pancwa, cwan loq canaih moeq
ngai wì ma rùp clêh ta hnim cadrong, tiaq manoh mangai
Juđa ma enh. **16** Jò aih i mòeq ngai xòc i qmoè tiang wì
clêh ta hnim cadrong, yiniq haq Baraba. **17** Jò wì tagop
dabau khoe bàc, Philat bòch wì haq: Pì enh au caqnaih
ka pì cabô? Baraba loq caqnaih Jesus, mangai ma creo
Christ aih? **18** Majah qmang aih cwan aih haq loq jao
manoh wì tarènh dài wì majah rùp aràng Jesus ka haq. **19**
Jò Philat qnang hangui ta gèq hadrah, cadrì haq thê wì
lam anoe ka haq bàu kô: Ùh dùh troq dèh ka mangai taq
atoq qmat, majah qmang aih hì kô jao haq qmat raq dài
au ma khoe ep xalep ta kan apô. **20** Mahaq bài mangai
pajàu kàn xam bài wì gucraq dua àu padô bàc ngai oe ta
aih, dôq wì aih bòch cwan caqnaih Baraba ka wì haq,
èh jêh đac hloe Jesus. **21** Philat bòch wì haq: Wa baiq
ngai kô, pì enh au caqnaih ka pì mangai leq? Wì tèu bàu:
Baraba, **22** Philat doe: Tàng qmang aih ha Jesus, mangai
ma creo Christ kô au broq qmang leq? Dìq döng ka wì
aih tèu: Tiang đinh haq qmat talong pagat! **23** Philat
bòch: Hagleq? haq kô khoe broq cleq ma dù? Mahaq wì
aih cachech yeo đêh hòm: Tiang đinh haq qmat talong
pagat! **24** Jò Philat hnoq bàu rađeh khoe pi blêq wì aih,
mahaq kan tagruàng èh rai đêh, haq yoc diac qnheo đêh
tì enh ngèa bài aih, haq doe: Au ùh pòq mahim mangai
kô, cla pì pòq đêh! **25** Dìq ka wì wiang doe: Mahim haq
mat dahrôq tagàu nhèn xam kon nhèn! **26** Khoe aih haq
caqnaih Baraba ka wì, èh haq thê blai Jesus, khoe aih am

ka wì lam tiang đình talong pagat. **27** Lình cwan aih qmùt Jesus ta hnim kàn, tagop dabau oe dudan ka haq. **28** Wì lêh đac eo haq, caxùnh ònh ka haq eo yôh gòh. **29** Khoe aih, wì tênh moeq toq cadoh yila, pacui tagàu haq. Wì tah moeq catoch cadia ta tì pah qma haq, wì hacùn cràng enh ngèa haq rai halê haq, wì doe: Waiq bùa mangai Juđa. **30** Wì cachôh ta chac haq, yǒc cadia blai tagàu haq **31** Atìq ka wì halê haq, wì lêh đac eo yôh gòh enh chac haq, caxùnh hlài eo da cla haq, khoe hi qnung haq lam đòeq tiang đình haq talong pagat. **32** Jò wì qnang lam ti trong, wì glàm moeq ngai oe ta Siren, yiniq haq Simôn, wì thê haq xùi long pagat. **33** Wì lam trùh ajang nòe wì ma creo Gôgotha (aih la go cadôh gàu). **34** Ta aih wì am Jesus ôq alac clai pajùm ka mat xang, mahaq jò Jesus liah ngan, haq ùh waq ôq. **35** Jò wì khoe tiang đình haq talong pagat, wì pàih panàih đòeq ta axong ka dabau eo yôh haq. **36** Khoe aih wì hi hangui ta aih đòeq gòm ngan haq. **37** Enh qnhèq ka gàu haq, wì đòeq moeq capiac long ban, wì achìh yiniq lui haq: KÔ RAQ JESUS, BÙA MANGAI JUĐA. **38** Hanoh jò aih diq, wì tiang đình baiq ngai atùng ti haq, moeq ngai apah qma ka haq, moeq ngai apah qngeo ka haq. **39** Bài mangai lam pagat trong aih hnoq haq, wì do halê rai ngu ngùu gàu, **40** wì doe: ìh mangai ma doe đeh raliang hnem kùh waiq, èh dìq piq hì raq hi broq hlài, doeoh rađeh beq! Tàng joq ìh kon Boc Plình, loh enh long pagat beq! **41** Bài pajàu kàn xam mangai hnài ranenh hloe xam bài gucraq hanoh lê haq: **42** Wì doe: Haq khoe đèch bàc ngai qnoeq mahaq doeoh rađeh ùh jah. Tàng ìh joq bùa mangai Israli, manòeq loh enh qmat beq, aih

nhèn men lùi. **43** Haq canòm ka Boc Plình, tàng joq Boc Plình loq waq ka haq, manòeq ajoq Boc Plình khe doeh haq, majah qmang aih haq khoe doe đeh kon Boc Plình. **44** Wa mangai atùng wì ma khoe tiang đìnħ talong pagat ti haq, hadai hnap ka haq qmang aih. **45** Pang jò qne hì, trùh piq jò xèq aih, dìq ka gùng aih tróc loh ka clam cluiq. **46** Qnah ta piq jò, Chuaq Jesus creo ka dēh: “Êli, Êli, lam-ma-sa-bat-ta-ni?” Bàu aih iq rameh: Boc Plình au, Boc Plình au, Gleq ĩh majah cađac au? **47** Wì yòng haten ka aih, tàng bàu haq, wì doe: Haq creo ka Êli. **48** Tajòe qmòe i moeq ngai tùh yōc moeq cato capaih, chùq ta diac jòq, srep agoe long cadia, dèch am ka Haq ôq. **49** Mahaq qnah ngai qnoeq doe: Dôq haq, ngan Êli i trùh dèch haq ùh? **50** Jesus creo tam moeq nà bàu dēh, khoe aih qnèp dèch dèh mahua yiang ka Baq. Haq hi pat. **51** Wop jò aih, bai prinh haganh ta hnim kùh waiq dahit enh qnhèq trùh taqneq, loh baiq apah, taneh loh ka ralàng, hmo kàn padah, **52** ralùng hanang tapèch, bàc hanang mangai tiaq trong hadròeh cachìt rìh hlài. **53** Atìq ka Chuaq Jesus rìh hlài, bài wì aih loh enh ralùng hanang, mùt ta Plài hadròeh, mahno rađeh ka bàc ngai jah hnoq. **54** Cla craq lindh xam bài mangai oe ti haq đòeq wiang gòm hanang Chuaq Jesus, hnoq taneh ralàng, xam bàc yiniq qnoeq hòm, haq dìq jaq yùq crè, haq doe: Mangai kô, joq kon Boc Plình. **55** Bàc ngai gucadri yòng haqmiang đeh enh hangai, wì haq aih bài mangai ma tiaq Chuaq Jesus enh gùng Galili, tiaq đòeq patih ka haq, hanoh oe ta aih. **56** Ta aih i Mari Mađolen, Mari miq Jaco xam Jôsep, xam miq baiq ngai kon Sêbêđê. **57** Trùh mahì khoe haqneq, i moeq

ngai padrōng trùh enh gùng Arimathê, yiniq haq Jôsep, haq aih hanoh mangai tiaq hốc Chuaq Jesus, **58** haq trùh ta Philat đòeq hu bòch ahlài hanang Chuaq Jesus. Philat hi am ka haq. **59** Jôsep yốc bai taboc lom hanang Jesus. **60** Lam đòeq ta ralùng haq ma neo thê wì pùng đòeq ka rađeh tanèo hmo kàn, khoe aih, wì cadro moeq toq hmo kàn padit ajang ngah ralùng, khoe aih èh hi bròc. **61** Mari Madolen, xam bài wì qnoeq hangui tangèa ka ralùng. **62** Sroq èh rameh (aih hì atìq ka hì ma padon acaq ramènh), bài pajàu kànx am mangai Pharisi adràc dabau lam glàm Philat, **63** wì haq doe: Wì craq! Nhèn hmàng mangai loq qnùt kô, jò haq oe rìh i doe rameh: Atìq ka piq hì, au hi rìh hlài. **64** Manđeq kô, lìh am lình lam gòm ralùng hanang ma hagau haq, trùh piq hì, yùq bài mangai tiaq hốc haq loq lam atùng hanang, khoe aih anoe ka phù cròng: Haq khoe rìh hlài enh kan cachìt. Kan qnùt yàng ma atìq kô yeo hamoq ka yàng adroe hòm. **65** Philat doe ka wì: Pì i dèh lình, lam broq tiaq dèh manoh pì ma enh beq. **66** Qmang aih, wì haq hi lam, nìm hadro ajang ngah ralùng, yốc lình đòeq gòm, cla hnoq dèh hagau haraya.

28 Atìq ka hì Sabat, hì baxèm ta tuàng ramènh, jò bu badrèh qngah, i Mari Madolen xam Mari qnoeq hòm, lam ta ralùng hanang. **2** I kan taneh ralàng dêh, majah qmang aih i mòeq bìngh plình Chuaq loh enh plình, trùh cadro hmo, èh haq hangui enh qnhèq ka hmo aih. **3** Hadrò haq qngah tìah ka camlet, eo haq taboc tìah ka yiloc. **4** Dài aih, bài lình gòm ralùng tarìt tariang, gang tìah ka mangai cachìt. **5** Mahaq bìngh plình doe ka wì mangai gucadri: Chôp paq yùq dèh, au loq chôp chaq Chuaq Jesus

mangai wì ma tiang đình haq talong pagat. **6** Haq ùh oe tacô, haq khoe rìh hlài, tìah ka bàu haq khoe doe. Drah lam ngan nòe taqnguì haq beq, **7** èh drah lam anoe ka bua Haq loq haq khoe rìh hlài. Hacô Haq lam adroe ka pì tòc ta Galili, ta aih èh pi hi hnoq haq. Aih au khoe doe ka pì. **8** Wa mangai cadrì aih drah loh enh ralùng, rai yùq crè rai manè, tùh cadàu lam anoe ka bài mangai tiaq hốc. **9** Ùh xài! Chuaq Jesus loh glàm wa aih, haq doe: “Lem bùi am ka chôp!” Wa haq tùh haten ta haq, cwat jènh rai kùh waiq haq. **10** Chuaq Jesus doe: “Apaq yùq cleq, drah lam anoe ka oh daq au tòc ta Galili, ta aih èh wì jah hnoq au. **11** Jò wa mangai gucadrì qnang lam roc trong, i qnah ngai lình gòm ralùng hanang mùt ta Jérusalem taqmon hlài ka bài pajàu loq dìq döng rìm yiniq. **12** Bài pajàu kàn tagop pajùm ka bài gucraq đòeq hu hatinh ka dabau, jò khoe hatinh, wì haq am ka bài mangai lình bac bac, **13** wì haq tanap: Pì doe rameh oq: Damang, jò nhèn oe kùi, bài mangai tiaq hốc haq atùng yōc hanang aràng taqnoeq. **14** Tàng bàu kô loq trùh don cwan kàn, i nhèn chaq trong hu anoe ka haq, dôq pì ùh hìaq ep yùq cleq. **15** Bài lình yōc bac, wì haq broq tiaq bàu tanap aih. Tagùng Juđa, bàu aih oe raq trùh manoèq. **16** Moeq jàt moeq ngai tiaq hốc lam ta gùng Galili, wì haq tòc ta wang Chuaq Jesus ma khoe thê. **17** Jò wì hnoq haq, wì kùh waiq haq, mahaq i biaq ngai, qnhòq dai lùi. **18** Chuaq Jesus lam ka haten ti bài mangai tiaq hốc, haq doe ka wì qmang kô: “Dìq ka cwìang itai oe ta plìnhan xam ta cröng taneh khoe jao döng ka au. **19** Qmang aih, drah lam jàp cröng taneh đòeq broq ka mangai oe rìm diac wìa döng mangai tiaq hốc au, canòm

ka hiniq Baq, hiniq Kon, hiniq Yiang Hadròeh đòeq broq
baptem ka wì, **20** rai hnài wì wèq rìm trong au khoe hnài
pì. Kô èh au oe hloe ti pì trùh hì atìq lùch. **(aiōn g165)**

MÕC

1 Baxèm Bàu lem da Chuaq Jesus Christ, kon calô Boc Plinh. **2** Tiah ka khoe achìh tanòe hset pajàu Êsai rameh: Kô au thê dèh mangai wê bàu lam enh ngèa ka ìh, Haq aih mangai đòeq hu palauq ka ìh trong. **3** I bàu creo tanòe hawit, Palauq đòeq trong ka Chuaq, Pajang trong lam ka haq. **4** Jon Baptit khoe trùh tagùng hawit, hnài rai broq ka wì ramènh baptem da kan raxach, dôq jah kan caqnaih yiniq lui. **5** Dìq döng cròng diac Juđa xam mangai oe ta Jérusalem trùh dìq ta haq. Anoe paqnoh dèh yiniq lui rai dôq haq broq baptem ka wì ta diac Jodan. **6** Jon caxùnh eo broq enh xàc lõcđa, kàt caqnam xam caxi akia, acaq toq bài lìp rai ôq diac xùt rôm wang. **7** Haq hnài rameh: Atìq ka au kô èh, I mòeq ngai i cwìang ùh hnau ka au, au ùh tajì ka jah broq đeh mangai kùp lêh caxi jep haq, **8** au broq baptem ka pì xam diac, mahaq Haq aih èh broq baptem ka pì xam Yiang Hadròeh. **9** Jò aih Chuaq Jesus trùh enh Naxaret gùng Galili, haq dôq Jon broq baptem ka rađeh ta diac Jodan. **10** Jò Jesus bu loh enh gùng ka diac, haq hnoq plinh tapèh èh Yiang Hadròeh tiah ka trù, loh jràp ta haq. **11** Èh i bàu loh enh plinh doe: “Kô Kon da Au loq waq dèh, haq lem manoh Au rìm trong.” **12** Jò aih raq, Yiang Hadròeh qmùt haq tagùng hawit. **13** Èh haq oe tanòe hawit aih pôn jàt hì, dôq Satan padô rađeh. Haq oe pajùm mòeq qmang ti bài ngè rôm, khoe èh i bình plinh trùh patih ka haq. **14** Atìq ka wì rùp clêh Jon. Chuaq Jesus trùh ta Galili hnài Bàu lem da Boc Plinh. **15** Haq doe: “Khoe trùh jò! Diac Boc Plinh trùh khoe haten, drah raxach rai lùi Bàu lem beq. Jesus creo

ka mangai tiaq hōc ma baxèm **16** Jeus lam jènh ti haqmai diac raxìq Galili, haq hnoq Simôn xam oh haq, qnang tang hlàm ta hlōng, majah qmang aih wa aih dìq mangai ranang ka. **17** “Drah tiaq Au, dôq au hu thê chôp lam tang hlàm mangai.” **18** Jò aih raq, wa cađac dōng dèh hlàm lam hloe ti haq. **19** Chuaq Jesus lam hi hangai ka aih toq biaq, haq hnoq Jaco kon Sêbêđê xam oh haq oe ta boang, qnang padon dèh hlàm. **20** Ùh lòm trò, Haq creo ka wa aih, èh wa oh daq aih đòeq Sêbêđê baq wa haq, oe ta boang ti bài mangai broq acaq kùng, đòeq tiaq haq. **21** Wì haq lam ta Cabênaum, trùh hì Sabat, Chuaq Jesus mùt tanòe hnim tagop qyoh, haq hnài wì. **22** Dìq ka mangai oe ta aih hamàih ka bàu haq hnài, majah qmang aih bàu haq hnài wì tìah ka mangai i cwìang itai, ùh xài troeq da bài mangai hnài ranenh. **23** Hanoh jò aih, tanòe him tagop qyoh i moeq ngai kiac pawè, **24** haq creo: Jesus, mangai Naxaret, ìh enh broq cleq ka nhèn, ìh trùh hu palùng đac nhèn qmòh? Au loq ìh qmat cabô: ìh, Mangai hadròeh da Boc Plinh. **25** Chuaq Jesus tapoch ka haq: “Oe ma hatinh haq! Drah loh khoe ka mangai kô!” **26** Kiac jròng rapôh mangai aih, rai cachech cadêh èh hi loh hloe enh gùng ka mangai aih. **27** Mangai leq mangai meh hamàih đeh hra, wì bòch dabau: Cleq kô ìq wa, kô trong hnài maneo qmòh? Mangai kô joq i cwìang, trùh kiac jròng dua iu bàu haq thê! **28** Yiniq haq wì ràu, maloq khoe jàp dudan gùng Galili. **29** Bu loh enh nòe hnim tagop, Chuaq Jesus xam mangai tiaq hōc lam ti Jaco xam Jon mùt ta hnim Simôn xam An rê. **30** Miq mai Simôn tacat qnang caqnùng ta juàng, wì drah anoe ka Chuaq Jeus loq. **31** Chuaq Jesus

lam trùh nòe haq kùi, carùp tì rai dèch haq yòng. Kan tacat hi hnhung, èh haq hi patìh ka wì. **32** Xèq aih, jò mahì khoe clìh, wì aràng bòe mangai ùh hrōc xam bài mangai i kiac pawè trùh ka Chuaq Jesus. **33** Dìq dǒng ka mangai oe ta plài, tagop dabau yòng ajang qmang hnim, **34** Chuaq Jesus broq bàc ngai brêh ka yinìq. Haq hadai drùh qnöh bàc kiac, mahaq Haq ùh lòh bài kiac doe cleq, majah qmang aih bài kiac aih loq ka haq. Jesus waiq khàn tanòe hawit **35** Sroeh sroq, jò trōc oe raq clam, Chuaq Jesus loh enh hnim lam tanòe hawit, haq waiq khàn ta aih. **36** Simôn xam bài bua lam chaq haq, **37** Jò hnoq Haq, wì doe: Rìm ngai qnang ti chaq iħ. **38** Chuaq Jesus padreo bàu: “Beq bèn lam taqnoeq, trùh roc plài haten ta kô, dôq au hu hnài ta aih. Jao aih iq raq au majah khoe trùh.” **39** Haq lam jàp gùng Galili, hnài ta hnim tagop qyoh rai drùh qnöh kan kiac. **40** I mòeq ngai bacùn trùh ti Haq, rai hacùn cràng rai waiq: Waiq Chuaq! Tàng joq iħ ma waq, iħ broq au brêh. **41** Chuaq Jesus tamèt ta manoh, haq hnho tì bèq mangai bacùn aih, haq doe: “Au waq, brêh beq.” **42** Tajòe qmòe, kan bacùn hnhung hloe haq aih hi jah brêh. **43** Chuaq Jesus thê haq aih loh enh gùng rai tanap: **44** “Ngan oq! Ùh jah anoe ka cabô loq. Mahaq iħ lam patô rađeh enh ngèa ka bài pajàu, iħ khoe jah brêh qmat, iħ dèch ramènh troeq bàu Môise thê đòeq anoe patô ka wì.” **45** Yàng èh, loh enh gùng, haq bahìa yiniq kô, lam pang leq haq anoe pang aih, jaq Chuaq Jesus loh ka pi jah mùt ta plài ka lem, haq ep oe đeh enh gùng, oe tanòe hawit, èh wì phù cròng jàp jìa trùh ti haq.

2 Biaq hì atìq ka aih, jò Chuaq Jesus wìh hlài ta Cabênaum, wì ta aih tàng doe haq oe ta hnem. **2** Wì tagop dabau ta aih bac joq qnàng. Jaq ajang trong qmang dua ùh anòh oe. Haq hi hnài wì. **3** I mangai trùh, aràng ka haq mòeq mangai pen, i pôn ngai wiang tòng. **4** Mahaq mangai bac hrìn wì haq ùh jah trùh ka haten ka Chuaq Jesus, wì haq hit kùa po hnim tajang ka nòe Chuaq Jesus hangui, jang nòe trom aih wì cadrai qnoh mangai pen. **5** Jò Chuaq Jesus hnoq kan lùi wì aih, Haq doe ka mangai pen: “Kon ôi, dìq döng yiniq lui kon khoe jah caqnaih”. **6** Mahaq i biaq ngai hnài ranenh hangui ta aih, wì haq hèm dèh ta manoh, **7** Hagleq mangai kô majah doe qmang aih? Haq jòq pi hòq qmòe ka Boc Plình! Enh gùng ka Boc Plình oe i cabô ma jah caqnaih yiniq lui? **8** Ta jòe qmòe jò aih, Chuaq Jesus loq ka manoh wì aih hèm cleq, Haq doe ka wì: “Hagleq pì majah hèm qmang aih? **9** Manoèq kô doe ka mangai pen kô: Yiniq lui kon khoe jah caqnaih, tàng ùh meh doe: Yòng beq! Dèch da ìh dradrah qmat hlài beq! Baiq bàu aih ma leq ma yi hlàu ka anoe? **10** Mahaq Au enh ka pì loq Kon mangai oe cröng taneh kô i cwìang caqnaih yiniq lui”, khoe aih Chuaq Jesus doe ka mangai pen, **11** “Au thê ìh yòng beq, xùi dradrah qmat hlài ta hnim”. **12** Mangai pen padinh yòng, dèch dèh dradrah lam enh ngèa dìq döng ka wì. Dìq döng mangai leq mangai meh hamàih đeh hra, wì manè apôi Boc Plình rai doe: Bèn qnhòq hmaq hnoq kan halac qmang kô! **13** Chuaq Jesus wìh hlài kênh haqmai diac raxìq hòm. Haraya mangai trùh ti haq, haq hi hnài wì. **14** Jò Haq qnang lam ti trong, haq hnoq Lêwi, kon da Aphê qnang hangui ta hnim yoc

thèq. Chuaq Jesus doe ka haq: “Lam tiaq au.” Lêwi hi padinh yòng tiaq hloe haq. **15** Jò Chuaq Jesus hangui acaq ta hnem Lêwi, i bàc ngai yōc thèq xam bài mangai broq trong ùh lem hanoh hangui acaq moeq qmang ti Chuaq Jesus xam mangai tiaq hōc haq. **16** Jò mangai hnài ranen aih bài mangai moeq bua ka mangai Pharisi hnoq Chuaq Jesus acaq ti bài mangai yōc thèq xam bài mangai broq trong ùh lem, wì bōch bài mangai tiaq hōc haq: Gleq Haq ma acaq pajūm ti bài mangai yōc thèq xam bài mangai i yiniq lui? **17** Tàng bàu aih, Chuaq Jesus hi doe ka wì: “Mangai tadēh ùh nhet cleq ka mangai broq jreо, mahaq mangai ùh hrōc ma nhet đeh, au trùh ùh xài đòeq creo ka mangai taq atoq mahaq đòeq creo ka mangai i yiniq lui”. **18** Jò aih, mangai tiaq hōc da Jon xam mangai ma tiaq hōc da mangai Pharisi dìq apàm ka acaq. I mangai trùh bōch Chuaq Jesus: Hagleq mangai tiaq hōc da Jon xam mangai ma tiaq hōc da mangai Pharisi dìq apàm ka acaq, mangai tiaq hōc da iħ ma ùh apàm? **19** Chuaq Jesus doe: “Jò acaq yineang, bài bua cla Kon ᠀ng ma wìa ka apàm ka acaq jò cla kon ᠀ng oe raq ti wì? **20** Mahaq, trùh jò wì ma hi qnung cađac Haq, hì aih èh wì ma hi apàm ka acaq. **21** Ùh i mangai leq yōc ahyah neo clep qmùt ta blah eo dùnh, broq qmang aih, calep neo dùng hyah ka eo dùnh, teo hyah aih rai hamoq ùh hnau ka adroe hòm. **22** Hanoh ùh i mangai leq yōc alac neo ùc qmùt ta abōq akia dùnh, broq qmang aih, alac broq ka abōq akia padah, alac ta-ùc, abōq akia hanoh pi oe. **23** Wop hì Sađat, Chuaq Jesus xam mangai tiaq hōc lam trong đùng qmau, jò lam ti trong, mangai tiaq hōc git hadròc qmau hu kaq. **24**

Mangai Pharisi hnoq, wì doe ka haq: ìh ngan tau, hagleq mangai tiaq hōc ìh broq yiniq ma ùh khòh broq ta hì Sabat? **25** Chuaq Jesus doe: “Pì ma qnhòq đōc ta hset, bùa Đawit broq cleq jò haq xam mangai tiaq haq pangot qmòh? **26** Qnhòng Abitha broq pajàu kàn, bùa aih mùt tanòe hnim kùh waiq Boc Plình, bùa aih acaq bênh wì ma padon, hadai am ka wì ma lam tiaq haq acaq diq, hi loq bênh aih toq bài mangai pajàu ma khòh acaq?” **27** Khoe aih, Haq doe: “Taq kon mangai kô majah broq loh hì Sabat, ùh xài jao hì Sabat ma jah broq loh kon mangai. **28** Qmang aih, Kon Mangai broq craq hì Sabat.”

3 Yàng qnoeq, Jesus mùt tanòe hnim tagop qyoh, ta aih i mòeq ngai gucalô ngwen moeq pah tì. **2** Ta aih i qnah ngai rap chaq nen hu rùp haq, wì hamrìh ngan hì sabat haq i broq brêh ka mangai aih ùh, đòeq hu tah hadrah ka Haq. **3** Chuaq Jesus doe ka mangai angwen tì: “Yòng beq! lam oe taqne kô.” **4** Khoe èh Chuaq Jesus bòch wì: “Tiaq ranenh hì Sabat, broq trong leq ma troq! Khòh broq trong lem loq khòh broq trong qmèq? khòh dèch mangai, loq khòh jêh cađac mangai?” Mahaq dìq ka wì oe hatinh dōng. **5** Haq haqmiang ngan dudan ka wì, rai nòeh rai mangò ka manoh wì ma cadoq hrìn, khoe aih haq doe ka mangai angwen tì: “Hnhu tì ìh qmat!” haq aih hi bahnhoh dèh tì, aih tì haq hi brêh. **6** Bài mangai Pharisi loh hloe jò aih raq, wì drah taqmùt pajùm ti bua Hêrot đòeq hatinh ka dabau chaq trong jêh đac Jesus. **7** Chuaq Jesus xam mangai tiaq hōc wia enh aih, wì haq loh ta haqmai diac raxìq, haraya mangai trùh enh gùng Galili, Juđê **8** enh Jêrusalem, gùng Ydumê, wì pah tau cròng

diac Jođan, hloe xam gùng Tyro gùng Siđôn, hìa tàng bài yiniq haq ma khoe broq, wì trùh dìq ta Haq. **9** Mangai bàc pi cajaq, haq hi thê dèh mangai tiaq hōc palauq đòeq ka haq mđeq toq boang qyoh, dōq wì ùh hìaq dahnen ka haq. **10** Haq khoe broq bàc ngai jah brêh ka hinìq, aih ìq bài mangai ùh hrōc majah àu hnen waq ka jah bèq Haq. **11** Jò bài kiac dù hnoq Chuaq Jesus, wì bla op anòe jènh haq, rai breo: ìh kô kon Boc Plình! **12** Mahaq Chuaq Jesus ùh lòh wì aih anoe ka cabô loq ka haq. **13** Khoe aih, Chuaq Jesus tōc ta wang, haq creo ka bài mangai haq ma enh, wì aih hi trùh ti haq. **14** Haq hi ràih yōc moeq jàt baiq ngai, đòeq hu oe ti haq, èh đòeq haq hu thê wì loh lam hnài bàu lem, **15** Haq am ka wì aih cwìang itai đòeq drùh hnan kan kiac. **16** Kô! yiniq wì moeq jàt baiq ngai tiaq cla Haq ma khoe dì: Simôn, Haq yiniq hlài Phiero, **17** Jaco xam Jon oh haq, wa aih kon Xêbêđê, Haq yiniq am ka wa Bô-a-net (aih la kon calô da kan camlet kan cađah), **18** Anrê, Philip, Bathêlemy, Mathio, Thôma, Jaco kon da Aphê, Thađê, Simôn, mangai Canaan, **19** Hloe xam Juđa Icariôt, mangai ma blòq đac Haq. **20** Atìq ka aih, Chuaq Jesus mùt tanòe hnim, i bàc ngai tagop dabau ta aih, Chuaq Jesus xam mangai tiaq hōc loh ka pi jah acaq. **21** Jò wì oh daq Haq tàng qmang aih, wì trùh đòeq hu padràng haq, majah qmang aih wì doe haq khoe rawè. **22** I bài mangai hnài ranenh loh enh Jérusalem, wì aih doe: Mangai qmat, kiac Bênxebun khoe mùt ta chac haq, haq qmat canòm ka cla craq kan kiac đòeq drùh qnöh kiac. **23** Chuaq Jesus creo ka wì aih, haq alìah ka wì: “Satan hnan cla Satan qmang leq majah? **24** Tàng joq diac leq to lah

rađeh, diac aih èh pi dràng yòng, **25** Hnim leq, to lah rađeh, hnim aih èh hadai pi dràng yòng. **26** Qmang aih, tàng joq Satan yòng tablēq ka cla rađeh, aih ajoq haq hit dađeh, haq yòng qmang leq ma oe dràng, ajoq haq khoe trùh dèh jò lùng pac. **27** Ủh i mangai leq jah mùt ta hnim mangai dêh padren đòeq hu atùng, tàng joq ùh kàt đòeq cla mangai aih adroe, ep kàt cla haq aih òeq, khoe aih men jah atùng yđc hang ta hnim haq. **28** Au anoe joq qnàng ka pì, yiniq lui kon mangai dìq jah caqnaih dōng xam rìm nà tapoch qmèq ka Boc Plình hanoh qmang aih.

29 Mahaq cabô tapoch qmèq ka Yiang Hadròeh, yiniq lui aih ùh jò leq jah caqnaih, haq pòq hloe dèh mòeq đòe".

(aiōn g165, aiōnios g166) **30** Chuaq Jesus ma jah doe qmang aih, jao wì aih doe: i kiac oe ta chac haq. **31** Jò miq Chuaq Jesus xam bài oh haq trùh, wì aih yòng enh gùng, thê mangai lam doe ka Haq. Bài mangai bac dua oe raq du danh ka Haq. **32** I mangai lam doe ka Haq: Miq xam oh ìh wì oe enh gùng, wì enh chaq ìh. **33** Mahaq Haq doe ka wì: "Cabô miq au, cabô oh au?" **34** Haq ngan wì ma hangui tap dan ka haq rai doe: "Hatau miq au, xam bài oh daq au!" **35** Mangai leq broq tiaq manoh Boc Plình, aih raq oh daq calô, oh daq ca drì, aih raq miq au.

4 Chuaq Jesus hnài hòm tanèo haqmai diac raxiq. I bac ngai tagop ti dabau oe dudan ka haq. Haq cadiang tòc hangui ta boang, bài wì mangai bac oe dìq tago ti kenh haqmai diac. **2** Haq yđc bàu alìah hnài wì bac trong, Jò hnài wì, haq doe: **3** "Tamàng kô, i mòeq ngai lam rai dèh adrech. **4** Jò haq qnang rai adrech, i tang qnah adrech taclìh ti trong lam, khoe aih i chìm loh jôh caq dōng; **5**

qnah hòm taclìh tanòe hmo raga, ta aih taneh toq biaq, adrech aih rên plôh, majah qmang aih taneh catùh ùh jrùq. **6** Mahaq jò mat mahì tōc haqnhèq, kan tōq jraq, haq hi cachìt ka croh, majah qmang aih haq ùh i ka riah. **7** Mòeq qnah hòm taclìh ta xèm yila, xèm yila èh rai cràm, padit cađac haq loh ka pi hrōc sròc. **8** Maqnoeq taclìh nòe taneh lem, jah yòng kàn, loh ka tacon, mòeq pliang jah piq jàt, mòeq pliang jah tadràu jàt, pliang qnoeq jah moeq hrinh.” **9** Khoe aih Haq doe: “Cabô i don, tamàng beq!” **10** Jò Chuaq Jesus oe đeh moeq ngai, bài wì ma oe dudan xam mòeq jàt baiq ngai tiaq hōc bòch haq bàu alìah aih anoe cleq. **11** Haq doe ka wì: “Kan hlèp oe ta diac Boc Plình khoe patô am ka pì loq. Mahaq bài wì ma oe enh gùng tau, rìm yiniq dìq anoe ka wì xam bàu alìah.” **12** Qmang aih dôq wì ngan mahaq ùh hnoq cleq, tamàng aih tàng, mahaq ùh qnì cleq, ùh qmang aih wì tawìh hlài ajoq wì haq jah claih đèh yiniq lui.” **13** Khoe ka aih Haq doe ka wì: “Pì ùh qnì tàng bàu alìah aih qmòh? Aih èh broq qmang leq pì ma loq tàng rìm bàu alìah qnoeq? **14** Mangai loh rai adrech aih mangai rai bàu lem. **15** Mangai oe ti trong, aih mangai khoe jah bàu mùt ta manoh, mahaq bu tàng bàu aih, tajòe hloe jò aih raq kiac Satan trùh blah yōc hloe bàu ma khoe rai ta manoh wì haq. **16** Hadai tìah ka qmang aih diq, mangai jah adrech taclìh nòe raga, aih bài mangai bu tàng bàu khoe dìq jaq lem bùi yōc ka rađeh. **17** Mahaq ta manoh cliac wì haq ùh i ka riah, rìh toq biaq hì, glàm kan tagah, kan baxa taiq bàu aih, wì tacro draq drình jò aih raq. **18** Èh da bài mangai qnoeq hòm, tìah ka adrech cìh nòe xèm yila, khoe tàng bàu, **19**

mahaq loq lèt ka rìh qmòe qnhòng kô, enh waq toq ka padrõngkan, xam bâi yiniq qnoeq hòm mùt ta manoh wì haq wiang padit cađac, bàu lem loh ka pi caqmon. (aiōn

g165) 20 Mahaq mangai qnoeq hòm, tìah ka adrech taclìh nòe taneh lem, aih bâi mangai tàng bàu, wì wê yōc bàu aih, loh plì, mòeq pliang jah piq jàt, pliang qnoeq jah tadràu jàt, pliang qnoeq jah moeq hrinh”. **21** Haq doe hòm ka wì: “I cabô bùh đen mahaq gùp xi cađap tàng ùh meh đòeq ta caqnàm jùang loq ùh? Ma ùh xài đòeq tanòe haqnhèq? **22** Majah qmang aih ùh i cleq hlèp èh wì ma ùh hnoq, ùh i yiniq leq cadoc èh wì ma ùh paqnoh. **23** Tàng cabô i don, tamàng beq”. **24** Haq doe hòm: “Rabiaq haq oq, rìm trong pì ma tàng, pì tõng xam ranac leq, ranac aih raq wì ma hu tõng hlài ka pì, ra-ùng haq tah tam ùh hnau ka aih hòm. **25** Majah qmang aih, brì ka am tam ka mangai leq khoe i, mahaq mangai leq ma qnhòq i, doeh yōc hloe yiniq haq ma khoe i”. **26** Haq anoe hòm: “Diac Boc Plình tìah ka mangai rai adrech ta taneh, **27** yac cla haq aih kùi, yac cla haq rìu, dahì damang ardech aih dua plôh đeh, cla haq ma i loq qmang leq. **28** Majah qmang aih taneh broq dèh ka long aih loh plì, baxèm aih loh long, atìq aih loh riang, khoe aih riang loh plì. **29** Jò plì hi dùm, haq hi qnoh pla haiq, majah qmang aih khoe trùh jò gat.” **30** Haq doe hòm: “Bèn yōc cleq hu alìah ka diac plình kô èh, yōc kan patìah leq đòeq hu paqnoh? **31** Diac aih tìah ka adrech habài: Jò wì rai haq aih yeo qyoh dìq dõng ka adrech qnoeq. **32** Mahaq jò khoe rai, haq hi jah plôh, haq yeo kàn dõng ka cachiq qnoeq, loh hamenh kàn, jaq chìm met lam broq qmòe pù ta aih.” **33** Haq yōc

bàc trong alìah qmang aih, đòeq hu hnài wì rìm trong, tiaq dèh wì bu loq tàng dàng leq. **34** Yac ka jò leq hnài wì dua haq yōc bàu alìah đòeq hu hnài, mahaq jò ùh i ka mangai qnoeq, haq hi capoch ka hloh dōq bài mangai tiaq hōc loq tàng. **35** Hì aih jò mahì khoe haqneq, haq doe ka bài mangai tiaq hōc: “Beq bèn tōc apah tau.” **36** Jò Haq khoe thê bài mangai bàc hlài, haq tōc ta boang, bài mangai tiaq hōc chùng boang qnung haq lam, i bài boang qnoeq hadai lam tiaq. **37** I kan bahùt kàn, lai laq dêh tep ta boang, diac ten bình qmòe ta boang. **38** Mahaq oe enh cloh boang, Chuaq Jesus angèn gàu ajang gōiq haq kùi. Mangai tiaq hōc tÙh padriù haq: Mangai hnài! bèn cachìt manòeq raq ih ùh lèt qmòh? **39** Haq hi yòng, lech ka cayeo rai tagàih ka diac: “Hatinh beq, rangep beq!” Cayeo hi dìq, diac loh ka hatinh hatot hloe. **40** Khoe aih Haq bòch mangai tiaq hōc: “Hagleq pì ma yùq, pì qnhòq i manoh lùi qmòh?” **41** Wì mangai tiaq hōc tarìt qmòe rai bòch dabau: Òq mangai kô ìq cabô? Jaq trùh cayeo, trùh lai laq diac raxìq, dìq iu bàu haq!

5 Chuaq Jesus xam mangai tiaq hōc tōc trùh tago apah tau diac, tagùng Jérasê. **2** Haq bu cadiang loh enh boang, tajòe qmòe i moeq ngai kiac khoe pawè, tÙh loh enh nòe cadràng hanang lam ajang ngèa Chuaq Jesus. **3** Mangai aih haq rìh toq roc nòe cadràng hanang, yac ka wì kàt haq xam caxi datoeq dua ùh dràng. **4** Majah qmang aih khoe bàc yàng wì clang jènh tì haq dua haq goh wahcadac, pi cabô oe blêq haq. **5** Xèq ka hì qngah ka mang haq rangòt roc ralùng hanang xam ta wang, cachech, cajiah yōc hmo xah dèh ta chac. **6** Oe enh hangai haq

hnoq Chuaq Jesus, haq cadàu tùh kùn cràng ajang ngèa Chuaq Jesus, **7** rai breo ka dêh: Jesus, kon da Boc Plình ma haqnhèq, ìh enh broq cleq ka au? Au canòm yiniq Boc Plình hu doe ka ìh apaq baxa dèh ka au! **8** Majah qmang aih Chuaq Jesus i doe ka haq: “Kiac dù meh, drah loh enh gùng ka mangai kô.” **9** Chuaq Jesus bòch haq hòm: “Gè qmat yiniq cleq?” Haq aih doe: yiniq au bài lình, majah qmang aih nhèn bac haraya, **10** èh haq toq cali calo ka Chuaq Jesus apaq hnan qnoh wì haq loh enh gùng aih. **11** I moeq calùh chùa qnang acaq ta hidroe wang haten ta aih. **12** Kiac aih bòch Chuaq Jesus: ìh am nhèn trùh ajang calùh chùa tau, dôq nhèn mùt ta bài chùa tau. Chuaq Jesus òq bàu. **13** Bài kiac aih hi loh enh mangai aih, mùt ta chac calùh chùa, bài chùa oe enh bùc haqnhèq hadrùc loh ta hlõng, jah qnah ta baiq muàn toq chùa cachìt ta diac raxìq. **14** Bài mangai ban chùa cadàu amot, wì haq anoe hlài yiniq kô jàp ka gùng ka plài ta aih. Dìq ka mangai ta gùng aih dahrôq loh ngan yiniq aih. **15** Jò wì haq trùh ajang nòe Chuaq Jesus, wì haq hnoq mangai ma i calùh kiac oe ta chac, qnang hangui, atàc eo kwàn, gòu ngoc haq khoe talang, wì dìq jaq crè. **16** Bài mangai ma khoe hnoq yiniq aih, anoe hlài ka wì qnoeq tàng yiniq ma khoe trùh ka mangai i kiac mùt ta chac, anoe hloe yiniq ma khoe loh ka calùh chùa. **17** Khoe aih dìq ka mangai ta aih hi pi lòh Chuaq Jesus mùt dèh ta gùng. **18** Jò Chuaq Jesus bu cadiang tòc ta boang, mangai adroe nèh kiac ma khoe pawè, haq bòch tiaq. **19** Chuaq Jesus ùh am haq tiaq, mahaq Chuaq Jesus doe ka haq: “Hlài ta hnim ìh beq, anoe ka oh daq ìh loq Chuaq khoe broq am

ka ìh yiniq kàn dàng leq, haq khoe loq waq ka ìh qmang leq.” **20** Mahaq mangai aih loh lam anoe jàp moeq jàt baiq plài oe ta cròng aih. Haq taqmon hlài yiniq kàn dàng leq Chuaq Jesus khoe broq am ka rađeh, Dìq ka mangai tàng hamàih đeh hra. **21** Jò Chuaq Jesus xam mangai tiaq hóc loh ta boang tōc pah tau, i bài mangai bàc tagop ti da bau oe dudan ka haq, haq oe ti haqmai diac ra xìq. **22** Ta wì mangai ma broq gàu hnim tagop qyoh, i mòeq ngai yiniq haq Jairu, trùh ti Chuaq Jesus, jò bu hnoq Chuaq Jesus haq hacùn cràng ajang nòe jènh Chuaq Jesus. **23** Haq anoe: Kon cadrì au ma qyoh, ten cachìt, au canòm đeh ka ìh trùh bèq chac haq, dôq haq hu jah rìh hlài. **24** Chuaq Jesus lam ti haq, bài mangai bàc hadai lam, wì ti dahnen ka haq. **25** Ta aih i mòeq ngai gùcadri da hrôq mahim khoe moeq jàt baiq hanam, **26** khoe bàc hanam haq xalep ta tì kòng bài mangai broq jreо, khoe dìq dōng đeh ka bàc jèn kùng hang, dua ùh yeo, mahaq yiniq aih èh rai hrìn tam. **27** Haq tàng wì anoe trùh Chuaq Jesus, haq thia đeh enh rù, pachiu taqne mangai bàc đòeq hujah bèq eo Chuaq Jesus. **28** Majah qmang aih haq doe: Tàng joq au jah bèq đeh toq haqmai eo haq raq, aih au loq đeh brêh. **29** Tajòe qmòe jò aih, mahim hi atàt, haq tàng đeh ta chac khoe brêh. **30** Jò aih raq, Chuaq Jesus loq i padren khoe loh đeh enh chac, haq hwi hlài taqne mangai bàc haq bòch: “Khoe bèq au?” **31** Bài mangai tiaq hóc doe: ìh hnoq bài mangai bàc qmang qmat dahnen ka ìh, ìh ma oe bòch: Cabô bèq eo au? **32** Mahaq dua Chuaq Jesus hwi dudan hu chaq mangai leq khoe broq qmang aih. **33** Mangai gùc cadrì loq yiniq leq ma khoe trùh ka rađeh,

rai yùq crè, haq hacùn cràng enh ngìa Chuaq Jesus rai
anoe paqnoh dìq döng. **34** Chuaq Jesus doe ka haq: “Yôiq
kon cadrì au, manoh kon lùi khoe broq kon jah brêh.
Lam beq lam ka catèm brêh ka yinìq.” **35** Chuaq Jò Jesus
oe raq tapoch, i mangai trùh enh hñim Jairu, mangai
broq gáu tanòe hñim tagop qyoh, wì aih doe: Kon ìh khoe
cachìt, ìh oe pangài dèh ka haq qmat? **36** Mahaq Jesus ùh
tamàng bàu aih, haq doe ka Jairu: “Apaq yùq, ìh rap toq
lùi raq.” **37** Chuaq Jesus ùh am mangai leq tiaq haq enh
gùng ka Phiero, Jaco xam Jon oh Jaco. **38** Jò khoe trùh ta
hñim mangai broq gáu nòe hñim tagop qyoh, Haq hnoq
wì broq ma tagrùang, qnah ngai hmoe, qnah ngai cajiah.
39 Jò khoe mùt ta hñim, Haq doe ka wì: “Gleq pì ma jah
tagruàng qmang qmat? Kon qyoh kô ùh xài cachìt, qmat
xài haq kùi”. **40** Wì do rai halê Haq. Haq thê wì loh dìq
döng, dòeq toq miq baq kon qyoh aih xam mangai tiaq
Haq, hanoh wì haq hi mùt tanòe tangùi kon qyoh aih. **41**
Haq rùp tì kon qyoh aih rai doe: “Ta-li-tha-Cu-mi.” (bàu
aih doe rameh: Yôiq kon cadrì qyoh, Au thê gè yòng beq.)
42 Kon mangai qyoh aih padinh yòng rai cadiang lam,
majah qmang aih haq khoe jah moeq jàt baiq hanam. Wì
dìq jaq hamàih. **43** Haq panhet wì ùh dùh am ka cabô loq
yiniq aih, khoe èh Haq thê wì am kon qyoh aih acaq.

6 Chuaq Jesus loh enh aih hlài dèh tagùng, bài mangai
tiaq hòc hadai lam ti Haq. **2** Trùh hì Sabat, haq hi hnài
tanòe hñim tagop qyoh, tàng bàu haq hnài, wì dìq jaq
hamàih, wì bòch dabau: Bài yiniq kô haq jah đeh enh leq?
Kan rabiaq meh ìq qmang leq? Jaq bài trong halac qmang
meh haq broq dua jah haq qmat? **3** Qmat ùh joq mangai

thòq broq long, kon da Mari, daq bài Jaco, Jôsep, Juđa, Simôn qmòh? Bài oh cadrì haq ma ùh xài oe taqne bèn kô qmòh? Wì hi catoeh ka haq. **4** Mahaq Chuaq Jesus doe ka wì: “Mangai pajàu toq tagùng cla, oh daq cla, hnim cla raq ma ùh ta-iu ka haq.” **5** Ta aih Haq ùh broq kan halac cleq, enh gùng ka yōc tì bèq biaq ngai ùh hrōc dôq wì aih jah brêh. **6** Haq loh ka hamàih majah qmang aih hnoq manoh wì ùh lùi. Khoe aih haq lam jàp plài ten aih hu hnài wì. **7** Haq creo dèh ka moeq jàt baiq ngai Tiaq cla, thê wì lam tang racop baiq ngai, haq am ka wì aih cwìang drùh qnoh kiac chōc. **8** Haq tanap ka wì lam ti trong apaq wê cleq enh gùng ka mòeq toq long canhra, yac ka bênh yac ka ayôp, apaq wê bac ta caqnam, **9** enh gùng ka tōc jep, ùh dùh wê racop baiq blah eo. **10** Haq doe ka wì: Jò pì mùt ta hnim cabô, pì hi oe hloe ta aih trùh hì pì loh lam. **11** Tàng i nòe leq ùh waq đìh pì, ùh tamàng bàu pì, drah loh enh aih rai hapùih blo ma khoe top ta jènh pì, đòeq broq acang ka wì hnoq. **12** Moeq jàt baiq ngai Tiaq cla loh lam anoe hnài dôq rìm ngai loq raxach, **13** drùh hnan qnoh bac kiac chōc, xùt dàu am ka bac ngai yiniq rai broq brêh ka wì. **14** Bùa Hêrôtàng wì anoe trùh Chuaq Jesus, (majah qmang aih yiniq Chuaq mangai khoe loq đeh hra jàp jia) haq doe: Jon mangai broq baptém, cachít khoe rìh hlài, ha-aih haq men jah broq bac trong halac. **15** Mangai qnoeq hòm doe: Aih Êli, qnah ngai qnoeq doe: Aih mangai pajàu dùnh qnhòng calah nèh. **16** Mahaq da bùa Hêrôt doe: Aih raq Jon, mangai au khoe thê pot ranöng, haq khoe rìh hlài. **17** Majah qmang aih, Hêrôt i thê wì rùp clêh Jon ta hnim cadrong, xèm goe haq oe

ajang nòe bùa Hêrot yōc Hêrô-đia aih cadrì da Philip oh cla bùa Hêrot raq, đòeq broq mai. **18** Jon i bàu ùh lòh haq rameh: Bùa ùh khòh yōc cadrì dèh oh broq mai. **19** Aih ìq, Hêrođia majah git ka Jon, enh chaq trong jêh cadac haq. **20** Mahaq ùh jah jêh, majah qmang aih Hêrot crè ka Jon, loq Jon kô aih mangai hadròeh, mangai taq atoq. Bùa chaq trong wèq Jon, jò khoe tàng bàu Jon, ta manoh bùa toq manhài, mahaq dua bùa enh tamàng. **21** Yàng èh taqnàih, wop glàm hì acaq ôq manè hì ha-uang bùa Hêrot, bùa akhen ka bài cwan kàn, cwan wèq bài lindh, xam dìq dōng gucraq ta gùng Galili. **22** Kon adrùh da Hêrođia mùt muaq ta aih, lem ka manoh bùa Hêrot xam bài mangai acaq ôq hì aih. Bùa doe ka kon mangai adrùh aih: Drah bòch beq enh waq cleq, au hu am. **23** Bùa hapah ka haq aih rameh: Waq toq hi bòch cleq, dua au am, pah axon taneh diac kô ùh loe. **24** Mangai cadrì aih loh enh gùng, hatùang dèh ka miq: Au bòch cleq ma yeo troq kô? Miq haq doe: Bòch gào Jon Baptit. **25** Mangai cadrì aih drah mùt ajang bùa, haq doe: Au enh ìh yōc gào Jon Baptit tah ta dòt kàn am ka au manđeq raq. **26** Bùa mangò pi ka jaq, mahaq khoe troq hapah, èh qnah hòm enh ngèa bàc ngai acaq ôq ta aih, bùa pi xèp hangah ka haq. **27** Bùa hi thê dèh lindh lam jêh cadac Jon khoe aih aràng gào haq ta aih. **28** Mangai lindh aih lam pot ranđong Jon ta hnìm cadrong, khoe èh haq tah gào aih ta dòt kàn aràng am ka kon mangai cadrì, èh mangai kon cadrì aih aràng dèh ka miq. **29** Mangai tiaq hòc Jon hìa qmang aih, wì lam yōc dèh hanang haq hlài catùh. **30** Moeq jàt baiq ngai Tiaq cla tagop dabau oe dudan ka Chuaq Jesus,

anoe hlài ka haq rìm yiniq wì haq ma khoe broq khoe hnài. **31** Haq doe dèh ka bài mangai tiaq cla: “Beq bèn lam tanèo ma hawit hu padài toq biaq.” Majah qmang aih tacô mangai lam hlài bac hrìn, jaq haq xam bài mangai tiaq cla met pi dòh jah acaq. **32** Wì haq hi loh ta boang đòeq hu lam tanoè ma yeo hawit. **33** Mahaq bac ngai hnoq wì haq lam, wì canau loq, bài mangai oe bac plài ta gùng aih cadàu trùh adroe tanèo Chuaq Jesus xam bài mangai tiaq cla lam. **34** Jò Chuaq Jesus cadiang tòc enh boang, haq hnoq bac mangai oe ta aih, haq tadèch qmòe nòeh, haq tamèt ka wì aih, majah qmang aih bài wì aih tìah ka trùu ùh i ka mangai ban. Haq hi hnài wì bac trong **35** Trùh jò mat mahì khoe haqneq, mangai tiaq hòc thia haten ka Chuaq, wì anoe: Tacô hawit, èh qnah hòm tròc khoe ten xèq, **36** iò am wì bròc, dôq wì ti mùt roc plài ten tacô hu rot dahwèq acaq. **37** Haq padreo bàu: “Pì kô raq mangai am ka wì acaq.” Mangai tiaq hòc anoe: Qmang aih nhèn ep dìq loe qne hanam bac kùng abroq hu rot bênh am ka wì acaq qmòh? **38** Haq bòch: “Pì i toq leq toq bênh? lam ti ngan beql!” Mangai tiaq hòc lam ti ngan, khoe èh wì doe: Padam toq bênh xam baiq pliang ka. **39** Haq doe ka bài mangai tiaq hòc thê wì hangui tang apùq tanèo nhat. **40** Wì hangui tiaq tang brong, i brong moeq hrinh, brong padam jàt. **41** Jesus yòc bênh xam baiq pliang ka, haq qngoc ta plinh, manè apui, khoe aih haq goh bênh qnèp am ka mangai tiaq hòc dôq wì lam am ka wì ma hangui ta nhat acaq, Haq hanoh axong baiq pliang ka qmang aih ka wì. **42** Rìm ngai acaq dìq jaq panàc, **43** mangai tiaq hòc toch hlài rah bình moeq jàt

baiq talênh haqnech bênh xam ka. **44** Toq gucalô ma acaq hì aih khoe padam muàn mangai. **45** Khoe ka aih, Haq pariaq mangai tiaq hõc drah loh ta boang, hu tõc pah tau adroe ka haq, tangèa qnah ta gùng Bêtsaïda, jò haq thê bâi mangai bâc hlài. **46** Atìq ka haq talah ka wì, haq tõc ta wang đõeq hu waiq khàn. **47** Trùh damang, boang khoe oe taqne diac, cla haq oe moeq ngai tago. **48** Haq hnoq bâi mangai tiaq hõc chiu boang dìq jaq xalep, majah qmang aih glàm cayeo tât ngèa wì haq. Trùh ten qngah, haq lam jènh ti riang diac hu trùh ti wì, haq enh lam adroe ka wì. **49** Mangai tiaq hõc hnoq haq lam ti riang diac, xoh kiac chõc, wì cajiah, **50** Majah qmang aih wì dìq hnoq haq, ùh i cabô ma ùh crè. Mahaq haq drah creo capoch ka wì, haq doe: “Paq yùq, hacô Au kô, apaq yùq.” **51** Haq cadiang tõc ta boang ti bâi mangai tiaq hõc, tajòe qmòe jò aih cayeo hi hatinh hloe. Bâi mangai tiaq hõc hamàih ùh hnau adroe ka aih hòm. **52** Majah qmang aih, manoh wì haq cadoq yac ka wì khoe hnoq kan halac jò haq broq bênh, dua wì qnhòq qnì cleq. **53** Jò Chuaq Jesus xam mangai tiaq hõc khoe tõc apah tau, trùh ta Gênesaret, wì mùt ta aih. **54** Jò bu cadiang loh enh boang, wì gùng aih khoe canau ka Chuaq Jesus. **55** Wì drah cadàu jàp gùng aih wì tòng aràng mangai ùh hrõc kùi ta dradrah, waq toq wì hìa haq oe taleq, wì tòng qnàng trùh ta aih. **56** Haq lam trùh taleq, yac ka plài qyoh, plài kàn, yac ta gùng leq, wì taqngùi mangai ùh hrõc tanèe chòq, wì bòch haq am ka wì jah bèq đeh toq haqmai eo haq, mangai leq khoe jah bèq eo haq dìq jah brêh.

7 I mangai Pharisi xam biaq ngai hnài ranenh, wì aih loh enh Jérusalem, wì oe dudan ka Jesus **2** Wì aih hnoq i mangai tiaq hōc, acaq xam tì ùh sròeh, aih ìq wì acaq mahaq ùh qnheo tì. **3** Mangai Pharisi xam dìq dōng mangai Juđa wèq yôt bàu wì craq dùnh nèh qmon, **4** tàng jòq qnhòq qnheo tì ka lem, ùh jò leq wì haq acaq, jò wì haq hlài enh nòe padro atech, tàng joq qnhòq qnheo dua wì ùh acaq. Wì haq oe tiaq bac bàu qmon qnoeq hòm, troeq haliang doe mōng, abôq broq xam taneh, gōc diac. **5** Aih ìq qmang aih, dài mangai Pharisi xam mangai hnài ranenh majah bòch Chuaq Jesus: Hagleq mangai tiaq hōc ìh ùh wèq tiaq bàu wì craq dùnh nèh haq khoe hnài, gleq wì majah acaq ùh dùh qmòe ka qnheo tì. **6** Haq padreo bàu doe: “Wùih! Bài mangai patiah toq enh gùng meh, bàu pajàu Êsai ràu trùh pì nèh joq khoe troq, qmang ka bàu khoe achìh: Wì kô yōc toq bàu kùh waiq au, Mahaq manoh wì haq hangai ka au. **7** Wì haq kùh waiq au aih joq qngwan, majah qmang aih, wì haq hnài tiaq toq ranenh loh enh bàu kon mangai. **8** Pì cađac ranenh Boc Plình, mahaq wèq tiaq bàu kon mangai qmon!” **9** Haq doe ka wì: “Pì cađac dōng ranenh Boc Plình, đòeq hu wê tiaq bàu cla qmon. **10** Majah qmang aih Môise i doe: Thê pì loq iu dèh miq baq, èh qnah hòm: Cabô hanip ra-òh dèh ka miq baq, mangai aih ep cachìt. **11** Mahaq da pì aih doe: Mangai leq doe dèh ka miq baq: Rìm yiniq au đòeq wiang ban chôp au khoe cōban (bàu aih rameh: au khoe dèch dōng ka Boc Plình.) **12** Qmang aih mangai aih pi ep wèq ngan miq baq. **13** Qmang aih pì yōc bàu cla rađeh qmon đòeq hu cađac bàu Boc Plình. Oe i bac trong qnoeq hòm

pì hadai broq qmang aih.” **14** Haq creo ka bài mangai bàc ma oe ta aih, haq doe: “Thê pì rai tamàng rai loq tàng, **15** ùh i ka yiniq cleq oe enh gùng mùt ta chac pì, broq ka pì ùh sròeh, mahaq bài yiniq enh dalam ka chac pì loh enh gùng, yiniq aih èh ma broq ka pì ùh sròeh.” **16** Tàng cabô i don, tamàng beq (Bàu kô ta hset dùnh nèh ùh i). **17** Jò Haq khoe mùt ta hnim, jò khoe hangai ka bài mangai bàc, mangai tiaq hốc bòch haq bàu alìah aih. **18** Haq padreo bàu: “Pì ma ùh i ka manoh loq hèm? Ùh i ka yiniq leq oe enh gùng mùt ta chac mangai, jah broq ka mangai loh ka amùa, bàu aih pì ma qnhòq qnì tàng? **19** Majah qmang aih bài yiniq aih ùh i mùt ta manoh mangai, mahaq bài yiniq aih loh hloe ta padùc, khoe aih hi loh enh gùng. Qmang aih haq doe: Yiniq acaq aih dìq lem. **20** Haq doe tam: “Yiniq leq loh enh chac mangai aih ma broq ka mangai ùh sròeh! **21** Joq qnàng aih enh dalam ka mangai ma jah loh manoh dù, loq taqnung, loq atùng, loq jêh đac mangai. **22** Tango anang, daiq plai, ratauq, gôpla, ùh qnì camaih, ta grình, tapoch dech ka wì, panhòm, tapoch blùng. **23** Bài kan qmèq aih dìq loh enh manoh, aih ma broq ka mangai loh ka ùh sròeh. **24** Chuaq Jesus loh enh aih haq lam ti kên gùng Tiro, Haq mùt ta moeq toq hnim aih, ùh enh am cabô loq haq oe ta aih, mahaq ùh hlèp. **25** Bu mùt ta aih, i moeq ngai gucadrì haq aih i moeq toq kon cadrì qyoh i kiac mùt ta chac, jò haq hìa tàng Chuaq Jesus, haq aih mùt pacro dađeh nòe jènh Chuaq Jesus. **26** Gucadrì aih mangai Gorec, ha-uang ta gùng Siro Phêni. Haq canòm đeh ka Chuaq Jesus hnan qnoph kiac loh enh chac kon haq. **27** Chuaq Jesus doe ka

haq: “Adroe aih, đòeq da cla wì yoh acaq ka panàc òeq, majah qmang aih yōc bênh wì qyoh acaq caqnìh am ka koq aih ùh troq!” **28** Gucadrì aih padreo bàu: Waiq Chuaq, khoe joq qmang aih raq, mahaq bài kon koq oe đeh ta caqnàm jah acaq đeh cràc bênh kon qyoh ma taclìh. **29** Khoe aih Chuaq Jesus doe ka mangai cadrì: “Pàng iħ khoe doe qmang aih, kiac majah khoe loh enh chac kon iħ, hlài beq”. **30** Mangai gucadrì aih hlài dèh ta hnim, haq hnoq dèh kon oe ta juàng, kiac khoe loh. **31** Atìq ka aih, Chuaq Jesus pi oe ta kēnh gùng Tiro hèm, haq lam pajang trong gùng Siđôn rai dang jùa loh diac raxìq Galili, khoe aih Haq müt ta cròng Đêcaboli. **32** Wì tòng aràng ka haq moeq ngai clìc don rai tapoch ùh hloh, wì canòm đeh ka Chuaq Jesus yōc tì bèq mangai aih. **33** Chuaq Jesus qnung haq aih lam ti rađeh, hangai ka mangai bàc tau, Chuaq Jesus yōc hadrang tì đòeq ajang don haq aih, rai yōc diac hai xùt rapet haq aih. **34** Chuaq Jesus qngōc ta plình, haq hihèm cadrùq, haq doe: “Ephata, (bàu aih rameh: Ta pèch beql!) **35** Tajòe qmòe jò aih raq, don mangai aih hi tapèch, rapet haq aih hadai jah rađah ka lem, mangai aih hi hloh tapoch. **36** Chuaq Jesus ùh am wì anoe ka cabô loq, mahaq haq ùh am dàng leq, wì anoe yeo hnau ka aih hèm. **37** Bài mangai tàng yiniq aih, wì hamàih oe i jaq cleq, wì doe: Haq broq rìm yiniq dìq loh ka lem dōng, broq ka mangai clìc don jah tàng, mangai làu jah hloh tapoch.

8 Bài hì aih, i bàc mangai qnoeq hèm lam tiaq Chuaq Jesus, jò wì aih pi i cleq hu acaq hèm, Chuaq Jesus creo ka mangai tiaq hōc trùh ajang da đeh, Haq doe: **2** “Au ha-och ka bài mangai bàc kô, wì haq oe ti au khoe jah piq hì kô,

ùh i ka yiniq acaq. **3** Tàng joq au thê wì haq hlài ta hnim rai pangot, wì haq loq tacro ti trong majah qmang aih wì haq trùh enh nòe hangai”. **4** Mangai tiaq hốc padreo bàu: Mahaq tanèo hawit qmang kô, cabô qnì chaq enh leq ma i bênh tàu ka wì acaq? **5** Jesus bòch: “Pì i toq leq toq bênh?” mangai tiaq hốc doe: i tapèh toq! **6** Haq thê bài mangai bàc aih haqngui ta taneh; khoe aih Haq yōc tapèh toq bênh, manè apôi Boc Plình, haq goh bênh aih khoe èh qnèp ka mangai tiaq hốc, đòeq wì haq lam axong ka mangai bàc acaq, mangai tiaq hốc lam axong ka wì. **7** Mangai tiaq hốc hanoh i biaq pliang kon ka qyoh, haq manè apôi Boc Plình khoe èh thê mangai tiaq hốc lam axong qmang ka yàng adroe diq. **8** Mangai leq mangai meh acaq qmòe ka tàu joq qnàng. Khoe aih mangai tiaq hốc toch hlài bài hanech oe rah jah qmòe tapèh talênh bình. **9** Bài mangai acaq hì aih jah qnah ta pôn muàn. **10** Atiq ka khoe am wì hlài, haq tōc ta boang ti mangai tiaq hốc, lam ta gùng Đama-nutha. **11** Bài mangai Pharsi trùh bòch Chuaq Jesus, đòeq hu chaq trong bahlac haq, wì thê haq am wì hnoq kan halac enh plình, đòeq hu qnhro Haq. **12** Chuaq Jesus hi hèm cadrùq, rai doe: “Hagleq xinoe kô majah bòch ngan kan halac. Au anoe joq qnàng ka pì, ùh i kan halac leq hu am ka pì.” **13** Haq hi cađac wì, tōc hlài dèh taboang đòeq hu tōc pah tau. **14** Mangai tiaq hốc ùh hmàng wê bênh, taboang i mòeq toq bênh raq. **15** Haq pariaq mangai tiaq hốc: “Ngan oq, pì ep wèq rađeh ma khoe ka blo da mangai Pharsi xam blo bài bua da Hêrot”. **16** Mangai tiaq hốc doe ka dabau: Aih jao bèn ùh i wê bênh. **17** Loq ka trong wì ta hatuàng, Chuaq Jesus bòch wì

haq; “Gleq pì ma jah hatuàng ti dabau bèn ùh i ka bênh? Pì ma qnhòq tàng, pì ma qnhòq tem raq qmòh? Manoh pì dua oe raq cadoq yôt qmòh? **18** Pì i mat mahaq gleq ma ùh hnoq? I don mahaq gleq ùh tàng? Pì ùh hmàng qmòh? **19** Jò au goh padam toq bênh am ka padam muàn mangai acaq, haqnech haq pì toch hlài jah toq leq rajo?” Wì doe: Moeq jàt baiq rajo. **20** Ha yàng au goh tapèh toq bênh am ka pôn muàn mangai acaq, pì toch hlài jah toq leq rajo? Wì doe: tapèh rajo. **21** Haq doe: “Pì dua oe raq qnhòq qnì qmòh?” **22** Chuaq Jesus xam mangai tiaq hóc lam trùh ta plài Bêtsaida. Wì aràng ka haq mòeq mangai lua mat wì canòm đeh ka haq yōc tì bèq haq aih. **23** Chuaq Jesus carùp tì mangai aih, tìc qnoph enh gùng ka plài, xùt diac hai ta mat haq aih, yōc tì bèq haq aih rai bòch: “Ìh i hnoq cleq ùh?” **24** Mangai lua mat qngoc ta haqnhèq rai padreo bàu: Au hnoq mangai wì haq lam tìah taiq ka long. **25** Chuaq Jesus yōc tì bèq mat mangai aih mòeq yàng hòm, aih mat haq hi tapèh, jah qngah, haq hnoq rìm yiniq dìq jaq hliang. **26** Chuaq Jesus thê haq aih hlài đeh ta hñim rai tanap: “Ùh dùh mùt đeh ta plài.” **27** Chuaq Jesus xam mangai tia hóc loh enh aih, wì lam ta roc plài haten ka Sêssare philip. Jò lam ti trong haq bòch wì: “Wì doe au kô ìq cabô?” **28** Wì padreo bàu: Qnah ngai doe Jon Baptit, tang ngai doe Elí, mangai qnoeq hòm doe ìh qmat moeq ngai pajàu dùnh calah nèh. **29** Haq bòch: “Ha pì doe au kô ìq cabô?” Phiero padreo bàu: Ìh kô raq Christ! **30** Chuaq Jesus panhet mangai tiaq hóc ùh jah anoe ka mangai qnoeq loq ka haq. **31** Pang aih, haq hi hnài ka mangai tiaq hóc rameh “Kon Mangai ep xalep bac trong, bài wì

gucraq, bài pajàu kàn xam bài mangai hnài ranenh kêh qnöh đac haq, haq ep cachìt, atìq ka piq hì haq hi rìh hlài.” **32** Haq anoe hloh trong aih ka mangai tiaq hōc. Phiero qnàng Haq lam ta kēnh rai tagàih haq. **33** Mahaq Chuaq Jesus hwi ngan mangai tiaq hōc rai tapoch ka Phiero: “Wùih Satan meh! Drah wia oe enh rù ka au beq. Majah qmang aih ìh ùh i hèm trùh trong da Boc Plình, mahaq hèm toq trong kon mangai.” **34** Khoe aih haq creo ka bài mangai bac xam mangai tiaq hōc trùh ajang haq. Haq doe: “Tàng cabô enh tiaq au, haq aih ep cađac rađeh, xùi dèh long pagat đòeq hu tiaq au. **35** Majah qmang aih cabô àu wèq dèh kan rìh, aih èh hnhung, mahaq mangai leq taiq au taiq bàu lem chìuq cađac dèh kan rìh, mangai aih èh jah dèch. **36** Mangai leq i dìq dōng crōng taneh kô mahaq cađac hnhung dèh ka mahua yiang, aih haq jah cleq? **37** I ka cabô jah yōc cleq đòeq hu halìh yōc hlài dèh mahua yiang ùh? **38** Oe taqne nang noe loq taqnung tango, broq toq yiniq lui kô, tàng cabô xep camaih ka yiniq au, camaih ka bàu au, Kon Mangai hadai camaih xep ka mangai aih, jò haq oe taqne kan ranhòm enh Baq haq hu trùh, xam bài bình plình hadròeh.”

9 Èh Haq doe ka mangai taq hōc: “Joq qnàng Au doe ka pì, pì ma yòng ajang kô i ngai ùh cachìt adroe ka jah hnoq diac Boc Plình yōc cwìang itai hu trùh. **2** Atìq ka tadràu hì, Chuaq Jesus aràng Phiero, Jaco xam Jon tiaq haq tōc ta wang haqhèq, ùh i ka mangai qnoeq ta aih, toq wì haq raq. Ta aih Haq wìh wìa enh ngèa wì piq ngai. **3** Eo Haq loh ka taboc camla dìq jaq, ùh i mangai leq oe ta crōng taneh broq taboc jah qmang aih. **4** Èli xam Môise

loh hatuàng tì Haq. **5** Phiero doe ka Chuaq Jesus: Rabi! Bèn oe ta kô lem joq qnàng, beq broq piq toq ranòh, moeq toq ka ìh, moeq toq ka Môise, moeq toq hòm ka Êli. **6** Phiero ùh qnì qmòe đeh doe cleq, majah qmang aih dìq ka wì haq yùq crè pi ka jaq. **7** khoe aih i moeq cato yùc kàn glàp wì haq, enh yùc aih i bàu doe: “Kô raq Kon calô da Au, mangai Au ma loq waq dèh, thê pì tamàng bàu haq.” **8** Jò aih, bài mangai tiaq hõc hwi ngan dudan, cadoe pi hnoq cabô, enh gùng ka moeq ngai Chuaq Jesus raq ma oe ti wì. **9** Jò wì loh enh wang, haq ùh lòh mangai tiaq hõc anoe hlài ka cabô loq bài yiniq wì haq ma khoe hnoq, trùh jò leq Kon Mangai khoe rìh hlài enh cachìt. **10** Mangai tiaq hõc wê bàu aih, wì bòch dabau: Cachìt rìh hlài, aih ìq haq doe cleq? **11** Mangai tiaq hõc bòch haq: Hagleq bài mangai hnài ranenh ma doe Êli ep trùh adroe? **12** Chuaq Jesus padreo bàu: “Joq Êli ep trùh adroe, đòeq hu palauq hlài rìm trong. Aih ìq hagleq majah i bàu achìh Kon Mangai ep xalep bàc trong, wì halê cađac haq?” **13** Mahaq au doe ka pì Êli khoe trùh, wì tabroq ka haq tiaq dèh manoh wì ma enh, wop troeq bàu ma khoe achìh trùh haq.” **14** Jò Chuaq Jesus xam piq ngai aih lam trùh ajang nòe bài mangai hanoh tiaq hõc, hnoq mangai bàc pi ka jaq oe dudan ka wì aih, èh i mangai hnài ranenh tarahen ka bài mangai tiaq hõc aih. **15** Bài mangai bàc aih bu hnoq haq wì khoe hamàih, wì tùh ta haq. **16** Haq bòch wì: “Pì rahen ka mangai tiaq hõc au yiniq cleq?” **17** I moeq ngai ta aih tèu bàu: Mangai hnài! Au aràng dèh kon trùh ka ìh, kiac làu khoe pawè haq, **18** yac ka qnang oe taleq, jò kiac hi mùt ta haq broq ka haq loh ka

troq kênh, loh toq diac hai camùh, cadrit hanenh, haq
loh ka gang got hloe, au canòm đeh ka mangai tiaq hốc
drùh qnoh kiac aih, mahaq ùh jah. **19** Chuaq Jesus doe:
“Wùih! nang noe ùh qnì lùi tau, Au oe jah oe ti pì trùh
pang leq? Au ep àt ka pì trùh jò leq hòm? Qnàng kon
mangai qyoh aih ka au”. **20** Wì hi qnàng kon qyoh aih ka
haq. Kon qyoh aih bu hnoq Chuaq Jesus, kiac khoe rapôh
haq, haq tacro ta taneh, cadro cadria hacùng loh toq diac
hai. **21** Chuaq Jesus bòch baq haq: “Haq loh ka qmang
kô dùnh neo?” Baq haq tèu: enh qyoh nèh raq. **22** Kiac
khoe bac yàng khwênh qnìh haq ta ùnh, ta diac, hu jêh
đac haq, mahaq ìh broq cleq jah, ìh ha-och rai broq biaq
ka ma diq! **23** Chuaq Jesus doe: “Hagleq ìh majah doe:
Tàng ìh broq jah? Waq toq cabô hi lùi rìm yiniq dìq jah”.
24 Baq kon mangai qyoh aih drah doe: au lùi ìh, Waiq
Chuaq! ìh wiang biaq da au ajang kan ùh qnì lùi aih. **25**
Jò Chuaq Jesus hnoq mangai bac trùh, Haq lech ka kiac
aih rai thê: “Kiac cíc rai lìu meh, au thê gè loh enh kon
mangai qyoh kô, pang kô ta èh pi jah pawè haq hòm”. **26**
Kiac rai cajiah rai rapôh kon qyoh aih cadêh, khoe kiac
hi loh, kon mangai aih tìah qmòe ka khoe cachìt, bac
ngai crè wì doe: haq khoe cachìt. **27** Mahaq Chuaq Jesus
rùp tì dèch haq hi yòng. **28** Jò Chuaq Jesus khoe mùt ta
hnim, mangai tiaq hốc thia haten wì chop bòch: Gleq
nhèn drùh kiac aih ùh jah? **29** Haq doe: “Tàng ùh waiq
khàn ùh i cabô drùh qnoh kiac aih jah.” **30** Khoe aih
Chuaq Jesus xam mangai tiaq hốc loh enh aih, lam pagat
trong Galili, Haq ùh enh dôq ka cabô loq wì haq qnang oe
taleq. **31** Majah qmang aih haq khoe hnài dèh mangai

tiaq hōc, haq doe: “Kon mangai kō èh mùt ta tì wì, wì jēh cađac, haq cachìt piq hì khoe èh rìh hlài. **32** Mahaq mangai tiaq hōc ùh tem bàu aih, wì ùh hùa bòch haq trong aih. **33** Wì haq trùh ta Cabênaum. Jò khoe oe ta hñim, haq bòch wì: “Jò lam ti trong iq pì tarahen cleq ka dabau? **34** Mahaq wì hatinh majah qmang aih oe ti trong wì tarahen ka dabau: Taqne bèn kō cabô ma yeo kàn? **35** Chuaq Jesus hangui, creo dōng moeq jàt baiq ngai tiaq hōc, Haq doe: “Mangai leq enh broq gäu, haq aih ep oe atìq lùch, ep broq hapōng patìh ka wì qnoeq.” **36** Haq yōc moeq toq kon qyoh, tah taqne mangai tiaq hōc, khoe aih haq caqmìn kon qyoh aih rai doe ka wì: **37** “Cabô jao Yiniq Au chìuq đìh moeq ngai kon qyoh qmang kō, aih haq đìh au, cabô đìh au, aih ùh xài haq đìh au, mahaq đìh Mangai ma khoe thê au.” **38** Jon doe ka Haq: Mangai hnài, nhèn khoe hmaq hnoq i mangai yōc yiniq ìh đòeq drùh kan kiac, nhèn khoe ùh lòh haq, majah qmang aih wì aih ùh tiaq bèn. **39** Chuaq Jesus doe: “Apaq tát dèh, ùh i mangai leq rai yōc yiniq au broq kan halac rai tapoch qmèq ka au. **40** Majah qmang aih, mangai leq ùh hìaq tablêq ka bèn haq aih hanoh ti bèn. **41** Cabô jao yiniq au kō èh ma am ka pì moeq doe chrōng diac, majah qmang aih taiq pì aih mangai da Christ, Joq qnàng au doe ka pì haq aih ùh hnhung dèh kan baha. **42** Mahaq mangai leq broq ka mòeq ngai taqne bài wì qyoh kō khoe lùi au clìh ta yiniq lui, yōc apau hmo ma kàn kàt ranōng haq aih lam cadram ta diac raxìq aih ùh hnau hòm. **43** Tàng joq tì ìh broq ka ìh loh yiniq, pot đac tì aih, yac ka moeq apah tì mahaq jah mùt ta kan rìh, ùh hnau tóm baiq

apah tì mahaq taclìh ta hwinh, ta bau ùnh ùh pat. (Geenna g1067) 45 Tàng jènh ìh broq ka ìh loh yiniq, pot cađac jènh aih, moeq apah jènh mahaq jah mùt ta kan rìh, ùh hnau tôm baiq apah jènh mahaq wì khwênh qnìh ta bau ùnh. (Geenna g1067) 47 Tàng joq mat ìh broq ka ìh loh yiniq, bōc đac mat aih beq, oe moeq apah mat ma haq jah mùt ta diac BocPlình, ùh hnau tôm baiq pah mat mahaq ta cìh ta hwinh, (Geenna g1067) 48 aih la nòe i hrai ma kaq wì haq, hrai aih ùh kachìt, tanòe ùnh ùh jò leq pat. 49 Rìm ngai ta aih jah paqnhòq xi ùnh. 50 Boh aih ngè lem, mahaq tàng boh aih pi xang, aih èh yōc cleq hu broq haq xang hlài. Dìq ka pì ep i boh oe ta manoh, ep hatroq ti dabau".

10 Chuaq Jesus loh enh aih, trùh ta cròng Juđê, tōc pah tau ka diac Jođan, mangai bàc tagop dabau trùh hòm ti haq, tiaq dèh ma khoe hmaq yôt, haq hi hnài wì. 2 Bài mangai Pharsi lam haten bòch đòeq hu chaq trong bahlac haq: Mangai gucalô akhòh cađac mai? 3 "Môise khoe thê pì qmang leq?" Haq bòch wì. 4 Wì aih padreo bàu: Môise lòh mangai calô achìh moeq araq jàiq broq bò acan tacadac, khoe aih caqnaih deh cadrì loh lam. 5 Chuaq Jesus padreo bàu: "Aih jao pì cadoq manoh Môise ma jah achìh ranenh aih. 6 Mahaq enh jò baxèm broq plình cròng taneh, Boc Plình broq moeq ngai calô, moeq ngai cadrì. 7 Aih ìq mangai calô majah talah dèh miq baq đòeq taqmùt dèh ti mai, 8 wa baiq ngai hi wìa moeq xech akia. Pang aih, ǒng mai pi xài baiq hòm, mahaq khoe loh moeq xech akia. 9 Qmang aih, kon mangai ùh jah lah bài mangai leq Boc Plình ma khoe acop". 10 Jò oe ta hnìm, mangai tiaq hòc bòch hòm trong aih, 11 Haq

padreo bàu: “Cabô cađac mai èh yđc mangai cadrì qnoeq broq mai, haq khoe wìa mangai tango ka mangai cadrì tau, **12** tàng joq mangai cadrì cađac dèh őng, yđc őng qnoeq, aih hanoh loh mangai tango. **13** Wì aràng kon qyoh trùh ti Chuaq Jesus dôq ka haq yđc tì bëq wì qyoh, mahaq mangai tiaq hđc lech ka wì. **14** Jò Chuaq Jesus hnoq qmang aih, haq nòeh ka mangai tiaq hđc, haq doe: “Dôq haq kon qyoh trùh ti au, apaq tát wì haq, majah qmang aih diac Boc Plình am bài mangai leq ma tìah ka kon qyoh. **15** Joq qnàng au doe ka pì, mangai leq ùh đìh yđc diac plình qmang kon qyoh qmat, haq aih ùh jò leq jah mìt ta diac plình”. **16** Khoe aih, haq caqmìn kon qyoh rai waiq am xôq ramot ka wì qyoh. **17** Chuaq Jesus qnang hu loh lam, i moeq ngai cadàu tÙh hacùn cràng enh ngèa ka haq, rai bòch: ìh kô mangai hnài lem lình, au ep broq cleq đòeq hu jah kan rìh halinh? (*aiōnios g166*) **18** Chuaq Jesus doe: “Hagleq ìh majah doe au mangai lem lình? Ùh i mangai leq lem lình, enh gÙng ka Boc Plình”. **19** Ìh loq bài ranenh kô: “Apaq tango, apaq jêh đac mangai, apaq atÙng, apaq yòng tapoch dech ka cabô, apaq qnÙt bô, loq ta-iu dèh miq baq” **20** Mangai aih padreo bàu: Mangai hnài, enh jò au oe qyoh nèh raq au khoe wèq đìq bài raneng kô. **21** Chuaq Jesus ngan mangai aih rai ha-đoch ka haq, Chuaq Jesus doe: “ìh qnhòq i moeq yiniq hòm, hlài tech đìq dòng kÙng hang ìh, am ka mangai pa, aih èh ìh hi i kÙng hang canaq oe ta diac Plình. Khoe aih hi lam tacô đòeq hu tiaq au”. **22** Jò aih hadrò mangaih guradam aih hnoq qmòe kan haq mangò ka bàu aih, majah qmang aih, kÙng hang haq bac haraya. **23** Chuaq Jesus ti ngan

dudan rai doe ka mangai tiaq hōc: “Mangai padrōng ùh hlàu cleq ka jah mùt diac Plình”! **24** Mangai tiaq hōc hamàih ka bàu aih. Mahaq Chuaq Jesus doe hòm: “Wì kon! mangai padrōng yo đeh kan đòeq mùt diac plình aih joq xa qnàng! **25** Lőcda mùt trom jrùm yi hlàu ka mangai padrōng mùt diac Boc Plình.” **26** Mangai tiaq hōc hamàih ùh hnau hòm, wì hatuàng ti dabau: Tàng qmang aih èh mangai leq ma oe jah dèch? **27** Chuaq Jesus ngan wì haq rai doe: “Yiniq aih kon mangai broq trong ùh jah, mahaq Boc Plình ùh qmang aih, Boc Plình broq jah rìm yiniq”. **28** Phiero anoe ka haq; Hacô nhèn khoe cađac rìm yiniq hu lam tiaq ìh. **29** Chuaq Jesus padreo bàu: “Joq qnàng au anoe ka pì, ùh i moeq ngai leq cađac dèh hnim, oh daq calô, oh daq cadrì, cađac miq baq hloe xam bài kon xam ruàng pràm, đòeq tiaq au xam trong Bàu lem, **30** manđeq kô raq, qnhòng kô raq haq aih ma ùh jah yōc hlài hloe ka hrinh yàng bòe hnim, oh daq calô, oh daq cadrì, miq kon, taneh ruàng, hloe xam bài kan nanxa xam kan rìh halinh qnhòng atìq kô èh. (aiōn g165, aiōnios g166) **31** Mahaq bàc ngai oe adroe loh ka atìq, mangai atìq loh ka adroe”. **32** Jò Chuaq Jesus xam mangai tiaq hōc qnang lam ti trong tōc ta Jérusalem, Haq lam adroe, bài mangai tiaq hōc dìq jaq yùq, bài mangai lam tiaq hadai crè. Haq qnang moeq jàt baiq ngai tiaq hōc lam crài ti haq hòm rai anoe ka wì loq yiniq padon trùh ka wì haq. **33** Haq doe: “Bèn qnang tōc ta Jérusalem, Kon Mangai kô èh mùt ta tì bài pajàu kèn xam bài mangai hnài ranenh. Wì aih hi taqmòq ka haq yiniq cachìt, wì aih aràng jao haq am ka wì enh gùng. **34** Wì hi halê haq, cachôh ka haq, mahaq piq hi

òn h èh haq hi rìh hlài.” **35** Atìq ka aih, Jaco xam Jon (kon Sêbede thia ajang Haq), wa doe: Mangai hnài, ìh broq am ka ma yiniq ma enh bòch đeh. **36** Haq doe: “Chôp enh Au broq ka chôp cleq?” **37** Wa aih pa dreo bàu: Jò leq ìh jah kan ranhòm èh, ìh am ka ma moeq ngai haqngui apah qma, moeq ngai apah qngeo ka ìh. **38** Chuaq Jesus padreo bàu: “Chôp ùh qnì ka rađeh qnang bòch cleq, doe chröng au ôq, chôp ahlàt ôq, baptem hu broq ka au, chôp ahlàt broq ùh?” **39** Wa aih tèu: Ma hlàt. Chuaq Jesus anoe ka wa: “Doe chröng au ôq kô èh chôp hanoh ôq, baptem hu broq ka au kô èh chôp hadai jah broq, **40** mahaq hu hangui apah qma, apah qngeo ka au aih ùh xài au am, ajang aih đòeq da bài mangai leq nòe aih khoe padon dèh adroe”. **41** Jò wì moeq jàt ngai tau tàng qmang aih, wì haq nòeh ka wa Jaco wa Jon. **42** Chuaq Jesus creo ka wì haq oe qmoeq qmang ti dabau, haq doe: “Pì loq mangai ma broq gàu wì enh gùng, thê wì qnoeq iu rađeh, cwan kèn aih haq yo ka rađeh đòeq padit mangai qnoeq, **43** pì ùh xài qmang aih, mahaq tapì mangai leq enh broq kèn, mangai aih ep broq hapöng, **44** mangai leq enh broq gàu, haq aih ep broq đìc rìm ngai. **45** Majah qmang aih, Kon Mangai trùh ùh xài đòeq wì patìh ka haq, mahaq đòeq haq patìh glòq ka wì, rai cađac kan rìh rađeh đòeq hu dèch bac ngai”. **46** Khoe aih, Chuaq Jesus xam mangai tiaq hòc trùh ta Jêrico. Jò wì haq hloe xam bài mangai bac qnang loh enh aih, i moeq ngai lua mat yiniq haq Batimê, (kon daTimê) qnang haqngui ti trong hu axìn. **47** Jò haq tàng wì doe: aih Chuaq Jesus mangai Naxaret, haq drah creo cadêh: waiq Chuaq Jesus, Kon bùa Đawit, xa-och ka au

diq! **48** Bác ngai tapoch hnap ka haq, thê haq chaq oe ma hatinh, mahaq haq ka creo tam yeo dêh hòm: Kon Đawit, xa-och ka au diq! **49** Chuaq Jesus yòng jang aih rai doe: “Creo ka haq lam ajang kô”. Wì creo ka mangai ùh xau aih rai doe ka haq: Cajap manoh, yòng beq, Haq creo ka ìh. **50** Mangai lua mat aih lêh dèh eo enh gùng, tùh thia ajang Chuaq Jesus. **51** Chuaq Jesus bòch haq: “Ìh enh au broq ka ìh cleq?” Mangai lua mat aih padreo bàu: Rabi, au enh jah hnoq. **52** Chuaq Jesus doe ka haq: “Lam beq! Kan lùi ìh khoe broq ìh brêh.” Tajòe hloe jò aih haq jah hnoq, haq hi lam tiaq ti Chuaq Jesus.

11 Jò khoe ten trùh Jérusalem, tanèo plài Bêphajê xam plài Bêthani tajang ka wang Oliu, Chuaq Jesus thê baiq ngai tiaq hóc, **2** Haq doe ka wa: “Mùt ta plài enh ngèa ka chôp, jò mùt ta aih hnoq moeq toq lùa qyoh wì kàt ta aih, qnhòq i cabô lah tòc crõng haq, chôp canaih haq khoe aih tiaq ahlài tacô ka au. **3** Tàng i mangai leq loq bòch: Gleq ma jah broq qmang qmat? Chôp doe ka wì: Chuaq i yiniq waq, aih èh wì hi dôq chôp tiaq ahlài”. **4** Wa aih hi lam, hnoq kon lùa qyoh qnang kàt enh gùng tajang ka trong qmang, wa hi lêh canaih. **5** Wì ma oe ta aih i qnah ngai oe ta aih bòch: Chôp caqnaih kon lùa qyoh qmat hu broq cleq? **6** Wa aih padreo bàu qmang ka Chuaq Jesus khoe tanap, wì hi canaih wa lam. **7** Wa tiaq ahlài kon lùa aih ka Chuaq Jesus, yõc dèh eo hlèch enh crõng lùa aih, khoe aih Chuaq Jesus hi tòc enh crõng. **8** Bác ngai lêh dèh eo hlèch ti trong lam, i qnah ngai loh ta ruàng goh hamenh long xap roc trong. **9** Mangai lam adroe, mangai lam atiq diq moeq bàu cadêh: Hôsana! Khòh manè ka

Mangai trùh enh dalam ka yiniq Chuaq! **10** Xôq ramot am ka diac padon trùh kô èh, aih raq diac bùa Đawit, kan cadraq bèn! Hôsana oe ta Plình haqnhèq. **11** Chuaq Jesus mùt ta Jérusalem, haq lam ta hnim kùh waiq. Haq ti ngan rìm yiniq dudan ta aih, jò mat mahì khoe haqneq, haq xam moeq jàt baiq ngai tiaq hốc loh enh aih lam ta plài Bêthani. Long póc croh **12** Sroq atìq, jò khoe loh enh plài Bêthani, aih Haq pangot. **13** Hnoq enh hangai i moeq xèm long póc i hla, Haq lam ngan long aih i ka plì ùh, jò trùh haten ka xèm long hnoq toq hla, majah qmang aih ùh xài jò plì. **14** Haq tapoch ka long aih: “Pang kô èh pi i cabô oe kaq plì enh gè hòm.” Dìq döng mangai tiaq hốc dìq tàng bàu aih. **(aiōn g165)** **15** Jò trùh ta Jérusalem, Haq mùt ta hnim kùh waiq, drùh qnöh bài mangai padro ta aih, blòq caböng mangai ma halih bac hloe xam gèq wì ma atech trù. **16** Haq ùh am cabô wê cleq jah lam pagat trong aih. **17** Khoe aih haq hnài wì: “Ajoq i bàu achìh, Hnim au jah creo hnim waiq khàn ka rìm taneh diac? Mahaq pì khoe broq haq loh pù bài mangai atùng.” **18** Bài pajàu xam bài mangai hnài ranenh tàng bàu aih, hi chaq trong hu jêh cađac haq, wì ùh hùa ka haq, majah qmang aih dìq döng phù cròng mangai leq mangai meh hamàih đeh hra ka bàu haq hnài. **19** Jò tröc khoe ten clam, Chuaq Jesus xam mangai tiaq hốc loh enh aih. **20** Sroq atìq, jò lam trong aih, wì haq hnoq long póc khoe croh trùh ta riah. **21** Phiero hi hmàng hlài haq doe ka Chuaq Jesus, Rabi, lìh ngan tau, long póc ìh tapoch ka haq hì nèh khoe croh. **22** Chuaq Jesus doe: “Thê pì i manoh lùi Boc Plình. **23** Au doe qnàng ka pì, tàng cabô doe ka bui wang kô: lam

caqnìh rađeh ta diac raxìq beq, ta manoh haq aih ùh i kan rangòt, mahaq lùi troeq bàu rađeh ma khoe anoe, haq jah qmang dèh ka bàu. **24** Aih ìq au majah doe ka pì: Rìm yiniq pì bòch jò pì waiq khàn, drah lùi pì khoe jah, aih èh pì hijah yiniq aih. **25** Jò pì yòng waiq khàn, tàng joq pì oe i yiniq cleq ùh hatroq ka cabô, drah cađac yiniq aih ka wì beq, aih èh Baq pì oe ta plình hanoh cađac da pì yiniq lui. **26** (hset dùnh) Tàng pì qnhòq cađac da wì yiniq lui, Baq pì oe ta plình hadai qnhòq cađac da pì.” **27** Chuaq Jesus xam mangai tiaq hốc wìh ta Jérusalem hòm, jò Chuaq Jesus qnang cadiang lam ta hamlang hnim kùh waiq, bài pajàu kàn, bài mangai hnài ranenh hloe xam bài gucraq thia ajang haq. **28** Wì aih bòch: Ìh yōc cwìang enh leq ma broq qmang kô? Cabô ma khoe thê ìh broq? **29** Chuaq Jesus padreo bàu: “Au hanoh bòch pì moeq bàu. Pì padreo bàu au, aih èh au hadai doe ka pì loq au yōc cwìang enh leq hu broq bài trong kô. **30** Baptem da Jon aih loh enh Plình, loq loh enh kon mangai? Anoe ka au beq!” **31** Wì aih hatuàng ti dabau, wì doe: Tàng joq bèn doe loh enh plình aih èh haq bòch bèn: Meh pì ma ùh lùi Jon? **32** Mahaq tàng bèn doe: loh enh kon mangai? Wì ùh hùa ka mangai ta aih, majah qmang aih, mangai ta aih dìq lùi Jon aih mangai pajàu joq qnàng. **33** Aih ìq wì haq majah hi doe ka Chuaq Jesus: Nhèn ùh qnì. Chuaq Jesus doe ka wì haq: “Au hadai ùh anoe ka pì loq au yōc cwìang enh leq hu broq yiniq kô”.

12 Khoe aih, Chuaq Jesus hi tapoch aliah ka wì haq: “I mòeq ngai pìt mòeq wuàn plì nho, haq broq canàng dudan, taqne wuàn haq broq mòeq toq nòe đòeq padit

yōc diac plì nho, haq broq mòeq toq hapom ka haqnhèq, khoe aih, haq am ka wì patih axong, èh cla haq lam ta gùng qnoeq. **2** Trùh jò, cla haq thê dèh mòeq ngai hapōng lam trùh ti bài mangai pìt nho, đòeq hu yōc plì wì ma axon da haq. **3** Mahaq, wì rùp jêh hapōng aih, khoe qnat haq bròc tì dech. **4** Haq thê dèh hapōng qnoeq hòm, mahaq wì blai gào haq aih rai hanip broq ka haq dìq jaq camaih. **5** Haq thê hapōng qnoeq hòm, wì jêh ca đac mangai aih, Haq thê bàc ngai qnoeq hòm trùh, qnah ngai wì blai, qnah ngai jêh cađac. **6** Yàng atìq pulùch, haq i dèh mòeq ngai kon calô raq haq ma loq waq dèh dìq jaq, haq hi thê kon aih lam, cla haq hèm dèh: Yi laiq wì ma ùh iu kon au. **7** Mahaq bài mangai pìt nho ta hatinh ka dabau: Kô raq kon cla wì craq, mangai ma hu jah waq dōng kùng hang, beq bèn jêh đac haq, aih èh kùng hang haq hi jah dōng bèn. **8** Wì hi rùp jêh cađac kon calô aih, khoe èh khwênh qnoh enh gùng ka wuàn plì nho. **9** Khoe aih cla wì craq wuàn nho broq qmang leq? Haq trùh hu jêh cađac dōng bài mangai pìt nho aih, khoe èh yōc wuàn aih am ka wì qnoeq. **10** Pì akhoe lah đốc bàu kô ta hset hadròeh: “Hmo, bài mangai broq hnem ma ràih qnoh cađac, Khoe wìa hmo mùm hnim; **11** Boc Plinh khoe broq qmang kô, Aih ajoq kan halac enh ngèa ka mat bèn?” **12** Bài mangai pajàu kàn, bài mangai hnài ranenh, xam bài gucraq, chaq trong hu rùp Chuaq Jesus, majah qmang aih wì loq bàu haq ma aliah aih anoe trùh wì. Mahaq wì pi lênh hùa ka bài mangai bàc ta aih, èh wì haq hi lam đac taqnoeq. **13** Atìq ka aih, wì thê bài bua da mangai Pharisi xam bài bua da Hêrot trùh ti Chuaq Jesus đòeq

rùp haq ajang nòe bàu tapoch. **14** Wì aih trùh ti haq rai doe: Mangai hnài, nhèn loq ìh kô mangai taq atoq, ùh i yùq ka cabô, majah qmang aih ngan mangai, ìh ùh i ngan toq enh gùng, mahaq hnài trong Boc Plình tiaq bàu joq qnàng. Am thèq ka Sêsa aih troq loq ùh? Nhèn i ep am thèq ka sêsa? **15** Mahaq Chuaq Jesus loq kan patìah wì aih, haq bòch: “Gleq pì ma ti àu chaq trong bahlac au? Drah qnàng ka au ngan moeq hliac bac beq”. **16** Wì aràng ka haq moeq hliac bac, Haq bòch wì: “Qmù kô qmù ka cabô, yiniq dacabô?” Wì padreo bàu: Da Sêsa. **17** Chuaq Jesus doe ka wì: “Padreo hlài da Sêsa yiniq cleq da sêsa, padreo hlài da Boc Plình yiniq cleq da Boc Plình.” Dìq ka wì hamàih deh hra ka bàu Haq. **18** Mangai Sadusê, aih bâi mangai ma doe ùh i ka kan rìh hlài, wì haq thia haten bòch Chuaq Jesus: **19** Wì doe: Mangai hnài! Môise i achìh ka nhèn ranenh rameh: Tàng moeq ngai tau, i oh daq haq cachìt, đòeq hlài dèh mai mahaq ùh i ka kon, mangai aih ep yōc gucadri hadrō aih, đòeq taqmot hlài caxi noe daq haq. **20** Manòeq kô wì oh daq aih i ta pèh ngai. Mangai ramua yōc mai, khoe aih haq cachìt, ùh i ha kon. **21** Mangai ma hatìa, yōc mangai cadrì hadrō aih, khoe aih haq cachìt, hadai ùh i ka kon, èh mangai ma atìq hanoh qmang aih. **22** Dìq dōng ka wì ta pèh ngai aih, ùh i mangai leq i kon. Pulùch, mangai cadrì aih hadai cachìt. **23** Trùh jò rìh hlài, taqne wì ta pèh ngai oh daq aih, mangai cadrì aih broq mai cabô? Majah qmang aih dìq dōng ka wì haq, hanoh khoe yōc gucadri aih broq mai. **24** Chuaq Jesus padreo bàu: “Ma ùh joq pì khoe hèm hwang? Majah qmang aih pì ùh qnì ka bàu Hset dadròeh

xam kan itai Boc Plình. **25** Jò mangai cachìt rìh hlài, wì ùh i yōc mai, hadai ùh yōc ǒng, mahaq bài mangai rìh hlài aih rìh tìah ka bình plình oe ta diac plình. **26** Anoe trùh bài mangai cachìt rìh hlài aih, ta hset Môise i achìh bàu Boc Plình capoch ka haq tanòe xèm yila rameh: Au kô Boc plình da Apraham, Boc Plình da Ysac, Boc Plình da Jacôp, pì ma qnhòq đõc? **27** Haq ùh xài Boc Plình da bài mangai cachìt, mahaq Boc Plình da bài mangai rìh! Pì qmat joq khoe hèm lìq”. **28** I mòeq ngai hnài ranenh tàng bàu wì tarahen, haq hnoq Chuaq Jesus tèu bàu dìq jaq rabiaq, haq aih thia ka haten hu bòch: Dìq dõng ka bài ranenh, ranenh maleq ma yeo kàn dõng? **29** Chuaq Jesus padreo bàu: “Kô ranenh ma yeo kàn: Dìq ka mangai Isorali tamàng kô! Chuaq aih Boc Plình da bèn, i moeq Chuaq raq. **30** Loq waq ka haq dìq ka cliac, dìq ka mahua yiang, dìq ka manoh, dìq ka padren hiwa. **31** Kô ranenh ma atìq, thê loq waq ka magai haten hatìa qmang ka cla pì. Ùh i ka ranenh leq yeo kàn ùh hnau ka baiq ranenh kô”. **32** Mangai hnài ranenh doe: Ìh anoe troq joq qnàng! I mòeq Boc Plình raq, enh gùng ka haq pi i ma qnoeq hòm; **33** joq ep loq waq ka Haq dìq ka cliac, dìq ka manoh, dìq ka padren hiwa, rai loq waq ka mangai haten hatìa tìah dèh cla, aih lem ùh hnau ka tadreo bùh, ùh hnau ka hang tadreo ma qnoeq. **34** Chuaq Jesus hnoq haq aih padreo bàu qmang ka mangai rabiaq, Chuaq Jesus doe: “Ìh pi hangai ka diac Boc Plình”. Pang aih pi i cabô oe hùa bòch Haq cleq hòm. **35** Jò Chuaq Jesus yòng hnài wì tanòe hnim kùh waiq, haq bòch: “Hagleq bài mangai hnài ranenh doe Christ aih kon Đawit? **36** Cla Đawit jò Yiang

Hadròeh mahno, haq doe: Chuaq khoe doe ka Craq au: Hangui enh pah qma au, trùh jò au roh bài mangai taблêq ka ìh enh qneq ka jènh ìh.” **37** Cla Đawit khoe creo ka Haq: Craq au! aih wìa ka haq oe broq kon Đawit qmang leq? Bài mangai ma bac ta aih dìq jaq enh tamàng bàu haq rai lem bùi. **38** Jò hnài wì, Chuaq Jesus doe: “Ngan oq, pì ep wèq rađeh ma khoe ka bài mangai hnài ranenh, bài mangai enh toq caxùnh eo yôh lam bayràt, enh waq toq mangai qnoeq kùh gàu ka rađeh taqne nòe padro, **39** tanòe hnìm tagop xam nòe acaq yiniang enh hangui toq nòe ma rahù, **40** wì haq lonh apom hnìm mangai cadrì hadrô, mahaq broq dèh waiq khàn waq ka yôh, trùh jò hadrah wì aih èh ep pòq kan baxa yeo trap hòm. **41** Chuaq Jesus hangui tangèa ka nòe đòeq tah bac, rai ngan wì ta aih tah dèh bac qmang leq. Bac ngai padrõng tah qmòe cabac. **42** Mahaq i moeq ngai gucadri hadrô pa, lam tah baiq hliac bac, **43** Chuaq Jesus creo dèh ka bài mangai tiaq hòc trùh, haq doe: “Joq qnàng au anoe ka pì, mangai cadrì hadrô kô haq pa, mahaq khoe tah yeo bac ùh hnau dìq dõng ka wì qnoeq. **44** Majah qmang aih, bài mangai qnoeq yõc toq rah đòeq tah tacô, yàng da mangai hadrô kô, haq dìq jaq pa, mahaq haq khoe tah dìq dõng dèh hliac bac đòeq huban rađeh.”

13 Jò Chuaq Jesus bu loh enh hnìm kùh waiq, i mòeq ngai tiaq hòc doe ka Haq: Ìh ngan tau, bòe hmo ta hnìm meh lem dàng leq! **2** Chuaq Jesus padreo bàu: “Ìh hnoq bài hnìm kàn kô qmòh? Kô èh pi i moeq toq hmo leq tacô oe jah raxon enh qnhèq ka hmo qnoeq hòm, dìq dõng taclìh taqneq.” **3** Jò Chuaq Jesus hangui ta wang Oliu, tajang ka

ngèa hnim kùh waiq, jò ùh i ka mangai qnoeq, Phiero, Jaco, xam Jon thia bòch haq: **4** Ìh anoe ka nhèn loq đeh diq, jò leq men loh bài yiniq aih? Èh i cleq patô am ka nhèn hu canau khoe trùh jò pagêh? **5** Chuaq Jesus doe ka wì: “Ngan oq! Paq dôq cabô trùh qnùt pì. **6** I bàc ngai yōc yiniq au đòeq trùh ta pì, wì doe: Au kô raq Christ! Èh wì qnùt bàc ngai. **7** Jò pì tàng kan tajêh poh, pì hìa trùh trong tablah, ta manoh pì ùh dùh lèt. Bài yiniq aih ep trùh, mahaq hì pulùch qnhòq trùh. **8** Gùng tamoe kô yòng taблêq ka gùng tamoe tau, Diac kô yòng taблêq ka Diac tau. Bàc nòe taneh loh ka ralàng, bàc nòe loh ka pangot hrah. Aih bu diang kan baxèm jìq hauang. **9** Pì ep wèq rađeh, wì loq rùp qnoh pì tanèo hadrah rai blai pì tanèo hnim tagop. Jao au kô èh pì majah ep yòng enh ngèa bài cwan kàn, bài bùa, đòeq hu panhìn ka wì. **10** Mahaq adroe dìq döng, Bàu lem ep waq ka jah anoe jàp ka mangai ðeq. **11** Jò wì rùp qnong pì, apaq yùq đeh ep anoe cleq, mahaq hi trùh dèh jò, pì toq tapoch tiaq bàu ma am ka pì, aih ùh xài cla pì tapoch dèh bàu, mahaq Yang Hadròeh tapoch. **12** Jò aih èh, oh daq blòq dèh oh daq ka cachít, baq blòq dèh kon, bài kon taблêq dèh ka miq baq, waq ka wa cachít. **13** Jao au kô èh dìq ka phù cròng wiang git ka pì, mahaq mangai leq ma cajap manoh trùh lùch haq aih èh ma jah dèch. **14** Jò pì hnoq kan raliang, kan pada broq tanèo ma ùh khòh broq (cabô đöc ep loq), jò aih mangai leq oe ta gùng Judê drah cadàu tòc ta wang, **15** mangai leq oe ta kùa po hnim ùh dùh loh dèh, ùh dùh mùt ta hnim hu qnhon qnoh dahnwèq, **16** mangai leq oe ta gùng apaq wìh hlài hu yōc eo. **17** Jò aih, hađo ka bài

mangai gucadri qnang oe jiang hloe xam bài magai kon oe ùq! **18** Drah waiq khàn dôq bài yiniq aih ùh hìaq trùh glàm jò ralim. **19** Majah qmang aih bài hì aih i kan ranàc kèn, enh jò Boc Plinh baxèm broq plinh cröng taneh trùh manðeq qnhòq lah i qmang aih, trùh hloe ta atiq kô èh dua ùh i qmang aih. **20** Tàng joq Boc Plinh ùh pot qnah bài hi aih dôq haq yi đêq, pi i cleq ma oe rìh. Mahaq taiq bài mangai haq ma khoe ràih haq majah khoe broq ka bòe hi aih yi đêq. **21** Jò aih tàng joq i cabô doe ka pì: Hacô Christ oe ta kô, ùh meh wì doe: Haq oe ta tau, pì apaq lùi. **22** Bác Christ patìah, pajàu patìah trùh, broq bác trong halac, tàng majah wì haq enh padô qmòe mangai ma khoe jah ràih raq. **23** Ngan oq wèq rađeh, Au khoe anoe ka pì loq adroe. **24** Oe ta bài hì aih, atiq ka kan nanxa, mat mahì loh ka clam, mat khê pi sreo qngah hòm, **25** bài halang ta tröc taclih ka rađeh, chac plinh hanoh loh ka dalàc. **26** Jò aih wì ma hi hnoq Kon Mangai trùh enh yùc plinh xam kan cwiàng itai kèn, kan ranhòm kèn. **27** Haq hi thê dèh bìnhanh plinh trùh gop bài mangai khoe jah ràih enh pôn bè ta cröng taneh, enh caqnàm plinh kô trùh caqnàm plinh tau. **28** Tamàng rai hòc bàu aliah trùh long pöc: Jò hamenh haq bu plöh hamöng loh ramot, aih pì loq khoe ten trùh jò padrang. **29** Hanoh qmang aih diq, jò pì hnoq bài yiniq aih trùh, pì loq, Kon Mangai trùh khoe haten, haq oe ajang trong qmang. **30** Joq qnàng au doe ka pì: caxi noe kô ùh hnhung adroe ka bài yiniq aih trùh. **31** Plinh cröng taneh kô èh hnhung, mahaq bàu au ùh jò leq hnhung. **32** Mahaq hì mang jò aih, ùh i cabô loq, yac ka bìnhanh plinh oe ta plinh, yac ka Kon, moeq ngai cla Baq raq

ma loq dèh. **33** Thê pì wèq ra đeh, pì hmàng hamang oq, majah qmang aih pì ùh qnì jò leq yiniq aih trùh. **34** Yiniq aih tìah ka moeq ngai lam hangai, Haq cađac dèh hním, thê deh bài hapõng broq moeq ngai moeq yiniq, haq hanoh i thê mangai rìu gòm qmang. **35** Qmang aih, pì ep rìu gòm, majah qmang aih pì ùh loq cla wì craq hním hlài jò leq, jò mahì wìh, jò qne mang, jò ia rõng, loq jò bu qngah, **36** beq rayeq cla wì craq hlài hlaiq, glàm jò pì qnang oe raq kùi. **37** Bàu au anoe ka pì kô, au hadai anoe ka bàc ngai qnoeq: Hmàng hamang oq!”.

14 Baiq hì adroe ka hì ramènh pan cwa xam ramènh acaq bênh ùh wàt blo, bài pajàu kàn xam bài mangai hnài ranenh hatinh ka dabau chaq trong rùp Chuaq Jesus ka hlèp hu jêh cađac. **2** Wì doe: ùh khòh broq yiniq kô ta hì ramènh, yùq ka phù cròng loq loh ka tagruàng. **3** Jò Chuaq Jesus oe ta plài Bêthani, ta hnìm Simôn, mangai bacùn, haq qnang hangai acaq, i moeq ngai gucadri trùh, tì haq wê moeq toq cabi broq xam hmo ngõc, enh dalam tah bình dàu xua thùm canaq bac, haq tùq padah cabi dàu aih, èh ùc dàu xua thùm ta gòu Chuaq Jesus. **4** I biaq ngai ta aih nòeh ka haq, wì anoe ka dabau: Hagleq maloq racaih ka dàu canaq qmang meh? **5** Tech dàu qmat jah loe piq hrinh đoniê, yõc bac aih ajoq jah am ka mangai pa? Khoe ka aih wì tapoch ka mangai gucadri aih oe loh cleq. **6** Mahaq Chuaq Jesus doe ka wì: “Apaq troq haq, hagleq pì ma tapoch ka haq? Haq qmat khoe broq moeq yiniq lem ka au. **7** Majah qmang aih yac ka jò leq dua i mangai pa oe dudan ka pì, pì enh broq trong lem ka wì aih jò leq ma ùh jah, mahaq au ùh i oe yôt ti pì. **8** Mangai

gucadrì kô khoe broq trong haq jah broq. Haq xùt dàu ta
chac au adroe đòeq hu padon catùh hanang au. **9** Joq
qnàng au doe ka pì: Dìq ka crõng taneh kô, waq toq nòe
leq Bàu Lem jah hnài, trong haq ma khoe broq kô èh
hadai jah ràu qnoh, đòeq hu hmàng trùh haq. **10** Taqne
wì moeq jàt baiq ngai, i moe ngai yiniq haq Juda Icariôt,
lam trùh ta bài mangai pajàu kàn đòeq hu tech Chuaq
Jesus ka wì. **11** Tàng bàu aih wì aih dìq jaq manè, wì tèu
bàu am ka haq bac. Pang aih Juda rap gòm toq jò leq bu
taqnàih, haq hi rùp Chuaq Jesus am ka wì. **12** Hì baxèm
da ramènh kaq bênh ùh wàt blo, aih hì jêh kon trùi broq
tadreo ka ramènh Pan cwa, bài mangai tiaq hõc bòch haq:
Ìh enh nhèn lam padon ka ìh kaq ramènh Pan cwa taleq?
13 Haq thê baiq ngai tiaq hõc lam, haq tanap: “Mùt ta plài
qmat, chôp hnoq moeq ngai qnang kôi abôq diac, chôp
tiaq haq aih. **14** Haq aih mùt hnim leq, chôp doe ka cla wì
craq hnim aih: Mangai hnài bòch: “Aleq nòe aniang au hu
acaq ramènh Pan cwa dèh ti mangai tiaq hõc? **15** Haq aih
hi patô ka chôp nòe aniang anòh oe enh qnhèq, rìm yiniq
ta aih khoe palauq qmòe. Padon ka bèn ta aih èh.” **16** Wa
mangai tiaq hõc hi lam, wa mùt ta plài, glàm tìah ka bàu
troeq bàu Haq thê, wa hi padon ramèng Pan cwa. **17** Xèq
aih, Jesus sam bài mangai tiaq hõc trùh ta aih. **18** Jò dìq
dõng wì haq qnang hangui acaq, Haq doe “Au anoe joq
qnàng ka pì, i moeq ngai oe taqne pì kô, haq acaq moeq
qmang ka au mahaq haq blòq đac au.” **19** Bài mangai tiaq
hõc mangò pi cajaq, khoe ka maleq trùh maleq, wì bòch
haq: A hìaq au? **20** Chuaq Jesus doe: “Moeq ngai oe taqne
pì moeq jàt baiq ngai, mangai ma chùq bênh pajùm ti au

ta doe kô. **21** Majah qmang aih Kon mangai kô èh loh lam, tìah ka bàu khoe achìh ka haq, mahaq hađo ka mangai ma blòq haq, apaq ha-uang qnoph haq aih xan ka ùh hnau hòm”. **22** Jò qnang acaq, Chuaq Jesus yđc bênh, manè apôi, khoe aih haq goh, qnèp dèh ka bài mangai tiaq hõc, rai doe: “Drah yđc beq, kô chac au.” **23** Haq rùp doe chrõng, manè apôi, khoe èh am dèh ka bài mangai tiaq hõc, maleq diq ôq enh chrõng aih. **24** Haq doe ka wì: “Kô mahim au, mahim da kan tajao dahrôq qnoph ka bàc ngai. **25** Au anoe joq qnàng ka pì, au pi ôq plì diac nho kô hòm, trùh hì au ôq plì nho niu oe ta diac Boc Plình.” **26** Jò khoe calêu hset hadròeh, Chuaq Jesus xam bài mangai tiaq hõc lam tõc ta wang Ôliu. **27** Chuaq Jesus doe ka mangai tiaq hõc: “Dìq ka pì tacro dõng, majah qmang aih i bàu khoe achìh: Au hi jêh cla mangai ban trìu, trìu haq hi palac dìq dõng. **28** Mahaq jò au rìh hlài èh, au lam trùh ta Galili adroe ka pì.” **29** Phiero haq doe qmòe: Yac ka dìq dõng rìm ngai tacro, au dua ma ùh. **30** Chuaq Jesus padreo bàu: “Joq qnàng au anoe ka ìh, hì kô, qmang kô raq, adroe ka ia rõng baiq yàng, ìh khoe piq yàng hangah đeh ùh qnì ka au.” **31** Mahaq dua Phiero doe: Yac ka au ep cachìt ti ìh, dua au ùh hangah đeh ùh qnì ka ìh. Dìq dõng ka wì qnoeq hadai anoe moeq bàu qmang aih. **32** Khoe aih, wì lam trùh moeq nòe, ta aih wì creo Gêtsemane, Chuaq Jesus doe ka bài mangai tiaq hõc: “Pì hangui ajang kô, gòm au waiq khàn.” **33** Haq qnung Phiero, Jaco, xam Jon tiaq haq, aih èh Haq hi loh ka cadròt rai mangò. **34** Haq doe ka wì piq ngai: “Mahua yiang au mangò haraya trùh cachìt, pì oe tacô, hmàng rìu gòm oq.” **35** Khoe èh, Haq

lam yeo hangai toq biaq, bla op rađeh ta taneh rai waiq khàn rameh tàng jah, dôq jò kô cwa đac dǒng khoe ka rađeh. **36** Haq creo: “Aba, waiq Baq, rìm yiniq ìh broq jah dìq dǒng, au waiq ìh dèch đac doe chrǒng kô ma khoe ka au, mahaq apaq tiaq manoh au enh, tiaq manoh Baq ma enh.” **37** Khoe aih, Haq wìh hlài, hnoq piq ngai khoe kùi, haq doe ka Phiero: “Simôn, ìh kùi qmòh! Moeq jò ìh rìu ma ùh jah? **38** Rìu rai waiq khàn beq, dôq pì ùh hìaq taclìh ta kan padô aluàn, manoh aih enh raya mahaq chac aih ùh nèn”. **39** Haq lam hòm, rai waiq khàn qmang ka yàng adroe. **40** Haq tawìh hlài, hnoq mangai tiaq hốc oe raq kùi, majah qmang aih mat wì haq pi jah tablèch qmòe, wì loh ka pi qmì tèu haq mang leq. **41** Haq tawìh hlài yàng piq, doe ka bài mangai tiaq hốc: “Manòeq kô pì oe raq kùi rai padài qmòh! Hêq, kô khoe trùh jò, Kon Mangai oe toq ma hì mùt ta tì kǒng bài mangai broq dù. **42** Yòng beq! Hatau, mangai ma blòq au trùh khoe ten”. **43** Haq oe raq anoe, tajòe qmòe, Juđa mangai ma hadai oe ti wì moeq jàt baiq ngai tiaq cla khoe trùh, lam moeq qmang ti haq i bàc ngai wê chang xam bài long dùi, wì aih trùh enh nòe bài pajàu kàn, bài mangai hnài ranenh, enh wì gucraq. **44** Mangai ma blòq Chuaq Jesus, khoe tanap ka wì qmang kô: Au hìp mangai leq, mangai aih raq, pì rùp qnung ma rabiaq oq. **45** Qmang aih, jò bu trùh Juda thia ka haten ka Chuaq Jesus, haq doe: Rabi! khoe aih haq hìp Chuaq Jesus. **46** Wì aih hi rùp Chuaq Jesus. **47** I mòeq ngai oe ten aih, dot qnoph pla chang yôh, jêh hapōng pajàu kàn, koh taclìh hla don mangai aih. **48** Chuaq Jesus tapoch ka wì: “Pì wê chang wê long dùi lam

rùp au tìah ka mangai atùng. **49** Rìm hì au oe taqne pì, hnài ta nòe hnim kùh waiq, gleq pì ùh rùp au? Mahaq yiniq kô loh qmang kô đòeq xìt ka bàu Hset hadròeh". **50** Jò aih rìm ngai khoe cadàu amot, cađac dǒng haq. **51** I mòeq ngai radam lam tiaq Chuaq Jesus, haq taqmàn rađeh xi moeq blah mù briang, jò wì rùp haq. **52** Haq cađac hloe dèh mù briang, cadàu qmòe rahòng. **53** Wì aràng Chuaq Jesus trùh nòe pajàu haqnhèq, bài mangai pajàu kàn i dìq ta aih, bài gucraq, bài mangai hnài ranenh hadai tagop ti dabau ta aih. **54** Phiero tiaq Chuaq Jesus, haq ti tayoe enh hangai, trùh tanòe hamlang hnim pajàu haqnhèq. Haq hangui ti bài mangai lình rai qnhìa ùnh pajùm ti wì ta aih. **55** Bài pajàu kàn, xam dìq ka craq hadrah wiang chaq trong hu tablêq ka Chuaq Jesus, đòeq hu jah jêh đac haq, mahaq wì haq chaq ùh loh. **56** Bác ngai wiang yòng tapoch qmùt ka haq, mahaq bàu wì aih tapoch ùh tacap ka dabau. **57** Atìq ka aih i biaq ngai yòng tapoch dech ka haq: **58** wì doe: Nhèn i tàng haq doe: Kô èh au raliang cađac hnim kùh waiq tì kõng kon mangai ma khoe broq kô, khoe aih piq hì au broq ònh hnim kùh waiq qnoe, ùh xài broq xam tì kõng kon mangai. **59** Mahaq bàu kô, dua wì haq tapoch ùh hatroq ka dabau. **60** Khoe aih, pajàu haqnhèq yòng enh ngìa wì aih, haq bòch Chuaq Jesus: ìh ùh tèu hlài moeq nà bàu cleq trong wì ma tapoch ka ìh qmòh? **61** Mahaq Chuaq Jesus oe hatinh, ùh tèu mòeq nà bàu. Mangai pajàu haqnhèq bòch hòm: ìh qmat Christ, kon Boc Plình ma khòh manè apôi joq ùh? **62** Chuaq Jesus padreo bàu: "Joq Auraq! atìq èh pì hi hnoq Kon Mangai hangui apah qma ka Boc Plình dìq jaq

haqnhèq i cwìang itai, hangui taqne yùc plình đòeq loh ta cröng taneh". **63** Jò aih, mangai pajàu haqnhèq hic dèh eo rai doe: Bèn oe ep chaq dèh yiniq qnoeq hòm? **64** Pì akhoe tàng bàu haq ùh hòq qmòe ka Boc Plình? Pì hèm qmang leq? Rìm ngai doe: Haq qmat troq ka cachìt. **65** I ngai cachôh ka Chuaq Jesus, srùp hadrò haq, rai tùc rai doe ka haq: Tapoch pajàu beq. Bài lình yđc long tong haq. **66** Phiero qnang hangui ta hamlang, i moeq ngai gucadri hapđng pajàu kàn trùh jang aih, **67** hnoq Phiero oe hangui qnhìa ùnh, haq chrìh ka haten khoe èh haq doe: ìh hadai oe moeq qmang ti Jesus, mangai Naxaret. **68** Mahaq Phiero hangah: Au ùh qnì, hadai ùh loq tàng ìh anoe cleq. Khoe aih haq yòng loh enh gùng ka hamlang, ia hi röng. **69** Mangai hapđng cadrì aih hnoq haq, doe hòm ka wì ta aih: Mangai kô hadai bua wì tau raq. **70** Mahaq Phiero hangah hòm. Moeq ahyàc hòm, wì ma oe ta aih doe ka Phiero: Hi loq ka ìh moeq bua ti wì tau, majah qmang aih ìh hadai mangai Galili. **71** Phiero hapah rai doe: Joq au ùh lòm canau ka mangai ìh ma anoe aih! **72** Adrình hloe jò aih, ia hi röng yàng baiq, Phiero hmàng hlài ka bàu Chuaq Jesus khoe anoe adroe ka rađeh: Adroe ka ia röng baiq yàng, ìh piq yàng hangah đeh ùh qnì ka au. Hèm ka bàu aih, haq toq moe.

15 Bu qngah, bài pajàu kàn hatinh ti bài gucreaq, bài mangai hnài ranenh xam dìq ka mangai oe ta hñim hadrah, jò khoe kàt wì hi qnung Chuaq trùh ka Philat. **2** Philat bòch haq: ìh kô raq bùa da mangai ùh xài? Chuaq Jeus tèu bàu: Wop qmang ka bàu aih." **3** Bài mangai pajàu kàn ta qmòq ka haq bac trong. **4** Philat bòch hòm: ìh ùh

tèu moeq nà bàu cleq qmòh? Ngan! Wì ta qmòq ka ìh
bàc trong! **5** Mahaq Chuaq Jesus dua pi tèu tam moeq
bàu cleq hòm, Philat loh ka hamàih. **6** Khoe hmaq, rìm
hanam trùh hì ramèn Pan cwa cwan caqnaih moeq ngai
broq yiniq lui loh enh hnim tù, tiaq bàu wì bòch. **7** Jò
aih i moeq ngai yiniq haq Banaba, wì clêh pajùm ti bài
mangai yòng tablêq ka chênh phù, majah qmang aih jò
yòng tablêq, wì haq i jêh đac mangai. **8** Mangai Juđa trùh,
wì haq bòch Philat caqnaih ka wì haq moeq ngai qmang
hmaq caqnaih rìm hanam. **9** Philat padreo bàu: Pì enh au
caqnaih bùa Juđa ka pì ùh? **10** Majah qmang aih Philat loq
wì mangai pajàu kàn majah rùp Chuaq Jesus aih jao wì
tajiq ka haq. **11** Mahaq bài pajàu kàn basrùq mangai Juđa
bòch Philat caqnaih Banaba ka wì haq. **12** Philat bòch
hòm: Tàng qmang aih manðeq kô pì enh au broq qmang
cleq ka mangai pì ma doe haq Bùa mangai Juđa? **13** Wì
cajiah cadêh: Drah tiang haq talong pagat! **14** Philat doe
ka wì: Mahaq mangai kô khoe broq cleq ma dù? Kiang
wì cachech cadêh ùh hnau hòm: Tiang đình haq talong
pagat! **15** Philat enh broq lem ka manoh mangai Juđa, haq
hi caqnaih Banaba, èh thê wì blai Chuaq Jesus, khoe aih
dôq wì qnung Chuaq Jesus lam tiang đình talong pagat.
16 Bài lình aràng Chuaq Jesus mùt ta blùang kàn, aih nòe
đòeq hu hadrah, creo dìq ka lình ta aih tagop ti dabau. **17**
Wì paclùm ka haq moeq blah eo gòh, wì tênh moeq toq
cadoh yila pacôi ta gàu haq, **18** wì tapoch ka Chuaq Jesus:
Waiq bùa Juđa! **19** Wì yốc long dùi tong gàu haq, cachôh
ka haq rai hacùn cràng kùh waiq haq, wì broq qmang
aih bàc yàng. **20** Khoe ka wì halê do ka haq qmang aih,

wì lêh đạc eo gòh, caxùnh hlài eo da cla haq, khoe aih aràng haq lam hu tiang đình talong pagat. **21** I mòeq ngai Siren, yiniq haq Simôn, baq da wa Alet-san-đo xam Ruphu, hlài enh ruàng, lam trong aih, wì rùp haq thê haq xùi long pagat. **22** Wì qnung Chuaq Jesus trùh nòe go wì ma creo Gôgotha (bàu aih la cadôh gàu). **23** Wì am ka haq ôq alac clai pajùm ka jan long xua thùm, mahaq haq ùh waq ôq. **24** Khoe ka tiang đình Haq talong pagat, wì ta axong ka dabau eo yôh haq, wì pàih panàih đòeq ngan maleq jah waq yiniq cleq. **25** Jò wì tiang đình haq, aih bu hachìn jò di sroq. **26** Capiac long ban qyoh enh gàu long pagat, wì achìh bàu đòeq taqmòq yiniq lui ka haq: BÙA MANGAI JUDA. **27** I baiq ngai atùng wì hadai tiang đình wa aih ti haq, mòeq ngai talong pagat apah qma ka Haq, moeq ngai talong pagat apah qngeo ka haq. (I qnah hset noeq tam brong) **28** “Qmang aih wì khoe alùh haq pajùm ka bài mangai dù.” **29** Bài mangai lam pagat trong aih halê do haq, wì ngù ngùi gàu doe: Ùih! Ìh mangai doe đeh raliang cađac hnim kùh waiq, piq hì broq ònh hi gêh, **30** doeh rađeh, loh enh long pagat qmat beq. **31** Bài mangai pajàu kàn xam mangai hnài ranenh hadai ta anoe ka dabau qmang aih, wì halê haq qmang aih: Haq doeh mangai qnoeq mahaq doeh rađeh ùh jah! **32** Aleq! Christ bùa Isorali, loh enh long pagat qmat beq, dôq nhèn hnoq, aih èh nhèn hu lùi. Wa baiq mangai wì ma tiang đình ti haq hadai halê haq. **33** I kan clam cluiq jàp döng gùng aih, enh qne hì trùh piq jò di xèq. **34** Trùh piq jò di xèq, Chuaq Jesus creo bàu dêh: “Ê-lo-i, Ê-lo-i, lam-ma-sa-bat-ta-ni.” Bàu aih rameh: Boc Plình au, Boc

Plình au. Hagleq lìh majah cađac au? **35** I wì ma yòng ta aih, wì doe: Tamàng aih, Haq qnang creo ka Êli. **36** I mòeq ngai oe ta aih cadàu yōc capaih chùq ta diac jòq, đòeq ajang goe long dèch am ka haq ôq rai doe: Dôq haq! Đòeq bèn ngan Êli i trùh doeħ haq ùh? **37** Mahaq Chuaq Jesus creo moeq nà bàu cadêh, khoe aih haq pat hihèm. **38** Bai prinh ta hnim kùh waiq dahic broq baiq enh qnhèq trùh ta qneq. **39** Cla craq bài lình oe tajang ka Chuaq Jesus, hnoq haq pat qmang aih, haq doe: Mangai kô joq Kon Boc Plình. **40** I bài mangai gucadri yòng ngan đeh enh hangai. Ta wì aih i Mari madolen, Mari miq da wa Jaco qyoh xam Jôsep, xam Salomê. **41** Aih piq ngai ma khoe tiaq patih ka haq jò oe ta Galili, hanoh i bac ngai gucadri qnoeq hòm, aih bài mangai khoe tiaq haq tōc ta Jérusalem. **42** Hì aih wop hì padon, hì adroe ka hì Sabat, jò trōc khoe ten clam, **43** I mòeq ngai oe ta Arimathê, yiniq haq Jôsep mangai broq kàn tanòe bài mangai broq gäu Juda, haq aih hadai xan tangèh gòm diac Boc Plình. Haq pacraq dèh manoh thia ta Philat đòeq hu bòch hanang Chuaq Jesus. **44** Philat hamàih haraya tàng doe Chuaq Jesus cachìt rênq qmang aih, haq creo ka mangai cwan bài lình hu bòch Chuaq Jesus cachìt a khoe dùnh. **45** Bu tàng cla craq bài lình anoe, haq hi am Jôsep yōc hanang Chuaq Jesus. **46** Jôsep khoe rot đòeq bai hu lòm hanang, qnoh hanang Chuaq Jesus loh enh long pagat, haq yōc bai lòm chac Chuaq Jesus khoe aih đòeq ta ralùng hanang haq ma khoe pùng tanòe hmo kàn. Khoe èh, cadre hmo kàn padit ajang ngah ralùng. **47** Mari madolen, xam Mari miq Jôsê, hanoh hnoq nòe catùh Chuaq Jesus.

16 Bu khoe ka hì Sabat, Mari madolen, Mari miq da Jaco, xam Salomê, rot dàu xua thùm lam hu qnheo hanang Chuaq Jesu. **2** Hì gàu tuàng, sroeh sroq jò mat mahì butōc, wì piq ngai aih lam ta ralùng, **3** wì rai tanoe ka dabau: Cabô ma cadro hmo padit ajang ngah ralùng ka bèn kô èh? **4** Jò wì haq ngan, hnoq hmo aih khoe cadro, hmo aih kàn haraya. **5** wì haq müt trom ta ralùng, hnoq moeq ngai radam hangui pah qma, caxùnh eo yôh taboc, wì haq crè pi cajaq. **6** Mahaq mangai aih doe ka wì haq: Apaq yùq dèh, pì chaq Chuaq Jesus mangai Naxaret, Mangai wì makhoe tiang đình talong pagat, Haq khoe rìh hlài, Haq pi i oe tacô, trùh ngan nòe wì ma khoe taqngùi haq beq. **7** Mahaq drah lam anoe ka mangai tiaq hõc haq hloe xam Phiero, Haq lam adroe ka pì müt ta Galili. Ta aih èh pì hnoq Haq, qmang ka bàu Haq khoe anoe ka pì. **8** Bì mangai gucadri aih loh enh ralùng hanang, cadàu amot rai yùq rai hamàih, ùh hùa anoe ka cabô cleq, majah qmang aih wì haq crè pi cajaq. **9** (note: The most reliable and earliest manuscripts do not include Mark 16:9-20.) Chuaq Jesus khoe rìh hlài sroeh sroq oe ta hì baxèm gàu tuàng, angoe aih haq mahno rađeh ka Mari Mađolen, aih mangai haq ma khoe drùh qnoph tapèh toq kiac dù. **10** Mangai gucadri aih lam patinh ka bì mangai adroe aih ma khoe tiaq Chuaq Jesus, mahaq manoeq qnang mangò crò hmoe. **11** Mahaq jò wì aih tàng mangai gucadri aih doe Chuaq Jesus khoe rìh hlài, èh rađeh khoe hnoq haq, wì ùh lùi. **12** Atìq ka aih, Chuaq Jesus yõc chac qnoeq hòm đòeq hu mahno rađeh ka baiq ngai tiaq hõc, jò wa aih qnang hlài dèh gùng. **13** Wa aih drah lam patinh ka wì qnoeq loq diq, mahaq dua

ùh i cabô lùi. **14** Atìq hòm, haq mahno rađeh ka moeq jàt moeq ngai tiaq hōc jò wì aih qnang acaq, Haq i tapoch cwò ka wì ma ùh i manoh lùi, manoh ma cadoq, ùh lùi bàu bài mangai ma khoe hnoq haq rìh hlài. **15** Haq thê wì aih: “Drah lam jàp dìq crōng taneh, anoe Bàu lem ka rìm ngai. **16** Mangai leq lùi rai chìuq broq baptém haq aih jah dèch, mangai leq ùh lùi haq aih èh jah pòq yōc kan hadrah. **17** Bài mangai ma lùi aih èh jah kan halac kô: Wì jah yōc yiniq au đòeq drùh qnoph kiac dù, jah tapoch bàu neo. **18** Cadopbih ta tì, tàng ôq yiniq ma ùh khòh, dua ùh hìa troq cleq, yōc tì bèq mangai ùh hrōc, mangai ùh hrōc jah brêh.” **19** Atìq ka Chuaq Jesus anoe ka wì qmang aih, khoe èh haq jah dèch atōc ta plinh, haq hangui enh pah qma Boc Plinh. **20** Khoe aih, mangai tiaq hōc loh lam rai anoe jàp jìa, Chuaq wiang broq pajùm ti wì, rai yōc bài kan halac acop tiaq đòeq broq cajap deh ka bàu.

LUCA

1 Wì craq Thêopilo, i bac ngai khoe dìq ka manoh achìh hu taqmon hlài bài yiniq broq ma khoe gêh oe taqne nhèn, **2** tiaq wì ma hnoq qmòe enh baxèm, manòeq khoe loh mangai ma patih ka Bàu lem khoe anoe hlài ka bèn, **3** qmang aih jò khoe ngan hlài ka rabiaq rìm trong enh jò baxèm, au hèm khòh tiaq qmòe tang cadiang hu achìh hlài ka ìh, **4** dôq ìh loq qmoè ka cajap bàu ìh ma khoe jah hòc aih joq qnàng. **5** Qnhòng Hêrôt broq bùa diac Juđê, i mòeq ngai pajàu yiniq haq Xachari, tiaq dèh apah Abija, Elisabet mai haq hadai nang noe Arôn. **6** Boc Plinh ngan hnoq dìq baiq ka wa aih mangai taq atoq, wèq gêh geo rìm ranenh hloe xam rìm ramènh Boc Plinh thê. **7** Wa ùh i ka kon majah qmang aih Elisabet haq xon, èh dìq baiq ka wa khoe bac hanam. **8** Jò Xachari tiaq dèh wì ma ta axong, khoe troq jò da haq broq pajàu dèch ramènh tadreo am ka Boc Plinh. **9** Tiaq dèh trong bài pajàu kàn xan broq, Xachari pàih panàih troq ka haq mùt ta hñim kùh waiq đòeq bùh gahnàu xua thùm ka Boc Plinh. **10** Trùh jò bùh gahnàu, bài mangai bac oe dìq enh gùng waiq khàn. **11** Moeq bình plinh loh enh ngèa ka Xachari, yòng enh pah qma ka nòe prang bùh gahnàu. **12** Jò Xachari hnoq bình plinh, haq loh ka lèt rai yùq crè. **13** Mahaq bình plinh doe ka haq: Xachari, ùh dùh yùq, bàu ih waiq khàn khoe jah tamàng, Elisabet cadrì ìh, haq aih èh ha-uang ka ìh moeq ngai kon calô, ìh yiniq ka aih Jon. **14** Kon calô aih èh broq ka ìh jah lem bùi, bac ngai qnoeq hadai manè jò ha-uang qnoh haq. **15** Enh ngèa Boc Plinh, kon qyoh aih wìa gucraq, yac ka alac plì nho, yac ka cleq

ma loq bù dua haq ùh ôq, haq aih jah bình halùih Yang
Hadròeh jò haq oe raq ta cliac miq. **16** Haq qnung bàc
ngai Isorali wìh hlài trùh ti Chuaq aih Boc Plình wì haq.
17 Èh haq lam enh ngèa ka Chuaq tiaq manoh xam kan
itai qmang da Êli, đòeq broq manoh baq wìh hlài dèh
ta kon, èh mangai ùh qnì iu wìh hlài ta kan rabiaq da
mangai taq atoq, hu padon đòeq ka Chuaq moeq nang
noe khoe palauq đòeq ta manoh. **18** Xachari bòch bình
plình: Broq qmang leq au ma loq ka bàu ìh aih joq qnàng?
Au khoe craq, mai au khoe bàc hanam. **19** Bình plình doe:
Au kô Gapriên, yòng enh ngèa ka Boc Plình. Haq khoe
thê au trùh bahìa kan lem bùi kô. **20** Manòeq kô, ìh loh ka
làu, pi hloh tapoch trùh hì loh bài yiniq qmang bàu au
khoe anoe, majah qmang aih ìh ùh lùi bàu au, aih la bàu
trùh dèh jò hi xìt. **21** Jò aih dìq ka bài wì mangai bàc oe
enh gùng gòm Xachari dìq jaq hamàih, majah qmang aih
haq oe ta hnim kùh waiq dùnh hrìn. **22** Jò Xachari loh
enh gùng, haq tapoch ùh jah, aih wì ma hi loq haq i hnoq
kan mahno tanòe hnim kùh waiq, haq yöc tì ti patìah ka
wì, mahaq oe raq làu. **23** Jò haq khoe dìq dèh ka hì patìh,
haq hlài dèh ta hnim. **24** Toq biaq atìq ka aih, Êlisabet,
mai haq hi hadràp, haq cadoc rađeh padam khê **25** haq
doe: Chuaq khoe broq yiniq kô ka au, haq khoe haqmiang
ngan au, đòeq lêh kan camaih au oe taqne mangai bàc.
26 Jò Êlisabet oe jiang khoe jah tadràu khê, Boc Plình
thê bình plình Gapriên trùh ta plài Naxaret, gùng Galili.
27 Lam glàm mangai adrùh sriu yiniq haq Mari, khoe
tèu bàu yöc moeq ngai radam yiniq haq Jôsep, caxi noe
Đawit. **28** Bình plình trùh ajang nòe mangai adrùh aih rai

doe: Manè am ka ìh, mangai jah xôq ramot! Chuaq oe
ti ìh. **29** Tàng bàu aih Mari haq hamàih, haq hèm bàu
hangah qmang aih ìq qmang leq? **30** Bìnph plình doe: Mari
ùh dùh yùq dèh, majah qmang aih ìh khoe jah kan tamèt
enh nòe Boc Plình. **31** Kô èh ìh hadràp èh ha-uang loh
moeq ngai kon calô, ìh yiniq ka haq Jesus **32** Haq aih èh
wìa gucraq, jah creo Kon Yiang Dìq Jaq Haqnhèq. Chuaq
aih Boc Plình jah am ka haq gèq enh kan cadraq haq
aih Đawit. **33** Haq aih èh ma wèq cwìang enh qnhèq ka
nang noe Jacôp trùh mòeq đòe, diac da haq ùh lùch. (aiōn
g165) **34** Mari padreo bàu: Au qnhòq lah qnì ka gucalô leq,
wìa ka i qmang aih? **35** Bìnph plình doe: Yiang Hadròeh
trùh enh qnhèq ka ìh èh kan itai Yiang Dìq Jaq Haqnhèq
taqmàn ìh tayàp haq, dài aih ìq raq, kon hadròeh aih ha-
uang loh majah ep creo kon Boc Plình. **36** Hatau, Elisabet
mangai hadròng ìh, hanoh oe jiang jò haq khoe craq,
rìm ngai khoe loq ka haq aih xon, yàng manòeq kô haq
oe jiang khoe jah tadràu khê. **37** Majah qmang aih, ùh i
cleq Boc Plình ma broq ùh jah. **38** Mari padreo bàu: Au
kô mangai hapõng Chuaq, waiq bàu ìh anoe ka au aih
jah gêh! Khoe aih bìnph plình hi lam. **39** Ta bài hì aih,
Mari haq drah lam trùh ta plài ma oe ta wang nòe gùng
Juđe, **40** ta aih haq mùt ta hñim Xachari rai dèch bàu
manè lem bùi ka Elisabet. **41** Elisabet bu tàng bàu Mari,
kon nga oe ta cliac khoe canhroh, Elisabet khoe jah bìnph
Yiang Hadròeh, **42** Haq dèch bàu anoe: Taqne dìq dõng ka
mangai gucadri, ìh kô mangai i xôq ramot, kon qyoh oe
ta cliac hadai jah xôq ramot. **43** Enh leq kô ìq au majah
kan tamèt qmang kô, miq da Chuaq au trùh hmàih ka au?

44 Majah qmang aih don au butàng bàu ìh, kon nga ta cliac au khoe canhroh rai lem bùi. 45 Xôq ramot ka ìh mangai khoe lùi bàu Chuaq anoe, aih bàu trùh dèh hì jah xìt. 46 Mari doe rameh: Manoh au manè apôi Chuaq, 47 Mahua yiang au lem bùi tanòe Boc Plình aih Chuaq dèch au, 48 Majah qmang aih haq khoe hqmàng hnoq kan hamoq au, mangai hapõng haq. Pang kô ta èh, rìm qnhòng dìq anoe au kô mangai i xôq ramot; 49 Majah qmang aih, Yiang dìq jaq haqnhèq, khoe broq biac kàn ka au. Yiniq haq aih hadròeh, 50 Haq loq waq ka mangai loq iu haq enh qnhòng kô trùh qnhòng tau. 51 Haq yõc dèh tì kõng đòeq patô qnoh deh kan itai; Rai raliang đac trong da mangai i manoh loq padèch radeh. 52 Haq khoe caqnìh qnoh mangai i cwìang clıh enh gèq cla wì haq, Rai dèch atõc mangai loq hamon radeh 53 Haq khoe broq ka mangai pangot jah bình dahwèq jiàng, Hnan mangai kan hlài tì dech. 54 Haq khoe wiang ti Isorali, hapõng haq Đòeq bahmàng hlài dèh kan loq waq haq, 55 Tìah ka bàu haq khoe doe ka kan cadraq bèn. (aiôn g165) 56 Mari oe ti Êlisabet jah ta piq khê, khoe aih hi wìh hlài dèh ta hñim. 57 Jò khoe trùh dèh khê Êlisabet hi ha-uang, haq ha-uang moeq ngai kon calô. 58 Plài pla xam bài oh daq hìa Chuaq khoe dìq jaq tamèt ka Êlisabet wì wiang trùh lem bùi ti haq. 59 Trùh rahem hì, dìq ka wì lam ta aih đòeq broq ramènh kat akia, wì yiniq ka kon qyoh aih Xachari tiaq yiniq dèh baq. 60 Mahaq miq haq doe: Ùh, ep yiniq ka haq Jon. 61 Wì doe: Dìq dõng ka nang noe ìh ùh i ka cabô leq i yiniq aih. 62 Wì yõc tì ti patìah hu bòch baq haq enh yiniq dèh ka kon yiniq cleq. 63 Xachari

thê wì yōc capiac long ban qyoh, haq achìh: yiniq haq Jon. Mangai leq mangai meh hamàih đeh hra. **64** Wop hloe jò aih raq, rapet haq jah rađah, haq tapoch rai manè apôi Boc Plinh. **65** Dìq ka wì taplài cadròt đeh hra, dìq ka gùng wang Galili wì anoe ka dabau toq trong aih. **66** Cabô tàng bàu aih hanoh wê đòeq ta manoh rai doe: Kon nga aih èh qmang leq cadèh oq? Majah qmang aih tì Chuaq oe ti haq. **67** Jò aih, Xachari baq kon nga aih jah bình Yiang Hadròeh, haq tapoch pajàu rameh: **68** Manè apôi Chuaq aih Boc Plinh Isorali, majah qmang aih ìh khoe trùh hmàih, rai baxon yōc hlài Isorali mangai da ìh, **69** ìh khoe paqnàng ka nhèn, ta hnim Đawit hapōng ìh, moeq Ngai dèch nhèn i kwìang itai! **70** Tìah ka ìh khoe yōc bàu wì mangai pajàu hadròeh qnhòng calah nèh, (aiōn g165) **71** ìh dèch nhèn khoe ka mangai tablêq, khoe ka nòe tì kǒng wì ma tagit ka nhèn; **72** ìh paqnoh kan loq waq am ka kan cadraq nhèn, rai hmàng bàu tajap hadròeh cla ìh, **73** Tìah ka ìh ma khoe hapah ka Apraham kan cadraq nhèn, **74** ìh khoe tèu bàu dèch nhèn claih enh tì kǒng mangai tagit ka nhèn, ìh am ka nhèn sôq ramot malem, ti ngèa ìh. **75** Đòeq yōc kan hadroèh, kan taq atoq hu patìh ka ìh, dìq ka qnhòng cla ùh hòq qmòe cleq. **76** Kon oq! kô èh wì creo kon aih pajàu da Yiang Haqnhèq; Kô èh kon lam enh ngèa ka Chuaq, padon trong ka haq, **77** Dôq ka mangai da haq ajang nòe yiniq lui wì haq jah caqnaih aih hu canau loq kan dèch am dech. **78** Majah qmang aih Boc Plinh nhèn tamèt ta manoh, Mat mahì enh qnhèq jah sreo qngah ka nhèn, **79** Đòeq sreo ka mangai hangui tanòe clam cluiq xam mangai hangui ta yàp qmù kan kachìt,

Rai qnung jènè nhèn lam ta trong catèm. **80** Kon qyoh aih yòng kàn, mahua yiang tadêh, rìh oe tanòe hawit trùh hì paqnoh rađeh ka mangai Isorali.

2 Jò aih Auguto, bùa kàn qnoh bàu thê dìq ka Lamah, aih taneh diac kàn dìq jaq, ep ti rèn ngan hlài mangai ta aih jah toq leq. **2** Aih yàng baxèm wì ti rèn ngan hlài, wop qnhòng da Quiniri-u broq cla craq bài cwan tagùng Siri. **3** Mangai hlài đeh hra ta gùng cla đòeq achìh qmùt dèh yiniq. **4** Jôsep aih caxi noe Đawit, haq hanoh lam enh Naxaret, gùng Galili, loh ta gùng Juđê trùh ta Bêt-le-hem. **5** Hu achìh qmùt dèh yiniq rađeh xam yiniq Mari, mangai khoe òq bàu yōc haq, qnang oe jiang. **6** Jò wa qnang oe ta aih, khoe trùh hì Mari ha-uang. **7** Haq ha-uang kon calô ramua, yōc mù taqmàn deh kon, ta qngùi ta atong nhat, majah qmang aih ta hnim padài khoe dìq ka nòe. **8** Hadai gùng aih, i bài mangai ban triù oe tagùng, riù qngah ka mang đòeq wèq dèh triù. **9** Moeq bình plình da Chuaq trùh ten ka wì, kan ranhòm Chuaq qngah qngiang dudan wì haq, wì crè pi cajaq **10** Bình plình doe: Ùh yùq cleq! Hacô au bahìa ka pì moeq Bàu lem, aih raq kan lem bùi am dìq ka mangai oe ta crōng taneh; **11** Hì cô ta plài Đawit khoe ha-uang ka pì moeq Ngai dèch mangai, aih Christ, aih Chuaq pì. **12** Kô oq kan hadro dôq pì hu canau ka Haq, pì hnoq moeq ngai kon qyoh taqmàn xi mù, kùi ta atong nhat. **13** Tajòe qmòe jò aih, raya rayùc lình plình xam bình plình aih calêu manè apôi Boc Plình rameh: **14** Qngah yiniq Boc Plình oe taplình haqnhèq, Catèm tanòe haqneq am ka bài mangai haq loq waq! **15** Jò wì bình plình khoe talah ka wì haq hu

wìh hlài ta plình, bài mangai ban triù doe ka dabau: Beq bèn lam ta Bêtlem hu ngan yiniq neo loh kô, Chuaq ma khoe doe ka bèn loq. **16** Qmang aih wì haq drah lam ka nhet, hnoq Mari xam Jôsep xam kon qyoh qnang kùi ta atong nhat. **17** Jò khoe hnoq wì anoe hlài bàu bình plình anoe trùh kon qyoh, wì haq ma khoe jah tàng. **18** Dìq ka mangai tamàng hamàih đeh hra ka bàu bài mangai ban triù anoe ka wì haq. **19** Mahaq Mari wê dìq döng bài bàu aih rai hèm yôt dèh ta manoh. **20** Bài mangai ban triù tawih hlài, rai broq qngah yiniq rai manè apôi Boc Plình trong wì haq khoe tàng xam yiniq wì haq khoe hnoq joq tìah ka bàu ma khoe anoe ka wì haq. **21** Trùh rahem hì, aih hì ep broq ramènh kat akia ka kon qyoh, wì yiniq ka haq Jesus, aih yiniq bình plình ma khoe yiniq adroe qmòe ka jò hadràp. Dèch Jesus ka Boc Plình **22** Khoe dìq ka hì basròeh, tiaq ranenh Moise, Jôsep xam Mari atoc kon qyoh ta Jérusalem đòeq dèch ka Boc Plình, **23** qmang ka khoe achih ta hset ranenh haq: “Rìm ngai kon calô ramua, ep dèch ka Chuaq”, **24** dèch tam baiq toq trù braih ùh meh baiq toq kon trù qyoh, qmang ka ranenh Chuaq khoe thê. **25** Jò aih, ta Jérusalem i moeq ngai rìh lem rìh taq atoq, yiniq haq aih Siméon, haq aih toq gòm kan alòng trùh ka Isorali, Yiang Hadròeh oe ti haq. **26** Yiang Hadròeh khoe anoe ka haq loq haq ùh cachít adroe ka jah hnoq Christ da Boc plình. **27** Qmang aih, haq tiaq Yiang Hadròeh qnung, haq mùt ta hnim kùh waiq wop troq jò wa miq baq aràng Chuaq Jesus ta aih, hu pagêh ka haq rìm trong ramnenh khoe thê. **28** Haq aih hi caqmìn kon qyoh aih, haq manè apôi Boc Plình rameh:

29 Waiq Chuaq! Manòeq kô ìh am au jah cachìt ka catèm tiaq troeq bàu ìh; **30** Majah qmang aih mat au khoe hnoq kan dèch kon mangai trùh enh nòe ìh, **31** ìh ma khoe palauq qmòe dèh, đòeq broq kan qngah enh ngèa rìm diac, **32** kan qngah sreo jàp ka phù cròng, broq ka Isorali ìh jah kan ranhòm. **33** Wa miq baq kon qyoh aih dìq jaq hamàih ka bàu wì anoe trùh dèh kon. **34** Simêon waiq xôq ramot am ka wa ǒng mai, haq doe ka Mari miq kon qyoh aih rameh: I bàu khoe tèu đòeq am ka Kon qyoh kô, haq broq nen ka bàc ngai Isorali tacro, èh hadai broq ka bàc ngai jah yòng, khoe tèu đòeq dôq haq wìa teo ka bàc ngai tarahen; **35** da ìh hòm, i moeq pla chang pàc hlùh ta cliac ìh. Aih èh bàc yiniq oe ta manoh bàc ngai jah paqnoh. **36** Èh hòm i mangai pajàu cadri, yiniq haq An-ne, kon da Phanu-ên, caxi noe Ase, joq khoe bàc hanam. Enh jò haq oe raq adrùh sriu, atìq ka aih haq oe dèh ti ǒng jah tapèh hanam, **37** khoe aih haq hi hadrô. Jò aih haq khoe jah rahem jàt pôn hanam, oe toq ta hnim kùh waiq, dahì damang patìh ka Boc Plình, apàm ka acaq rai waiq khàn. **38** Hanoh jò aih diq, haq trùh ta aih, manè apôi Boc Plình rai anoe trùh kon qyoh ka bài mangai qnang tangèh gòm Jérusalem jah dèch paclaih. **39** Jò Jôsep xam Mari khoe broq gêh ka trong ranenh Boc Plình thê, wa haq tawìh hlài ta Galili, trùh dèh ta Naxaret plài cla. **40** Kon qyoh aih yòng kèn, rai tadêh, jah bình kan rabiaq, xôq ramot Boc Plình oe ti Haq. Jò Jesus jah moeq jàt baiq hanam **41** Rìm hanam wa miq baq Haq tóc ta Jersalem, đòeq lam tagop ta hì ramènh Pancwa. **42** Jò khoe jah moeq jàt baiq hanam haq lam tiaq dèh wa miq baq tóc ta aih hu hadai

tagop ta hì ramènh qmang ka xan hmaq broq. **43** Khoe dìq ka hì ramènh, wì haq wìh hlài dèh tagùng, Chuaq Jesus oe hlài ta aih mahaq miq baq haq ùh qnì. **44** Hèm deh haq lam ti bài bua ta aih, khoe moeq hì lam trong aih men ti bòch wì oh daq xam bài mangai canau; **45** jò chaq haq khoe pi hnoq, wa wìh hlài ta Jerusalem đòeq chaq. **46** Piq hì wa men hnoq haq tanòe hnim Kùh waiq, qnang hangui taqne bài mangai hnài, rai tamàng rai bòch hlài wì aih. **47** Rìm ngai tàng bàu rai hnoq kan rabiaq haq wì dìq loh ka hamàih jò haq bòch wì. **48** Jò hi hnoq haq, wa miq baq dìq jaq hamàih. Miq haq doe: A kon! Hagleq ma jah habo ka ma qmang kô, ma khoe lèt oe i jaq cleq? **49** Haq bòch: “Aih chôp chaq dèh ka au? Chôp ma ùh loq au ep oe patih dèh ta hnim Baq qmòh?” **50** Mahaq wa aih ùh tem bàu haq anoe ka rađeh cleq. **51** Khoe aih haq hlài ta Naxaret ti wa miq baq rai iu broq tiaq bàu wa, mahaq bàu da haq miq haq wê döng ta manoh. **52** Chuaq Jesus rai èh rai rabiaq tam, chac rai èh rai kèn, kiang èh kiang lem manoh Boc plinh xam kon mangai.

3 Hanam moeq jàt padam qnhòng Tibêro broq bùa kèn, jò aih Bônso-philat broq cla craq bài cwan ta gùng Judê, Herôt broq bùa qyoh ta gùng Galili, Philip oh haq broq bùa qyoh ta gùng Yturê xam tracôni, Lysa-nia broq bùa qyoh ta gùng Abilen, **2** Anne xam Caiphe broq pajàu kèn, aih i bàu Boc Plinh thê Jon kon Xacahri tanòe gùng hawit. **3** Jon ti lam dudan jàp ka rìm gùng cròng diac Jôđan, hnài wì broq ramènh baptem da kan loq raxach cađac trong dù đòeq hu jah caqnaih yiniq lui, **4** tìah ka bàu khoe achìh ta hset pajàu Êsai: I bàu creo tanòe hawit: Drah

palauq trong ka Chuaq, pajang trong da haq. **5** Nòe jrùq
tàc dôq haq bình, Roc bui wang, roc nòe haqnhèq qnoh
dôq haq haqneq; Trong tawech pajang dôq haq hnhoh,
Trong qnhèq qneq broq dôq haq tamang. **6** Dìq dǒng kon
mangai jah hnoq kan dèch enh Boc Plình. **7** Jon anoe ka
mangai bac qnang trùh ta aih đòeq jah broq baptem:
Nang noe bìh tau, cabô ma hnài pì loq wia ka kan nòeh hì
atìq? **8** Qmat èh, drah wìa malem dôq ùh qngwan ka pì
khoe loq raxach, ùh dùh doe Apraham aih kan cadraq
nhèn, majah qmang aih au doe ka pì Boc Plình broq bài
hmo kô loh nang noe ka Apraham jah. **9** Chòng khoe
roh qmòe ajang xèm long, waq toq long leq ùh loh plì
lem, long aih èh koh đòeq hu bùh cađac. **10** Wì bòch Jon:
Aih èh nhèn ep broq qmang leq? **11** Haq padreo bàu:
Cabô i baiq blah eo, yōc moeq blah am ka mangai chac
dech, dahlwèq acaq hadai qmang aih. **12** I bac ngai yōc
thèq trùh hu broq baptem, wì aih bòch: Ha nhèn ep broq
cleq? **13** Haq doe ka wì: Apaq yōc yeo bac ka maneh khoe
pajaq. **14** Bài mangai lindh hanoh bòch: Ha nhèn kô hòm
ep broq cleq? Haq doe: apaq tacaq ka cabô, apaq qnùt
cabô, jèn baha pì pang leq, pì waq dèh pang aih. **15** Majah
qmang aih wì qnang tagòm ngèh, wì hèm dèh ta manoh
ahìaq Jon kô raq Christ, **16** aih ìq Jon majah doe ka wì: Au
broq ka pì baptem xi diac mahaq Mangai trùh atìq ka au
cwìang yeo haqnhèq ka au, au mech qnhòq wìa broq đeh
magai doeh da haq caxi jep. Haq aih èh ma broq ka pì
baptem xi Yiang Hadròeh xi ùnh. **17** Tì Haq wê cađap hu
dè dèh qmau ta haneh ka hreо, lênh qmau haq tah ta
hapom, manùh haq bùh ta ùnh ùh jò leq pat. **18** Jò Jon

anoe Bäu lem, haq hadai hnài wì bac trong qnoeq, **19**
Mahaq Hêrôt bùa qyoh, Jon khoe i tapoch ùh lòh haq
yōc Hêrođia mai oh haq, hloe xam bài trong dù bùa ma
broq, **20** haq broq tam moeq yiniq dù hòm, aih haq rùp
clêh Jon ta hnim tù. **21** Jò dìq ka mangai ta aih khoe jah
broq baptem, Chuaq Jesus hanoh jah broq baptem, plinh
tapèh qmòe jò haq qnang waiq khàn, **22** Yiang Hadròeh
yōc chac trù loh jràp ta chac haq, tajòe qmòe jò aih i
bäu enh plinh doe: “Îh kô kon au, mangai au loq waq
deh, kon lem ka manoh au rìm trong.” **23** Jò Chuaq Jesus
baxèm broq dèh trong haq broq, jò aih haq bu jah qnah
ta piq jàt hanam. Tiaq manoh wì hèm haq aih kon Jôsep,
Jôsep kon Hêli, **24** Hêli kon Matat, Matat kon Lêwi, Lêwi
kon Mêñ chi, Mêñ chi kon Jane, Jane kon Jôsep **25** Jôsep
kon Mata-thia, Mata-thia kon Amôt, Amôt kon Nahum,
Nahum kon Êt-li, Êt-li kon Na-gê, **26** Na gê kon Ma at, Ma
at kon Mata-lia, Mata-lia kon Sê-me-in, Sê-me-in kon Jô-
et, Jô-et kon Jô-đa, **27** Jô-đa kon Jô-anan, Jô-anan kon
Rêsa, Rêsa kon Xôro-baben, Xôro-baben kon Sala-thien,
Sala-thien kon Nêri, **28** Nêri kon Mêñchi, Mêñchi kon A
đi, A đì kon Kôsam, Kôsam kon Ên-mađan, Ên-mađan
kon Ero, **29** Ero kon Jêsu, Jêsu kon Êli-es, Êli-es kon
Jôrim, Jôrim kon Ma-that, Ma-that kon Lêvi, **30** Lêvi kon
Si-mê-on, Si-mê-on kon Juda, Juda kon Jôsep, Jôsep kon
Jônam, Jônam kon Êli-akim, Êli-akim Mê-lea, **31** Mê-lea
kon Mêna, Mêna kon Mata-tha, Mata-tha kon Nathan,
Nathan kon Đawit, **32** Đavit kon Jêse, Jêse kon Jôbet, Jôbet
kon Bo-ô, Bo-ô kon sala, Sala kon Nach-son, Nach-son kon
Ami-na-đap, **33** Ami-na-đap kon Amin, Amin kon Arôni,

Arôni kon Et-rôm, Et-rôm kon Pharê, Pharê kon Juda,
34 Juda kon Jacôp, Jacôp kon Ysac, Ysac kon Apraham,
apraham kon Tharê, Tharê kon Nacô, **35** Nacô kon Sêruc,
Sêruc kon Ragao, Ragao kon Phalet, Phalet kon Hêbe,
Hêbe kon Sala, **36** Sala kon Canam, Canam kon Abasac,
Abasac Sem, Sem kon Noê, Noê kon Lêmec, **37** Lamec kon
Mêtô-sela. Mêtô-sela kon Hênoc, Hênoc kon Jaret, Jaret
kon Mêle-le-en, Mêle-le-en kon Cainam, **38** Cainam kon
Enot, Enot kon Sêt, Sêt kon Adam, Adam kon Boc plinh.

4 Chuaq Jesus bình Yiang Hadròeh, hlài enh cròng diac
Jođan, Yiang Hadròeh aràng haq mùt tagùng hawit. **2** Ta
aih kiac padô aluàn haq pôn jàt hì, Ta bài hì aih haq ùh
lòm acaq qmòe cleq, dìq dèh ka jò haq loh qmòe ka hrah.
3 Kan kiac doe ka haq: Tàng joq ìh kon Boc Plinh, thê
hmo kô wìa bênh beq. **4** Chuaq Jesus padreo bàu: “Khoe i
bàu achìh, kon mangai rìh ma xài canòm toq ka bênh.”
5 Kiac atôc haq tanèo haqnhèq, qmoeq rahyàc raq haq
khoe patô ka Chuaq Jesus dìq döng ka bài diac ta cròng
taneh; **6** haq doe ka Chuaq Jesus: dìq döng ka cwiang
xam ka ranhòm taqmat, khoe am döng ka au, au enh am
ka cabô leq am. **7** Tàng ìh kùh waiq au, aih hi jah ìh. **8**
Chuaq Jesus pareo bàu: “I bàu achìh rameh: ìh ep kùh
waiq Boc plinh ìh rai patìh toq ka haq raq” **9** Kiac aràng
haq trùh ta Jêrusalem rai dèch atôc haq oe tanèo dìq jaq
haqnhèq ta bui hñim kùh waiq, haq doe: Tàng joq ìh kon
Boc plinh, hadrùc beq, **10** majah qmang aih khoe i bàu
achìh: Haq thê dèh bìnph plinh wèq ìh, **11** Wì aih dèch ìh
tôc taxöng wì haq, aih èh dôq jènh ìh ùh hìaq catoeh ka
hmo. **12** Chuaq Jesus padreo bàu: “I bàu khoe achìh: Ùh

khòh qnhro Chuaq aih Boc Plình ìh”. **13** Kan kiac dìq ka trong đòeq hu padô Chuaq Jesus, haq hi wia đò hòeq. **14** Chuaq Jesus jah bình cwìang atai enh Yiang Hadròeh, haq wìh hlài ta Galili, jàp gùng dudan aih khoe hìa tàng yiniq haq. **15** Haq hnài tanèe hnim tagop qyoh, mangai mannè đeh hra. **16** Haq trùh ta Naxaret, nòe haq yòng kèn. Tìah dèh Haq hmaq broq, trùh hì Sabat haq mùt hnim tagop qyoh, èh hi yòng đoc. **17** Wì am ka haq hset pajàu Êsai, haq pèh jang nòe khoe achìh: **18** Yiang Boc Plình oe ti au; Majah qmang aih haq khoe xùt dàu ka au, đòeq hu anoe Bàu lem ka mangai pa; **19** Haq khoe thê au trùh paclaih mangai oe ta hnim tù jah loh enh gùng, Mangai ùh xau jah hnoq, Mangai wì tacaq ka haq jah claih; Rai bahìa hanam catèm da Chuaq. **20** Khoe aih haq don hlài hset padreo am da ka mangai patìh ta aih khoe èh haq hi hangui. Rìm ngai ta hnim tagop qyoh aih dìq haqmiang ngan haq. **21** Haq doe ka wì: Bàu hset hadròeh pì ma tamàng aih, hì kô khoe xìt. **22** Dìq ka mangai ta aih maleq ma meh dìq anoe trùh haq, wì hamàih ka bàu rabiaq loh enh haq, wì doe: Haq qmat ajoq kon Jôsep? **23** Haq doe ka wì: “Canau pì yōc bàu cachôi qmang kô hu anoe ka au: Mangai broq jreo, haqnauq đèh cla òeq, aleq bài yiniq ìh broq ta Cabênaum nhèn ma khoe tàng, broq nòe gùng cla kô beq.” **24** Haq doe ka wì: “Joq au doe ka pì, qnhòq lah i mangai pajàu leq jah gùng cla manè. **25** Au anoe qnàng ka pì, qnhòng Êli, jò tróc pađang piq hanam qne, dìq dōng ka gùng loh ka pangot hrah, tanèe mangai Isorali i bàc mangai hadrô; **26** yac ka qmang aih, aleq i thê Êli trùh hnim cabô taqne bài aih, mahaq thê

haq lam ta hnim mangai cadrì hadrô oe ta Sarepta gùng Siđôn. **27** Qnhòng da pajàu Èlisê mangai Isorali loh ka bacùn ma i palap cleq, mahaq ma i mangai leq jah brêh, enh gùng ka Na-aman, mangai Siri. **28** Maleq ma meh oe ta hnim tagop qyoh tàng bàu aih, wì nòeh pi ka jaq cleq. **29** Wì padinh yòng, hua qnoh haq loh enh gùng ka plài, qnung haq tōc ta bui wang nòe wì broq plài đòeq hu caqnhùt qnìh đac haq. **30** Yàng haq pagat ti ngèa wì èh hi lam taqnoeq. **31** Haq loh ta Cabênaum, oe ta gùng Gallili, hnài ta hì Sabat. **32** Rìm ngai tamèt ta manoh jò tàng bàu haq hnài, majah qmang aih bàu haq i ang. **33** Tanòe hnim kùh waiq i moeq ngai ta dalam chac haq i kiac mùt, breo cadêh: Jesus mangai Naxaret, **34** Ìh enh broq ka nhèn cleq kô ìq? Ìh trùh hu raliang cađac nhèn qmòh? Ìh qmat cabô, au loq: Mangai Hadròeh da Boc plînh! **35** Mahaq Chuaq Jesus capoch nhang ka haq aih: “Oe ma hatinh haq! Drah loh enh mangai qmat”. Hloe jò aih, taqne mangai bac kiac rapòt mangai aih ta haqneq, èh hi loh, ùh hìaq broq ka haq aih loh habau. **36** Mangai leq mangai meh haglènh đeh hra, wì ta anoe ka dabau: Bài bàu kô qmang leq ìq! Haq yōc cwiang yōc kan dêh enh leq ma drùh qnoh kiac, kiac ma loh hloe qmang meh. **37** Dìq dōng gùng dudan ta aih wì loq đeh hra ka Haq. **38** Chuaq Jesus loh enh hnim tagop qyoh, haq lam ta hnim Simôn. Miq mai Simôn qnang tōq tanget hlàc raya. Wì canòm ka Chuaq Jesus broq brêh ka haq. **39** Chuaq Jesus cachình chac ta mangai aih, haq tapoch ka kan tanget, kan tanget hi dìq. Mangai aih hi padinh yòng patìh. **40** Jò mat mahì clìh, mangai yinìq qmang leq, mangai ùh

hrōc qmang leq wì aràng trùh dìq ta haq, haq yōc tì bēq tang ngai hu broq brēh ka wì. **41** Bàc kiac cadàu loh enh bàc ngai rai cajiah: ĩh qmat kon Boc Plình. Mahaq Chuaq Jesus lech ùh am wì haq tapoch, majah qmang aih kiac loq ka haq aih raq Christ. **42** Buqngah, Chuaq Jesus loh lam tanoè hawit. Bàc mangai lam ti chaq haq. Jò hnoq haq, wì padràng haq oe, wì ùh enh dôq haq lam taqnoeq. **43** Mahaq haq doe ka wì: “Au ep lam anoe Bàu lem da Boc Plình ka wì ta qnoeq hòm, aih raq majah khoe thê au trùh.” **44** Haq ti hnài roc hnim tagop qyoh da mangai Juda.

5 I mòeq hì, jò Chuaq Jesus yòng ti haqmai hlōng Gênesaret, bài mangai bàc raya oe dudan dahnen dabau hu tamàng bàu Boc Plình. **2** Haq hnoq i baiq toq boang oe ti haqmai diac, cla mangai ranang khoe loh qnheo hlàm ta diac. **3** Baiq toq boang aih haq hi tōc ta moeq toq, aih boang da Simôn, thê haq qnoph tadrùq toq biaq, èh haq hangui ta boang đòeq hu hnài wì. **4** Jò khoe hêq ka hnài haq thê Simôn: “Chùng boang qnoph tanđe diac jrùq tau đòeq caqnìh hlàm hu rùp ka.” **5** Simôn padreo bàu: Mangai hnài, nhèn broq khoe lep qngah moeq mang ìq, ùh lòm jah qmòe cleq. Mahaq ĩh khoe doe qmang aih, òq nhèn tang hlàm. **6** Wì caqnìh hlàm ta diac jah ka pi cajaq, hlàm wì haq ten tapot, **7** aih wì haq hi gwàih tì dèh ka bua oe ta boang qnoeq trùh, đòeq wiang ti wì haq, ka bình baiq toq boang, boang loh qmòe ka enh cram. **8** Jò Simôn hnoq qmang aih, haq hacùn cràng enh ngèa ka Chuaq Jesus: Chuaq au! ĩh wia hangai ka au beq, au kô mangai bình toq yiniq lui. **9** Majah qmang aih haq xam

bài dèh bua oe ti haq, hnoq jah hrìn ka, maleq mameh
loh ka crè döng. **10** Chuaq Jesus doe ka Simôn: “Apaq
yùq cleq, pang kô ta èh, ìh jah wìa mangai tang hlàm
mangai”. **11** Khoe ka atōc boang tago, wì hi cađac dìq
döng đòeq hu tiaq haq. **12** Jò Chuaq Jesus qnang oe tanòe
plài tau, i moeq ngai bacùn dìq tachac, trùh bla op dèh
hadrò taqneq rai dang: Waiq Chuaq, tàng ìh ma waq broq,
ìh broq au brêh. **13** Chuaq Jesus hnhu tì bèq haq aih, rai
doe: “Au enh, brêh beq!” Tajòe hloe jò aih kan bacùn hi
brêh. **14** Chuaq Jesus tanap ka haq: “Paq anoe ka cabô
loq, mahaq ìh khoe brêh qmat drah lam patô rađeh ka
bài pajàu, rai dèch ramènh tiaq bàu Môise khoe thê, đòeq
patô ka wì hnoq.” **15** Yiniq Chuaq Jesus chàc rai èh rai
hangai, bàc mangai trùh hu tamàng, rai đòeq haq broq
ka wì jah brêh ka yiniq. **16** Mahaq Chuaq Jesus xan lam
tanòe hawit đòeq hu waiq khàn. **17** I mòeq hì, Chuaq
Jesus qnang hnài, i biaq ngai Pharisi xam bài mangai
hnài ranenh trùh hangui ta aih, wì haq loh enh bài plài
tagùng Galili, gùng Judê xam Jérusalem. Cwìlang itai Boc
Plinh oe ti Chuaq Jesus broq brêh ka mangai yiniq. **18** Jò
aih, i wì tòng aràng moeq ngai pen kùi ta dradrah, chaq
trong đòeq qmùt haq enh ngèa Chuaq Jesus. **19** Mahaq
taiq mangai bàc hrình, pì qnì qmùt qmòe trong leq, dài
wì majah àu atōc haq aih ta cröng hnim, doe kùa po,
qnhùa qnoh haq aih oe ta dradrah taqne wì mangai bàc
ta aih, tajang hloe ka ngèa Chuaq Jesus. **20** Chuaq Jesus
hnoq manoh lùi wì aih, haq doe ka mangai pen: “Yôiq
kon, yiniq lui kon khoe jah caqnaih.” **21** Bài mangai hnài
ranenh xam mangai Pharisi hèm dèh ta manoh: Cleq meh

ìq cabô, mangai tapoch ùh hòq, enh gùng ka Boc Plình
oe i cabô majah baclaih yiniq lui? **22** Chuaq Jesus loq ka
manoh wì hèm cleq, haq bòch “Hagleq pì majah hèm
qmang aih ta manoh? **23** Manðeq kô doe: Yiniq lui ìh
khoe jah caqnaih, tàng ùh meh doe yòng lam beq, aih
maleq ma yi hlàu ka capoch? **24** Mahaq au dôq pì loq
Kon Mangai oe ta crõng taneh i cwìang caqnaih yiniq
lui.” Haq doe ka mangai pen “Au thê ìh, yòng, dèch dra
drah qmat hlài ta hnim beq.” **25** Mangai pen padinh yòng
enh ngèa ka wì hloe jò aih raq, binh dèh dradrah haq ma
kùi hlài ta hnim, rai manè apôi Boc Plình. **26** Rìm ngai
tadèch qmòe nòeh rai manè Boc Plình rai crè tarít wì
doe: Hì kô joq bèn khoe hnoq trong joq dìq jaq halac!
Acaq moeq qmang ti mangai i yiniq lui **27** Atìq ka aih,
Chuaq Jesus loh enh gùng, hnoq moeq ngai, broq mangai
yõc thèq, yiniq haq Lêwi, qnang haqngui tanðe hnim yõc
thèq. Haq creo ka mangai aih: “Lam tiaq au.” **28** Lêwi
cadac dìq dõng, padinh yòng tiaq Chuaq Jesus. **29** Lêwi
broq yiniang kàn ta hnim raðeh padon ka Chuaq Jesus, i
bàc ngai yõc thèq xam bài mangai qnoeq haqngui acaq
pajùm. **30** Bài mangai Pharisi xam mangai hnài ranenh
mamùc ka mangai tiaq hõc Chuaq Jesus: Hagleq pì ma
acaq pajùm ti mangai yõc thèq xam mangai i yiniq lui?
31 Chuaq Jesus doe ka wì: “Mangai tadêh ma i nhet ka
chaq mangai broq jreo, mangai ùh hrõc ma nhet.” **32** Au
ùh xài trùh ðòeq creo ka mangai taq atoq, mahaq creo ka
mangai i yiniq lui. **33** Wì anoe ka haq: Mangai tiaq hõc da
Jon xan apàm ka acaq ðòeq waiq khàn, èh mangai tiaq
hõc da mangai Pharisi hadai, ùh xài qmang ka mangai

tiaq hōc da ìh toq acaq toq ôq. **34** Haq padreo bàu: “Jò cla kon ống oe raq dèh ti bua, trùh lem bùi hì yiniang haq, wìa ka pì ma thê wì apàm ka acaq? **35** Mahaq trùh hì wì ma qnung kon ống lam hangai ka wì, bài hì aih èh wì men apàm ka acaq.” **36** Haq alìah ka wì qmang kô: “Ùh i cabô hit mòeq calep eo neo đòeq clep ka eo dùnh. Tàng broq qmang aih, eo neo loh ka hyah, èh haqnech maneo hadai ùh tajì ka eo dùnh. **37** Hadai ùh i cabô ùc alac neo ta bau akia dùnh, broq qmang aih, alac neo broq ka bau akia dùnh hađah, alac taùc, bau akia hadai pi wìa waq. **38** Alac neo ep ùc ta bau akia neo. **39** Hanoh ùh i mangai leq khoe ôq alac dùnh èh bòch alac neo, majah qmang aih haq doe: alac dùnh yeo jiāng”.

6 I moeq yàng, wop hì sabat Chuaq Jesus lam pagat trong ruàng qmau, mangai tiaq hōc git hadròc qmau rai tuta hu kaq. **2** Bài mangai Pharsi bòch: Hagleq pì majah broq trong ùh troq ta hì Sabat? **3** Chuaq Jesus doe ka wì: “Pì ma qnhòq đōc Đawit broq cleq jò haq xam mangai tiaq haq hadai pangot qmòh? **4** Haq mùt ta hnim Boc Plình, yōc bênh ta aih qnoh acaq rai am dèh ka bua, bênh aih toq pajàu ma khòh acaq. **5** Haq doe hòm: Kon Mangai aih Chuaq hì Sabat”. **6** Hì sabat qnoeq hòm, Chuaq Jesus mùt hnài ta hnim tagop qyoh. Ta aih i moeq ngai angwenh tì pah qma. **7** Bài mangai hnài ranenh xam mangai Pharsi qnang ti chaq yiniq đòeq rùp Chuaq Jesus, wì ti ngan ta hì sabat haq i broq brêh ùh. **8** Mahaq Chuaq Jesus loq ka wì aih qnang hèm trong leq, haq doe ka mangai angwenh tì: “Yòng beq, yòng oe taqne kô.” Mangai aih hi yòng oe taqne wì ta aih. **9** Aih èh Chuaq Jesus hi doe: “Au

bòch pì: Maleq ranenh ma am broq tahì sabat, khòh broq trong lem loq broq trong qmèq? jêh đac mangai loq dèch mangai?” **10** Haq ti ngan dudan dìq ka wì ta aih, khoe èh haq doe ka mangai angwenh tì: “Bahnhoh tì ìh qmat.” Mangai aih broq tiaq qmang bàu, tì haq hi jah brêh. **11** Mahaq mangai Pharsi xam mangai hnài ranenh wì nòeh pi cajaq, wì bòch dabau broq qmang leq ka Jesus kô èh. **12** Oe ta bài hì aih Chuaq Jesus tōc ta wang waiq khàn, haq rìu qngah ka mang aih đòeq waiq khàn ka Boc Plình **13** Trùh qngah sroq èh, haq creo dèh mangai tiaq hōc, haq ràih moeq jàt baiq ngai, đòeq broq mangai Tiaq cla: **14** Haq yiniq ka Simôn aih Phiero, Anrê oh Simôn, Jaco xam Jon, Philip xam Bathê-lemi, **15** Mathio xam Thôma, Jaco kon Aphê, Simôn wì ma creo Xêlot, **16** Juđe kon Jaco, xam Juđa Ica-riôt, mangai ma blòq Chuaq Jesus atìq kô èh. **17** Khoe aih, Chuaq Jesus xam mangai tiaq hōc loh enh wang, wì oe tanòe tamang, ta aih i bàc ngai tiaq hōc xam bàc ngai trùh enh gùng Juđê, Jérusalem, xam trong diac Tiro, Siđôn, trùh tamàng bàu haq hnài rai dôq haq broq wì jah brêh kan yinìq tōq. **18** Bái mangai kiac mùt ta chac hadai jah brêh dōng. **19** Dìq dōng ka mangai bàc ta aih ti àu bèq haq, majah qmang aih i kan itai loh enh chac haq, broq ka bàc ngai jah brêh. **20** Chuaq Jesus ngan dèh mangai tiaq hōc, rai doe: “Xôq ramot am ka mangai pa, majah qmang aih diac Plình aih da pì. **21** Xôq ramot am ka mangai qnang pangot, majah qmang aih pì jah panàc, Xôq ramot ka qnang crò hmoe, majah qmang aih pì jah do lem bùi! **22** Xôq ramot am ka pì, jò wì git ka pì, hnan qnoph pì, hnap hnuq ka pì, cađac yiniq pì tìah kan amùa!

Taiq pì tiaq au! **23** Hì aih, thê pì lem bùi, ti aplôh rai manè, majah qmang aih kan baha pì oe ta Plinh èh kàn haraya: Majah qmang aih, kan cadraq wì haq calah nèh hadai khoe tabroq ka bài mangai pajàu qmang aih diq. **24** Mahaq habo ka pì mangai ma padrõng, majah qmang aih pì khoe jah qmèe dèh kan alòng! **25** Habo ka pì, mangai qnang panàc, majah qmang aih pì jah pangot! Habo ka pì mangai qnang lem bùi, majah qmang aih pì jah hmoe ta-oeh ka kan cachìt. **26** Habo ka pì mangai qnang jah bàc ngai tapoch manè, majaq qmang aih kan cadraq wì haq calah nèh hadai broq ka bài pajàu patìah qmang aih diq. **27** Mahaq au doe ka pì aih bài mangai qnang tamàng bàu au: Thê loq waq ka mangai tablêq ka pì, broq lem ka mangai git ka pì. **28** Waiq xôq ramot am ka mangai hanip pì, waiq khàn am ka mangai tapoch qmèq ka pì. **29** Cabô tep da pì taböc pah kô, hnhu hloe ka wì haq taböc pah tau, cabô hrùiq da pì eo enh gùng, dôq haq wì yöc hloe da pì eo enh dalam. **30** Tàng cabô bòch cleq, drah am, tàng i cabô blah yöc da pì cleq, apaq bòch yöc hlài. **31** Pì enh wì broq ka rađeh qmang leq, pì ep broq ka wì qmang aih. **32** Tàng pì loq waq toq mangai ma loq waq ka pì, aih ma ep pòq dòeh cleq? Mangai i yiniq lui hadai loq waq ka mangai loq waq ka haq. **33** Tàng pì toq hanò ka magai loq hanò ka pì, aih ma i pòq dòeh cleq? Mangai broq yiniq lui hadai qmang aih diq. **34** Tàng pì am đò ka wì qnoeq cleq, mahaq toq ngèh ka wì am hlài, aih ma i pòq dòeh cleq? Mangai i yiniq lui hadai am ka mangai i yiniq lui ti lình, đòeq hu jah yöc hlài xam xèm xam goe. **35** Mahaq thê pì loq waq ka mangai tablêq ka pì, loq hanò ka wì, loq

am ka wì, apaq ngèh ka yōc hlài cleq enh wì. Aih èh kan baha ka pì kàn joq qnàng, aih pì jah broq kon da Mangai dìq Jaq haqnhèq, majah qmang aih haq hanò ka mangai gôpla xam mangai broq dù. **36** Thê pì loq waq tìah ka Baq pì aih Mangai ma xan loq waq. **37** Apaq ti hadrah dèh cabô, èh pì ùh hìaq pòq kan hadrah, apaq taqmòq yiniq lui ka cabô, aih wì hadai ùh hìaq taqmòq yiniq lui ka pì. Thê cađac da wì qnoeq yiniq lui, aih wì hadai cađac da pì yiniq lui. **38** Am beq, aih èh wì hadai am hlài ka pì, èh wì yōc cađap kàn, xàu dôq haq nhet, tōng qmòe ka bình, tah tam ta eo pì, majah qmang aih pì dèch ka wì maneh leq, wì hadai dèch hlài maneh aih. **39** Haq hadai capoch alìah hu hnài wì rameh: “Mangai ùh xau qnung mangai ùh xau ajah? Ùh xài dìq baiq ka wa aih clìh ta ralùng qmòh?” **40** Mangai tiaq hōc ùh yeo haqnhèq ka mangai hnài, mahaq mangai tiaq hōc leq ma gêh geo, aih èh haq jah tìah dèh mangai hnài. **41** Gleq ìh hnoq criah ta mat oh daq ìh, mahaq ùh hnoq long ban ta mat cla? **42** Ìh doe dèh ka oh daq: Aleq dôq au doeh criah ta mat ìh, mahaq ùh hnoq dèh long ban ta mat cla! pì capoch dèh qmang leq majah? Wùih! bài mangai patìah toq enh gùng meh! doeh long ban loh enh mat cla qmat adroe, aih èh men xau hnoq hu doeh criah ta mat oh daq. **43** Long loh plì qmèq aih ùh xài long lem, long loh plì lem aih ùh xài long qmèq **44** majah qmang aih ngan plì ma canau ka long. Ùh i cabô git plì pōc ta yila, ùh i cabô git plì nho ta brech. **45** Mangai ta manoh haq bình trong lem, hloh bàu rangot lem, mangai dù ta manoh bình trong dù, hloh bàu dù, majah qmang aih khoe bình ta manoh men hloh ajang bàu. **46** Hagleq

pì creo ka au: Chuaq, Chuaq, mahaq ùh dùh ka broq tiaq bàu au? **47** Kô au patô ka pì loq mangai trùh ti au, tamàng bàu au, broq tiaq bàu au, aih èh haq tìah ka cabô. **48** Haq aih tìah ka mangai broq hnem, chìa jrang cajrùq, dèch hnem enh crõng hmo talech: Diac tõc, diac dêh glàm ta hním aih, mahaq ùh dalàc, majah qmang aih broq khoe cajap. **49** Yàng mangai leq tàng bàu au mahaq ùh broq tiaq, haq aih tìah ka mangai broq hním ta taneh ùh i ka xém, diac dêh glàm ta hním aih, moeq ayàc raq khoe ralàih, raliang dìq dõng.

7 Jò khoe hêq ka hnài bàu aih, Chuaq Jesus mùt ta Cabênaum. **2** Cwan lình tagùng aih i moeq ngai hapõng haq dìq jaq loq waq, qnang ùh hrõc ten cachìt, **3** tàng wì anoe i Chuaq Jesus trùh, cwan thê wì gucraq mangai Juđa lam canòm ka Chuaq Jesus broq brêh dêh ka hapõng. **4** Wì aih trùh ti Chuaq Jesus, wì doe: Cwan kô troq ka ìh dì bàu haq, **5** majah qmang aih haq loq waq ka mangai bèn, khoe broq am ka nhèn hním tagop. **6** Chuaq Jesus lam ti wì aih. Jò ten trùh hním, cwan aih thê dêh bua lam anoe ka Chuaq Jesus: Waiq Chuaq! ìh ùh dùh baxa hrìn rađeh, majah qmang aih au ùh tajì ka đìh ìh mùt dêh ta hním. **7** Au hadai khoe hèm rađeh kô qnhòq tajì ka trùh ti ìh. Mahaq ìh tapoch toq bàu raq brì ka hapõng au brêh. **8** Majah qmang aih au kô hadai oe enh qneq ka cwiang wì qnoeq, au hanoh i lình enh qneq ka cwiang au diq, au doe ka mangai kô: Lam beq! haq aih hi lam, thê mangai qnoeq: Trùh tacô! haq hi trùh, au thê dêh hapõng: Broq yiniq kô! haq hi broq. **9** Jò Chuaq Jesus tàng bàu aih, hamàih dêh ta manoh, Haq hwi ngan bài mangai

lam tiaq rađeh, haq doe: “Au doe ka pì, oe ta Isorali, au qnhòq lah hnoq mangai leq i kan lùi kàn dàng kô.” **10**
Khoe aih, bài mangai cwan ma thê wì lam aih, wìh hlài ta hním, hnoq mangai hapõng khoe brêh. **11** Hì atìq, Chuaq Jesus lam ta plài Na-in, mangai tiaq hõc xam bàc mangai lam tiaq haq. **12** Jò haq bu trùh gàu plài, hnoq wì tòng qnoh moeq ngai cachìt, aih kon calô gucadri hadrô ta plài aih, haq i dèh moeq toq kon aih raq, bàc ngai ta plài aih wiang lam ti mangai hadrô aih. **13** Jò Chuaq Jesus hnoq, tamanoh haq ha-och ka mangai miq aih, haq doe: “Apaq hmoe.” **14** Khoe aih, Chuaq Jesus thia haten, haq bèq hom, bài mangai tòng hanang hi yòng. Haq hi doe: “Mangai radam meh, au thê oh yòng beq.” **15**
Mangai cachìt padinh hangui rai tapoch tuàng, khoe aih Chuaq Jesus hi am da miq haq. **16** Mangai leq mangai meh crè đeh hra, rai manè apôi Boc Plình rameh: I moeq pajàu kàn khoe loh taqne bèn. Boc Plình khoe trùh đòeq wiang dèh ti mangai da Haq. **17** Biàc aih, wì anoe jàp cròng Juđê xam gùng dudan ta aih. **18** Mangai tiaq hõc da Jon taqmon dìq dõng bài yiniq aih ka Jon. **19** Jon creo dèh wa baiq ngai ma tiaq hõc rađeh, thê wa lam trùh ta Chuaq Jesus hu bòch: ĩh ajoq mangai đòeq trùh tacô, nhèn ahìaq ep gòm mangai qnoeq hòm? **20** Jò wa aih trùh ta Chuaq Jesus, wa doe: Jon Baptit thê ma trùh bòch: ĩh ajoq mangai đòeq trùh tacô loq nhèn ep gòm mangai ma qnoeq? **21** Wop jò aih Chuaq Jesus broq brêh bàc ngai yiniq, ùh hrõc, mangai i kiac dù müt ta chac, rai broq bàc ngai ùh xau jah hnoq. **22** Chuaq Jesus padreo bàu ka wa: “Hlài anoe ka Jon loq rìm yiniq chôp khoe hnoq,

khoe tàng: Mangai ùh xau jah hnoq, mangai liap jah lam, mangai bacùn jah hreо, mangai clìc jah tàng, mangai cachìt jah rìh hlài, mangai pa jah tamàng Bàu lem. **23** Xôq ramot ka mangai leq ùh hìaq catoeh ka au.” **24** Jò wa aih khoe lam, Chuaq Jesus hi anoe trùh Jon dôq bài mangai bàc ma lam tiaq haq tàng: “Pì khoe lam ngan cleq taqnòe hawit? Pì lam ngan triang niaq cayeo ma hlui qmòh? **25** Ùh qmang ai pì lam ngan cleq hòm? Ngan mangai caxùnh eo lem qmòh? Hatau wì ma caxùnh eo canaq, mangai oe acaq rahù dìq oe ta hnìm bùa. **26** Mahaq pì lam ngan cleq hòm? Mangai pajàu qmòh? Joq au anoe ka pì ùh hnau ka pajàu hòm. **27** Kô raq mangai ma khoe i bàu achìh trùh haq: Kô au thê dèh mangai wê bàu lam adroe ka ìh, Haq aih èh ma palauq da ìh trong enh ngèa ka ìh. **28** Au anoe ka pì, dìq dòng ka bài mangai gucadri ma hauang qnoh, ùh i mangai leq yeo kàn ùh hnau ka Jon, mahaq oe ta diac Boc Plình, mangai yac ka qyoh dàng leq, dua haq yeo kàn ùh hnau ka Jon. **29** Dìq dòng ka bài mangai ta aih hloe xam mangai yđc thèq khoe jah Jon broq baptem, wì tàng bàu Chuaq Jesus hnài, mangai leq mangai meh dìq doe Boc Plình aih taq atoq. **30** Mahaq mangai Pharisi xam mangai hnài ranenh chàih cađac trong Boc Plình enh taqmroq ka wì haq, majah qmang aih wì ùh waq Jon broq baptem ka dađeh. **31** Chuaq Jesus doe: Au alìah wì qnhòng kô tìah ka cabô? **32** Wì haq tìah ka wì qyoh hangui ta nòe atech, doe ka dabau: Nhèn khoe hlui taliaq, gleq pì ma ùh ti cađoeq, nhèn khoe ti calêu atoch gleq pì ùh crò hmoe. **33** Jon khoe trùh, haq ùh acaq bênh ùh ôq alac, aih pì doe: I kiac dù oe ta chac haq.

34 Kon Mangai trùh, haq acaq haq ôq, aih pì doe: Meh mangai plai toq ka acaq, daiq ka ôq, taqmùt ti bài mangai yōc thèq xam bài mangai i yiniq lui. **35** Mahaq kan khun rabiaq aih jah creo ka haq taq atoq canòm ajang yiniq broq da wì haq.” **36** I moeq ngai Pharisi akhen ka Chuaq Jesus trùh acaq dèh ta hnim, jò khoe mùt ta hnim, Chuaq Jesus hi hangui. **37** Tagùng aih, i moeq ngai gucadri rìh ùh wìa, hìa doe Chuaq Jesus qnang hangui acaq ta hnim mangai Pharisi, haq aràng moeq toq cabi ngōc tabōc enh dalam tah bình dàu xua thùm. **38** Haq yòng đeh enh rù ajang nòe jènh Chuaq Jesus, crò hmoe, diac mat taclìh ta jènh Chuaq Jesus, khoe èh haq yōc dèh xàc gàu hi xùt, èh haq hìp jènh Chuaq Jesus, khoe aih haq xùt dàu ta jènh Chuaq Jesus. **39** Mangai Pharisi ma akhen ka Chuaq Jesus, hnoq qmang aih, haq hèm dèh ta manoh: Mangai kô tàng haq joq pajàu, aih wìa ka haq ùh loq ka mangai gucadri ma bèq rađeh aih cabô, wìa ka haq ùh loq ka gucadri qmat mangai qmang leq, qmat xài mangai bình toq yiniq lui. **40** Chuaq Jesus doe ka haq: “Simôn, au i biaq nà anoe ka ìh.” Simôn padreo bàu: Mangai hnài, ìh anoe beq. **41** “I moeq ngai aih, i baiq ngai pòq dòeh haq: moeq ngai pòq padam hrinh đoniê, moeq ngai pòq padam jàt. **42** Dìq baiq ka wa ùh i cleq hu caqnaih dòeh, cla wì craq hi cađac dōng ka wa. Taqne wa baiq ngai aih, maleq ma loq waq ka wì craq yi bac?” **43** Simôn hi tèu: Au hèm mangai leq ma khoe jah cađac yeo bac aih, haq aih loq waq yi bac. Chuaq Jesus doe: “Ìh hèm troq.” **44** Khoe aih, haq wìh ta gucadri rai doe ka Simôn: “Ìh i hnoq mangai gucadri kô? Au mùt ta hnim ìh, ìh ùh qnöh qmòe diac

qnheo jènh, mahaq gucadri kô yōc dèh diac mat srùh jènh au, khoe èh yōc dèh xàc gàu hu xùt. **45** Ìh ùh hìp au, mahaq haq kô patep haq mùt hñim ìh, haq hìp jènh au ùh hêq. **46** Ìh ùh xùt dàu ta gàu au, yàng da haq kô yōc dàu xua thùm xùt ta jènh au. **47** Aih ìq au majah doe ka ìh, yiniq lui mangai gucadri kô bac joq qnàng, khoe jah caqnaih dìq dōng, majah qmang aih haq khoe loq waq yeo bac, yàng da mangai jah caqnaih yeo biaq, haq loq waq yeo biaq.” **48** Chuaq Jesus doe ka mangai gucadri: “Yiniq lui ìh khoe jah caqnaih dōng.” **49** Bái wì ma hadai hangui acaq moeq qmang ta aih hèm ta manoh: Mangai kô ìq cabô ma doe rádeh i cwìang caqnaih yiniq lui? **50** Mahaq Chuaq Jesus doe ka mangai gucadri aih: “Kan lùi ìh khoe dèch ìh, lam ka catèm oq.”.

8 Atìq ka aih, Chuaq Jesus lam enh gùng kô trùh gùng tau, enh plài kô trùh plài qnoeq, anoe hnài Bàu lem lem da diac Boc Plinh. I moeq jàt baiq ngai tiaq cla oe ti haq. **2** Èh hadai i wì gucadri lam tiaq haq, aih la bái mangai khoe jah paclaih enh kiac dù, khoe jah brêh ka yinìq: Mari, wì ma creo Mađolen, tapèh toq kiac dù loh enh chac haq, **3** Jan-no, cadrì da Chu-sa, aih cwan wèq ta hñim bùa Hêrôt, Su-sana xam bac ngai qnoeq hòm wiang dèch bac jènh ka haq. **4** Jò bái mangai bac tagop ti dabau xam mangai enh rìm plài trùh dìq ta Chuaq Jesus, haq hi yōc bàu aliah hu hnài wì: **5** “I moeq ngai lam rai dèh adrech. Jò rai, moeq qnah clìh ti trong, aih wì hi troq jôiq èh chìm enh qnhèq loh jôh dōng. **6** Moeq qnah clìh ta taneh raga, bu hon ma loq khoe croh majah qmang aih ùh i đeh toq biaq hnha kan da-ìm. **7** Maqnoeq taclìh

taqne xèm yila, haq hon pajùm ti yila, haq toq hlac loh ka pi jah kàn. **8** Adrech ma qnoeq cìlh tanèe taneh lem. Haq hon lem, loh hadròc, moeq jah moeq hrinh. Jò anoe qmang aih haq doe: “Mangai leq i don, tamàng beq.” **9** Mangai tiaq hòc bòch haq bàu alìah aih anoe cleq. **10** Haq doe: “Kan hlèp tanèe diac Plình khoe am pì loq, yàng wì qnoeq aih yòc bàu alìah hu anoe, dôq wì ngan manhaq ùh hnoq cleq, tamàng mahaq ùh qnì tàng. **11** Bàu alìah aih rameh: Adrech aih bàu Boc Plình **12** Adrech taclìh ti trong, aih bài mangai tàng bàu, yàng atìq ka aih kan kiac trùh tablah yòc bàu ta manoh cliac wì haq, yùq wì haq lùi èh loq jah dèch qmòh. **13** Adrech taclìh nòe raga, aih bài mangai bu tàng bàu khoe lem bùi yòc bàu aih, mahaq ùh i ka riah. Wì lùi moeq rayàc, jò i kan khech tát, wì haq hi talùi. **14** Adrech taclìh ta yila, aih bài mangai tàng bàu, mahaq tiaq dèh manoh kan loq lèt kan padrõng kan rìh qmòe ka hlàu toq taqnhòng kô, broq ka bàu aih pi jah chet, pi loh qmòe plì ma yi wìa. **15** Mahaq adrech taclìh tanèe taneh lem aih bài mangai i manoh cliac lem joq qnàng, bài mangai tàng bàu, rai cajap manoh wèq bàu aih hi jah loh plì. **16** Ùh i cabô bùh đen èh yòc griang gùp cađac, tàng ùh meh cadoc ta caqnàm, mahaq dèch tanèe haqnhèq, dôq cabô mùt ta hním dìq jah hnoq kan qngah. **17** Majah qmang aih ùh i cleq hlèp, èh ma ùh hnoq, ùh i cleq cadoc èh wì ma ùh loq, ma ùh hìa ep patô qnoh. **18** Qmang aih pì ep tamàng ma rabiaq bàu pì tàng majah qmang aih mangai khoe i, èh jah am tam, mangai leq ùh i, aih èh jah doeh yòc hloe yiniq cleq haq xoh đeh khoe i.” **19** Jò aih, miq da Chuaq Jesus xam wì oh haq lam

chaq haq. Yàng mangai bac hrinh, ùh jah thia haten ka haq. **20** I mangai lam anoe ka haq: Miq ìh xam wì oh ìh oe enh gùng, enh glàm ìh. **21** Mahaq Chuaq Jesus padreo bàu “Miq au xam oh daq au aih bài mangai tàng bàu Boc Plinh rai broq tiaq bàu aih”. **22** I moeq hì, Chuaq Jesus loh tabooang ti mangai tiaq hòc, haq doe: “Beq bèn tòc pah tau hlöng”; khoe wì hi lam. **23** Jò boang qnang cadàu, Chuaq Jesus kùi. I bahùt trùh ta hlöng aih, diac bình tabooang, qnang jò yat dìq jaq. **24** Mangai tiaq hòc tùh padriù haq: Mangai hnài, mangai hnài, bèn cachìt manðeq kô raq! Mahaq jò haq bu yòng, haq tagàih ka cayeo xam diac dôq wa hatinh, aih wa hi hatinh hatot hloe. **25** Haq doe ka mangai tiaq hòc: “Manoh lùi pi taleq hòm.” Mangai tiaq hòc rai crè rai hamàih, bòch dabau: Mangai kô ìq cabô, jaq cayeo xam diac dìq iu döng bàu haq? **26** Khoe aih wì trùh tagùng mangai Jérasê, tajang ka gùng Galili. **27** Jò Chuaq Jesus tòc tago, tagùng aih i moeq ngai bac kiac tachac haq. Khoe dùnh, haq pi lah caxùnh eo, pi lah oe ta hñim, mahaq oe ta cadràng hanang. **28** Bu hnoq Chuaq Jeus, haq aih cajiah ta gruàng, rai pacro daðeh ande jènh Chuaq Jesus, haq tapoch qmòe cadêh: ìh enh broq ka au cleq kô ìq, Chuaq Jesus kon da Boc Plinh haqnheq au waiq ìh ùh dùh baxa au dèh. **29** Majah qmang aih, Chuaq Jesus i thê kiac dù aih loh ma khoe ka mangai kiac rùp khoe dùnh aih. Yac ka wì tát haq, kàt, clang jènh tì haq, dua haq hràt caðac caxi mem, wah caðac long clang, kiac qmùt haq tanòe hawit. **30** Chuaq Jesus bòch haq: “Gè yiniq cleq?” haq padreo bàu: Bài lindh, majah qmang aih bac toq kiac khoe mùt tachac haq. **31** Wì haq cali calo ka

Chuaq Jesus apaq caqnìh wì haq kòe jrùq. (Abyssos g12)

32 Jò aih i meq calùh chùa qnang acaq tawang. Bài kiac bòch Chuaq Jesus am wì haq jah mùt đeh ta calùh chùa aih, Chuaq hi am. **33** Bài kiac loh enh mangai aih, mùt ta calùh chùa, calùh chùa oe enh bùc haqn hèq cadàu hatàp gàu ta hlõng cachìt dìq dõng. **34** Bài mangai ban chùa hnoq qmang aih, drah cadàu lam amot, rai anoe yiniq aih jàp rìm gùng rìm plài ta aih. **35** Wì dahrôq loh ngan, jò wì haq trùh tanòe Chuaq Jesus, hnoq mangai kiac neo loh enh haq aih qnang hangui nòe jènh Chuaq Jesus, sràp eo cwàn, gàu ngoc prau prinh, wì yùq pi cajaq. **36** Bài mangai ma khoe hnoq kan halac aih, anoe ka hlài jàp ka phù cròng loq mangai kiac rùp aih khoe jah brêh qmang leq. **37** Dìq dõng mangai oe ta gùng Jérasê cali calo doe ka Chuaq Jesus đòeq haq lam đac tagùng qnoeq, majah qmang aih wì crè pi cajaq. Haq loh tabooang wìh hlài pah tau. **38** Mahaq mangai kiac ma khoe cadàu loh enh chac, haq bòch tiaq Chuaq Jesus, mahaq Chuaq Jesus thê haq hlài, Chuaq Jesus doe ka haq: **39** “Hlài ta hnim hu anoe ka wì dôq wì loq Boc Plình khoe broq am ka ìh cleq.” Qmang aih, haq hi lam rai anoe hlài rìm yiniq Boc Plình khoe broq am ka rađeh jàp rìm gùng. **40** Jò wì wìh hlài, i bac ngai đìh Chuaq Jesus, majah qmang aih mangai leq mangai meh ngèh đeh hra ka haq. **41** I moeq ngai wèq hnim tagop qyoh yiniq haq Jairu trùh bla op nòe jènh Chuaq Jesus, cali calo canòm ka Chuaq trùh dèh ta hnim. **42** Majah qmang aih haq i moeq ngai kon cadrì moeq jàt baiq hanam khoe ten cachìt. Jò Chuaq Jesus lam ti trong bài wì dahnen dudan ka haq. **43** Jò aih i moeq ngai

gucadrì yinìq khoe moeq jàt baiq hanam dahrôq mahim, bac jènh haq khoe Yam dìq döng ka bâi mangai broq jreo, mahaq ùh i ka mangai leq haqnauq haq brêh, **44** haq trùh enh rù bèq haqmai eo Chuaq Jesus, tajòe qmòe mahim haq hi xôt. **45** Chuaq Jesus doe: “Cabô khoe bèq au?” mangai leq mangai meh haqngah đeh hra, Phiero xam bua haq doe: Mangai hnài, mangai bàc ti dudan rai hnen ìh. **46** Chuaq Jesus doe: “I mangai khoe bèq au, au tàng i padren loh enh chac au. **47** Mangai cadrì aih hnoq dađeh cadöc pi hlèp, haq tarít thia bla op dađeh ta haqneq ajang nòe jènh Chuaq Jesus enh ngèa mangai bàc, haq anoe döng hagleq đeh majah bèq haqmai eo Chuaq Jesus, èh manđeq rađeh khoe jah brêh qmang leq. **48** Mahaq Chuaq Jesus doe ka haq: “Yôiq kon cadrì au, manoh lùi kon khoe broq kon jah brêh, lam ma catèm beq.” **49** Chuaq Jesus oe raq capoch, i mangai loh enh hnim Jairu, craq wèq hnimitagop qyoh doe ka haq: Kon cadrì ìh khoe cachìt, oe pangài dèh ka haq qmat hòm. **50** Tàng bàu aih, mahaq Chuaq Jesus doe ka Jairu: “Apaq yùq! toq lùi raq, aih èh kon ìh hi jah brêh.” **51** Jò khoe trùh ta hnim, Chuaq Jesus am toq Phiero, Jaco, Jon xam wa miq baq kon qyoh aih mùt tiaq haq. **52** Jò meh dìq ka mangai ta aih ta-oeħ ti atoch ka kon mangai aih, Chuaq Jesus doe: “Hêq pi dùh hmoe! Kon mangai kô ùh xài haq kachìt, haq qnang kùi.” **53** Wì do ka haq, majah qmang aih wì loq kon mangai aih joq khoe cachìt. **54** Mahaq Chuaq Jesus carùp tì kon cadrì qyoh aih rai doe “Kon au, yòng beq!”. **55** Mahua yiang mùt hlài tachac, haq hi padinh yòng. Khoe aih Chuaq Jesus thê wì qmi kon qyoh aih acaq. **56** Miq baq kon qyoh

aih dìq jaq hamàih ta manoh, mahaq Chuaq Jesus ùh lòh
wa anoe ka cabô loq yiniq aih.

9 Chuaq Jesus creo ka wì moeq jàt baiq ngai, haq am ka
wì padren cwìang itai đòeq drùh hnan kiac chöc, broq
brêh ka mangai yinìq, **2** khoe aih haq thê wì loh lam anoe
hnài trong diac Boc Plình rai broq ka mangai ùh hröc jah
brêh. **3** Haq tanap ka wì: “Jò pì lam ùh dùh wê cleq, yac
ka long dùi, yac ka ayôp, yac ka bênh, bâc jènh, apaq wê
racop baiq blah eo.” **4** Pì mùt hnim leq, pì oe ta aih trùh
jò loh enh plài aih, **5** tàng wì ùh đìh ùh pachùh pì, loh
enh plài aih pì hapùih blo top tajènh pì đòeq broq kan
pagau am ka wì haq hnoq.” **6** Moeq jàt baiq ngai tiaq cla,
loh lam enh plài kô trùh plài tau, anoe Bàu lem rìm nòe
rai broq ka bâc ngai jah brêh ka yinìq. **7** Jò aih, bùa Herôt
hìa wì anoe rìm yiniq Chuaq Jesus ma khoe broq, haq loh
ka rawè, hèm pi hlùh, majah qmang aih i ngai doe: aih
Jon, khoe rìh hlài enh cachìt; **8** mangai qnoeq doe: Èli
khoe loh, mangai qnoeq hòm doe: taqne bâi pajàu dùnh
calah nèh i moeq ngai khoe rìh hlài. **9** Mahaq Hêrôt doe:
Au khoe thê wì pôt ranöng Jon, mangai kô aih cabô hòm,
gleq au ma jah tàng bâc trong haq broq? Bùa Herôt hi ti
chaq nen hu glàm Chuaq Jesus. **10** Moeq jàt baiq ngai tiaq
cla wìh hlài taqmon ka Chuaq Jesus rìm yiniq wì haq khoe
broq, haq qnong wì aih tiaq haq, wì lam đeh crài haten ka
plài Bêtsaïda. **11** Mahaq bâi mangai ta aih wì tàng, wì hi
lam tiaq haq. Chuaq Jesus đìh wì aih, hnài dôq wì loq ka
diac Boc Plình rai broq ka mangai yinìq jah brêh. **12** Trùh
mat mahì ten clìh, mòeq jàt baiq mangai tiaq cla thia
haten ka Chuaq, wì doe: lìh thê wì hlài beq, dôq wì haq ti

mùt roc gùng roc plài ten dudan tacô, hu chaq nòe padài rai chaq dahwèq acaq, majaq qmang aih bèn kô qnang oe tanòe hawit. **13** Mahaq haq doe ka wì: “Pì raq mangai hu qmi ka wì acaql!” Moeq jàt baiq ngai tiaq cla tèu: Tàng joq nhèn ùh lam rot dahwèq acaq am dìq ka wì tacô, nhèn i padam toq bênh xam baiq pliang ka raq, **14** (Jah padam muàn mangai gucalô ta aih) Chuaq Jesus doe ka mangai tiaq hōc: “Thê wì hangui tang brong padam jàt ngai.” **15** Mangai tiaq hōc broq tiaq bàu aih, thê dìq dōng wì hangui. **16** Èh Chuaq Jesus yōc padam toq bênh xam baiq pliang ka, haq qngōc ngan ta plinh, manè apōi Boc Plinh khoe aih goh bênh. Haq am ka mangai tiaq hōc ti axong ka mangai ta aih. **17** Mangai leq mangai meh acaq panàc đeh hra, wì toch hlài bài haqnech rah jah moeq jàt baiq rajo. **18** I moeq hì, jò Chuaq Jesus qnang waiq khàn đeh moeq ngai, mangai tiaq hōc tagop dudan ka haq. Haq bòch: “Dìq ka bài mangai bac doe au kô ìq cabô?” **19** Wì padreo bàu: Mangai kô doe Jon Baptit, mangai tau doe Èli, mangai qnoeq hòm doe moeq ngai pajàu qnhòng calah nèh rìh hlài. **20** Haq bòch hòm “Ha pì, pì doe au cabô?” Phiero doe: ìh kô Christ, kon da Boc Plinh. **21** Chuaq Jesus ùh lòh wì mangai tiaq hōc anoe yiniq aih ka cabô loq, **22** Haq doe tam ka wì: “Kon mangai ep glàm bac kan xalep, bài wì gucraq, bài pajàu xam mangai hnài ranenh kēh qnoh cađac haq, wì jêh cađac haq, piq hì èh haq hi rìh hlài. **23** Khoé aih, haq doe: “Tàng mangai leq enh tiaq au, ep cađac rađeh, rìm hì xùi dèh long pagat lam tiaq au.” **24** Majah qmang aih, cabô enh wèq dèh kan rìh, aih èh hnhung, mangai leq cađac dèh kan rìh đòeq tiaq au,

haq aih èh jah dèch. **25** I jah cleq ka mangai jah dìq döng cröng taneh kô mahaq cla haq aih raliang hnhung. **26** Mangai leq camaih đac ka au xam bàu au, aih èh Kon mangai hadai camaih chau ka wì aih, jò haq trùh hangui dèh ta kan ranhòm cla haq, kan ranhòm Baq xam kan ranhòm bình plình hadròeh. **27** Joq qnàng au doe dìq ka pì mangai qnang yòng tacô, i ngai ùh cachìt adroe ka wì jah hnoq diac plình”. **28** Qnah ta rahem hì atìq ka anoe bàu aih, Chuaq Jesus qnong Phiero, Jon xam Jaco tiaq haq tōc tawang đòeq waiq khàn. **29** Jò qnang waiq khàn, hadrò haq loh ka crài, eo haq loh ka taboc camla. **30** I Môise xam Êli oe ta kan ranhòm loh hatuàng ti haq. **31** Wì hatuàng trùh biac Chuaq Jesus cachìt, aih trong haq ep broq gêh ta Jérusalem. **32** Phiero xam bua haq enh kùi pi cajaq, mahaq jò bu cadrat, wì hnoq kan ranhòm Chuaq Jesus xam baiq ngai qnang yòng ti haq. **33** Jò wa aih bu talah ka Chuaq Jesus, Phiero doe ka haq: Mangai hnài, bèn oe tacô lem joq qnàng, beq bèn broq piq toq hapom tacô, moeq toq ka ìh, moeq toq ka Môise, moeq toq ka Êli. (Haq ùh qnì ka rađeh khoe anoe cleq) **34** Jò haq oe raq anoe, i moeq cato yùc trùh glom dìq ka wì haq, bài mangai tiaq hōc crè pi cajaq. **35** Jò aih i bàu enh yùc doe: “Kô Kon da au, Mangai au khoe ràih dèh, drah tamàng bàu haq”. **36** Jò bàu aih atêh loh, wì haq hnoq moeq ngai Chuaq Jesus raq. Mangai tiaq hōc oe aiq hatinh, ùh anoe ka cabô loq đeh khoe hnoq cleq. **37** Hì atìq, jò wì loh enh bui wang, pi cajaq mangai lam đìh haq. **38** Ta aih i moeq ngai creo cadêh: Mangai hnài! au cali calo đeh ka ìh, lam ngan biaq da au kon, au i dèh moeq toq haq aih raq.

39 Moeq toq kiac rùp haq oe hi cachech cachaiq cadêh, kiac aih rapôh rapât haq dìq jaq, hacùng loh toq diac hai camùh, chac haq hech hoch men waq loh. **40** Au khoe canòm ka mangai tiaq hõc ìh drùh qnoh kiac aih, mahaq wì drùh ùh jah. **41** Chuaq Jesus doe: “Wùih! caxi noe ùh qnì lùi rai gópla tau, au oe ti pì, au àt ka pì trùh pang leq kô èh? Drah aràng kon ìh lam acô”. **42** Mangai kon calô aih bu thia haten, kiac caqnhùt haq tacro ta haqneq, rai ranhùq haq. Mahaq Chuaq Jesus lech ka kiac aih, khoe èh haq broq brêh ka kon qyoh aih èh hi am hlài da baq haq. **43** Mangai leq mangai meh hamàih đeh hra kan itai Boc Plình. Jò dìq ka wì ta aih oe raq manè trong Chuaq Jesus ma broq, haq doe đèh ka mangai tiaq hõc: **44** “Pì tamàng ma rabiaq haq bàu au anoe ka pì kô èh: Kon mangai kô èh mùt ta tì kõng wì.” **45** Mahaq mangai tiaq hõc ùh qnì tàng, bàu aih khoe cadoc ka wì haq dôq wì haq ùh loq, wì hadai ùh hùa bòch haq bàu aih. **46** Bái mangai tiaq hõc tarahen ti dabau hu ngan taqne wì haq kô èh mangai leq ma yeo kàn dõng. **47** Mahaq Chuaq Jesus loq ta manoh bái mangai tiaq hõc, haq yõc moeq ngai kon qyoh đòeq oe haten ka haq, **48** Haq doe: “Enh dalam ka yiniq au cabô đìh kon qyoh kô, aih haq đìh au, cabô leq đìh au, aih haq đìh Mangai khoe thê au. Majah qmang aih taqne pì mangai leq ma yeo qyoh dõng, aih raq mangai ma yeo kàn dõng.” **49** Jon doe: Mangai hnài, nhèn i hnoq mangai yõc yiniq ìh đòeq hnan qnoh kan kiac, nhèn khoe tát haq, majah qmang aih haq ùh pajùm moeq qmang ti bèn. **50** Chuaq Jesus padreo bàu: “Apaq tát haq, majah qmang aih mangai leq ùh tablêq ka pì, aih haq hatroq ti pì”. **51**

Khoe ten trùh dèh jò Chuaq Jesus pi oe ta crõng taneh, dua haq waq ka tõc ta Jerusalem. **52** Haq thê mangai lam bahia adroe. Wì aih loh lam, müt ta plài mangai Samari đõeq hu padon hñim padài ka haq. **53** Mahaq mangai Samari ùh waq đinh haq, majah qmang aih haq tõc ta Jerusalem. **54** Jò mangai tiaq hõc aih la Jaco xam Jon, hnoq qmang aih, wa doe: Chuaq au, ìh i enh ma creo ka ùnh enh plinh loh bùh đac wì qmat loq ùh? **55** Mahaq Chuaq Jesus tawih ta wa, haq tagàih: “Chôp ùh qnì cleq ma jrõq chiu rađeh qmat.” **56** Khoe aih haq xam mangai tiaq hõc hi lam ta plài qnoeq. **57** Jò qnang lam ti trong, i mangai doe ka haq: Waiq Chaq, ìh lam pang leq au tiaq pang aih. **58** Chuaq Jesus tèu haq: “Chôn i cabõc, chìm i pù, mahaq Kon mangai ùh i nòe hu angèn gàu.” **59** Haq doe ka mangai qnoeq hòm: “ìh lam tiaq au beq!” Mangai aih tèu bàu: ìh dôq au hlài catùh hanang deh baq ðeq. **60** Mahaq Chuaq Jesus doe: “Dôq da mangai cachìt catùh dèh mangai cachìt, ìh lam tiaq au hu anoe trong diac Plinh.” **61** Mangai qnoeq hòm doe: Brì ka au tiaq ìh, mahaq adroe aih ìh dôq au hlài hangah dèh kan cadraq ðeq. **62** Chuaq Jesus padreo bàu: “Cabô tì khoe cadop long kai ma oe raq hwi ngan enh rù, mangai ùh tajì ka diac Boc Plinh.”

10 Atiq ka aih, Chuaq Jesus raih yõc tapèh jàt ngai tiaq hõc maqnoeq hòm, khoe èh haq thê wì lam racop baiq ngai, baiq ngai, lam adroe ka rađeh, trùh rìm nòe haq padon lam. **2** Haq doe ka mangai tiaq hõc: “Qmau trùh khoe bac, yàng mangai gat aih toq biaq. Qmang aih, drah bòch cla wì craq qnoh tam bình gat hòm. **3** Drah lam beq, meh au thê pì lam, i crài cleq ka kon trùu oe qne koq

yang. **4** Apaq wê cayôp bac, apaq wê bau, jai, roc trong apaq kùh gàu ka cabô. **5** Jò pì müt hnim cabô, adroe aih pì doe: waiq kan catèm am ka hnim kô! **6** Tàng joq hnim aih i mangai tajì ka jah kan catèm, aih èh kan catèm enh pì loh oe ti mangai aih, tàng ùh qmang aih, kan catèm wih hlài ta cla pì. **7** Pì oe ta hnim aih, acaq dahwèq wì qnöh ka pì, majah qmang aih mangai patih ùh qngwan ka jah kùng baha. Apaq rangòt lam hawàt enh hnim kô trùh hnim tau. **8** Jò pì müt gùng leq, wì gùng aih pachùh adràc, wì padon cleq, pì acaq ka aih. **9** Broq brêh ka mangai yinìq ta aih, rai doe ka wì: Diac Boc Plinh trùh khoe haten ti pì. **10** Mahaq jò pì müt ta plài leq, yàng wì ta aih ùh đih pì müt, pì loh roc trong rai doe: **11** Pì ngan kô, blo plài pì ma top ta jènh, nhèn ha pùih đac đòeq chônh pariaq pì hnoq, mahaq pì ep loq rameh Diac plinh khoe trùh haten ka pì. **12** Au doe ka pì, trùh hì ma atìq lùch èh, gùng Sôđom pòq kan hadrah yi biaq ka gùng aih. **13** Habo ka gè, Côrasin. habo ka gè Bêtsaida, majah qmang aih tàng joq kan halac khoe broq taqne pì qmat aràng broq ta gùng Tiro xam Siđôn, wa aih khoe caxùnh eo briang, kui blo tanùh, khoe raxach, tawih hlài khoe dùnh. **14** Aih èh, trùh hì hadrah, plài Tiro xam Sôđom pòq kan hadrah yi biaq ka pì. **15** Da gè hòm, Cabênaum, gè jah dèch atöc trùh ta plinh qmòh? Ùh đòh, gè qmat èh jah qnìh cađac trùh qmòe ta hwinh. (**Hadës g86**) **16** Cabô tamàng pì, aih tamàng au, cabô cađac pì, aih cađac au, cabô cađac au aih ca đac Mangai ma khoe thê au.” **17** Tapèh jàt ngai tiaq hòc wih hlài rai lem bùi rai doe: Chuaq! Enh dalam yiniq ìh, jaq kan kiac dua iu bàu nhèn. **18** Chuaq Jesus padreo

bàu: “Au hnoq Satan cìlh tìah ka kan camlet enh plìn. **19** Au khoe am ka pì cwìang itai hu jôiq padit bìh, agôt hloe xam cwìang mangai tagit ka pì. Ùh i mangai leq hlàt broq ka pì raliang. **20** Qmang aih, ùh dùh lem bùi jò kiac iu bàu pì, mahaq lem bùi jò yiniq pì khoe jah achìh ta diac plìn.” **21** Jò aih, Chuaq Jesus dìq jaq lem bùi ta Yang Hadròeh, haq doe: “Waiq Baq! Craq da plìn crõng taneh, au manè apôi ìh, majah qmang aih ìh khoe cadoc yiniq kô ka mangai rabiaq, mangai i hõc, mahaq patô qnöh ka kon qyoh. Baq ôi, joq qnàng qmang aih, majah qmang aih ìh khoe hnoq bìac aih lem. **22** Baq khoe jao dõng rìm yiniq ka au, enh gùng ka Baq ùh i cabô loq ka Kon, enh gùng ka Kon, xam mangai leq kon enh mahno am, hadai ùh i mangai leq loq ka Baq aih cabô.” **23** Khoe aih, Chuaq Jesus hwi ngan mangai tiaq hõc rai doe: “Xôq ramot ka mat jah hnoq trong pì hnoq! **24** Majah qmang aih au anoe ka pì, bâc ngai pajàu xam bùa tangèh jah hnoq trong pì hnoq, mahaq ùh jah hnoq, tangèh ka jah tàng trong pì tàng mahaq ùh jah tàng.” **25** I moeq ngai hnài ranenh, yòng bòch đòeq hu qnhro ngan Chuaq Jesus, haq doe rameh: Mangai hnài, au ep broq cleq đòeq hu jah kan rìh halinh mòeq đòe? (**aiōnios g166**) **26** Chuaq Jesus bòch: “Ta hset ranenh achìh cleq? ìh đõc cleq ta aih?” **27** Haq aih tèu bàu: ìh ep dìq ka manoh, dìq ka mahua yiang, dìq ka padren, dìq ka gàu ngoc loq iu Chuaq aih Boc Plìn ìh, rai loq waq ka mangai haten hatia ka ìh. **28** Chuaq Jesus doe ka haq: “ìh tèu khoe troq, broq qmang aih beq, ìh hi jah rìh.” **29** Mahaq mangai hnài ranenh aih enh doe rađeh aih mangai taq atoq, haq bòch Chuaq Jesus: Mangai

haten hatià ka au aih cabô? **30** Chuaq Jesus padreo bàu: “I moeq ngai enh Jérusalem loh ta Jérico, ti trong glàm bài mangai atùng, wì blah yōc dìq dōng da haq bac jèn, jēh haq habau habùa ta chac, khoe cla wì hi lam cađac haq oe ti aih ten cachìt ten rìh. **31** Jò aih, i moeq ngai pajàu loh trong aih, hnoq mangai aih, haq wia pah tau trong èh lam hloe. **32** Èh hòm, i moeq ngai Lêwi hadai trùh jang aih, thia haten, ngan hnoq qmang aih, èh hanoh lam hloe. **33** Mahaq i moeq ngai samari lam ti trong, thia haten hnoq qmang aih, ta manoh haq ha-och ka mangai aih. **34** Haq yōc dàu, yōc alac qnheo teo habau, khoe èh ti kèt palauq, khoe aih, dèch atōc enh crōng lùa aràng trùh hnim padài, hu wèq ngan. **35** Trùh hì atìq, yōc baiq đoniê am ka craq hnim padài rai tanap: ìh wèq ngan mangai kô oq, tàng loq yam ùh hnau, jò au wìh hlài i au caqnaih. **36** Taqne piq ngai aih, ìh hèm beq, mangai leq ma haten hatià ka mangai wì ma atùng aih?” **37** Mangai hnài ranenh aih padreo bàu: Aih mangai ma khoe i manoh loq waq, khoe loq hanò ka haq. Chuaq Jesus doe: “Drah lam beq, broq tiaq qmang aih” **38** Jò Chuaq Jesus xam mangai tiaq hōc lam ti trong, trùh ta plài tau, i moeq ngai gucadri yiniq haq Mathê đìh Chuaq Jesus müt dèh ta hnim. **39** Haq aih i moeq ngai oh cadrì, yiniq haq Mari, haqngui nòe jènh Chuaq Jesus hu tamàng bàu Chuaq. **40** Mathê toq ti hawet jiang patìh, trùh anoe ka Chuaq Jesus: Chuaq au! oh au đòeq au patìh đeh moeq ngai, ìh doe ka haq wiang patìh ti au diq. **41** Chuaq Jesus padreo bàu: “Mathê, Mathê, ìh chìuq lep rai hèm bac trong; **42** mahaq i moeq yiniq raq

ma nhet. Mari khoe ràih yōc ka dadeh yiniq aih, ùh i cabô jah blah yōc da haq”.

11 I moeq hì, Chuaq Jesus qnang waiq khàn tanòe aih, jò khoe hēq ka waiq khàn, moeq ngai tiaq hōc doe ka haq: Chuaq ôi, ìh hnài nhèn waiq khàn qmang ka Jon khoe hnài dèh mangai tiaq hōc diq. **2** Chuaq Jesus doe: “Jò waiq khàn pì anoe qmang kô: Waiq Baq, Yiniq Baq jah hadròeh, diac Baq jah trùh, **3** Am ka nhèn dahwèq acaq hì leq qnang lem hì meh, **4** Caqnaih da nhèn yiniq lui, majah qmang aih nhèn hadai caqnaih yiniq lui ka mangai ma broq yiniq ka nhèn, ùh dùh aràng nhèn tanòe padô qnùt”. **5** Khoe aih, haq doe ka wì mangai tiaq hōc: “Tàng taqne pì i moeq ngai i dèh bua qne mang trùh creo: È daq, am đò ka au piq toq bênh, **6** majah qmang aih i bua au neo trùh enh hangai, au ùh i ka dahwèq hu qnoh ka haq acaq. **7** Tàng joq mangai oe ta hnim doe: Apaq pangài ka au, qmang khoe clênh, wì kon xam cla au dìq khoe kùi, ùh jah yòng yōc bênh ka ìh; **8** au doe ka pì, yac ka mangai ùh enh yòng yōc bênh am dèh ka bua, mahaq pàng mangai aih xan bòch yôt, èh dua haq yòng am dèh ka bua haq rìm yiniq bua haq qnang nhet ka waq. **9** Au anoe tam ka pì: Bòch beq, yiniq aih jah am ka pì, chaq beq pì hi hnoq, clôq beq qmang hi tapèh am ka pì. **10** Majah qmang aih mangai leq bòch, mangai aih jah, mangai leq chaq, mangai aih hnoq, èh mangai leq clôq, qmang hi ta pèch am ka mangai aih. **11** Dìq ka pì ma broq baq qmat, i cabô jò kon cla bòch bênh yàng aih am hmo? Ùh meh bòch ka mahaq am bìh? **12** Tàng ùh meh bòch catap mahaq am agôt? **13** Qmang aih, pì qmat

mangai qmèq mahaq oe loq am dèh ka kon yiniq lem, ùh dùh dèh ka Baq pì oe ta plình ma ùh am Yang Hadròeh ka mangai creo dang haq!” **14** Chuaq Jesus hnan qnoh moeq toq kiac làu, jò kiac khoe loh, mangai làu aih hi jah capoch. Mangai leq mangai meh hamàih đeh hra.

15 Mahaq i qnah ngai doe: Mangai kô canòm ka Bê-en xêbun, craq kiac đòeq drùh kiac. **16** Mangai ma qnoeq hòm enh qnhro ngan haq, wì bòch haq am wì hnoq kan halac loh enh plình. **17** Chuaq Jesus loq ka manoh wì, haq doe: “Diac leq to hit rađeh, diac aih raliang, hnim leq cla to lah dabau, hnim aih èh tacro. **18** Qmang aih tàng joq kiac Satan hit rađeh, diac haq ma oe dràng, majah qmang aih pì doe au canòm ka Bê-en xêbun đòeq drùh qnoh kan kiac? **19** Tàng joq au canòm ka Ben xê bun đòeq drùh kiac, aih èh kon pì canòm ka cabô đòeq drùh kiac? Aih ìq raq, kon pì ma jah broq mangai hadrah cla pì. **20** Mahaq tàng joq au canòm ka hadrang tì Boc Plình đòeq drùh hnan kan kiac, aih diac Boc plình trùh khoe haten ka pì. **21** Jò mangai dêh padren wê ranac wèq dèh hnim cla, aih èh kùng hang ta hnim haq jah cajap. **22** Yàng i mangai ma yeo dêh ka haq, trùh blêq haq, blah yōc ranac haq ma canòm xam dìq kùng hang haq aih. **23** Mangai leq ùh oe ti au, mangai aih tablêq ka au, mangai leq ùh pajùm ti au, mangai aih èh haprah hapriang. **24** Jò kiac dù loh enh chac moeq ngai, haq lam rangòt tanòe croh crênh ti chaq nòe padài. Chaq ùh jah, haq hi doe: Hêq au hlài dèh tanòe au ma neo loh. **25** Haq wìh hlài, hnoq hnim hwit khoe hreо, rìm yiniq ta hnim khoe don palauq qmòe calem, **26** haq hi lam adràc tam tapèh toq kiac qnoeq yeo dù ùh

hnau ka haq mùt oe ta hnim aih, aih èh, mangai aih yeo hamoq ùh hnau ka adroe hòm. **27** Jò Chuaq Jesus qnang anoe bàu aih, i moeq ngai gucadri oe taqne mangai bàc ta aih dêh bàu doe: Xôq ramot ka mangai miq khoe huang ìh, ma khoe ta-ùq ìh. **28** Chuaq Jesus padreo bàu: “Mangai leq tàng bàu Boc plinh rai iu bàu aih, jah xôq ramot ùh hnau ka aih hòm.” **29** Bái mangai tagop dabau ta aih èh rai bàc, Chuaq Jesus doe: “Caxi noe kô xinoe dù, wì haq bôch ngan teo halac, mahaq ùh am ka wì haq teo halac qnoeq enh gùng ka teo halac da Jôna. **30** Majah qmang aih, Jôna aih raq kan halac ka plài Ninive, hadai qmang aih, Kon mangai hadai kan halac am ka xinoe kô. **31** Trùh hì tah hadrah, bùa cadri enh pah qma mat mahì loh, yòng hadrah ka xinoe kô, majah qmang aih haq oe enh gùng haqmai lùch cröng taneh khoe trùh hu tamàng bàu rabiaq da bùa Salomôn, mahaq, oe tacô i moeq Ngai kèn ùh hnau ka Salomôn. **32** Trùh hi tah hadrah, mangai oe ta Ninive wì haq yòng pajùm hu hadrah caxi noe kô, majah qmang aih wì haq tàng bàu Jôna, wì haq khoe loq raxach, mahaq, ajang kô i moeq Ngai yeo kèn ùh hnau ka Jôna. **33** Ùh i cabô bùh đen mahaq đòeq tanèe hanàp, tanèe caqnàm, mahaq wì dèch đòeq tanèe haqnhèq, dôq mangai mùt ta hnim jah hnoq kan qngah. **34** Mat aih đen ta chac hamac, tàng joq mat ìh tadêh, dìq ka chac ìh jah qngah, tàng joq mat ìh ùh nèn, dìq ka chac ìh oe ta clam. **35** Qmang aih, ngan oq, kan qngah ta pì loq loh kan clam. **36** Tàng joq dìq tachac pì qngah qngai, ùh i nòe leq clam jah qngah dìq döng, aih hadai tìah ka jò i đen sreo qngah am ka pì diq.” **37** Jò Chuaq Jesus anoe bàu aih bu dìq, i

moeq ngai Pharisi akhen ka Chuaq Jesus hlài acaq dèh ta hnim. Chuaq hangui acaq. **38** Mangai Pharisi hnoq Chuaq Jesus ùh qnheo tì adroe ka acaq, haq hamàih. **39** Chuaq Jesus doe ka haq: “Dìq ka bài pì aih mangai Pharisi, pì haliang dòt doe hreο toq enh gùng, mahaq enh dalam bình toq kan atùng xam kan dù. **40** Wùih! mangai ratùt, Mangai ma khoe broq enh gùng, ma ùh joq haq broq hloe enh dalam qmòh? **41** Xan pì yōc dèh hang pì ma i aih, ti am ka mangai pa, aih èh rìm yiniq hi lem hreο am ka pì. **42** Mahaq, habo ka pì, mangai Pharisi, majah qmang aih pì dèch ka Boc Plình mòeq phàn mòeq jàt cachiq bōc ha, cachiq xang, xam rìm bài cachiq qnoeq, mahaq trong taq atoq, trong loq iu Boc plình aih pì cađac! Aih bài yiniq pì ma ep broq, mahaq hadai ùh dùh cađac bài yiniq tau. **43** Habo ka pì, mangai Pharisi, majah qmang aih pì enh haqngui nòe yeo haqnhèq tanòe hnim tagop, enh mangai qnoeq kùh gàu ka rađeh taqne nòe padro! **44** Habo ka pì, majah qmang aih pì tìah ka ralùng hanang khoe cađac klui, wì jōiq enh qnhèq mahaq ùh canau!” **45** I moeq ngai hnài ranenh doe: Mangai hnài, iħ capoch qmang aih ma ùh joq iħ broq ka nhèn kan xep. **46** Chuaq Jesus padreo bàu: “hadai habo ka iħ qmang aih diq, mangai rabiaq toq ka hnài ranenh, pì dèch taqmòq ka mangai qnoeq kan trap, kan tawac, cla pì aih ùh tadroq qmòe moeq hadrang tì! **47** Habo ka pì, majah qmang aih pì bùn ralùng hanang wì pajàu kan cadraq pì ma khoe jēh đac nèh haq! **48** Qmang aih ajoq pì patô qnoh pì khoe mòeq manoh dèh ka trong kan cadraq pì broq, majah qmang aih wì haq khoe jēh cađac pajàu Boc Plình, pì aih mangai bùn

ralùng. **49** Aih ìq raq, kan rabiaq Boc plình i doe: Au thê dèh mangai pajàu xam mangai pòq bàu trùh ti wì haq, wì haq jêh cađac mangai kô rùp mangai tau, **50** Dôq mahim rìm ngai pajàu khoe ta-ùc enh jò baxèm broq plình crồng taneh, jah taboe dìq ka nang noe kô, **51** Patep enh mahim da Abên trùh mahim Xachari, mangai wì ma khoe jêh cađac ta adreo prang tadreo xam hnim kùh waiq, joq, au noe ka pì, mahim wì aih èh, bòch hlài dìq ajang nang noe kô èh. **52** Hađo ka pì, mangai hnaì ranenh, majah qmang aih pì ta qmiaq yōc long gahlòng da kan rabiaq, cla pì aih ùh waq mùt, mangai qnoeq aih enh mùt, aih pì ùh lòh!” **53** Jò Chuaq Jesus khoe loh enh gùng, mangai Pharisi xam mangai hnài ranenh dìq jaq àu tablêq ka haq, wì bòch bàc trong hu dakhwàiq haq, **54** chaq trong đòeq bahlac haq ta bàu tapoch.

12 Jò aih, mangai ta aih tagop ti dabau hi bình qmòe ka mùan, loh qmòe ka tajōiq dabau, Chuaq Jesus chônh anoe dèh ka mangai tiaq hōc: “Ngan oq! wèq rađeh apaq top blo da mangai Pharisi, aih kan ti patiah toq enh gùng. **2** Ùh i cleq cadoc èh ma ùh hnoq, ùh i yiniq cleq hlèp èh wì ma ùh qnì. **3** Qmang aih rìm trong pì anoe tanòe clam cluiq, jah tàng dìq tanòeh qngah qngai, rìm yiniq pì ta bahech tabluàng hlèp, aih èh jah paqnoh ta kùa po. **4** Au anoe ka pì aih mangai bua da au, apaq yùq ka mangai jêh đac toq chac pì khoe aih pi jah broq cleq hòm. **5** Mahaq au patô am ka pì khòh yùq ka cabô: Khòh yùq crè ka Mangai jò khoe jêh cađac chac hamac, èh haq i cwiang tèm caqnìh ta hwinh, joq qnàng au doe ka pì: aih Mangai pì ep yùq crè! (Geenna g1067) **6** Ma ùh joq padam toq chìm

xê wì tech baiq hliac bac raq qmòh? Mahaq moeq toq ta aih dua Boc plình ùh hèt. **7** Xàc ta gàu pì qmat hadai rènh khoe dìq. Apaq yùq dèh! Majah qmang aih pì canaq ùh hnau ka chìm xê. **8** Au anoe ka pì: mangai leq doe đeh canau loq ka au enh ngèa wì phù cròng, aih èh Kon mangai hadai doe đeh canau loq ka yiniq haq enh ngèa ka bình plình Boc plình. **9** Mahaq mangai leq hangah đeh ùh canau ka au enh ngèa phù cròng, aih èh enh ngèa ka bình plình da Boc plình, au hadai doe đeh ùh qnì ka yiniq haq aih. **10** Mangai leq tapoch tablêq ka Kon mangai, yiniq lui aih oe jah caqnaih, mahaq mangai leq tapoch ùh hòq ka Yiang Hadròeh, yiniq lui haq aih èh pi oe jah caqnaih. **11** Jò wì aràng pì trùh enh ngèa hnim tagop, qnoh pì enh ngèa cwan hadrah, cwan wèq cwìang, aih pì apaq hèm đeh anoe qmang leq, anoe cleq hu cwaih doeh rađeh, **12** majah qmang aih, wop jò aih raq Yiang Hadròeh hnài pì bàu ma troq ka tapoch. **13** Jò aih, taqne mangai bac i moeq ngai dèch bàu doe: Mangai hnài, ìh anoe biaq ka daq au dôq haq axong kùng hang ka au diq. **14** Mahaq Chuaq Jesus padreo bàu: “Wùih mangai meh, cabô dèch au broq mangai hadrah yiniq, broq mangai axong da pì kùng hang?” **15** Khoe aih, haq doe ka wì ta aih: “Rabiaq haq oq! apaq daiq cadèh, mangai kô rìh ùh xài canòm ajang nòe bac kùng hang”. **16** Haq alìah ka wì bàu kô: “I moeq ngai padrõng, ruàng haq jah qmau pi cajaq, **17** haq aih hèm dèh ta manoh: Au broq qmang leq kô èh? Pi i qmòe ka nòe anòh hu don đòeq qmau, **18** Haq doe dèh raq: Au broq qmang kô èh, raliang dõng hapom ma dùnh, broq ònh ma qnoeq yi kàn, tah đòeq qmau xam

bài dahwèq ta aih, **19** khoe aih anoe dèh ka mahua yiang
cla: Gè i qmau khoe bac, hu acaq bac hanam, hêq, padai
beq, acaq, ôq, rai bùi hyòq diq. **20** Mahaq Boc plinh doe
ka haq: Wùih mangai blung, mahua yiang gè au yoc hlai
mang kô raq. Aih èh kung hang gè khoe padon ka dađeh
qmat èh jah cabô? **21** Mangai leq toq ti gop đòeq ka rađeh
mahaq ùh padrōng kan nòe Boc plinh, qmang aih èh diq.”
Trong loq lèt **22** Chuaq Jesus doe dèh ka mangai tiaq hòc:
“Qmang aih, au doe ka pì, apaq crè ka kan rìh pì kô èh
acaq cleq, hadai ùh dùh yùq ka chac pì kô èh caxùnh cleq.
23 Kan rìh yeo kàn ka dahwèq acaq, chac hamac yeo kàn
ka dahwèq caxùnh atàc. **24** Haqmiang ngan ac: haq ùh i
rai adrech, ùh i gat, hadai ùh i ka bùaq, ùh i ka hapom,
mahaq dua Boc plinh wèq ban haq, pì aih ajoq yeo canaq
ùh hnau ka ac? **25** I ka cabô oe taqne pì qmat canòm kan
loq lèt majah broq ka rađeh halinh tam toq biaq ùh? **26**
Tàng biac qyoh dàng aih pì broq ùh jah, meh pì oe lèt dèh
trong qnoeq? **27** Ngan riang tacreo hon qmang leq? Haq
ùh i abroq xalep, hadai ùh i caxênh brai, mahaq au doe ka
pì: Qnhac ka bùa Salomôn ranhòm dàng leq, dua ùh jah
caxùnh eo lem tìah ka bài riang aih. **28** Wùih! bài mangai
biaq kan lùi, tàng joq bài nhat oe ta gùng aih hì kô oe
rìh, hì da èh bùh ta ralung, mahaq Boc plinh oe am haq
caxùnh lem qmang aih, ùh dùh dèh ka pì! **29** Qmang aih,
manoh cliac pì paq hèm acaq cleq, ôq cleq, ùh dùh lèt dèh
trong aih. **30** Majah qmang aih, wì mangai enh gùng oe ta
crōng taneh kô jò leq ma ùh cadau tiaq bài yiniq aih, èh
Baq pì oe ta plinh khoe loq pì nan đeh ka bài yiniq aih. **31**
Mahaq chaq diac Haq òeq, bài yiniq aih troq jò èh brì ka

haq am tam ka pì. **32** Yôiq wì kon qyoh, apaq yùq cadèh, majah qmang aih Baq pì khoe lem manoh hu am ka pì Diac plình. **33** Tech kùng hang pì beq hu am ka mangai ma hamoq, palauq đòeq ka rađeh balet tah bac ma ùh hìaq loq hyah xam kùng hang canaq ùh hìaq loq racòch oe ta plình, aih nòe ùh i ka mangai atùng jah thia haten, ùh i ka hadrùng, ùh i catia kap bahech. **34** Majah qmang aih kùng hang pì oe taleq, manoh cliac pì hadai oe ta aih. **35** Caxi caqnam pì ep kàt, đen bùh dôq haq qngah yôt. **36** Qmang ka magai hapõng gòm dèh wì craq hnim hlài enh acaq yiniang, waq toq wì craq hi clôq qmang, haq khoe drah pèh qmòe carênh. **37** Xôq ramot ka mangai hapõng aih, jò wì craq hlài hnoq wì haq hmàng rìu gòm! Joq qnàng au doe ka pì, craq aih kàt dèh caxi caqnam, am mangai hapõng hangui ti cabõng, khoe haq hi patìh hlài ka wì. **38** Joq xôq ramot am ka mangai hapõng jò wì craq hlài hnoq wì haq rìu gòm qmang aih, yac ka jò qne mang, yac ka jò ia rõng. **39** Loq maro qmang kô! tàng joq cla wì craq hnim khoe loq jò leq i mangai atùng trùh, aih èh haq hamang đòeq hu rap, ùh dôq mangai atùng chìa da haq panàt hnim. **40** Pì hadai qmang aih diq, hmàng gòm rap qmòe oq, majah qmang aih Kon mangai trùh wop qmòe jò pì ùh ùac ngèh.” **41** Phiero bòch: Chuaq au, bàu alìah kô ìh anoe ka nhèn, loq ìh anoe xam mangai qnoeq? **42** Chuaq Jesus doe: “Cabô ma i manoh ùh hìaq gôpla rai rabiaq ka taqmroq, craq hnim dèch haq broq mangai wèq dìq ka hapõng ta hnim, đòeq trùh jò hu ti axong ka wì aih dahwèq acaq? **43** Xôq ramot ka mangai hapõng aih jò wì craq wìh hlài, hnoq haq broq qmang

aih! **44** Joq qnàng au anoe ka pì, aih èh craq hnim am haq wèq dìq kùng hang ta hnim. **45** Mahaq tàng joq mangai hapǒng aih hèm dèh ta manoh: Craq au oe dùnh men trùh, èh haq ti jêh bài mangai hapǒng calô, hapǒng cadrì, rai acaq ôq bù bia, **46** aih èh craq haq trùh wop hì haq ùh tangèh, wop qmòe jò haq ta ùac, yǒc long roe blai haq hyah hyoch ka akia, khoe aih cađac haq oe moeq qmang ti bài mangai manoh gôpla. **47** Mangai hapǒng kô khoe loq ka manoh cla wì craq, mahaq ùh padon ùh broq tiaq manoh aih, haq jah jìq yeo bac. **48** Yàng mangai hapǒng ma ùh qnì ka manoh cla wì craq, haq broq ùh troq ka manoh wì craq, aih èh jah jìq yeo biaq. Majah qmang aih mangai leq khoe jah am yeo bac, aih èh wì craq bòch hlài yeo bac, mangai leq khoe jah jao yeo bac èh wì craq bòch hlài yeo bac hòm. **49** Au khoe trùh hu caqnìh ùnh ta crǒng taneh, tàng joq haq khoe jah cheo cadêh, aih au oe tangèh cleq loe ka aih hòm! **50** I moeq baptem au ep pòq, au mangò xalep oe i jaq cleq men trùh hì baptem aih jah gêh! **51** Pì xoh au trùh au trùh hu aràng kan catèm ka crǒng tanenh qmòh? Au anoe ka pì: ùh! mahaq aràng kan talah. **52** Majah qmang aih, pang kô ta èh, tàng padam ngai oe pajùm moeq hnim, bài aih èh talah ka dabau, piq ngai tablêq ka baiq ngai, baiq ngai tablêq ka piq ngai, **53** baq tablêq dèh ka kon calô, kon calô tablêq dèh ka baq, miq tablêq dèh ka kon cadrì, kon cadrì tablêq dèh ka miq, yaq tablêq dèh ka kon mai, kon mai tablêq dèh ka yaq.” **54** Haq doe ka bài mangai bac ta aih: “Jò pì hnoq yùc yòng enh apah mat mahì clìh, pì doe: Hì kô èh loq i mè, èh joq qnàng qmang aih. **55** Èh i cayeo hlui enh pah

qma mat mahì loh pì doe: Hì kô èh tòq, èh joq i qmang aih. **56** Wùih! bài mangai patìah toq enh gùng tau! Pì loq hadro ngan ta tròc, hadro ngan ta taneh, òq hagleq pì ùh qnì hadro ngan qnhòng kô? **57** Hagleq cla pì ùh ti ngan deh trong leq ma taq atoq? **58** Qmang aih, jò pì lam ti bài mangai ma qnöh pì tanèe hadrah, roc trong drah àu hatroq ka wì, yùq èh wì dùi pì trùh enh ngèa cwan hadrah, cwan aih qmùt pì tanèe cwan wèq hñim cadrong, cwan aih clêh pì. **59** Au doe ka pì: Pì caqnaih yac ka oe pòq moeq hliac raq dua pì qnhòq jah loh enh aih”.

13 Hadai jò aih raq, i bài mangai anoe hlài ka Chuaq Jesus loq Philat khoe jêh đac toq leq ngai Galili, yđc mahim clai ta ngè tadreo. **2** Chuaq Jesus doe ka wì haq: “Pì xoh đeh bài mangai Galili aih broq yiniq lui cleq yeo qmèq ùh hnau ka mangai Galili qnoeq qmòh, dài wì majah glàm kan haño qmang aih? **3** Au doe ka pì loq: Ùh xài, mahaq tàng pì ùh qnì raxach, èh đìq ka pì hanoh lùng pac qmang aih đìq. **4** Tàng ùh qmang aih, moeq jàt rahem ngai cachìt ka hñim haqnhèq Siloê túc, aih pì hèm wì haq broq yiniq lui yeo qmèq ka mangai oe ta Jérusalem qmòh? **5** Au doe ka pì: Ùh! Mahaq tàng pì ùh raxach, đìq ka pì hadai cachìt lùch qmang aih èh. **6** Khoe aih haq hi alìah bàu kô: “I moeq ngai pìt đèh ta wuàn plì nho moeq xèm long pđc, haq loh chaq git plì ta aih mahaq chaq ùh lòm hnoq, **7** Haq doe ka bài wì mangai pìt nho: Khoe piq hanam au loh git plì nòe xèm long pđc kô mahaq ùh lah i qmòe plì, kau cađac long qmat, gleq majah đòeq haq tawac ngwan toq ka taneh? **8** Mangai pìt nho padreo bàu: Wì craq, iñ đòeq tam moeq hanam kô

hòm, dôq au bōc dudan taxèm haq khoe aih tah phàn. **9**
Broq braiq atiq èh haq loh plì, ùh qmang aih èh ìh hi koh
cadac. **10** I moeq hì sabat, Chuaq Jesus mùt hnài tanòe
hnim tagop qyoh. **11** Ta aih i moeq ngai gucadri, loh ka
pen khoe moeq jàt rahim hanam, majah qmang aih kiac
rùp baxa haq. Haq kōc crōng ùh jah yòng ka qnhoh. **12**
Bu hnoq haq, Chuaq Jesus khoe creo doe: “Yôiq! mangai
gucadri tau, ìh khoe jah brêh ka yinìq”, **13** Chuaq Jesus hi
yōc tì bèq chac haq. Tajòe hloe, haq aih jah yòng cajang,
rai dèch bàu manè apôi Boc plînh. **14** Jò aih, mangai wèq
hnim tagop qyoh hnoq Chuaq Jesus broq brêh ka mangai
yinìq ta hì sabat, haq aih tapoch hloe ka mangai bàc ta
aih: I tadràu hì hu abroq, pì trùh ta bài hì aih đòeq hu jah
broq brêh ka yinìq ùh hrōc, ùh dùh trùh dèh hì sabat. **15**
Mahaq Chuaq Jesus tèu haq: “Wùih! Mangai patìah toq
enh gùng tau, hì sabat pì ma ùh caqnaih bo, caqnaih lùa
loh enh cadrong hu tiaq aràng haq lam ôq diac qmòh? **16**
Kon cadrì da Apraham kô, satan khoe rùp kàt haq moeq
jàt rahim hanam, ta hì sabat ma ùh khòh lêh caqnaih haq
qmòh?” **17** Haq tapoch qmang aih bài mangai ma tagit ka
haq loh dōng ka camaih, yàng da mangai bàc ta aih lem
bùi ka trong halac haq khoe broq. **18** Chuaq Jesus doe:
“Diac Boc plînh qmang leq, au yōc cleq hu alìah? **19** Diac
aih tiàh ka moeq pliang clong habài, i moeq ngai aih haq
rai deh ta wia, jah hon hi wìa long kàn, chìm trùh broq
pù ta hamenh haq.” **20** Haq anoe hòm: “Au alìah diac Boc
plînh ti cleq kô hòm? **21** Diac aih tiàh ka blo, i moeqngai
gucad ri yōc jràu ta piq cađap dàc, trùh dèh jò dàc hi rêu
dōng.” **22** Khoe aih Chuaq Jesus tòc ta Jérusalem, haq lam

pagat enh bài plài qyoh trùh plài kàn, rai lam haq hnài wì. **23** I mangai bòch haq: Waiq Chuaq! Ajoq toq biaq ngai raq ma jah dèch qmòh? **24** Haq doe ka wì: “Ep ran dìq ka paden đòeq àu mùt ta qmang chit, majah qmang aih au doe ka pì, bàc ngai àu chaq trong hu mùt mahaq ùh jah.” **25** Jò cla wì craq ta hnim yòng clenq qmang, pì yòng enh gùng clôq qmang rai creo: waiq Chuaq! pèh ka nhèn qmang diq. Mahaq cla wì craq doe: Au ùh qnì ka pì trùh enh leq. **26** Jò aih èh pì doe: Nhèn khoe acaq, khoe ôq pajùm ti ìh, ti trong ti chòq ìh khoe hnài nhèn. **27** Mahaq wì craq doe hòm: Au doe ka pì, au ùh qnì ka pì trùh enh leq, dìq döng bài mangai broq dù tau, drah wia döng ma khoe ka au beq! **28** Jò aih èh, pì hnoq Apraham, Ysac xam Jacôp hloe xam dìq döng bài mangai pajàu tanèe diac Boc plình, mahaq pì èh jah khwênh qnöh cadac enh gùng, tanèe aih toq crò hmoë xam cadrit hanenh. **29** Yàng èh, enh gùng mahì loh, enh gùng mahì mùt, enh gùng pah qma, enh gùng pah qngeo, wì trùh hangui ta aniang hu acaq yiniang ta diac Boc Plình. **30** Aih èh, i mangai atìq jah loh angoe, mangai adroe jah loh ka atìq.” **31** Hadai jò aih, i mangai Pharsi lam doe ka Chuaq Jesus: ìh pi dùh oe tacô chaq lam taqnoeq beq, Herôt enh jêh đac ìh, **32** Chuaq Jesus padreo bàu: “Lam anoe ka chôn aih: Hì kô, hì da èh, au oe drùh hnan kan kiac rai broq brêh kan hinìq tòq, trùh hì mòe, aih èh qnhòng rìh da au hi dìq. **33** Mahaq hì kô, hì da èh, xam hì mòe au ep lam, majah qmang aih wìa ka mangai pajàu ma cachìt enh gùng ka Jérusalem. **34** Wùih! Jérusalem, Jérusalem, gè jêh cadac bài mangai pajàu, yoc hmo hibùq bài mangai wê bàu trùh

ti gè, bac yàng au enh hacom haqmon pì qmang ka ia kan creo àm dèh kon ta panan, mahaq pì ùh waq! **35** Kô èh, hnim pì wà hnim catù. Au doe qmòe ka pì, kô èh pì pi hnoq au hòm trùh hì ma hi doe: Xôq ramot am ka Mangai trùh enh dalam ka Yiniq Chuaq.”

14 I moeq hì sabat, Chuaq Jesus mùt acaq ta hnim mangai gucraq Pharisi, bài mangai ta aih ti achop ngan haq. **2** I moeq ngai lìu ten padah oe enh ngèa haq. **3** Chuaq Jesus bòch mangai Pharisi xam mangai hnài ranenh: “Tiaq qmang ka ranenh ta hì sabat akhòh broq brêh ka mangai yinìq, loq ùh khòh?” **4** Mahaq wì oe hatinh ùh padreo bàu. Chuaq Jesus dèch mangai yinìq yòng, broq brêh ka haq, khoe aih thê haq hlài. **5** Khoe aih haq bòch wì: “taqne pì qmat i ka mangai leq wop hì sabat, i dèh moeq ngai kon lô qyoh, tàng ùh meh i dèh moeq toq bo clìh ta ralùng, pì ma ùh drah loh dèch qmòh?” **6** Trong aih wì tèu ùh jah. **7** Jò haq hnoq bài mangai ma jah akhen trùh acaq ta aih, wì toq ràih ka rađeh nòe haqngui ma haqnhèq ranhòm, haq hi alìah ka wì: **8** “Jò wì akhen ka ìh trùh acaq yiniang ǒng mai, apaq ràih hanqgui nòe rahù, tabeq i tamoe ma yeo kàn ka ìh. **9** Mangai akhen lam doe ka ìh: Dôq haq meh hangui ajang kô, aih ajoq ìh xep ka rađeh ep loh hangui enh qneq qmòh. **10** Mahaq jò ìh jah akhen, ìh hangui đeh enh nòe haqneq raq, aih èh cla wì craq trùh, haq doe ka ìh: Ê daq! tòc hangui enh qnhèq kô. Aih ajoq broq bac ngai hadai jah akhen jah ta-iu ka ìh. **11** Qmang aih cabô padèch rađeh, haq aih èh jah qnoh haqneq, mangai leq paqnoh rađeh haqneq, haq aih èh jah dèch atòc”. **12** Khoe aih Chuaq Jesus anoe ka mangai

ma akhen ka haq: “Jò ìh i yiniq akhen wì acaq ôq qne hì qnì, di xèq qnì, apaq akhen toq deh ka bua, deh ka oh daq calô, oh daq cadri, xam wì plài pla ma kan padrõng, yùq èh wì loq akhen hlài ka ìh đòeq hu caqnaih dòeh. **13** Mahaq jò ìh i yiniq acaq ôq, akhen ka mangai pa, mangai angwenh, mangai liap, mangai lua mat, **14** aih èh majah xôq ramot. Hiloq wì haq ùh hlàt akhen hlài ka ìh, mahaq trùh jò mangai taq atoq jah rìh hlài, aih èh hi jah padreo hlài ka ìh.” **15** I moeq ngai hangui acaq moeq qmang ti haq, tàng bàu aih hi tèu: Xôq ramot am ka mangai ma jah acaq bênh tanđe diac Plình! **16** Mahaq Chuaq Jesus padreo bàu rameh “I mangai aih haq padon yineang kàn, akhen ka bàc ngai lam acaq. **17** Trùh jò acaq, thê dèh hapõng lam anoe ka bài mangai ma khoe jah akhen: Trùh beq, rìm yiniq dìq khoe jah padon. **18** Mahaq dìq dõng ka wì pajùm moeq bàu hangah. Mangai baxèm doe: Au i rot moeq haqnech ruàng, ep lam ngan, apaq da yo oq. **19** Mangai qnoeq doe: Au i rot moeq jàt toq bo, au ep lam ngan qmang leq cadèh, apaq da yo oq. **20** Mangai maqnoeq hòm doe: Au neo yōc mai, au lam ùh jah. **21** Mangai hapõng wìh hlài anoe dèh ka wì craq. Khoe aih craq hním aih plôh nòeh, thê dèh hapõng: “Drah loh roc trong, roc hanom taplài, aràng bài mangai pa, mangai angwenh, mangai lua xam mangai cwê mùt tacô.” **22** Khoe aih, hapõng anoe: Wì craq bàu ìh thê nhèn khoe broq, mahaq nòe rah oe raq bàc. **23** Mangai craq hním doe deh ka hapõng: “Loh lam roc plài roc gùng, hnoq mangai leq, pa-àu wì mùt, aih dôq haq bình ka hním au. **24** Majah qmang aih au doe ka pì: Dìq dõng ka mangai ma

khoe jah akhen adroe, aih ùh i mangai leq ma oe jah acaq yiniang ta hnim au”. **25** I bài mangai bàc haraya lam ti tiaq, haq hwi ngan wì aih rai doe. **26** “Tàng joq i mangai leq trùh ti au mahaq ùh git deh ka miq baq, cadrì, kon, oh daq cadrì, calô, git hloe kan rìh deh cla, haq aih ùh jah broq mangai tiaq hóc au. **27** Mangai leq ùh xùi deh long pagat tiaq au mangai aih hadai ùh wìa broq mangai tiaq hóc au. **28** I mangai leq oe taqne pì enh broq moeq toq hnim haqnhèq kàn. Ma ùh joq baxèm aih haq hangui òeq hu ngan dìq toq leq, đòeq ngan rađeh atàu bac đòeq pagêh hnim aih ùh? **29** Majah qmang aih jò haq khoe broq xèm èh ùh lênh gêh ka chac hnim, aih rìm ngai hnoq ajoq wì loq do, **30** wì doe: Mangai kô khoe broq, mahaq ùh lênh gêh”. **31** I ka bùa leq lam tajêh ka bùa qnoe, ma ùh dùh hangui hatinh ngan òeq, đòeq ngan rađeh qnung moeq muàn lình, ahlàt tablêq ka bùa tau ma wê baiq muàn lình loq ùh? **32** Tàng joq haq hnoq đeh ùh blêq, jò bùa tau oe raq hangai haq khoe thê deh mangai hadrah chônh lam đòeq ti alia aclai chaq trong hatroq. **33** Hadai qmang aih, tàng joq pì ùh cađac dèh rìm yiniq pì ma i, pì ùh jah broq mangai tiaq hóc Au. **34** Boh aih lem, mahaq tàng haq hnhung dèh kan xang, aih yōc cleq broq dôq haq xang hlài hòm? **35** Yac ka qnoh ta ruàng dua pi wìa, broq phàn dua piloh cleq; wì ep ùc qnoh cađac enh gùng. Cabô i don tamàng, drah tamàng beq!”

15 Dìq dǒng ka bài mangai yōc thèq xam bài mangai i yiniq lui thia haten ka Chuaq Jesus hu tamàng bàu haq hnài. **2** Mahaq mangai Pharisi xam bài mangai hnài ranenh, bahech ka dabau: Mangai kô đìh toq bài mangai

i yiniq lui rai acaq moeq qmang ka wì! **3** Haq hi alìah ka wì: **4** “Taqne pì qmat, mangai leq ma i moeq hrinh toq trìu mahaq hnhung moeq toq raq, haq ma ùh đòeq dèh hachìn hachìn toq oe tanòe hawit, đòeq hu chaq trìu ma hnhung aih waq qmòe ka hnoq qmòh? **5** Èh jò khoe hnoq, haq bùi pi cajaq, binh dèh trìu aih taplêh; **6** hlài ta hnim. Khoe aih, haq creo deh ka bài bua xam wì plài, haq doe: Beq lem bùi ti au, majah qmang aih kon trìu au ma hnhung, au chaq hoe hnoq deh. **7** Au doe ka pì: Hadai qmang aih diq, ta plình lem bùi jò moeq ngai i yiniq lui loq raxach, ùh hnau ka hachìn jàt hachìn ngai taq atoq ùh ep raxach. **8** Patìah haq, i moeq ngai gucadri i moeq jàt hliac bac, hnhung moeq hliac bac raq, haq ma ùh bùh đen, hwit hnim rai chaq qmòe ka da adia waq qmòe ka hnoq qmòh? **9** Èh trùh jò haq chaq khoe hnoq, haq creo deh ka bua xam wì plài haten, haq doe: Lem bùi ti au beq, majah qmang aih bac au ma hnhung au chaq khoe hnoq. **10** Au doe ka pì: Enh ngèa bình plình Boc Plình hadai qmang aih, wì lem bùi ka mangai i yiniq lui loq raxach.” **11** Haq anoe hòm: “I moeq ngai tau haq i baiq ngai kon calô. **12** Mangai kon ma qyoh doe deh ka baq: Baq, hang leq ma axong ka au, am da au. Mangai baq hi axong deh kèng hang am ka wa kon. **13** Atìq ka aih biaq hì, mangai oh yōc dōng deh kèng hang, lam ka hangai, ta aih, haq rìh loh ka pi wìa cleq, acaq racaih hreо dōng deh kèng hang. **14** Jò haq racaih khoe dìq dōng kèng hang, gùng aih i kan pangot kàn, haq loh ka nan pa, **15** haq hi lam patìh ka wì gùng aih, wì thê haq lam ban chùa tagùng. **16** Haq enh yōc đeh caqnahah tòh đòeq chem chùa hu acaq

đeh ka panàc, mahaq dua wì ùh am. **17** Jò aih haq men
cadrat don, haq doe: Ta hnim baq au, oe i jaq cleq mangai
patìh jah acaq ùh dìq ùh dài, tacô aih au cachìt ka hrah.
18 Au kô èh yòng hu wih hlài dèh ta baq rai anoe ka haq:
Baq! Au khoe broq yiniq lui ka plình xam ka ìh. **19** Au pi
oe wìa creo kon ìh hòm, ìh ngan au tìah ka wì ma patìh
ka ìh dìq. **20** Haq hi padinh yòng hlài dèh ta baq. Jò oe raq
enh hangai, hnoq deh kon baq haq tadèch qmòe nòeh,
tùh loh yǒc tì k wat dèh kon raih hìp haq. **21** Haq doe deh
ka baq: Baq! au khoe i yiniq lui ka tròc ka ìh, pi oe wìa ka
creo kon ìh hòm. **22** Mahaq baq haq doe ka bài mangai
hapõng: Rênh haq! Drah aràng eo ma dìq jaq lem caxùnh
am ka haq, asràng nhàn ajang hadrang tì haq, tòc ka haq
jep. **23** Drah rùp kon bo ma bit lem hu broq jam. Beq!
bèn acaq lem bùi, **24** majah qmang aih kon au kô khoe
cachìt mahaq manòeq khoe rìh hlài, khoe hnhung mahaq
manòeq kô khoe hnoq hlài. Khoe aih, dìq ka wì hi lem
bùi. **25** Jò aih, mangai daq ramua qnang oe ta gùng. Jò haq
hlài ten trùh hnim, tàng atêh broc tàng bàu calêu, **26** haq
hi creo ka moeq ngai hapõng hu bòch ngan i yiniq cleq.
27 Hapõng aih padreo bàu: Oh ìh khoe hlài, aih ìq baq ìh
majah khoe bùh kon bo bit, majah qmang aih, hnoq oh ìh
hlài jah tadéh. **28** Mangai kon ramua plôh nòeh, pi waq
mùt ta hnim. Baq haq hi loh padô haq mùt. **29** Mahaq haq
doe: Ngan kô, au patìh ka ìh khoe toq leq hanam, qnhòq
lah i yàng leq broq ùh troq ka manoh ìh, aleq ìh malah
am ka au moeq toq kon bubi qyoh au hu acaq lem bùi
deh ti bua. **30** Yàng manòeq kô, kon ìh mangai ma khoe
racaih dõng kùng hang ìh ti bài gucadri hađoh, manòeq

haq wih hlai aih ih buh qmoe kon bo bit. **31** Baq haq doe: Akon! Kon oe yot ti baq, diq deng kung hang baq aih xai kung hang kon. **32** Mahaq ben joq khoh acaq yiniang lem bui, majah qmang aih oh kon khoe cachit mahaq mandeq khoe ri hla, khoe hn hung mahaq khoe hnoq hla.”

16 Chuaq Jesus anoe hòm ka tòai mangai tiaq hòc “Mangai padrøng tau i moeq ngai hapøng wèq da haq kung hang, i wi lam anoe ka haq: Wi craq! haq aih racaih deng hang wi craq. **2** Aih wi craq hi creo ka mangai aih mut rai bòch: ih broq cleq! hagleq au majah tang wi anoe qmang aih iq? ih wèq kung hang qmang leq, anoe beq! Majah qmang aih, pang kô èh ih pi oe jah wèq kung hang au hòm. **3** Mangai wèq kung hang aih hem: Wi craq pi am au broq hòm, broq qmang leq kô èh? abèq ruang au ùh i ka padren, lam chaq acaq aih camaih hrin. **4** Au khoe loq broq qmang leq, døeq jø wi craq pi am broq, oe i mangai dh ahlai au ta hñim. **5** Haq hi creo ka tang ngai pøq døeh wi craq truh, haq bòch mangai adroe: ih pøq døeh craq au toq leq? **6** Mangai aih doe: Moeq hrinh thung dau. Mangai wèq kung hang thê: Drah yoc jaiq hangui aqmat achih beq: Padam jat. **7** Èh haq bòch mangai tau: Ha ih qmat pøq døeh craq au toq leq? Haq padreo bau doe: Moeq hrinh ateo qmau. Mangai wèq kung hang doe: Drah achih jaiq døeh: Rahem jat. **8** Craq haq hi manè mangai wèq kung hang loq gópla trong haq rabiaq ka broq qmang aih. Majah qmang aih kon da qnhøng kô yeo rabiaq ùh hnau ka kon da kan qngah trong taqmüt ti dabau. (aiøn g165) **9** Au anoe ka pi: Yoc ma diq ka hang gópla aih hu taqmüt chaq bua beq, døq jø hang aih khoe

dìq, wì hu đìh qmùt pì tanòe oe hloe. (aiōnios g166) 10

Mangai leq ùh tablòq manoh trong yiniq qyoh, haq aih hadai ùh tablòq manoh trong yiniq kàn, mangai leq gôpla trong yiniq qyoh, hadai gôpla trong yiniq kàn. 11 Qmang aih tàng kùng qnhòng kô, pì khoe ùh dìq ka manoh, aih èh cabô ma tùt am ka pì wèq kùng hang joq qnàng ta diac plình? 12 Tàng joq khoe pi wìa ka lùi pì trong kùng hang mangai qnoeq, aih cabô oe dôq pì jah wèq deh kùng hang cla? 13 Ùh i ka hapõng leq jah patìh ka baiq toq craq, majah qmang aih haq loq waq ka mangai kô mahaq git ka mangai tau, dìq manoh ka mangai kô mahaq hnoq mangai tau ùh loh cleq. Pì ùh jah broq hapõng Boc hlìnhanh rai broq hapõng Mamôn hòm.” 14 Mangai Pharsi aih bàì ma plai ka bac jèn, tàng dìq bàu aih, wì haq halê Jesus. 15 Haq tapoch ka wì: “Pì broq deh taq atoq dôq mangai qnoe ùh qni, mahaq Boc plình loq ka manoh pì, majah qmang aih trong leq kon mangai pì hnoq đeh lem, aih kan amùa ramòt enh ngèa ka Boc plình. 16 Ranenh xam bàu pajàu trùh pang qnhòng da Jon raq hi dìq, pang aih Bàu lem diac da Boc Plình jah anoe qnoh, mangai leq mangai meh ep àu dìq ka padren hujah mùt ta aih. 17 Plình crõng taneh kô hnhung yi hlàu ùh hnau ka cađac moeq chù, moeq teo yi qyoh ta hset ranenh. 18 Cabô cađac deh mai lam yōc cadri qnoeq, mangai aih pòq yiniq lui tango, mangai leq yōc gucadri õng haq cađac, hadai pòq yiniq lui tango. 19 I moq ngai padrõng kan, caxùnh toq eo gòh drinh broq xi bai lem, rìm hì rìh acaq oe ta kan rahù. 20 I moeq ngai pa yiniq haq Laxaro, kùi ajang qmang ngo mangai padrõng aih, tachac haq xìa dõng kan talêh

bachùng. **21** Haq toq ngèh đeh jah toch acaq chiac bài
cràc taclìh enh ca'böng mangai padröng, hadai i koq liah
da haq rahenh. **22** Trùh jò mangai pa cachìt, bình plình
aràng haq qmùt oe ta achong Apraham. Mangai padröng
hadai cachìt, wì lam catùh. **23** Mangai padröng oe tanòe
mangai kachìt, qnang chìuq salep, enh hangai haq qngoc
ngan, hnoq Laxaro oe ta achong Apraham, (**Hadès g86**) **24**
haq drah creo cadêh: Apraham kan cadraq au! Ha-och ka
au diq, thê Laxaro lùac hadrang tì tadiac đòeq broq ka
rapet au jah hangèp đeh toq biaq, majah qmang aih au
tôq lep pi cajaq ta ùnh kô. **25** Mahaq Apraham doe: A
kon! Hmàng hlài beq, jò oe rìh kon khoe jah waq deh kan
lem, yàng Laxaro aih glàm toq trong qmèq, Yàng manòeq
oe tacô haq jah alòng, da kon jah oe tanòe baxa. **26** Qnah
hòm, ta adreo bèn i moeq toq kòe jrùq, yac ka i cabô oe
pah kô enh tòc pah qmat dua ùh jah, cabô enh pah qmat
enh tòc pah kô hadai ùh jah. **27** Mangai padröng aih
anoe: Kan cadraq au! Ìh thê Laxaro lam ta hním baq au,
28 majah qmang aih au i padam ngai oh daq, đòeq haq
doe ka wì loq yiniq kô, tàng ùh qmang aih, yùq èh wì
hadai loh tanòe xalep kô diq. **29** Apraham padreo bàu: Wì
haq khoe i Môise xam bòe pajàu, wì haq ep tamàng bàu
wì aih. **30** Mangai padröng anoe: Apraham kan cadraq au,
ùh xài qmang aih, tàng joq i mangai cachìt rìh hlài trùh
ta wì haq, aih èh wì haq hi raxach. **31** Mahaq Apraham
doe tàng joq ùh tamàng Môise xam bài pajàu, yac ka i
mangai cachìt rìh hài, dua wì haq ùh lùi”.

17 Chuaq Jesus doe ka magai tiaq hòc: “Bài yiniq đòeq
broq ka mangai qnoeq catoeh tacro aih ùh jê, mahaq

habo ka rađeh mangai ma broq trong aih. **2** Tàng joq mangai leq broq ka moeq ngai kon mangai qyoh kô cro ta yiniq lui, yđc apau hmo kàt ajang ranđong haq aih hu khwênh caqnìh cađac ta diac raxìq aih xan ka ùh hnau hòm. **3** Pì ep wèq rađeh. Tàng joq i oh daq ìh broq yiniq lui ka ìh, drah tagàih ka haq, tàng joq wì haq loq raxach, drah cađac yiniq lui ka wì haq. **4** Yac ka moeq hì, wì loh yiniq ka ìh tapèh yàng, tapèh yàng wì haq wìh hlài doe: Au raxach, aih drah caqnaih yiniq lui wì haq. **5** Bì mangai tiaq cla doe ka haq: Tam ka nhèn manoh lùi. **6** Chuaq Jesus doe: “Tàng joq pì i manoh lùi qyoh budàng clong habài, pì doe ka long pôh kô: Tabùiq enh kô hu loh pìt tadiac raxìq chàm, aih dua haq iu bàu **7** Taqne pì qmat i mangai leq i hapöng lam kai ruàng, lam ban triù, jò haq hlài enh gùng pì doe ka haq: Drah thia hangui tacô hu acaq qmòh? **8** Ma ùh xài pì thê haq: Padon ka au acaq, kàt caxi caqnam patìh ka au hèqe, trùh jò leq au hèq ka acaq, khoe aih pì hi acaq diq qmòh? **9** Hapöng iu tiaq bàu, craq haq i ep cleq ka manè haq? **10** Pì hadai qmang aih, jò broq gêh trong thê pì broq, pì doe rameh: Nhèn kô bì hapöng ùh loh cleq, nhèn broq toq trong nhèn ma ep broq.” Mòeq jàt ngai bacùn **11** Manòeq Chuaq Jesus qnang lam trong tóc ta Jérusalem, Haq lam tiaq roc acang taqne gùng Samari xam gùng Galili. **12** Wop jò haq mùt taplài aih, i moeq jàt ngai bacùn đìh haq, wì haq yòng enh hangai, **13** wì creo: Wì craq! ha-och ka nhèn diq. **14** Jò bu hnoq wì aih, Chuaq Jesus doe: “Lam beq! lam patô rađeh ka bì pajàu.” Jò wì aih qnang lam, đìq ka wì haq jah brêh. **15** I moeq ngai, hnoq rađeh jah brêh, haq

wìh hlài, rai dêh bàu manè apôi Boc plình; **16** mangai aih caqnìh rađeh ajang jènh Chuaq rai manè haq. Kô aih mangai Samari. **17** Chuaq Jesus bòch: “Ùh xài moeq jàt ngai jah brêh dǒng qmòh? Hachìn ngai tau taleq hòm? **18** Hagleq ùh i moeq ngai leq wìh hlài manè apôi Boc plình enh gùng ka mangai diac wì kô”. **19** Khoe èh, haq doe ka mangai aih: “Yòng lam beq! manoh lùi ìh khoe broq ìh brêh lem.” **20** Mangai Pharisi bòch Chuaq Jesus jò leq diac Plình ma trùh, haq padreo bàu “Diac plình trùh ùh tìah ka yiniq jah hnoq xam mat, **21** ùh i cabô jah doe: Oe tacô loq oe hatau, majah qmang aih diac plình oe ta pì.” **22** Haq doe deh ka mangai tiaq hõc: “Kô èh i jò pì ma tangèh jah hnoq đeh mòeq hì da Kon mangai, mahaq ùh jah. **23** Èh i wì doe ka pì: Haq oe tacô loq oe ta tau, mahaq apaq lam, paq tiaq wì. **24** Majah qmang aih tìah ka camlet enh caqnàm plình kô trùh ta caqnàm plình tau qmang leq, Kon Mangai trùh dèh hì cla haq hanoh qmang aih. **25** Mahaq adroe aih, Kon mangai ep xalep bac trong, èh kon mangai qnhòng kô kwaih ùh waq đac haq. **26** Biac ma khoe loh ta hì Noê nèh qmang leq, hì da Kon Mangai trùh hadai qmang aih: **27** Wì acaq, ôq, ban õng, yõc mai, trùh hì Noê hi müt ta boang, diac kàn trùh, palùng dìq dǒng phù cròng. **28** Yiniq ma khoe loh ta hì da Lot nèh hadai, wì acaq ôq, wì tapadro, wì pìt, wì broq hnim. **29** Mahaq hì Lot loh khoe enh gùng Sôđom, aih i mè ngia ùnh cìh enh plình jêh dǒng mangai ta plài aih. **30** Hì Kon mangai loh hadai qmang aih. **31** Hì aih èh, cabô oe ta kùa po, i dahwèq ta hnim, ùh dùh loh qnhon, cabô oe tagùng, hanoh ùh dùh wìh hlài dèh. **32** Hmàng hlài

cadri Lot beq! **33** Mangai leq chaq trong hu dèch dèh kan rìh, aih èh hnhung, mangai leq cađac deh kan rìh, aih èh jah yōc hlài. **34** Au doe ka pì, mang aih, baiq ngai kùi moeq aniang, mòeq ngai jah dèch atōc, mòeq ngai rong đòeq hlài. **35** Baiq ngai gucadri pêh pajùm mòeq toq apau qmau, mòeq ngai jah dèch atōc, mòeq ngai jah rong đòeq hlài. **36** Baiq ngai gucalô oe tagùng, mòeq ngai jah dèch atōc, mòeq ngai jah rong đòeq hlài.” **37** Mangai tiaq hōc bòch: Chuaq nhèn! yiniq aih èh loh taleq? Haq padreo bàu: “Taleq i hanang cachìt, cliang kèn tagop dabau ta aih”.

18 Chuaq Jesus alìah ka mangai tiaq hōc mòeq yiniq, dôq wì loq ep waiq khàn yôt, ùh dùh tagah lep: **2** Tagùng aih, i mòeq ngai cwan ùh yùq ka Boc Plình, rai ùh camaih qmòe ka cabô. **3** Tagùng aih hadai i mòeq ngai gucadri hadrô, trùh anoe ka cwan: Au canòm chiac ka ìh, hadrah taq atoq am ka au xam mangai tagit ka au. **4** Cwan aih ùh tamàng khoe dùnh. Yàng khoe ka aih haq hèm: Hiloq ka au ùh yùq ka Boc plình, ùh camaih qmòe ka cabô, **5** mahaq mangai gucadri kô lam pangài yôt qmòe ka au, hêq au tamàng döng ka haq kan taq atoq, dôq haq pi hìaq trùh yôt broq ka au loh qmòe ka jìq gàu. **6** Khoe aih, haq bòch wì: “Pì atàng bàu cwan hadrah ùh taq atoq aih khoe anoe cleq ùh? **7** Qmang aih yilaiq Boc plình ma ùh hadrah taq atoq ka mangai ma khoe jah ràih, aih bài mangai dahì damang toq creo dang haq, wìa ka haq xòe ka trùh hu dèch wì aih qmòh? **8** Au doe ka pì: Haq drah rên tamàng kan taq atoq ka wì. Mahaq èh jò Kon mangai hi trùh haq i hnoq manoh lùi oe ta cröng taneh loq ùh? **9** Haq alìah

bàu kô ka bài mangai loq doe rađeh taq atoq èh hnoq mangai qnoeq ùh loh cleq: **10** “I baiq ngai tōc ta hnim kùh waiq hu waiq khàn: mòeq ngai Pharisi, mòeq ngai yōc thèq. **11** Mangai Pharisi yòng waiq khàn ta manoh qmang kô: Waiq Boc plinh, au manè apôi ìh, majah qmang aih au ùh hìaq tìah ka wì qnoeq: loq atùng, broq dù, loq tango, ùh hìaq tìah ka mangai yōc thèq meh. **12** Mòeq tuàn au apàm ka acaq baiq yàng, tarìm yiniq au i, mòeq jàt phàn au dèch mòeq. **13** Mahaq mangai yōc thèq yòng chiac enh hangai, haq ùh lùi qngoc taplinh, haq tùc dèh rada rai anoe: Boc plinh, ha-och ka au diq, au mangai i yiniq lui! **14** Au doe ka pì, enh ngèa ka Boc plinh, mangai kô wìh hlài deh ta hnim jah kan taq atoq ùh hnau ka mangai tau. Majah qmang aih, mangai leq chaq trong padèch atōc rađeh, aih èh jah caqnìh qnoh haqneq, mangai leq paqnoh rađeh, aih èh jah dèch atōc ka haqnhèq”. Bòe kon qyoh **15** Wì hadai aràng bài kon qyoh trùh ti Chuaq Jesus, dôq haq yōc tì bèq wì qyoh aih. Mangai tiaq hōc hnoq qmang aih, hi lech ka bài mangai aràng. **16** Mahaq Chuaq Jesus crêu anoe ka wì: “Dahaq wì qyoh trùh ti au, apaq tát, majah qmang aih mangai hatìah bài kon qyoh qmat majah diac Boc plinh. **17** Joq qnàng au doe ka pì, cabô ùh waq yōc diac Boc plinh tìah ka mòeq ngai kon qyoh, haq aih ùh jah müt diac Plinh”. **18** Jò aih i mòeq ngan cwan bòch Chuaq Jesus: Mangai hnài lem, au ep broq cleq đòeq hu jah kan rìh halinh mòeq đòe? (**aiōnios g166**) **19** Haq padreo bàu: “Hagleq ìh majah creo ka au mangai lem. Ùh i ka mangai leq lem enh gùng ka mòeq ngai Boc plinh. **20** Ìh khoe loq bài ranenh kô: ìh apaq

tango, apaq jêh đac mangai, apaq atùng, apaq wiang yòng đòeq capoch dech ka mangai qnoeq. Ep i loq hèm dèh ka miq baq”. **21** Mangai aih doe: Dìq dõng rìm yiniq aih au khoe wèq qmòe enh jò oe qyoh nèh raq. **22** Chuaq Jesus tàng qmang aih, hi doe ka haq: “Ìh oe raq i mòeq yiniq hòm. Tech dõng kùng hang ìh beq, axong am ka mangai pa èh ìh hi jah hang oe ta plình, khoe aih ìh trùh, hu lam tiaq au.” **23** Jò tàng qmang aih, mangai radam aih loh ka mangò, majah qmang aih haq padrõng pi cajaq. **24** Chuaq Jesus ngan ta haq rai doe: “Mangai padrõng mùt diac Boc plình joq xa. **25** Lõcđa mùt trom jrùm yeo hlàu ka mangai kan mùt diac Plình”! **26** Bài mangai tàng bàu aih, wì bòch: Qmang aih èh cabô majah dèch? **27** Haq padreo bàu: “Trong leq mangai broq ùh jah, aih Boc plình broq jah.” **28** Phiero bòch: Hacô nhèn khoe cađac dìq dõng yiniq nhèn i đòeq hu tiaq ìh, aih èh nhèn jah cleq? **29** Chuaq Jesus padreo bàu: “Joq qnàng au doe ka pì, mangai leq taiq diac Plình loh qmòe ka cađac deh hnìm, miq baq, oh daq, cadri kon, **30** oe ta qnhòng kô haq jah hlài yeo bàc, qnhòng atìq jah kan rìh halinh mòeq đòe.” (**aiōn g165, aiōnios g166**) **31** Chuaq Jesus qnong wì mòeq jàt baiq ngai lam crài ti rađeh, haq doe ka wì: “Kô èh bèn tòc ta Jérusalem, rìm yiniq bài pajàu ma khoe achìh trùh Kon mangai èh hi jah xít. **32** Majah qmang aih wì rùp haq am ka mangai diac wì. Wì halê haq, hanip haq rai cachôh ka haq. **33** Khoe ka wì blai haq wì hi jêh cađac haq. Trùh hì piq, haq hi rìh hlài.” **34** Mahaq bài mangai tiaq hõc ùh qnì tàng, bàu aih enh anoe cleq majah qmang aih khoe cadoc ka bài mangai tiaq hõc, dài wì haq majah ùh qnì Chuaq

Jesus anoe cleq. **35** Jò Chuaq Jesus ten trùh ta Jérico, i mòeq ngai lua mat hangui ti trong đòeq hu ti axìn acaq. **36** Jò haq tàng i bài mangai bàc lam trong aih, haq bòch i yiniq cleq. **37** wì doe ka haq: Chuaq Jesus mangai Naxaret lam trong kô. **38** Haq crêu cadêh: Waiq Kon bùa Đawit, ha-och ka au diq! **39** Bài mangai lam adroe lech thê haq chaq oe ma hatinh haq; yàng aih kiang haq creo yeo dêh hòm: Kon bùa Đawit ha-och ka au diq! **40** Chuaq Jesus hi yòng rai thê wì aràng mangai aih trùh. Jò mangai lua mat trùh ten jang aih, haq hi bòch: **41** “Ìh enh au broq ka ìh cleq?” mangai aih doe: Waiq Chuaq! au enh jah xau hnoq! **42** Chuaq Jesus doe ka haq: “Xau hnoq hlài beq! Manoh lùi da ìh khoe broq brêh ka ìh. **43** Tajòe qmòe jò aih raq, haq jah xau hnoq hlài, haq hi lam tiaq Chuaq Jesus rai manè apôi Boc plinh. Dìq ka mangai hnoq qmang aih wì hadai manè apôi Boc plinh.

19 Chuaq Jesus mìt ta Jérico, haq pagat ti trong. **2** Ta aih i mòeq ngai yiniq haq Xachê, broq gàu bài mangai yōc thèq, padrōng pi cajaq. **3** Haq aih enh hnoq Chuaq Jesus aih mangai qmang leq, mahaq ùh jah, majah qmang aih mangai bàc hrinh, èh haq aih mangai đêq. **4** Haq cadàu adroe, heo tōc goe long pōc đòeq hu jah ngan Chuaq Jesus, majah qmang aih Chuaq Jesus lam trong aih. **5** Chuaq Jesus trùh ajang aih, qngoc ngan rai crêu: “Xachê! drah loh beq, majah qmang aih hì kô au mìt hnìm ìh.” **6** Xachê drah loh qmòe ka rên, rai đìh Chuaq Jesus rai lem bùi. **7** Dìq dōng mangai hnoq qmang aih, wì bahech ka dabau: Mangai kô ka doe mìt oe ta hnìm mangai i tuiq. **8** Mahaq Xachê padinh yòng rai anoe: Waiq Chuaq! Au yōc

deh moeq haqne hang cla au hu đòeq axong ka mangai pa, tàng joq au i broq haño ka cabô yiniq cleq ùh loe, au padreo hlài loe pôn yàng. **9** Chuaq Jesus doe: “Hì kô, kan dèch khoe mùt ta hnim kô, majah qmang aih haq kô hadai kon xau Apraham. **10** Majah qmang aih Kon mangai trùh hu chaq dèch mangai ma khoe hnhung”. Alìah trùh bac **11** Jò wì oe raq tamàng bàu aih, Chuaq Jesus tam mòeq alìah ka wì hòm, majah qmang aih haq khoe ten trùh Jérusalem, wì xoh dèh diac Boc plinh loh hloe draq drinh jò aih raq. **12** Haq doe rameh: “I mòeq ngai kon bùa lam hangai đòeq hujah dèch broq bùa khoe èh hi wìh hlài; **13** haq hi crêu dèh moeq jàt ngai hapõng, am ka wì aih moeq jàt capiac bac, rai tanap: Yõc bac kô abroq dôq haq loh tam trùh hì au wìh hlài. **14** Mahaq mangai gùng aih git ka haq, wì thê mòeq mangai wê bàu atìq ka haq hu doe: Nhèn ùh enh mangai kô broq bùa wèq nhèn. **15** Jò haq khoe jah dèch broq bùa, haq wìh hlài, crêu ka bòe mangai khoe yõc bac trùh ta haq, đòeq hu ngan mòeq ngai wì broq jah toq leq. **16** Mangai adroe trùh doe: Wì craq! bac ìh khoe loh tam mòeq jàt capiac qnoeq hòm. **17** Wì craq doe: Joq wìa qnàng, mangai hapõng lem da au, trong qyoh ìh khoe dìq ka manoh, ìh kô èh jah wèq mòeq jàt gùng. **18** Hapõng ma hatìa trùh doe: Wì craq! bac ìh am, au khoe broq jahtam padam capiac hòm. **19** Wì craq doe: ìh jah wèq padam gùng. **20** Mangai qnoeq hòm trùh doe: Wì craq! Hacô bac ìh, au khoe caxop don đòeq ta mù, **21** majah qmang aih au crè ka ìh, au loq ìh kô mangai nhang ùh palap cleq, yõc tanòe ìh ùh i đòeq, gat tanòe ùh i rai. **22** Wì craq doe: Wùih! mangai hapõng dù

tau, au tiaq bàu cla ìh raq đòeq hu hadrah ka ìh, ìh khoe loq ka au mangai nhang, yōc toq taqnòe ùh i đòeq, gat toq tanòe ùh i rai, **23** hagleq ùh yōc bac aih tah ta hnim padro bac? jò au hlài au hu yōc dèh xam xèm xam goe. **24** Wì craq doe ka bài mangai ma yòng ta aih: yōc bac haq qmat, am ka mangai ma khoe i moeq jàt capiac bac. **25** Wì doe: Wì craq! haq aih khoe jah mòeq jàt capiac bac. **26** Au doe ka pì: mangai leq khoe i, aih èh jah am tam, mangai leq ùh i, aih èh yōc hloe cleq wì haq ma khoe i. **27** Mahaq bài mangai leq ma tagit ka au, ùh enh ka au broq bùa enh qnhèq ka wì haq, qnoh wì haq tacô, jêh cađac enh ngèa au kô.” **28** Atìq ka Chuaq Jesus tapoch qmang aih, haq lam enh ngoe ka wì, tōc ta Jerusalem. **29** Jò haq ten trùh ta plài Bêpha-jê xam plài Bêthani ajang wang Ôliu, haq thê deh baiq ngai tiaq hōc lam, **30** rai tanap: “Lam ta plài enh ngèa chôp qmat, Jò müt ta plài chôp hnoq mòeq toq lùa kon wì kàt, qnhòq lah i cabô kòe, caqnaih caxi dùi ahlài tacô ka au. **31** Tàng i cabô bòch chôp: gleq chôp majah caqnaih haq? Chôp doe: Chuaq i yiniq waq ka haq”. **32** Baiq ngai loh lam, glàm tìah ka bàu Chuaq Jesus khoe doe. **33** Jò qnang caqnaih lùa kon aih, cla mangai ban lùa aih bòch: Hagleq majah caqnaih lùa mat, **34** wa padreo bàu: Chuaq i yiniq waq. **35** Wa aih tiaq lùa aih ahlài ka Chuaq khoe èh yōc deh eo hlèch ta crōng lùa, dèch Chuaq tōc hangui enh qnhèq. **36** Jò Chuaq Jesus qnang tōc ti trong, bac ngai qyōc dèh eo hlèch ti trong lam. **37** Jò ten trùh criang Ôliu, dìq dōng mangai tiaq hōc manè pi cajaq, wì dêh bàu manè apôi Boc plình rìm trong halac wì haq ma khoe hnoq. **38** “Xôq ramot am ka

bùa trùh ma trùh enh dalam ka Yiniq Chuaq Kan catèm tanòe diac Plình, kan ra nhòm tanòe dìq jaq haqn hèq”

39 I bài mangai Pharsi oe ta mangai bac ta aih anoe ka Chuaq Jesus: Mangai hnài, ih tagàih bài mangai hòc tiaq ih qmat. **40** Chuaq Jesus padreo bàu: “Au doe ka pì, tàng joq wì qmat hatinh, bài hmo qmat èh hi cachech”. **41** Jò Chuaq Jesus haten ngan hnoq Jérusalem, haq hmoe ka Jérusalem. **42** Haq doe: “Au ngèh hì kô, gè loq yiniq cleq aràng am ka gè kan catèm, mahaq yiniq aih hì kô khoe gahnàp, mat gè ùh xau hnoq.” **43** Majah qmang aih i mòeq hì trùh ti gè, jò wì ma tagit ka gè boc lì wa wênh ka gè, dudan ka gè tap bè; **44** wì raliang jêh cađac dìq döng, xam cla xam wì kon ma oe taqne gè qmat. Wì ùh đòeq mòeq pliang hmo leq oe jah raxon enh qnhèq ka dabau, majah qmang aih, gè khoe ùh canau jò Boc plình trùh ti dađeh”. **45** Jò Chuaq Jesus mùt ta hamlang hnim kùh waiq, haq drùh qnoh döng bài mangai padro ta aih. **46** Haq doe: “I bàu achìh: Hnim au kô hnim waiq khàn, mahaq pì broq haq wìa pù atùng.” **47** Rìm hì haq hnài ta hnim kùh waiq. Bài pajàu kàn, bài mangai hnài ranenh xam bài gucraq gùng aih, chaq trong jêh đac haq; **48** Mahaq wì ùh qnì chaq trong leq, majah qmang aih dìq döng mangai ta aih ùh talic ka tamàng bàu haq.

20 I mòeq hì ta bài hì aih Chuaq Jesus qnang hnài wì tanòe hnim kùh waiq rai anoe ka wì trong Bàu lem, i bài pajàu kàn, bài mangai hnài ranenh, taqmùt ti bài gucraq trùh ta haq, **2** wì bòch: Anoe ka nhèn cwìang enh leq ih majah broq qmang kô, cabô ma am ka ih cwìang aih? **3** Haq padreo bàu: “Au hanoh bòch pì mòeq bàu. Drah

anoe ka au: **4** Baptem da Jon trùh enh Plình loq loh enh mangai? **5** Wì aih ta hatinh ka dabau: Tàng bèn doe: Trùh enh Plình, aih èh haq bòch bèn: Qmang aih gleq pì ma ùh lùi bàu haq? **6** Tàng bèn doe: Loh enh mangai, aih èh dìq ka mangai bac wì yōc hmo đàp bèn, majah qmang aih wì khoe lùi Jon aih joq mangai pajàu. **7** Qmang aih wì padreo bàu doe: Nhèn ùh qnì haq loh enh leq. **8** Chuaq Jesus doe: “Au hadai ùh doe ka pì loq cwìang enh leq au ma broq bòe yiniq kô.” **9** Haq alìah hloe ka wì qmang kô: “I mòeq ngai pìt mòeq wuàn plì nho, am ka wì broq axong wuàn nho aih khoe èh cla haq lam gùng hangai dùnh hì. **10** Trùh jò git plì, cla haq thê deh mòeq ngai hapōng trùh ta bài pìt nho hu ta axon yōc plì, mahaq bài mangai pìt nho jêh hapōng aih, hnan haq hlài tì dech. **11** Wì craq thê hapōng maqnoeq hòm, mahaq wì hadai jêh, hanip, èh hnan haq aih hlài tì dech. **12** Wì craq thê hapōng yàng piq, wì hadai jêh haq aih loh habau rai hnan đac. **13** Craq wuàn nho aih doe: Au broq qmang leq kô? Au thê deh kon calô au ma loq waq, lam, broq braiq wì camaih iu ka haq.” **14** Mahaq jò bài mangai pìt nho hnoq kon calô aih trùh, wì hatuàng ka dabau: Hatau mangai kon majah waq dōng kùng hang, beq bèn jêh cađac haq, aih èh kùng hang haq jah dōng bèn. **15** Wì hi khwênh qnōh haq enh gùng ka wuàn nho rai jêh cađac hloe. Aih èh craq wuàn nho broq cleq ka bài aih? **16** Haq trùh jêh dōng bài mangai pìt nho aih khoe èh yōc wuàn aih am ka mangai qnoeq abèq. Bài mangai ma tàng bàu aih wì doe: Boc Plình ùh i manaq taleq! **17** Chuaq Jesus ngan wì haq rai bòch: “Tàng qmang aih bàu ma achìh: Hmo mangai thòq broq hnim

cadac, Khoe wìa hmo mùm hnìm, bàu aih anoe cleq? **18**
Mangai leq ta clìh ta hmo kô èh, hech loh dàc, hmo kô
tùc troq cabô, mangai aih èh hech hoch döng. **19** Wop
jò aih, bài pajàu kàn xam bài mangai hnài ranenh chaq
trong jêh cadac haq, majah qmang aih wì loq bàu Chuaq
Jesus alìah aih anoe trùh wì haq raq. Mahaq wì ùh hùa ka
bài mangai bac ta aih. **20** Wì ti hanhoe ngan haq, wì thê
bài mangai ti rinh broq patìah mangai khôn khauq, đòeq
chaq trong hu goh haq ajang bàu tapoch, hu rùp haq am
ka bài mangai i cwìang, mangai gàu bài cwan. **21** Wì aih
bòch Chuaq Jesus bàu kô: Mangai hnài! Nhèn loq trong
bàu tapoch, trong hnài da ìh tiaq trong jang, ùh loq waq
tang ngai, yđc bàu joq qnàng đòeq hnài trong Boc plình.
22 Nhèn akhòh am thèq ka Sêsa ùh? **23** Mahaq Chuaq
Jesus loq ka manoh wì, haq doe: **24** “Am ka au ngan mđeq
đo-ni-ê beq, Kô ìq qmù cabô, yiniq cabô?” Wì padreo bàu:
Sêsa. **25** Haq doe ka wì: “Padreo da Sêsa yiniq cleq da
Sêsa, am da Boc Plình yiniq cleq da Boc Plình.” **26** Enh
ngèa mangai bac wì bahlac bàu haq ùh jah. Toq hamàih
ka bàu haq ta hatèu, wì hi loh ka hatinh. **27** I qnah ngai
Sadusê, aih bài mangai loq doe ùh i kan rìh hlài, wì trùh
haten ka Chuaq Jesus rai bòch: **28** Mangai hnài, Môise
khoé đòeq ka nhèn ranenh qmang kô: Tàng mangai i daq
yđc mai, khoe haq cachìt, ùh i đeh kon, mangai oh aih ep
yđc mai deh daq aih đòeq haqmot hlài xinoe ka daq haq.
29 Qmang aih, i tapèh ngai oh daq. Mangai daq ramua yđc
mai, èh cachìt qnhòq i kon. **30** Mangai hatìa yđc mai aih,
31 èh trùh mangai atìq, dìq döng wì tapèh ngai dìq yđc
mangai aih, wì dìq cachìt mahaq ùh lòm i kon. **32** Pulùch,

mangai cadrì aih hanoh cachìt. **33** Qmang aih èh trùh hì rìh hlài gucadrì aih broq mai cabô? Majah qmang aih dìq döng tapèh ngai aih hanoh khoe yōc gucadrì aih broq mai. **34** Chuaq Jesus doe: “Mangai qnhòng kô yōc őng yōc mai, (aiōn g165) **35** mahaq bài mangai ma khoe troq ka jah kan rìh hlài qnhòng atìq, jò rìh hlài enh kan cachìt, aih pi i yōc őng yōc mai hòm. (aiōn g165) **36** Majah qmang aih wì haq pi cachìt hòm, wì haq tìah ka bình plình, wì haq aih kon Boc Plình, aih kon da kan rìh hlài. **37** Mahaq da mangai cachìt rìh hlài aih Môise khoe am loq jò anoe hlài ùnh cheo ramù yila, jò haq doe Chuaq aih Boc Plình da Apraham, Boc Plình da Ysac, Boc Plình da Jacôp. **38** Haq ùh xài Boc Plình da mangai cachìt, mahaq da mangai rìh, majah qmang aih rìm ngai dìq rìh ka haq.” **39** I bài mangai hnài ranenh anoe ka haq: Mangai hnài, bàu ìh anoe dìq jaq troq. **40** Wì pi hùa bòch tam haq mòeq bàu leq hòm. **41** Khoe aih Chuaq Jesus bòch wì haq: “Hagleq wì ma doe Christ aih kon bùa Đawit? **42** majah qmang aih cla Đawit raq khoe anoe ta hset calêu plình rameh: Boc Plình doe ka Chuaq au: Hangui enh apah qma ka au, **43** Trùh jò au rùp mangai tagit ka ìh broq radua roh jènh ìh. **44** Đawit khoe crêu ka haq aih Chuaq, atìq ka aih haq wìa kon Đawit qmang leq?” **45** Jò dìq döng ka wì ta aih qnang tamàng, Chuaq Jesus doe ka mangai tiaq hōc: **46** “Ngan oq! bài mangai hnài ranenh, aih bài mangai enh toq caxùnh eo yôh, ti lam dauq hawàt, enh wì kùh gàu ka rađeh taqne chòq, ta hnim tagop enh toq hangui nòe yi haqnhèq, jò acaq yiniang enh toq hangui enh qnhèq; **47** waiq khàn broq deh waq ka yôh, mahaq lõnh apom hnim

gucadrì hadrô. Bài aih èh Boc plình taqmòq kan baxa ka wì haq yeo bac.”

21 Jò Chuaq Jesus haqmiang ngan, hnoq bài mangai padrõng tah bac ta hnim kùh waiq, **2** èh hadai hnoq mòeq ngai gucadrì hadrô tah baiq hliac bac. **3** Haq doe: “Joq qnàng au doe ka pì, mangai hadrô pa qmat tah yeo bac dõng ka wì qnoeq. **4** Majah qmang aih bài mangai padrõng tau tah toq bac rah, yàng mangai hadrô qmat joq nan pa, mahaq khoe tah dõng deh bac đòeq haq ban rađeh.” **5** I qnah ngai anoe trùh hnim kùh waiq, xam bài hmo lem xam bài dahwèq dèch ka Boc Plình. Chuaq Jesus doe: **6** “Tangèa kô èh, rìm yiniq pì ngan hnoq qmat èh taclìh dõng dìq pi oe i mòeq pliang hmo leq oe jah raxon crõng hmo leq. **7** Wì hi bòch haq: Mangai hnài, bài yiniq aih jò leq men trùh? I cleq pateo ka am ka mangai loq bài yiniq aih khoe ten trùh? **8** Haq padreo bàu: “Pì ngan oq! apaq dôq wì padô qnùt pì, majah qmang aih i bac ngai patìah yiniq au, trùh doe ka pì: Au kô raq Christ! Jò atìq lùch khoe ten trùh. Ùh dùh tiaq wì haq. **9** Jò pì tàng ràu trùh trong tajêh tablah, apaq yùq hrìn, majah qmang aih bài yiniq aih ep trùh adroe, mahaq kan atìq lùch qnhòq trùh hloe draq drình.” **10** Khoe aih haq anoe ka wì: “Gùng kô yòng tagit gùng tau. Diac kô tagit ka diac tau. **11** Èh i kan ralàng kàn, pangot hrah, xam bac kan jìq dài, i bài kan ramòt halac kàn oe ta trõc. **12** Mahaq adroe ka bài yiniq aih trùh, taiq yiniq au kô èh wì phù cròng majah ti canàt rùp baxa pì, aràng pì ta hnim tagop rai clêh pì, qnoh pì yòng enh ngèa ka bùa xam mangai broq craq cwan. **13** Aih đòeq pì yòng anoe dôq wì loq ka au. **14**

Qmang aih pì ep hmàng ta gàu, apaq lèt kô èh đeh anoe cleq hu aclai ka rađeh. **15** Majah qmang aih, i au am ka pì bàu capoch xam kan rabiaq đòeq mangai git ka pì ùh hlàt tablêq, ùh i trong hu goh pì. **16** Kô èh, ra-ùng haq, miq baq, daq oh, hadròng, trùh hloe bua cla pì hadai blòq pì, broq ka bac ngai taqne pì ep cachìt. **17** Taiq au kô èh rìm ngai majah git ka pì. **18** Mahaq mòeq hadrang xàc tagàu pì dua ùh hnhung. **19** Yòng ma cajap haq oq, aih èh pì jah kan rìh. **20** Jò pì hnoq bài lình canàt tap danh ka Jérusalem, aih pì loq kan raliang da haq khoe ten trùh. **21** Jò aih cabô oe ta gùng Juđê drah cadàu tōc tawang. Cabô oe ta plài drah ca dàu loh enh gùng. Cabô oe tagùng ùh dùh wìh mùt taplài. **22** Majah qmang aih bòe aih jò đòeq hu patem chau, dôq xít qmang ka rìm bàu khoe achìh. **23** Bài hì aih èh, habo ka mangai cadri oe jiang xam gucadri ta-ùq kon! I kan ranàc kèn, kan panòeh ka mangai gùng kô. **24** Wì haq cro enh qneq ka pla chang, èh wì rùp qnong wì haq lam broq dìc ta diac qnoeq. Èh mangai diac qnoeq jôiq padit Jérusalem, trùh jò da mangai diac qnoeq jah gêh. **25** Èh i kan halac ta mat mahì, mat khê xam bài halöng, bài mangai ta taneh loh ka mangò yùq crè majah qmang aih diac raxiq loh atêh tagruàng tagràt. **26** Jò aih kon mangai hnoq trong dù trùh ta cröng taneh, loh ka pi i qmòe mahua yiang, majah qmang aih bài cwìang ta tröc tì hadai ka dalàc. **27** Jò aih èh phù cròng ma hi hnoq Kon Mangai yōc cwìang yōc kan ranhòm kèn hangui taqne yùc plình hu trùh. **28** Jò bài yiniq kô bu trùh, drah yòng majang, gàu rai qngöc, hì baxon yōc ahlài pì trùh khoe ten **29** Haq alìah ka wì qmang kô: Pì ngan long pōc xam

bài long qnoeq; **30** jò haq plôh hamõng, pì hnoq qmang aih, pì loq đeh khoe ten trùh jò padrang. **31** Hadai qmang aih, jò hnoq khoe loh bài yiniq kô, aih pì loq diac Boc Plình khoe ten trùh. **32** Au anoe qnàng ka pì, nang noe kô ùh lùch adroe ka bài yiniq aih trùh. **33** Plình crõng taneh kô èh hnhung, mahaq bàu au anoe kô èh ùh jò leq hnhung. **34** Qmang aih ep wèq rađeh, yùq èh trong acaq ôq, trong bù bia xam kan loq lèt taqnhòng kô broq ka manoh pì loh ka pi hmàng, èh hì aih trùh tapì tìah taiq ka jeo gùp; **35** majah qmang aih, hì aih hadai trùh ka rìm ngai oe ta crõng taneh. **36** Qmang aih pì ep hamang rai waiq khàn yôt, dôq pì jah puplech ka bài kan ranàc aih, hu jah yòng enh ngèa Kon mangai.” **37** Rìm hì haq hnài ta hním kùh waiq, rìm mang haq tõc ta wang Oliu kùi padài ta aih. **38** Èh bu qngah bài mangai bàc khoe trùh ta hním kùh waiq hu tamàng bàu haq.

22 Hì Ramènh Bênh ùh tah blo, aih la hì ramènh Pancwa.
2 Bài pajàu kàn xam bài mangai hnài ranenh chaq trong hu jêh cađac Chuaq Jesus, majah qmang aih wì ùh hùa ka mangai bàc ta aih. **3** Kiac Satan khoe mùt enh dalam ka Juda, ma creo Icari-ôt, haq hadai mangai oe ta Mòeq jàt baiq ngai, **4** haq lam chaq bài mangai pajàu kàn xam bài craq lình ma wèq hním kùh waiq, haq ta hatinh ti wì hu chaq trong leq đòeq rùp Chuaq Jesus am ka wì. **5** Wì aih manè pi cajaq, dìq ka wì wiang òq bàu am ka haq bac. **6** Haq khoe mòeq manoh ka wì, chaq jò hatroq hu rùp Chuaq Jesus am ka wì, mahaq ùh dôq mangai bàc loq. **7** Trùh hì Ramènh acaq bênh ùh tah blo, hì aih ep jêh kon trùu broq tadreo hì ramènh Pancwa, **8** Chuaq Jesus thê

xam Phiero xam Jon lam rai tanap: “Lam padon ka bèn acaq ramèn Pancwa.” **9** Wa aih doe: ìh enh nhèn padon ramèn aih taleq? **10** Haq padreo bàu: “Jò chôp mùt taplài, hnoq mòeq ngai wê abôq diac, chôp drah tiaq haq aih mùt ta hnim, **11** chôp doe ka craq hnim aih, Mangai hnài nhèn doe ka ìh: Aniang kàn nòe au acaq ramèn pajùm deh ti mangai tiaq hõc oe taleq? **12** Craq hnim aih hi patô am ka chôp mòeq adùq kàn oe enh qnhèq, ta aih rìm yiniq khoe palauq qmòe, pì padon ta aih”. **13** Wa aih hi lam, joq qnàng wa glàm tìah ka bàu Chuaq Jesus khoe doe, wa hi padon ramèn Pancwa ta aih. **14** Trùh jò, Chuaq Jesus xam bài mangai tiaq cla hangui acaq ti haq. **15** Haq doe: “Au dìq jaq enh acaq ramèn Pancwa kô ti pì adroe ka au chìuq xalep. **16** Majah qmang aih, au pi acaq ramèn kô hèm trùh hì ramèn aih jah gêh ta diac Boc Plinh”. **17** Khoe aih haq dèch doe chrõng, manè apôi, hi khoe haq doe: “Yõc chrõng kô pì qnèp ka dabau. **18** Majah qmang aih au doe ka pì, pang kô ta èh au pi ôq diac plì nho kô hèm trùh jò leq diac Boc Plinh jah trùh”. **19** Khoe aih, haq yõc bênh, manè apôi, khoe èh goh bênh axong am ka mangai tiaq hõc, rai doe: “Kô chac au, khoe am ka pì, pì broq qmang kô hu hmàng trùh au.” **20** Acaq hi khoe, hanoh qmang aih, haq yõc chrõng qnèp ka mangai tiaq hõc rai doe: “Doe chrõng kô aih tajao maneo oe ta mahim au, mahim khoe ta ùc qnöh am ka pì... **21** Mahaq tì kõng da mangai ma padon blòq au hadai oe ta cabõng kô ti tì au. **22** Kon Mangai kô èh lam, tìah ka bàu khoe thê. Mahaq haþo ka mangai ma blòq haq.” **23** Mangai tiaq hõc bòch dabau, taqne wì haq mangai leq ma broq trong

aih. Mangai tiaq hōc tarahen **24** Mangai tiaq hōc tarahen ti dabau, đòeq hu ngan mangai leq ta wì haq èh majah broq yeo kàn dōng. **25** Chuaq Jesus doe ka wì: “Bài bùa diac wì yōc deh cwìang enh cla đòeq hu hmet mangai qnoeq, bài mangai broq gāu yōc cwìang padit mangai qnoeq, mahaq creo ka rađeh aih mangai broq lem. **26** Mahaq pì ùh dùh qmang aih, taqne pì mangai leq ma yeo kàn ep tìah qmang ka mangai yeo qyoh, mangai leq broq gāu ep broq tìah ka mangai patìh. **27** Majah qmang aih moeq ngai haqngui acaq xam moeq ngai yòng patìh mangai maleq ma yeo kàn? Axài mangai haqngui acaq loq ùh? Mahaq oe taqne pì au tìah ka mangai patìh. **28** Pì bài mangai ma khoe cajap manoh yòng ti au jò wì tah hadrah ka au, **29** aih èh au am ka pì diac au, tìah ka Baq au ma khoe am ka au, **30** dōq pì jah acaq ôq pajùm ti au ta diac au, jah hangui ta gèq hu hadrah mòeq jàt baiq xinoe Isorali. **31** Simôn, Simôn! Kiac Satan khoe bac yàng bòch ùm ìh tìah ka ùm qmau. **32** Mahaq au khoe waiq khàn ka ìh, dōq manoh lùi ìh ùh hìaq capòch. Qmang aih, jò ìh khoe hwi hlài, drah broq ka cajap manoh oh daq”. **33** Phiero doe: Chuaq au! yac ka wì rùp clêh au, yac ka au cachìt, dua au tiaq ìh. **34** Chuaq Jesus padreo bàu: “Phiero, au doe ka ìh, hì kô èh, adroe ka ia rōng ìh khoe piq yàng hangah đeh ùh qnì ka au.” **35** Khoe aih Chuaq Jesus bòch wì haq: “Jò au thê pì lam ùh wê bac, bau, ùh i qmòe ka jep, pì ahìaq thìuq cleq ùh?” Wì padreo bàu: ùh hìaq! **36** Haq doe ka wì: “Mahaq manòeq kô, tàng pì i bac, wê beq, maleq i bau, hadai qmang aih. Maleq ùh i ka chang, lam tech eo yôh qmat đòeq hu rot. **37** Majah

qmang aih, kô au anoe ka pì loq, i bàu khoe achìh rameh: wì alùh haq pajùm ti bài mangai dù. Bàu aih ep xít trùh ka au. Joq qmang aih, rìm yiniq khoe patô trùh au qnang jah xìt.” **38** Mangai tiaq hốc doe: ìh ngan kô, nhèn i baiq pla chang. Haq doe: “Toq aih khoe qnang lem.” **39** Khoe aih, Chuaq Jesus tōc ta wang Ôliu, qmang ka haq ma loq lam dèh yôt, bài mangai tiaq hốc lam tiaq deh haq. **40** Jò khoe trùh nòe, haq doe ka mangai tiaq hốc: “Waiq khàn beq, dôq pì ùh hìaq taclìh ta kan padô qnùt. **41** Khoe aih haq lam yeo hangai bu mòeq atèm hmo, rai hacùn cràng rai waiq khàn **42** rameh: “Waiq Baq! Tàng joq lem manoh ìh, dèch chrõng kô khoe ka tì au. Hnoq doe qmang aih apaq dì manoh au mahaq tiaq manoh ìh.” **43** I mòeq bìnhanh plình loh enh plình trùh jang haq, tam padren ka haq. **44** Jò dìq jaq mangò aih, haq waiq khàn yeo criaq hòm, pa-ùh haq loh tìah qmòe ka mahim, catôh ta taneh. **45** Hêq ka waiq khàn haq wìh hlài ajang nòe bài mangai tiaq hốc hnoq wì kùi pi hmàng ta kan mangò. **46** Haq bòch wì: “Hagleq pì majah kùi? Drah yòng beq hu waiq khàn dôq pì ùh hìaq cìlh ta kan padô qnùt.” **47** Jò haq oe raq anoe, mòeq calùh mangai trùh, Juđa haq hadai oe ta mòeq jàt baiq ngai, lam qmòe adroe hu qnong wì. Juđa trùh ka haten hìp Chuaq Jesus. **48** Mahaq Chuaq Jesus bòch haq: “Juđa, ìh blòq cađac Kon mangai xi mòeq qmang hìp kô raq qmòh?” **49** Jò mangai tiaq Chuaq Jesus hnoq khoe padon loh yiniq, wì bòch: Nhèn yōc chang nhèn jêh khòh ùh? **50** I mòeq ngai ta bòe mangai tiaq hốc jêh mangai hapõng pajàu haqnheq, pot catech da haq aih don pah qma. **51** Mahaq Chuaq Jesus doe: “Hêq pi dùh broq qmang

kô.” Èh Haq yōc tì bèq don mangai aih rai broq brêh. **52**
Khoe aih Chuaq Jesus tapoch ka bài pajàu kàn, bài cwan
wèq hnim tagop xam bài gucraq ma lam rùp haq “Pì wê
chang, wê long lam rùp au tìah ka lam rùp mangai atùng.
53 Rìm hì au oe ti pì tanòe hnim kùh waiq, pì ùh rùp au.
Mahaq manðeq kô jò da pì, jò da diac clam cluiq”. **54**
Khoe aih wì hi rùp Chuaq Jesus, qnong haq trùh hnim
mangai pajàu haq nhèq, Phiero ti taqyoe enh hangai. **55**
Jò aih i qnah ngai patep ùnh qne hamlamg, wì hangui
qnhìa ùnh ti dabau, Phiero hadai hangui ti wì aih. **56** I
mòeq ngai hapōng cadri hnoq Phiero hangui qnhìa ùnh,
haq chrih ngan ka haten rai doe: Mangai kô hadai mòeq
bua ti haq tau. **57** Mahaq Phiero hangah: Mangai cadri
meh, au ma i loq ka haq aih. **58** Atìq ka aih mòeq ahyàc, i
mangai qnoeq hnoq Phiero, haq doe: ìh hadai taqmùt ti
haq tau. Phiero doe: Cleq kô! Au ùh i taqmùt ti wì aih. **59**
Jah mòeq jò atìq ka aih, i mangai qnoeq hòm doe: Cleq
kô, hi loq ka mangai taqmùt ti haq tau, majah qmang
aih ìh kô mangai Galili. **60** Phiero padreo bàu: Mangai
kô! Au ùh qnì tàng ìh doe cleq. Jò Phiero qnang anoe,
ia rōng hloe jò aih raq. **61** Chuaq Jesus hwi enh rù rai
ngan tajang ka Phiero. Aih Phiero ma hi hmàng hlài bàu
haq ma khoe doe ka rađeh: “Hì kô èh, adroe ka ia rōng,
ìh khoe piq yàng hangah đeh ùh loq ka au.” **62** Haq hi
loh enh gùng rai hmoe ua ac. **63** Bài mangai ti rap ngan
Chuaq Jesus halê rai jêh haq; **64** wì bàng mat haq raih
bòch: Tapoch pajàu beq! cabô jêh ìh! **65** Wì hnap ka haq
bàc trong qnoeq hòm. **66** Qngah sroq eh, bài gucraq gùng
aih xam bòe mangai pajàu kàn hloe xam bài mangai hnài

ranenh, wì tagop ti dabau, thê qnoh Chuaq Jesus loh enh
ngèa wì haq. **67** Wì doe: Tàng joq ìh qmat Christ, ìh drah
anoe ka nhèn beq! Haq padreo bàu: “Yac ka au doe cleq,
dua pì ùh lùi, **68** tàng joq au bòch pì, aih dua pì ùh tèu
bàu. **69** Mahaq pang kô ta èh, Kon mangai hi hangui pah
qma cwìang itai Boc Plình”. **70** Rìm ngai wiang bòch:
Tàng qmang aih ìh qmat ma kon Boc Plình qmòh? Haq
padreo bàu: “Pì raq khoe doe au kon haq” **71** Khoe aih wì
doe: Bèn ep gòm cabô anoe cleq ka bèn hòm? Bèn khoe
tàng qmòe bàu enh cla haq qmat raq.

23 Khoe aih dìq dõng mangai wiang tah hadrah padinh
yòng aràng haq trùh enh ngèa Philat. **2** Wì tapoch bàu
hu taqmòq yiniq lui ka haq: Nhèn khoe hnoq mangai
kô patùt mangai bèn broq ùh troq, ùh lòh am thèq ka
Sêsa, haq doe rađeh kô Mêśia, aih la bùa. **3** Philat àu bòch
haq: Ìh kô ajoq bùa mangai Juđa? Chuaq Jesus padreo
bàu: “Joq qmang ka bàu ìh khoe doe”. **4** Philat doe ka
bài pajàu kèn xam dìq ka mangai ta aih: Au ùh i hnoq
qmòe mangai kô i yiniq lui cleq. **5** Mahaq dua wì àu waq
ka jah: Haq kô baxrùq dìq ka mangai ta gùng Juđa xi
bàu haq hnài. Haq baxèm qmòe enh gùng Galili trùh
hloe ta kô. **6** Tàng bàu aih, Philat bòch: mangai kô ajoq
mangai Galili? **7** Jò Philat khoe loq Chuaq Jesus oe tanòe
cwìang bùa Hêrot, hi aràng haq trùh ta bùa Hêrot, jò
aih bùa Hêrot hadai oe ta Jérusalem. **8** Jò Hêrot hnoq
Chuaq Jesus, haq manè pi cajaq, majah qmang aih haq
ngèh ka jah hnoq Chuq Jesus khoe dùnh. Haq khoe tàng
wì anoe trùh Chuaq Jesus, haq enh hnoq kan halac. **9**
Hêrot bòch bac trong, mahaq Chuaq Jesus ùh tèu. **10** Bài

pajàu kàn xam mangai hnài ranenh yòng ta aih, chaq trong taqmòq yiniq lui ka haq nhang haraya. **11** Jò aih Hêrot xam bài lình haq, ngan Chuaq Jesus ùh loh cleq, toq ti halê haq, caxùnh ka haq eo yôh lem khoe hi padreo ahlài da Philat. **12** Nèh haq, wa Philat wa Hêrot tagit ka dabau, mahaq pang hì aih wa hi loh ka hatroq. **13** Philat creo ka bài pajàu kàn xam bài cwan hadrah xam dìq ka mangai ta aih oe mòeq nòe, **14** haq doe ka wì: Pì aràng ka au mangai kô pì doe haq baxrùq wì hu yòng tablêq ka Sêsa; enh ngèa ka pì au khoe ti bòch haq, au ùh hnoq haq i yiniq lui cleq tiàh bàu pì ma anoe; **15** yac ka bùa Hêrot hadai, majah qmang aih, hacô haq khoe padreo ahlài mangai kô ka bèn, pì hanoh hnoq. Mangai kô ùh i yiniq lui cleq ma troq ka cachìt, **16** qmang aih au thê wì blai haq khoe èh hi caqnaih haq **18** Dìq ka wì wiang cachech: Jêhcadac mangai kô, caqnaih da nhèn Baraba! **19** (Baraba aih mangai pagàu yòng tablêq ka Sêsa, haq i jêh đac mangai.) **20** Philat enh caqnaih Chuaq Jesus, haq majah bòch hòm wì. **21** Mahaq kiang wì cachech cadêh: Tiang đinh haq talong pagat beq! Tiang đinh haq talong pagat beq! **22** Philat doe hòm yàng piq: Mahaq mangai kô khoe broq cleq ma dù? Au ùh i hnoq haq i qmòe yiniq lui cleq ma troq ka cachìt. Qmang aih au blai haq khoe èh caqnaih haq. **23** Mahaq dua wì àu cachech cadêh: Ep tiang đinh haq talong pagat; bàu cachech wì haq jah blêq. **24** Philat hi thê broq tiaq qmang ka bàu wì bòch. **25** Philat caqnaih mangai haq ma khoe clêh, aih mangai jêh đac mangai rai baxrùq wì yòng tablêq ka Sêsa, tiaq bàu wì bòch, khoe aih am Chuaq Jesus ka wì haq tiaq manoh

wì ma enh. **26** Jò bài lình qnong Chuaq Jesus lam, hnoq mòeq ngai gùng Siren, yiniq haq Simôn hlài enh ruàng. Wì rùp haq aih thê xùi long pagat lam atìq ka Chuaq Jesus. **27** Raya mangai lam tiaq Chuaq Jesus, i qnah ngai gucadri rai tuc dèh nòeh rai crò hmoe ka haq. **28** Chuaq Jesus hwi ngan rai doe ka wì haq: “Yôiq bài kon gucadri Jérusalem, ùh dùh hmoe dèh ka au, hmoe ka cla pì xam bài kon pì. **29** Majah qmang aih ta ngèa kô èh jò pì ma hi doe: Xôq ramot ka gucadri xon, xôq ramot ka cliac ma ùh lah hauang xam tôh ma ùh lah ta-ùq! **30** Jò aih èh wì doe ka bui wang: Ta-ùc enh qnhèq ka nhèn kô beq! doe ka go: Gùp enh qnhèq ka nhèn beq! **31** Tàng joq wì broq bài yiniq aih ka long rìh, long croh èh qmang leq?” **32** Wì hadai qnong baiq ngai qnoeq hòm, wa aih mangai atùng, đòeq hujêh pajùm ti haq. **33** Jò wì khoe trùh tanòe wì ma creo go Cadôh, ta aih wì tiang đình haq talong pagat ti wa mangai atùng – mòeq ngai apah qma, mòeq ngai apah qngeo. **34** Mahaq Chuaq Jesus waiq khàn: “Waiq Baq! ìh caqnaih da wì yiniq lui, majah qmang aih wì ùh qnì rađeh broq cleq.” Khoe èh, wì pàih panàih hu ngan maleq majah eo haq. **35** Wì mangai bac yòng haqmiang ngan ta aih. Wì mangai ma i cwìang do halê haq. Wì doe: Haq khoe dèch mangai qnoeq, tàng joq haq qmat Mêisia Boc Plình ma khoe ràih, dôq cla haq doeh rađeh beq! **36** Bài lình hadai racaih blìa ka haq, lam haten ka haq yōc diac panhòq am haq ôq, **37** rai doe rameh: Tàng ìh joq bùa Juđa, doeh rađeh beq! **38** Enh qnhèq ka gàu haq wì achìh: Mangai kô bùa Juđa. **39** Mòeq ngai atùng wì ma tiang đình hadai hnap ka haq; ìh qmat ùh xài Christ qmòh? Dèch rađeh

beq khoe aih dèch nhèn diq! **40** Mahaq mangai matau lech ka mangai aih, haq doe: ìh hadai khoe qmang qmat, gleq ma ùh crè ka Boc Plình **41** Da ba kô, khoe troq tiaq kan taq atoq, kan baxa ba ùh i qngwan ka trong dù ba broq, mahaq mangai kô haq ùh lah broq qmèo yiniq cleq ma qmèq. **42** Khoe èh, haq doe: Chuaq Jesus! jò ìh hlài dèh diac Plình, hmàng trùh au diq. **43** Chuaq Jesus doe ka haq: “Joq qnàng au doe ka ìh, hì kô raq ìh jah oe ta au ta Parađi.” **44** Jò aih wop qne hì, dìq ta gùng aih loh döng ka clam trùh hloe piq jò dixèq. **45** Mat mahì loh ka clam cluiq, èh bai prình ta hnim kùh waiq loh ka dahit broq baiq apah. **46** Chuaq Jesus creo cadêh: “Baq! au qnèp deh mahua yiang ta tì kõng ìh.” Atìq ka bàu aih, haq hi pat hi hèm. **47** Cla craq bài lình hnoq qmang aih, haq dèch bàu manè apôi Boc Plình, haq doe: Kô joq mangai taq atoq joq qnàng! **48** Dìq döng bài mangai lam ngan, wì hnoq qmang aih wì rai hlài rai tùc deh rada. **49** Mahaq bài mangai canau ka Chuaq Jesus xam bài mangai gucadri ma khoe tiaq haq enh gùng Galili, dìq yòng enh hangai hu haqmiang ngan. **50** I mòeq ngai yiniq haq Jôsep, hadai broq cwan hadrah, haq aih mangai taq atoq. **51** haq ùh mòeq manoh èh haq ùh wiang jò wì ma hadrah Chuaq Jesus. Haq oe ta Ari-mathê, gùng Juđê, toq tangèh ka diac Boc Plình. **52** Haq lam ta Philat bòch yōc hanang Chuaq Jesus. **53** Jò khoe qnöh hanang Chuaq Jesus enh long pagat, haq yōc bai lòm hanang, taqngùi hanang ta trom ralùng wì khoe pùng đòeq tanòe hmo kàn. Ralùng aih qnhòq lah tah cabô. **54** Hì aih hì padon, èh hì sabat khoe ten trùh. **55** Bài mangai gucadri khoe lam ti Chuaq Jesus

enh gùng Galili, tiaq Jôsep hu ngan ralùng rai ngan wì ta qngùi hanang Chuaq Jesus qmang leq. **56** Wì haq wìh hlài ta hñim, padon diac jreo xam dàu xua thùm. Mahaq hì sabat, tiaq deh ranenh wì haq padài.

24 Hì baxèm tuàng lè, buqngah bài mangai gucadri wê diac jreo xam dàu xua thùm wì haq ma khoe palauq aràng trùh ta ralùng. **2** Wì haq hnoq hmo padit qngah ralùng khoe cadro taqnoeq; **3** mahaq, mùt enh dalam ùh hnoq hanang Chuaq Jesus. **4** Wop jò wì haq qnang hamàih trong kô, i baiq ngai calô caxùnh eo tìah ka camlet, loh yòng enh ngèa wa haq. **5** Wa haq qnang crè dìq jaq, toq kùp hadrò ta haqneq, wa aih doe: Hagleq pì majah chaq mangai rìh tanòe mangai cachìt? **6** Haq pi oe tacô, haq khoe rìh hlài. Hmàng hlài beq, jò oe ta Galili haq doe ka pì qmang leq? **7** Haq khoe doe: “Kon mangai mùt ta tì kõng mangai yiniq lui, wì tiang đinh haq talong pagat, hì piq haq hi rìh hlài.” **8** Aih wì men hmàng hlài bàu Chuaq Jesus ma khoe anoe. **9** Jò wì haq wìh hlài enh ralùng hanang, wì haq anoe hlài yiniq kô ka mòeq jàt mòeq ngai tiaq cla, xam dìq ka wì qnoeq. **10** Bài gucadri aih: Mari-madolen, Jano, Mari miq da Jaco xam bài gucadri qnoeq, ma hadai i lam, wì aih anoe hlài yiniq kô am ka bài mangai tiaq cla Chuaq Jesus. **11** Mahaq wì ùh lùi bàu bài mangai gucadri aih anoe, majah qmang aih bàu wì haq tìah taiq ka bàu tapoch hwang. **12** Hnoq doe qmang aih, Phiero yòng cadàu tûh loh ta ralùng, haq kùp chri ngan, hnoq toq bai lom hanang oe jang aih, khoe aih haq hi hlài rai hamàih ta manoh ka bìac aih. **13** Hì aih raq, i baiq ngai hadai tiaq hõc, qnang ti trong trùh ta plài

Em-mau, enh aih trùh ta Jêrusalem tadràu jàt Êtado; **14**
wa hatuàng ka dabau bài yiniq neo loh khoe toq leq hì
kô. **15** Jò wa haq qnang ta anoe rai hatinh ka dabau, cla
Chuaq Jesus trùh rai lam ti wa. **16** Mahaq mat wa haq
ùh canau ka Chuaq. **17** Haq bòch wa aih: “Jò chôp lam ti
trong ìq, chôp qnang ta anoe ka dabau cleq?” Wa aih
hi yòng, hadrò wa mangò dìq jaq. **18** Ta wa aih i mòeq
ngai yiniq haq Clê-oba, bòch haq: Ahìaq toq ìh kô raq
qmòh, mangai enh gùng hangai trùh ta Jêrusalem ma
ùh dùh ka loq yiniq neo loh ta aih bu baiq piq hì kô? **19**
Haq bòch wa: “yiniq cleq aih?” Wa aih doe: Aih Chuaq
Jesus, mangai gùng Naxaret, haq aih mangai pajàu itai
enh yiniq broq trùh bàu capoch, enh ngèa Boc Plình xam
enh ngèa kon mangai; **20** ùh qnì hagleq bài pajàu kàn
xam bài cwan hadrah majah rùp haq am ka wì jêh đac, èh
tiang đình haq talong pagat. **21** Nhèn ngèh haq aih èh
raq mahu dèch mangai Isorali, nhèn oe ngèh ùh hnau ka
aih hòm, yiniq kô loh khoe piq hì kô. **22** Taqne nhèn, i bài
mangai gucadri broq ka nhèn hamàih, sroeh sroq kô wì
haq lam ta ralùng, **23** mahaq chaq ùh hnoq hanang haq.
Wì aih hlài doe ka nhèn i bìn plình loh doe haq khoe rìh
hlài. **24** Khoe aih i bua nhèn lam trùh ta ralùng hnoq rìm
yiniq tìah ka bàu bài gucadri khoe anoe, cla haq aih ùh
hnoq. **25** Chuaq Jesus doe ka wa haq: “Chôp kô joq ùh qnì,
hagleq majah adia ka lùi dìq ka bàu wì pajàu ma khoe
anoe! **26** Ùh joq Mangai Mêisia ep xalep qmang aih, khoe
aih men jah deh kan ranhòm qmòh?” **27** Khoe aih, haq
yoc qmòe enh Môise trùh dìq döng bài pajàu hu anoe dôq
wa loq dìq döng bàu ta hset hadròeh, aih dìq anoe trùh

haq. **28** Jò ten trùh ta plài wì haq ma ta-en lam, Chuaq Jesus tìah gleq enh lam tam yeo hangai. **29** Mahaq wa aih àu padràng haq, wa aih doe: ìh oe tacô ti ma, majah qmang aih tröc khoe ten clam. Qmang aih, haq hi oe ti wa. **30** Jò haq hangui acaq ti wa, haq yōc bênh, manè apôi, khoe èh goh axong ka wa. **31** Wa hi tapèch mat, canau ka haq, yàng aih haq khoe hnhung hnhaiq. **32** Wa doe ka dabau: ìq haq jò oe ti trong, haq capoch tuàng ti ba rai anoe bahloh hset Hadröeh, ma ùh joq manoh ba tôq tìah qmòe ka ùnh qmòh? **33** Jò aih raq, wa drah yòng, wìh hlài ta Jérusalem, glàm mòeq jàt mòeq ngai tiaq cla xam bài mangai tiaq hōc maqnoeq qnang tagop ti dabau, **34** wa doe: Hi loq! Chuaq Jesus khoe rìh hlài, haq khoe mahno rađeh ka Simôn. **35** Khoe aih wa hi anoe yiniq wa khoe hnoq ti trong, qmang leq wa ma khoe canau ka Chuaq Jesus jò haq goh bênh. **36** Mangai tiaq hōc qnang anoe ti dabau, cla Chuaq Jesus loh taqne wì haq rai doe: “Catèm am ka pì.” **37** Bài mangai tiaq hōc haglènh, tarìt tariang, majah qmang aih wì haq xoh đeh hnoq kiac chöc. **38** Haq doe: “Gleq pì majah yùq, gleq pì majah ùh lùi qmang qmat? **39** Ngan jènh tì au, joq au raq. Pì bèq au beq, ngan beq, kiac chöc ùh i ka xech akia, ùh i ka caxènh, mahaq au i.” **40** Jò haq anoe qmang aih, haq patô dèh xam tì xam jènh ka wì aih hnoq. **41** Mahaq bài mangai tiaq hōc lem bùi hrìn, wì loh ka hamàih qnhòq dai lùi, haq hi doe ka wì: “Tacô pì i cleq acaq ùh?” **42** Mangai tiaq hōc qnèp ka haq haqnech ka bùh. **43** Haq hi yōc acaq enh ngèa ka wì. **44** Khoe aih, haq doe: “Kô raq yiniq au khoe anoe ka pì loq jò au ma oe ti pì: Rìm yiniq ta ranenh Môise,

xam bài pajàu xam hset calêu plình khoe achìh trùh au ep waq ka gêh”. **45** Khoe aih, haq pèh gàu ngoc wì, aih wì ma hi loq ka bàu Hset hadròeh. **46** Haq doe ka wì: “I bàu achìh: Mangai Mêisia ep xalep qmang aih, trùh hì piq haq hi rìh hlài enh kan cachìt, **47** aih èh wì hi yǒc Yiniq Haq hu lam anoe ka rìm ngai, rìm diac dôq wì loq raxach đòeq hujah caqnaih yiniq lui, patep enh Jérusalem. **48** Pì lam anoe hlài yiniq aih, kô èh Au am ka pì yiniq Baq au ma khoe tèu, **49** mahaq pì ep oe gồm ta Jérusalem trùh jò pì jah caxùnh cwìang itai loh enh qnhèq.” **50** Khoe aih haq qnong bài mangai tiaq hõc trùh nòe haten ka plài Bêthani, haq dèch tì am xôq ramot ka wì. **51** Qnang jò am xôq ramot, haq hi talah ka wì rai jah dèch tõc ta plình. **52** Mangai tiaq hõc kùh waiq haq, khoe aih wì wìh hlài ta Jérusalem rai lem bùi dìq jaq. **53** Mangai tiaq hõc oe yôt ta hnìm kùh waiq, manè apôi Boc Plình.

JON

1 Baxèm i Bàu, Bàu aih oe ti Boc Plình, èh Bàu aih raq Boc plình. **2** Haq oe ti Boc Plình enh jò baxèm. **3** Rìm yiniq khoe jah broq loh enh haq, ùh i yiniq cleq ma i đeh enh gùng ka haq. **4** Ta haq i kan rìh, èh kan rìh aih raq kan qngah am ka kon mangai. **5** Kan qngah sreo ta clam mahaq kan clam ùh waq kan qngah. **6** I moeq ngai Boc Plình thê haq trùh, yiniq haq Jon. **7** Haq trùh hu anoe panhìn ka kan qngah aih, dôq mangai lùi đeh hra. **8** Cla haq aih ùh xài kan qngah, mahaq anoe am ka kan qngah. **9** Kan qngah kô, aih raq joq kan qngah joq qnàng, jò haq trùh crõng taneh kô sreo qngah ka rìm ngai. **10** Bàu aih oe crõng taneh kô, crõng taneh kô loh enh haq, crõng taneh kô ùh canau ka haq. **11** Haq khoe trùh ta gùng cla, mahaq wì ta aih ùh waq ka haq. **12** Mahaq waq toq cabô hi lùi haq, aih haq hi am ka mangai aih cwiang đòeq hu wìa kon Boc Plình. **13** aih bài mangai ùh xài loh enh mahim jan, ùh xài loh enh õng mai, enh manoh mangai, mahaq loh enh Boc Plình. **14** Bàu khoe wìh wìa xech akia, oe ta qne bèn, bình halùih kan tabàih xam trong joq qnàng, bèn khoe haqmiang hnoq kan ranhòm haq, joq kan ranhòm da Kon mòeq loh enh Baq. **15** Jò anoe trùh Haq, Jon dêh bàu doe: Kô raq Mangai au khoe ràu trùh jò au doe: Haq mangai trùh atìq ka au, mahaq ùh hnau ka au, majah qmang aih haq i adroe ka au. **16** Aih ìq, jao kan bình halùih ta haq bèn majah kan tabàih yeo bac hòm. **17** Majah qmang aih, ranenkhoe paqnoh enh Môise, yàng kan tabàih xam trong joq qnàng aih trùh enh Jesus Christ. **18** Qnhòq i cabô hmaq hnoq Boc Plình, enh gùng ka Kon mòeq oe ta

manoh Baq, Haq aih raq Mangai mahnu Baq am ka bèn.

19 Kô bàu Jon paqnoh, jò mangai Juđa thê bài mangai pajàu, bài mangai Lêwi enh Jérusalem trùh bòch haq: ìh kô ìq cabô? **20** Haq tapoch hloh ùh hangah moeq nà cleq, doe rađeh ùh xài Christ. **21** Wì bòch hòm: qmang aih ìh qmat kabô? ìh qmat Êli ùh xài? Haq padreo bàu: Ùh xài! ìh qmat pajàu ùh xài? Haq padreo bàu: Ùh xài. **22** Wì hi bòch: Qmang aih ìh kô ìq cabô? Dôq nhèn loq đòeq nhèn hu anoe hlài ka mangai ma thê nhèn lam. ìh doe rađeh cabô? **23** Haq padreo bàu: Au kô bàu mangai creo ta gùng hawit: “Pajang trong ka Chuaq.” **24** Bài mangai wì ma thê trùh ta Jon, aih dìq mangai Pharisi. **25** Wì bòch clò hòm: Tàng joq ìh ùh xài Christ, ùh xài Êli, ùh xài pajàu, òq hagleq ìh ma jah broq baptem ka wì? **26** Jon doe: Au broq baptem xi diac, mahaq i moeq ngai oe ta qne pì mahaq pì ùh canau. **27** Aih raq Mangai trùh atìq ka au, au qnhòq tajì ka jah broq mangai kùp doeh caxi jep haq. **28** Bài yiniq kô dìq loh ta gùng Bêthani, apah tau cròng diac Jôđan, nòe Jon broq baptem. **29** Trùh hì atìq, Jon hnoq Chuaq Jesus trùh ti rađeh, haq doe: Hatau, Kon triù da Boc Plình, Mangai ma hu dèch dǒng yiniq lui ta cròng taneh! **30** Haq qmat raq mangai au ma khoe doe i Mangai trùh atìq ka au, mahaq yiloe ka au, majah qmang aih haq i adroe ka au. **31** Cla au ùh qnì ka Haq, mahaq au khoe trùh broq baptem xam diac dôq Haq jah mahnu qnoh ka mangai Isorali. **32** Jon anoe am hòm: Au khoe hnoq Yiang Hadròeh enh plình tìah ka trù loh jràp Haq. **33** Au joq ùh qnì ka Haq, mahaq Yiang ma thê au broq baptem xi diac i doe ka au rameh: Mangai ìh ma hnoq Yiang Hadròeh

loh jràp oe ti haq, aih raq Mangai broq baptem xi Yang Hadròeh. **34** Au khoe hnoq, au majah doe: Haq aih raq kon Boc Plinh. **35** Hì da èh rameh, Jon oe ta aih ti baiq ngai tiaq hòc haq. **36** Hnoq Chuaq Jesus pagat trong aih, haq doe: Hatau, Kon trùu Boc Plinh. **37** Baiq ngai tiaq hòc tàng bàu aih, wa hi lam tiaq Chuaq Jesus. **38** Chuaq Jesus wìh ngan, hnoq wa aih lam tiaq dađeh, haq bòch: “Chôp chaq cleq?” Wa aih padreo bàu: Rabi (aih mangai hnài). Ìh oe ta leq? **39** Chuaq Jesus tèu wa: “Lam ngan beq!” Wa aih hi lam, hnoq nòe Chuaq Jesus oe, wa haq hi oe ti haq, jò aih qnah ta pôn jò di xèq. **40** Wa baiq ngai ma tàng bàu Jon doe, èh lam tiaq hloe haq, aih moeq ngai yiniq haq Anrê, oh Simôn Phiero. **41** Angoe aih, haq lam chaq deh daq haq aih Simôn, haq hi anoe: Nhèn khoe glàm Mêsi (Mêsi aih Christ). **42** Haq hi qnung Simôn trùh ti Chuaq Jesus. Bu hnoq Simôn, Chuaq Jesus doe: “Ìh kô Simôn kon Jôna, pang kô èh jah creo ka ìh Sêpha” (aih Phiero). **43** Trùh hì atìq hòm, Chuaq Jesus tòc ta gùng Galili, chaq Philip, haq creo: “Drah tiaq au.” **44** Philip aih oe gùng Bêtsai-đa, moeq gùng ka wa Anrê wa Phiero. **45** Philip chaq Natha-naên, haq doe: Nhèn khoe hnoq Mangai Môise ma achìh ta hset ranenh nèh, bài pajàu hanoh ràu trùh, aih Chuaq Jesus mangai ta Naxaret, kon da Jôsep. **46** Natha-naên bòch: A lah i cleq ma wìa loh enh gùng Naxaret ùh? Philip doe: Trùh ngan beq. **47** Jò Chuaq Jesus hnoq Natha-naên trùh ti dađeh, haq doe: “Kô, majoq mangai Isorali joq qnàng, enh dalam ka haq ùh i qmòe mòeq yiniq cleq jùh jùn”. **48** Natha-naên bòch: Enh leq ìh ma jah loq ka au? Chuaq Jesus padreo bàu:

“Adroe ka Philip creo ka ìh, au khoe hnoq ìh jò ìh oe anòe xèm long póc. **49** Natha-naên hi doe: Rabi! ìh kô joq kon calô Boc Plình! **50** Chuaq Jesus doe: “Au khoe doe au hnoq ìh oe anòe xèm long póc ìh majah lùi, kô èh ìh jah hnoq trong ùh hnau ka aih. **51** Haq anoe hòm: “Joq qnàng, au anoe dìq ka pì, kô èh pì jah hnoq plình tapèch, xam bàì bình plình Boc Plình tōc loh ajang Kon mangai.

2 Piq hì atìq ka aih, i wì acaq yiniang ta Cana, trong gùng Galili, miq da Chuaq Jesus i mat ta aih. **2** Chuaq Jesus xam mangai tiaq hōc hanoh jah akhen. **3** Jò wì bu dìq ka alac, miq Chuaq Jesus doe ka haq: Wì pi i ka alac! **4** Chuaq Jesus padreo bàu: “Mangai gucadri meh, yiniq cleq ka ba? Jò da au qnhòq lap trùh! **5** Miq Haq tanap ka bàì mangai patih: Haq i thê cleq, pì broq tiaq dìq dōng. **6** Ta aih i tadràu toq padri hmo, padon đòeq hu qnheo jènh ka mangai Juda, moeq toq jah padam ùh ta dràu jàt lit diac. **7** Chuaq Jesus thê wì ùc diac bình ta aih, wì ùc bình trùh ta ngah. **8** Chuaq Jesus doe: “Manòeq pì qmùc diac qmat beq, aràng am ka mangai ma ngan acaq ôq hì kô”. Wì hi qnàng ka haq aih. **9** Jò haq aih ôq diac khoe wìa alac (haq ùh qnì alac kô loh enh leq, toq mangai patih ma i qmùc diac aih ma loq) haq creo ka cla kon ống, **10** rai doe: Da mangai qnoeq qnoh alac jiāng adroe, jò wì ôq khoe bàc, èh qnoh alac qnang lem. Da ìh kô aih don đòeq alac jiāng trùh manòeq. **11** Aih iq oe ta Cana, gùng Galili, Chuaq Jesus baxèm broq trong halac, rai mahno kan ranhòm dàđeh, bàì mangai tiaq hōc hi lùi haq. **12** Khoe aih, Chuaq Jesus xam miq haq xam bàì oh daq haq xam mangai tiaq hōc, dìq loh ta Cabênaum, wì oe ta aih

biaq hì raq. **13** Hì ramènh Pan cwa da mangai Juđa khoe ten trùh, Chuaq Jesus tōc ta Jérusalem. **14** Tanòe hamlang hnem kùh waiq, haq hnoq bài wì qnang tapadro: bo, trìu, trù, qnah mangai qnoeq hòm qnang hangui ti halìh bac jèn. **15** Chuaq Jesus đênh moeq hadrang long roe caxi, haq hnan qnoph dōng enh gùng ka nòe hnem kùh waiq, xam bo xam trìu, ùc cađac bac mangai ma padro bac jèn, hacùp hloe da wì aih cabōng. **16** Haq doe ka mangai atech trù: “Qnoph ma dìq bài cleq qmat loh enh gùng ka nòe kô, apaq broq ka hnem Baq au loh nòe padro baxen. **17** Mangai tiaq hōc hmàng hlài i bàu ma khoe achìh: “Kan nhet dèh ka hñim Baq khoe bùh cheo au”. **18** Bài mangai Juđa rahan ka haq: ìh broq qmang qmat, ìh i dôq nhèn hnoq kan halac leq ùh, đòeq nhèn ma hu loq ìh cwìang broq qmang kô? **19** Chuaq Jesus padreo bàu: “Raliang hnem kô beq! Piq hì raq, au hi paqnàng hlài”. **20** Mangai Juđa doe: Wì broq hnem kùh waiq kô dìq qmòe pôn jàt tadràu hanam, aih ìh ma doe ra đeh dèch haq piq hì raq? **21** Mahaq hñim kùh waiq Chuaq Jesus ma anoe aih chac cla haq. **22** Khoe ka Chuaq Jesus rìh hlài enh kan cachìt, mangai tiaq hōc hèm hlài haq i anoe bàu aih, aih wì ma hi lùi bàu hset hadròeh xam bàu Chuaq Jesus ma khoe tapoch. **23** Hì ramènh Pan cwa, Chuaq Jesus qnang oe ta Jérusalem, bàc ngai hnoq kan halac haq broq, wì hi lùi yiniq haq. **24** Mahaq Chuaq Jesus ùh dôq rađeh mùt ta ti kõngwì, majah qmang aih haq loq ka manoh rìm ngai. **25** Ùh ep i cabô doe, majah qmang aih haq loq đeh rìm yiniq oe ta manoh mangai.

3 Taqne bài mangai Pharisi, i moeq ngai yiniq haq Nicôđem, haq aih hanoh broq craq wèq mangai Juda. **2** Damang, mangai kô trùh ti Chuaq Jesus haq doe: Rabi, nhèn loq ìh kô mangai hnài trùh enh Boc Plình, majah qmang aih bài trong halac ìh ma khoe broq, tàng joq Boc Plình ùh oe moeq qmang, ùh i cabô broq jah. **3** Chuaq Jesus padreo bàu: “Joq nàng, joq qnàng, au doe ka ìh, ùh i mangai leq jah hnoq Diac Plình, tàng joq mangai aih ùh ha-uang lauq moeq yàng hòm. **4** Nicôđem bòch: Mangai khoe craq, ha-uang lauq qmang leq ma oe jah? Haq wìa ka oe jah mìt ta cliac miq đòeq hu ha-uang lauq moeq yàng hòm? **5** Chuaq Jesus doe: “Joq qnàng au doe ka ìh, ùh i mangai leq jah mìt Diac Boc Plình, tàng joq mangai aih ùh canòm ka diac xamYiang Hadròeh đòeq ha-uang lauq. **6** Xech akia ha-uang loh xech akia, mahaq Yiang ha-uang loh yiang. **7** Ùh dùh hamàih bàu au anoe ka ìh: Pì ep ha-uang lauq moeq yàng hòm. **8** Cayeo enh taleq haq hlui tameh, pì tàng atêh, mahaq pì ùh qnì cayeo trùh enh leq, haq lam taleq. Mangai leq ha-uang loh enh Yiang Hadròeh hadai qmang aih”. **9** Nicôđem bòch: Broq qmang leq majah qmang aih? **10** Chuaq Jesus padreo bàu: “Ìh qmat mangai hnài mangai Isorali, laiq ìh ma ùh qnì tàng bàu aih? **11** Joq qnàng, joq qnàng au doe ka ìh: nhèn anoe trong nhèn loq, nhèn patô trong nhèn khoe hnoq, mahaq dua pì ùh dì yōc bàu nhèn khoe anoe patô. **12** Tàng joq au anoe ka pì trong oe crōng taneh kô, dua pì qnhòq lùi, loq ka au anoe ka pì yiniq ma oe ta plình, aih pì lùi qmang leq majah? **13** Qnhòq i cabô tōc ta plình, enh gùng ka Mangai ma loh enh plình, aih raq Kon mangai ma oe

dèh ta plình. **14** Nèh haq Môise dèch paqnàng bìh tanòe hawit croh crênh qmanag leq, Kon mangai èh hadai ep wì dèch paqnàng haq qmang aih diq, **15** mahaq waq toq cabô hi lùi haq, hi jah kan rìh halinh mòeq đòe. (aiōnios g166) **16** Pàng Boc plình loq waq ka crōng taneh, loh qmòe ka khoe am dèh Kon moeq cla haq, đòeq cabô lùi Kon aih ùh hìaq raliang hnhung mahaq jah kan rìh halinh mòeq đòe. (aiōnios g166) **17** Aih ìq, Boc Plình khoe thê dèh Kon haq loh crōng taneh kô, ùh xài đòeq hu tah kan hadrah ka crōng taneh, mahaq đòeq ka crōng taneh kô canòm ka Kon aih hujah dèch. **18** Cabô hi lùi haq mangai aih pi ep pòq kan hadrah hòm, cabô ùh lùi khoe pòq qmòe kan hadrah, majah qmang aih pàng haq ùh lùi yiniq Kon mòeq Boc Plình. **19** Kan hadrah aih rameh: Kan qngah khoe trùh crōng taneh, mahaq kon mangai bêh kan clam cluiq ùh hnau ka kan qngah, majah qmangai yiniq wì haq broq dìq qmèq. **20** Mangai broq qmèq, dìq git ka kan qngah, ùh hùa thia ta kan qngah, yùq yiniq đeh khoe broq loq pi hlèp. **21** Mahaq mangai leq rìh tiaq bàu joq qnàng aih, haq trùh ti kan qngah, dôq dìq dōng yineq haq khoe broq jah paqnoh majah qmang aih haq khoe broq enh ngèa ka Boc Plình. **22** Khoe aih, Chuaq Jesus xam bài mangai tiaq hòc lam trùh ta gùng Juđa, haq oe ta aih ti wì, rai broq ɓaptem. **23** Jò aih Jon hanoh broq ɓaptem ta Ênon, haten ka Salim, majah qmang aih ta aih bac diac, wì bac ngai trùh hu jah broq ɓaptem. **24** Jò aih wì qnhòq rùp clêh haq. **25** Mangai tiaq hòc Jon i tarahen ka mangai Juđa trong ramènh basròeh. **26** Wì lam anoe ka Jon rameh: Rabi, hatau mangai ma oe ti ìh pah tau

cròng diac Jôđan, mangai ìh ma khoe ràu trùh, manðeq haq qnang broq baptem, mangai trùh đeh hra ta haq. **27**
Jon doe: Tàng joq ùh xài enh plình am, ùh i cabô jah cleq.
28 Cla pì raq ma khoe wiang tàng bàu au doe: Au kô ùh xài Christ, mahaq au kô khoe jah thê lam enh ngèa haq.
29 Cabô neo yōc mai, aih raq cla kon ǒng, bòe bua haq oe ten aih tàng bàu haq, jò wì jah tàng bàu cla kon ǒng wì dìq jaq lem bùi, aih raq kan lem bùi da au. **30** Haq aih jah padèch ka haqnhèq, au kô èh ep paqnoh đac ta haqneq.
31 Mangai trùh enh qnhèq, haq aih yeo haqnhèq dìq dōng rìm trong, mangai loh enh taneh, haq aih da taneh, haq tapoch hadai tìah ka mangai loh enh taneh. Mangai loh enh plình, haq aih ma yeo nhèq dìq dōng rìm trong. **32**
Haq anoe trong haq ma khoe hnoq khoe tàng, mahaq ùh i cabô dì bàu haq. **33** Mangai leq khoe rùp bàu haq, mangai aih hadai wiang panhìn ka cajap bàu Boc Plình aih joq qnàng. **34** Majah qmang aih Mangai Boc Plình ma khoe thê, haq aih trùh anoe toq bàu Boc Plình, majah qmang aih Boc Plình khoe am ka haq Yiang Hadròeh oe i jaq cleq. **35** Baq loq waq dèh Kon, khoe qnèp dìq dōng rìm yiniq ta tì Kon. **36** Mangai leq lùi Kon, jah kan rìh halinh mòeq đòe, mangai ùh lùi Kon, ùh i hnoq kan rìh taleq, mahaq kan mahau nòeh da Boc Plình oe raq enh qnhèq ka mangai aih. (aiōnios g166)

4 Jò Chuaq Jesus hìa bàu doe mangai Pharsi i tàng haq creo broq baptem jah bac ngai ùh hnau ka Jon, **2** (Ùh xài cla Jesus, ma joq qnàng aih mangai tiaq hốc haq). **3** Chuaq Jesus cađac gùng Judê wìh hlài ta Galili. **4** Jò aih, haq ep pagat trong Samari. **5** Qmang aih, Haq trùh ta

mòeq plài gùng Samari, plài aih wì creo Sikha, haten tanède taneh Jacôp ma am ka Jôsep aih kon haq. **6** Ta aih i moeq toq diac adràm Jacôp, khoe lep ka trong hangai Chuaq Jesus hangui haten ka adràm aih, jò aih khoeqne hì. **7** Mòeq ngai gucadrài samari loh qninh diac. Chuaq Jeus doe: “Am au ôq diac. **8** (Bài mangai tiaq hōc khoe mùt ta plài đòeq chaq rot dahwèq acaq). **9** Mangai cadrài aih padreo bàu: Ùih! ìh qmat mangai Juđa, gleq ma jah bòch ôq da au diac (majah qmang aih mangai Juđa ùh taqmùt ka mangai Samari). **10** Chuaq Jesus doe: “Tàng joq ìh maloq ka yiniq Boc Plinh ma khoe am, rai loq ka magai ma doe ka ìh: Am au ôq đeh diac aih cabô, aih ìh khoe bòch haq am ka ìh ôq, aih èh haq aih hi am ka ìh diac kan rìh.” **11** Mangai gucadrài aih doe: Wì Craq! ìh ùh i cleq đòeq hu qmùc, diac adràm kô aih jrùq, ìh jah diac rìh aih enh leq? **12** Kan cadraq nhèn aih Jacôp khoe đòeq hlài ka nhèn diac adràm kô, cla haq hanoh ôq adràm kô, hloe xam bài kon xau haq, hloe xam bài kùng hang haq ban, ìh ma yeo kàn ùh hnau ka Jacôp? **13** Chuaq Jesus padreo bàu ka haq: “Cabô ôq diac kô dua oe raq croh ranöng, **14** mahaq mangai leq ôq diac au am, mangai aih èh pi jò leq croh ranöng hòm. Diac au ma am aih èh wìa tamöc plöh enh chac mangai aih trùh ta kan rìh halinh mòeq đòe.

(aiōn g165, aiōnios g166) **15** Mangai gucadrài aih doe: Wì Craq, ìh am ka au diac aih diq, dôq au ùh hìaq croh ranöng, dôq au pi hìaq ep lam qmùc diac ta kô hòm. **16** Chuaq Jesus doe ka haq: “Lam beq! creo ka öng ìh, khoe aih wìh hlài ta kô.” **17** Mangai gucadrài aih doe: Au ùh i ka öng. Chuaq Jesus anoe hòm: “ìh doe đeh ùh i ka öng aih joq khoe

troq, **18** ìh khoe padam yàng yōc ǒng, mahaq mangai yàng kô aih ùh xài ǒng ìh, ma aih joq ìh khoe tapoch dèh joq qnàng. **19** Mangai gucadri aih doe: Wì Craq, au hnoq ìh kô mangai pajàu joq qnàng. **20** Kan kadraq nhèn khoe kùh waiq tanèe bui wang kô, yàng da mangai Juđa aih doe nòe ma troq ka kùh waiq aih oe ta Jérusalem. **21** Chuaq Jesus doe ka mangai gucadri: “Drah lùi bàu au, hi trùh jò èh, pì kùh waiq Baq, ùh xài ta bui wang kô, hanoh ùh xài ta Jerusalem. **22** Pì kùh waiq bàiyiniq pì ùh qnì, nhèn kùh waiq yiniq nhèn ma khoe loq, majah qmang aih kan dèch loh enh mangai Juđa. **23** Mahaq jò mahi trùh, manðeq kô khoe trùh, jò wì mangaima kùh waiq joq qnàng yōc manoh xam bàu joq qnàng đòeq kùh waiq, aih raq bài mangai kùh waiq Baq ma enh. **24** Boc Plinh aih Yeang, cabô kùh waiq haq ep yōc manoh xam bàu joq qnàng đòeq kùh waiq. **25** Mangai gucadri doe: Au loq, Mangai Mêsi (aih bèn creo Christ) ep trùh, jò haq trùh, haq hi anoe rìm trong am ka bèn. **26** Chuaq Jesus doe: “Au, mangai qnang capoch ti ìh, au kô raq Mangai aih”. **27** Jò aih, wì mangai tiaq hōc hlài hi trùh, wì haq haglènh jò wì hnoq Chuaq Jesus capoch tuàng ti mangai gucadri, mahaq ùh i mangai leq bōch: ìh anoe ka haq qmat yiniq cleq? Ùh meh hagleq ìh majah hatuàng ti haq? **28** Mangai gucadri aih hi đòeq đac dèh abôq ta aih wìh mùt ta plài, doe ka wì ta aih: **29** Drah loh ngan, i mòeq ngai khoe anoe dōng da au rìm trong au ma khoe broq, aih ma ùh xài Christ qmòh? **30** Wì hi loh enh plài trùh ti Chuaq Jesus. **31** Mahaq, wì mangai tiaq hōc ti àu yôt haq: Rabi, ìh acaq diq. **32** Haq padreo bàu: “Au i dèh dahwèq đòeq

hu ban rađeh mahaq pì ùh qnì. **33** Aih ìq, mangai tiaq hōc majah bōch dabau: Ahìaq i mangai leq khoe aràng ka haq dahwèq acaq ùh xài? **34** Chuaq Jesus doe: “Dahwèq acaq da au aih broq tiaq manoh Mangai ma khoe thê au trùh, rai pagêh da haq yiniq broq. **35** Ma ùh xài pì doe oe pôn khê ònh èh men trùh jò gat qmòh? Mahaq au doe ka pì: “Haqmiang beq! rai ngan ta ruàng khoe dùm yrùng dōng, oe toq hu gat raq. **36** Mangai gat khoe yōc dèh kùng baha rai don đđeq qmau ta kan rìh halinh mòeq đđe, đđq xam mangai rai adrech xam mangai gat hadai jah lem bùi ti da bau. (**aiōnios g166**) **37** Kô èh wì jah doe: “Mangai kô rai, mangai tau gat, aih joq khoe wop. **38** Au khoe thê pì trùh gat tanòe pì ùh i abèq, mangai qnoeq ma khoe broq, pì mùt ta aih toq yōc haqnauq padren mangai qnoeq” **39** I bac ngai Samari ta aih lùi haq, tiaq bàu mangai gucadri ma doe: Haq qmat khoe anoe dōng rìm trong au ma khoe broq. **40** Qmang aih, bài mangai Samari ma khoe trùh ti haq, àu thê haq mùt padài dèh ta plài, Haq padài ta aih baiq hì. **41** Jò khoe tàng bàu haq, mangai lùi haq rai bac tam. **42** Wì aih doe ka mangai gucadri: Kô pi oe xài enh bàu ìh ma khoe anoe am ka nhèn taleq, nhèn ma lùi, manòeq kô nhèn khoe tàng qmòe enh cla haq, èh nhèn loq haq kô joq Mangai hu dèch đìq crōng taneh kô. **43** Atìq ka aih baiq hì Chuaq Jesus loh enh aih lam ta Galili. **44** (Aih ìq cla Haq raq khoe doe mangai pajàu ùh i jò leq jah mangai gùng cla manè). **45** Jò khoe trùh ta gùng Galili, wì gùng aih đìh haq đìq dèh ka manoh, majah qmang aih wì gùng aih khoe hnoq rìm yiniq Haq broq ta hì ramènh jò oe ta Jêrusalem, majah qmang aih

wì aih hanoh i lam hàu hì ramènh aih. **46** Haq trùh ta plài Cana, ta gùng Galili, nòe Haq ma khoe broq diac hangeo wìa alac. Oe ta plài Cabênaum, i moeq ngai cwan kàn, kon calô haq aih hinìq. **47** Cwan aih tàng doe Chuaq Jesus enh gùng Judê khoe trùh ta Galili, haq drah trùh chaq rai creo dang Chuaq Jesus loh ta hnem rađeh hu haqnauq dèh kon haq khoe ten cachìt. **48** Chuaq Jesus doe: “Tàng joq pì ùh hnoq kan halac, kan hamàih, ùh jò leq pì lùi”. **49** Cwan aih doe: Wì Craq, au canòm đeh ka ìh loh ta hním au jò kon au qnhòq hìaq cachìt! **50** Chuaq Jesus doe ka haq: “Lam beq, kon ìh rìh.” Mangai aih lùi bàu Chuaq Jesus khoe anoe ka rađeh, haq hi lam. **51** Jò haq oe raq lam titrong, wì mangai hapõng loh đìh haq, wì doe: Kon calô ìh khoe rìh. **52** Haq bòch wì aih kon haq khoe blinh jò leq. Wì aih padreo bàu: Hì nèh, jò mòeq jò, kan tanget khoe brêh. **53** Mangai baq aih kanau loq aih raq jò Chuaq Jesus doe ka haq: Kon ìh rìh, pang aih haq aih xam dìq ka wì ta hnem hi lùi. **54** Aih kan halac yàng baiq Chauaq Jesus broq, Jò haq tawìh enh gùng Judê hlài ta Galili.

5 Khoe aih, i mòeq hì ramènh ta wì mangai Juđa, Chuaq Jesus tòc ta Jérusalem. **2** Jò aih ta Jérusalem, haten ka qmang Triù, i moeq toq hlõng, bàu Hêbru creo Bêtetda, dudan ta aih i padam toq qmang. **3** Bác haraya bài mangai yinìq, mangai ùh xau hoq, mangai angwenh, mangai pen kùi ta aih, (rap gồm jò diac lai laq), **4** majah qmang aih i moeq bìnhanh plinh dùnh dùnh loh lai laq diac ta hlõng aih, jò diac khoe lai laq, mangai leq loh ta hlõng adroe, yac ka haq yinìq qmang leq dua brêh). **5** Ta aih i moeq ngai ùh hrõc khoe piq jàt rahem hanam. **6** Chuaq Jesus hnoq haq

aih caqnùng, loq ka haq aih yinìq khoe dùnh, Haq doe:
“Ìh i enh brêh ùh? **7** Mangai yinìq aih padreo bàu: Wì
Craq! au ùh i đeh ka mangai hu wiang caqnìh qnoh au ta
diac. Jò au qnang ti àu loh đeh, i mangai qnoeq khoe loh
adroe ka au. **8** Chuaq Jesus doe: “Drah yòng, dèch da ìh
hadòng qmat lam beq.” **9** Wop hloe jò aih raq, mangai
aih jah brêh. Hì aih hanoh wop hì Sabat. **10** Bì ma broq
gàu mangai Juđa tapoch ka mangai ma khoe jah brêh: Kô
xài hì Sabat, tiaq troq ranenh ìh ùh khòh xùi hadòng lam
qmang qmat. **11** Haq padreo bàu ka wì: Cla mangai ma
broq ka au brêh thê: Dèch da ìh hadòng qmat lam beq. **12**
Wì bòch haq: Mangai ma thê dèch da ìh hadòng qmat
lam beq, haq aih ìq cabô? **13** Mahaq mangai khoe jah
broq brêh aih haq pi qnì qmòe ka cabô, majah qmang aih
Chuaq Jesus khoe alùh pajùm ti bài mangai cràm jang aih
raq. **14** Atìq ka aih, Chuaq Jesus hnoq haq aih tanèe hñim
kùh waiq hi doe ka haq: “Meh oq, ìh khoe brêh pi dùh
broq yiniq lui hòm, beq loq i yiniq cleq mèq trùh ti ìh.”
15 Haq aih lam anoe ka mangai Juđa: Hatau raq Chuaq
Jesus mangai khoe broq rađeh jah brêh. **16** Aih ìq, dài
mangai Juda majah tirùp baxa Chuaq Jesus, majah qmang
aih haq broq yiniq kô hi Sabat. **17** Mahaq Chuaq Jesus doe
ka wì aih: “Baq au abroq trùh manđeø kô, au kô hadai
broq qmang aih diq. **18** Ajang aih raq mangai Juđa majah
chaq trong hu jêh đac hloe haq, ùh xài aq toq poh hì
Sabat hi hêq, yàng haq oe doe Boc Plình aih Baq rađeh
rai broq ka rađeh daq dàng ka Boc Plình. **19** Chuaq Jesus
hi anoe ka wì haq: “Joq qnàng, joq qnàng, au anoe ka pì,
Kon ùh broq đeh cleq jah, Kon broq toq yiniq cleq kon

hnoq dèh Baq broq, Kon hadai broq tiaq qmang aih. **20**
Baq loq waq ka kon rai mahno dìq dōng rìm yiniq Baq
broq: Baq oe mahno tam ka Kon yiniq kàn ùh hnau ka bài
yiniq broq kô hòm, dôq pì hu hamàih. **21** Hanoh, qmang
ka Baq broq mangai cachìt rìh hlài rai am kan rìh ka wì
aih qmang leq, Kon kô èh hadai am kan rìh ka mangai
kon ma enh qmang aih diq. **22** Baq hadai ùh hadrah ka
cabô, mahaq khoe dôq dìq ka Kon cwìang hadrah, **23**
đòeq dìq dōng rìm ngai jah dèch kan ranhòm ka Kon,
tìah ka wì ma padèch kan ranhòm ka Baq. Mangai leq ùh
dèch kan ranhòm ka Kon, aih haq ùh dèch kan ranhòm
ka Baq, aih Mangai ma khoe thê Kon trùh. **24** Joq qnàng,
joq qnàng, au doe ka pì, mangai leq tàng bàu au, èh lùi
Mangai ma khoe thê au, mangai aih jah kan rìh mòeq
đòe, ùh hìaq ep trùh tanòe hadrah, mahaq khoe claih
enh kan cachìt đòeq trùh ta kan rìh. (*aiōnios g166*) **25** Joq
qnàng, joq qnàng, au anoe ka pì, tangèa kô èh, manòe kô
hanoh khoe troq jò, jò bài mangai cachìt hujah tàng bàu
Kon Boc Plinh, mangai jah tàng aih èh hi jah rìh. **26** Tìah
troeq Baq i kan rìh enh dalam, Baq hadai khoe am ka Kon
i kan rìh enh dalam qmang aih. **27** Baq khoe am dìq dōng
cwìang đòeq hu hadrah ta tì Kon, majah qmang aih Kon
kô Mangai. **28** Ùh dùh hamàih dèh trong aih, kô èh jò
wì ma oe ta ralùng tàng bàu haq, wì jah loh enh aih, **29**
mangai leq broq trong lem aih èh rìh hlài đòeq hu jah
kan rìh, mangai leq khoe broq dù, aih èh rìh hlài đòeq
hu jah kan hadrah. **30** Cla Au ùh broq cleq ma hlàt, au
hadrah tiaq au trong tàng, qmang aih kan hadrah au aih
taq toq, majah qmang aih au ùh chaq trong manoh cla

ma enh, mahaq chaq trong Mangai ma khoe thê au. **31**
Tàng joq au capoch panhìn ka cla rađeh, bàu panhìn aih
ùh wìa ka pì lùi dèh. **32** I mangai qnoeq capoch panhìn
am ka au, èh au loq bàu haq aih anoe khòh lùi. **33** Pì khoe
thê mangai trùh ti Jon, haq khoe anoe panhìn ka pì trùh
bàu joq qnàng. **34** Da Au hòm, bàu panhìn au jah ùh xài
trùh enh kon mangai, mahaq au anoe qmang aih, dôq pì
jah dèch. **35** Jon aih, tìah ka hadreo khoe bùh khoe qngah,
kan qngah đò aih lem manoh pì, pì hyòq ajang nòe qngah
haq aih. **36** Mahaq i mòeq bàu capoch panhìn trùh au,
bàu aih yeo haqnhèq ùh hnau ka bàu Jon, majah qmang
aih trong leq Baq khoe thê, au broq gêh, bài yiniq au
broq aih patô am ka pì loq Baq khoe thê au. **37** Cla Baq,
aih Mangai ma khoe thê au, hanoh wiang panhìn am ka
au. Pì qnhòq hmaq tàng bàu Haq, qnhòq lah hnoq hadrò
Haq, **38** èh bàu Haq ùh oe enh dalam ka pì, majah qmang
aih pì ùh lùi Mangai Haq ma khoe thê trùh. **39** Pì chèh
chaq ta hset Hadròeh, pì hèm dèh canau ajang aih majah
kan rìh halinh mòeq đòe: Aih Hset hadròeh mahno trùh
au. (aiōnios g166) **40** Pì ùh enh trùh ti au đòeq hu jah kan
rìh! **41** Au ùh chaq kan ranhòm loh enh kon mangai, **42**
mahaq au loq enh dalam pì ùh i ka kan loq waq ka Boc
Plinh. **43** Au khoe trùh tacô enh dalam ka yiniq Baq au, pì
ùh waq ka au. Tàng joq i mangai qnoeq yōc dèh yiniq cla
haq hu trùh ti pì, aih èh pì ma đih yōc haq. **44** Pì toq enh
canòm kan ranhòm dabau, ùh chaq kan ranhòm trùh enh
Boc Plinh, qmang aih thê pì lùi qmang leq majah. **45** Apaq
hèm au yòng enh ngèa Baq đòeq patô da pì yiniq lui,
mangai ma yòng patô da pì yiniq lui aih Môise, mangai pì

ma tangèh canòm. **46** Aih ìq, tàng joq pì lùi bàu Môise, pì hadai lùi bàu au, majah qmang aih bàu haq ma khoe achih aih, haq achih trùh au. **47** Mahaq tàng joq pì ùh lùi bàu haq, pì lùi bàu au qmang leq?

6 Atìq ka aih toq biaq, Chuaq Jesus tōc apah tau diac raxìq Galili, (nòe kô aih haqmai gùng Têbiriat, **2** Moeq calùh mangai bàc haraya tiaq haq, majah qmang aih wì aih hmaq hnoq bàc trong halac haq broq brêh ka bài mangai yinìq. **3** Mahaq, Chuaq Jesus tōc ta wang, hangui ta aih ti bài mangai tiaq hōc. **4** Hì ramènh Pancwa da mangai Juđa khoe ten trùh. **5** Jò Chuaq Jesus haqmiang ngan hnoq wì aih qnang thia ta haq, haq doe ka Philip: “Bèn chaq rot bênh taleq đòeq hu am ka wì acaq?” **6** Haq bòch qmang aih hu nhro ngan Philip, majah qmang aih ta manoh haq khoe loq đeh padon broq cleq. **7** Philip padreo bàu: Yōc baiq hrinh đō-ni-ê, rot bênh dua ùh rìm mòeq ngai toq biaq. **8** I mòeq ngai tiaq hōc yiniq haq Anrê, oh Simôn doe: **9** Hacô i mòeq ngai kon calô qyoh, i padam toq bênh mi xam baiq pliang ka qyêq, mahaq mangai bàc qmang qmat i jàp pang leq? **10** Chuaq Jesus doe: “Thê wì hangui”. Tanèo aih bàc nhat, wì hi hangui. Jah qnah ta padam muàn mangai. **11** Chuaq Jesus yōc bênh manè apôi Boc plinh, khoe aih axong am ka bài mangai hangui, haq hadai yōc baiq pliang ka axong am ka wì, mac ka cabô enh toq leq toq meh. **12** Jò đìq ka wì khoe panàc, haq thê mangai tiaq hōc: “Ti toch hlài bòe rah, apaq cađac yac ka toq xít.” **13** Mangai tiaq hōc toch hlài haqnech rah padam toq bênh atìq ka wì khoe panàc jah mòeq jàt baiq rajo. **14** Wì ta aih, hnoq kan halac Chuaq Jesus broq, wì doe ka

dabau: Kô raq Pajàu! mangai mahu loh ta cröng taneh. **15**
Chuaq Jesus loq ka wì enh trùh đòeq pa-àu rađeh broq
bùa, Haq wia enh aih, tōc oe đeh mòeq ngai ta wang. **16**
Jò mat mahì khoe ten clìh, mangai tiaq hōc loh ta haqmai
diac. **17** Wì loh ta boang pajang tōc pah tau, ngèa qnah
ta plài Cabêna-um. Trōc khoe clam mahaq Chuaq Jesus
qnhòq trùh ti wì haq. **18** Cayeo hlui tagruàng tagràt, diac
lai laq dêh pi cajaq. **19** Jò aih wì chùng boang khoe jah
qnah ta baiq jàt padam ùh piq jàt êta-đo, hnoq Chuaq
Jesus lam tiriang diac, ten trùh ti boang, wì loh ka crè
crep. **20** Mahaq Chuaq Jesus doe: “Kô raq Au, apaq yùq.”
21 Jò aih mangai tiaq hōc hi đìh Chuaq Jesus tōc boang
ti wì, draq drìngh lloe jò aih boang khoe trùh tago wì
ma padon lam. **22** Hì atìq, bài mangai bàc oe tago patau
hlōng hnoq mòeq toq boang ta aih raq, loq Chuaq Jesus
ùh i tōc tabooang ti bài mangai tiaq hōc, toq mangai tiaq
hōc lam ka rađeh. **23** Khoe aih i biaq toq boang enh Têbi-
ri-at trùh tanòe bài wì ma acaq bênh atìq ka Chuaq Jesus
ma manè apôi Boc plình. **24** Wì hnoq Chuaq Jesus ùh i
oe ta aih, mangai tiaq hōc hadai ùh hnoq, wì drah loh
taboang hu lam ta Cabêna-um đòeq chaq Chuaq Jesus. **25**
Jò wì bu hnoq Chuaq Jesus tago apah tau diac, wì bòch
Haq: Rabi! ìh trùh tacô jò leq? **26** Chuaq Jesus doe: “Joq
qnàng Au doe ka pì, pì ti chaq au ùh xài taiq pì khoe
hnoq trong halac au khoe broq, mahaq taiq pì khoe jah
acaq bênh ka panàc. **27** Apaq abroq hu chaq toq dahwèq
acaq hi dìq hi hnhung, mahaq chaq dahwèq ma oe hloe
mòeq đòe. (aiōnios g166) **28** Khoe aih wì bòch Haq: Nhèn ep
broq qmang leq men jah broq yiniq Boc plình ma thê? **29**

Chuaq Jesus doe: “Yiniq broq da Boc plình thê, aih pì lùi Mangai Boc plình ma khoe thê haq trùh.” **30** Wì bòch haq: “Tàng joq qmang aih, ìh broq trong halac leq dôq nhèn hnoq đòeq nhèn hu lùi? Kô èh ìh broqcleq? **31** Boc yaq nhèn nèh khoe acaq mana oe ta gùng hawit, tìah ka bàu khoe achìh: Haq am ka wì acaq bênh enh plình. **32** Chuaq Jesus padreo bàu: “Joq qnàng, joq qnàng au doe ka pì: Môise qnhòq lah am ka pì bênh enh plình, mahaq Baq au ma am ka pì bênh joq qnàng, aih bênh loh enh plình. **33** Majah qmang aih, bênh da Boc plình aih bênh loh enh plình, am kan rìh ka crõng taneh. **34** Wì doe: Waiq Chuaq, ìh am ka nhèn bênh aih yôt oq! **35** Chuaq Jesus doe ka wì: “Au kô raq bênh kan rìh, mangai leq trùh ti au haq aih pi hìaq pangot hòm, mangai leq lùi au, haq aih pi hìaq croh ranõng hòm. **36** Mahaq au khoe anoe: Pì khoe hnoq au, mahaq pì ùh lùi. **37** Dìq dõng mangai leq Baq khoe am ka au aih èh wì trùh ti au, mangai leq trùh ti au, ùh jò leq au khwênh qnoh đac enh gùng. **38** Majah qmang aih au khoe loh enh plình ùh xài đòeq broq tiaq deh manoh, mahaq broq tiaq manoh Mangai ma khoe thê au. **39** Kô manoh Mangai ma khoe thê au: mangai leq Haq khoe am ka au, aih au apaq cađac hnhung, mahaq au ep broq haq rìh hlài ta hì pulùch èh. **40** Kô manoh Baq au: Mangai leq ngan Kon rai lùi kon aih mangai aih jah kan rìh halinh mòeq đòe, hì atìq lùch au broq haq aih rìh hlài.” (*aiōnios g166*) **41** Jò aih, mangai Juđa mumùc ka haq, majah qmang aih haq i doe: Au kô raq bênh loh enh Plình.” **42** Wì aih doe: Kô ma ùh joq Jesus kon da Jôsep, bèn ma ùh qnì ka miq baq haq qmòh? Aih hagleq haq ma wìa ka doe: Au

khoe loh enh plinh? **43** Chuaq Jesus doe: “Pì apaq mumùc
ti dabau. **44** Tàng joq Baq, aih Mangai ma khoe thê au, ùh
aràng ka au, ùh i cabô jah trùh ti au, hì atiq èh au jah
broq ka mangai aih rìh hlài. **45** Hset pajàu i achìh rameh:
kô èh rìm ngai dìq jah tàng Boc Plinh hnài. Mangai leq hi
jah tàng bàu Baq rai hõc tiaq dua haq, mangai aih èh
trùh ti au. **46** Ùh i mangai leq hmaq hnoq Baq, enh gùng
ka mòeq ngai loh enh Baq, toq haq aih ma khoe hnoq
Baq. **47** Joq qnàng au doe ka pì: waq toq mangai leq hi lùi,
mangai aih hi jah kan rìh halinh mòeq đòe. (aiōnios g166)

48 Au kô bênh kan rìh. **49** Boc yaq pì acaq mana tanòe
gùng hawit, èh dua khoe cachìt. **50** Mahaq hacô bênh ma
loh enh plinh, waq toq cabô hi acaq bênh kô mangai aih
ùh cachìt. **51** Au kô bênh kan rìh loh enh plinh. Mangai
leq hi acaq bênh kô hi jah kan rìh halinh mòeq đòe. Bênh
am dìq ka mangai đòeq wì hu jah kan rìh aih xech cla au
kô raq.” (aiōn g165) **52** Aih ìq dài bài mangai Juđa majah
tarahen: Wìa ka mangai kô yõc deh xech hu am ka bèn
acaq qmòh? **53** Chuaq Jesus doe ka wì haq: “Joq qnàng,
oq qnàng, au doe ka pì, tàng joq pì ùh acaq xech Kon
Mangai, ùh ôq mahim haq, aih èh ta pì ùh i kan rìh. **54**
Mangai leq acaq xech, ôq mahim au, aih èh jah kan rìh
halinh mòeq đòe, tahì pulùch au broq haq aih jah rìh
hlài. (aiōnios g166) **55** Majah qmang aih xech au kô dahwèq
acaq joq qnàng, mahim au kô dahwèq ôq joq qnàng. **56**
Mangai leq acaq xech au ôq mahim au, mangai aih oe enh
dalam ka au, au hadai oe enh dalam ka haq aih. **57** Tìah
ka Baq rìh halinh, khoe thê au trùh, au hadai rìh xi Haq,
hanoh qmang aih, mangai leq acaq xech au, hadai rìh xi

au diq. **58** Kô bênh loh enh plînh. Bênh aih ùh xài qmang ka bênh mana kan cadraq pì ma khoe acaq, èh dua cachìt, mangai leq acaq bênh kô aih èh jah kan rìh halinh mòeq đòe. (aiōn g165) **59** Chuaq Jesus anoe bàu aih, jò haq hnài nòe hnim tagop qyoh ta Cabêna-um. **60** Tàng bàu aih, bàc ngai tiaq hõc doe: Bàu kô joq xa ka tàng, Cabô ma hlàt tamàng? **61** Loq ka bai mangai tiaq hõc mumùc ka bàu kô, Chuaq Jesus doe ka wì haq: “Bàu kô broq ka manoh pì catoeh qmòh?” **62** Tàng joq pì hnoq Kon Mangai jah dèch atõc tanòe haq ma oe dèh enh nèh, aih èh qmang leq? **63** Aih ìq, yiang ma broq ka rìh, chac mac ùh i loh cleq. Dìq dõng bàu au ma anoe ka pì aih dìq yiang xam kan rìh. **64** Mahaq taqne pì i mangai ùh lùi. Majah qmang aih enh jò baxèm raq, Chuaq Jesus khoe loq ka mangai ma ùh lùi, mangai leq ma blòq cađac haq. **65** Haq anoe hòm: “Aih ìq raq, au majah doe ka pì tàng joq Baq au ùh am, ùh i mangai leq jah trùh ti au.” **66** Pang aih, bàc ngai tiaq hõc talùi pi tiaq haq hòm. **67** Chuaq Jesus bòch wì mòeq jàt baiq ngai: “Aleq, pì ahìaq enh ta lùi diq?” **68** Simôn Phiero doe: Chuaq! Nhèn tiaq đeh cabô? ìh i bàu kan rìh halinh mòeq đòe; (aiōnios g166) **69** nhèn khoe lùi, nhèn khoe loq ìh raq Kon mòeq Hadròeh da Boc plînh. **70** Chuaq Jesus doe: “Ajoq Au khoe ràih pì mòeq jàt baiq ngai? Mahaq moeq ngai aih kiac dù.” **71** Bàu aih, Haq anoe trùh Juđa, kon da Simôn I-cari-ot, majah qmang aih taqne wì mòeq jàt baiq ngai, haq aih mangai atìq kô èh ma blòq Jesus.

7 Atìq ka aih, Chuaq Jesus lam dudan gùng Galili. Haq ùh enh lam tagùng Judê, majah qmang aih mangai Juđa toq chaq trong hu jêh đac haq. **2** Mahaq hì Ramènh hla da

mangai Juđa khoe ten trùh. **3** Wì oh Chuaq Jesus doe ka haq: Drah loh enh kô hu lam tagùng Juđa beq, đòeq mangai tiaq hōc jah hnoq yiniq ìh broq. **4** Jò enh ka mangai qnoeq loq ka rađeh, ùh i cabô cadoc deh yiniq broq ta nòe hlèp. Patep pang hì ìh ma broq bài bìac aih, drah lam paqnoh rađeh am ka phù cròng beq. **5** Majah qmang aih wì oh haq hadai ùh lùi haq. **6** Aih ìq Chuaq Jesus majah doe ka wì haq: “Jò da au qnhòq troq, da pì jò leq ma ùh troq.” **7** Wì phù cròng ùh i tagit ka pì, mahaq git ka au, majah qmang aih au anoe patô qnoh trong da wì haq broq aih trong dù. **8** Pì tōc hàu ramènh aih beq, au qnhòq tōc ta ramènh aih majah qmang aih qnhòq troq jò da au. **9** Atìq ka anoe bàu aih, haq dua oe raq ta Galili. **10** Hnoq anoe qmang aih, khoe ka wì oh haq lam hàu ramènh, haq hanoh lam, haq lam laiq ka hlèp, ùh dôq cabô loq. **11** Oe tanèo ramènh, bòe gucraq Juđa ti rinh chaq Chuaq Jesus, wì bòch dabau: Taleq haq? **12** Tanèo mangai bàc i bàu wì ta anoe ka dabau. Qnah ngai doe: Haq aih mangai lem, qnah ngai doe: Ùh! haq aih mangai toq ti qnùt wì phù cròng. **13** Mahaq ùh i cabô hùa anoe hloh trùh Chuaq Jesus, majah qmang aih wì crè ka bài gucraq Juđa. Jesus hnài jò Ramènh **14** Qne ramènh, Chuaq Jesus tōc hnài ta hnim kùh waiq. **15** Mangai Juđa ta aih dìq jaq hamàih wì bòch dabau: Mangai kô qnhòq lah hōc, gleq haq majah rabiaq ka hset Hadròeh qmang meh? **16** Chuaq Jesus doe: “Bàu au hnài ùh xài loh eh cla au, mahaq loh enh Mangai ma khoe thê au. **17** Mangai leq broq tiaq manoh Boc Plình, aih èh hi canau bàu au ma hnài loh enh Boc Plình loq loh enh cla au. **18** Mangai

leq capoch tiaq deh manoh, aih haq chaq kan ranhòm toq ka dađeh, mahaq mangai leq broq ka Mangai ma thê dađeh jah ranhòm, aih mangai ma joq qnàng, tanòe haq ùh i yiniq cleq jùh jùn. **19** Ma ùh joq Môise khoe am ka pì ranenh? I cabô leq taqne pì broq tiaq ranenh! Hagleq pì chaq trong hu jêh cađac au? **20** Bài wì doe: ĩh qmat kiac khoe pawè, cabô ma chaq jêh đac ĩh? **21** Chuaq Jesus padreo bàu: “Au khoe broq mòeq yiniq, pì mangai leq mangai meh hamàih đeh hra. **22** Môise thê pì wèq ranenh kat akia (ranenh aih ùh i loh enh Môise, mahaq loh enh wì kan cadraq) pì broq ranenh aih ka mangai gucalô ta hì Sabat! **23** Tàng joq mangai gucalô kat akia ta hì Sabat waq ka hatroq tiaq ranenh Môise, aih hagleq pì majah nòeh ka au jò au broq ka chac mangai yiniq jah brêh ta hì Sabat? **24** Apaq ngan toq enh gùng đòeq hu hadrah mangai qnoeq, mahaq ep hadrah tiaq trong ma taq toq. **25** I qnah ngai oe ta Jérusalem doe: Meh raq ùh xài mangai wì ma chaq jêh cađac? **26** Ngan meh haq ma i capoch rai amot, atàng i cabô tapoch mòeq nà bàu cleq ka haq. Ahìaq bài cwan khoe doe haq meh raq Christ joq qnàng? **27** Mahaq mangai meh trùh enh leq bèn loq, Yàng jò Christ hi trùh, i cabô maloq haq trùh enh leq. **28** Jò aih Chuaq Jesus oe raq hnài tanòe hamlang hnim kùh waiq, Haq capoch qmòe cadêh: “Pì canau ka au, loq ka au trùh enh leq, ùh xài au trùh đeh ajang kô, mahaq Mangai ma khoe thê au aih joq qnàng. Pì ùh qnì ka haq, **29** mahaq au loq ka haq, majah qmang aih au loh enh haq, haq khoe thê au”. **30** Aih ìq raq, wì majah ti àu chaq trong rùp Chuaq Jesus, mahaq ùh i mòeq ngai leq

hùa poh ta chac Jesus, majah qmang aih jò da haq qnhòq trùh; **31** mahaq i bac ngai lùi haq. Wì doe: Jò Christ trùh, haq i broq bac trong halac ùh hnau ka mangai kô ùh? **32** Mangai Pharisi tàng bac ngai ta aih ta hatuàng trùh Chuaq Jesus ti dabau. Aih, wì haq hi mòeq manoh ka bái pajàu kàn wiang thê bái lình wèq hnim kùh waiq lam rùp haq. **33** Chuaq Jesus doe: “Au oe ti pì toq biaq hòm, khoe aih au hi hlài deh ta Mangai ma khoe thê au. **34** Pì hi ti chaq au, mahaq ùh hnoq au, èh hòm tanòe au ma oe, ta aih pì trùh ùh jah”. **35** Mangai Juđa doe ka dabau: Mangai kô enh lam taleq haq ma doe bèn chaq ùh hnoq haq? Ahìaq haq lam trùh ti bái mangai bèn ma haprah priang taqne mangai Gorec, đòeq hu hnài mangai Gorec qmòh? **36** Haq khoe doe: Pì ti chaq au, mahaq ùh glàm au, èh hòm tanòe au oe pì enh trùh ta aih ùh jah, bàu aih qmang leq? **37** Hì atìq pulùch, aih hi ma yeo nhet dìq döng ta hì ramènh, Chuaq Jesus yòng rai tapoch bàu dêh: “Mangai leq croh ranöng, drah trùh ti au hu ôq. **38** Mangai leq lùi au, qmang ka bàu Hset Hadròeh khoe anoe: cròng diac kan rìh plôh loh qmòe enh dalam ka wì haq”. **39** Bàu aih, Haq anoe trùh Yiang Hadròeh mangai leq ma lùi haq atìq kô èh hi jah, jò aih qnhòq ùc qnoh Yiang Hadròeh, majah qmang aih Chuaq Jesus qnhòq jah ranhòm. **40** Ta aih bac ngai tàng, wì doe: Mangai kô pajàu joq qnàng. Mangai qnoeq doe: Qmat raq Christ. **41** Mangai qmoeq hòm doe: Wìa ka Christ ma loh enh gùng Galili? **42** Ma ùh joq hset Hadròeh doe: Christ ep loh enh nang noe Dawit, enh plài Bételehem aih plài da bùa qmòh? **43** Taiq ajang nòe Chuaq Jesus, wì haq majah talah đac dabau. **44** Qnah ngai enh

rùp haq, mahaq ùh i cabô hùa hnho deh mòeq apah tì ta
chac haq. **45** Qmang aih, bài lình tawìh hlài nòe bài pajàu
kàn xam bài mangai Pharisi. Wì aih bòch: Hagleq pì ma
ùh ahlài mangai aih tacô? **46** Bài lình padreo bàu: Qnhòq
lah i cabô capoch tìah ka mangai kô. **47** Mangai Pharisi
goh bàu bài aih: Ahìaq haq aih khoe padô hloe xam pì
qmòh? **48** I ka cwan leq, mangai Pharisi leq lùi haq aih
ùh? **49** Ùh! mahaq bài mangai bình qmòe ka calùh chàm
joq ùh lòm loq qmòe ka ranenh cleq, joq jiāng toq ra òh
hamaiq! **50** Nicôđem (mangai adroe ka aih i trùh ti Chuaq
Jesus, haq hanoh oe mòeq bua ti bài aih) doe: **51** Ranenh
da bèn ma rùp mangai leq bèn qnhòq bòch, qnhòq qnì ka
yiniq haq aih broq qmòh? **52** Wì doe ka haq: ìh kô ma
hadai mangai Galili qmòh? ìh ngan beq! ìh hi hnoq ùh
lah i mangai pajàu leq ma loh enh gùng Galili. **53** Khoe
aih, dìq ka wì hi hlài deh hra ta hnim.

8 Mahaq Chuaq Jesus tòc ta bui wang Oliu. **2** Bu qngah,
haq wìh hlài ta hnim kùh waiq, dìq dǒng ka mangai ta
aih trùh tapdan ka haq. Haq hangui hu hnài wì. **3** Jò aih
bài mangai hnài ranenh xam bài mangai Pharisi aràng
trùh ka haq mòeq ngai cadri wì jah rùp jò haq qnang
tango. Wì thê haq yòng taqne mangai bac ta aih. **4** Wì
bòch Chuaq Jeus: Mangai hnài, mangai gucadri kô nhèn
rùp jò haq qnang tango, **5** ta ranenh da Môise thê bèn
hachùq đac xam hmo mangai qmang kô, ha da ìh doe
qmang leq? **6** Wì bòch qmang aih đòeq hu bahlac haq,
đòeq chaq nen hu tah hadrah ka haq. Mahaq Chuaq Jesus
kùp ta haqneq, yōc hadrang tì achìh ta taneh. **7** Jò wì xan
bòch yōt, haq padinh yòng rai doe ka wì: “Dôq ka mangai

leq taqne pì qmat tàng dađeh ùh hìaq i yiniq lui cleq, mangai aih yōc hmo hachùq adroe beq” **8** Haq hi kùp achìh hòm ta taneh. **9** Jò wì tàng qmang aih, wì hi lam, mangai craq lam adroe, trùh jò oe mòeq ngai Chuaq Jesus ta aih, xam mangai gucadri oe raq yòng. **10** Chuaq Jesus yòng bòch haq: “Mangai gucadri meh, wì taleq hòm? Ùh i ca bô taqmòq ka ìh yiniq lui cleq qmòh? **11** Haq padreo bàu: Waiq Chuaq, ùh i ka cabô. Chuaq Jesus doe: “Au hadai ùh taqmòq ka ìh yiniq lui, lam beq pi dùh broq yiniq hòm”. **12** Chuaq Jesus doe hòm ka wì: “Au kô raq kan qngah ka crōng taneh kô, mangai leq tiaq au, haq aih ùh hìaq lam ta kan clam, mahaq i kan qngah da kan rìh. **13** Mangai Pharisi rahlen: ìh yòng jang kô anoe cla rađeh, bàu aih ùh wìa ka lùi. **14** Chuaq Jesus doe: “Yac ka cla au anoe rađeh, bàu aih dua khòh lùi, majah qmang aih au loq đeh khoe trùh enh leq, loq đeh padon lam taleq. Mahaq pì ùh qnì ka au trùh enh leq, ùh qnì au lam taleq. **15** Pì tah hadarh tiaq ranenh da kon mangai, au ùh tah hadrah ka cabô. **16** Mahaq tàng joq au hadrah ka cabô, au hadrah troq joq qnàng, majah qmang aih au ùh i yòng đeh mòeq ngai, au yòng deh ti Baq ma khoe thê au. **17** Tanòe ranenh pì khoe achìh: bàu baiq ngai wiang anoe patô, bàu aih joq qnàng. **18** Au panhìn ka rađeh, Baq ma khoe thê au trùh, hadai wiang anoe panhìn ti au”. **19** Wì bòch haq: Aleq baq ìh? Chuaq Jesus doe: “Pì ùh canau ka au, ùh qnì ka Baq au, tàng joq pì khoe canau ka au, aih pì hadai khoe loq ka Baq au”. **20** Chuaq Jesus tapoch bàu kô jò yòng hnài tanòe hamlang hnim kùh waiq, haten ka nòe hnim don đòeq kùng hang ma dèch am ka hnim

kùh waiq, ùh i mangai leq rùp haq majah qmang aih haq qnhòq trùh dèh jò. **21** Chuaq Jesus noe tam ka wì haq: “Au kô èh lam, pì ti chaq au, pì qmat èh cachìt dèh ta yiniq lui. Nòe Au lam pì ùh jah trùh”. **22** Mangai Juđa anoe: Haq doe nòe au lam pì ùh jah trùh, qmang aih haq lam cachìt qmòh? **23** Mahaq Chuaq Jesus tapoch hòm: “Pì qmat loh enh qneq, au loh enh qnhèq. Pì qmat da cröng taneh kô, au ùh xài da cröng taneh kô. **24** Au khoe doe pì cachìt dèh ta yiniq lui cla, tàng joq pì dua ùh lùi au kô raq, joq qnàng pì cachìt dèh ta yiniq lui cla”; **25** wì bòch: ìh qmat ìq cabô? Chuaq Jesus padreo bàu: “Qmang ka bàu au khoe doe ka pì enh baxèm raq, **26** Au i bàc trong anoe, bàc trong hu hadrah pì, mahaq Mangai khoe thê au trùh aih ma joq qnàng, au tàng cleq enh Haq, aih au hi anoe hlài ka cröng taneh kô. **27** Wì ùh qnì tàng aih haq anoe trùh dèh Baq. **28** Aih ìq Chuaq Jesus majah doe: “Jò pì hi atua Kon Mangai, aih èh pi men loq au kô cabô, loq yac ka moeq yiniq cleq dua au ùh broq đeh, mahaq au anoe toq trong Baq khoe hnài au. **29** Mangai khoe thê au trùh dua oe yôt ti au, qnhòq lah dôq au oe đeh mòeq ngai, majah qmang aih yac ka jò leq dua au broq lem manoh Haq”. **30** Chuaq Jesus anoe qmang aih i bàc ngai lùi bàu haq. **31** Chuaq Jesus doe ka mangai Juđa ma khoe lùi haq: “Tàng joq pì wèq bàu au hnài, aih pì joq mangai tiaq hòc au; **32** pì jah loq bàu joq qnàng, bàu joq qnàng jah lêh caqnaih pì”. **33** Mangai Juđa doe: Nhèn kô nang noe Apraham, qnhòq lah broq dìc hapöng cabô, gleq ìh ma doe: jah lêh caqnaih nhèn? **34** Chuaq Jesus doe ka wì: “Joq qnàng, joq qnàng au doe ka pì, mangai leq broq

yiniq lui aih broq dìc yiniq lui. **35** hapǒng dìc majah oe hloe ta hnim, mahaq toq Kon raq majah oe hloe ta aih.

(aiōn g165) **36** Qmang aih tàng joq Kon lêh caqnaih pì, aih pì joq khoe jah paclaih joq qnàng. **37** Au loq pì nang noe Apraham, mahaq pì toq chaq trong jêh cađac au, majah qmang aih bàu au ùh i nòe ta manoh cliac pì. **38** Au anoe yiniq au hnoq enh ngèa Baq au, pì broq trong pì top dua baq pì.” **39** Wì doe: Apraham aih baq da nhèn, Chuaq Jesus doe: “Tàng joq pì kon Apraham, aih pì broq tiaq Apraham. **40** Mahaq manđeq kô pì chaq trong jêh đac au, mangai ma khoe yđc bàu joq qnàng enh Boc Plình đđeq anoe ka pì. Apraham ùh i broq qmang aih! **41** Pì qmat broq yiniq baq pì broq.” Wì aih padreo bàu: Nhèn ùh xài kon tango, nhèn i mđeq ngai baq raq, aih Boc Plình. **42** Chuaq Jesus doe: “Tàng joq Boc Plình aih baq pì, pì loq waq ka au, majah qmang aih au loh enh Boc Plình, au trùh enh Haq, au ma i trùh đeh tacô, Haq aih ma khoe thê au. **43** Hagleq pì ma ùh qnì tàng bàu au? Aih ìq taiq pì ùh qnì trong da au. **44** Pì loh enh kan kiac aih kan cadraq da pì, pì enh broq gđh trong baq pì enh. Enh baxèm raq haq aih mangai jêh đac mangai, ùh cajap manoh wèq bàu joq qnàng, majah qmang aih ùh i ka bàu joq qnàng enh dalam ka haq. Jò haq amòng, haq capoch tiaq deh khoe hmòt, majah qmang aih haq mangai loq amòng broq baq mangai loq amòng. **45** Mahaq pàng au anoe bàu joq qnàng, dài pì majah ùh lùi au. **46** Taqne pì qmat i cabô patô jah yiniq lui da au ùh?... Tàng au anoe bàu joq qnàng gleq pì ma ùh lùi au? **47** Mangai da Boc Plình aih tàng bàu Boc Plình. Pì majah ùh tàng bàu Boc Plình, pàng pì

ùh xài mangai da Boc Plình.” **48** Mangai Juđa doe: Nhèn doe ìh qmat mangai Samari kan kiac khoe pawè, aih ma ùh troq? **49** Chuaq Jesus pa dreo bàu: “Au ùh xài mangai kiac pawè au, mahaq au ta iu Baq au, da pì aih enh poch qmèq ka au. **50** Au ùh chaq kan nhòm ka dađeh, mahaq i mòeq Mangai chaq, haq aih èh mangai hadrah. **51** Joq qnàng, joq qnàng au doe ka pì, mangai leq iu tiaq bàu au, haq aih èh ùh hnoq kan cachìt”. (aiōn g165) **52** Mangai Juđa doe: Manoèq kô nhèn khoe loq joq qnàng, ìh qmat joq mangai kiac khoe pawè. Apraham khoe cachìt, dìq dōng bài pajàu hadai, yàng ìh aih doe mangai leq iu tiaq bàu ìh ùh jò leq glàm kan cachìt. (aiōn g165) **53** Ìh ma yeo kàn ùh hnau ka baq nhèn? Aih la Apraham mangai khoe cachìt. Bài pajàu hadai khoe cachìt, ìh qmat patìah đeh broq cabô? **54** Chuaq Jesus padreo bàu: “Tàng joq au padèch kan ranhòm ka rađeh, kan ranhòm aih ùh loh cleq, Baq au, mangai pì doe deh Baq, aih mangai broq ka au jah kan ranhòm. **55** Pì ùh qnì ka Haq, au loq ka Haq. Tàng au doe đeh ùh qnì ka Haq, aih au hadai loq qnùt tìah ka pì diq, mahaq au loq ka Haq rai broq tiaq bàu haq. **56** Baq pì aih Apraham, calah nèh haq tadèch qmòe qnòeh jò haq hnoq hì da au, khoe jah hnoq haq dìq jaq lem bùi.”. **57** Wì tèu ka haq: Ìh qnhòq jah padam jàt hanam ìh ma khoe hnoq Apraham. **58** Chuaq Jesus padreo bàu: “Joq qnàng, joq qnàng au doe ka pì, adroe ka i Apraham, khoe i au.” **59** Jò aih wì toch hmo đòeq hibùq haq, mahaq Chuaq Jesus cadoc dađeh loh hnìm kùh waiq, lam taqnoeq.

9 Chuaq Jesus bu lam ti trong, hnoq mòeq ngai lua qmòe enh jò baxèm ha-uang. **2** Mangai tiaq hốc bòch: Rabi,

cabô ma khoe i yiniq lui, cla haq loq miq baq haq, hagleq haq bu ha-uang ma khoe lua qmang qmat? **3** Chuaq Jesus doe: “Qmat ùh xài claq haq hadai ùh xài miq baq haq khoe i yiniq lui, mahaq qmat đòeq yiniq Boc Plình broq jah paqnoh ajang haq. **4** Jò oe raq qngah da hì, au ep broq gêh ka yiniq Mangai ma khoe thê au trùh, jò trồc clam ùh i cabô oe jah broq cleq. **5** Jò au oe raq ta crõng taneh, au raq kan qngah ka crõng taneh.” **6** Khoe ka capoch bàu aih, haq cachôh ta taneh, jràu diac hai ta blo dôq haq wìa tráp, èh haq xùt ta mat mangai lua aih. **7** Khoe haq doe: “Lam beq, lam ta bau diac Siloê đòeq hu qnheo (Siloê aih la Jah thê)”; haq hi lam trùh ta bau aih, qnheo, khoe èh wìh hlài, hi jah xau hnoq qmòe lem lech. **8** Wì plài mangai lua aih xam bài mangai nèh haq hmaq hnoq mangai lua kô rìh ka axìn, wì doe: Ùih! kô ajoq mangai xan hangui axìn ùh xài? **9** Qnah ngai doe: hi loq haq qmat raq! Mangai qnoeq doe: Ùh xài, mangai tah hatiâh ka haq. Mahaq cla haq doe lam doe hlài: Hi loq ka au kô raq! **10** Wì bòch: Hagleq mat gè khoe jah tapèch? **11** Haq tèu bàu: Mangai yiniq haq Jesus leo tráp xùt ta mat au. Haq thê au lam ta bau diac Siloê hu qnheo. Au hi lam qnheo, manòeq au khoe jah xau hnoq. **12** Wì bòch haq: Taleq mangai aih? Haq doe: au ùh qnì. **13** Wì qnong mangai neh haq ma lua mat trùh ajang ngèa mangai Pharisi. **14** Hì Jesus ma leo tráp broq ka mangai lua mat jah brêh aih, wop hì Sabat. **15** Mangai Pharisi bòch hòm hagleq haq ma khoe jah xau hnoq. Haq doe: Mangai aih xùt tráp ta mat au, au lam qnheo khoe hi jah hnoq. **16** Qnah ngai Pharisi doe: Mangai kô ùh xài loh enh Boc Plình, hacô haq ùh

wèq hì Sabat. Mahaq mangai qnoeq hòm doe: Mangai i yiniq lui majah broq kan halac qmang qmat? Pi tahatraq, wì hi loh ka talah ka dabau. **17** Khoe aih wì haq tawìh hlài ajang mangai lua, wì bòch: Manðeq kô mangai ma khoe broq ka ìh jah xau hnoq qmat ìh doe qmang leq? Mangai aih padreo bàu: Haq aih mangai pajàu. **18** Mahaq mangai Juða ùh lùi haq aih nèh lua mat yàng manðeq khoe jah hnoq, trùh wì ma hi creo ka miq baq haq. **19** Wì àu bòch: Kô ajoq kon calô chôp ma xan doe haq lua qmòe enh jò ha-uang nèh raq? Òq hagleq manðeq haq majah xau hnoq? **20** Wa miq baq haq doe: Ma canau haq qmat joq kon ma, lua qmòe enh jò ha-uang nèh raq, **21** yàng manðeq kô hagleq haq jah xau hnoq, ma hadai ùh loq, ma hanoh ùh qnì ka cabô khoe pèch da haq mat. Bòch cla haq, haq khoe kàn, cla haq doe deh. **22** Miq baq haq majah anoe qmang aih, wa haq crè ka bài gucraqJuða, wì aih khoe doe waq toq cabô doe Jesus aih raq Mêisia, mangai aih èh wì hnan qnöh đac enh gùng ka hñim tagop qyoh. **23** Aih wa miq baq haq majah doe: Haq khoe troq hanam, bòch cla haq. **24** Mangai Pharaisi creo ka mangai nèh haq lua mat aih tam mòeq yàng hòm, wì doe: Drah manè apôi Boc Plìngh beq, nhèn loq mangai aih i yiniq lui; **25** mangai aih doe: au ùh qnì mangai aih i yiniq lui loq ùh, au loq mòeq yiniq, nèh au lua mahaq manðeq au jah qngah. **26** Wì bòch hòm: Haq khoe broq ka gè cleq, haq pèch da gè mat qmang leq? **27** Haq padreo bàu: au khoe doe ka pì, pì ùh ta màng. Gleq pì majah enh tàng hòm? Ahìaq pì enh broq mangai tiaq hõc haq aih diq qmòh? **28** Wì hnap hnuq ka haq rai doe: Gè qmat òq mangai tiaq

hocard haq, nhèn kô mangai tiaq hocard Môise. **29** Nhèn loq Boc Plinh khoe doe ka Môise, mahaq mangai kô nhèn ùh qnì qmòe ka haq loh enh leq. **30** Haq aih padreo bàu: Mangai aih khoe pèch da au mat, aih pì doe ùh qnì haq loh enh leq, aih joq ma halac! **31** Bèn loq Boc Plinh malah tamàng bàu mangai i yiniq lui, mahaq tàng cabô loq yùq iu bàu Boc Plinh, broq tiaq manoh Haq, bàu mangai aih Haq tamàng. **32** I cabô lah tàng doe i mangai pèh mat mangai lua qmòe enh qyoh. (aiōn g165) **33** Tàng joq mangai kô ùh loh enh Boc Plinh, haq ùh broq cleq majah. **34** Wì tèu haq: Gè qmat catàm ta yiniq lui enh jò ha-uang nèh raq, broq deh hnài nhèn! khoe aih wì hnan qnoh haq enh gùng. **35** Chuaq Jesus tàng doe wì khoe hnan qnoh cađac mangai aih loh enh gùng, jò hnoq mangai aih, haq doe: “Ìh alùi Kon Mangai?” **36** Mangai aih bòch: Wì Craq! anoe ka au loq haq aih cabô, đòeq au hu lùi. **37** Chuaq Jesus doe: “Manđeq kô ìh khoe hnoq haq, joq qnàng, hacô haq mangai qnang hatuàng ti ìh.” **38** Mangai aih doe: Waiq Chuaq! au lùi ìh. **39** Chuaq Jesus doe: “Au khoe trùh ta crõng taneh đòeq broq kan tah hadrah qmang kô: mangai ùh xau èh jah hnoq, mangai hnoq èh loh ka ùh xau.” **40** Mangai Pharisi ma yòng ti haq tàng anoe qmang aih, wì bòch: ìh doe cleq? Nhèn ma hadai lua mat? **41** Chuaq Jesus doe: “Tàng joq pì hadai lua, aih pì ùh ka yiniq lui cleq, mahaq manđeq pì doe đeh qngah, dài aih raq yiniq lui pì majah oe.”.

10 “Joq qnàng qnàng au doe ka pì mangai, mangai leq thia ta cadrong trùu ma ùh mùt trong qmang, mahaq heo trong qnoeq, aih mangai atùng. **2** Mangai leq mùt ti trong

qmang, aih majoq mangai ban trìu. **3** Mangai gồm qmang pèh ka haq qmang, trìu tàng dèh bàu mangai ban, haq creo yiniq dèh trìu hu tiaq qnoh enh gùng. **4** Jò haq khoe qnoh trìu loh dìq enh gùng, cla haq lam adroe, trìu lam atìq, majah qmang aih trìu canau ka bàu haq. **5** Mahaq ùh jò leq trìu tiaq mangai ùh canau, majoq qnàng aih trìu loh ka cadàu amot, majah qmang aih haq ùh canau ka bàu mangai aih. **6** Chuaq Jesus alìah bàu aih, mahaq bài mangai Pharsi ùh qnì tàng haq anoe cleq. **7** Aih ìq Chuaq Jesus majah anoe hòm: “Joq qnàng au anoe ka pì, au kô raq qmang trìu. **8** Bài mangai trùh adroe ka au dìq bài mangai atùng, mahaq trìu ùh tamàng bàu wì aih. **9** Au kô raq qmang, mangai leq mùt jang au mangai aih jah dèch. Wì haq jah mùt loh, jah glàm nhat. **10** Mangai atùng trùh đòeq toq hu atùng, jêh rai palùng đac. Mahaq au khoe trùh đòeq trìu jah rìh, rai jah kan rìh tàu tìa. **11** Au kô raq mangai ban trìu khun rabiaq, mangai ban khun rabiaq haq cađac qmòe rađeh dôq trìu jah kan rìh. **12** Mangai ban acaq baha aih ùh xài mangai ban joq qnàng, trìu hadai ùh xài trìu haq, tàng haq hnoq koq gùng trùh, haq cađac trìu hu cadàu claih toq ka dađeh. Koq gùng blah yōc trìu rai broq ka trìu haprah priang. **13** Mangai ban baha cadàu toq ka dađeh, haq ùh i hèm trùh trìu. **14** Au kô raq mangai ban khun rabiaq, au loq deh ka trìu, èh trìu au hadai loq ka au. **15** Tìah ka Baq loq ka au, au loq ka Baq – Au cađac rađeh am ka trìu. **16** Au oe raq i calùh trìu qnoeq ùh xài ta cadrong kô; au ep tiaq ahlài haq. Trìu aih èh hadai jah tàng bàu au, jah wìa mòeq calùh, èh mòeq ngai ban raq. **17** Hagleq Baq majah loq waq au, aih au

phùq deh kan rìh đòeq hu jah yōc hlài. **18** Ùh i cabô doeh yōc da au kan rìh, mahaq cla au phùq đeh, au i cwìangcadac deh kan rìh hadai i cwìang yōc hlài. Baq khoe thê qmang aih. **19** Mangai Juđa tàng bàu aih, wì loh qmòe ka talah ka dabau. **20** Qnah ngai doe: Haq qmat kiac pawè haq khoe loh ka rawè, tamàng dèh ka bàu haq? **21** Qnah ngai doe: Bàu kô ùh xài bàu mangai kiac khoe caqnit don. Kiac wìa ka jah pèh mat mangai ùh xau? **22** Trùh hì Ramèn dèch hnim kùh waiq ta Jérusalem. Aih troq jò ralim, **23** Chuaq Jesus oe ta hamlang hnim kùh waiq, haq ti dauq roc canhiang qmang Salomôn. **24** Mangai Juđa ti dudan ka haq rai bòch: ìh đòeq nhèn rangòt yôt qmang kô trùh jò leq? Tàng joq ìh kô raq Mêśia, anoe ka nhèn ma hloh haq. **25** Chuaq Jesus padreo bàu: “Au khoe doe ka pì, mahaq pì ùh lùi. Bàyiniq au broq enh dalam ka yiniq Baq au, khoe wiang panhìn ka au; **26** mahaq pì ùh lùi, majah qmang aih pì ùh xài trìu au. **27** Trìu da au tamàng bàu au, Au loq ka wì haq, wì haq tiaq au. **28** Au am ka wì haq kan rìh halinh mòeq đòe, wì haq ùh jò leq cachìt, ùh i cabô jah hrùiq yōc wì haq enh tì au. (aiōn g165, aiōnios g166)

29 Baq au Mangai ma khoe am trìu aih ka au, Haq yeo kàn dìq dōng. Ùh i cabô jah hrùiq yōc wì haq enh tì Baq au. **30** Au xam Baq aih mòeq raq. **31** Mangai Juđa töch hmo hu hibùq haq hòm. **32** Chuaq Jesus doe: “Au khoe broq ka pì hnoq bàc yiniq lem loh enh Baq. Yiniq cleq pì majah töch hmo hu đàp au.” **33** wì doe: Ùh xài ìh broq lem nhèn majah đàp ìh, mahaq taiq ìh capoch haqnhèq bàu ùh hòq qmòe cleq, ìh qmat xài mangai, aih ìh ma doe rađeh Boc Plình. **34** Chuaq Jesus padreo bàu: Ta Hset ranenh pì ùh

xài i achìh: Au khoe creo ka pì aih yiang qmòh? **35** Tàng Hset Ranenh creo ka bài mangai jah bàu Boc Plình aih yiang, tàng joq bàu Hset Hadròeh ùh jah cađac, **36** ha mangai Baq ma khoe đòeq dèh crài, khoe thê loh ta crõng taneh kô? Hagleq pì majah doe au haqnhèq bàu jò au doe au kon Boc Plình.” **37** Apaq lùi, tàng joq au ùh broq yiniq Baq broq. **38** Mahaq tàng au broq, yac ka pì ùh lùi au, pì lùi bài yiniq au broq, aih pì hi canau loq Baq oe enh dalam ka au, au hadai oe enh dalam ka Baq.” **39** Wì àu rùp haq hòm, mahaq haq wia cađac. **40** Khoe aih Chuaq Jesus wìh hlài apah tau cròng diac Jôđan, trùh ta nòe Jon ma baxèm broq baptem nèh. Haq oe ta aih, **41** bàc ngai trùh ta haq. Wì doe: Yac ka Jon qnhòq hmaq broq cleq ma halac, mahaq rìm nà Jon anoe trùh mangai kô aih dìq wop dõng. **42** Ta aih, i bàc ngai lùi Chuaq Jesus.

11 I mòeq ngai ùh hrõc yiniq haq Laxaru, oe ta Bêthani, plài Mari xam Mathê daq haq. **2** Mari aih mangai ma khoe xùt dàu xua thùm ka Chuaq Jesus, rai yõc deh xàc gàu xùt jènh Jesus, daq haq Laxaru qnang ùh hrõc. **3** Wa thê mangai lam patìn ka Chuaq Jesus: Waiq Chuaq! Mangai ìh ma loq waq khoe ùh hrõc. **4** Jò Chuaq Jesus tàng qmang aih, haq doe: “Yinìq kô ùh i ma doe cachìt, mahaq đòeq ka Boc Plình jah kan ranhòm, aih èh yiniq Kon haq hadai jah qngah qngai”. **5** Chuaq Jesus loq waq ka Mathê, loq waq ka oh haq xam Laxaru. **6** Jò Haq tàng doe Laxaru ùh hrõc, haq oe tam ta aih baiq hì. **7** Khoe aih haq doe ka mangai tiaq hõc: “Beq bèn wìh hlài ta Juđê”. **8** Mangai tiaq hõc doe: Rabi! Neo ta adreo kô nèh, mangai Juđa kô yõc hmo hu hacam đàp ìh, ìh oe wìh hlài ta aih

hòm qmòh? **9** Chuaq Jesus padreo bàu: “Dahì ma ùh xài i mòeq jàt baiq jò qmòh? Mangai cadiang lam jò dahì aih ùh catoeh, majah qmang aih kan qngah ta crõng taneh kô broq ka haq xau hnoq. **10** Mahaq tàng cabô cadiang lam jò damang, haq catoeh majah qmang aih haq ùh i ka kan qngah”. **11** Atìq ka anoe bàu kô, Chuaq Jesus doe: “Laxaru bua bèn qnang kùi, mahaq au trùh ta aih hu padriù haq.” **12** Mangai tiaq hõc doe: Tàng joq haq jah kùi, aih èh haq rênbrêh. **13** Chuaq Jesus anoe bàu aih hu doe Laxaru khoe cachìt mahaq mangai tiaq hõc xoh đeh haq kùi joq qnàng. **14** Haq hi anoe hloh hloe ka wì: “Laxaru khoe cachìt”. **15** Au lem bùi am ka pì, ùh i ka au ta aih, đòeq pì hu lùi, beq bèn lam ta haq.” **16** Khoe aih Thôma (Qnah ngai creo Đì đím) doe: Beq bèn hanoh lam, hu cachìt pajùm ti haq.” **17** Jò trùh ta aih, Chuaq Jesus loq Laxaru oe ta ralùng khoe jah pôn hì. **18** Adreo Bêthani trùh Jérusalem bu mòeq jàt padam êtađo. **19** I bàc ngai Juđa trùh ta aih hu alòng Mathê xam Mari jò daq wa khoe pi i. **20** Jò Mathê tàng doe i Chuaq Jesus trùh, haq tûh loh, mahaq Mari oe raq ta hnìm. **21** Mathê doe: Waiq Chuaq! Tàng i ìh tacô, daq au ùh cachìt. **22** Mahaq manòeq kô au loq, ìh bòch cleq dua Boc Plình am. **23** Chuaq Jesus doe ka haq “Daq ìh jah rìh hlài.” **24** Mathê padreo bàu: Au loq trùh jò mangai cachìt rìh hlài hì atìq pulùch èh, haq jah rìh hlài. **25** Chuaq Jesus doe ka haq: “Au kô raq kan rìh xam kan rìh hlài. Mangai leq lùi au haq aih jah rìh hlài, yac ka haq khoe cachìt. **26** Èh hòm, mangai oe rìh lùi au, haq aih ùh cachìt. ìh alùi qmang aih?” (aiōn g165) **27** Mathê padreo bàu: Waiq Chuaq, au lùi

ìh kê raq Christ, Kon calô Boc Plình, Mangai đòeq trùh ta crõng taneh kê. **28** Khoe ka doe qmang aih, haq hlài chop anoe deh ka Mari oh haq; Mangai hnài qnang oe tacô, haq creo chaq oh. **29** Jò Mari tàng qmang aih, haq drah yòng lam trùh ta Chuaq Jesus. **30** Jò kê Jesus qnhòq mùt taplài, oe raq yòng tanèe Mathê ma loh đinh haq. **31** Mangai Juđa qnang oe ta hnim ti Mari đòeq alòng haq, jò hnoq haq loh lam, wì drah tiaq haq majah qmang aih wì hèm canau haq loh hmoe ta ralùng. **32** Jò Mari trùh ajang nòe Chuaq Jesus yòng, bu hnoq Haq, Mary hacùn cràng nòe jènh Chuaq Jesus rai anoe: Waiq Chuaq! Tàng joq ìh oe tacô, daq au ùh i cachìt. **33** Jò Chuaq Jesus hnoq Mary hmoe, èh hnoq bòe mangai Juđa ma lam tiaq haq hanoh hmoe, Chuaq Jesus tamèt ta manoh, haq bòch: “Pì catùh hanang haq taleq?” **34** Dìq ka wì doe: Waiq Chuaq! ìh lam hu ngan. **35** Chuaq Jesus hmoe. **36** Mangai Juđa ta anoe: Ngan meh! Kan haq loq waq ka Laxaru qnì dàng leq. **37** Mahaq i qnah ngai doe: Mangai khoe jah pèch mat mangai lua, laiq ma hadai broq mangai kê ùh cachìt qmòh? **38** Jò aih, Chuaq Jesus haq jìq tam ta manoh, haq lam trùh ta ralùng (Ralùng aih kòp i mòeq toq hmo kàn padit ajang ngah). **39** Haq doe: “Cadro hmo qmat lam taqnoeq”. Mathê oh mangai cachìt aih doe: Waiq Chuaq! manòeq kê khoe xua, majah qmang aih haq oe ta ralùng khoe pôn hì. **40** Chuaq Jesus doe hòm: “Au ma qnhòq lah doe ka ìh tàng joq ìh lùi, ìh hi jah hnoq kan ranhòm Boc plình?” **41** Qmang aih, wì hi cadro đac hmo. Khoe aih Chuaq Jesus qngoc ngan ta plình rai doe: “Baq, au manè apôi ìh khoe tamàng bàu au, **42** au loq yac ka jò leq dua ìh

tamàng bàu au, mahaq au majah anoe qmang aih dôq wì ma yòng dudan tacô jah tàng, đòeq ka wì haq jah loq ìh khoe thê au trùh”. **43** Khoe ka anoe qmang aih, haq creo cadêh “Laxaru! loh beq”. **44** Mangai cachìt hi cadiang loh, bai lòm hanang oe raq kàt da haq jènh tì, mù oe raq tù da haq hadrò. Chuaq Jesus doe ka wì: “Lêh dǒng bai qmat, dôq haq jah lam”. **45** Bác ngai Juđa ma trùh đòeq hu alòng Mari hnoq yiniq Chuaq Jesus broq, wì hi lùi haq. **46** Mahaq i qnah ngai lam chaq bài mangai Pharsi anoe ka wì aih loq yiniq Chuaq Jesus khoe broq. **47** Bòe pajàu kàn xam mangai Pharsi tagop ti dabau ta hnìm hadrah, wì doe: Mangai kô broq bác kan halac, bèn broq qmang leq kô èh? **48** Tàng joq bèn xan dôq haq broq yôt qmang kô, trùh wì ma lùi dǒng haq, jò aih èh hnìm kùh waiq xam taneh diac bèn, mangai Rôma trùh tacô raliang đac dǒng. **49** Khoe aih i mòeq ngai yiniq haq Caiphe, hanam aih haq broq cla craq pajàu kàn, haq doe: Pì ùh lòm qnì qmòe cleq! **50** Pì ùh hèm tàng mòeq ngai cachìt am dìq dǒng ka mangai aih ajoq yeo lem ùh hnau dìq ka taneh diac kô lùng pac dǒng. **51** Bàu aih ùh xài cla haq anoe đeh, mahaq hanam aih haq broq cla craq pajàu kàn, haq tapoch pajàu trùh Chuaq Jesus padon cachìt am dìq dǒng ka mangai, **52** èh ùh xài toq ka taneh diac aih mahaq xam dìq dǒng ka kon Boc plình ma khoe prah priang, đòeq hu tagop ahlài wì haq dôq wì haq wìa mòeq. **53** Pang hì aih wì hi chaq trong jêh cađac haq. **54** Dài aih ìq, Chuaq Jesus lam ta gùng Juđa, mahaq pi am bác ngai loq, Chuaq Jesus cađac ta aih haq lam mùt tagùng haten ka đùng hawit, trùh ta plài Epra-im haq hi oe ta aih đèh ti bòe mangai

tiaq hōc. **55** Hì ramènħ Pan cwa da mangai Juđa ten trùh, bắc ngai tōc ta Jerusalem adroe ka hì ramènħ basrōeh. **56** Wì haq ti chaq Chuaq Jesus, oe ta hñim kùh waiq wì haq bòch dabau: Pì hèm qmang leq cadèh? Haq aih ma ùh tōc hàu ta hì ramènħ kô qmòh? **57** Mahaq bài pajàu kàn xam mangai Pharisi khoe tanap bàu waq toq cabô hnoq Chuaq Jesus oe taleq, mangai aih ep lam anoe ka wì haq loq đòeq wì haq hu rùp Chuaq Jesus.

12 Tadràu hì adroe ka ramènħ Pancwa, Chuaq Jesus mùt ta plài Béthani, aih nòe Laxaru, mangai Chuaq Jesus khoe broq haq rìh hlài enh kan cachìt. **2** Wì padon yiniang ka Chuaq Jesus acaq ta aih, Mathê ti patìh, Laxaru hadai hangui ti wì ma acaq pajùm aniang ti haq. **3** Mari yōc qne lit dàu xua thùm canaq bac, haq pùc dàu aih ta jènh Chuaq Jesus èh yōc deh xàc gàu xùt da haq jènh. Ta hñim aih bìn dōng kan xua thùm. **4** Mahaq i mòeq ngai tiaq hōc, yiniq haq Juđa, mangai atìq kô èh ma blòq Chauq Jesus, haq doe: **5** Hagleq ma ùh tech dàu kô hu yōc bac đòeq am ka mangai pa? Dàu qmat mòeq hanam abroq men plàih. **6** Haq anoe qmang aih ùh xài haq loq hèm trùh mangai pa, mahaq haq aih mangai loq atùng, haq mangai wèq bac jèn xan bōc yōc atùng bac wì tah ta aih. **7** Chuaq Jesus doe: “Paq troq dèh ka haq, haq khoe palauq dàu qmat đòeq trùh hì hu lòm hanang au. **8** Jò leq ma ùh i ka mangai pa oe dudan ti pì, mahaq au ma i oe yōt ti pì”. **9** Jò aih haraya mangai Juđa loq ka Chauq Jesus oe ta aih, wì trùh ùh xài đòeq hnoq toq Chuaq Jesus, mahaq hu ngan hloe xam Laxaru, mangai Chuaq Jesus khoe broq rìh hlài enh kan cachìt. **10** Bài mangai pajàu kàn hadai

chaq trong jêh cađac hloe xam Laxaru. **11** Ajang Laxaru aih raq majah i bàc ngai Juđa rai trùh rai lùi Chuaq Jesus. **12** Hì atìq, pi cajaq mangai tōc hàu Ramènh Pancwa, tàng doe Chuaq Jesus qnang tōc ta Jérusalem. **13** Wì hlêh hla triaq, tûh loh ta Chuaq Jesus rai cachech: Hôsana! Xôq ramot am ka mangai trùh enh dalam yiniq Chuaq. Xôq ramot ka bùa Isorali! **14** Chuaq Jesus hnoq mòeq toq lùa qyoh, Haq tōc hangui enh crõng lùa aih, qmang ka bùa khoe achìh: **15** “Kon adrùh Siôn! Apaq crè, Ngan meh, bùa pì qnang trùh, Hangui enh crõng lùa qyoh.” **16** Jò baxèm aih, mangai tiaq hõc ùh qnì bài biac kô. Trùh atìq ka jò Chuaq Jesus khoe jah ranhòm wì haq men hmàng hlài bài bùa aih khoe achìh trùh haq, wì broq qmang aih dôq xìt ka bùa aih gêh. **17** Bài mangai ma oe ti Chuaq Jesus jò haq creo ka Laxaru loh enh ralùng rai broq ka haq rìh hlài, hadai ùh hêq ka anoe yôt biac aih. **18** Bàc ngai khoe tàng doe Chuaq Jesus broq trong halac kô, aih ìq bài wì majah loh đìh Chuaq Jesus. **19** Mangai Pharisi ta anoe ka da bau: Pì ahnoq rađeh ùh broq cleq jah, ngan tau, dìq ka phù cròng tiaq dõng haq! **20** Jò wì ma tōc kùh waiq ta hì Ramènh, ta aih i mangai Gorec, **21** trùh ajang Philip mangai Bet-saïđa gùng Galili, wì haq doe: wì craq! nhèn enh hnoq đeh Chuaq Jesus! **22** Philip lam doe ka Anrê, Anrê xam Philip lam anoe ka Chuaq Jesus. **23** Chuaq Jesus padreo bùa: “Jò Kon Mangai jah kan ranhòm khoe trùh. **24** Joq qnàng, joq qnàng au anoe ka pì, tàng joq pliang adrech qmau tau ùh cachìt, atìq ka jò haq khoe jah rai ta taneh aih èh haq oe moe dèh qmang aih raq. Mahaq tàng joq haq cachìt, aih èh haq men jah loh qmòe

ka bàc. **25** Mangai leq loq waq dèh toq kan rìh cla, aih èh hnhung, mangai leq git deh kan rìh cla ta qnhòng kô, haq aih èh jah wèq hlài dèh trùh ta qnhòng rìh halinh mòeq đòe. (aiōnios g166) **26** Mangai leq patih ka au, ep tiaq au, èh au oe taleq mangai patih hadai ep oe ta aih, tàng cabô patih ka au, Baq au ta-iu ka mangai aih... **27** Manòeq kô mahua yiang au ma nhài ùh catèm, au anoe cleq kô èh? Waiq Baq! dèch kon khoe ka jò kô! mahaq taiq jò kô raq kon majah khoe trùh. **28** Baq! broq ka cla yiniq ìh jah qngah qngai.” Wop jò aih, i bàu enh plinh doe: Au khoe broq qngah qngai yiniq au, au oe raq broq dôq qngah qngai hòm! **29** Wì ma oe ta aih tàng bàu aih wì doe: Tróc hilùng, i qnah ngai doe: I bình plinh loh hatuàng ka haq. **30** Chuaq Jesus doe: “Bàu kô ùh xài am ka au, mahaq đòeq am ka pì. **31** Manòeq kô i kan hadrah ka crōng taneh kô, hanoh manòeq kô raq bùa crōng taneh kô ep drùh qnoh đac. **32** Yàng da au kô hòm, jò chac au jah dèch atua khoe ka taneh, aih èh au hi aràng dìq ka mangai trùh ti au”. **33** Haq doe bàu kô đòeq hu anoe rađeh cachìt qmang leq. **34** Bài mangai ta aih doe: Nhèn i hốc ta hset ranenh doe Christ rìh mòeq đòe, wìa ka ìh doe: Kon Mangai ep dèch atua haqnhèq? Kon mangai aih ìq cabô? (aiōn g165)

35 Chuaq Jesus padreo bàu: “Kan qngah oe taqne pì toq biaq hòm, cadiang lam jò oe raq i kan qngah, adroe ka kan clam trùh enh qnhèq ka pì. Mangai cadiang lam ta clam ùh qnì ka rađeh qnang lam taleq. **36** Pì qnang i kan qngah, drah lùi kan qngah aih, dôq pì wìa kon da kan qngah”. Jò khoe hêq ka capoch qmang aih, Chuaq Jesus puplech hangai ka wì. **37** Yac ka Chuaq Jesus khoe broq

bàc trong halac enh ngèa wì, dua wì ùh lùi haq. **38** Qmang aih dôq xìt qmang ka bàu pajàu Êsai khoe doe: Chuaq! cabô ma khoe lùi bàu nhèn anoe Tì Chuaq khoe paqnoh am ka cabô? **39** Wì majah ùh lùi, taiq ajang qnoeq Êsai i doe: **40** Haq khoe broq ka mat wì ùh xau hnoq, manoh wì cadoq, Yùq mat wì loq hnoq, manoh wì loq tàng, Wì haq wìh hlài, èh au loq broq wì haq jah brêh qmòh! **41** Êsai capoch bàu kô, haq anoe trùh Chuaq Jesus majah qmang aih haq khoe hnoq kan ranhòm Chuaq Jesus. **42** Hnoq anoe qmang aih, jò aih taqne bài cwan ma broq gäu i bàc ngai lùi Chuaq Jesus, mahaq wì haq ùh hùa anoe qnoh, majah qmang aih wì crè ka bài mangai Pharis loq hnan qnoh wì haq enh gùng ka hnim tagop. **43** Aih iq, wì haq enh waq kan ranhòm da kon mangai ùh hnau kan ranhòm da Boc Plình. **44** Khoe aih, Chuaq Jesus tapoch qmòe cadêh: “Cabô lùi au ùh xài lùi mòeq ngai au, mahaq lùi Mangai ma khoe thê au; **45** mangai leq hnoq au, aih hnoq Mangai thê au. **46** Au khoe trùh đòeq hu broq kan qngah ta crõng taneh, dôq ka mangai leq lùi au pi hìaq oe raq ta kan clam cluiq hòm. **47** Tàng mangai leq tamàng bàu au, mahaq ùh wèq tiaq bàu aih, au ùh i tahadrah ka haq aih, majah qmang aih au trùh ùh xài hu hadrah crõng taneh kô, mahaq hu dèch crõng taneh kô. **48** Khoe i kan hadrah ka mangai leq ma cwaih cađac au, ùh dì yōc bàu au, bàu au khoe capoch, bàu aih raq ma hadrah wì haq ta hì pulùch. **49** Majah qmang aih dìq ka bàu au anoe, ùh xài au anoe tiaq deh manoh cla, mahaq Baq khoe thê au trùh. Haq khoe am bàu đòeq au hu anoe hu hnài. **50** Au loq bàu Haq thê, aih kan rìh halình mòeq đòe. Qmang

aih, bàu au anoe, aih anoe tiaq bàu Baq au khoe thê”.

(aiōnios g166)

13 Adroe ka hì ramènh Pancwa, Chuaq Jesus loq khoe ten trùh jò rađeh padon cađac crõng taneh đòeq hu hlài deh ti Baq, haq khoe loq waq deh ka mangai da haq oe ta crõng taneh kô aih haq loq waq trùh lùch trùh gêh. **2** Qnang jò acaq di xèq, kan kiac baxrùq manoh Juđa icariôt, kon Simôn đòeq haq blòq Chuaq Jesus. **3** Chuaq Jesus loq Baq khoe jao ta tì dađeh rìm yiniq, majah qmang aih haq khoe trùh enh Boc Plình, manđeq padon wìh hlài ta Boc Plình, **4** Jò acaq, haq padinh yòng, lêh deh eo enh gùng, yōc mù kàt ajang caqnam. **5** Èh haq ùc diac ta khai hi qnheo jènh mangai tiaq hõc, khoe aih haq yōc mù ma kàt ti caqnam hi xùt waq ka srênh. **6** Haq trùh ajang Simôn Phiero, Phiero doe: Chuaq au! Wìa ka ìh qnheo jènh au qmòh? **7** Chuaq Jesus padreo bàu: “Manđeq kô ìh qnhòq qnì trong au ma qnang broq, mahaq atìq èh ìh hi loq”. **8** Phiero doe: Ùh đòh! ùh jò leq au dôq ìh qnheo da au jènh. Chuaq Jesus doe: “Tàng joq au ùh qnheo jènh ìh, aih èh ìh ùh i pajùm cleq ti au”. (aiōn g165) **9** Simôn padreo bàu: Chuaq au! Tàng qmang aih, ùh xài toq qnheo jènh, ìh qnheo hloe xam tì xam gàu au diq. **10** Chuaq Jesus doe: “Mangai khoe hùm, qnheo toq jènh raq hi hreο, pì khoe jah hreο, mahaq ùh xài rìm ngai”. **11** Majah qmang aih Chuaq Jesus loq cabô ma padon blòq haq, dài haq majah doe: “Ùh xài rìm ngai khoe jah hreο”. **12** Jò qnheo da wì jènh hi khoe, Chuaq Jesus caxùnh dèh eo, lam hangui hlài dèh anòe acaq, haq bòch wì: “Pì aloq yiniq au ma neo broq am ka pì qmat?

13 Pì doe au: Mangai hnài, creo au Chuaq pì, aih troq, au joq qmang aih, **14** tàng au Chuaq pì, mangai hnài pì, khoe qnheo jènèh pì, qmang aih pì hadai ep qnheo jènèh da bau. **15** Majah qmang aih, au khoe broq dua đòeq pì hnoq, dôq pì hadai broq qmang ka au khoe broq ka pì.” **16** Joq qnàng, joq qnàng au doe ka pì, hapđong ùh yeo kàn hnau cla wì craq, mangai loh lam ùh yeo kàn hnau ka mangai thê lam. **17** Tàng pì loq bài yiniq kô rai broq tiaq aih èh pì jah xôq ramot. **18** Au ùh i anoe ka pì rìm ngai, au loq dèh mangai leq au khoe ràih, mahaq waq ka jah xít qmang ka bàu Hset Hadròeh: Mangai hmaq acaq bênh au, dèch lùn jènèh blòq au. **19** Manđeq kô au chônh anoe adroe ka pì jò bài yiniq aih qnhòq trùh, đòeq jò yiniq aih trùh, pì hu jah loq au kô raq Mangai aih. **20** Joq qnàng, joq qnàng au anoe ka pì, cabô đìh mangai au thê, aih đìh au, cabô đìh au aih đìh Mangai thê au”. **21** Atìq ka anoe bàu aih, Chuaq Jesus manhài ùh catèm ta manoh, Haq doe: “Joq qnàng, joq qnàng au doe ka pì, taqne pì i mòeq ngai padon blòq au”. **22** Mangai tiaq hõc ti ngan dabau, ùh qnì qmòe haq ràu trùh cabô. **23** Taqne mangai tiaq hõc i mòeq ngai Chuaq Jesus ma loq waq, jò aih haq hangui hatìa ka Chuaq Jesus. **24** Simôn Phiero kùh gàu ka haq thê haq aih bòch ngan Chuaq Jesus enh anoe trùh cabô. **25** Haq chinh rađeh angèn ajang rada Chuaq, haq hi bòch: Chuaq au! aih ìq cabô? **26** Chuaq Jesus padreo bàu “Aih mangai au padon am ka haq haqnech bênh au khoe chùq diac kô”. Èh Chuaq Jesus yõc mòeq haqnech bênh chùq ta diac khoe aih am ka Juđa, kon da Simôn Icariôt. **27** Draq drình hloe jò Juđa hnhu tì yõc bênh, Satan mùt

enh dalam ka haq. Chuaq Jesus doe ka haq: “Ìh broq deh cleq, drah broq beq”. **28** Mahaq dìq ka wì hangui acaq ta aih, ùh i mangai leq qnì hagleq Chuaq Jesus majah thê haq qmang aih. **29** Majah qmang aih Juđa mangai wèq bac, qnah ngai hèm Chuaq thê haq lam rot dahnwèq palauq đòeq ka hì ramènh, tàng ùh meh yōc bac ti am ka mangai pa. **30** Juđa yōc bênh hi loh lam. Jò aih trōc khoe clam. **31** Jò Juđa khoe lam, Chuaq Jesus doe: “Manđeø kô khoe trùh jò Kon Mangai jah ranhòm, Boc Plình hadai jah kan ranhòm enh dalam ka haq. **32** Tàng joq Boc Plình ranhòm enh dalam ka haq, aih èh Boc plình hadai dèch kan ranhòm ka Kon Mangai enh dalam cla Boc Plình, Boc Plình broq qmòe manđeø kô raq. **33** Yôiq yôiq wì kon! Au oe tam ti pì toq biaq hòm, kô èh pì ti chaq au, tìah ka au anoe ka mangai Juđa: Nòe au lam pì lam ùh jah, manđeø au hadai anoe ka pì bàu aih. **34** Au am ka pì ranenh neo: aih pì ep loq waq ka dabau! tìah ka au khoe loq waq ka pì qmang leq, pì hadai loq waq ka dabau qmang aih”. **35** Tàng joq pì loq waq ka dabau, ajang aih èh wì phù cròng ma canau pì joq qnàng mangai tiaq hōc da au”. **36** Simôn doe: Chuaq au! Ìh lam taleq? Chuaq Jesus padreo bàu: Nòe au lam, manđeø ìh tiaq ùh jah, mahaq hì atìq èh ìh ma tiaq au”: **37** Phiero bòch: Chuaq au! Hagleq manđeø au ma ùh jah tiaq ìh? Au hùa tamùa hu tiaq ìh. **38** Chuaq Jesus padreo bàu: “Ajoq ìh hùa tamùa hu tiaq au? Joq qnàng, joq qnàng, au doe ka ìh jò ia qnhòq rōng ìh khoe piq yàng hangah đeh ùh qnì ka au”.

14 Manoh pì ùh dùh manhài dèh, pì lùi Boc Plình, pì hadai ep lùi au. **2** Hnim Baq au i bac nòe oe, tàng ùh

qmang aih, ajoq au khoe doe ka pì au lam adroe đòeq padon ka pì mòeq nòe oe? 3 Jò au khoe lam padon ka pì nòe, aih èh au wìh hlài đòeq hu aràng pì oe ti au, dôq au taleq pì hadai oe ta aih. 4 Pì loq au lam taleq, pì hadai loq trong lam. 5 Thôma bòch Chuaq Jesus: Chuaq au! nhèn ùh qnì ìh lam taleq, aih broq qmang leq nhèn ma loq ka trong lam? 6 Chuaq Jesus padreo bàu: “Au kô raq trong lam, bàu joq qnàng xam kan rìh”. Enh gùng ka au ùh i cabô jah trùh ti Baq. 7 Tàng joq pì loq ka au, pì hadai loq ka Baq au. Pang kô ta èh pì loq ka Haq, pì hadai khoe hnoq haq. 8 Philip doe: Chuaq au! ìh patô am ka nhèn hnoq đeh Baq diq, toq aih raq khoe hêq. 9 Chuaq Jesus padreo bàu: “Philip, au oe ti pì khoe dùnh, pì qnhòq qnì ka au! Cabô khoe hnoq au aih khoe hnoq Baq. Gleq ìh majah doe: Patô am nhèn jah hnoq đeh Baq?”: 10 ìh ma ùh lùi au oe enh dalam ka Baq, Baq oe enh dalam ka au qmòh? Dìq ka bàu au anoe ka pì, aih ùh xài cla au capoch đeh mahaq aih Baq rìh enh dalam ka au, cla Haq abroq gêh đèh bìac da haq. 11 Jò au doe au oe ti Baq, Baq oe enh dalam ka au, pì drah lùi au, ùh meh lùi bài yiniq au khoe broq. 12 Joq qnàng au doe ka pì, cabô lùi au, hadai jah broq yiniq au ma broq èh broq kèn ùh hnau ka aih hòm, majah qmang aih au hlài đèh ta Baq. 13 Pì canòm ka yiniq au đòeq bòch cleq, dua au am ka pì, waq ka Baq jah kan ranhòm ajang Kon. 14 Pì canòm ka yiniq au yac ka bòch cleq, dua au broq am ka pì”. 15 Tàng joq pì loq waq ka au, aih pì wèq bàu au khoe thê. 16 I au bòch Baq dôq haq am ka pì Yang along maqnoeq đòeq hu oe hloe ti pì, (aiōn g165) 17 aih Yang bàu joq qnàng. Cröng taneh kô ùh jah

yōc haq, majah qmang aih wì ùh xau hnoq haq, wì hadai ùh qnì ka haq. Mahaq pì loq ka haq, majah qmang aih haq rìh ti pì, oe enh dalam ka pì. **18** Au ùh cađac pì tìah lac lai. Au trùh ti pì; **19** oe toq biaq hòm, mangai oe crōng taneh kô pi jah hnoq au, mahaq pì jah hnoq au, majah qmang aih au rìh pì hadai jah rìh. **20** Hì aih, pì hi canau au oe enh dalam ka Baq au, pì oe enh dalam ka au, au oe enh dalam ka pì. **21** Mangai leq i ranenh au rai wèq tiaq, aih mangai ma loq waq ka au. Mangai leq ma loq waq ka au, Baq au hadai loq waq chau ka haq aih, au hanoh loq waq ka haq rai patô rađeh ka wì haq. **22** Juđa, (ùh xài Ica-riot) doe: Chuaq au! Hagleq ìh majah doe ìh mahnu rađeh am ka nhèn mahaq ùh mahnu rađeh ka mangai crōng taneh kô? **23** Chuaq Jesus padreo bàu: “Mangai leq loq waq ka au, mangai aih iu bàu au hnài. Baq au loq waq ka haq aih, dìq ka nhèn trùh rai oe ti haq. **24** Mangai leq ùh loq waq ka au, mangai aih ùh tiaq bàu au hnài. Dìq ka bàu pì tàng aih ùh xài bàu cla au, mahaq loh enh Baq, haq aih mangai ma thê au trùh. **25** Dìq ka bái yiniq aih au khoe anoe jò au oe raq oe ti pì. **26** Mahaq jò Yiang alòng, aih la Yiang Hadròeh, Baq canòm ka yiniq au đòeq thê trùh. Haq aih èh jah hnài pì rìm trong, bahmàng pì hmàng hlài rìm yiniq au anoe ka pì. **27** Au đòeq ka pì kan catèm, au am ka pì kan catèm da au, kan catèm au am ka pì ùh xài qmang da crōng taneh am. Manoh pì apaq rawè hadai apaq yùq. **28** Pì khoe tàng au doe: Au padon lam hangai khoe aih au tawìh hlài ta pì. Tàng pì loq waq ka au, aih èh pì lem bùi jò au hlài deh ta Baq, majah qmang aih Baq yeo kàn ka au. **29** Manòeq kô au chônh anoe am ka pì,

adroe ka bài yiniq aih trùh, đòeq jò bài yiniq aih trùh pì hu lùi. **30** Au pi anoe ka pì cleq bac hòm, majah qmang aih bùa da crõng taneh kô qnang padon trùh. Haq aih ùh i cwìang cleq enh qnhèq ka au; **31** mahaq đòeq ka crõng taneh kô loq au loq waq deh ka Baq, au broq troq tiaq bàu Baq au thê. Drah yòng! beq bèn loh khoe enh kô.”

15 Au kô raq rangàu nho joq qnàng, Baq au Mangai pì. **2** Hamenh leq ta au ma ùh loh plì, Haq sri dõng, Haq trêh palauq bài hamenh ma loh plì dôq plì top ùh hnau hòm. **3** Pì khoe jah sròeh canòm ka bàu au khoe doe ka pì. **4** Pì ep oe yôt enh dalam au tìah ka au hadai oe enh dalam ka pì. Tìah ka hamenh nho tàng joq haq ùh hatop ajang rangàu tùn nho, aih haq ùh loh plì, hadai qmang aih tàng joq pì ùh oe yôt enh dalam ka au, pì hadai ùh loh plì. **5** Au kô raq tùn nho, pì aih hamenh. Mangai leq oe yôt enh dalam ka au, au oe enh dalam ka haq aih èh loh plì ma bac, majah qmang aih enh gùng ka au, pì ùh i broq cleq jah. **6** Tàng joq mangai leq ùh oe yôt enh dalam ka au, haq aih èh ep khwênh qnoph cađac enh gùng, tìah ka hamenh nho, hamenh hi croh, wì toch khwênh ta ùnh haq hi cheo. **7** Tàng pì oe yôt enh dalam ka au èh bàu au hadai oe yôt enh dalam ka pì, bòch beq yiniq cleq pì enh aih pì hi jah. **8** Ajang kô ma broq ka yiniq Baq au jah qngah: Aih pì loh plì bac, qmang aih èh mangai tiaq hõc da au. **9** Tìah ka Baq khoe loq waq ka au qmang leq, au hadai loq waq ka pì qmang aih. Manòeq kô thê pì oe hloe ta kan loq waq au. **10** Tàng pì wèq ranenh au thê, aih pì jah oe hloe ta kan loq waq da au, tìah ka au wèq deh ranenh Baq au thê, au hanoh jah oe yôt ti kan loq waq

Haq. **11** Au anoe ka pì bài yiniq kô, đòeq kan lem bùi da au jah oe enh dalam ka pì, dôq kan lem bùi pì jah tôm xrôm. **12** Kô ranenh au thê: Pì loq waq ka dabau qmang ka au khoe loq waq ka pì. **13** Ùh i kan loq waq leq ma yeo kàn ùh hnau kan loq waq chìuq cachìt am deh ka bua. **14** Tàng joq pì broq tiaq bàu au hnài, aih pì joq bua au. **15** Au pi creo pì hapõng hòm, majah qmang aih hapõng ùh qnì wì craq broq cleq, mahaq au khoe doe pì kô bua au, majah qmang aih au khoe anoe ka pì loq rìm yiniq au tàng deh enh Baq au. **16** Aih ùh xài pì khoe ràih au, mahaq au ma khoe ràih rai dèch paqnàng pì, đòeq pì loh lam, dôq plì da pì jah top hloe, èh Baq hadai am tam ka pì rìm trong pì canòm ka yiniq au đòeq bòch Haq. **17** Kô ranenh au thê: Pì ep loq waq ka dabau. **18** Tàng wì phù cròng tagit ka pì, aih pì loq wì khoe git ka au adroe ka pì. **19** Tàng pì mòeq bua ka crõng taneh kô, aih èh crõng taneh kô loq waq deh ka bua, mahaq au khoe ràih pì taqne crõng taneh kô pì ùh mòeq bua ka wì haq, aih ìq dài crõng taneh kô majah git ka pì. **20** Ep hmàng bàu au khoe anoe ka pì: Hapõng ùh yeo kàn ùh hnau ka cla wì craq, tàng wì khoe rùp pani baxa au, wì hadai rùp pani baxa pì. Tàng wì iu bàu au hnài aih èh wì hadai iu bàu pì hnài. **21** Mahaq taiq yiniq au, wì yōc bài trong aih hu baxa pì, majah qmang aih wì qnì ka Mangai khoe thê au trùh. **22** Tàng joq au ùh trùh hu hnài wì haq, aih wì haq ùh i ka yiniq lui cleq, mahaq manoèq kô wì haq pi jah aclai dèh yiniq lui hòm. **23** Cabô git ka au hadai git ka Baq au. **24** Tàng joq au ùh broq taqne wì haq trong qnhòq hmaq i cabô broq, aih wì haq ùh i ka yiniq lui cleq,

mahaq manoèq wì haq khoe hnoq, mahaq dua wì haq git ka au xam Baq au. **25** Mahaq ajang kô aih dôq xìt qmang ka bàu khoe achìh ta hset ranenh wì haq: Wì git ka au ùh i qmòe ka yiniq. **26** Jò Yiang alòng hi trùh, aih Yiang enh Baq, au thê haq trùh ta pì, aih Yiang da bàu joq qnàng loh enh Baq, Haq aih èh ma yòng anoe panhìn am ka au; **27** xam bài pì, hadai yòng anoe panhìn am ka au, majah qmang aih pì khoe oe qmòe ti au enh jò baxèm.

16 Au khoe anoe ka pì dìq ka bài yiniq kô, dôq pì ùh hìaq catoeh cro. **2** Wì hnan qnoh cađac pì loh enh gùng ka hñim tagop qyoh, ma joq qnàng tangèa kô èh jò wì jêh cađac pì, aih cla wì xoh dèh wì qnang dèch ramènh patìh ka Boc Plìngh. **3** Wì majah broq qmang aih, taiq wì ùh qnì ka Baq, wì hadai ùh canau ka au. **4** Au khoe doe ka pì bài yiniq kô, đòeq trùh jò da wì, pì jah hmàng hlài au khoe anoe ka pì. Enh baxèm au ùh doe ka pì bài yiniq kô majah qmang aih au oe raq oe ti pì. **5** Manòeq kô au padon hlài dèh ta Mangai khoe thê au trùh, pì ùh i cabô leq bòch au: ìh padon lam taleq? **6** Mahaq au anoe bài yiniq kô ta manoh pì bình bauq kan mangò. **7** Mahaq au doe qnàng ka pì: Au lam aih troq ka pì. Tàng au ùh lam, Yiang alòng ùh trùh ta pì, mahaq tàng au lam, au jah thê Haq trùh ta pì. **8** Jò Haq trùh, haq broq ka crõng taneh kô canau deh kan yiniq lui, kan taq toq xam kan hadrah; **9** kan yiniq lui aih taiq wì haq ùh lùi au, **10** kan taq toq, aih taiq au hlài dèh ta Baq, aih èh pì pi hnoq au hòm, **11** kan hadrah, aih taiq bùa crõng taneh kô khoe pòq kan hadrah. **12** Au oe i bàc yiniq hu anoe ka pì, mahaq bài yiniq aih manòeq kô padren pì qnhòq hlàt wê. **13** Mahaq jò Yiang da Bàu

joq qnàng hi trùh, Haq aih èh ma hu ajèn qmùt pì tarìm
bàu joq qnàng, majah qmang aih Haq ùh capoch đeh,
mahaq anoe yiniq haq ma khoe tàng, rai anoe am ka pì
loq bài yiniq padon trùh ta ngèa kô èh. **14** Haq aih èh ma
paqngah Yiniq au, majah qmang aih Haq yōc bài yiniq
enh au đòeq hu anoe am ka pì. **15** Dìq rìm yiniq Baq i, aih
jah au, dài au majah doe: Haq yōc bài yiniq enh au đòeq
hu anoe am ka pì loq. **16** Chuaq Jesus anoe hòm: “Oe toq
biaq hòm pì pi hnoq au, khoe ka aih toq biaq pì hi jah
hnoq au”. **17** Jò aih, i toq biaq ngai tiaq hōc hatuàng ka
dabau: Oe toq biaq hòm pì pi hnoq au, khoe ka aih toq
biaq, pì hi jah hnoq hlài au, aih haq doe: Au hlài dèh ta
Baq. Qmang aih ìq qmang leq? **18** Mangai tiaq hōc tabòch
yôt dabau: Oe toq biaq hòm aih ìq haq doe cleq? Bèn ùh
qnì tàng qmòe haq anoe cleq. **19** Jesus hnoq wì enh bòch,
Haq doe ka wì: “Ajoq pì bòch dabau au anoe cleq jò au
doe: Oe toq biaq hòm pì pi hnoq au hòm, èh khoe ka aih
toq biaq pì hi jah hnoq hlài au? **20** Joq qnàng, joq qnàng
au doe ka pì, kô èh pì jah crò hmoe, wì crōng taneh jah
lem bùi, pì jah kan mangò mahaq kan mangò da pì jah
wìh wìa kan bùi lem. **21** Mangai gucadri jò hauang aih
jìq pi cajaq, majah qmang aih khoe trùh dèh jò, yàng jò
kon khoe jah clìh enh cliac, haq pi hmàng dèh kan jìq
hòm, toq lem bùi jò hnoq đeh khoe jah hauang qnoh
mòeq ngai ta crōng taneh kô. **22** Qmang ka pì manòeq kô
qnang mangò, mahaq au jah hnoq hlài pì, jò aih pì hi
lem bùi, ùh i cabô jah qnung yōc da pì kan lem bùi aih.
23 Hì aih èh pì pi oe bòch au cleq hòm. Joq qnàng, joq
qnàng au doe ka pì, enh dalam ka yiniq au pì bòch cleq

dua Baq am ka pì. **24** Trùh manoèq kô pì qnhòq canòm ka yiniq au đòeq hu bòch cleq. Bòch beq aih pì hi jah, dôq kan lem bùi pì jah gêh geo. **25** Au khoe alìah ka pì bài yiniq aih. Kô èh au pi yōc bàu alìah đòeq anoe ka pì hòm, mahaq au capoch hloh dôq pì loq ka Baq. **26** Hì aih èh, pì hi yōc yiniq au đòeq hu bòch. Au ùh i doe au bòch am ka pì. **27** Ủh! Cla Baq raq ma loq waq ka pì, majah qmang aih pì khoe loq waq ka au rai lùi au trùh enh Baq. **28** Au khoe loh enh Baq đòeq trùh ta crōng taneh, manòeq kô au cađac crōng taneh kô đòeq hu hlài đèh ta Baq. **29** Mangai tiaq hōc doe: Manòeq kô ìh khoe capoch hloh, pi hìa capoch alìah hòm. **30** Manòeq kô nhèn loq ìh loq rìm trong, ùh ep ka cabô bòch ìh, ajang aih nhèn loq ìh loh enh Boc Plình. **31** Chuaq Jesus doe “Ajoq manòeq kô pì khoe lùi? **32** Khoe ten trùh jò, majoq qnàng aih khoe trùh, aih jò đìq ka pì mangai haprah hapriang đeh hra, cađac au oe đeh mòeq ngai, mahaq au ùh oe đeh mòeq ngai, majah qmang aih Baq oe ti au. **33** Au khoe anoe ka pì qmang aih dôq manoh pì jah kan catèm ta au. Pì glàm bàc kan ranàc kàn ta crōng taneh kô, mahaq cajap manoh oq, au khoe blêq crōng taneh kô.”

17 Atìq ka anoe bàu kô, Chuaq Jesus qngoc ngan ta plình rai waiq khàn: “Baq! khoe trùh jò, ìh broq dôq on jah kan ranhòm, đòeq kon hadai jah đèch kan ranhòm ka baq; **2** ma jah qmang aih baq khoe am ka kon cwìang enh qnhèq đìq dōng ka rìm ngai, đòeq Kon jah am kan rìh halình mòeq đòeq ka mangai ìh ma khoe am ka kon. (aiōnios g166) **3** Manòeq kô, kan rìh halình mòeq đòeq aih ìq: Canau ka Baq rai loq toq ìh raq Boc Plình joq qnàng,

xam Jesus Christ mangai ìh khoe thê trùh. (aiōnios g166) 4

Kon khoe dèch kan ranhòm ka baq ta crōng taneh, broq gêh trong baq thê broq. 5 Manðeq kô Baq! ìh broq ka kon jah ranhòm enh ngèa ka ìh xi kan ranhòm kon khoe i qmòe andè ìh, adroe ka jò i crōng taneh. 6 Kon khoe paqnoh yiniq ìh am ka bâi mangai ìh ma khoe am ka kon taqne crōng taneh kô, wì haq mangai da Baq, ìh khoe am ka kon, wì haq khoe wèq bàu ìh. 7 Manðeq kô, wì haq khoe loq rìm yiniq ìh am ka kon aih dìq trùh enh Baq. 8 Majah qmang aih, au khoe am hlài ka wì bàu baq ma am ka kon, wì haq khoe wèq yōc bàu aih. Wì haq loq joq qnàng Baq khoe thê kon trùh. 9 Kon waiq khàn ka wì haq, ùh xài waiq khàn ka crōng taneh kô, mahaq waiq khàn ka mangai baq khoe am ka kon, majah qmang aih wì haq mangai da ìh. 10 Rìm yiniq da kon i aih da Baq, rìm yiniq da baq i aih da kon. Èh ajang wì haq kon jah kan ranhòm. 11 Kon pi oe dùnh ta crōng taneh kô hòm, mahaq wì haq oe raq ta crōngtaneh kô, kô èh kon bròc ta baq. Baq Hadròeh, ìh wèq wì haq ta yiniq cwiang i tai da ìh, yiniq ìh ma khoe am ka kon, dôq wì haq wìa mòeq tìah ka bèn aih mòeq. 12 Jò kon oe raq ti wì haq, kon khoe wèq wì haq jah catèm ta yiniq baq, aih yiniq ìh am ka kon. Enh gùng ka mòeq ngai kon da kan lùng pac, ta qne wì haq ùh hnhung mòeq ngai, dôq bàu Hset Hadròeh jah xít. 13 Manðeq kon hlài ta baq, mahaq kon anoe bâi bàu kô jò kon oe raq ta crōng taneh, dôq ta manoh cliac wì haq jah bình kan lem bùi da kon 14 Au khoe am ka wì haq bàu ìh, crōng taneh kô tagit ka wì haq, majah qmang aih wì haq pi xài mangai da crōng taneh kô tìah ka kon hadai

ùh xài mangai da crōng taneh kô. **15** Kon ùh waiq ìh dèch wì haq loh khoe crōng taneh kô mahaq waiq Baq wèq wì haq khoe ka mangai dù. **16** Wì haq ùh oe xài mangai da crōng taneh qmang troeq kon hadai ùh xài mangai da crōng taneh kô. **17** Waiq Baq yōc bàu joq qnàng broq wì haq jah hadròeh, bàu ìh aih bàu joq qnàng. **18** Qmang ka ìh khoe thê kon ta crōng taneh kô, au hadai thê wì haq ta crōng taneh kô. **19** Taiq wì haq kon majah broq rađeh hadròeh, đòeq wì haq hadai canòm ka bàu joq qnàng hu jah wìh wìa hadròeh. **20** Ùh xài kon waiq khàn am toq ka wì haq, mahaq waiq khàn hloe ka bài mangai ma lùi kon jò tàng bàu wì haq anoe, **21** dôq rìm ngai jah wìa mòeq, tìah ka Baq oe enh dalam ka kon èh kon hadai oe enh dalam ka Baq, đòeq wì haq hadai oe enh dalam ka bèn, waq ka crōng taneh kô lùi cla Baq khoe thê kon. **22** Kon khoe am ka wì haq kan ranhòm Baq ma khoe am ka kon, đòeq wì hadai pajùm broq mòeq tìah ka bèn kô dua mòeq raq: **23** Kon oe enh dalam ka wì, Baq oe enh dalam ka kon, qmang aih wì jah wìa mòeq gêh geo ti dabau. Aih èh crōng taneh kô hu jah ngan loq ih thê au, au hadai khoe loq waq ka wì haq tìah ka ìh khoe loq waq ka au. **24** Baq! Kon enh cla kon oe taleq bài mangai ìh khoe am ka kon hadai jah oe ti kon ta aih, đòeq wì haq jah ngan hnoq kan ranhòm da kon, aih kan ranhòm Baq khoe am ka kon, majah qmang aih Baq khoe loq waq ka kon adroe ka broq loh crōng taneh. **25** Baq tatoq ôi! Yac ka crōng taneh kô ùh lòm qnì ka ìh, mahaq kon loq ka ìh, wì kô hadai loq ìh khoe thê kon. **26** Kon khoe paqnoh yiniq Baq am ka wì haq loq, èh kon oe raq paqnoh hòm, dôq kan loq waq Baq

ma loq waq ka kon jah oe dalam wì haq, èh cla kon hadai
oe enh dalam ka wì haq.

18 Khoe ka waiq khàn, Chuaq Jesus xam mangai tiaq hōc
pùh tōc apah tau thòng diac Xêt-rôn. Ta aih i mòeq toq
wuàn, Chuaq Jesus xam mangai tiaq hōc mùt dōng ta aih.
2 Juđa mangai ma blòq Chuaq Jesus hadai loq nòe aih,
majah qmang aih Chuaq Jesus xam mangai tiaq hōc bàc
yàng tagop dabau ta aih. **3** Juđa qnung mòeq calùh lình,
xam bài mangai enh wì pajàu kàn xam bài mangai Pharisi
thê lam, wì haq wê hadreo xam ranac mùt ta aih. **4** Chuaq
Jesus khoe loq i yiniq padon trùh ka dađeh, haq cadiang
trùh bòch: “Pì chaq cabô?” **5** Wì aih padreo bàu: Nhèn
chaq Jesus mangai Naxaret. Chuaq Jesus doe: “Au kô raq!”
Juđa mangai blòq Chuaq Jesus hadai yòng ti wì ta aih. **6**
Jò Chuaq Jesus doe: “Au kô raq” wì aih talùi tacro dōng ta
taneh. **7** Chuaq Jesus bòch hòm: “Pì enh chaq cabô?” Wì
padreo bàu: Chaq Jesus mangai Naxaret! **8** Chuaq Jesus
doe hòm: “Au khoe doe ka pì hacô raq au, tàng joq pì
chaq rùp au, pì ep caqnaih wì kô lam. **9** Qmang aih dôq
xìt troeq bàu cla haq doe: “Au ùh cađac hnhung mòeq
ngai leq ìh ma khoe am ka au.” **10** Simôn Phiero i mòeq
rala chang, haq doeh chang jêh mangai hapōng da pajàu
kàn, koh catech da mangai aih don pah qma. Mangai
hapōng aih yiniq haq Manchu. **11** Mahaq Chuaq Jesus
thê Phiero: “Qmùt chang qmat ta caqnop beq, chrōng
Baq qnèp ka au wìa ka au ùh ôq qmòh?” **12** Khoe aih bài
lình xam cla craq, hloe xam đìq dōng bài mangai loh enh
mangai Juđa wiang rùp kàt Chuaq Jesus. **13** Baxèm aih, wì
aràng Chuaq Jesus trùh jang Anne, majah qmang aih haq

aih baq mai da Caiphe, hanam aih haq qnang broq craq pajàu haqnhèq. **14** Caiphe aih raq mangai ma khoe doe ka mangai Juđa rameh: Dôq mòeq ngai raq cachìt am dìq dǒng ka mangai qnoeq, ma aih yeo troq. **15** Simôn Phiero xam mòeq ngai tiaq hōc ma qnoeq lam tiaq atìq ka Chuaq Jesus. Mangai tiaq hōc aih i canau ka craq pajàu haqnhèq, aih ìq haq jah müt ti Chuaq Jesus ta hamlang hnim craq pajàu kàn. **16** Mahaq phiero aih haq yòng gòm enh gùng, haten ka trong qmang. Mangai tiaq hōc mangai ma i canau ka craq pajàu haqnhèq loh poch tuàng ka mangai hapōng cadrì ma gòm qmang, khoe aih haq hi qmüt Phiero müt diq. **17** Mangai hapōng cadrì ma gòm qmang aih bòch Phiero: ìh kô, hadai mangai tiaq hōc mangai tau, joq ùh? Mahaq Phiero doe: Au ùh xài. **18** Trōc tanget, dìq ka bái hapōng xam bái lình baxù tanùh ùnh, wì yòng dudan qnhìa ka hatôq. Phiero hadai yòng qnhìa ti wì. Craq pajàu haqnhèq bòch Jesus **19** Craq pajàu haqnhèq ti àu bòch trùh bái mangai tiaq hōc xam trong Chuaq Jesus loq hnài. **20** Chuaq Jesus doe: “Au hmaq anoe hloh yôt am ka wì phù cròng, jò leq au ma ùh hnài ta hnim tagop xam hnim kùh waiq, aih nòe dìq ka mangai Juđa tagop ti dabau, au qnhòq lah capoch cadoc qmòe yiniq cleq. **21** Hagleq pì ma ti àu bòch au? Drah lam bòch bòe mangai ma khoe lah tàng au hnài beq, wì aih loq au anoe cleq. **22** Jò Chuaq Jesus doe qmang aih, i mòeq ngai patìh ta hnim cwan yòng ten aih, dèch tì tep haq rai doe: ìh hùa hatèu ka craq pajàu haqnhèq qmang aih ayòq? **23** Chuaq Jesus doe: “Tàng joq au capoch ajang leq ùh troq, patô beq, tàng au anoe troq gleq ìh ma jêh au? **24** Khoe aih, jò wì

oe raq kàt, Anne thê wì aràng Jesus trùh ta hnìm Caiphe aih craq pajàu haqn hèq. **25** Jò aih Simôn Phiero oe raq yòng qnhìa ùnh, i mangai bòch haq: ìh kô hadai mangai tiaq hòc haq tau joq ùh? Phiero hangah: Au ùh xài. **26** I mòeq ngai hapõng da craq pajàu haqn hèq, hadròng ka mangai Phiero ma koh catech da haq don, doe: Ma ùh joq au hnoq ìh oe ta wuàn ôliu ti haq tau qmòh? **27** Mòeq yàng hòm Phiero hangah cađac hloe, wop jò aih raq ia hi rõng. **28** Khoe aih, bài gucraq Juđa qnung Chuaq Jesus enh hnìm Caiphe trùh tanòe hnìm hadarh Rôma. Jò aih oe raq sroeh sroq. Cla wì haq ùh waq mùt tanòe hadrah, wì waq ka dađeh jah sròeh đòeq hu acaq ramènh Pancwa. **29** Qmang aih, Philat cadiang loh bòch wì: Pì tah hadrah ka haq kô yiniq lui cleq? **30** Wì padreo bàu: Tàng haq kô ùh xài mangai dù, nhèn ùh aràng haq trùh ta ìh. **31** Philat doe ka wì: Cla pì rùp ahlài hadrah tiaq deh ranenh da cla pì beq. Wì padreo bàu: Nhèn ùh i cwìang hadrah jêh đac cabô. **32** Qmang aih waq ka xít qmang ka bàu Chuaq Jesus khoe anoe đeh cachìt qmang leq. **33** Philat wìh mùt tanòe hadrah, creo ka Chuaq Jesus hu bòch haq: ìh kô ajoq bùa mangai Juđa? **34** Chuaq Jesus bòch: “Aih ìq cla ìh capoch tiaq deh manoh, loq khoe i cabô anoe ka ìh loq ka au? **35** Philat padreo bàu: Au kô ìq ma mangai Juđa qmòh? Mangai cla pì xam bài pajàu kàn rùp ìh aràng ka au. ìh khoe broq yiniq lui cleq? **36** Chuaq Jesus doe: “Diac au ùh xài oe ta crõng taneh kô, tàng joq diac au oe ta crõng taneh kô, bài bua au khoe tajêh đòeq tát bài gucraq Juđa ùh dôq wì aih rùp au. Mahaq manòeq kô diac au ùh oe ta crõng taneh kô”. **37** Philat bòch hòm: Tàng qmang aih ìh

kô bàu joq qnàng qmòh? Chuaq Jesus tèu: “Joq qmang ka bàu ìh doe, au kô bàu, aih ìq raq au majah ha-uang loh ta crõng taneh kô đõeq hu anoe bàu joq qnàng. Mangai leq mòeq bua da bàu joq qnàng, mangai aih èh tàng bàu au.”

38 Philat bòch: Bàu joq qnàng aih qmang leq? Khoe aih haq loh hòm enh gùng doe ka bài mangai Juđa: Au ùh i hnoq qmòe haq kô i yiniq lui cleq. **39** Mahaq pì khoe hmòt, waq toq trùh hì Ramèngh Pancwa, au hi caqnaih ka pì mòeq ngai loh enh hnim clêh, qmang aih pì i enh au caqnaih da pì bàu Juđa ùh? **40** Dìq dõng ka wì cajiah cadêh: Apaq caqnaih haq qmat, mahaq caqnaih da nhèn Baraba! Baraba aih mangai loq ti atùng.

19 Khoe aih, Philat thê wì rùp qnung lam blai Chuaq Jesus. **2** Bài lình broq mòeq toq cadoh yila, dèch pacôi ta gàu Chuaq Jesus, rai taqmàn ka haq mòeq blah eo göh. **3** Khoe èh, wì thia haten doe ka haq: Waiq bàu Juđa. Khoe èh wì dèch tì tep haq. **4** Philat loh enh gùng doe hòm ka mangai Juđa ma oe ta aih: Ngan kô! Au qnoh haq enh gùng, dôq pì loq au khoe chaq ùh lòm hnoq qmòe haq kô i yiniq lui cleq. **5** Jò Chuaq Jesus loh enh gùng gàu haq kôi cadoh yila, chac haq caxùnh eo göh, Philat doe ka wì: Pì ngan mangai kô! **6** Mahaq jò bài pajàu kèn xam bài mangai ma tiaq wì haq bu hnoq Chuaq Jesus, wì khoe cachech: Drah tiang đình haq qmat talong pagat! drah tiang đình haq qmat talong pagat! Phi lat doe ka wì: Clapì rùp tiang đình mangai kô talong pagat beq, majah qmang aih au ùh lòm hnoq haq kô i yiniq lui cleq. **7** Mangai Juđa doe: Nhèn i dèh ranenh, tiaq ranenh aih haq qmat ep cachìt, majah qmang aih haq doe đeh Kon

Boc Plinh. **8** Jò Philat tàng qmang aih, kiang haq crè ùh hnau hòm. **9** Philat wìh mùt hlài tanòe hadrah bòch Chuaq Jesus: ìh trùh enh leq? Mahaq dua Chuaq Jesus ùh tèu. **10** Philat doe: ìh ùh waq tèu au, ìh ma ùh qnì au i cwìang caqnaih, i cwìang tiang đình ìh qmòh? **11** Chuaq Jesus padreo bàu: “Tàng ùh xài enh qnhèq khoe am ka ìh cwìang aih, ìh ùh i cwìang cleq enh qnhèq ka au, qmang aih mangai ma rùp au aràng ka ìh, mangai ma i tuiq yeo kèn. **12** Pang aih Philat toq chaq trong hu caqnaih Chuaq Jesus, mahaq mangai Juđa cajiah yeo dêh hòm: Tàng joq ìh caqnaih mangai qmat, ìh pi xài mòeq bua ka Sêsa hòm, majah qmang aih cabô doe rađeh kô bùa, mangai aih enh yòng tablêq ka Sêsa! **13** Philat tàng bàu qmang aih, haq hi qnoh Chuaq Jesus loh enh gùng, haq hangui ta gèq hadrah, ajang aih wì creo dèh Pawi (bàu Hebru creo Gabatha). **14** Hì aih wop hì padon ka Ramènh Pancwa, jò aih khoe qne hì, Philat doe ka mangai Juđa: Kô bùa pì. **15** Mahaq wì cajiah cadêh: Jêh đac haq beq! jêh đac haq beq! tiang đình haq talong pagat beq! Philat doe ka wì: Au tiang đình bùa pì talong pagat qmòh? Bái pajaù kèn doe: Enh gùng ka Sêsa, nhèn ùh i ka bùa ma qnoeq. **16** Pulùch aih, Philat hi am ka wì Chuaq Jesus đòeq wì qnung lam tiang đình haq talong pagat. Qmang aih wì hi rùp qnung Chuaq Jesus. **17** Chuaq Jesus xùi dèh long pagat trùh ajang nòe ta aih wì creo go Cadôh, (bàu Hebru aih creo Gogôtha). **18** Wì tiang đình haq ta aih, i baiq ngai qnoeq hòm ti haq, mòeq apah mòeq ngai, Chuaq Jesus oe taqne wa. **19** Philat broq mòeq capiac long ban, đòeq enh gàu ka long pagat. Ta aih i achìh: JESUS MANGAI

NAXARET, BÙA DA MANGAI JUĐA. **20** Bàc ngai Juđa đốc bàu kô majah qmang aih nòe tiang đình Chuaq Jesus haten ka plài, èh bàu aih achìh tiaq bàu Hebru, bàu Latin xam bàu Gorec. **21** Bài pajàu kàn da mangai Juđa lam anoe ka Philat: Apaq achìh bùa da mangai Juđa, mahaq achìh mangai kô doe rađeh kô bùa mangai Juđa. **22** Philat doe: Bàu au achìh cleq, au khoe achìh. **23** Jò bài lình khoe tiang đình Chuaq Jesus talong pagat, wì lêh yōc da haq eo đòeq hu lah axong broq pôn phàn, mòeq ngai mòeq phàn ka wì haq, wì hadai yōc da haq eo yôh. Mahaq eo yôh kô ùh i ka trong jìp, khoe jah atênh mòeq yàng enh qnhèq trùh taqneq. **24** Wì haq doe ka dabau: Apaq hit eo kô, beq bèn pàih paqnàih, troq ka magai leq, mangai hi jah. Qmang aih, waq ka xìt qmang ka bàu Hset hadròeh achìh: Wì ta axong ka dabau eo au, Pàih paqnàih hu yōc eo yôh au. Aih bìac da bài lình ma khoe broq. **25** Haten ka long pagat da Chuaq Jesus, miq haq xam daq miq haq yòng jang aih, i Mari cadrì da Clê-ôba, hloe xam Mari Mađolen hòm. **26** Chuaq Jesus hnoq deh miq xam mangai tiaq hōc đeh ma loq waq yòng tìa aih, haq doe deh ka miq: Mangai cadrì meh, qmat kon ìh. **27** Èh Chuaq Jesus doe ka mangai tiaq hōc: “Qmat miq ìh.” Pang hì aih, mangai tiaq hōc aih hi ahlài miq da Chuaq Jesus ta hnim đòeq hu wèq ban. **28** Khoe aih, loq rìm yiniq khoe jah gêh, èh bàu Hset hadròeh hadai khoe jah xìt, Chuaq Jesus doe: “Au croh ranöng. **29** Ajang aih i mòeq toq abôq diac jòq, wì yōc cato capaih tàm ta diac aih, kàt cato aih ajang goe long dèch ta hacùng Chuaq Jesus. **30** Jò Chuaq Jesus khoe jah diac jòq aih, haq hi doe: “Rìm yiniq khoe jah gêh.”

Haq wech gàu, mahua yiang haq hi loh. **31** Hì aih wop hì padon ramèn Pancwa, hì atìq aih troq hì Sabat, yàng hì Sabat kô aih dìq jaq kàn, dài aih bài gucreaq mangai Juđa ùh enh dôq ta hì Sabat bài hanang oe raq ta long pagat. Wì haq trùh bòch Philat am wì tùq tagoh caxèn tangong đòeq hu qnoh bài hanang enh long pagat loh ta haqneq. **32** Qmang aih, lình trùh tong tagoh caxèn tangong mangai baxèm, èh trùh mangai ma tau diq, aih wa mangai wì tiang đình pajùm ti Chuaq Jesus. **33** Jò bài lình trùh ajang Chuaq Jesus, hnoq haq khoe cachìt, wì pi hìaq tùq tagoh da haq tangong hòm; **34** mahaq i mòeq ngai lình yōc jaoq bìt da haq yimìa cabōng, tajòe qmòe xam mahim xam diac dahrôq loh. **35** Mangai ma khoe jah hnoq bài yiniq aih haq hi taqmon hlài (bàu haq anoe aih joq qnàng, cla haq loq ka dađeh anoe joq qnàng) đòeq pì hadai lùi. **36** Bài yiniq kô, khoe loh qmang aih dôq xít tiaq bàu kô ta Hset hadròeh: “Ùh i mòeq toq caxèn leq da haq tagoh”. **37** Èh i bàu kô hòm ta Hset hadròeh: “Wì jah hnoq mangai wì ma khoe bìt”. **38** Atìq ka aih, Jôsep mangai oe ta Arimathê, haq aih mangai tiaq hōc Chuaq Jesus mahaq haq cadoc rađeh majah qmang aih haq crè ka bài gucreaq Juđa. Haq trùh ajang Philat bòch yōc hanang Chuaq Jesus. **39** Nicôđem aih mangai nèh haq hadai khoe trùh ti Chuaq Jesus jò damang, jò aih haq hanoh trùh, haq aràng jah piq jàt pôn kìq jan xua thùm jràu pajùm ti gahnàu. **40** Wa aih qnoh hanang Chuaq Jesus yōc bai xam diac jreо xua thùm lom hanang Chuaq Jesus tiaq ranenh mangai Juđa. **41** Jò aih, tanòe wì ma tiang đình Chuaq Jesus i mòeq toq wuàn, ta wuàn aih i

mòeq toq ralùng oe raq neo, ralùng aih qnhòq lah catùh cabô. **42** Wa taqngùi hanang Chuaq Jesus ta aih, majah qmang aih, hì aih hì padon da mangai Juđa, èh qnah hòm ralùng hanang haten hloe ta aih.

20 Sroeh sroq hì baxèm tuàng ramènh, tróc bu badrèh badrah oe raq clam, Mari Mađolen lam ta ralùng hanang, hnoq hmo padit qngah ralùng khoe cadro taqnoeq. **2** Haq drah cadàu chaq Simôn Phiero xam mangai tiaq hōc maqnoeq, aih mangai Chuaq Jesus ma loq waq, haq doe: Wì khoe qnoph hanang Chuaq Jesus lam taqnoeq, ùh qnì wì đòeq haq taleq. **3** Wa Phiero xam mangai tiaq hōc maqnoeq drah tûh loh ta ralùng hanang. **4** Dìq baiq ka wa cadàu, mahaq mangai matau cadàu yeo dêh ka Phiero haq trùh ta ralùng adroe. **5** Haq aih ki ngan hnoq bai oe ta haqneq, mahaq haq ùh mùt. **6** Simon Phiero trùh diq, mùt hloe ta ralùng, hnoq bai oe ta haqneq. **7** Mù gàu xam bai lom hanang ùh oe pajùm ti dabau, mahaq khoe canua đòeq crài taqnoeq. **8** Jò aih mangai ma trùh adroe, hadai cadiang mùt, hnoq qmang aih haq hi lìu diq. **9** Majah qmang aih wa aih dìq qnhòq tem bàu Hset Hadròeh anoe: Jesus ep rìh hlài enh mangai cachìt. **10** Khoe ka aih, wa mangai tiaq hōc hi hlài deh tahnim. **11** Mahaq Mari yòng đeh enh gùng, haten ka ralùng hanang rai hmoe. Haq rai hmoe rai kùp ngan ta ralùng. **12** Haq hnoq baiq bìn plinh caxùnh eo taboc, mòeq ngai haqngui enh gàu, mòeq ngai hangui enh jènh, ajang nòe taqngùi hanang Chuaq Jesus. **13** Baiq bìn plinh bòch: Mangai gucadri meh, gleq ìh majah crò? Haq padreo bàu: Wì khoe qnhac Chuaq au taqnoeq, au ùh qnì wì đòeq haq taleq?

14 Capoch bu khoe, haq hwi ngan hnoq Chuaq Jesus yòng
ajang aih, mahaq haq ùh canau. **15** Chuaq Jesus bòch:
Mangai gucadri meh, hagleq ìh majah hmoe? ìh chaq
cabô? Hèm deh aih canau mangai broq wuàn, haq doe:
Wì daq, tàng joq ìh khoe qnung hanang Haq taqnoeq, ìh
anoe biaq ka au loq, dôq au lam yōc ahlài. **16** Chuaq Jesus
creo ka haq: “Mari.” Mari drah hwi ngan, haq capoch bàu
Hebru: Rabuni (aih la mangai hnài)! **17** Chuaq Jesus doe:
“Apaq bèq au, majah qmang aih au qnhòq tōc deh ta Baq,
mahaq drah lam anoe ka bài oh daq au, doe ka wì loq au
tōc dèh ta Baq au, aih hadai Baq pì, tōc ti Boc Plình au,
aih hadai Boc Plình pì. **18** Mari Mađolen lam anoe ka bài
mangai tiaq hōc: Au khoe hnoq Chuaq Jesus. Rai taqmon
ka wì dìq dōng rìm yiniq Chuaq Jesus anoe ka haq. **19** Hì
aih raq jò khoe xèq, aih hì baxèm ta gàu tuàng, bài qmōc
qmang nòe bài mangai tiaq hōc oe, dìq clenh clòng ka
cajap, majah qmang aih wì crè ka mangai Juđa, Chuaq
Jesus loh yòng taqne wì haq rai doe: “Catèm ka pì! **20** Doe
qmang aih hi khoe, Haq am ka wì ngan xam tì xam yimìa
haq. Mangai tiaq hōc dìq jaq lem bùi jò jah hnoq Chuaq
Jesus. **21** Haq doe hòm: “Catèm am ka pì, Baq khoe thê au
qmang leq, au hadai thê pì qmang aih.” **22** Èh Haq hlui
qmùt hi hèm ka wì rai doe: “Drah yōc Yiang Hadròeh
beq. **23** Tàng pì caqnaih da cabô yiniq lui, yiniq lui wì
aih èh jah claih, tàng joq pì ùh caqnaih da wì yiniq lui,
yiniq lui wì aih ùh jah claih.” **24** Mahaq jò Chuaq Jesus
trùh, Thôma wì macroeo Đì đìm, aih mangai hadai oe ti wì
mòeq jàt baiq ngai, ùh i ka mat ta aih ti bòe mangai tiaq
hōc. **25** Wì mangai tiaq hōc qnoeq anoe ka haq: Nhèn

khoe hnoq Chuaq Jesus. Mahaq haq doe: Tàng joq au ùh hnoq qmòe teo đình ta capiang tì haq, rai tah hadrang tì ajang habau aih, tàng joq au ùh bèq yimìa haq, ùh jò leq au lùi. **26** Rahem hì atìq ka aih, mangai tiaq hōc Chuaq Jesus oe hòm ti dabau ta hnim, Thôma hadai oe ti wì ta aih. Jò qmang hnim oe raq clòng, Chuaq Jesus mùt yòng taqne mangai tiaq hōc rai doe ka wì: “Catèm am ka pì.” **27** Khoe aih Haq doe ka Thôma: “Yōc hadrang tì ìh tah ajang kô, èh ngan capiang tì au, hnhu tì bèq ti yimìa au, apaq cadoq manoh, mahaq toq lùi raq.” **28** Thôma doe: Waiq Chuaq au aih Boc Plình au! **29** Chuaq Jesus doe: “Pàng ìh khoe hnoq au ìh majah lùi. Xôq ramot am ka mangai qnhòq hmaq hnoq mahaq khoe lùi.” **30** Chuaq Jesus oe broq bàc kan halac enh ngèa mangai tiaq hōc mahaq ùh i achìh ta hset kô. **31** Mahaq bài yiniq kô khoe achìh, dôq pì lùi Chuaq Jesus aih raq Mêsi, Kon da Boc Plình, đòeq jò pì lùi, canòm ka yiniq haq aih èh đòeq hu jah kan rìh.

21 Atìq ka aih, Chuaq Jesus loh mahno rađeh hòm ka mangai tiaq hōc ta haqmai diac raxìq Têbi-riat. Biac aih rameh: **2** Simôn Phiero, Thôma (wì creo Đì đím), Nathana-ên mangai Cana giùng Galili, kon da Sêbedê xam baiq ngai tiaq hōc qnoeq hòm oe ti dabau. **3** Simôn Phiero doe ka wì: Au lam ranang ka, wì padreo bàu: Nhèn hadai lam ti ìh. Qmang aih wì loh ta boang, mahaq mang aih ranang ùh jah qmòe cleq. **4** Trùh sroeh sroq, Chuaq Jesus yòng tago mahaq bài mangai tiaq hōc ùh canau ka haq. **5** Haq creo ka wì: “Yôiq bài bua au, Pì ajah ka ùh?” Wì doe: Ùh jah cleq. **6** Haq doe ka wì: “Caqnìh hlàm enh pah qma ka boang qmat aih pì hi jah ka.” Jò wì aih caqnìh

hlàm, wì jah ka bàc haraya, loh qmèe ka pi hlàt dèch dèh hlàm. **7** Mangai tiaq hōc Chuaq Jesus ma loq waq doe ka Phiero: Hatau raq Chuaq. Jò Simôn Phiero tàng doe: Aih raq Chuaq, haq drah yōc caxùnh dèh eo yōh (majah qmang aih haq oe chac dech) rai hadrùc ta diac. **8** Bái mangai tiaq hōc maqnoeq chùng boang atōc tago rai chua hlàm khoe bình bài ka, majah qmang aih wì haq ùh hìaq hangai ka go, loq jah bu baiq hrinh hagat. **9** Jò mangai tiaq hōc khoe tōc tago, hnoq ta aih i ka phiang ta ngia ùnh, bênh hadai i. **10** Chuaq Jesus doe ka wì haq: “Aràng ka pì neo ranang tacô”. **11** Simôn Phiero cadiang loh ta boang, rai hua hlàm hlech jah mòeq hrinh padam jàt piq pliang ka kàn atōc tago, mahaq yac ka hnoq jah bàc qmang aih, hlàm dua ùh hyah. **12** Chuaq Jesus doe ka wì: “Thia tacô hu acaq di sroq.” Ùh i moeq ngai tiaq hōc leq hùa bòch: ìh kô ìq cabô? Wì loq aih raq Chuaq Jesus. **13** Chuaq Jesus lam haten yōc bênh yōc ka am ka mangai tiaq hōc. **14** Aih yàng piq Chuaq Jesus mahnu rađeh am ka mangai tiaq hōc hnoq, atìq ka haq rìh hlài enh mangai cachìt. **15** Jò wì khoe hêq ka acaq, Chuaq Jesus doe ka Simôn Phiero: “Simôn kon da Jôna, ajoq ìh loq waq ka au ùh hnau ka wì kô ùh? Phiero doe: Chuaq au, joq ìh loq au loq waq ka ìh. Chuaq Jesus doe: “Qmi da au trìu kon acaq. **16** Chuaq Jesus doe hòm yàng baiq: “Simôn kon da Jôna, ajoq ìh loq waq ka au ùh hnau ka wì kô ùh?” Phiero padreo bàu: Chuaq au, joq ìh loq au loq waq ka ìh. Chuaq Jesus doe: “wèq da au trìu oq.” **17** Yàng piq Haq anoe ka Simôn hòm: “Simôn kon da Jôna, ajoq ìh loq waq ka au?” Phiero dìq jaq mangò ta manoh majah qmang

aih Chuaq Jesus bòch haq piq yàng: “Ajoq ìh loq waq ka au?” Phiero doe: Chuaq au, ìh loq rìm trong, ìh loq au loq waq ka ìh. Chuaq Jesus doe ka haq: “Qmi da au trìu.” **18** Joq qnàng au anoe ka ìh, jò ìh oe raq radam, cla ìh kèt dèh kaxi caqnam, enh lam taleq lam, mahaq trùh jò ìh hi craq, ìh hnhu tì am ka wì kèt da ìh kaxi caqnam qnung ìh trùh tanèo ìh ùh enh lam. **19** Chuaq Jesus anoe bàu kô đòeq patô ka Phiero haq loq rađeh kô èh cachìt qmang leq dôq ka Boc Plình jah kan ranhòm. Khoe aih haq doe ka Phiero: “Lam tiaq au.” **20** Phiero hwi ngan hnoq mangai tiaq hốc Chuaq Jesus ma loq waq qnang tiaq wa, aih mangai mang wì haq ma acaq ramènh Pancwa, haq ma angèn ta rada Chuaq Jesus rai bòch: Chuaq au, cabô ma blòq ìh? **21** Jò hnoq mangai aih, Phiero bòch: Chuaq au! ha mangai meh èh qmang leq? **22** Chuaq Jesus padreo bàu: “Tàng joq au enh ka haq qmat oe rìh yôt trùh hì au wìh hlài, aih ep cleq ka ìh?” mahaq ìh kô ep tiaq au. **23** Aih ìq taqne oh daq majah i bàu doe: Mangai tiaq hốc aih ùh cachìt. Mahaq ùh xài Chuaq Jesus doe haq aih ùh cachìt, haq toq doe: “Tàng joq au enh ka haq qmat oe rìh yôt trùh hì au wìh hlài, aih ep cleq ka ìh?” **24** Cla mangai tiaq hốc kô raq ma rai anoe rai achìh hlài bài yiniq kô, bèn loq bàu haq ma anoe aih joq qnàng. **25** Oe i bàc yiniq qnoeq Chuaq Jesus khoe broq, tàng joq achìh hlài dìq tang yiniq, au hèm dìq döng ka cröng taneh kô ùh anòh đòeq hset wì ma achìh aih.

BÌAC YIANG HADRÒEH

1 Wì craq Thiôpi, oe ta hset adroe au khoe anoe rìm trong Chuaq Jesus ma khoe broq rai hnài qmòe enh jò baxèm, **2** trùh hì haq jah dèch atōc ta plình, atìq ka haq khoe canòm ka Yiang Hadròeh đòeq hu hnài deh bài mangai tiaq cla haq ma khoe ràih. **3** Atìq ka haq khoe pòq kan xalep, enh ngèa ka bài mangai tiaq cla haq yōc bâc trong đòeq patô ka wì loq haq kô rìh, èh haq oe ti bài tiaq cla pôn jàt hì, anoe ka wì trong diac Boc plình. **4** Jò oe ti bài mangai tiaq cla, haq tanap: Apaq loh enh gùng ka Jérusalem, mahaq pì ep oe ta aih raq gòm yiniq Baq ma khoe tèu am ka pì, aih yiniq pì khoe tàng au doe. **5** Majah qmang aih Jon khoe broq ka pì baptém xi diac, mahaq toq biaq hì hòm, pì jah broq baptém xi Yiang Hadròeh. **6** Bài mangai ma tagop ta aih bòch: Waiq Chuaq! manoèq kô raq ùh xài ìh ma dèch paqnàng hlài diac Isorali? **7** Haq padreo bàu “Hì leq jò leq toq cla Baq khoe loq deh, trong aih pì ùh khòh loq. **8** Mahaq Jò Yiang Hadròeh jràp enh qnhèq ka pì, aih èh pì hi jah yōc kan cwìang itai đòeq hu lam anoe dôq wì loq ka au, ta Jérusalem, jàp hloe gùng Judê, gùng Samari trùh jàp jìa crōng taneh. **9** Khoe ka anoe qmang aih, haq jah dèch atōc ta plình, jò wì ta aih qnang ngan qngoc haq, i yùc glom qnung haq lam, pi hnoq hòm. **10** Jò wì ta aih oe raq haqmiang ngan haq jah dèch atōc ta trōc i baiq ngai gucalô caxùnh eo taboc loh enh ngèa wì haq, **11** rai doe: “Wùih mangai Galili, pì yòng ajang kô hanhoe dèh ta trōc qmang qmat ìq? Jesus kô khoe jah dèch atōc ta trōc enh ngèa ka pì, èh haq hadai wìh hlài qmang ka pì khoe hnoq haq tōc ta trōc diq.” **12**

Khoe aih, wì haq enh nòe wang Ôliu hlài ta Jérusalem,
wang aih hangai ka Jérusalem lam bu mòeq hì sabat. **13**
Jò wì haq hlài khoe trùh, drah tòc talàu aih nòe Phiero,
Jon, Jaco, Anrê, Philip, Thôma, Bathêlemi, Mathio, Jaco
kon da Aphê, Simôn Silot, Jiuđe kon da Jaco loq oe. **14** Dìq
dõng ka wì aih cajap mòeq manoh waiq khàn pajùm ti bài
mangai gucadri, Mari miq da Chuaq Jesus xam wì oh haq.
15 Ta bài hì aih, Phiero yòng taqne oh daq tagop ti dabau
– bài mangai tagop ta aih jah mòeq hrinh baiq jàt ngai,
haq doe: **16** “Dìq dõng oh daq calô xam oh daq cadrì,
bàu Yiang Hadròeh ma khoe canòm ka hacùng Đawit
capoch pajàu tanòe Hset Hadròeh anoe trùh Juđa mangai
khoe ajèn trong dôq wì rùp Chuaq Jesus, aih khoe xìt. **17**
Majah qmang aih haq hanoh oe ti bèn, hadai khoe jah
broq mangai tiaq cla qmang ka bèn. **18** Haq aih yōc bac
baha kan dù da rađeh rot moeq haqnech ruàng, ta aih
haq taclih hatàp gàu padah loh dõng cliac. **19** Bìac aih
dìq ka Jérusalem mangai loq đeh hra, wì loh qmoè ka
creo ka ruàng aih tiaq bàu wì haq aih Haêndama, aih
ruàng mahim. **20** Ta hset Calêu plinh i achìh: “Xoeq diq
nòe da haq oe loh ka clui hawit Apaq i cabô oe ta aih. Èh
hòm: Xoeq diq i mangai müt yōc ajang nòe da haq. **21** Aih
ìq, taqne mangaì ma khoe tiaq bèn enh jò Chuaq Jesus
baxèm oe ti bèn, **22** pang Jon ma broq baptem trùh hì
Chuaq Jesus jah dèch atòc khoe ka bèn, taqne wì aih ep i
mòeq ngai hu wiang lam anoe ti bèn trong Chuaq Jesus
khoe rìh hlài. **23** Mangai tiaq hòc ràih baiq ngai: Jôsep
aih Basaba, tang jò creo Juctu, xam Mathia, **24** khoe aih
wì waiq khàn: Waiq Chuaq, ìh loq manoh cliac rìm ngai,

ìh patô am ka nhèn loq wa baiq ngai kô ìh khoe dì deh maleq, **25** đòeq hu broq mangai tiaq cla, hu qmùt hlài ajang nòe da Juđa ma khoe cađac hu lam oe dèh tanòe. **26** Khoe aih, wì pàih panaih, hi troq ka Mathia, haq hi jah qmùt ajang mòeq jàt mòeq ngai tiaq cla.

2 Trùh Ramènh hì padam jàt, mangai tiaq hốc tagop dabau mòeq nòe. **2** Cadoe i atêh loh enh plinh qmang atêh ka cayeo hlui, jàp jia ta hnim mangai tiaq hốc hangui. **3** wì haq hnoq i tang pla ùnh tiah ka rapet, loh jràp tang ngai ta wì haq. **4** Rìm ngai jah bình Yiang Hadròeh, pang aih wì hi capoch bài bàu qnoeq, tiaq qmang ka Yiang Hadròeh am ka rađeh capoch. **5** Jò aih, ta Jérusalem bài mangai Juđa ma loq iu yùq ka Boc plinh enh rìm diac oe ta caqnàm plinh trùh ta aih. **6** Jò wì haq tàng atêh bàu aih, wì tùh loh ngan, mangai leq mangai meh hi haglènh đeh hra majah qmang aih wì haq tàng bài mangai tiaq hốc capoch bàu gùng wì haq. **7** Wì haq yùq pi cajaq rai bòch dabau: Dìq döng ka wì qmat ma ùh xài mangai Galili qmòh? **8** Tàng joq qmang aih, hagleq bèn majah tàng wì haq tapoch bàu gùng bèn? **9** Bài magai Bathê, Mêđi, Êlamit, mangai oe ta Mêđôbôtami, Jiu đê, Capbađoc, Bong, Asi, **10** Phirigi, Bam phili, Êđip, Libi ma haten ka gùng Siren, mangai trùh enh Rôma, **11** mangai Jiuđa hloe xam mangai maneo tiaq trong mangai Jiuđa, mangai Coret, mangai Aràp, nhèn tàng wì haq capoch bàu gùng nhèn đòeq anoe kan haqnhèq kàn kaiq da Boc Plinh. **12** Wì hamàih loh ka pi qnì hèm cleq, wì tabòch dabau: Yiniq kô iq qmang leq? **13** Mahaq i bài mangai ma loq ti halê doe: Wì qmat bù ka alac neo. **14** Jò aih Phiero

yòng pajùm ti mòeq jàt mòeq ngai tiaq cla, dèch bàu anoe ka mangai bac ta aih: “Oh daq Jieuđa xam dìq ka mangai oe ta Jérusalem, dôq au anoe ka pì qmang kô, pì tamàng ma adia haq. **15** Wì kô ùh i bù qmang ka pì xoh, majah qmang aih manòeq kô bu hachìn jò di sroq. **16** Mahaq kô raq yiniq Jôen mangai pajàu Boc Plình ma khoe anoe: **17** Boc Plình doe: Tahì atìq kô èh, Au ùc qnoh Yiang au am dìq ka kon mangai; Kon calô xam kon cadrì pì dìq jah tapoch pajàu, Bài guradam jah hnoq kan mahno, Mangai craq jah hnoq apô. **18** Joq qnàng tađài hì aih èh, au ùc qnoh Yiang au jàp ka mangai hapđong calô xam hapđong cadrì, Dìq ka wì haq jah capoch bàu pajàu; **19** Au mahno tam ka wì haq kan halac oe ta plình, Xam ta crđong taneh; Aih la mahim, ùnh, xam kan nhòe; **20** Mahì loh ka clam, Khê wìh wìa mahim, Adroe ka hì kàn hì ranhòm da Chuaq trùh; **21** Aih èh cabô ma canòm ka Chuaq, mangai aih hi jah dèch. **22** Mangai Isorali, pì tamàng bàu kô: Chuaq Jesus mangai Naxaret kô, aih raq mangai Boc Plình khoe yđc haq đđeq broq trong i cwìang itai, kan halac, kan hamài oe taqne pì, dôq pì jah loq đđeq pì hu anoe ka wì qnoeq qmang ka cla pì ma khoe loq. **23** Pì khoe rùp haq am ka wì, tiaq manoh Boc Plình ma khoe loq khoe tamroq deh adroe, pì khoe canòm tì kòng mangai dù tiang đinh haq talong pagat đđeq hu jêh cađac. **24** Mahaq Boc Plình khoe broq ka Chuaq Jesus rìh hlài, hràt catech caxi kan cachìt, majah qmang aih kan cachìt ùh jah rùp padràng Chuaq Jesus oe enh qneq ka cwìang haq. **25** Ràu trùh haq, Đawit khoe anoe: Au hmaq hnoq yôt Chuaq oe enh ngèa ka au, Majah qmang aih haq oe enh apah qma

au, Dôq au ùh hìaq dalàc. **26** Aih ìq raq, manoh cliac au lem bùi, rapet au manè, Chac au hadai jah padài ta kan canòm; **27** Majah qmang aih Chuaq ùh dôq mahua yiang au oe ta hwinh, Hanoh ùh cađac au oe ta kan cachìt. Haq ùh dôq chac mangai hadròeh haq hech hnhung. (**Hadès g86**)

28 Chuaq khoe patô ka au trong kan rìh; Am ka manoh au jah bình kan lem bùi enh ngèa ka ìh. **29** Dìq ka oh daq Isorali, au anoe qnàng ka pì, Đawit aih kan cadraq bèn, haq khoe cachìt, wì khoe catùh, mandeq kô ralùng hanang haq oe raq taqne bèn. **30** Mahaq, haq aih mangai pajàu, haq loq Boc plìnkhoe hapah đòeq tèu bàu ka haq, aih ta xinoe haq Boc plìnkhoe dèch mòeq ngai đòeq hangui tanòe gèq bùa haq, **31** aih haq khoe chônh hnoq yiniq ma padon trùh, chônh anoe trùh kan rìh hlài da Christ rameh: Haq ùh oe hloe tanòe kan cachìt, chac haq hadai ùh hech ùh hnhung. (**Hadès g86**) **32** Boc Plìnkhoe broq ka Chuaq Jesus kô rìh hlài, dìq ka nhèn hadai wiang hnoq. **33** Jò haq khoe jah dèch atōc hangui apah qma Boc Plìnkhoe, enh nòe Baq haq khoe jah yōc Yiang Hadròeh Baq ma khoe tèu am, haq hi ùc qnoph Yiang Hadròeh, aih yiniq pì ma qnang hnoq qnang tàng kô. **34** Majah qmang aih Đawit qnhòq lah tōc ta plìnkhoe, mahaq cla haq raq doe: Chuaq khoe doe ka Chuaq au: Hangui enh qma ka au, **35** Trùh jò au roh mangai git ka ìh oe enh qneq ka ìh, đòeq broq radua ròh jènh ka ìh. **36** Qmang aih dìq ka mangai Isorali pì ep loq qmang kô Boc Plìnkhoe dèch Chuaq Jesus kô mangai pì ma khoe tiang đình haq talong pagat broq Christ broq Chuaq.” **37** Jò wì tàng bàu kô, wì tadèch qmòe ta manoh, wì bòch Phiero xam bài mangai tiaq

cla: Wì daq! nhèn ep broq qmang leq? **38** Phiero padreo bàu: thê pì loq raxach, rìm ngai ep canòm ka yiniq Chuaq Jesus đòeq jah broq baptem, dôq yiniq lui pì jah caqnaih, khoe aih hi jah yōc Yiang Hadròeh. **39** Majah qmang aih bàu ma khoe tèu aih jah pì xam bài kon da pì, xam dìq ka bài mangai oe hangai, aih bài mangai Boc Plình bèn ma khoe padon creo”. **40** Phiero yōc tam bàc trong đòeq rai hnài rai pariaq wì, haq doe: “Pì drah doeh rađeh claih enh xinoe ngang dù kô”. **41** Mangai ma tamàng bàu haq dìq jah broq baptem, hì aih i tam piq muàn mangai jah qmùt tanòe Tagop Hadròeh. Mòeq manoh ka dabau **42** Wì aih dìq ka manoh wèq bàu bài mangai tiaq cla hnài, hatroq ka dabau, wèq Ramènh goh bênh wèq trong waiq khàn. **43** Rìm ngai i manoh iu yùq, majah qmang aih i bàc kan halac loh enh tì kōng mangai tiaq cla. **44** Dìq dōng mangai ma lùi Chuaq Jesus, pajùm mamoh ti dabau, yōc rìm yiniq broq hang pajùm. **45** Tech dōng dèh bài kùng hang, taneh ruàng đòeq hu axong ka dabau, tiaq dèh tang ngai ma i yiniq nan ka waq pang leq. **46** Hì leq hì meh panim ka tōc ta hnim kùh waiq. Jò oe ta hnim wì haq dìq ka manoh lem bùi goh bênh acaq ôq ti dabau, **47** rai manè apôi Boc Plình, wì haq jah lem ka manoh phù cròng. Rìm hì Chuaq qmùt tam mangai jah dèch ta Tagop Hadròeh.

3 I mòeq hì, wa Phiero wa Jon tōc ta hnim kùh waiq, hu waiq khàn, jò aih khoe jah piq jò dixèq. **2** Ta aih, i mòeq ngai pen enh jò haq cìh enh cliac, rìm hì wì aràng pagui đòeq haq ta hnim kùh waiq ajang nòe qmang wì ma creo Qmang lem, hu axìn enh bài mangai ma mùt ta hnim kùh waiq. **3** Hnoq wa Phiero wa Jon mùt, haq hnhu tì bòch

đeh bac wa aih. **4** Phiero xam Jon chrìh ngan haq, èh Phiero doe: Ngan ma kô. **5** Mangai aih hi ngan đeh wa ja cajoq, xoh dèh ta manoh canau loq jah đeh toq xit toq criah cleq. **6** Yàng èh, Phiero doe ka haq: Au ùh i ka bac wang, mahaq au i cleq au am ka ìh ka aih: Canòm ka yiniq Chuaq Jesus Christ, mangai Naxaret, cadiang lam beq! **7** Phiero rùp tì pah qma dèch haq yòng. Tajòe qmòe jò aih, capiang jènh xam mat ka haq loh ka qnhrang. **8** Haq hi padinh yòng tiaq wa mùt ta hním kùh waiq, rai lam rai aplôh calêu manè appôi Boc Plình. **9** Wì ta aih dìq hnoq haq lam rai manè apôi Boc Plình. **10** Wì canau meh raq mangai ma hangui ajang Qmang lem hu axìn, wì loh döng haglènh rai hamàih jò hnoq kan halac loh ka haq qmang aih. **11** Haq aih qnang carùp tì Phiero xam Jon, bài mangai ta aih hamàih pi cajaq, rìm ngai tûh loh ngan wì aih, ajang nòe wì ma creo radua qmang Salômôn. **12** Phiero hnoq qmang aih, haq doe ka mangai ta aih: Dìq ka oh daq Isorali, hagleq pì majah hamàih ka yiniq kô? Hagleq pì majah chrìh ma qmang qmat, tìah gleq ma khoe canòm kan itai, kan taq atoq da cla ma đòeq broq ka mangai kô jah cadiang lam? **13** Boc Plình da Apraham, Ysac, Jacôp, Boc Plình da kan cadraq bèn khoe broq ka hapõng haq aih Chuaq Jesus jah ranhòm, aih Mangai pì khoe rùp, khoe ùh waq đac ka haq enh ngèa Philat, jò Philat enh caqnaih haq. **14** Pì khoe cađac Mangai Hadròeh, Mangai taq atoq đòeq hu bòch caqnaih ka rađeh mòeq ngai jêh đac mangai, **15** pì khoe jêh đac Yiang kan rìh, mahaq Boc plình khoe broq haq rìh hlài enh kan cachìt. Nhèn kô mangai khoe hnoq trong aih. **16** Mangai kô haq lùi yiniq

Chuaq Jesus, yiniq Chuaq Jesus khoe broq ka mangai pì ma hnoq ma canau loq kô jah brêh, aih la kan lùi enh Chuaq Jesus khoe am haq kô jah brêh lem enh ngèa ka pì. **17** Manðeq kô oh daq Isorali au loq pì xam bài cwan, pang pì ùh qnì dài ma khoe broq qmang aih. **18** Mahaq Boc plinh khoe broq qmang aih raq đòeq xìt qmang ka bàu haq tapoch qnoh enh hacùng bài pajàu: Christ da haq ep glàm bàc kan xalep. **19** Drah loq raxach rai tawih hlài ta Boc Plinh, dôq dìq döng yiniq lui jah caqnaih, **20** đòeq trùh jò kan padài loh enh Chuaq, aih èh haq thê deh Christ ma khoe tèu am ka pì, aih la Chuaq Jesus, **21** mangai Tröc ep đìh ahlài dèh gòm trùh jò dìq döng rìm yiniq jah paneo hlài, aih jò Boc plinh ma khoe anoe adroe enh hacùng bài pajàu hadròeh haq. (**aiōn g165**) **22** Môise i doe: Chuaq aih Boc Plinh bèn dèch paqnàng taqne oh daq mòeq Ngai pajàu qmang ka au, pì ep broq tiaq rìm bàu haq thê. **23** Waq toq cabô ùh tamàng bàu Pajàu aih, mangai aih ep hnan qnoh đac enh gùng ka oh daq. **24** Joq dìq döng bai pajàu enh Samuên xam bài wì ma atìq ka haq, dìq khoe anoe adroe trùh bài hì kô. **25** Pì qmat xinoe da bài pajàu, xam bàu tajao Boc plinh khoe jap ka kan cadraq bèn, jò haq doe ka Apraham: Dìq ka mangai oe ta cröng taneh canòm ka xinoe ìh kô èh majah xôq ramot **26** Boc plinh khoe dèch paqnàng deh hapöng cla haq, adroe aih thê haq aih loh am xôq ramot ka pì, đòeq tìc ahlài rìm ngai oe taqne pì wìh cađac deh trong dù.

4 Jò Phiero xam Jon qnang capoch tuàng ka wì ta aih, i bài pajàu, cwan wèq hnim tagop xam mangai Sađusê trùh. **2** Wì nòeh pi cajaq jò hnoq wa haq hnài rai doe enh

dalam ka Chuaq Jesus i kan rìh hlài da mangai cachìt. 3
Bài aih rùp clêh wa haq ta hnim cadrong trùh sroq atìq,
majah qmang aih trõc khoe clam. 4 Yac ka qmang aih, i
bàc ngai lùi jò khoe tàng bàu wa aih hnài, mangai lùi
tõc jah padam muàn. 5 Sroq atìq, bài cwan, bài gucraq
xam bài mangai hnài ranenh tagop ti dabau ta Jérusalem,
6 xam Anne, aih pajàu haqnhèq, Caiphe, Jon, Alexanđo
xam dìq dõng bài nang noe pajàu haqnhèq. 7 Wì rùp
qnoh wa Phiero wa Jon yòng enh ngèa wì haq, wì bòch:
Yõc cwìang enh leq, tàng ùh meh canòm ka yiniq cabô
chôp ma broq qmang kô? 8 Jò aih, Phiero, bình halùih
Yiang Hadròeh, haq doe: “Dìq dõng bài cwan xam bài
gucraq, 9 tàng joq hì kô pì creo ka ma yòng ajang kô đõeq
hu tah hadrah ma, taiq ma khoe broq lem ka mangai
pen, èh bòch ma broq qmang leq haq ma khoe jah brêh.
10 aih dìq ka pì xam bài mangai Isorali khòh loq rameh
aih canòm ka yiniq Chuaq Jesus Christ mangai Naxaret,
Mangai pì khoe tiang đình talong pagat, Boc plình khoe
broq haq rìh hlài enh mangai cachìt, canòm ka haq aih
mangai kô khoe jah brêh lem, manðeq kô qnang yòng
enh ngèa ka pì. 11 Chuaq Jesus aih: “Hmo bài pì mangai
broq hnim ma khoe khwênh cađac, Khoe wìa hmo mùm
hnim.” 12 Ùh ih kan dèch dech ajang cabô qnoeq, majah
qmang aih enh caqnàm plình kô, ùh i ka yiniq ma qnoeq
am ka mangai đõeq bèn ep canòm ajang aih hu jah dèch”.
13 Jò wì hnoq kan tanoq da Phiero xam Jon, loq ka wa aih
mangai blùng ùh qnì đeh cleq, wì toq hamàih, èh wì loq
wa aih hmaq oe ti Chuaq Jesus. 14 Mahaq patep pang jò
wì hnoq mangai khoe jah brêh yòng pajùm ti wa ta aih,

wì pi oe jah tapoch cleq. **15** Wì hi thê wa aih loh enh gùng ka nòe hadrah, wì hatinh ka dabau: **16** “Wa kô èh bèn broq qmang leq? Dìq ka Jérusalem mangai loq đeh hra wa kô khoe broq kan halac kàn, yac ka bèn enh cadoc dua ùh jah. **17** Mahaq dôq yiniq kô pi hìaq prai tam yi hangai, bèn taqnhùq hacam ka wa haq, ùh lòh wa haq, pang kô ta èh pi jah yōc yiniq aih đòeq hu hnài cabô hòm. **18** Wì hi creo ka wa mùt hòm, wì doe: Pi jah ràu yiniq Chuaq Jesus đòeq anoe đòeq hnài cabô hòm. **19** Mahaq Phiero xam Jon padreo bàu: Cla pì hèm beq, maleq ma yeo troq enh ngèa ka Boc plinh, tamàng bàu pì, loq tamàng bàu Boc plinh? **20** Majah qmang aih da nhèn kô, ùh jah tàng ùh anoe trùh yiniq nhèn ma khoe hnoq khoe tàng!” **21** Aih ìq, wì hi taqnhùq hacam tam ka wa, khoe hi caqnaih, pi chaq trong hu rùp wa hòm, majah qmang aih mangai ta aih dìq hnoq kan halac neo loh, mangai leq mangai meh manè apôi đeh hra Boc plinh. **22** Mangai ma khoe jah brêh aih khoe loe pôn jàt hanam. **23** Loh enh aih, wa bròc dèh ti bài oh daq, taqmon hlài dìq dõng bàu bài pajàu kàn xam bài gucraq ma anoe ka wa. **24** Jò dìq ka wì tàng bàu aih, wì mòeq bàu ti dabau waiq khàn ka Boc plinh: “Boc Plinh ma dìq jaq haqnhèq, ìh khoe broq plinh, taneh, diac rasìq xam rìm yiniq oe ta aih. **25** Ìh khoe canòm ka Yang Hadròeh, tapoch ajang hacùng kan cadraq nhèn, aih bùa Đawit hapõng ìh, rameh: “Hagleq rìm diac ma plôh nòeh, Hagleq phù cròng wiang hatinh trong ùh loh qmòe cleq? **26** Bài bùa ma padinh yòng. Bài cwan hangui pajùm ti dabau, Đòeq hu tablêq ka Chuaq aih Mangai ìh khoe xùt dùu”... **27** Joq qnàng Herôt xam Bônso Philat, mangai diac

wì xam mangai Isorali khoe tagop ti dabau ta kô đòeq hu
tablêq ka Hapõng hadròeh ìh aih la Chuaq Jesus ìh ma
khoe xùt dàu, **28** đòeq hu broq rìm yiniq tì kõng xam
manoh ìh khoe thê deh adroe. **29** Manòeq kô, ìh tamàng
bàu wì ma khoe hacam aih, am ka mangai hapõng ìh bình
manoh tanoq đòeq hnài trong da ìh. **30** Hnhu qnoh tì
kõng ìh đòeq broq brêh kan yinìq, broq kan halac canòm
ajang nòe yiniq hapõng hadròeh ìh aih la Chuaq Jesus. **31**
Khoe ka waiq khàn, nòe wì haq tagop loh qmòe ka ralàng.
Mangai leq mangai meh jah bình halùih Yang Hadròeh,
ùh lòm yùq qmòe cleq ka anoe trong da Boc Plinh. **32**
Dìq dõng ka bài mangai ma lùi, wì moeq manoh moeq
cliac ti dabau. Pi cabô oe arènh kô dahnèq da au, mahaq
dìq dõng ka dahnèq wì pajùm dõng ti dabau. **33** Bài tiaq
cla yõc kan itai kàn hu anoe kan rìh hlài da Chuaq Jesus
Christ; dìq ka wì jah xôq ramot kàn. **34** Taqne wì ma lùi
Chuaq Jesus pi oe i cabô leq nan cleq hòm, majah qmang
aih i ruàng i hñim, wì tech dõng, jah toq leq dua wì wê **35**
aràng đòeq ajang jènh bài mangai tiaq cla, khoe aih cabô
nan pang leq axong pang aih. **36** I mòeq ngai yiniq haq
Jôsep, bài mangai tiaq cla yiniq ònh ka haq aih Banaba
(Banaba aih la kon calô da kan alòng), xinoe Lêwi, gùng
Chipro, **37** i mòeq haqnech ruàng, haq tech ruàng aih yõc
bac aràng đòeq ajang nòe jènh bài mangai tiaq cla.

5 Mahaq i mòeq ngai yiniq haq Anania, pajùm manoh
dèh ti mai haq aih la Saphira, tech dèh kùng hang, **2** bac
aih wa đòeq hlài mòeq qnah, khoe aih mòeq qnah wa
aràng đòeq ajang jènh bài mangai tiaq cla. **3** Phiero doe:
Anania, aih hagleq Satan ma khoe bình ta manoh ìh, ìh

loh qmòe ka qnùt Yiang Hadròeh, bac tech ruàng gleq
ih khoe lah đòeq qnah? **4** Jò ih qnhòq tech aih ma ùh
joq ruàng ih? Jò khoe tech ih đòeq dèh bac aih ma ùh
jah? Trong aih mùt ta manoh ih qmang leq? kô aih ùh
xài ih qnùt kon mangai, mahaq ih qnùt Boc Plinh. **5** Jò
Anania tàng qmang aih haq tabùng cro ta haqneq cachìt
hloe, dìq döng mangai ma loq ka bìac aih crè pi cajaq. **6**
Khoe aih bài guradam hi trùh lom hanang haq aih, èh
wì hi aràng lam catùh. **7** Jah piq jò atìq ka aih, mai haq
mùt diq, haq ùh qnì neo loh i yiniq cleq. **8** Phiero doe
ka haq: Anoe ka au beq, ajoq chôp Anania tech taneh
jah toq kô? Saphira padreo bàu: Joq, jah toq qmat raq. **9**
Phiero doe: Hagleq chôp mahùa mòeq manoh ti dabau
đòeq hu nhro ngan Yiang Hadròeh da Chuaq? **10** Draq
drình jò aih Saphira cro cachìt hloe ajang jènh Phiero.
Bài wì guradam hlài enh gùng, hnoq haq khoe cachìt,
wì hi tòng lam catùh haq hatìa ralùng dèh ống. **11** Dìq
döng ka Tagop Hadròeh crè pi cajaq, yac ka wì qnoeq hìa
hanoh qmang aih. **12** Jò aih i bac kan halac broq loh enh
tì kòng mangai tiaq cla, dìq ka mangai tiaq hõc tagop ti
dabau tanè hawài qmang ngo Salômon. **13** Ùh i cabô
hùa taqmùt ti mangai tiaq hõc, yac ka phù cròng dêh
bàu manè apôi. **14** Mangai tiaq Chuaq èh rai bac tam,
gucalô xam gucadri hanoh bac. **15** Wì loh qmòe ka tòng
aràng bài mangai yinìq đòeq ti trong lam, taqngùi ta
driah, ta racoh, đòeq jò Phiero lam pagat trong aih, loq
qmang leq dôq qmù haq jah pagat đeh toq biaq biaq ngai
hnha. **16** Wì ma oe gùng ten aih hadai qnung dabau tòc
ta Jérusalem, aràng bài mangai ùh hrõc, mangai kiac

pawè, dìq dǒng jah broq brêh. **17** Jò aih, pajàu haqnhèq xam bài mangai tiaq haq (aih mangai Sađusê) ta manoh wì haq bình kan tajìq, **18** rùp clêh bài mangai tiaq cla. **19** Mahaq jò damang i mòeq bình plình da Chuaq pèh qmang qnoh mangai tiaq cla loh enh gùng. **20** Bình plình doe: Lam beq! lam yòng tanèe hamlang hnim kùh waiq, anoe ka wì ta aih loq rìm bàu kan rìh kô. **21** Mangai tiaq cla tàng toq aih nà, bu qngah wì haq mùt ta hnim kùh waiq, hi hnài wì ta aih. Mahaq, Pajàu haqnhèq xam bài bua haq trùh, wì creo ka dabau tagop ta hnim hadrah, hloe dìq dǒng xam bài gucraq mangai Isorali. Wì thê lình lam ta hnim cadrong rùp qnoh bài mangai tiaq cla loh enh gùng am ka wì haq. **22** Mahaq jò bài lình trùh ta hnim cadrong, ùh hnoq bài mangai tiaq cla ta aih, wì hlài doe: **23** Nhèn hnoq qmang oe raq clenq cajap, bài lình rap oe raq yòng ajang trong qmang, mahaq jò pèh qmang enh dalam ùh i hnoq cabô. **24** Cwan wèq hnim tagop xam bài pajàu tàng doe qmang aih, wì nòeh rai hamàih ùh qnì hagleq majah qmang aih. **25** Mahaq i mangai trùh doe: Hatau bài mangai pì cwan ma khoe rùp clêh, manòeq kô wì haq qnang yòng ta hnim kùh waiq, hnài wì ta aih. **26** Cwan wèq hnim kùh waiq xam bài bua haq, hi lam rùp ahlài mangai tiaq cla, mahaq ùh hùa dalam ka wì aih majah qmang aih wì haq crè ka mangai bàc ta aih loq hachùq wì haq xi hmo. **27** Wì qnung mangai tiaq cla mùt yòng tanèe hadrah, Pajàu Haqnhèq bòch bài mangai tiaq cla: **28** Nhèn khoe ùh lòh pì blinh ùh jah hnài yiniq Jesus am ka cabô, aih kiang pì hnài jàp jià broq ka Jérusalem bình dǒng trong da pì, pì enh taqmòq ka nhèn mahim

mangai aih dôq haq dahrôq hlài ta nhèn qmòh? **29** Phiero xam mangai tiaq cla maqnoeq padreo bàu: Nhèn ep iu tiaq bàu Boc Plình ùh hnau ka bàu kon mangai. **30** Boc Plình da boc yaq nhèn khoe broq ka Chuaq Jesus, Mangai pì ma khoe tiang đình jêh cađac talong pagat rìh hlài. **31** Boc plình khoe dèch atōc haq aih oe enh qma Boc Plình, broq Bùa, broq Chuaq, đòeq am manoh loq raxach xam kan paclaih yiniq lui ka mangai Isorali. **32** Nhèn kô mangai panhìn hlài trong aih, tiah ka Yang Hadròeh Boc Plình ma khoe am ka mangai iu bàu haq. **33** Jò tàng bàu aih, wì cadrit qmòe haninh, nòeh pi cajaq, wì hatinh ka dabau chaq trong jêh cađac bài mangai tiaq cla. **34** Mahaq i mòeq ngai Pharisi, yiniq haq Gamalien, mangai hnài ranenh, haq aih bac ngai iu camaih ka haq, yòng taqne nòe hadrah, thê wì qnoh bài mangai tiaq cla loh enh gùng mòeq ahyàc. **35** Khoe aih, haq doe: Dìq ka mangai Isorali, pì ep rabiaq haq oq trong pì padon tabroq ka wì kô. **36** Adroe kô nèh, i mòeq ngai yiniq haq Thêuđa, yòng doe đeh kô mangai broq gàu, ten jah pôn hrinh ngai tiaq haq: Wì jêh haq cachìt, dìq dǒng mangai tiaq haq hi pac lac dǒng, pulùch èh pi loh cleq. **37** Atìq ka aih, i mòeq ngai yiniq haq Jiuđa, mangai Galili, yòng pagàu, aih wop jò bùa thê rèn hlài mangai ta diac haq jah toq leq, haq aih adràc bac ngai tiaq rađeh, haq aih èh hanoh cachìt, mangai tiaq haq hadai haprah hapriang. **38** Manòeq kô au doe ka pì: Wia ma hangai ka wì kô, dôq da wì haq. Majah qmang aih tàng joq trong kô loh enh kon mangai, aih èh haq raliang đeh, **39** mahaq tàng loh enh Boc Plình, pì ùh i broq cleq ka wì haq jah, aih budàng pì tamùa rađeh hu

tajêh ka Boc Plinh. **40** Wì tiaq bàu haq, creo ka bài mangai tiaq cla mùt ta hnim, thê mangai blai wì aih, khoe èh blinh ùh am qmòe wì haq yōc yiniq Chuaq Jesus đòeq hnài cabô hòm, khoe èh hi caqnaih wì lam. **41** Bài mangai tiaq cla loh enh nòe hadrah, lem bùi ka rađeh khoe tajì ka jah broq mangai pòq kan xalep ka yiniq Chuaq Jesus. **42** Hì leq hì meh, ta hnim kùh waiq, enh hnim kô trùh hnim tau, bài mangai tiaq cla toq anoe hnài yôt Bàu lem da Chuaq Jesus, aih raq Christ.

6 Jò aih, mangai tiaq èh rai bac, dài haq mangai Hêlenit mamùc ka mangai Hêbru, majah qmang aih wì ùh hmàng axong ka bài mangai hadrô da wì haq dahwèq acaq. **2** Wì Mòeq jàt baiq ngai creo tagop dìq dōng bài mangai tiaq hōc, wì doe: Cađac trong hnài bàu Boc Plinh đòeq hu patìh trong ranenh acaq aih joq ùh troq. **3** Manòeq kô oh daq ràih yōc taqne cla pì qmat tapèh ngai ma i tiang, bình Yiang Hadròeh, i kan rabiaq, khoe aih nhèn hi đòeq wì haq patìh trong kô. **4** Aih èh nhèn jah toq waiq khàn jah dìq ka manoh broq dèh bìac. **5** Bàu kô hatroq manoh dìq dōng oh daq, wì hi patô Êtien, aih mangai bình manoh lùi xam Yiang Hadròeh, Philip, Bôcoro, Nicanô, Timôn, Bamêna xam Nicôla, aih mangai Antiôt neo wìh tiaq trong mangai Juđa; **6** wì aràng tapèh ngai aih loh enh ngèa bài mangai tiaq cla. Bài mangai tiaq cla waiq khàn khoe aih roh tì ta wì aih. **7** Bàu Boc Plinh chàc rai èh rai hangai, ta Jérusalem mangai tiaq rai bac. I bac ngai pajàu hanoh tiaq. **8** Jò aih, Êtien jah bình xôq yiang xam cwìang itai, broq bac trong halac taqne phù cròng. **9** Mahaq i toq biaq ngai enh hnim tagop wì ma

creo dèh: Tagop da mangai pi tawac, xam bài mangai ta Siren, mangai gùng Alecxando, xam mangai Juđa oe ta Silisi, gùng Asi, bài aih yòng tarahen ka Êtien. **10** Mahaq wì ùh blêq kan rabiaq enh Yang Hadròeh am ka haq jò haq capoch. **11** Aih iq wì hi lam baxrùq wì qnoeq, rameh: Nhèn khoe tàng haq kô tapoch qmèq ka Môise xam Boc Plinh. **12** Wì patut bài phù cròng, bài gucraq xam bài mangai hnài ranenh, khoe aih wì hi clàm cadêh müt rùp Êtien, aràng haq loh yòng enh ngèa nòe hadrah. **13** Wì hi qnoh dèh bài mangai yòng tapoch qmùt ka haq, bài aih doe rameh: Mangai kô toq capoch troq nòe hadròeh xam ranenh. **14** Majah qmang aih nhèn khoe tàng haq doe: Jesus mangai Naxaret raliang cađac nòe kô èh rai broq tablòq hlài ranenh rìh acaq Môise ma khoe đòeq hlài ka bèn. **15** Jò aih bài mangai hangui tanèe hadrah dìq chrih ngan Êtien, hnoq hadrò haq tìah ka hadrò bình plinh.

7 Craq pajàu haqnhèq bòch Êtien: Ajoq qmang aih loq ùh? **2** Êtien padreo bàu: Wì daq xam bài baq, pì tamàng au anoe kô! Boc plinh da kan ranhòm khoe mahno rađeh ka kan cadraq bèn aih Apraham jò haq oe raq ta gùng Mêso-bôtami, adroe ka haq rìh ta Charan, **3** Boc plinh doe: “Drah cađac gùng kô cađac hloe xam oh daq iìh hu lam trùh tanèe au patô am ka iìh. **4** Jò aih haq hi loh enh Kan-đê lam trùh ta Charan. Atiq ka baq haq cachìt, enh aih Boc plinh qnung haq trùh ta gùng pì qnang oe manòeq. **5** Boc plinh ùh am ka haq cleq ta gùng kô, mòeq haqnech taneh toq capiang jènh dua ùh i, mahaq Boc plinh i tèu am ka haq xam xinoe haq gùng kô, yac ka jò aih haq qnhòq i kon. **6** Boc plinh doe ka haq rameh: Xinoe

ìh broq đeh tamoe tanòe taneh diac wì qnoeq. Gùng aih rùp wì haq broq hapõng dìc rai baxa pani wì haq pôn hrinh hanam. **7** Boc plinh doe: Mahaq au tahadrah ka bài mangai ma khoe rùp xinoe ìh broq hapõng dìc aih, khoe èh wì haq loh enh gùng aih đõeq kùh waiq au tanòe kô. **8** Khoe aih Boc plinh am ka haq tajao ramènh kat akia. Aih ìq, jò Apraham khoe i ka Ysac, haq broq ramènh kat akia ka Jacôp, èh Jacôp broq ramènh aih ka mòeq jàt baiq ngai kan cadraq. **9** Mòeq jàt baiq ngai kan cadraq tajênh ka Jôsep, wì rùp tech haq broq hapõng ta gùng Êdip. Mahaq Boc plinh oe ti haq. **10** Rai paclaih haq khoe kan nanxa, broq ka haq jah kan tamèt, kan rabiaq enh ngèa Pharaôn, bùa Êdip, bùa aih dèch haq broq cla craq cwan wèq dìq dõng tagùng aih wèq hloe xam hnim bùa. **11** Qnhòng aih, i kan pangot kàn ta gùng Êdip xam gùng Cana-an, nanxa joq qnàng, kan cadraq bèn chaq ùh loh qmòe dahuwèq acaq. **12** Jacôp hìa gùng Êdip i qmau, haq hi thê kan cadraq bèn loh ta aih yàng adroe. **13** Yàng atìq, bài oh daq hi canau ka haq, aih Pharaôn men loq ka xinoe Jôsep. **14** Atìq ka aih, Jôsep thê wì đìh qnoh dèh baq xam wì ta hnim dìq dõng jah tapèh jàt padam ngai. **15** Jacôp loh oe ta Êdip, haq cachìt ta aih, bài cadraq bèn hadai qmang aih, **16** Atìq ka aih èh, jah ahlài ta Sichem catùh tanòe ralùng Apraham ma khoe yõc bac rot hlài enh nang noe Hêmo oe ta Sichem. **17** Mahaq ten trùh jò Boc plinh hu pagêh deh bàu haq ma khoe tèu ka Apraham, bài mangai bèn oe ta gùng Êdip èh rai bac. **18** Trùh jò gùng aih i mòeq ngai bùa qnoeq ùh loq ka Josep. **19** Haq

aih chaq trong hu palùng đac xinoe Isorali rai baxa kan cadraq bèn, thê wì cadraq bèn tèm cađac kon qyoh neo hauang, dôq cachìt đac dǒng. **20** Môise hanoh jah hauang jò aih diq; haq yeo alàng ka kon qyoh qnoeq, jah ban dèh ta hnim baq piq khê. **21** Trùh hì wì ma ep cađac haq, kon cadrì da Pharaôn hi dèch haq tōc enh diac, ban broq deh kon. **22** Môise hốc yōc dǒng kan rabiaq da mangai Êdip, enh bàu capoch trùh yiniq broq dìq rabiaq. **23** Mahaq jò haq pôn jàt hanam, ta manoh haq hmàng enh lam hmàih deh ka oh daq aih mangai Isorali. **24** Môise hnoq i mangai baxa mòeq ngai oh daq ta aih, haq wiang deh ti oh daq jêh cachìt mangai Êdip đòeq hu patem chau. **25** Haq hèm dèh oh daq loq Boc plình khoe yōc haq đòeq dèch paclaih wì, mahaq wì ùh qnì. **26** Trùh hì atìq, jò wì qnang tajêh dabau, Môise thia haten hu plah, haq doe: Òq wa, oh daq wìa ka jêh hrìn dabau qmang qmat? **27** Mangai ma jêh deh bua caqnhùt đac Môise rai doe: Cabô khoe dèch ìh broq cwan đòeq hadrah nhèn? **28** Ahìaq ìh enh jêh đac nhèn qmang ka mangai Êdip hì nèh? **29** Môise bu tàng qmang aih haq drah cadàu amot tagùng Mađi-an, ta aih haq i baiq ngai kon calô. **30** Atìq ka aih, pôn jàt hanam, mòeq bìngh plình loh ta haq, tanèo hawit trong wang Sina-i, taqne pla ùnh cheo xèm yila. **31** Môise hnoq qmang aih, hamàih pi cajaq, haq thia ka haten đòeq hu ngan, haq tàng bàu Chuaq doe: **32** “Au kô raq Boc plình da Apraham, da Ysac, da Jacôp. Môise crè pi cajaq, ùh hùa blèch ngan. **33** Chuaq doe: “Drah lêh jai ìh qmat, majah qmang aih nòe ìh yòng qmat, aih nòe taneh hadròeh. **34** Au joq khoe hnoq kan nanxa mangai da au oe ta gùng

Êdip, au khoe tàng bàu wì haq hràng, hacô au khoe loh hu paclaih wì haq. Manðeq lam tacô, au hu thê ìh hlài ta Êdip. **35** Môise aih mangai wì khoe qnoph đac, wì doe: Cabô khoe dèch ìh broq cwan đòeq hadrah nhèn? Aih raq mangai Boc plînh khoe thê broq gàu broq mangai paclaih, canðom ka mðeq bình plînh loh doe ka haq ta xèm yila. **36** Aih raq mangai khoe qnung wì haq loh enh Êdip, broq bac teo halac kan hamâih ta gùngÊdip, ta diac Raxìq gòh, xam pôn jàt hanam tanðe braih kàn. **37** Môise kô raq ma khoe anoe ka mangai Isorali: Atìq kô èh Boc Plînh paqnàng taqne pì oh daq, mðeq ngai pajàu tìah ka au **38** Aih raq Mangai khoe oe ti Isorali tanðe braih kàn, oe ti bình plînh yiang ma khoe capoch tuàng ka haq xam yaq boc bèn ta bui wang Sina-i. Haq khoe yđc bàu kan rìh đòeq hu am hlài ka bèn. **39** Aih raq mangai yaq boc bèn ùh iu qmòe blinh bàu haq, cađac haq đòeq hu ta ngèa dèh manoh ta gùng Êdip, **40** wì anoe ka Arôn: Broq bòe kiac hu lam adroe ka nhèn beq, majah qmang aih Môise mangai ma khoe qnoph nhèn loh enh gùng Êdip, pi qnì haq khoe glàm yiniq cleq taleq hnha. **41** Ta bài hì aih, wì broq mðeq toq radua qmù bo kon, dèch ramènh ka radua qmù rai lem bùi dèh ka yiniq broq loh enh tì kõng cla. **42** Boc plînh hi cađac wì haq, dôq da wì haq kùh waiq mat mahì, mat khê xam bài halõng ta trõc, qmang ka bàu khoe achìh ta hset pajàu rameh: Dìq ka mangai Isorali, pôn jàt hanam nòe braih kàn, Pì i hmaq dèch ka au ramènh tadreo leq ùh, **43** Jò pì tòng ranòh da Molõc, Xam halõng da kiac Rom phan, Aih bài radua qmù cla pì broq loh đòeq hu kùh waiq qmòh? Qmang aih èh au

hadai lam palac pì ta gùng Babilôn. **44** Hnim ranòh kùh waiq oe ti yaq boc bèn tanèe hawit, qmang ka Chuaq khoe thê Môise broq tiaq dua haq khoe hnoq. **45** Atìq ka aih, yaq boc bèn khoe aràng hnim ranòh kùh waiq aih, tiaq Josuê mùt tagùng wì haq ma khoe blah yōc enh tì kǒng bài mangai diac wì, Boc plình ma khoe hnan qnoh enh ngèa wì haq, hnim ranòh kùh waiq aih oe yôt ta aih trùh qnhòng bùa Đawit, **46** aih mangai jah xôq ramot enh ngèa Boc plình, haq bòch mòeq nòe hu đòeq ka Boc plình da Jacôp oe. **47** Khoe aih, bùa Salomôn broq am ka Chuaq mòeq toq hnim. **48** Mahaq Yiang Dìq Jaq Haqnhèq ùh oe ta hnim broq enh tì kǒng kon mangai, tìah ka bàu pajàu khoe doe: **49** “Chuaq doe: Trōc aih gèq au, Taneh aih nòe au roh jènh. Hnim qmang leq pì broq ka au, I nòe leq dôq ka au padài? **50** Ma ùh joq tì kǒng au broq loh dìq dōng rìm yiniq kô qmòh?” **51** Wùih, bài mangai cadoq ranǒng, manoh xam don qnhòq kat akia meh! Pì àu tablêq yôt ka Yiang Hadròeh, kan cadraq pì qmang leq, pì hadai qmang aih! **52** I pajàu leq kan cadraq pì ùh rùp? Wì hadai khoe jêh cađac bài mangai pajàu anoe trùh Mangai taq atoq, manòeq kô pì raq khoe rùp jêh cađac Mangai aih; **53** pì khoe yōc ranenh anoe qnoh xi bàu bình plình, mahaq pì ùh wèq tiaq ranenh aih! **54** Wì tàng bàu aih, ta manoh nòeh pi cajaq, wì cadrit qmòe hanenh ka Êtien. **55** Mahaq Êtien jah bình Yiang Hadròeh, haq qngoc ngan ta plình, hnoq kan ranhòm Boc plình, hnoq Chuaq Jesus yòng enh apah qma Boc plình; **56** haq doe: Hatau, au hnoq Diac plình tapèh, i Kon mangai yòng apah qma Boc plình. **57** Jò aih, bài wì cajiah cadêh rai bàng don, wì glàm ta haq, **58**

hua qnoh Êtien enh gùng ka plài, wì yōc hmo đàp rachùq haq. Bài mangai yòng capoch dech ka Êtien yōc deh eo yōh đòeq ajàng nòe jènh mòeq ngai guradam yiniq haq aih Saulo. **59** Jò wì oe raq đàp haq, Êtien waiq khàn: Waiq Chuaq Jesus ìh đìh yōc mahua au. **60** Khoa aih, haq kùn cràng rai capoch cadêh: Waiq Chuaq, apaq taqmòq yiniq lui kô ka wì! Bu khoe ka bàu aih, haq hi kùi.

8 Êtien cachìt aih troq ka manoh Saulò, jò aih Tagop Hadròeh ta Jérusalem glàm kan habo kàn, enh gùng ka bài mangai tiaq cla, dìq dōng ka mangai lùi Chuaq ep cadàu prah priang jàp gùng Judê xam gùng Samari. **2** Mahaq, bài mangai dìq ka manoh iu yùq ka Boc plinh catùh hanang Êtien rai crò hmoe ka haq. **3** Mahaq pang aih, Saulo àu raliang đac Tagop Hadròeh. Lam enh hnim kô trùh hnim tau haq ti hua qnoh rùp clêh gucalô xam gucadri. **4** Bài mangai ma khoe cadàu paclac trùh taleq anoe Bàu lem ta aih. **5** Philip hadai qmang aih, haq cadàu loh ta Samari rai anoe Chuaq Jesus Christ ka wì ta aih, **6** wì ta aih tàng bàu haq hnài rai hnoq kan halac haq broq, dìq ka wì mòeq manoh tamàng bàu haq, **7** i bòe kiac chóc breo cadêh cadàu loh enh chac bac ngai, mangai cwê jah brêh hanoh bac. **8** Dài aih, ta gùng aih i kan lem bùi kàn. **9** Jò aih, gùng aih i mòeq ngai yini haq Simôn, broq pajàu tadreo, dìq ka mangai Samari hamàih đeh hra ka haq. Haq doe rađeh kô mangai i tiang i bang. **10** Enh guqyoh trùh gucraq dìq manè dèh haq, wì doe: Mangai kô raq kan itai kàn da Boc plinh, **11** Wì tiaq haq, majah qmang aih khoe dùnh wì hamàih ta manoh jò wì hnoq trong haq ti blàih blöng. **12** Yàng jò wì ma hi lùi Philip

aih mangai hnài Bàu lem Diac plình, lùi yiniq Chuaq Jesus, mangai gucalô xam gucadri dìq jah broq baptem.

13 Simôn hadai lùi Chuaq, atiq ka jah broq baptem haq hi oe hloe ti Philip, hnoq bài kan halac, haq hamàih pi cajaq.

14 Mòeq jàt baiq ngai tiaq cla dua oe raq ta Jérusalem, hìa ta gùng Samari khoe yōc bàu Boc plình, wì haq thê Phiero xam Jon trùh ta aih. **15** Wa trùh ta aih, waiq khàn ka mangai neo tiaq, dôq wì aih jah yōc Yiang Hadròeh.

16 Majah qmang aih Yiang Hadròeh qnhòq loh ti cabô taqne wì aih, wì haq toq canòm ka yiniq Chuaq Jesus đòeq jah broq baptem. **17** Wa Phiero wa Jon roh tì ta chac mangai neo tiaq, dìq ka wì hi jah yōc Yiang Hadròeh.

18 Simôn hnoq wa mangai tiaq cla đòeq tì ta chac cabô mangai aih hi jah Yiang Hadròeh, haq hi yōc bac dèch ka wa rai doe: **19** Am ka au kan itai aih diq, đòeq mangai leq au roh tì haq aih hi jah Yiang Hadròeh. **20** Mahaq Phiero doe: Bac iħ qmat thê haq hnhung lùch tiaq cla iħ, majah qmang aih iħ hèm dèh yōc bac canau plàih rot kan tabàih enh Boc plình! **21** Īħ ùh jah pajùm cleq ti nhèn, majah qmang aih manoh cliac īħ ùh hnħuh lem enh ngèa Boc plình. **22** Drah loq raxach caðac deh kan dù qmat đòeq hu waiq khàn ka Boc plình, dôq kan qmèq ta manoh īħ jah caqnaih. **23** Majah qmang aih, au hnoq īħ qnang rìh oe ta clong mat xang, talong clang kan dù. **24** Simôn padreo bàu: Au ngèh đeh ka chôp raq waiq khàn Boc plình am ka au, dôq au ùh hìaq glàm đeh bài yiniq chôp ma anoe aih. **25** Atiq ka wa anoe hnài bàu Boc plình rai paqnoh Chuaq Jesus am ka wì, wa Phierò wa Jon hi wìh hlài ta Jérusalem, rai lam rai hnài Bàu Lem ta bàc

plài da mangai Samari. **26** Jò aih, i mòeq bình plình da Chuaq doe ka Philip: “Drah yòng beq! lam trong apah qma enh Jérusalem loh ta Gaxa. Trong aih hawit.” **27** Haq padinh yòng hi lam. Ti trong lam haq hnoq mòeq ngai cwan khoe xon Êthiopi, cwan patih ka Candac, aih bùa cadri diac Êthiopi, cwan aih wèq dìq dǒng kùng hang bùa aih. Haq khoe tōc kùh waiq ta Jérusalem, **28** Jò dang hlài haq hangui ta xê, đōc ta hset pajàu Êsai. **29** Yang Hadròeh doe ka haq: “Drah lam haten tem xê axêh tau.” **30** Philip cadàu ka haten, tàng mangai Êthiopi aih đōc hset Êsai, aih haq hi bòch: ìh aloq tàng bàu ìh ma đōc aih ùh? **31** Cwan aih doe: Ùh i cabô anoe ka au broq qmang leq au maloq tàng? Cwan aih hi pachùh Philip tōc hangui tìa cla haq. **32** Cwan aih đōc ajang kô ta hset Hadròeh: “Wì khoe hua haq tìah ka kon trìu trùh nòe xah jam Tìah kon trìu làu enh ngèa mangai got xàc, Haq ùh dahah hacùng, **33** Jò haq loh đeh ka hamoq aih kan taq atoq da haq wì khoe cađac. Oe i cabô ma qmon hlài qnhòng da haq? Majah qmang aih kan rìh haq ta crōng taneh wì khoe dèch đac”. **34** Cwan khoe xon aih doe: Au bòch ìh, pajàu aih anoe trùh cabô? Ahìaq haq anoe cla rađeh, ùh meh haq anoe trùh mangai leq? **35** Philip hi patep ajang nòe Hset Hadròeh cwan ma đōc aih đòeq hu anoe Chuaq Jesus am ka cwan aih loq. **36** Wa qnang lam ti trong, glàm nòe i diac, cwan aih bòch: Hacô diac kô, i hìaq i cleq khech tìat au broq baptém loq ùh? **37** Philip doe: Tàng joq ìh dìq ka manoh lùi aih jah. Cwan khoe xon aih doe: Au lùi Chuaq Jesus Christ aih Kon Boc plình. **38** Haq thê xê axêh yòng ajang aih, dìq baiq wa loh ta diac, Philip hi

broq baptem am ka cwan jang aih. **39** Jò tōc enh diac, Yiang Hadròeh da Boc plìngh hi aràng Philip taqnoeq, cwan pi oe hnoq haq hòm, mahaq dua rai hlài rai lem bùi. **40** Yàng Philip aih wì hnoq haq ta Axôt, enh aih haq lam ta Sêsarê, trùh pang leq haq hnài Bàu Lem ta aih.

9 Jò aih, Saulo ùh hêq ka hacam ti chaq jêh cađac mangai tiaq Chuaq Jesus, haq trùh ti mangai pajaù haqnhèq, **2** bòch jàiq enh haq aih hu aràng roc hnim tagop qyoh ta gùng Đamat, waq toq hnoq magai leq tiaq Trong bàu lem yac ka mangai calô, mangai cadrì, kàt ahlài dìq ta Jérusalem. **3** Mahaq jò Saulo qnang lam ten trùh ta Đamat, ka doe i kan qngah enh plìngh sreo qngah du danh ka haq. **4** Haq cro ta haqneq rai tàng bàu tapoch ka rađeh: “Saulo, Saulo, hagleq ìh majah ti chaq rùp au?” **5** Haq bòch: Waiq Chuaq, ìh cabô? Bàu aih tèu: “Au kô raq Jesus mangai ìh ma chaq rùp baxa; **6** mahaq manòeq kô yòng beq, müt ta plài, i mangai anoe ka ìh trong ìh ma ep broq. **7** Dìq ka mangai lam mòeq qmang ti haq, yòng ta aih hi haglènh pi jah tapoch qmòe cleq, wì tàng bàu tapoch mahaq ùh i hnoq qmòe cabô. **8** Saulo àu yòng enh taneh, mat aih blèch mahaq ùh xau hnoq qmòe cleq. Wì carùp tì haq qnung haq müt ta Đamat **9** haq oe ta aih piq hì, mat ùh xau hnoq cleq, ùh dùh ka acaq ùh dùh ka ôq. **10** Jò aih ta Đamat i mòeq ngai tiaq hōc yiniq haq Ana-nia, ta kan mahno Chuaq creo ka haq: “Anania!” Haq padreo bàu: Chuaq au! hacô au kô. **11** Chuaq doe ka haq: “Drah yòng beq, lam ta trong wì ma creo Trong jang, chaq Saulo mangai Tacso, oe ta hnim Juđa, majah qmang aih haq qnang waiq khàn”, **12** haq khoe hnoq

i mòeq ngai yiniq Ana-nia, mùt ta hnìm yōc tì bēq ta
chac haq, dōq haq mat haq jah qngah hlài. **13** Anania
padreo bàu: Waiq Chuaq au! Au tàng bàc ngai anoe hlài
mangai kô khoe broq kan haþo ka bàc ngai hadròeh ìh ta
Jérusalem. **14** Manòeq haq lam tacô, haq jah dōng cwìang
enh wì mangai pajàu haqnheq, đòeq rùp kàt dìq dōng
mangai ma creo dang yiniq ìh. **15** Mahaq Chuaq doe ka
Ana-nia: “Drah lam beq, majah qmang aih au khoe ràih
mangai kô đòeq broq ranac da au, hu anoe yiniq au ka
mangai diac wì, ka þài bùa, hloe xam mangai Isorali, **16**
Au ji doe dôq haq loq kô èh taiq yiniq au haq ep chìuq
xalep dàng leq cadèh. **17** Ana-nia hi yòng lam, haq mùt ta
hnìm, khoe aih haq yōc tì roh ta chac Saulo rai doe: Daq
Saulo, Chuaq aih Jesus ma khoe loh ti ìh ti trong jò ìh lam
tacô, khoe thê au trùh, dōq mat ìh jah qngah hlài rai
jah bình Yang Hadròeh. **18** Tajòe qmòe jò aih i cleq tìah
ka cachep clìh enh mat Saulo aih mat haq hi hnoq. Haq
padinh yòng dôq wì broq þaptem ka raðeh. **19** Jò haq
khoe acaq aih haq hi tadêh hlài. Saulo oe ta Ðamat toq
biaq hì ti þài mangai tiaq hõc. **20** Haq drah hnài roc him
tagop qyoh: Chuaq Jesus aih kon Boc Plình. **21** Þài mangai
tàng bàu haq aih, dìq loh ka hamàih, wì doe: Ma ùh xài
haq qmat raq mangai yòng rùp baxa dìq dōng ka oh daq
ta Jérusalem ma creo dang yiniq kô, ma ùh joq haq lam
tacô hu rùp kàt ahlài wì ka þài mangai pajàu kàn qmòh?
22 Mahaq Saulo rai èh rai cajap manoh, haq goh bàu þài
mangai Juða ma oe ta Ðamat, haq doe ka wì: Chuaq Jesus
aih raq Christ. **23** Bàc hì atìq ka aih, þài mangai Juða
hatinh ka dabau chaq trong jêh caðac Saulo. **24** Mahaq

i mangai bahìa ka Saulo loq trong mangai Juđa ma ta hatinh. Wì tát dìq dǒng roc qmang ngo đøèq hu gòm jêh đac Saulo. **25** Yàng èh jò damang, bài mangai tiaq hōc yōc rajo kàn cadrai qnōh haq loh enh gùng ka panàt canàng. **26** Jò Saulo khoe trùh ta Jérusalem, haq enh taqmùt ti mangai tiaq hōc ta aih, mahaq wì hòq ka haq, ùh lùi haq hadai khoe broq mangai tiaq hōc. **27** Banaba hi ajèn haq, qnung haq trùh enh ngèa bài mangai tiaq cla rai taqmon dôq wì aih loq ti trong Chuaq Jesus khoe loh anoe ka Saulo qmang leq, ta Đamat haq khoe hnài yiniq Chuaq Jesus, ùh lòm yùq crè qmòe cleq. **28** Pang aih, Saulo thia lam hlài ti mangai tiaq hōc ta Jérusalem. **29** Canòm ka yiniq Chuaq Jesus haq capoch tuàng ùh yùq qmòe cleq. Haq hadai tarahen ka mangai Hêlênit, mahaq wì aih chaq trong hujêh cađac haq. **30** Jò oh daq hìa qmang aih, wì aràng haq trùh ta Sêsarê, èh thê haq lam ta gùng Tacso **31** Qmang aih, dìq ka Tagop Hadròeh tagùng Juđê, gùng Galili xam gùng Samari jah kan lem bùi catèm, jah hagau, rìh ta kan loq iu Chuaq, canòm ka Yiang Hadròeh wiang, mangai tiaq èh rai bac tam. **32** Jò aih, Phiero lam jàp gùng, haq trùh hmàih ka mangai oh daq ta Chuaq tagùng Lyđa. **33** Ta aih i mòeq ngai pen yiniq haq Ênê, kùi mòeq nòe ta racoh khoe rahim hanam. **34** Phiero doe ka haq: Daq Ênê! Chuaq Jesus Christ broq ka ìh jah brêh, drah yòng beq, ti don da ìh racoh ìh ma kùi qmat. Draq adrinh hloe jò aih, haq padinh yòng. **35** Dìq ka mangai ta Lyđa xam gùng sarôn hnoq qmang aih wì hi tawìh hlài ta Chuaq. **36** Oe ta Jopbê, taqne mangai tiaq hōc, i mòeq ngai cadrì yiniq haq Tabitha, (bàu Gorec aih Đôca), haq

broq bac yiniq lem rai loq ti am ka mangai pa. **37** Jò aih, haq ùh hrōc èh hi cachit. Wì ti ti qnheo hanang haq, khoe hi ta qngùi haq tabluàng talàu qnhèq. **38** Mangai tiaq hōc tàng doe Phiero qnang oe ta Lyđa, haten ka Jopbê, wì hi thê baiq ngai lam akhen ka haq, wa doe: ìh drah lam rēnh haq. **39** Phiero hi yòng lam ti wa aih. Jò trùh ta aih, wì atōc haq ta bluàng haqnhèq, dìq dōng bài mangai cadrì hadrō yòng dudan ka haq rai hmoe, wì patô ka haq ngan bài eo yôh xam bài eo hlaq, Đôca khoe jìp am ka wì jò haq oe rìh. **40** Phiero thê wì loh dōng enh gùng, khoe aih haq hacùn cràng hu waiq khàn, haq wìh tajang ka hanang, rai doe: Tabitha, yòng beq! Mangai gucadrì aih hi blèch mat hnoq Phiero, haq drah yòng qmòe ka rēnh. **41** Phiero hnhu tì ka haq carùp hu dèch haq yòng, èh haq ti creo ka wì ma lùi Chuaq ta aih, hloe xam bài mangai cadrì hadrō, dôq wì hnoq haq aih khoe rìh hlài. **42** Yiniq aih tagùng Jopbê wì hìa dìq dōng. Aih ìq, majah i bac ngai lùi Chuaq. **43** Phiero oe ta Jopbê bac hì, haq oe ta hñim mangai thòq broq akia yiniq haq Simôn.

10 Tagùng Sêsarê, i mòeq ngai yiniq haq aih Kot-nai, broq cla craq wèq mòeq hrinh ngai lình Italia. **2** Cla haq xam cadraq haq dìq rìh rabiaq alàng loq iu yùq Boc Plinh, loq tabàih am ka mangai hamoq, waiq khàn ka Boc plinh ùh lah catech. **3** I mòeq hì, wop qnah ta piq jò di xèq, ta kan mahno haq hnoq i mòeq bìnhanh plinh enh Boc plinh trùh doe ka haq: “Kot-nai!” **4** Mat haq ngan ta bìnhanh plinh rai tarit tariang, haq padreo bàu: Waiq chuaq! Ahiaq i yiniq cleq ùh? Bìnhanh plinh doe: “Bàu waiq khàn xam kan tabàih da ìh am ka mangai hamoq tōc khoe trùh ta

Boc plình, Haq khoe hmàng da ìh. **5** Manðeq kô drah thê mangai lam ta Jopbê, akhen ka mòeq ngai yiniq haq Simôn, mangai wì ma creo Phiero aih. **6** Manðeq kô haq oe ta hnim Simôn, aih mangaih thòq broq akia, hnim haq ten kênh diac raxìq.” **7** Jò bình plình ma tapoch ka haq khoe lam, Kot-nai hi creo deh baiq ngai hapõng xam mòeq ngai lình ma dìq dèh manoh ka haq, **8** haq anoe hlài ka wì tàng dìq dõng, khoe aih haq hi thê lam ta Jopbê. **9** Hì atìq wì piq ngai qnang lam ti trong, jò qne hì wì lam ten trùh ta Jopbê, Phiero tõc enh kùa po hnim hu waiq khàn. **10** Haq loh ka pangot enh acaq, jò wì qnang padon qnoh ka haq acaq, haq loh ka pi hmàng pi hmat. **11** Haq hnoq plình tapèh i cleq tìah taiq ka blah mù kàn wì ma rùp dèch pôn toq mùm cadrai loh ta taneh. **12** Haq hnoq ta aih i rìm ngè rìh i pôn toq jènh, rìm yiniq rìh loq rai pan rai moq ta taneh, xam chìm ta trõc. **13** Khoe aih i bàu doe ka haq: “Phiero! drah yòng beq, broq jam qmat hu acaq”. **14** Mahaq Phiero padreo bàu: Chuaq au! ùh đòh, majah qmang aih au ùh lah acaq adrech cleq ma ùh hruah. **15** Bàu aih doe tam ka haq: “Yiniq cleq Boc plình khoe broq haq hadròeh, aih paq ngan haq oe raq ùh hruah”. **16** Bàu aih doe ka haq piq yàng, khoe èh cleq aih hi dèch atõc hlài ta plình. **17** Jò Phiero oe raq hèm trùh kan mahno đeh ma khoe hnoq aih, bài mangai Kot-nai thê lam, chaq khoe hnoq hnim Simôn, khoe yòng qmòe ajang trong qmang. **18** Wì creo bòch: Simôn wì ma creo Phiero aih ajoq oe ta hnim kô loq ùh? **19** Phiero oe raq hèm yôt ta kan mahno, Yiang Hadròeh doe ka haq: “Hatau i piq ngai chaq ìh. **20** Drah yòng loh lam ti wì beq!

Apaq rangòt, majah qmang aih au kô ma khoe thê wì haq.” **21** Phiero hi loh ta wì, haq doe: Hacô au kô, mangai pì ma qnang chaq, pì trùh i yiniq cleq ùh? **22** Wì padreo bàu: Claq craq nhèn Kot-nai, aih mangai taq atoq loq yùq crè ka Boc plînh, mangai Juđa dìq capoch lem ka haq, i mòeq bìnhanh plînh hadròeh anoe ka haq, thê nhèn lam tacô akhen waq qmòe ka jah ìh hlài deh ta hnim haq, đòeq tamàng bàu ìh hnài. **23** Phiero pachùh wì mùt ta hnim, mang aih haq dôq wì oe kùi ta aih. Sroq èh, Phiero yòng lam ti wì, i biaq ngai oh daq ta Jopbê hanoh tiaq haq. **24** Hì atiq wì trùh ta Sêsarê, cla Kot-nai loh đìh, rai kùh rai bla op nòe jènh Phiero; **25** Phiero bu mùt, aih cla Kot-nai loh đìh, rai kùh rai bla op nòe jènh Phiero. **26** Mahaq Phiero dèch haq yòng rai doe: ìh yòng beq, au kô hanoh mangai. **27** Phiero capoch tuàng ti Kot-nai, jò mùt ta hnim haq hnoq i bàc ngai khoe tagop ti dabau ta aih. **28** Haq doe ka wì: Mangai Juđa ùh khòh ta qmùt ti mangai diac wì, hadai ùh khòh thia ta hnim wì. Mahaq Boc plînh khoe mahno ka au loq ùh jah ngan mangai leq amùa ùh sròeh. **29** Aih ìq jò mangai ìh thê lam chaq au bu trùh, au hadai ùh hòq cleq ka trùh tacô. Aleq au bòch, i yiniq cleq pì majah akhen ka au trùh tacô? **30** Kot-nai padreo bàu: Khoe pôn hì ta adreo kô, qnah ta piq jò di xèq, au qnang oe ta hnim waiq khàn, cadoe i mòeq ngai caxùnh eo tabòc ka-ah ka-iang yòng enh ngèa au, **31** mangai aih doe: Kot-nai! bàu waiq khàn ìh khoe jah dì, yiniq ìh ma ti tabàih ka mangai pa Boc Plînh khoe hmàng da ìh. **32** Manòeq kô ìh thê mangai lam ta Jopbê, akhen ka Simôn wì ma creo Phiero aih lam tacô: Haq qnang oe

ta hnim Simôn thòq broq akia, hnim aih ten kênh diac raxìq. **33** Au hi drah thê lam chaq ìh, ìh trùh tacô aih joq troq. Manðeq kô, dìq dõng ka nhèn qnang oe enh ngèa Boc plình, hu tamàng bàu haq khoe tanap ka ìh đòeq anoe hlài ka nhèn. **34** Phiero hi anoe: Joq qnàng, au loq Boc plình ùh loq waq tang ngai, **35** mahaq dìq dõng ka mangai ta crõng taneh, waq toq cabô loq iu yùq ka haq rai broq trong taq atoq, mangai aih jah lem manoh haq. **36** Aih la bàu haq khoe anoe ka mangai Isorali, jò hnài Bàu lem da kan catèm enh Chuaq Jesus Christ, aih Chuaq dìq dõng da kon mangai. **37** Yiniq aih baxèm enh Galili khoe aih jàp tagùng Juđê, atìq ka aih Jon khoe hnài broq þaptem, aih pì hanoh khoe loq, **38** Boc plình khoe xùt dày ka Chuaq Jesus mangai Naxaret xi Yiang Hadròeh, khoe aih haq hi lam enh gùng kô trùh gùng tau ti am xôq ramot rai paclaih ka bài mangai kiac padit, majah qmang aih Boc Plình oe ti haq. **39** Nhèn mangai hnoq rìm yiniq haq broq tagùng mangai Juđa xam ta Jérusalem. Wì khoe taqmac haq talong hu jêh cađac. **40** Mahaq trùh hì piq, Boc plình khoe broq haq rìh hlài rai paqnoh haq. **41** Ùh xài paqnoh am dìq dõng ka mangai hnoq, mahaq am toq ka mangai hu lam panhìn, bài mangai Boc plình ma khoe ràih qmòe enh baxèm, aih nhèn kô mangai ma khoe acaq ôq pajùm ti haq, atìq ka haq rìh hlài enh kan cachìt. **42** Haq khoe thê nhèn hnài rai anoe dôq rìm ngai loq haq aih raq Mangai Boc plình ma khoe xùt dày đòeq hu hadrah mangai rìh xam mangai cachìt. **43** Dìq dõng bài mangai pajàu hanoh khoe anoe trùh haq, wì doe: waq toq mangai leq lùi haq, aih hi jah claih dìq ka yiniq lui taiq

canòm ka yiniq haq. **44** Jò Phiero oe raq anoë, aih Yiang Hadroëh loh oe dìq döng ti mangai ma tamàng bàu. **45** Bái mangai khoe broq ranenh kat akia, aih la bái mangai ma lam ti Phiero, wì hamàih pi cajaq majah qmang aih wì hnoq Boc plình hadai ùc am Yiang Hadròeh ka mangai diac qnoeq. **46** Majah qmang aih wì tàng bái aih tapoch bàu crài đòeq manè apôi Boc Plình. **47** Jò aih Phiero hi doe: Wì kô hadai khoe jah Yiang Hadròeh qmang ka bèn, cabô hùa tát wì haq jah broq baptem xi diac hòm? **48** Haq hi thê broq baptem ka wì, canòm ka yiniq Chuaq Jesus. Wì àu padràng haq oe tam ti wì toq biaq hì.

11 Bái mangai tiaq cla xam oh daq oe ta Juđê hìa doe mangai diac wì hanoh khoe tawìh tiaq trong Boc plình. **2** Jò Phiero khoe wìh tòc ta Jerusalem, bái mangai lùi mahaq khoe broq tiaq ranenh kat akia i tapoch ka haq rameh: **3** Ìh khoe mùt hním bái mangai qnhòq broq ranenh kat akia, rai acaq pajùm ti wì! **4** Mahaq Phiero yòc rìm yiniq ma khoe loh đòeq taqmon hlài ka wì tiaq tang yiniq i xém goe, rameh: **5** Jò au qnang waiq khàn ta Jopbê aih au loh ka pi hmàng, ta kan mahno au hnoq i cleq tìah ka mòeq blah mù kèn, pôn toq mùm haq aih yinh atòc, qnhùa qnoh enh plình clìh enh ajang qngèa au. **6** Au ngan ka nhìn ta aih, hnoq ta aih i bái ngè i pôn toq jènh, bái jam gùng, bái yiniq ma loq ti pan loq ti moq ta taneh xam bái chìm pan ta tròc. **7** Khoe aih, au tàng i bàu doe ka au: “Phiero! drah yòng beq, broq jam qmat hu acaq.” **8** Au padreo bàu: Chuaq au! Ùh đòh, majah qmang aih ùh lah i cleq amùa ùh sròeh mùt ta hacùng au. **9** Bàu enh plình doe hòm ka au yàng baiq: “Bái yiniq

cleq Boc Plình ma khoe basròeh ùh dùh doe haq oe raq amùa.” **10** Bàu aih capoch lauq piq yàng, khoe aih, dìq dǒng bài yiniq aih hi jah dèch atōc hlài ta plình. **11** Meh oq, draq drình hloe jò aih, piq ngai enh Sêssare wì ma thê lam ta au, khoe trùh qmòe ajang qmang hnim au ma oe. **12** Yiang Hadròeh thê au lam ti wì aih, apaq hòq cleq. Hacô, tadràu ngai oh daq kô hanoh lam ti au, èh hadai dìq dǒng ka nhèn müt ta hnim Kot-nai. **13** Haq aih hi anoe hlài ka nhèn haq i hnoq mòeq bình plình loh ta hnim haq qmang leq rai thê: “Drah thê mangai lam ta Jopbê, akhen ka Simôn wì macroe Phiero aih trùh tacô. **14** Haq aih hi anoe ka pì, đòeq canòm ajang bài bàu aih, ìh xam dìq ka cadraq ìh jah dèch.” **15** Au bu qnang anoe, aih i Yiang Hadròeh enh qnhèq loh ti wì, tìah ka jò baxèm haq khoe loh ti bèn diq. **16** Aih au hi hmàng hlài bàu Chuaq Jesus khoe doe: “Jon khoe broq baptem xi diac, mahaq kô èh pì jah baptem xi ùnh. **17** Qmang aih, tàng joq Boc Plình khoe am ka wì hadai jah kan tabàih qmang ka bèn aih bài mangai ma khoe lùi Chuaq Jesus Christ, qmang aih au kô ìq cabô mahùa tát Boc Plình? **18** Jò wì khoe tàng qmang aih, dìq ka wì pi oe tablêq ka haq hòm, wì manè apôi Boc Plình rameh: Qmang aih, Boc Plình hadai khoe am ka wì kan loq raxach dôq mangai diac wì hanoh jah kan rìh! **19** Bài mangai ma khoe cadàu haprah priang ka kan baxa jò wì ma jêh đac Êtien, wì trùh ta Phêñixi, Chipro xam Antiôt, wì anoe bàu lem am toq ka mangai Juđa. **20** Mahaq ta wì aih i biaq ngai gùng Chipro, gùng Syren, wì lam trùh ta Antiôt, wì hanoh hadai anoe am ka mangai Gorec, hnài Bàu lem da Chuaq Jesus ka wì.

21 Tì Chuaq oe ti wì aih, dài mangai lùi rai tawìh hlài ta Chuaq majah bac haraya. **22** Tagop Hadròeh ta Jérusalem hè bàu aih, wì thê Banaba lam ta Antiôt. **23** Jò trùh ta aih hnoq xôq ramot Boc Plinh haq mannè pi cajaq rai toq ti alòng oh daq ep cajap manoh tiaq Chuaq. **24** Banaba aih mangai lem manoh qnàng, bình Yiang Hadròeh xam kan lùi. Jò aih mangai tiaq Chuaq rai bac. **25** Khoé aih, Banaba lam ta gùng Tacso, hu chaq Saulo, **26** Jò khoé glàm, hi ahlài ta Antôt. Wop jah mòeq hanam, wa aih tagop pajùm ti Tagop Hadròeh rai hnài bac ngai. Oe tagùng Antiôt wì ma hi creo ka mangai tiaq hõc aih Corê-tien. **27** Oe ta bài hì aih, i wì mangai pajàu loh enh Jérusalem trùh ta Antiôt. **28** Taqne wì aih i mòeq ngai yiniq haq Agabut padinh yòng, Yiang Hadròeh am haq capoch pajàu: “Kô èh i kan pangot hrah jàp ta crõng taneh”; Joq qnàng qmang aih, kan pangot hrah kô troq qnhòng da Colôt broq bùa. **29** Mangai tiaq hõc hatinh ka dabau, rìm ngai tiaq deh hra padren, padon đòeq hliac jènh hu tabàih ka oh daq tagùng Juđê. **30** Mangai tiaq hõc broq gêh trong aih, canòm ka Banaba xam Saulo aràng dahwèq aih am ka bài gucraq.

12 Hanoh qnhòng aih, bùa Hêrôt rùp toq biaq ngai ta Tagop Hadròeh. **2** Bùa yōc chang jêh cađac Jaco, aih daq da Jon, **3** Haq hnoq broq qmang aih lem ka manoh mangai Juđa, haq hi thê rùp hloe xam Phiero hòm. Jò aih wop troq jò ramènh kaq bênh ùh tah blo. **4** Bùa rùp clêh haq, thê pôn calùh lình gồm rap, mòeq calùh i pôn ngai lình. Bùa hèm dèh gồm khoe ka hì ramènh pancwa, aih èh hi rùp Phiero loh yòng enh ngèa dìq dõng ka mangai

ta aih. 5 Qmang aih, wì jrong Phiero ta hnim cadrong, mahaq Tagop Hadròeh dìq jaq waiq khàn am ka haq. 6 Mang adroe ka hì Hérôt ma hu padon qnoph haq loh yòng nòe hadrah, Phiero oe raq kùi i caxy datoeq kàt haq taqne baiq ngai lình, ajang trong qmang i bài lình gồm rap. 7 Cadoe i mòeq bình plình da Chuaq trùh, i kan qngah sreo qngah ta hnim cadrong clam cluiq aih. Haq tep ta yimia Phiero, padriù haq yòng, bình plình doe: “Drah yòng.” Caxy datoeq kàt tì haq taclih döng haqneq. 8 Khoe aih bình plình doe “Rìt hlài caxy qnam qmat, tòc jep beq.” Phiero broq tiaq bàu. Bình plình doe hòm “Drah caxùnh eo enh gùng qmat hu tiaq au.” 9 Phiero tiaq haq loh enh gùng, ùh qnì aih joq qnàng, haq xoh deh kan mahno. 10 Wa lam khoe catech ka nòe rap ma adroe èh nòe ma atiq, aih hi trùh ajang qmang mem, aih nòe ma hu mùt ta phôq. Qmang aih tapèch deh am ka wa, wa hi lam trong aih, tòc ta trong kàn, aih bình plình hi cađac haq. 11 Khoe aih Phiero ma hi cadrat don, haq doe: Manòeq kô au ma hi loq Boc Plình joq khoe thê deh bình plình loh caqnaih au claih enh tì Hérôt xam trong mangai Juđa ma tangèh. 12 Haq hèm hlài bài yiniq aih, khoe aih haq lam ta hnim Mari, miq da Jon wì ma creo Mõc, ta aih i bac ngai qnang tagop waiq khàn. 13 Haq clôq qmang, i mòeq ngai hapõng yiniq haq Rôđo loh pèch qmang, 14 canau ka bàu Phiero haq manè pi cajaq, loh ka pi dòh pèch qmang, haq drah cadàu mùt doe: Phiero qnang yòng ajang trong qmang! 15 Wì doe: Gè khoe rawè. Mahaq dua haq doe hi loq. Wì doe: Aih bình plình da haq. 16 Mahaq Phiero clôq yôt qmang. Jò pèh qmang, hnoq Phiero, dìq döng ka wì

hamàih đeh hra. **17** Mahaq Phiero dèch tì, patìah ka wì thê wì hatinh, haq hi anoe ka wì loq Chuaq khoe qnoh haq loh enh gùng ka hnìm cadrong qmang leq, khoe aih haq tanap: Doe ka Jaco xam dìq ka oh daq loq yiniq kô. Khoe aih haq hi lam taqnoeq. **18** Trùh qngah sroq èh, taqne bài lình i kan tagruàng kàn: Majah qmang aih wì haq ùh qnì ka Phiero lam taleq. **19** Bùa Hêrôt thê wì ti chaq jaq ka joq, mahaq wì chaq ùh hnoq, Hêrôt ti creo bòch qmòe tang ngai lình, khoe aih thê wì qnung lam jêh đac bài aih. Khoe ka aih Hêrôt loh ta Sêssare, haq oe hlài ta aih **20** Bùa Hêrôt git ka mangai ta Tyro xam mangai ta Siđôn. Majah qmang aih, wì aih khoe jah manoh Balatut aih mangai cwan patìh oe ka jèngh ka tì ti bùa, bùa ma tut dèh, wì pajùm mòeq manoh ka dabau trùh glàm bùa Hêrôt đòeq hu bòch broq hatroq ka bùa, majah qmang aih gùng wì haq acaq canòm đeh dahuwèq enh taneh diac bùa. **21** Trùh hì aih, Hêrôt caxùnh eo bùa, haqngui tagèq bùa, capoch tuàng qne nòe mangai bac. **22** Bài mangai ta aih doe: Aih bàu da kiac, ùh xài bàu da mangai! **23** Tajòe qmòe jò aih, i bình plình da Chuaq jêh bùa Hêrôt, majah qmang aih Hêrôt enh blah yōc kan ranhòm da Boc Plình, khoe aih bùa loh ka hrai kaq, haq hi cachìt. **24** Mahaq bàu Boc Plình hlàng trùh rai èh rai jàp jìa. **25** Banaba xam Saulo broq gêh dèh ka bìac, wa haq hi loh enh Jérusalem hlài ta Antiôt, qnong Jon wì ma creo dèh Mòc lam ti wa.

13 Oe ta Tagop Hadròeh Antiôt có bac ngai pajàu xam mangai hnài, aih Basaba, Simeôn wì macroe dèh Nijé, Lusi-ut mangai gùng Syren, Manahem aih (oh ban da Hêrôt bùa qyoh), xam Saulo. **2**Jò oh daq qnang kùh waiq

Chuaq rai apàm ka acaq, Yiang Hadròeh thê: “Lah đòeq crài Banaba xam Saulo đòeq wa hi broq trong Au khoe creo wa broq. **3** Atìq ka apàm ka acaq rai waiq khàn, oh daq roh tì enh qnhèq ka wa, khoe aih hi thê wa lam. **4** Qmang aih, Jò Yiang Hadròeh khoe thê Banaba xam Saulo lam, wa loh ta Sêloxi, enh aih wa tòc boang lam ta pleo Chipro. **5** Jò wa khoe trùh ta Salamin, wa hnài trong Boc plình ta hnim tagop qyoh da mangai Juđa, Jon hadai lam hu wiang patih ka wa. **6** Wa lam dìq ka pleo aih trùh hloe ta Baphô, wa glàm mòeq ngai Juđa, mangai aih i canàih, aih mangai pajàu qnùt, yiniq haq Bajêsu, **7** oe ti mangai tình trùang yiniq haq Sêjut-Phaulut, mangai tình trùang kô khun rabiaq dìq jaq. Haq akhen ka Banaba xam Saulo trùh, haq enh bòch tamàng đeh trong Boc Plình. **8** Mahaq Êlima, mangai pajàu i canàih (aih ngìah yiniq haq), tát wa aih, ti àu chaq trong dôq cwan tình trùang ùh lùi. **9** Khoe aih, Saulo wì ma loq creo Phaulô bình ha lùih Yiang Hadròeh, ngan tajang ka Êlima rai doe: **10** “Wùih, mangai bình bauq kan gôpla, kan dù meh, kon da kiac chóc jròng, taблêq ka kan taq atoq, ìh ùh hêq ka enh toq troq đac trong jang da Chuaq qmòh? **11** Manòeq kô Chuaq dèch kòng taблêq ka ìh, kô èh ìh jah lua mat, pi hnoq mat mahì toq biaq hì.” Tajòe hloe jò aih raq, i kan clam cluiq gùp döng haq, haq ti tawìh dudan đòeq chaq mangai tìc rađeh. **12** Jò cwan tình trùang hnoq qmang aih, haq hi lùi, haq hamàih dìq cajaq ka bàu da Chuaq. Oe ta Antiôt gùng Bisiđi **13** Phaulô xam deh bua tòc boang enh Baphô lam ta Betjê trong gùng Bamphi-li. Mahaq Jon cađac wa, đòeq hlài ta Jérusalem. **14** Wa aih hòm, loh Betjê wa boe

trong lam trùh Antiôt gùng Bisi-đi, Troq hì Sabat, wa mùt haqngui ta hnìm tagop qyoh. **15** Bu hêq ka đöc ta hset ranenh xam bài hset pajàu, wì craq wèq hnìm tagop qyoh doe ka wa haq: “Wa daq! Tàng joq loq i biaq nà bàu đöeq anoe hnài oh daq, anoe beq.” **16** Phaulô hi yòng, gwàih tì ka oh daq, haq doe: “Dìq ka oh daq Isorali xam mangai loq iu yùq Boc Plình, tamàng kô! **17** Boc Plình da mangai Isorali kô, khoe ràih kan cadraq bèn, broq ka wì aih chèch lòe jò wì haq oe đeh tanèo taneh diac wì, aih diac Êdip, yđc cwìang itai kàn qnöh wì loh enh gùng aih. **18** Jah ta pôn jàt hanam, haq chìuq àt ka kan ùh wìa da wì aih nòe braih kàn. **19** Jò khoe raliang qnìh cađac tapèh diac ta Cana-an, yđc taneh wì aih aq am đèh ka mangai da haq. **20** Khoe èh, qnah ta pôn hrinh padam jàt hanam tìa aih, Boc Plình am ka wì aih bài mangai hadrah trùh hloe ta qnhòng pajàu Samuên. **21** Jò aih wì bòch ka haq am ka wì mòeq ngai broq bùa, Haq am ka wì Saulo kon da Kit, nang noe Bênjamin, broq bùa wèq wì haq aih pôn jàt hanam. **22** Khoe èh haq cađac bùa aih, đèch Đawit broq bùa, anoe trùh Đawit Boc plình doe: “Au khoe chaq hnoq Đawit kon da Jêse, aih mangai lem ka manoh au, haq aih èh ma broq tiaq rìm yiniq au enh thê haq broq. **23** Tiaq qmang ka bàu khoe tèu đöeq adroe, enh nang noe haq aih èh Boc Plình ma hi padèch am ka magai Isorali mòeq Ngai Dèch, aih Chuaq Jesus Christ. **24** Adroe ka Chuaq Jesus trùh, Jon khoe hnài ranenh baptém da kan loq raxach am mangai Isorali. **25** Jò Jon qnang pagêh đèh yiniq broq, haq doe: “Pì xoh au kô ìq cabô? Au ùh xài mangai pì qnang ti chaq. Mahaq i mòeq ngai trùh atìq ka au, au ùh tajì ka jah broq

đeh mangai lêh caxy jep haq aih.” **26** Yôi oh daq bèn kô aih mangai kon xau da Apraham xam mangai ma loq iu yùq ka Boc Plình, bàu bahìa trùh kan dèch kô khoe anoe am ka bèn. **27** Majah qmang aih xam cwan xam mangai oe ta Jérusalem ùh canau loq ka Chuaq Jesus kô, aih ìq raq jò wì ma tahadrah ka haq, wì haq khoe broq gêh bàu bài mangai pajàu wì haq ma loq đốc ta hì Sabat. **28** Yac ka wì chèh chaq ta haq wì ùh loh qmòeq yiniq lui cleq ma troq ka cachìt, mahaq dua wì àu bòch dôq Philat jêh cađac haq. **29** Jò wì broq khoe xìt rìm trong ma khoe achìh trùh haq, wì hi qnoph haq enh long pagat, èh catùh hanang haq ta ralùng. **30** Mahaq Boc Plình khoe broq haq rìh hlài enh kan cachìt. **31** Bài mangai ma tiaq haq enh Galili tòc trùh Jérusalem jah hnoq haq bàc hì, wì aih manoèq kô qnang anoe hu panhìn haq am ka mangai bèn. **32** Da nhèn kô hòm, anoe am ka oh daq bàu lem, aih la bàu Boc Plình ma khoe tèu am ka kan cadraq bèn rameh: **33** Boc Plình khoe broq ka Chuaq Jesus rìh hlài, qmang aih khoe xìt bàu haq ma tèu am ka bèn, aih bài kon xau da kan cadraq bèn, wop qmang ka bàu khoe achìh ta hset Calêu Plình: “Kon kô kon calô da au, hì kô au khoe hauang kon.” **34** Boc Plình broq ka Chuaq Jesus rìh hlài enh kan cachìt, qmang aih dôq chac haq ùh jò leq om hnhung hòm, qmang ka Boc Plình khoe doe: “Au am ka pì bàu hadròeh cajap, am xôq ramot au ma khoe tèu ka Đawit.” **35** Ajang brong qnoeq hòm doe: “Ìh ùh dôq dèh Mangai Hadròeh ìh hnoq kan om taleq.” **36** Jò Đawit oe rìh, broq tiaq bàu Boc Plình thê, khoe aih cachìt, haq khoe jah catùh dèh ti kan cadraq, hanang

haq khoe om. **37** Mahaq Mangai Boc plình ma broq ka haq rìh hlài enh kan cachìt ùh om taleq. **38** Qmang aih, oh daq au, bèn khòh loq rameh: Canòm ka Chuaq Jesus aih raq, kan baclaih yiniq lui khoe jah anoe am ka pì; **39** èh canòm ka haq aih raq waq toq cabô lùi aih hi jah kan taq atoq, rìm trong tiaq ranenh da Môise ùh broq ka mangai leq jah kan taq atoq. **40** Aih ìq, drah wèq rađeh dôq bàu khoe achìh ta hset pajàu ùh hìaq trùh ka pì: **41** “Wùih! mangai ma loq halê meh, ngan beq, drah loq crè rai lùng pac beq; Majah qmang aih au padon broq mòeq yiniq oe ta qnhòng da pì, Yac ka i cabô anoe hlài ka pì, dua pì ùh lùi.” **42** Wa aih cadiang loh enh hnìm tagop qyoh, wì akhen ka wa trùh hì Sabat atìq hnài tam bàu aih. **43** Jò khoe hêq enh tagop, i bàc ngai neo tiaq trong Juđa, tiaq Phaulô xam Banaba, wa capoch tuàng ti wì rai pariaq wì oe ma cajap ta kan loq waq Boc Plình. **44** Hì sabat atìq, wì ta aih tagop ten dìq ka dabau đòeq ta màng bàu Chuaq. **45** Yàng bài mangai Juđa hnoq mangai bàc qmang aih ta manoh wì bình chàu kan tagit, wì haq tàih cađac bàu Phaulô rai capoch qmèq hloe ka haq. **46** Phaulô xam Banaba hi doe hloe ka wì: Nhèn ep hnài bàu Boc Plình ka pì adroe òeq, mahaq pì khoe ùh tamàng, pì hnoq rađeh ùh tajì đòeq jah kan rìh halinh mòeq đòe, kô èh nhèn tawìh ta mangai diac wì. (aiōnios g166) **47** Majah qmang aih Chuaq i thê nhèn rameh: “Au dèch pì broq kan qngah am bàc diac, Dôq pì aràng kan dèch trùh jàp caqnàm plình”. **48** Mangai diac wì tàng anoe qmang aih wì toq lem bùi manè apôi bàu da Chuaq, mangai leq ma khoe jah padon đòeq ka kan rìh halinh mòeq đòe, dìq

lùi dǒng. (aiōnios g166) 49 Trong da Chuaq hlàng jàp gùng aih. 50 Mahaq mangai Juđa baxrùq bài mangai gucadri padrōng kan tagùng aih xam bài mangai ratauq, tirùp Phaulô xam Banaba, khoe aih hnan đac wa loh khoe dèh ka gùng. 51 Wa aih tangèa ta wì, hapùih caqnìh blo top ta jo wa, Khoe hi lam ta Ycôni. 52 Wì mangai tiaq hốc jah ùc bình kan lem bùi xam Yiang Hadròeh.

14 Oe ta Ycôni, Phaulô xam Banaba mùt ta hnim tagop qyoh da mangai Juđa, wa capoch hnài qmòe dìq jaq, loh qmòe ka i bac ngai Juđa xam mangai Gorec lùi tiaq. 2 Mahaq mangai Juđa ma qnhòq waq lùi xan toq patah rai baxrùq manoh cliac bài mangai cla gùng aih đòeq hu tablêq ka wì oh daq. 3 Yac ka qmang aih, Phaulô xam Banaba oe ta aih dùnh diq wa bình manoh lùi, anoe Chuaq am ka wì, ùh lòm yùq qmòe cleq. Chuaq yōc tì kōng wa broq bac kan halac, đòeq panhìn ka cajap trong loq waq da Haq. 4 Mangai ma oe ta phôq aih talah broq baiq: Qnah ngai tiaq pah magai Juđa, qnah ngai tiaq wa. 5 Jò mangai diac wì xam mangai Juđa hloe xam bài cwan mòeq manoh ti dabau yòng tablêq rai enh yōc hmo đàp wa, 6 mahaq wa khoe loq adroe, wa hi wia enh aih lam puplech tagùng Lycôni aih phôq Lit tro, Đetbo, xam bài gùng ten aih, 7 rai hnài Bàu lem. 8 Oe ta Lit tro i mòeq ngai pen, liap qmòe enh jò baxèm hauang, ùh jah cadiang. 9 Haqngui tamàng bàu Phaulô hnài. Phaulô ngan mat haq, hnoq haq i manoh lùi đòeq jah broq brêh, 10 Phaulô hi capoch cadêh: “Ìh yòng beq, yòng ma hnhoh haq.” Haq aih aplôh mòeq qmang, khoe aih hi cadiang lam. 11 Wì ta aih hnoq yiniq Phaulô khoe broq, wì tapoch

xam bàu Lycôni: Bài kiac khoe yōc chac mangai đòeq
loh ti bèn. **12** Wì creo ka Banaba aih kiac Jupite, Phaulô
aih wì creo kiac Mecuro, majah qmang aih haq mangai
broq gàu yòng hnài. **13** Craq pajàu da kiac Jupite i hñim
tadreo ajang qmang ngo mùt ta phôq, aràng mòeq toq
bo qnìq xam riang trùh ajang trong qmang, enh pajùm
mòeq manoh ti wì ta aih hu dèch mòeq ramènh tadreo.
14 Mahaq jò Banaba xam Phaulô aih mangai tiaq cla, tàng
qmang aih, wa haq hit deh eo rai tÙh loh ta mangai bàc,
rai doe cadêh: **15** Wùih oh daq! gleq majah broq qmang
qmat? Ma hadai mangai tìah ka oh daq, ma aràng Bàu
lem am ka pì, dôq pì cađac bài kiac ùh loh cleq tau, hu
hlài ti Boc Plình rìh halinh mòeq đòe, Haq aih ma broq
loh plình crõng taneh, diac raxìq xam rìm yiniq ta aih. **16**
Qnhòng calah nèh, haq dôq rìm diac mangai leq mangai
meh tiaq deh hra trong, **17** mahaq dua haq patô rađeh
yôt ka wì, aih la haq am xôq ramot, caqnìh mè enh plình,
jò mùa am ka wì jah qmau jah plì, dahwèq acaq ùh dìq,
xam kan lem bùi. **18** Mahaq yac ka wa anoe qmang aih,
bu qnang lem tát wì ùh hìaq dèch ka wa ramènh tadreo.
19 Khoe ka aih, i mangai Juđa trùh enh Antiôt xam Ycôni
lam padô wì ta aih, wì yōc hmo hibùq Phaulô, xoh dèh
haq khoe cachìt, wì hua qnang haq enh gùng ka phôq. **20**
Mahaq jò mangai tiaq hõc ta aih qnang tagop dabau oe
dudan ka haq, haq padinh yòng mùt ta phôq. Hì atìq,
haq lam ti Banaba trùh ta Đetbo. **21** Wa anoe Bàu lem
ta aih, broq ka bàc ngai wìh wìa mangai tiaq hõc, wa hi
hlài ta Litro, Ycôni xam Antiôt. **22** Pariaq mangai tiaq
hõc ep cajap manoh lùi, anoe ka wì loq qmòe adroe ep

glàm bàc kan xalep men jah mùt diac Boc Plinh. **23** Jò wa khoe ràih bài mangai đòeq hu broq gucraq ka rìm Tagop Hadròeh ta aih, khoe ka apàm ka acaq rai waiq khàn, dèch wì aih ka Chuaq wa haq ma khoe lùi dèh. **24** Khoe aih, wa lam catech ka gùng Bisiđi, trùh tagùng Bamphily. **25** Atìq ka hnài ta Betjê, wa hi loh ta Atali. **26** Enh aih, wa lam boang hlài ta Antiôt, aih raq nòe wa ma khoe loh lam, ma khoe jah jao am ka kan loq waq Boc Plinh, đòeq hu broq rìm yiniq wa neo broq gêh. **27** Trùh nòe, wa creo ka Tagop Hadròeh tagùng aih, wa hi taqmon rìm yiniq Boc Plinh khoe broq ajang tì kõng wa, Boc Plinh khoe pèh mòeq toq qmang kan lùi am ka mangai diac wì qmang leq cadèh. **28** Mangai tiaq hõc ta aih bàc hì.

15 I biaq ngai enh gùng Juđê trùh hnài oh daq rameh: Tàng joq pì ùh broq ramènh kat akia tiaq ranenh da Môise, aih pì ùh jah dèch. **2** Aih ìq dài Phaulô xam Banaba majah loh ka tarahen kàn ka wì aih, wì waq qmòe ka Phaulô xam Banaba lam ti wì haq tõc ta Jérusalem, glàm bài mangai tiaq cla xam gucraq ta aih đòeq bòch yiniq kô. **3** Qmang aih, jò Tagop Hadròeh khoe thê wì haq, wì lam trong gùng Phénisi gùng Samari, taqmon bìac mangai diac wì khoe wìh hlài ti Bàu lem qmang leq, broq dìq dõng ka oh daq lem bùi dìq jaq. **4** Bu trùh ta Jérusalem, Tagop Hadròeh xam mangai tiaq cla, hloe wì gucraq ta aih đìh wì haq ka alàng. Wì anoe hlài Boc Plinh khoe thê wì haq broq cleq. **5** Mahaq i bài mangai moeq bua ti mangai Pharisi hadai khoe tiaq, padinh yòng doe: Ep broq ranenh kat akia ka mangai diac wì rai thê wì aih ep wèq tiaq ranenh Môise. **6** Wì Mangai tiaq cla xam

gucraq hi haqngui ti dabau đòeq hu hatinh trong kô. 7
Khoe ka hatinh Phiero hi yòng anoe ka wì: “Dìq ka oh
daq, pì loq rameh enh jò baxèm, Boc Plinh khoe ràih au
taqne oh daq, dôq mangai diac wì jah tamàng Bàu lem
loh enh hacùng au đòeq wì hu lùi tiaq. 8 Boc Plinh loq ka
manoh cliac kon mangai, haq paqnoh rađeh khoe dì yōc
mangai diac wì, ajang nòe am ka wì Yang Hadròeh tìah
ka bèn diq. 9 Haq ùh i ngan bèn xam mangai diac wì
crài ka dabau, majah qmang aih haq khoe yōc kan lùi
broq ka manoh wì jah hadròeh. 10 Manòeq kô hagleq oh
daq majah ti qnhro ngan Boc Plinh, taqmac ta ranōng
oh daq mangai diac wì long ech yac ka cadraq bèn, yac
ka bèn enh nèh trùh manòeq qnhòq lah hlàt pòq? 11
Majoq qnàng aih, bèn lùi rameh canòm kan am dech
ajang Chuaq Jesus, bèn jah dèch qmang ka mangai diac wì
diq.” 12 Dìq ka mangai tagop ta aih loh ka hatinh dōng,
tamàng Banaba xam Phaulô anoe hlài bàc trong bàc kan
halac Boc Plinh khoe broq ajang wa am ka mangai diac
wì hnoq. 13 Khoe ka wa anoe, Jaco hi doe: “Dìq ka oh daq
tamàng kô! 14 Simôn i taqmon hlài ka bèn yàng baxèm,
Boc Plinh khoe ha-och ka mangai diac wì qmang leq, enh
aih ràih yōc mòeq xinoe hu dèch ka yiniq cla haq. 15 Bìac
aih, hatroq troeq bàu wì pajàu, majah qmang aih i bàu
achìh rameh: 16 Atìq ka aih, au wìh hlài, Broq hlài hnim
ranòh da Dawit ma khoe taclìh raliang; Au palàng hlài
nòe ma khoe taclìh, Au dèch paqnàng hlài haq; 17 Dôq
bài mangai ma oe rah, jah chaq Chuaq Xam dìq dōng
mangai diac wì ma creo dang yiniq au. Chuaq, Mangai ma
broq loh bài yiniq kô i anoe qmang aih; 18 enh calah nèh

raq, haq khoe loq bài bìac kô. (aiōn g165) 19 Qmang aih, troeq manoh au, ùh dùh baxa oh daq mangai diac wì ma khoe wìh hlài ti Boc Plình, 20 mahaq toq achìh jàiq tanap ka wì haq ep dênh apaq acaq dahwèq khoe tadreo am ka kiac qmù, paq tango anang, apaq acaq jam cachìt ka ùh jah hi hèm, apaq acaq mahim. 21 Majah qmang aih enh nèh trùh manðeq, yac ka taleq dua i mangai hnài ranenh Môise, rìm hì sabat, oe ta hnim tagop qyoh wi i đõc ranenh aih. 22 Khoe ka aih, bài mangai tiaq cla xam wì gucraq xam dìq dõng ka Tagop Hadròeh ràih biaq ngai ta aih, khoe èh thê wì aih lam ti Phaulô xam Banaba trùh ta Antiôt. Wì ràih Juđe aih mangai wì xan creo dèh Basaba xam Sila, aih baiq ngai broq gàu wì oh daq; 23 khoe aih am ka wa aih jàiq i achìh rameh: Bài mangai tiaq cla, xam wì gucraq xam oh daq i bàu hmàih trùh oh daq mangai diac wì ma oe ta Antiôt, gùng Siri xam gùng Silisi! 24 Nhèn khoe tàng doe i biaq ngai enh nhèn, wì aih ùh i yõc mòeq nà bàu nhèn, wì aih yõc bàu deh cla broq ka manoh oh daq loh ka manhài ùh catèm, 25 aih ìq dìq ka nhèn majah mòeq manoh ràih biaq ngai hu lam ti wa bua bèn aih Phaulô xam Banaba, đòeq trùh ta oh daq. 26 Wa aih khoe tamùa rađeh am ka yiniq Jesus Christ aih Chuaq bèn. 27 Aih raq nhèn majah thê Juđe xam Sila trùh đòeq anoe xi bàu waq ka oh daq loq trong aih: 28 Qmang aih Yiang Hadròeh xam nhèn khoe hadai pi taqmòq tam ka oh daq kan trap leq hòm enh gùng ka yiniq ma khòh nhet, 29 aih oh daq ep dênh: apaq acaq bòe dahwèq khoe tadreo ka kiac qmù, mahim, jam cachìt ka ùh jah hi hèm, èh apaq tango anang; aih raq bài yiniq oh daq ep dênh,

ep wia ka hangai. Waiq kan catèm ka oh daq! **30** Wì aih
loh lam ta trùh ta Antiôt, creo tagop dìq döng ka oh daq,
khoe hi am jàiq aih. **31** Wì đöc jàiq aih, rìm ngai lem bùi
majah qmang aih wì khoe jah tàng bàu alòng. **32** Juđe
xam Sila wa aih raq mangai pajàu, wa hadai yōc bac trong
hnài hu pariaq manoh oh daq tadêh. **33** Oe ta aih toq biaq
hì, oh daq wiang waiq kan catèm ka wa khoe aih dôq wa
hlài dèh ti mangai khoe thê wa trùh. **35** Mahaq Phaulô
xam Banaba dìq oe hlài ta Antiôt, hnài Bàu lem rai hnài
trong da Chuaq am ka bac ngai qnoeq hòm. **36** Atìq ka aih
toq biaq, Phaulô hatuàng ka Banaba: Beq ba hlài hmàih
dìq döng ka oh daq oe roc gùng ba ma khoe anoe ka wì
trong Chuaq enh adroe kô nèh, ngan wì haq manòeq kô
qmang leq cadèh. **37** Banaba enh qnung Jon ma creo Mõc
lam tiaq. **38** Mahaq Phaulô ùh waq qnung Mõc lam diq,
majah qmang aih tagùng Bamphili, haq khoe cađac wa, pi
abroq pajùm ti wa. **39** Ajang aih, wa haq majah loh kan
tarahen kàn, loh qmòe ka talah ka dabau, Banaba qnung
Mõc tõc boang lam ta pleo Chipro. **40** Phaulô ràih Sila,
canòm ka oh daq waiq khàn dèch wa haq ta kan loq waq
da Chuaq, khoe aih wa hi lam. **41** Phaulô lam trong gùng
Siri, Silisi, broq ka bài Tagop Hadròeh ta aih jah hagau.

16 Phaulô lam trùh ta Đetbo xam Litro. Ta aih i mòeq
ngai tiaq hõc yiniq haq Timothê, miq haq aih mangai
Juđa khoe lùi, baq haq aih mangai Gorec. **2** Oh daq oe ta
Litro xam Ycôni dìq capoch lem ka haq. **3** Phaulô enh
qnong haq tiaq, mahaq mangai Juđa oe ta aih dìq loq
baq da Timothê aih mangai Gorec, aih ìq Phaulô majah
broq ramènh kat akia ka Timothê. **4** Wì thia phôq leq, wì

toq ti tanap oh daq ep wèq tiaq ranenh mangai tiaq cla
xam bâi gucraq ta Jérusalem khoe paqnoh. **5** Qmang aih,
bâi Tagop hadròeh jah cajap manoh lùi, mangai tiaq rai
èh rai bac. **6** Khoe aih, lam catech trong gùng Phirigi
xam taneh gùng Galati, majah qmang aih Yiang Hadròeh
khoe ùh lòh wì haq lam anoe Bäu lem ta cròng Asi. **7** Ten
trùh gùng Misi, wa padon mùt tagùng Bithini, mahaq
Yiang Hadròeh da Jesus ùh am, **8** wa drah lam khoe ka
gùng Misi, èh wa loh ta Trô-ach, **9** Jò damang, Phaulô
hnoq kan mahno, i mòeq ngai Maxêđoan yòng eh ngèa
rađeh, cali calo ka haq rameh: “Drah trùh ta Maxêđoan
hu dèch nhèn diq.” **10** Atìq ka Phaulô hnoq kan mahno
aih, nhèn hi drah lam padon lam ta Maxêđoan, majah
qmang aih nhèn loq Boc Plình khoe creo ka nhèn lam
anoe Bäu lem ta aih. **11** Qmang aih, enhTrô-ach nhèn tòc
bong pajang trùh ta Samôtra, hì atìq nhèn trùh ta Napôli;
12 enh aih, nhèn trùh ta Philip, gùng aih khoe jah diac
Roma, aih phôq basèm da tình Masêđoan. Nhèn oe ta
aih toq biaq hì. **13** Trùh hì sabat, nhèn loh enh gùng ka
phôq, lam roc kênh cròng diac, nhèn hèm dèh wì tagop
dabau ta aih đòeq hu waiq khàn, nhèn hi hangui, khoe
aih hi ta hatuàng ti bâi mangai cadrì oe ta aih. **14** I mòeq
ngai ta aih tamàng bàu nhèn, yiniq haq Lyđi, mangai
gùng Thia-tiro, haq aih mangai padro bai gòh. Haq aih
mangai loq iu yùq ka Boc Plình. Chuaq pèh manoh, haq
dìq jaq tamàng bàu Phaulô. **15** Jò haq xam dìq ka hnim
haq khoe jah broq ɓaptem, haq doe: “Tàng joq pì khoe
doe au kô mangai dìq manoh ka Chuaq, aih pì ep mùt oe
padài ta hnim au”; khoe aih haq hi àu pachùh waq qmòe

ka jah. **16** I mòeq hì, nhèn lam waiq khàn, glàm mòeq ngai hapǒng cadrì i kiac Phitôn mùt oe enh dalam ka haq, haq loh ka loq blàih blǒng, broq ka cla craq haq jah bac jènh haraya. **17** Haq ti tiaq Phaulô xam dìq ka nhèn, rai cachech cadêh rameh: Bài wì kô, aih dìq hapǒng Boc plình haqnhèq, anoe am ka pì trong jah dèch claih. **18** Bac hì haq broq qmang aih, Phaulô loh ka mahèu, haq hwi doe ka kiac: “Au canòm ka yiniq Chuaq Jesus Christ thê gè loh enh gùng ka mangai cadrì kô.” Kiac loh qmòe jò aih raq. **19** Mahaq cla craq da mangai gucadri aih, wì hnoq đeh pi oe jah bac jèn enh mangai hapǒng aih, wì rùp Phaulô xam Sila, hua wa trùh tanòe broq biac, enh ngèa bài mangai cwan, **20** khoe èh aràng wa ta cwan haqnhèq hòm, wì doe: Wa kô dìq mangai Juđa, broq ka gùng bèn loh dǒng ka manhài. **21** Hnài toq trong bèn ùh khòh tamàng yōc, ùh khòh broq tiaq, majah qmang aih bèn kô mangai Rôma. **22** Bài mangai ta aih hanoh wiang yòng tablêq ka wa, jò cwan haqnhèq khoe thê hich da wa haq eo, haq hi thê wì tong wa aih. **23** Jò wì tong wa khoe bac, wì hi lam clêh wa, rai tanap ka cwan wèq hnim clêh aih ep ngan wa ja cajoq. **24** Jah bàu aih, cwan aih hi clêh wa haq ta cadrong clam rai clang da wa jènh. **25** Qnah ta qne mang, Phaulô xam Sila qnang waiq khàn, calêu manè apôi Boc Plình, bài mangai wì ma clêh ta aih hadai tàng dǒng. **26** Ùh xài oq, taneh loh ka ralàng kàn, xàn hnim ma clêh wì haq loh ka dalàc, adrìn hloe mòeq yàng bài qmōc qmang tapèh dǒng, bài caxi datoeq clìh dìq haqneq. **27** Mangai wèq hnim clêh rarì cadrat, hnoq qmōc qmang khoe tapèch dǒng, haq hèm ta manoh bài

wì cadàu khoe dìq, haq hroe qnoph deh chang hu pàc đac rađeh. **28** Mahaq Phaulô creo cadêh: “Apaq broq cleq ti habo ka rađeh, nhèn oe dìq tacô.” **29** Mangai wèq hnim clêh drah creo ka wì qnoph đen, haq rai tùh rai crè, hacùn cràng ajang jènh Phaulô xam Sila. **30** Khoe aih, haq qnoph wa loh enh gùng rai bòch: Wì craq! au ep broq cleq men jah dèch? **31** Wa padreo bàu: “Drah lùi Chuaq Jesus, aih èh ìh xam dìq ka hnim ìh hi jah dèch.” **32** Wa hi hnài ka haq xam rìm mangai ta hnim haq trong Boc plình, **33** Mang aih, hloe jò aih raq mangai wèq hnim clêh qnoph wa aih, qnheo da wa habau, khoe aih xam cla haq xam mangai oe ta hnim haq dìq jah broq baptem. **34** Khoe aih, akhen ka wa hlài deh ta hnim, padon qnoph ka wa acaq, cla haq xam dìq ka mangai ta hnim lem bùi ka rađeh jò wì khoe jah tiaq trong Boc Plình. **35** Trùh qngah, cwan enh qnhèq thê lindh lam anoe ka mangai wèq hnim clêh rameh: Drah caqnaih wa beq. **36** Haq aih anoe ka Phaulô: Bài cwan enh qnhèq khoe thê au caqnaih chôp lam, chôp loh beq, lam ma catèm haq oq. **37** Mahaq Phaulô doe ka mangai lindh: “Nhèn kô mangai diac Rôma, qnhòq loq ma i yiniq lui cleq, wì khoe blai ma qne mangai đùng đam, khoe aih clêh ma ta hnim cadrong, manòeq kô aih wì haq caqnaih atùng ma qmòh? Qmang aih ùh jah. Cla bài cwan ep lam jang kô hu caqnaih ma, xài qmang aih ma troq.” **38** Bài cwan enh qnhèq tàng lindh anoe hlài qmang aih, loq ka wa haq aih mangai Rôma, wì haq yùq pi cajaq. **39** Wì lam alìa èh hi caqnaih wa, rai cali calo dôq wa loh khoe gùng wì haq. **40** Jò khoe jah caqnaih, wa lam ta hnim Liđy, hmàih ra pariaq, khoe aih wa men lam.

17 Phaulô xam Sila pagat trong gùng Amphi-bôlit xam gùng Abôloni, khoe aih wa trùh ta Têsalonica, ta aih mangai Juđa i mòeq toq hnim tagop qyoh. **2** Phaulô tiaq dèh cla khoe hmaq, ta piq hì sabat haq mùt ta aih hu rahen ka wì. **3** Yđc Hset Hadròeh patô ka hloh dôq wì loq Christ ep xalep, khoe aih rìh hlài enh kan cachìt. Haq doe: “Chuaq Jesus au ma khoe anoe ka pì kô aih raq Christ.” **4** Taqne mangai Juđa, aih i biaq ngai lùi tiaq bàu rai taq mùt ti Phaulô xam Sila, èh hadai i bàc ngai Gorec loq iu yùq ka Boc plình hloe xam bài mangai gucadri padrõng ta aih. **5** Mahaq mangai Juđa toq tajìq, ti adràc bài mangai lam ròe ratauq roc trong rai baxrùq mangai gùng aih broq kan manhài ta phôq aih. Wì haq clàm mùt ta hnim Jasôn, ti chaq Phaulô xam Sila đòeq hu rùp qnoh taqne mangai dung đam ta aih. **6** Chaq ùh hnoq, wì haq hi hua qnoh Jasôn xam biaq ngai oh daq loh enh ngèa bòe cwan wèq gùng aih, wì cachech: Kô raq bài mangai khoe broq ka phù cròng loh toq kan manhài, manoèq wì haq khoe trùh tacô diq. **7** Jasôn khoe đìh wì haq mùt oe dèh ta hnim! Wì haq kô đìq bài mangai yòng tablêq ka Sêsa, majah qmang aih wì haq doe oe i mòeq toq bùa qnoeq, yiniq haq aih Jesus. **8** Tàng bàu aih đìq ka mangai ta aih hloe xam bài cwan loh dõng ka rawè. **9** Mahaq jò cwan khoe thê Jasôn xam bua haq ep clìh ka bac, aih hi caqnaih wì haq lam. **10** Ùh batrò, mang aih raq oh daq drah thê Phaulô xam Sila lam ta Bêrê. Trùh ta aih, wa mùt ta hnim tagop qyoh da mangai Juđa. **11** Mangai Bêrê i manoh ùh hnau ka mangai Têsalônica, majah qmang aih wì haq toq enh tamàng yđc bàu hnài, hì leq hì meh toq

ti ngan ta Hset hadròeh đòeq hu ngan bàu Phaulô xam Sila hnài ajoq troq ùh. **12** Ta aih i bàc ngai Juđa lùi tiaq, i bàc ngai gucadri Gorec ma padrõng, i bàc ngai gucalô hanoh lùi tiaq. **13** Mahaq jò mangai Juđa oe ta Têsalônica tàng doe Phaulô anoe trong Boc Plinh ta Bêrê, wì haq drah trùh ta aih hu rai kan manhài đòeq baxrùq mangai ta aih. **14** Oh daq drah thê Phaulô lam trong diac raxiq, mahaq Sila xam Timôthê oe raq ta Bêrê. **15** Bài oh daq ma ajèn Phaulô wì aràng haq trùh ta Athen, èh wì hi bròc, ahlài bàu ka Sila xam Timôthê, thê wa drah rên trùh ti Phaulô. **16** Phaulô oe ta Athen gòm wa aih trùh, haq jiq qmòe ta manoh majah qmang aih haq hnoq ta aih bình toq qmù dua kan kiac. **17** Qmang aih, ta hnim tagop qyoh haq rahen ka mangai Juđa xam mangai Gorec ma loq iu yùq ka Boc Plinh, xam mangai haq glàm rìm hì tanòe padro atech. **18** I bài mangai hõc tiaq trong da Êpicurien xam trong da Stocien, hadai wiang ta rahen ka haq. Qnah ngai doe: Cleq bàc bàu kô haq enh anoe cleq? Qnah ngai doe: Tìah gleq haq enh anoe ka bèn bài kiac diac wì. (Majah qmang aih Phaulô qnang anoe trùh Chuaq Jesus xam trong rìh hlài enh kan cachìt am ka wì). **19** Wì rùp aràng haq trùh ta Arêoba, wì bòch: Nhèn ajah loq trong iìh neo hnài aih ùh? **20** Majah qmang aih iìh hnài ka nhèn trong joq halac, nhèn enh loq qmang leq ka dèh. **21** (Dìq ka mangai Athen xam mangai diac wì ma oe ta aih enh toq tamàng rai ta anoe trong maneo ma halac.) **22** Jò aih, Phaulo mahi yòng taqne Arêoba, haq doe: “Mangai Athen tamàng kô, au hnoq yac ka trong leq dua pì loq nhet pi cajaq. **23** Majah qmang aih au lam dudan tanòe pì, au

ngan qmòe ka adia hnoq bài ngè pì kùh waiq, ta aih mòeq toq prang i achìh: KÙH WAIQ KIAC NHÈN QNHÒQ QNÌ, manòeq kô Yiang au qnang anoe ka pì, aih raq Mangai pì qnhòq qnì mahaq khoe kùh waiq. **24** Boc Plình ma khoe broq loh plình crõng taneh xam rìm yiniq rìh oe ta aih, aih raq Chuaq da plình crõng taneh. Haq ùh oe ta hnim kùh waiq broq loh enh tì kõng kon mangai. **25** Haq hadai ùh ep waq ka i tì kon mangai patìh ka rađeh, tìah taiq ka haq ma i nan no cleq, majah qmang aih haq raq ma am ka rìm ngai jah kan rìh, hiwa rìh, xam hloe rìm yiniq qnoeq. **26** Haq khoe broq dìq ka phù cròng ha-uang loh enh mòeq ngai raq, am wì oe jàp crõng taneh, pajaq adroe qnhòng rìh rai acang ka wì nòe oe. **27** Boc Plình khoe broq qmang aih dôq kon mangai loq chaq haq, àu qmòe dìq ka padren waq ka jah bèq, yac ka haq ùh i oe hangai ka bèn. **28** Majah qmang aih enh dalam ka haq, bèn jah rìh, jah tadroq, jah i, tìah ka calah nèh taqne pì bài mangai ma loq cachôi i doe: Bèn kô hadai xinoe haq. **29** Qmang aih, bèn kô xinoe Boc plình, apaq hèm haq tìah taiq ka wang, bac, ka hmo, tìah ka qmù broq loh enh tì kõng mangai ma rabiaq. **30** Enh nèh, Boc Plình khoe cađac da wì kan blùng aih, manòeq haq thê dìq dõng kon mangai oe rìm nòe ep loq raxach, **31** Majah qmang aih Boc plình khoe ràih đòeq dèh mòeq hì, yõc kan taq atoq hu hadrah crõng taneh xi mangai haq ma khoe dì deh adroe, Boc Plình khoe broq ka haq aih rìh hlài enh kan cachìt, đòeq panhìn ka cajap trong kô. **32** Jò wì tàng anoe trùh mangai cachìt rìh hlài, qnah ngai aih hi halê haq, qnah ngai doe: Hêq trong aih yàng qnoeq èh nhèn

tamàng ònh. **33** Aih ìq Phaulô majah cadiang loh khoe ka wì haq. **34** Mahaq i biaq ngai tiaq haq wì hi lùi Chuaq Jesus, ta aih i Đêni, mangai cwan hadrah ta Arêoba, i tam mòeq ngai gucadri yiniq haq Đamari xam bài mangai qnoeq

18 Khoe èh, loh enh Athen Phaulô lam ta Côrintô. **2** Ta aih haq glàm mòeq ngai Juđa, yiniq haq Aquila mangai gùng Bông xam Bêritsin aih mai haq, wa aih neo trùh tacô majah qmang aih bùa Kolôt i thê dìq döng mangai Juđa ep loh ma khoe ka Rôma, Phaulô hi taqmùt ti wa. **3** Haq hanoh mangai ajip traiq qmang ka wa, aih ìq Phaulô majah oe mòeq hnim ti wa đòeq hu abroq pajùm ti dabau. **4** Rìm hì Sabat Phaulô hnài ta hnim tagop qyoh, pariaq mangai Juđa xam mangai Gorec. **5** Jò Sila xam Timôthê enh gùng Maxêđoan trùh ta aih, aih Phaulô hi cađac ka ajip đòeq toq ti hnài. Anoe patô ka mangai Juđa loq Chuaq Jesus aih raq Christ. **6** Mahaq wì tablêq rai jù cađac haq, aih ìq haq majah da arù deh eo rai doe: Mahim pì da hrôq hlài tagàu cla pì! Au ùh pòq, pang kô èh au lam trùh ti mangai diac wì. **7** Loh enh aih Phaulô müt ta hnim mòeq ngai yiniq haq Titiu Juptu, aih mangai loq iu yùq ka Boc Plinh, hnim haq aih pajùm panàt ka hnim tagop qyoh. **8** Koritbu mangai broq gàu hnim tagop qyoh, xam dìq ka hnim haq lùi döng Chuaq Jesus. Khoe èh i bàc ngai Côrintô khoe hmaq tàng Phaulô hnài, hadai lùi rai chiuq broq Baptem. **9** I mòeq mang Chuaq doe ka Phaulô ta kan mahno: “Apaq yùq cleq! anoe beq! apaq hatinh; **10** au oe ti ìh, ùh i cabô jah dèch tì broq habo cleq ka ìh, majah qmang aih au i bàc ngai oe tacô.” **11** Phaulô oe ta aih

mòeq hanam tadràu khê, hnài ka wì trong Boc Plình. **12**
Jò Galiôn qnang broq cwan kàn tagùng Achai, mangai
Juđa mòeq manoh wiang ti dabau hu taблéq ka Phaulô wì
rùp aràng haq trùh ajang nòe hnim hadrah, **13** wì doe:
Haq kô toq ti baxrùq mangai tagùng bèn kùh waiq Boc
Plình ùh troq tiaq ka ranenh. **14** Phaulô qnang hah bàu
hu hatèu, Galiôn khoe doe ka mangai Juđa: Dìq ka mangai
Juđa pì tamàng kô, tàng joq i cleq ma ùh troq, tàng joq
loq i yiniq lui cleq, ma aih au troq ka hangui tamàng pì.
15 Mahaq tàng joq tarahen trong bàu tapoch, trong yiniq
creo, trong ranenh da pì, aih cla pì hadrah deh, au ùh
tamàng trong qmang aih. **16** Haq hi hnan qnoph đac wì loh
enh gùng ka hnim hadrah. **17** Jò aih, wì hi tawìh rùp ataq
Sôthen, mangai broq craq hnim tagop qyoh, tong rachùq
haq aih enh ngèa hnim hadrah, mahaq dua Galiôn ùh
waq tamàng. **18** Phaulô oe tam ta Côrintô toq biaq hì,
khoe aih haq hangah ka oh daq, haq tòc boang ti Bêritsin
xam Aquila wì haq lam tagùng Syri, atìq ka haq got gàu
ta Sencôrê, majah qmang aih haq khoe i bàu hapah deh
adroe; **19** khoe aih wì piq ngai trùh ta Êphêô, Phaulô
dôq deh bua oe ta aih. Cla haq aih müt ta hnim tagop
qyoh, capoch tùang ti mangai Juđa. **20** Jò wì aih enh àu
haq oe tam ti wì toq biaq hì hòm, haq ùh òq bàu. **21** Haq
hangah ka wì aih rameh: Tàng joq Boc plình thê, yàng
qnoeq hòm au hi trùh ti pì, khoe aih enh Êphêô haq tòc
boang lam. **22** Jò boang khoe trùh ta Sêsarê, haq tòc ta
Jêrusalem, hmàih ka Tagop hadròeh, khoe ka aih, haq loh
hòm ta Antiôt. **23** Oe ta aih toq biaq hì, haq lam hòm,
haq lam jàp jìa ka gùng Galati hloe xam gùng Phirigi,

broq dìq dǒng ka mangai tiaq hōc cajap manoh. **24** Jò aih i mòeq ngai Juđa, yiniq haq Abôlô, gùng haq oe ta Alecxantri, haq aih mangai rabiaq ka tapoch tùang rai rabiaq ka Hset hadròeh, haq trùh ta Êphêô. **25** Haq khoe hōc trong Chuaq, dài haq majah dìq ka manoh anoe rai hnài rìm trong da Chuaq Jesus, yac ka haq bu loq đeh toq Baptem da Jon. **26** Qmang aih, enh jò baxèm haq khoe hùa hnài qmòe ka hagau haginh ta hñim tagop qyoh. Bêritsin xam Aquila tàng haq hnài, wa ahlài haq hlài ta wa, anoe trong Boc Plinh dôq haq loq tam ùh hnau hòm. **27** Jò Abôlô padon lam ta Achai, dìq dǒng oh daq wiang parông haq rai achìh jàiq tanap ka mangai tiaq hōc ta aih ep đìh haq ka alàng. Jò haq khoe trùh ta aih, canòm ka kan loq waq jah dech enh Boc Plinh haq broq lòeq ka oh daq ma khoe lùi. **28** Haq dìq cajaq bàt hlài mangai Juđa qne mangai bàc, yōc Hset Hadròeh đòeq mahnu ka wì loq Chuaq Jesus aih ra Christ.

19 Jò Abôlô oe ta Côrintô, Phaulô lam khoe jàp ta bài gùng enh qnhèq, khoe aih haq loh ta Êphêô, ta aih haq glàm toq biaq ngai tiaq hōc. **2** Haq bòch wì: “Pang jò oh daq khoe lùi, akhoe jah yōc đeh Yang Hadròeh ùh?” Wì padreo bàu: “Ùh! Nhèn qnhòq lah tàng doe i Yang Hadròeh. Phaulô bòch hòm: “Tàng qmang aih Baptem leq pì khoe jah? **3** Wì doe: “Baptem da Jon aih.” **4** Phaulô doe: “Baptem da Jon aih baptem da kan loq raxach dèh ka yiniq lui, rai thê wì lùi Mangai ma trùh atìq ka haq, aih lùi Chuaq Jesus. **5** Wì tàng qmang aih, wì hi broq baptem canòm ka yiniq Chuaq Jesus. **6** Jò Phaulô roh tì ta chac wì haq, Yang Hadròeh loh ta wì haq, am wì haq capoch

bàu qnoeq xam bàu pajàu. 7 Dìq ka wì aih jah ta mòeq
jàt baiq ngai. 8 Phaulô mùt ta hnìm tagop qyoh, ta piq
khê haq ùh hòq qmòe ka hnài wì ta aih, mahnu ka wì
loq bàc trong da Diac Plình đòeq hu pariaq mangai ma
tamàng haq. 9 Mahaq ta aih i qnah ngai cadoq manoh, wì
tàiđ đac ùh waq lùi, enh ngèa phù cròng wì haq tapoch
halê trong Boc Plình, aih ìq Phaulô majah hi lah rađeh,
tagop deh crài mangai ma tiaq hđc, rìm hì haq hnài ta
truàng Tiranu. 10 Baiq hanam qmang aih, rìm ngai oe ta
cròng Asi, yac ka mangai Juđa, yac ka mangai Gorec, dìq
tàng trong Boc plình. 11 Boc Plình broq bàc bìac halac
anòe tì kòng Phaulo, 12 wì yđc mù yđc eo haq ma khoe
caxùnh taqmàn ka bài mangai ùh hrđc, dìq ka wì aih loh
ka jah brêh, jah paclaih enh kiac dù. 13 I bài mangai Juđa,
lam dudan enh gùng kô trùh gùng tau, wì haq patìah
rađeh canòm yiniq Chuaq Jesus đòeq drùh qnoh kan kiac,
wì doe: “Au canòm ka Yiniq Chuaq Jesus, aih la mangai
Phaulô ma hnài, au thê gè loh beq! 14 Tapèh ngai ma
broq qmang aih dìq kon calô da Sêwa, haq aih hanoh
mangai broq pajàu kàn ta mangai Juđa. 15 I mòeq hì, kiac
dù tèu bàu: Chuaq Jesus, au loq, Phaulô aih cabô au hadai
loq, mahaq pì kô ìq cabô? 16 Mangai kiac ma rùp aih,
glàm ta wì aih, haq blêq döng wì, haq jêh pani rachùq wì,
wì habau habùa döng tachac, loh qmòe ka cadàu qmòe
rahòng khoe ka hnìm aih. 17 Jò mangai Juđa xam mangai
Gorec rìh oe ta Êphêđô hìa qmang aih, wì yùq crè dìq jaq,
yiniq Chuaq Jesus jah dèch ka haqnhèq. 18 Bàc ngai ma
khoe lùi, lam paqnoh dèh yiniq lui, anoe döng rìm trong
wì haq ma khoe broq. 19 Bàc ngai adroe ka aih broq pajàu

tadreo aràng bùh dèh hset enh ngèa ka phù cròng, wì boq hset aih tàng tech jah padam mùan hliac bac. **20** Qmang aih, Bàu lem hlàng hangai jàp jìa rai èh rai cajap. **21** Atìq ka bài yiniq aih, Phaulô enh pagat trong gùng Maxêđoan xam Achai đòeq hu lam ta Jêrusalem. Haq doe: “Jò au khoe hmàih ta aih, au hadai ep lam hmàih ta Rôma diq. **22** Haq thê Timôthê xam Êrat, aih baiq ngai ma wiang ti haq chônh lam ta Maxêđoan, cla haq oe raq ta Asi biaq hì hòm. **23** Jò aih i kan manhài kàn enh tablêq ka Bàu lem. **24** I mòeq ngai thòq bac yiniq haq aih Đêmêtri, haq yđc bac broq loh radua qmù kiac cadrì Đi-an, broq ka bac ngai thòq ma patih ka haq jah bac kùng hang, **25** haq gop bac wì aih, haq doe: “Oh daq bèn loq, bèn jah padrõng kan enh biac abroq kô, **26** pi hadai hnoq, hadai tàng, ùh xài toq ta Ephêô, mahaq ten dìq hloe ka cròng Asi, Phaulô padô broq ka bac ngai khoe tawìh manoh, haq doe kiac loh enh tì kõng kon mangai aih dìq ùh xài kiac. **27** Ùh xài bèn toq yùq ka yiniq abroq da bèn kô èh wì loq halê, mahaq bèn hadai yùq ka hnim kùh waiq da Đi-an kiac cadrì kàn kaiq kô èh wì loq jù đac, èh kan ranhòm kiac cadrì da bèn oe tagùng Asi xam dìq crõng taneh kô loq lùch.” **28** Tàng toq aih bàu, tagrùang qmòe wì plôh nòeh, wì cachech cadêh: “Kàn oe i jaq cleq Đi-an kiac cadrì da mangai Ephêô.” **29** Dìq ka Ephêô loh dõng ka manhài, wì rùp Gai-ut xam Aritac, mangai gùng Maxêđoan, wa aih hanoh lam pajùm ti Pahulô, mòeq manoh ka dabau wì hua wa aih qmùt ta hnim kon hat. **30** Phaulô enh cla rađeh loh yòng enh ngèa wì ta aih, mahaq mangai tiaq hõc ùh am. **31** Èh hadai i bac cwan kàn ta Asi aih bua haq,

thê mangai lam doe ka haq ùh dùh lam ta hnim kon hat.

32 Qnah ngai cajiah qmang kô, qnah ngai cachech qmang tau, nòe wì tagop loh ka tagrùang, bàc ngai ùh qnì hagleq rađeh majah wiang lam tagop dèh tacô. **33** Wì dùi qnoh Alecxando loh enh gùng ka mangai đùng đam, mangai Juđa caqnhùt haq loh yòng enh ngèa, haq hnhè tì enh ngèa ka wì hu capoch hu cwaih rađeh. **34** Mahaq jò wì bu canau ka haq aih mangai Juđa, beq meh dìq ka wì wiang cachech tagrùang jah baiq jò đùng hô: “Kàn dìq jaq! Đisan kiac cadrì da mangai Êphêsô!”. **35** Jò aih i cwan thu kìq ta phôq aih, loh pagàt wì haq waq ka hatinh, haq doe: “Oh daq mangai Êphêsô! dìq ta crõng taneh kô, cabô ùh loq đeh hra gùng Êphêsô bèn kô raq mangai wèq hnim tadreo da Đisan kiac cadrì ma dìq jaq kàn, radua qmù haq aih khoe loh qmòe enh trõc tì qmòh? **36** Yiniq aih ùh ep rahen dèh, pì oe ma hatinh haq, apaq tem broq cleq loh yiniq, **37** Majah qmang aih bái mangai pì ma khoe aràng trùh tacô ùh i atùng cleq ta hnim tadreo, wì haq hadai ùh i tapoch qmèq cleq trùh kiac cadrì da bèn. **38** Manòeq kô, tàng joq Đêmêtriu xam bái thòq ma abroq ka haq, i yiniq enh tah hadarh ka cabô, hnim hadrah pèch qmang rìm hì, cwan kàn hanoh oe ta aih. Dôq ka da wì tah hadrah ka dabau. **39** Tàng joq pì i enh bòch tam cleq, pì lam trùh ta wì mangai hadrah, dôq wì haq hadrah troq tiaq ranenh. **40** Majah qmang aih, yùq loq habo ka bèn tàng joq wì bòch hagleq bèn majah rêu ka broq lìq hì kô, bèn chaq ùh loh trong đòeq hutèu. **41** Haq capoch toq aih bàu, khoe aih haq thê wì hlài.

20 Jò kan manħài khoe jah hatinh, Phaulô creo ka báì mangai tiaq hōc trùh, khoe ka pariaq oh daq, haq hangah ka wì doièq lam tagùng Maxêđoan. **2** Haq lam jàp gùng aih, haq anoe báç trong đòeq pariaq mangai lùi; khoe aih haq lam ta diac Gorec, **3** oe ta aih piq khê. Taiq mangai Juđa khoe hatinh chaq trong hu jêh đac haq jò haq bu tōc boang lam ta Syri, aih lìq haq majah hi wìh trong Maxêđoan doièq hu hlài. **4** Sôbate, kon da Biru, mangai gùng Berê, lam ti haq, i tam Aritac xam Sacundu mangai gùng Têsalônica, Gai-ut, gùng Đecbo xam Timôthê, Tichico xam Trôphim dìq gùng Asi. **5** Wì kô lam adroe, gồm nhèn ta Trô-ach. **6** Atiq ka hì ramènh acaq bênh ùh wàt blo, nhèn tōc boang enh Philip, padam hì atiq nhèn glàm dabau ta Trô-ach, èh nhèn oe ta aih tapèh hì. **7** Hì baxèm tagàu tuàng, nhèn tagop dabau đòeq goh bênh, Phaulô ep lam hì da èh, dài haq majah hatùang ka oh daq rai hnài hloe trùh qne mang, **8** I báç toq đen talàu nòe nhèn ma qnang tagop dabau. **9** I mòeq ngai radam yiniq haq Ôtic, hangui ajang trong qmōc, Phaulô hnài xòe hêq haq aih loh ka gù kùi, jò kùi pi hmàng haq taclih enh làu piq, wì loh dèch hnoq haq khoe cachìt. **10** Mahaq, Phaulô cadiang loh chinh deh chac ta mangai aih, yōc tì kwat chac haq rai doe: “Apaq lèt, mahua oe raq tachac. **11** Phaulô tōc hlài taqnhèq, goh acaq bênh; rai anoe hnài hòm trùh qngah men lam. **12** Mangai radam oe rìh, wì tòng ahlài haq ta hñim, yiniq aih broq ka wì jah alòng haraya. **13** Bái nhèn hòm, chônh lam adroe, tōc boang lam ta Asôt, aih nòe nhèn ma hu glàm Phaulô; haq khoe taqmroq deh qmang aih, majah qmang aih haq enh lam jènh. **14** Nhèn

glàm Phaulô ta Asôt, khoe aih haq tôt boang ti nhèn, hadai nhèn trùh ta Mitilen. **15** Khoe enh aih, tiaq trong diac raxìq, sroq eh nhèn trùh tajang ka pleo Chi-ô. Hì atìq hòm nhèn padòh müt ta plaì Samôt, mòeq hì hòm hi trùh ta Milê. **16** Phaulô khoe dì deh ta manoh, haq chônh lam adroe ta Êphêsô, mahaq ùh padài ta aih yùq loq trò ta cròng Asi. Haq haqnan lam waq ka trùh ta Jérusalem tem ramèn Hì padam jàt. **17** Yàng aih, Phaulô thê wì ma oe ta Milê lam ta Êphêsô akhen ka wì gucraq broq gâu Tagop Hadròeh lam glàm haq. **18** Jò wì aih khoe trùh tagop ti haq, haq anoe “Enh jò au baxèm trùh ta Asi, au acaq oe qmang leq qne pì, oh daq loq. **19** Au qnoph rađeh dìq jaq haqneq hu patih ka Chuaq, loh bac diac mat, bac yàng mangai Juđa khoe qnhro ngan rai chaq trong jêh đac au. **20** Oh daq loq, au ùh lòm ra-đeq đòeq anoe ka oh daq loq trong leq ma lem ka pì, ùh lòm cadoc qmòe toq xit cleq, èh hòm pì loq au khoe hnài taqne nòe mangai bac, ùh meh enh hnime kô trùh hnime tau, **21** hnài ka mangai Juđa xam mangai Gorec kan loq raxach đòeq hu wìh hlài ta Boc Plình, xam kan lùi enh dalam ka Chuaq Jesus Christ aih Chuaq bèn. **22** Manđeq kô Yiang Hadròeh khoe panan, thê au lam ta Jérusalem, qnhòq qnì i yiniq cleq trùh ka au ta aih èh, **23** Moèq yiniq raq Yiang Hadròeh khoe anoe ka au loq: enh phôq kô trùh phôq tau, kaxi datoeq xam kan nanxa khoe gòm đòeq au. **24** Mahaq au ùh i adênh ka rađeh, toq ran broq qmang leq au cadàu magêh dèh ka trong, broq gêh yiniq Chuaq Jesus ma khoe thê au, lam panhìn Bàu lem aih kan am dech da Boc Plình. **25** Manoèq kô, taqne oh daq au ma khoe trùh anoe hnài diac

Boc Plinh, kô èh pi i cabô oe hnoq hadrò au hòm. **26** Aih
ìq raq, dài hì kô au majah doe dìq ka mahim oh daq au pi
pòq. **27** Majah qmang aih au ùh lòm i ra-ðeq ðòeq anoe ka
oh daq jah loq manoh da Boc Plinh ma enh. **28** Oh daq ep
wèq raðeh, èh wèq hloe xam bài Yiang Hadròeh ma khoe
dèch oh daq broq mangai wèq, ðòeq ban Tagop Hadròeh
da Boc Plinh haq ma khoe rot deh xi mahim cla. **29** Au
loq khoe ka au loh lam kô èh, i koq yiang ngang dù mùt
taqne pì, haq ùh i adênh ka oh daq. **30** Taqne oh daq hòm
imangai yòng tapoch bàu patah, àu padô mangai tiaq
höc cadàu tiaq wì haq. **31** Qmang aih, drah loq hamang,
hmàng hlài khoe piq hanam rìm hì rìm mang au loh diac
mat ðòeq hu pariaq rìm ngai oh daq. **32** Manðeq kô au jao
oh daq dìq ta tì kõng Boc Plinh ta kan loq waq haq ma
am dech ka bèn, aih jao oh daq ka Mangai broq ka oh daq
jah cajap rai am kùng hang ka oh daq pajùm ti mangai
jah hadròeh. **33** Au ùh i lòm daiq ka bac, wang, eo yôh
cabô. **34** Cla pì oh daq loq, baiq toq capiang tì kô khoe
broq loh dahlwèq ka cla au xam bài bua au. **35** Au khoe
hnài yôt, oh daq ep panim ka abroq qmang aih, ðòeq hu
wiang tabàih ka mangai hamoq, rai hmàng hlài ka bàu
Chuaq Jesus i doe: hnhu am aih i xôq ramot ùh hnau ka
hnhu yõc. **36** Khoe ka capoch qmang aih, Phaulô hacùn
cràng waiq khàn pajùm ti wì. **37** Mangai leq mangai meh
hmoe ðeh hra, rai kwat ranõng Phaulô rai hìp haq, **38** wì
mangò pi cajaq jò tàng haq doe: kô èh oh daq pi hnoq
hadrò raðeh hòm. Khoe aih, wì qnoph haq tõc boang.

21 Atìq ka talah ka wì aih, nhèn tõc boang lam trùh hloe
ta Kôt, hì atìq trùh ta Ruðo enh aih nhèn trùh ta Batara. **2**

Ta aih nhèn hnoq moèq toq boang padon lam ta Phêni; nhèn hi tōc boang aih đòeq hu lam. **3**Jò khoe hnoq pleo Chipro, nhèn hi puplech apah qma, tiaq trong lam ta Siri, boang hi yòng majah qmang aih boang ep qnoh hang ta aih. **4**Nhèn chaq hnoq bài mangai tiaq hōc, nhèn hi oe ti wì tapèh hì. Mangai tiaq hōc ta aih jah Yiang Hadròeh pariaq, wì aih padràng Phaulô apaq tōc ta Jêursalem. **5**Mahaq jò khoe dìq ka hì padài, nhèn hi lam dèh hòm; bài mangai tiaq hōc xam cadrì kon wì haq wiang lam ti nhèn loh enh gùng ka aih, dìq ka wì haq hacùn cràng tago, waiq khàn ti da bau. **6**Atìq ka hangah ka dabau, nhèn loh ta boang, bài mangai tiaq hōc hlài deh ta hnim. **7**Nhèn lam trong diac enh Tiro trùh ta Bêtôlêmai, hmàih ka oh daq èh oe ti wì mòeq hì. **8**Hì da èh loh enh aih nhèn trùh ta Sêsarê, müt ta hnim Philip mangai hnài Bàu lem, (mòeq ngai patìh ta tapèh ngai) nhèn oe ta aih. **9**Haq i pôn ngai kon cadrì oe raq sriu, loq capoch pajàu. **10**Nhèn oe ta aih khoe jah toq leq hì, i mòeq ngai pajàu loh enh gùng Juđê yiniq haq Agabut. **11**Haq thia hmàih ka nhèn, khoe aih haq doeñ caxi caqnam Phaulô, kàt dèh jèñh tì, rai doe: “Kô bàu Yiang Hadròeh doe: Ta Jêrusalem, mangai Juđa kàt mangai ma i caxi qnam kô qmang kô diq, đòeq rùp haq hu am ka mangai diac wì.” **12**Jò khoe tàng toq aih nà, oh daq tiaq hōc ta aih xam bài nhèn wiang cali calo ka Phaulô ùh dùh tōc ta Jerusalem. **13**Mahaq Phaulô padreo bàu: “Oh daq hmoe broq cleq, qnang ti broq ka au loq mangò? Ùh xài toq dôq wì kàt rađeh, yac ka cachìt ka yiniq Chuaq Jesus ta Jêrusalem dua au lèñh.” **14**Haq ùh dì bàu pagàt, nhèn hi hêq, nhèn doe: Waiq dôq

manoh da Chuaq jah gêh. **15** Khoe aih nhèn hi padon lam tōc Jerusalem. **16** I bài mangai tiaq hōc oe ta Sêsarê hadai lam ta aih ti nhèn, aràng nhèn müt ta hnim Manason, mangai gùng Chipro, haq aih hadai mangai tiaq khoe dùnh, haq am nhèn padài ta hnim cla haq. **17** Trùh ta Jérusalem, oh daq ta aih đinh nhèn bùi ka dìq jaq. **18** Hì atìq, Phaulô lam ti nhèn trùh ta hnim Jaco, dìq dōng bài gucraq khoe tagop đòeq ta aih, **19** Phaulô ti bòch hmàih wì haq, khoe èh haq hi taqmon hlài tang yiniq Boc plình khoe broq taqne nòe mangai diac wì ajang tì kōng rađeh. **20** Tàng qmang aih, wì dèch bàu manè apôi Boc plình. Khoe aih, wì doe ka haq: “Ê daq! ìh ji hnoq, toq leq jàt muàn mangai Juđa khoe lùi, dìq ka wì aih mangai leq ma ùh nhet pi cajaq trong ranenh. **21** Wì hìa, ìh khoe hnài dìq ka mangai Juđa, ma rìh ta mangai diac wì ep cađac Môise, apaq broq ramènh kat akia deh ka bài kon, ùh dùh rìh acaq tiaq wì craq qmon. **22** Kô èh bèn broq qmang leq? Wì loq ìh khoe trùh tacô. **23** Manòeq ìh broq tiaq bàu nhèn ma anoe ka ìh, ta nhèn kô i pôn ngai khoe hlac dèh ka bàu hapah; **24** aràng wì aih lam ti ìh, broq ramènh basròeh ka wì xam ka cla ìh hloe, bac wì haq ma got xàc gàu aih, ìh caqnaih. Aih èh wì hi loq đeh hra bàu wì haq ma tàng anoe trùh ìh aih ùh xài, wì hi jah loq joq qnàng ìh hanoh rìh tiaq ranenh. **25** Èh da mangai diac wì ma khoe lùi aih, i nhèn achìh jaiq ka wì haq loq trong nhèn ma khoe dì: Aih ep dênh ùh khòh acaq dahnwèq ma khoe tadreo ka kiac, mahim xam jam cachìt ka ùh jah hi hèm. **26** Phaulô hi qnong wì pôn ngai ti haq, trùh hì atìq, haq broq ramènh basròeh ti wì, khoe aih lam ta hnim kùh

waiq hu patinh ka wì loq trùh hì leq ramènh basròeh
men gêh đòeq tang ngai jah dèch ramènh. **27** Jò tapèh hì
khoe ten dìq, i bài mangai Juđa, gùng Asi hnoq Phaulô oe
ta hnìm kùh waiq, wì baxrùq dìq dõng mangai ta aih rùp
haq, **28** wì cachech creo: Dìq dõng ka manai Isorali, drah
tùh wiang tacô! Hacô raq mangai ma ti hnài jàp jìa ka
phù cròng đòeq tablêq ka mangai bèn, tablêq ka ranenh,
tablêq hloe ka nòe kô, jaq haq mech aràng bài mangai
Gorec mùt hloe ta hnìm kùh waiq broq ka nòe hadròeh
ko loh ka pi hruah. **29** Wì majah doe qmang aih, adroe ka
aih wì i hnoq Trôphim mangai Êphêso lam ti Phaulô, wì
xoh deh Phaulô khoe qnung haq aih mùt ta hnìm kùh
waiq. **30** Dìq ka mangai gùng aih loh ka tagrùang tagràt,
wì tùh loh tagop ti dabau, rùp Phaulô, hrùiq haq qnöh
enh gùng ka hnìm kùh waiq, khoe èh drah clen hclong
dõng qmõc qmang. **31** Wì qnang ti chaq trong hu jêh đac
haq, bàu aih hìa trùh don mangai cla craq lình Rôma:
Dìq ka Jérusalem khoe manhài dõng. **32** Cla craq lình
Rôma drah creo ka lình xam bài cwan tùh lam ngan. Bu
hnoq mangai cla craq xam lình haq, wì hi hêq, pi jêh
Phaulô hòm. **33** Craq lình hi thia rùp Phaulô, haq thê
wì yõc baiq hadrang caxi datoeq kàt Phaulô, khoe èh
haq bòch: Mangai kô ìq cabô? Haq khoe broq loh yiniq
cleq? **34** Qnah ngai doe qmang kô, qnah ngai cachech
doe qmang tau, hnoq kan manhài qmang aih, haq pi qnì
maleq ma joq troq, haq hi thê lình ahlài Phaulô ta đôn.
35 Jò Phaulô bu cadiang tõc haqmai hnìm, lình ep tòng
haq majah qmang aih bài wì ta aih xòc hrìn. **36** Pi cajaq
cađac mangai ma ti tiaq enh rù, rai tiaq rai cachech: Jêh

đac, jêh đac mangai qmat. **37** Jò Phaulô khoe mùt ta đôn, haq anoe ka claq craq lình: “Au ajah anoe đeh toq biaq nà ka ìh? Cla craq lình bòch: “Ìh loq capoch bàu Gorec qmòh? **38** Tàng qmang aih ìh kô ùh xài mangai Êdiptô nèh haq ma broq lìq rai qnung pôn muàn mangai atùng cadàu mùt ta braih kàn qmòh? **39** Phaulô padreo bàu doe: “Au kô mangai Juđa, gùng Tatso, oe ta Silisi aih gùng ma i bang i tiang, ìh dôq au jah tapoch biaq bàu ka wì tau. **40** Jò khoe jah bàu enh cla craq lình, Phaulô yòng ajiang caloeh hnìm, haq hnhè tì thê wì tamàng. Dìq ka wì oe hatinh, haq capoch ka wì xi bàu Hêbru:

22 “Wì daq xam wì baq, tamàng au anoe hu palem rađeh”. **2** Jò wì tàng haq capoch ka wì xi bàu Hêbru, wì loh dồng ka hatinh. Khoe aih Phaulô doe: **3** “Au kô mangai Juđa, hauang ta Tatso, trong gùng Silisi mahaq jah yòng kan tacô. Au hóc enh qneq ka Gamalien, tiaq troq ka ranenh boc yaq bèn. Nèh haq, au dìq jaq nhet trong Boc Plình, qmang ka pì hì kô diq. **4** Au hmaq ti rùp jêh cađac ka cachìt bài mangai ma tiaq Trong kô, rùp clêh gucalô xam gucadri, **5** dìq ka pajàu haqnheq xam wì craq hadrah wiang loq. Au khoe jah jàiq enh wì aih achìh ka oh daq oe ta Đamat, aih nòe au padon lam đòeq rùp kàt bài mangai ta aih ahlài ta Jérusalem hu baxa wì haq. **6** Au qnang lam ti trong, wop qne hì jò au ten trùh ta Đamat, aih cadoe i kan qngah enh plình sreo dudan ka au. **7** Au tacro ta taneh, au tàng i bàu capoch ka au: Saulo, Saulo! Hagleq ìh majah rùp baxa au? **8** Au bòch: Chuaq au, ìh kô ìq cabô? Haq padreo bàu: Au raq Jesus mangai Naxaret, mangai ìh qnang ti chaq rùp baxa kô. **9** Wì ma lam ti au

hanoh hnoq kan qngah mahaq ùh tàng bàu Mangai ma tapoch ka au. **10** Au bòch: Chuaq au, manòeq kô au ep broq qmang leq? Chuaq doe: drah yòng, mùt ta Đamat, ta aih èh i mangai anoe ka ìh loq rìm trong au ma khoe thê ìh broq. **11** Kan qngah aih qngah picajaq, au loh ka pi xau hnoq, bài bua au ep rùp tì tìc au trùh ta Đamat. **12** I mòeq ngai yiniq haq Anania trùh chaq au, haq aih mangai dìq ka manoh wèq tiaq ranenh, mangai Juđa oe ta Đamat dìq manè haq; **13** haq yòng enh ngèa au rai doe: Daq Saulo, qngah hlài mat beq, jò aih raq au jah hnoq hloe Anania. **14** Haq doe ka au: Boc Plình da kan cadraq bèn, khoe ràih dôq ìh jah loq manoh Chuaq enh, jah hnoq Mangai Taq atoq, èh jah tàng hloe bàu loh enh hacùng haq. **15** Majah qmang aih, kô èh ìh jah yòng enh ngèa bàc ngai hu anoe rìm yiniq ìh ma khoe hnoq khoe tàng, dôq wì loq ka haq, **16** Manòeq kô ìh oe batrò dèh? Ùh drah yòng creo dang yiniq Chuaq đòeq hu jah baptém hu jah broq hreо deh yiniq lui beq. **17** Jò au ta wìh hlài ta Jérusalem, au qnang waiq khàn ta hnim kùh waiq, au loh ka pi hmàng ka don **18** hnoq Chuaq doe ka au: “Drah loh enh gùng ka Jérusalem ma rênhaq! Majahq qmang aih, bàu ìh ma anoe trùh au mangai tacô ùh waq tamàng”. **19** au padreo bàu: “Chuaq! mangai gùng kô loq au hmaq lam enh hnim tagop qyoh kô trùh ta hnim tagop qyoh tau rùp clêh rai jêh mangai leq ma lùi ìh. **20** Èh hòm jò mahim Êtien, mangai ma lam anoe panhìn dôq wì loq ka ìh, ma ta-ùc au yòng ta aih wiang moèq manoh ti wì rai wê eo bài mangai jêh đac haq aih. **21** Chuaq doe ka au: “Lam beq, Au thê ìh lam trùh ta mangai diac wì”. **22**

Wì aih tàng Phaulô anoe pang aih, wì padinh yòng rai cachech: “Hêq mangai qmang qmat pi oe rong rìh dèh ta crõng taneh kô! Haq pi troq ka rìh dèh hòm”. **23** Wì cachech, lêh hwênh dèh eo, caxaiq blo ta haqnhèq. **24** Cla craq lình drah thê wì qmùt Phaulô ta đôn. Haq thê wì yđc long roe blai Phaulô đđeq bòch ngan hagleq bài mangai bàc enh gùng tau majah cachech hrìn ka haq qmang aih. **25** Jò wì qnang hua qnoh Phaulo đđeq hu blai, Phaulô bòch mangai wèq lình yòng ajang aih: “Tiaq ranenh ìh akhòh jêh mangai Rôma, mangai pì qnhòq chaq hnoq haq aih i qmòe yiniq lui cleq loq ùh? **26** Jò mangai wèq lình tàng qmang aih, haq lam ajang nòe ka mangai cla craq thê haq, haq bòch: “Wùih! ìh qnang padon broq cleq kô ìq? Mangai kô mangai Rôma. **27** Cla craq lình tàng qmang aih, haq lam trùh ajang Phaulô, haq bòch: “Anoe ka au loq, ìh kô ajoq mangai Rôma? Phaulô tèu “Joq”. **28** Mangai cla craq lình doe: “Au clìh ka bac bàc haraya men jah rot cwìang broq mangai Rôma”. Phaulô tèu: “Jò bu hauang au kô khoe mangai Rôma”. **29** Dìq ka mangai ma blai haq, tàng doe qmang aih wì drah wia ka hangai, cla craq lình jò loq ka rađeh khoe kàt mangai diac Rôma, haq crè pi cajaq cleq. **30** Sroq atìq, cla craq lình enh loq ka nhìn hagleq mangai Juđa majah enh tah hadah ka Phaulô, haq thê wì lêh caqnaih phaulô, creo dìq ka bài pajàu kàn xam bài craq hadrah trùh ta aih, khoe èh haq qnoh Phaulô loh yòng enh ngèa wì.

23 Phaulô ngan tajang tanòe hadrah rai doe: “Wì oh daq! enh ngèa Boc Plinh au khoe acaq oe dìq ka manoh loq yùq loq iu trùh manđeq. **2** Mahaq Anania, mangai

pajàu haqnhèq thê wì ma yòng haten aih tep hacùng Phaulô. 3 Phaulô hi capoch ka haq: “Wùih panàt xòn taboc meh, Boc Plình jêh ìh, ìh hangui đòeq hu hadrah au tiaq trong ranenh, mahaq ìh ngan ranenh ùh loh cleq, aih ka ìh thê wì jêh au. 4 Bài mangai yòng kênh aih doe: ìh hùa hnap ka pajàu Boc plình qmòh! 5 Phaulô padreo bàu: “Wì oh daq, au ùh qnì ka haq qmat broq pajàu haqnhèq, majah qmang aih khoe i bàu achìh: ìh ùh dùh capoch qmèq ka mangai ma wèq mangai bèn. 6 Phaulô loq ka wì ta aih, qnah aih mangai Sađusê, qnah aih mangai Pharsi, haq hi creo cadêh: “Wì oh daq! au kô mangai Pharsi, nang noe da mangai Pharsi. Gleq au majah yòng ajang kô? Aih taiq au lùi i kan rìh hlài enh mangai cachìt. 7 Haq tapoch qmang aih bu hêq, mangai Pharsi xam mangai Sađusê hi loh ka tarahen, bài mangai hadrah hi lah broq baiq pah. 8 Majah qmang aih mangai Sađusê doe: ùh i ka kan rìh hlài, ùh i ka bìn plình, ùh i ka kan kiac taleq, yàng da mangai Pharsi dìq lùi i trong aih. 9 Bàu tagruàng tagrát èh rai dêh. I bài mangai hnài ranenh nang noe da mangai Pharsi yòng tarahen ka mangai qnoeq, wì doe: “nhèn ùh hnoq mangai kô i broq cleq ma ùh troq. Cabô ma qnì, broq braiq qnì i kiac i bìn plình qnì khoe capoch tuàng ka haq? 10 kan tarahen rai èh rai dêh, cla craq lình yùq trùh wì ma hit cađac Phaulô loh baiq, haq thê deh lình drah loh blah yōc Phaulô enh tì wì aih hu ahlài ta đôn. 11 Mang atìq Chuaq yòng haten ka Phaulô rai doe: “Apaq yùq! ta Jérusalem ìh khoe anoe dôq wì loq ka au qmang leq, ta Rôma ìh hadai ep anoe dôq wì loq ka au qmang aih diq. 12 Trùh qngah, mangai Juđa khoe hatinh

ti dabau, dìq dǒng ka wì haq hapah ti dabau ùh acaq, ùh ôq trùh jò leq khoe jah jêh cađac Phaulô. **13** Loe pôn jàt ngai ma hatinh qmang aih. **14** Wì lam chaq bài mangai pajàu kàn xam bài gucraq wì doe: “nhèn khoe hapah ti dabau ùh acaq qmòe blinh trùh jò leq nhèn jah jêh cađac Phaulô. **15** Manòeq kô xam pì xam wì craq hadrah, trùh bòch cwan cla craq lình, dôq haq qnophaulô yòng enh ngèa ka pì broq tìah ka pì ma i yiniq enh bòch dôq hu loq tam, èh nhèn khoe rap qmòe ti trong jò haq qnhòq trùh tacô nhèn khoe jêh cađac. **16** Mahaq, i kon calô mangai daq cadrì da Phaulô loq ka wì hatinh qmang aih, haq mùt ta đôn, anoe ka Phaulô loq adroe. **17** Phaulô creo ka mòeq ngai broq đaiq đôiq, haq doe: “Aràng kon mangai radam kô trùh glàm cwan cla craq lình, haq kô i yiniq enh patìn ka cwan aih. **18** Haq hi qnong mangai radam aih lam glàm cwan cla craq lình. Mangai đaiq đôiq doe: “Phaulô mangai ma qnang oe tù i creo ka au thê au aràng kon mangai radam kô trùh ta ìh, haq kô i yiniq enh anoe ka ìh. **19** Mangai cla craq lình rùp tì mangai radam aih lam ta kênhanh rai bòch: “ìh enh patinh ka au yiniq cleq?” **20** Mangai aih doe: “Mangai Juđa khoe mòeq manoh ti dabau đòeq wiang bòch ìh, hì da èh am Phaulô lam yòng enh ngèa nòe hadrah, broq tìah qmang ka wì haq ma i yiniq enh bòch panhìn dôq hu loq tam. **21** Mahaq ìh apaq lùi, majah qmang aih i loe pôn jàt ngai khoe hatinh ti dabau chaq trong jêh cađac Phaulô, wì aih khoe hapah ka dabau adroe ka jah jêh cađac Phaulô, wì haq blinh ùh acaq ùh ôq qmòe cleq, manoeq kô wì haq khoe padon đòeq gòm toq ìh òq bàu. **22** Cwan cla craq lình am kon

mangai radam aih hlài rai tanap: “Apaq anoe ka cabô loq bàu ìh neo bahìa ka au.” **23** Khoe aih, haq creo ka baiq ngai đaiq đôiq rai tanap ka wa: “Hachìn jò mang kô, padon đòeq baiq hrinh ngai lình, tapèh jàt lình kòe axêh, baiq hrinh lình wê jaoq, hu lam ta Sêsarê; **24** padon am ka Phaulô axêh, dôq jah qnung lam ka catèm trùh ta Phêlit cwan haqnhèq. **25** Haq achìh ka cwan aih mòeq araq jàiq, rameh: **26** “Kôlot-Lysia, achìh ka Phêlit cwan haqnhèq, waiq ka ìh jah kan catèm! **27** Mangai Juđa khoe rùp mangai kô hujêh cađac, mahaq au khoe qnung lình lam blah yōc haq claih enh wì aih, majah qmang aih au tàng doe haq kô mangai diac Rôma. **28** Au enh loq hagleq wì majah tah hadrah ka mangai kô, aih ìq au hi qnoh haq tanòe hadrah da cla wì haq. **29** Au hnoq mangai kô wì tah hadrah ka haq tiaq toq trong ranenh da cla wì aih, mahaq ùh lòm i ajang leq ma doe mangai kô troq ka cachìt qnì troq ka rùp clêh qnì. **30** Yàng aih au hìa i wì hatìn chaq trong hu jêh cađac mangai kô, aih ìq au majah thê haq drah trùh ta ìh. Au hadai khoe thê bìài mangai tah hadrah ka haq kô enh anoe cleq aih trùh ajang ìh.” **31** Bìài lình iu tiaq bàu, mang aih raq qnung Phaulô tiaq wì haq trùh ta Anti-batri. **32** Sroq atìq wì dôq toq lình kòe axêh lam ti haq, bìài lình qnoeq aih hi wìh hlài ta đôn. **33** Jò lình kòe axêh khoe trùh ta Sêsarê, wì yōc jàiq aih dèch am ka cwan haqnhèq rai jao hloe Phaulô ka haq. **34** Cwan haqnhèq ngan jàiq, khoe aih haq bòch Phaulô oe ta tình leq, jò haq bu loq ka Phaulô oe ta tình Silisi, **35** aih haq hi doe: “Jò leq bìài mangai tah hadrah aih trùh tacô, aih èh

bri ka au tamàng ìh. Khoe aih haq thê wì rùp padràng Phaulô ta hnim Hêrot.

24 Atìq ka aih padam hì, Anania mangai pajàu haqnhèq xam biaq ngai gucraq lam pajùm ti mòeq ngai rabiaq ka capoch acaq, yiniq haq Tectulu, am ka cwan haqnhèq jàiq wì haq khoe achìh đòeq tah hadrah ka Phaulô. **2** Jò khoe creo ka Phaulô müt, Tectulu hi doe: **3** “Cwan haqnhèq Phêlit, canòm đeh ka ìh nhèn ma khoe jah rìh catèm rìm trong, canòm kan rabiaq, kan loq hnoq hangai enh ìh bài kan qmèq khoe wìa kan lem am ka nhèn, jò leq jò meh yac ka oe taleq dua nhèn toq hmàng toq manè ìh. **4** Mahaq đòeq ùh hìaq pangài hrìn đeh ka ìh, broq qmang leq ìh hai tamàng da nhèn biaq nà. **5** Nhèn hnoq haq kô mangai enh chaq toq yiniq, toq ti jrôq chiu mangai Juđa jàp ta crõng taneh. Haq pagàu bài bua mangai Naxaret, **6** Haq hadai khoe hwaq broq kan amùa ta hnim kùh waiq, dài nhèn ma jah rùp haq, nhèn enh hadrah haq qmat tiaq ranenh cla nhèn. **7** Mahaq Lysia, cwan cla craq lình, haq aih ngang haraya khoe blah mangai qmat enh tì kõng nhèn. **8** Thê dìq ka mangai hadrah lam glàm qmòe cla ìh, manòeq kô cla ìh bòch haq qmat beq, aih ìh hi loq gleq nhèn majah qnang tah hadrah ka haq. **9** Bài mangai Juđa hadai wiang mòeq bàu ka Tectulu, wì doe hiloq qmang aih raq. **10** Cwan haqnhèq hnhè tì thê Phaulô capoch, Phaulô padreo bàu: “Au loq ìh broq cwan hadrah ta taneh diac kô khoe bac hanam, aih ìq dài au majah lem bùi hu capoch cwaih rađeh. **11** Ìh ti bòch beq, ìh hi loq au neo tõc ta Jerusalem đòeq kùh waiq, qnhòq tem jah mòeq jàt baiq hì. **12** Wì qnhòq hmaq hnoq au tanòe hnim kùh

waiq, tanòe hnim tagop qyoh, ta roc phôq, tarahen ka cabô đòeq jrôq chiu thê wì broq manhài. **13** Manòeq kô wì ùh yōc cleq aleq hu patô am ka ìh hnoq đòeq panhìn bàu wì ma tah hadrah ka au. **14** Enh ngèa cwan, au ùh hangah rađeh joq au kùh waiq Boc Plinh boc yaq nhèn ma lùi dèh enh nèh, au lùi rìm bàu achìh ta hset ranenh xam hset pajàu, **15** au hadai lùi tìah qmang ka wì haq ma lùi nòe Boc Plinh diq, aih lùi i kan rìh hlài da mangai taq atoq xam mangai dù. **16** Dài aih ìq raq, enh ngèa Boc Plinh enh ngèa kon mangai au majah àu wèq dèh manoh cliac dôq haq jah hliang lem. **17** Au arù hangai khoe bàc hanam, au hlài ta Jérusalem hu qnàng dahnwèq tabàih am ka oh daq au bài mangai ma pa đeh, rai dèch ramènh ka Boc plinh. **18** Jò aih, i bài mangai Juđa oe ta gùng Asi hnoq au qnang broq ramènh basròeh ka rađeh ta hnim kùh waiq, ùh i broq cleq lìq làn, ùh i mangai enh leq ma bàc. **19** Tàng joq wì aih i yiniq cleq enh tah hadrah ka au, aih ajoq wì haq trùh anoe enh ngèa ka cwan kô ma troq. **20** Tàng ùh meh, bài pì ma yòng tacô ep doe beq, pì khoe hnoq au i broq yiniq cleq ùh troq jò au yòng tanòe hadrah da mangai Juđa, **21** enh gùng ka mòeq bàu au ma khoe capoch dêh enh ngèa wì haq: Hì kô au majah ep yòng ajang kô tamàng bàu pì bòch aih taiq au lùi kan rìh hlài da mangai cachìt. **22** Phêlit khoe loq Trong Phaulô ma anoe aih, dài haq majah taqnìhùa, haq doe: “Hêq gòm jò leq Lysia mangai cla craq lình trùh tacô, brì ka au tamàng yiniq kô”. **23** Khoe aih, Phêlit thê mangai đaiq đôiq rùp đòeq Phaulô mahaq ep am haq jah lam hlài đeh toq biaq, apaq tát bài bua Phaulô jò wì lam hmàih rai aràng ka haq

dahwèq haq ma i yiniq waq. **24** Biaq hì atiq ka aih, Phêlit xam Đorusi cadrì haq, aih mangai Juđa, trùh thê wì creo ka Phaulô, tamàng haq anoe trùh kan lùi nòe Chuaq Jesus Christ. **25** Mahaq jò tàng Phaulô anoe trùh kan taq atoq, kan loq wèq rađeh xam kan hadrah hì atiq, Phêlit crè picajaq, haq doe: “Hêq hì kô anoe pang kô raq, gòm hì qnoeq au dòh au hi creo ònh”. **26** Phêlit hadai toq tangèh ka Phaulô am ka haq bac jèn, dài haq majah ti hawet creo capoch tuàng yôt ka Phaulô. **27** Baiq hanam atiq ka aih, Bôtiu-Phêtu trùh broq thai ka Phêlit. Taiq Phêlit enh yōc manoh mangai Juđa dài haq majah ùh caqnaih Phaulô.

25 Phêtu broq tình trùang bujah piq hì, haq loh enh Sêsarê tōc ta Jerusalem. **2** Ta aih, i bài mangai pajàu kàn, bài gucraq da mangai Juđa trùh enh ngèa haq hu tah hadrah ka Phaulô, **3** Wì haq àu bòch cwan Phêtu caqnaih Phaulô hlài ta Jérusalem, majah qmang aih wì haq khoe hatinh ka dabau jêh cađac Phaulô jò haq qnang lam ti trong. **4** Mahaq Phêtu doe “Phaulô, wì oe raq clêh ta Sêsarê”, cla au kô èh hadai ep haqnan ka hlài ta aih, **5** manòeq kô pì yōc biaq ngai gaudi gucraq lam ti au, tàng joq mangai aih i broq cleq ùh troq, aih pì hi paqnoh. **6** Phêtu oe ti wì loq jah rahem hì ùh moèq jàt hì, khoe aih haq ta wìh loh Ta Sêsarê, sroq atiq haq hangui nòe hñim hadrah, haq thê wì qnoph Phaulô loh yòng enh ngèa haq. **7** Phaulô bu trùh, bài mangai Juđa ma loh enh Jérusalem khoe tûh yòng dudan ka haq, wì yōc bac trong tapoch cheo đòeq taqmòq yiniq lui ka haq, mahaq ùh i cleq đòeq hu panhìn bài bàu aih. **8** Khoe aih Phaulô hi anoe đòeq cwaih rađeh: “Au qnhòq lah broq cleq ùh troq, broq cleq

ma pagau ka ranenh mangai Juđa, pagau ka hnime kùh
waiq, pagau ka Sêsa.” **9** Mahaq Phêtu enh lem ka manoh
mangai Juđa haq bòch Phaulô: “Ih i enh tòc ta Jêrusalem
đòeq hadrah bâi yiniq kô enh ngèa ka au loq ùh?” **10**
Phaulô padreo bàu doe: “Manđeq kô au yòng nòe hadrah
yiniq da Sêsa, au waq ka jah hadrah ta aih, au ùh i broq
yiniq lui cleq ka mangai Juđa, yac ka ih hadai khoe loq. **11**
Tàng joq au i broq yiniq lui cleq ma troq ka cachìt, au ka
ùh chuiq ka cachìt. Mahaq tàng joq bàu wì mangai Juđa
ma tah hadrah ka au ùh joq qnàng, ùh i cabô jah rùp au
am ka wì haq. Au dang trùh ta Sêsa.” **12** Phêtu hatinh
ka bâi mangai wiang hadrah, khoe aih haq hi doe: “Ih
khoe creo dang Sêsa, aih èh ih jah trùh ta Sêsa”. **13** Biaq
hì atìq ka aih, bùa Aripba xam Bêrêsit, wa lam trùh ta
Sêsarê đòeq hmàih ka Phêtu. **14** Wa haq oe ta aih bac hì,
Phêtu hi anoe ka bùa loq trong yiniq da Phaulô. Haq doe:
“Tacô i mòeq ngai cwan Phêlit khoe clêh đòeq. **15** Jò au
tòc ta Jêrusalem, bâi mangai pajàu kàn xam bâi gucraq
da mangai Juđa trùh hu tah hadrah ka haq aih, wì àu
thê au dèch taqmòq tuiq ka haq. **16** Au hi doe: Mangai
Rôma ùh taqmòq yiniq lui ka cabô, jò mangai aih qnhòq
yòng enh ngèa bâi mangai tah hadrah ka haq đòeq hu
capoch cwaikh rađeh. **17** Jò wì aih lam tiaq au trùh tacô,
au hadai ùh batrò, sroq atìq au khoe thê qnöh mangai aih
đòeq hu hadrah. **18** Bâi mangai ma tah hadrah khoe tôm
dõng, mahaq ùh lòm i qmòe yiniq cleq ma wìa ka taqmòq
ka haq tuiq troeq au ma hèm dèh ta manoh. **19** Wì toq
tapoch rahlen ka haq toq trong đaoq da cla wì, èh ràu trùh
mòeq ngai khoe cachìt yiniq haq Jesus, mahaq Phaulô

dua rahan: Haq aih oe rìh. **20** Wì tarahen deh qmang aih, au pi qnì tiaq da ma leq, dài au ma hi bòch cla Phaulô i enh tōc ta Jérusalem đòeq tamàng wì hadrah ta aih loq ùh. **21** Mahaq cla Phaulô khoe dang waq ka jah wì hadrah haq enh ngèa ka Sêsa. Au khoe thê wi clêh haq đòeq gòm trùh hì aràng haq ka Sêsa. **22** Bùa Aripba anoe ka Phêtu: “Au hadai enh tamàng bàu mangai aih.” Phêtu doe “Sroq èh ih hi jah tamàng haq aih”. **23** Sroq atiq bùa Ariba xam Bêrisit nhòm nhình cadiang mùt ta hním hadrah hangui ti bài cwan lình xam wi gucraq gùng aih, Phêtu hi thê wì qnoph Phaulô. **24** Khoe aih Phêtu doe: “Bùa Ariba xam dìq ka pì i mat tacô, pì dìq hnoq mangai kô, taiq haq kô dìq ka mangai Juđa oe ta Jérusalem xam mangai oe tacô majah khoe lam canòm ka au, wì doe: “Apaq dôq haq rìh hòm”. **25** Mahaq au khoe ti chaq ngan ùh hnoq haq i yiniq lui cleq ma troq ka cachìt, cla haq hadai khoe creo dang trùh ta Sêsa, Au hèm kô èh au aràng haq ka Sêsa. **26** Mahaq au ùh qnì yōc cleq đòeq achìh hu anoe ka Sêsa, hì kô au qnoph haq loh enh ngèa pì, ajang kô i bùa Ariba, aih joq pi i cleq yeo loe hòm, đòeq bòch haq, khoe aih au men i yiniq đòeq hu achìh ka Sêsa. **27** Majah qmang aih, au hèm qnung mòeq ngai broq yiniq lui mahaq ùh anoe hloh trong wì ma tah hadrah ka haq, aih ajoq kan talìq talàn.

26 Khoe aih bùa Ariba doe ka Phaulô: “Ìh jah capoch đòeq hu cwaih rađeh”. Phaulô qnhè tì ka wì, khoe aih haq anoe qmang kô: **2** “Bùa Ariba, joq lem ka au hì kô jah yòng enh ngèa ìh đòeq hu capoch palem rađeh khoe ka rìm trong mangai Juđa ma tah hadrah ka au, **3** majah qmang aih ìh loq joq qnàng trong mangai Juđa rìh acaq

xam kan wì haq loq tarahen dàng leq. Aih ìq au majah ngèh ìh ran àt hu tamàng au anoe. **4** Enh qyoh nèh rq, au rìh acaq qmang leq, mangai Juđa oe tagùng cla au xam mangai Juđa oe ta Jérusalem dìq loq. **5** Wì loq ka au khoe dùnh tàng joq wì ma waq anoe biaq ka au, au kô mangai Pharisi, au tiaq đaoq aih yeo nhet diq döng ka wì qnoeq. **6** Manoeq kô, taiq tangèh ajang bàu Boc Plình ma khoe tèu am ka boc yaq nhèn au majah ep yòng nòe hadrah kô, **7** Mòeq jàt baiq xinoe Isorali nhèn yđc dìq ka manoh kùh waiq Boc Plình, xam dahì xam damang, toq tangèh ka bàu aih jah pagêh. Bùa Ariba ôi! taiq kan tangèh aih mangai Juđa majah tah hadrah ka au. **8** Wùih! Ji laiq pì mahèm Boc plình broq mangai cachìt rìh hlài ùh jah qmòh? **9** Au hadai khoe lah hèm ta manoh ep broq bàc trong đòeq hu tablêq hlài ka yiniq Jesus mangai Naxaret. **10** Joq qnàng au khoe broq qmang aih ta Jérusalem. Au jah cwìang enh bài pajàu kàn, au rùp clêh bàc ngai hadròeh, èh hòm jò wì ma jêh cađac bài mangai aih, au hadai mòeq manoh ti wì. **11** Bàc yàng au lam enh hnìm tagop qyoh kô trùh hnìm tagop qyoh tau, hujêh wì, thê wi tapoch qmèq ka Boc plình. Au nòeh oe i jaq cleq au ti chaq rùp wì haq trùh hloe tanòe diac wì. **12** Qmang aih, jah cwìang enh bài pajàu kàn, au tòc ta Đamat, jò qnang lam ti trong, **13** wop qne hì, au hnoq i kan qngah loh enh plình, qngah ùh hnau ka mat mahì sreо dudan ka au xam bua au. **14** Dìq ka nhèn tacro döñq ta taneh, au tàng i bàu capoch ka au xi bàu Hêbru: “Saulo, Saulo! hagleq ìh majah ti rùp baxa dèh ka au? ìh đaoq ta long hin aih habo ka cla. **15** Au padreo bàu “Craq au! ìh kô cabô”. Haq doe” Au kô

Jesus mangai qnang ti chaq rùp. **16** Mahaq drah rai yòng
beq! Majah qmang aih au khoe loh ti ìh đòeq thê ìh broq
mangai patìh rai anoe dôq wì qnoeq loq rìm yiniq ìh ma
khoe hnoq xam bài yiniq au padon patô ka ìh. **17** I au
caqnaih ìh loh khoe tì kõng mangai gùng kô xam mangai
diac wì nòe Au thê ìh lam, **18** đòeq hu pèch mat wì haq,
dôq enh nòe clam cluiq wì haq jah atđc tanòe qngah
qngai, enh caqnàm Satan wì haq jah trùh ti Boc plình, jò
manoh wì haq lùi ajang au wì haq jah kan caqnaih yiniq
lui, hadai jah kùng hang ti bài mangai khoe jah barsòeh.
19 Pang aih, bùa Ariba ôi, au pi hùa tablêq ka kan mahnu
enh plình, **20** baxèm aih au anoe ka mangai oe ta Đamat,
atiq aih anoe ka mangai oe ta Jérusalem, xam dìq dõng
gùng Jiuđê, khoe aih trùh mangai diac wì, au hnài wì
ep loq raxach đòeq hu tawìh hlài ti Boc Plình, khoe aih
broq trong lem đòeq patô joq qnàng wì haq khoe raxach.
21 Aih ìq, dài haq mangai Juđa majah rùp au ta Hnim
kùh waiq rai àu jêh cađac hloe au. **22** Mahaq rìm hì Boc
plình wèq, trùh hì kô au jah yòng ajang kô đòeq anoe
panhìn ka mangai qyoh xam mangai gucraq, au ùh anoe
cleq enh gùng ka bàu bài pajàu xam Môise khoe anoe
bài bàu aih jah trùh. **23** Aih Christ ep xalep, haq rìh hlài
adroe dìq dõng ka mangai cachìt, aràng am kan qngah ka
mangai bèn xam mangai diac wì.” **24** Phaulô qnang cwaih
rađeh qmang aih, Phêtu tapoch cadêh đòeq pot bàu haq:
“Phaulô ìh qmat hốc bac hrìn khoe loh ka ranhùa.” **25**
Phaulô padreo bàu: “Cwan kàn Phêtu, au ùh i ranhùa,
bàu au anoe aih dìq troq dìq joq qnàng”. **26** Yac ka bùa
hadai loq trong kô, dài au ùh xa cleq anoe ka ìh, majah

qmang aih i cleq bùa ùh qnì, rìm yiniq aih ùh i broq ta hanàp clam. **27** Bùa Ariba, ìh alùi bài pajàu ùh? Au loq ma joq qnàng aih ìh lùi”. **28** Bùa Ariba doe ka Phaulô “Oe toq xit hèm ìh khoe thê au wìa mangai tiaq hốc da Christ”. **29** Phaulô doe: “Waiq Boc Plình, ùh rênêh èh adia, ùh xài mòeq ngai bùa mahaq dìq döng ka mangai tamàng au hì kô, jah wìa tìah ka au, enh gùng ka hadrang kaxi datoeq kô raq”. **30** Bùa padinh yòng, cwan tình truàng, Bênhêpit xam dìq ka wì ma haqngui ta aih hanoh qmang aih. **31** Jò khoe loh enh gùng, wì haq ta anoë ka dabau: “Mangai kô ùh i broq cleq ma troq ka cachìt troq ka clêh haq.” **32** Bùa Ariba doe ka Phêtu: “Mangai kô troq ka caqnaih, apaq haq ma khoe creo dang trùh ta Sêsa”.

27 Jò khoe hatinh, nhèn ep lam trong diac raxìq đòeq trùh ta diac Itali, wì hi jao Phaulô xam bài mangai oe tù maqnoeq hèm ka mòeq ngai cwan lình yiniq haq Juliut, aih cla craq lình wèq bùa kàn. **2** Nhèn tòc mòeq toq boang trùh enh Atramit padon lam bac tình ti kenh diac raxìq Asi, loh lam enh aih i Aritac mangai Maxêdoan oe ta Têsalônica lam ti nhèn. **3** Hì atìq nhèn trùh ta Siđôn, Juliut aih mangai lem manoh, haq am Phaulô lam hmàih dèh bài bua, dôq wì aih jah taqmroq palauq ka Phaulô bài dahwèq haq ma qnang nan. **4** Enh aih, nhèn lam tiaq haqmai pleo Chipro, majah qmang aih glàm cayeo tát qngèa. **5** Jò nhèn lam khoe catech diac raxìq Silisi xam Bamphili, nhèn trùh ta Mira oe ta Lysi. **6** Ta aih, cwan lình hnoq mòeq toq boang enh Alecxantri lam pagat gùng Itali, haq am nhèn tòc boang aih. **7** Boang cadàu adia, bac hì men trùh ta Conit. Cayêu dêh hrìn boang ùh

jah mùt tago, nhèn ep lam ti haqmai pleo Coret, tangèa ka Samôn. **8** Lam qmòe caxa roc haqmai diac qmang aih. Nhèn men trùh mòeq nòe wì creo dèh “Wình boang lem”, haten ka Lasê. **9** Bác hì boang cadàu glàm kan yat (khoe dìq ka jò apàm ka acaq), Phaulô pariaq bài mangai taboang, **10** haq doe: “Oh daq! Au hnoq bèn lam boang yàng kô glàm kan yat, ùh xài hnhung toq ka hang ka boang mahaq yat hloe trùh cla. **11** Mahaq mangai cwan lình lùi bàu mangai wèq boang ùh hnau ka bàu Phaulô. **12** Ta aih ùh lem ka boang achàt oe clech ka ralim, bác ngai wiang hatinh ep loh ma khoe enh aih, hèm dèh ran trùh ta Phênit oe ta aih clech ka ralim, aih nòe achàt boang da pleo Corêt, nòe kô i baiq trong boang hu mùt mòeq aih ta ngèa pah qma mahì loh, mòeq aih pah qngeo mahì clìh. **13** Jò cayêu enh apah qma mahì loh bu hlui, wì hèm dèh jah trùh tanòe wì ma enh lam, wì drah dèch glêh boang, lam tiaq haqmai pleo Corêt. **14** Atìq ka aih toq biaq, i kan cayeo bahùt dêh, yiniq cayeo Aquilôn rapàt cadêh tòc ta pleo. **15** Bahùt hlui boang talùi ka hangai, ùh hlàt tablêq ka cayeo nhèn hi mac maiq ka cayêu qnung. **16** Cayêu qnung boang trùh ta mòeq toq pleo qyoh yiniq haq Clođa, xalep haraya men jah dèch boang qyoh atòc ta boang kàn. **17** Jò khoe jah dèch atòc, nhèn yòc kaxi griaq tap dan caqnam haq ka cajap. Khoe aih yùq boang loq hlac nòe braih Siroto, nhèn hi caqnìh glêh boang ta diac, khoe aih dôq daiq cayeo tàih boang taleq tameh. **18** Trùh hi da èh, bahùt dêh mòeq jaq, wì khwênh caqnìh bài hang ta diac rasìq. **19** Trùh hì piq, tù kòng cla nhèn caqnìh bài hang ta diac. **20** Bác hì qmang aih ùh i ka mat

mahì, ùh i ka halõng, bahùt ùh dùh ka rangep, nhèn loh ka pi i cabô ma oe ùac ka jah rìh. **21** Wì ùh acaq khoe dùnh, Phaulô yòng enh ngèa wì aih, haq doe: “Dìq ka oh daq, adroe nèh tàng pì waq tamàng bàu au, apaq loh enh Corêt, aih bèn khoe ùh hìaq glàm kan habo qmang kô. **22** Mahaq manðeq kô au anoe dôq pì ùh hìaq yùq, majah qmang aih dìq ka pì ùh i cabô cachìt, toq boang ko èh ma hnhung. **23** Mang ìq, mòeq bình plình da Boc plình au ma patih i loh doe ka au: **24** Phaulô apaq yùq! ìh ep yòng enh ngèa Sêsa, hacô Boc Plình khoe am ka ìh kan rìh da bài mangai ma lam ti ìh. **25** Qmang aih, dìq capì cajap manoh oq, majah qmang aih au i kan lùi Boc Plình, kô èh rìm yiniq wop tìah ka bàu haq khoe anoe”; **26** bèn jah tòc tapleo leq qnhòq qnì. **27** Khoe mòeq jàt pôn mang, boang nhèn oe raq hìu lìq làn ta diac raxìq Adri-atic, trùh qne mang, wì xoh đeh khoe ten trùh tago. **28** Wì caqnìh mòeq hadrang caxi đòeq nhro ngan, hnoq jrùq oe jah baiq jàt plaih, hangai tam toq biaq, wì caqnìh hòm hnoq jrùq bu mòeq jàt padam plaih. **29** Jò aih yùq boang loq glàm hmo, enh cloh boang wì caqnìh pôn toq glêh mem loh ta diac, khoe aih toq waiq ka tròc drah qngah. **30** Mahaq, ta boang i mangai enh cadàu claih toq ka rađeh, wì haq enh caqnìh boang qyoh patiah đeh lam ngan glêh mem enh ngèa boang, **31** Phaulô doe ka cwan craq lình: “Tàng joq bài mangai qmat ùh oe tabooang, dìq ka pì ùh i mangai leq jah rìh. **32** Bài lình kat cađac caxi grap boang qyoh dôq haq clìh tadiac. **33** Jò oe gồm tròc qngah, Phaulô pariaq wì acaq. Haq doe: “Hì kô khoe mòeq jàt pôn hì pì toq ngèh gồm ùh dùh i acaq toq xit cleq. **34**

Manòeq au pariaq pì drah acaq, broq qmang aih dôq pì i padren, majah qmang aih dìq ka pì ùh i mòeq ngai leq ma hnhung mòeq hadrang xàc gàu. **35** Anoe qmang aih hi khoe, haq yōc bênh, manè apôi Boc plinh èh hi goh hu acaq. **36** Qmang aih, mangai leq mangai meh jah kan alòng, wì hi paran dabau acaq. **37** Dìq ka nhèn ma oe ta boang jah baiq hrinh tapèh jàt tadràu ngai. **38** Jò khoe panàc dìq jaq, wì caqnìh dōng dahwèq acaq ta diac dôq boang pi hìaq trap. **39** Jò tröc hi qngah, wì ùh canau ka rađeh oe ta taneh leq, mahaq hnoq wình i braih ta kenh, wì hatinh ka dabau tàng jah chaq trong qmùt boang ta aih. **40** Qmang aih wì hi kat caqnìh đac caxi kàt boang tadiac raxìq, lêh caxi wì ma kàt long loeq boang, hi khoe ka aih caqnìh bai boang dôq cayeo hlui boang tòc tago. **41** Mahaq boang cadàu glàm ataq nòe diac ma daxrùp, boang hi hlac, mùh haq hatàp ta braih pi jah tadroq, diac lai laq dêh tep ta cloh boang padah padech dōng. **42** Bìa lình enh jêh đac dōng mangai tù, majah qmang aih yùq i mangai ma loq glài èh wì loq claih. **43** Mahaq mangai cla cwan lình, enh wèq Phaulô, dài haq majah tát đac trong aih. Haq thê dìq ka mangai leq loq glài aih chônh hadrùc ta diac hu glài mùt tago, **44** mangai ma qnoeq aih capùng ka capiac long ban, ka hanech boang. Qmang aih rìm ngai jah tòc tago ka catèm.

28 Jò khoe jah tòc tago ka catèm qmang aih, nhèn men loq pleo aih yiniq haq Manta. **2** Mangai ta pleo aih đìh nhèn joq laq alàng joq qnàng. Wì haq baxù tanùh ùnh, pachùh dìq ka nhèn qnhìa majah qmang aih tröc mè rai tanget. **3** Phaulô yōc moeq ha-om ra-ùnh tah ta tanùh, i

moeq toq bìh plöng, loh enh ra-ùnh tôq aih ɓuban tì haq.
4 Mangai ta pleo aih hnoq bìh kap atua ta kǒng Phaulô, wì doe ka dabau “Mangai kô joq mangai jêh mangai joq qnàng, hacô yac ka khoe jah dèch enh diac raxìq, mahaq tröc ma taq atoq dua ùh rong haq rìh”. **5** Mahaq Phaulô da arêh bìh aih clìh ta ùnh, cla haq ùh i troq cleq. **6** Wì hèm kǒng haq aih èh đíc tablù cadeh, tàng ùh meh diq tacro taqneq cachìt hloe, mahaq gòm khoe dùnh ùh i hnoq haq troq cleq, ta manoh wì hèm trong qnoeq hòm, wì doe ka haq kan kiac. **7** Ten aih i đùng ruàng da Bupliu, cla craq pleo aih, haq aih đìh nhèn mùt deh ta hnim, qmi nhèn acaq piq hì. **8** Baq haq ùh hröc ta aniang, rai tacat rai jìq cliac keo. Phaulô mùt tìn haq, khoe ka waiq khàn yöc tì bèq chac haq đòeq broq brêh ka haq. **9** Hnoq qmang aih, bài mangai ùh hröc ta aih đìq trùh ti Phaulô, đìq ka wì hadai jah brêh. **10** Wì loq ta- iu nhèn báç trong, trùh jò padon lam, wì palauq am ka nhèn báç dahwèq nhèn ma nhet ka waq. **11** Piq khê atìq ka aih, nhèn tòc boang trùh enh Alecxantri, jò ralim boang kô khoe oe ta pleo aih, yiniq boang kô Đîôkua. **12** Trùh ta Sira-cuso, nhèn oe tacô piq hì. **13** Enh aih, nhèn boe tiaq roc haqmai diac raxìq Siliso, trùh ta Rêgium. Hì da èh rameh, i cayêu enh pah qma mat mahì loh hlui dêh, dài haq baiq hì hòm nhèn hi trùh ta Buxôlo. **14** Ta aih, bài oh daq pachùh nhèn oe ti wì tapèh hì, khoe aih nhèn hi trùh ta Rôma. **15** Oh daq ta aih hìa nhèn trùh, enh nòe hangai wì haq lam trùh ta Phôrum Abiu lam ajang nòe Piq Hnim đòeq hu đìh nhèn. Bu hnoq oh daq, Phaulô manè apôi Boc Plình, manoh haq jah tam kan cajap. **16** Jò nhèn trùh ta Rôma,

wì am Phaulô jah oe crài, i mòeq ngai lình wèq haq. **17**
Piq hì atìq ka aih, haq creo ka bài gucraq mangai Juđa
trùh tagop ti haq, jò wì khoe trùh haq doe: “Oh daq au.
Yac ka au qnhòq lah broq cleq đòeq tablêq hlài ka mangai
bèn, broq cleq ma pagau hlài ka trong ranenh rìh acaq da
kan boc yaq bèn, mahaq ta Jérusalem wì rùp au am ka
mangai Rôma. **18** Wì aih khoe hadrah ngan au, wì enh
caqnaih au, majah qmang aih au ùh lòm i broq qmòe
yiniq lui cleq ma troq ka cachìt. **19** Mahaq mangai Juđa
ùh waq qmang aih, dài au majah dang trùh ta Sêsa, ùh
xài au enh tah hadrah ka mangai bèn. **20** Dài aih raq, au
majah enh glàm đeh pì oh daq đòeq hu anoe đeh ka pì,
taiq kan tangèh da mangai Isorali au majah ep bac wê
caxi datoeq kô”. **21** Wì aih tèu bàu: “Nhèn qnhòq i hnoq
moeq araq jàiq leq enh Juđê trùh ta nhèn, ùh i cabô lam
anoe cleq ka nhèn, èh hadai ùh i mangai leq capoch qmèq
cleq ka ìh. **22** Mahaq nhèn enh jah loq ìh hèm qmang leq,
majah qmang aih nhèn loq đìq ka mangai oe taleq tameh
qnang tablêq ka đaoq kô”. **23** Khoe tanap hì ka haq, wì
bàc ngai trùh tanòe haq oe, enh sroeh sroq trùh clam,
haq toq anoe patô rai hnài wì loq ka diac Boc Plình, yōc
enh ranenh Môise xam bài pajàu đòeq hu àu waq ka wì
lùi Chuaq Jesus. **24** I mangai lùi bàu haq anoe, i ngai ùh
lùi. **25** Pi mòeq manoh ka dabau wì hi loh hlài, dài qmang
aih Phaulô capoch tam bàu kô: “Bàu Yeang Hadròeh khoe
anoe joq troq, jò haq canòm ka pajàu Êsai đòeq hu doe
ka boc yaq pì **26** Drah trùh nòe bài mangai kô đòeq hu
doe: Pì yōc don tamàng mahaq ùh qnì tàng cleq; Yōc mat
ngan mahaq ùh hnoq cleq. **27** Majah qmang aih, wì haq

khoe trap manoh; Wì caxet don, Caqnhip clong mat. Yùq
deh mat loq hnoq, Don cla loq tàng, Manoh loq hèm, Wì
wìh hlài Èh Au loq broq ka wì jah brêh qmòh. **28** Qmang
aih, au enh pì loq kan dèch dech da Boc Plình khoe aràng
am ka mangai diac wì, wì aih èh ma tamàng, **29** Khoe ka
Phaulô capoch qmang aih, mangai Juđa loh enh gùng rai
tarahen ka dabau oe i jaq cleq. **30** Phaulô oe wop baiq
hanam, ta hnim haq ma clìh ka bac đòeq hu oe đò. Haq
đìh đìq dǒng mangai leq lam glàm haq. **31** Haq cajap
manoh đòeq anoe ka wì diac Boc Plình, hnài wì loq ka
Chuaq Jesus Christ, pi oe i cabô khech tàt hòm.

RÔMA

1 Phaulô hapõng da Jesus Christ, khoe jah creo broq mangai Tiaq cla, khoe jah lah đõeq crài hu anoe Bàu lem da Boc Plình, **2** aih Bàu lem enh nèh raq Boc Plình khoe tèu adroe ajang wì pajàu ta hset hadròeh, **3** ràu trùh kon da haq, tiaq xech akia aih hauang loh enh nang noe bùa Đawit, **4** tiaq yiang da kan hadròeh, taiq haq khoe rìh hlài enh kan cachìt, aih ma khoe jah nhìn haq joq kon Boc Plình i cwìang i tai, aih raq Chuaq Jesus Christ, Chuaq da bèn, **5** canòm ka haq xam yiniq haq aih, nhèn ma khoe jah waq kan tabàih dech, jah broq mangai tiaq cla, đõeq creo dìq ka mangai rìm diac qnoeq trùh ajang kan loq iu da manoh lùi, **6** ta bài mangai aih, oh daq hanoh khoe jah creo enh cla Chuaq Jesus Christ; **7** gòe dìq ka mangai Boc Plình ma loq waq deh oe ta Rôma, jah creo broq mangai hadròeh. Waiq dìq ka oh daq jah waq kan tabàih dech, jah kan catèm enh Boc Plình, aih Baq bèn, xam enh nòe Chuaq Jesus Christ! **8** Adroe dìq dõng aih, canòm ka Chuaq Jesus Christ, au manè apôi Boc Plình majah qmang aih manoh lùi da oh daq khoe jah anoe hlài jàp jìa ta crõng taneh. **9** Boc Plình au ma patìh dìq dèh ka manoh ti ajang anòe au ma anoe Bàu lem da kon haq, hadai wiang panhìn au ùh lah hêq ka ràu trùh oh daq. **10** Rìm yàng jò au waiq khàn, au waiq khàn tàng ùh manõeq kô dua hì atìq èh tiaq manoh Boc Plình, pèh am trong au jah trùh ta oh daq. **11** Joq qmang aih, au toq tangèh jah trùh hmàih ka oh daq, đõeq hadai jah pajùm kan tabàih yiang ti oh daq, dôq oh daq rai èh rai cajap, **12** aih iq, au oe qne oh daq, đõeq hadai bèn wiang

parông manoh dabau jah tadêh pajùm ta manoh lùi bèn, aih manoh lùi da oh daq xam da au. **13** Au ùh enh dôq oh daq ùh qnì, bắc yàng au khoe padon lam hmàih ka oh daq đòeq hu jah wiang git plì ti oh daq xam mangai diac wì mahaq i kan khech tát au trùh manðeq. **14** Au pòq dòeh mangai GOREC xam mangai ùh xài mangai GOREC, mangai rabiaq xam mangai blùng. **15** Aih ìq dài au majah toq enh anoe BÀU lem am ka pì oh daq, aih mangai ma rìh oe ta RÔMA. **16** Joq au ùh camaih ka BÀU lem majah qmang aih, aih raq kan itai da Boc Plình đòeq dèch rìm ngai ma i manoh lùi, adroe aih ka mangai Juđa atìq aih ka mangai GOREC; **17** Majah qmang aih, enh dalam ka BÀU lem kô khoe mahnu kan taq atoq da Boc Plình, xi manoh lùi men jah, èh ajèn trùh ta kan lùi hòm, qmang ka bàu ma khoe achìh: “Mangai taq atoq rìh xi manoh lùi”. **18** Qmang aih, kan nòeh da Boc Plình khoe mahnu enh plình tablêq hlài ka rìm trong ùh qnì iu yùq xam kan ùh taq atoq da bài mangai yōc kan ùh taq atoq đòeq padit trong joq qnàng. **19** Majah qmang aih, yiniq cleq hu dôq wì jah loq ka Boc Plình, dìq khoe paqnoh ka wì, Boc Plình khoe patô ka wì, **20** majah qmang aih kan geo da haq mat bèn ùh xau hnoq, aih la kan itai mòeq đòe xam manoh haq, enh jò baxèm broq plình crõng taneh khoe dayinh qmòe tìah ka mat hnoq, jò wì ti ngan yiniq broq da haq. Aih ìq dài wì ma pi jah aclai rađeh, (aüdios g126) **21** majah qmang aih yac ka wì loq ka Boc Plình mahaq wì ùh waq broq qngah yiniq haq aih Boc Plình, èh hadai ùh waq manè apôi haq, ti tiaq toq trong ùh loh cleq xam manoh blùng bình toq kan clam cluiq. **22** Wì doe đeh rabiaq,

mahaq loh ka ratùt. **23** Wì haq khoe halìh kan ranhòm ùh lùch da Boc Plình yōc radua qmù loq hnhung lùch da kon mangai, da chìm, da ngè rìh tagùng, da ngè loq moq ta taneh. **24** Aih ìq, Boc Plình majah dôq da wì haq chìh deh ta kan amùa qmang ka manoh cla wì haq ma enh, loh qmòe ka broq kan camaih hloe deh ka chac cla. **25** Wì haq halìh trong joq qnàng da Boc Plình, đòeq yoc kan amòng, kùh waiq rai patìh ka bài ngè Boc Plình ma broq loh, ùh kùh waiq Boc Plình ma broq loh bài ngè aih, aih Boc Plình bèn ma khòh manè apôi mòeq đòe! Amen. (aiōn g165) **26** Taiq ajang raq Boc Plình majah hi dôq da wì haq tiaq trong tango anang jiàng ka camaih, taqne wì haq, gucadri pi rìh hatiaq ma troq trong, wìh tiaq trong ùh troq. **27** Gucalô hadai qmang aih cađac trong gucadri gucalô, tiaq trong ùh troq aih toq ti enh ka dabau, hadai gucalô aih waq ka dabau, èh cla wì haq hi ep pòq dèh kan baxa aih. **28** Ùh hnau ka aih hòm, pàng wì haq ùh nhet chaq canau ka Boc Plình, aih ìq Boc Plình majah cađac wì tiaq dèh manoh ùh wìa, đòeq broq toq trong ùh loh cleq. **29** Wì bình toq kan ùh taq atoq, kan đùc, kan plai, ratauq, toq kan tagit, jêh đac mangai, talech, loq qnùt, loq nòeh; **30** tapoch dech, tapoch qmèq ka dabau, git ka Boc Plình, da hadiac, padèch rađeh, catèh, rabiaq trong dù, ùh iu bàu miq baq; **31** blùng, ùh qnì wèq dèh bàu, ùh qnì tamèt, ùh i manoh loq waq. **32** Yac ka wì loq ka Boc Plình taq atoq i doe: mangai leq broq bài yiniq qmang aih troq ka cachìt, aleq ma xài toq wì haq broq hi hêq, mahaq wì ti baxrùq tam mangai qnoeq broq qmang aih diq.

2 Qmang aih, ìh qmat mangai ma toq ti tah hadarah tau, yac ka ìh qmat cabô ùh dèh, waq toq ìh hi hadrah mangai qnoeq aih èh ìh pi jah cwaih rađeh hòm, majah qmang aih jò ìh tah hadrah ka wì qnoeq, aih ìh hadai tah hadrah ka cla rađeh, ìh tah hadrah ka wì mahaq cla ìh hadai broq qmang ka wì. **3** Manđeq kô, bèn loq kan hadrah da Boc Plình am ka bài mangai broq yiniq qmang aih, aih joq troq tiaq bàu joq qnàng. **4** Wùih! mangai ma toq ti hadrah ka bài mangai broq qmang aih, mahaq cla hadai broq ùh troq, pì loq xoh cla pì claih ka kan hadrah enh Boc Plình qmòh? **5** Ahìaq ìh ùh dèh dèm đac kan loq waq bình halùih, kan loq àt, kan ùh manaq da haq, loh ka pi qnì canau kan loq waq da Boc Plình ma aràng ìh trùh ajang kan loq raxach ùh xài? **6** Taiq manoh ìh cadoq, ùh raxach, aih ìh chàu pabình đòeq ka rađeh kan nòeh ta hì mahau atìq kô èh, jò kan hadrah taq atoq da Boc Plình mahi trùh, **7** jò aih, Boc Plình hi am hlài da tang ngai tiaq tang yiniq wì ma broq: **8** Mangai leq cajap manoh broq trong lem, chaq kan qngah, kan ranhòm xam kan ùh hìaq loq lùch. Boc Plình am ka wì kan rìh halinh mòeq đòe; (*aiōnios g166*) **9** mangai leq i manoh toq àu tablêq, ùh tiaq trong joq qnàng, mahaq iu tiaq kan ùh taq atoq, aih èh Boc plình patem ka wì kan nòeh xam kan mahau. **10** Kan ùh catèm kan nanxa ka mangai broq dù, adroe aih ka mangai Juđa, khoe aih ka mangai Gorec; **11** mahaq kan qngah, kan ranhòm, xam kan catèm am ka rìm ngai broq lem, adroe aih ka mangai Juđa atìq aih ka mangai Gorec. **12** Majah qmang aih, Boc Plình ùh loq waq ka apah. **13** Mangai leq broq yiniq lui, yac ka haq ùh qnì

ka ranenh haq aih dua hnhung lùch, magai leq loq ka ranenh mahaq broq yiniq lui, aih èh ep đòeq da ranenh hadrah haq; **13** majah qmang aih ùh xài mangai leq tàng đõc ranenh aih hi wìa mangai taq atoq enh ngèa Boc Plình, mahaq mangai ma broq tiaq ranenh aih majah broq mangai taq atoq. **14** Ma joq qnàng, mangai diac wì ùh i đeh ka ranenh Môise, jò wì haq broq đeh trong ranenh ma thê, bài mangai aih yac ka ùh i ka ranenh, dua khoe broq ka rađeh i ranenh. **15** Wì haq patô qnoh trong ranenh ma thê aih khoe achìh đeh ta manoh cliac wì haq: Manoh da cla panhìn am ka ranenh, gàu ngoc da cla i jò bahmàng i jò palem deh cla. **16** Aih la bài yiniq padon trùh ta hì da Boc Plình enh dalam ka Chuaq Jesus Christ hu hadrah kan hlèp ta manoh kon mangai, wop qmang ka Bàu lem au ma khoe anoe. **17** Manđeq, ìh doe rađeh kô mangai Juđa, kùi padài enh qnhèq ka ranenh, catèh đeh loq ka Boc Plình, **18** loq ka manoh haq, canau trong leq troq, trong leq ùh, majah qmang aih ranenh khoe hnài ìh; **19** catèh đeh broq mangai ajèn trong ka mangai lua mat, broq kan qngah ka mangai oe ta clam, **20** broq mangai hnài bài mangai blùng, bài mangai qnhòq gêh manoh, majah qmang aih ta hset ranenh i kan rabiaq xam trong joq qnàng, **21** qmang aih ìh hnài mangai qnoeq mahaq ùh hnài cla rađeh qmoh? ìh hnài apaq atùng, mahaq ìh atùng! **22** ìh doe: ùh khòh tango, mahaq ìh tango! ìh git ramòt ka bài radua qmù, mahaq ìh blah yõc da haq dahwèq. **23** ìh hnhè rađeh wèq tiaq ranenh, mahaq ìh ùh broq tiaq ranenh, dài aih raq ìh ma khoe broq kan xep ka Boc Plình! **24** Taiq pì raq, wì mangai enh gùng

majah tapoch qmèq ka yiniq Boc plinh, tìah qmang ka bàu ma khoe achìh. **25** Joq! tàng pì broq tiaq ranenh, ramènh kat akia aih ùh hìaq ngwan, mahaq tàng pì broq ùh troq tiaq ranenh, yac ka pì broq ramènh kat akia aih bu diang ùh. **26** Qmang aih, tàng mangai qnhòq broq ramènh kat akia wèq tiaq bàu ranenh hnài, aih ma ùh tìah ka khoe kat akia qmòh? **27** Mangai ùh broq ramènh kat akia, mahaq wèq gêh geo tiaq bàu ranenh, mangai aih èh ma hadrah bài pì, aih bài mangai yac ka i ranenh, i broq ramènh kat akia, mahaq ùh lênh broq tiaq ranenh. **28** Qmang aih mangai leq toq enh gùng haq broq mangai Juđa, aih ùh xài mangai Juđa, ramènh kat akia toq enh gùng, aih ùh xài ra mènh kat akia; **29** mahaq mangai Juđa ma joq qnàng aih mangai Juđa enh dalam, ramènh kat akia ma joq qnàng aih ramènh kat akia enh dalam xi Yiang hadròeh, ùh xài tiaq toq bàu achìh. Mangai Juđa qmang aih ma tajì ka manè, khòh jah padèch, ùh xài enh kon mangai mahaq enh Boc Plinh.

3 Tàng qmang aih kan yeo loe da mangai Juđa aih qmang leq, ùh meh ramènh kat akia ajah cleq? **2** Jah bac trong. Adroe aih rameh: Aih xài bàu Boc Plinh khoe am ka mangai Juđa. **3** Mahaq tàng ta wì aih i biaq ngai loq tablòq manoh ka Boc Plinh, kan loq blòq manoh da wì haq ahìaq broq ka kan ùh tablòq manoh cliac da Boc Plinh loh qngwan qngwaiq ùh? **4** Ùh i qmang aih! Boc Plinh aih joq qnàng, kon mangai kô ma loq qnùt, tìah ka khoe achìh “Wì jah creo ka ìh mangai taq atoq, jò ìh capoch, Jah blêq jò wì tah hadarah ka ìh”. **5** Mahaq tàng kan ùh taq atoq da bèn jah patô qnöh kan taq atoq da Boc

Plình, aih èh bèn anoe qmang leq? Boc Plình ma ùh taq atoq jò haq qnoph kan panòeh ka bèn qmòh? (Au capoch troeq wì ma dìh loq rahen) **6** Joq ùh lòm, tàng qmang aih èh Boc Plình hadrah crõng tneh kô qmang leq? **7** Mahaq tàng bàu joq qnàng da Boc Plình jah kan ranhòm haqnhèq ajang nòe bàu tapoch qnùt da au, aih hagleq au majah oe ep pòq kan hadrah tìah ka mangai broq yiniq lui? **8** Tàng qmang aih hagleq bèn ùh broq trong dù đòeq jah trong lem, tìah ka mangai loq patah khoe capoch dech ka nhèn doe nhèn hnài trong aih? Kan hadrah baxa taqmòq ka wì haq aih taq atoq. **9** Aih qmang leq, bèn i cleq ma yeo lem ka wì? Ùh lòm i, hacô bèn khoe anoe panhìn yac ka mangai Juđa yac mangai Gorec dìq oe enh qneq ka cwìang yiniq lui. **10** qmang ka khoe achìh: “Ùh i cabô taq atoq, yac ka mòeq ngai dua ùh, **11** Ùh i cabô i mamoh loq hèm, Ùh i cabô ti chaq Boc Plình. **12** Wì haq dìq khoe lam hwang, dìq khoe pi loh cleq; Ùh i mòeq ngai broq trong lem, yac ka mòeq ngai dua ùh. **13** Hõng wì haq da hah tìah ka ngah ralùng hanang; Yõc dèh rapet đòeq qnùt wì qnoeq; Blìa hacùng wì haq i nõc bìh tùa. **14** Hacùng wì haq toq nà hanip xam kan pagau. **15** Jènh wì haq darênh toq ka broq ta ùc mahim. **16** Trong lam da wì haq toq kan raliang xam nanxa, **17** Wì ùh lah qnì ka trong ma catèm. **18** Enh ngèa wì haq ùh i kan loq iu yùq Boc Plình. **19** Manòeq kô bèn loq, rìm yiniq ranenh ma anoe, aih anoe ka rìm ngai oe enh qneq ka ranenh, dôq rìm toq hacùng dìq ep caqnhìp, dìq ka phù cròng ep pòq yiniq lui enh ngèa Boc Plình; **20** majah qmang aih ùh i ka cabô broq tiaq ranenh ma jah creo ka haq aih taq atoq enh

ngèa Boc Plình, majah qmang aih ranenh patô dôq wì loq dèh ka yiniq lui. **21** Mahaq manðeq kô, kan taq atoq enh Boc Plình, Hset ranenh xam bài pajàu ma khoe wiang panhìn, khoe patô qnöh enh gùng ka ranenh: **22** Aih la kan taq atoq da Boc Plình oe ajang nòe bèn lùi Chuaq Jesus Christ, am dìq ka rìm ngai ma lùi. Ùh i cleq crài ka dabau, **23** majah qmang aih rìm ngai dìq khoe broq yiniq lui, khoe capòch ka kan ranhòm da Boc Plình, **24** mahaq canòm kan tabàih enh Boc Plình, wì jah dech kan taq atoq, majah qmang aih kan baxon hlài khoe jah broq gêh enh dalatm ka Chuaq Jesus Christ, **25** aih la Mangai Boc Plình khoe dèch haq broq ramènh baxon hlài, xi manoh lùi ta mahim haq aih, Boc Plình rangep ka kan panòeh, ajang aih haq paqnoh dèh kan taq atoq. Majah qmang aih, haq khoe caqnaih da wì yiniq lui ma broq enh nèh, **26** Haq khoe broq qmang aih đòeq taqnhòng kô haq patô đeh kô taq atoq đòeq creo ka mangai leq ma lùi Chuaq Jesus jah kan taq atoq. **27** Qmang aih, kan catèh oe jang leq? Pi i, khoe cađac, cađac ajang ranenh leq? Tiaq ranenh da yiniq broq? Ùh xài, mahaq tiaq ranenh da manoh lùi; **28** majah qmang aih bèn doe kon mangai jah kan taq toq ajang noè manoh lùi, ùh xài ajang broq tiaq ranenh. **29** Ahìaq Boc Plình aih Boc Plình toq da mangai Juđa? Ma ùh xài hadai Boc Plình da mangai diac wì diq? **30** Majah qmang aih i moèq Boc Plình raq, aih Yiang broq ka mangai kat akia jah taq atoq tiaq manoh lùi, hanoh broq ka mangai ùh kat akia jah kan taq atoq tiaq manoh lùi. **31** Tàng qmang aih, canòm ka manoh lùi bèn ka cađac

ranenh qmòh? Joq ùh lòm i qmang aih! Yeo hnau ka aih bèn broq ka ranenh jah cajap.

4 Qmang aih bèn anoe qmang leq Apraham cadraq bèn. Tiaq xech akia haq khoe jah lòeq cleq? **2** Joq qmang aih, tàng joq haq khoe jah kan taq atoq tiaq yiniq broq, aih i noè đòeq haq jah padèch rađeh, mahaq enh ngèa ka Boc Plình ùh xài qmang aih. **3** Majah qmang aih, Hset Hadròeh hnài cleq? Apraham lùi Boc Plình, bìac aih raq khoe broq ka haq jah kan taq atoq! **4** Manòeq kô mangai abroq, hliac jènh baha aih ùh xài kan tabàih, mahaq tìah ka dòeh, **5** mangai ma ùh dùh i broq qmòe cleq, mahaq lùi Boc Plình aih Yiang broq ka mangai pòq yiniq lui jah kan taq atoq, manoh lùi da haq aih majah creo ka haq aih taq atoq. **6** Đawit hanoh anoe qmang aih, jò haq ràu trùh xôq ramot ka mangai jah Boc Plình am ka haq kan taq atoq ùh tiaq trong yiniq abroq, rameh: **7** “Joq xôq ramot qnàng ka bài mangai lui haq jah caqnaih, Yiniq lui haq jah gahnàp! **8** Joq xôq ramot qnàng ka mangai Boc Plình pi arèn da haq yiniq lui”. **9** Bàu anoe trùh xôq ramot aih, ma anoe toq ka mangai ma kat akia qmòh? Hadai am ka mangai ma ùh kat akia. Majah qmang aih bèn doe ameh: Manoh lùi da Apraham khoe jah tình ka haq taq atoq. **10** Mahaq jah tình qmang leq? Atìq ka haq broq ramènh kat akia loq adore ka haq broq ramènh kat akia? Aih ùh xài atìq ka haq broq ramènh kat akia, mahaq adroe. **11** Qmang aih, haq khoe jah yōc teo xìt kat akia, tìah ka teo da kan taq atoq haq ma khoe jah dèh adroe xi manoh lùi, jò haq qnhòq broq ramènh kat akia, đòeq hu broq baq đìq dōng bài mangai lùi mahaq ùh broq ramènh kat akia,

dôq wì aih hadai jah kan taq atoq. **12** Èh hadai broq baq
bài mangai broq ramènh kat akia, aih baq da bài mangai
ùh xài toq kat akia hi hèq, mahaq hadai cadiang tiaq teo
manoh lùi manoh lùi da Apraham kan cadraq bèn, ma
khoe jah dèh adroe ka haq broq ramènh kat akia. **13**
Qmang aih, bàu ma tèu am ka Apraham xam nang noe
haq jah yōc dìq crōng taneh kô broq kùng hang, ùh xài
loh enh ranenh, mahaq loh enh kan taq atoq da manoh
lùi. **14** Majah qmang aih, tàng tiaq ranenh men jah kùng
hang, aih èh manoh lùi hi loh ka qngwan qngwaiq, bàu
tèu am hadai khoe cađac. **15** Majah qmang aih, ranenh
plôh loh toq kan panòeh, mahaq taleq ùh hìaq i ranenh,
ta aih hadai ùh i mangai broq ùh troq ka ranenh. **16**
Qmang aih, canòm ka manoh lùi kon mangai ma hi jah
waq kùng hang, bài yiniq aih dìq jah xi kan tabàih dech,
đòeq bàu tèu jah cajap ka nang noe Apraham, ùh xài
am toq ka nang noe oe enh qneq ka cwiang da ranenh,
mahaq hadai am ka nang noe i manoh lùi da Apraham,
kan cadraq bèn, **17** wop qmang ka bàu ma khoe achìh: Au
khoe dèch ìh broq baq bàc diac. Haq aih joq baq da bèn
oe enh ngèa ka Boc Plình, aih Mangai haq ma khoe lùi,
aih Boc Plình ma am kan rìh ka mangai cachìt, creo ka
bài yiniq qnhòq i tìah gleq khoe i. **18** Haq taqngèh gòm jò
pi qmòe ka dua hu gòm tangèh, mahaq dua haq lùi, aih
haq ma hijah wìa baq bàc diac, tiaq qmang ka bàu khoe
doe ka haq: “Nang noe ìh jah qmang aih èh”. **19** Haq hnoq
dèh chac khoe craq, majah qmang aih khoe ten hrinh
hanam, hnoq Sara pi oe jah ha-uang, mahaq manoh lùi
da haq dua ùh xùch. **20** Haq ùh lòm rangòt, hadai ùh hìaq

ùh tìn bàu Boc Plình, mahaq kan lùi haq èh rai dêh rai toq manè apôi Boc Plình. **21** Majah qmang aih haq lùi trong leq Boc Plình khoe tèu, Boc Plình i cwìang đòeq broq gêh trong aih. **22** Aih ìq, dài manoh lùi da haq khoe broq ka haq jah kan taq atoq. **23** Bàu ma doe: “Manoh lùi da haq khoe broq ka haq jah kan taq atoq”, aih ùh xài anoe toq ka mòeq ngai cla haq, **24** mahaq hadai anoe am ka bèn, manoh lùi hadai broq ka bèn jah kan taq atoq, majah qmang aih bèn lùi Boc Plình aih Mangai khoe broq ka Chuaq Jesus, Chuaq da bèn rìh hlài enh kan cachìt. **25** Taiq yiniq lui bèn wì rùp jêh đạc haq, haq rìh hlài đòeq broq ka bèn jah kan taq atoq.

5 Qmang aih patep pang jò khoe jah creo ka bèn mangai taq atoq tiaq manoh lùi, aih bèn khoe jah hatroq ti Boc Plình, canòm ka Chuaq Jesus Christ da bèn. **2** Aih Mangai broq ka bèn jah müt ta kan tabàih dech kô, aih raq kan tabàih ma broq ka bèn jah yòng cajap manòeq, èh bèn hadai catèh rađeh ajang nòe tangèh gòm kan ranhòm da Boc Plình. **3** Ma xài toq aih hi diq, bèn hadai catèh rađeh ta kan nanxa diq, majah qmang aih bèn loq kan nanxa men loh kan loq kèm, **4** kan loq kèm men loh kan qnhrang, kan qnhrang men loh kan tangèh. **5** Kan tangèh ùh broq ka bèn ep camaih xep, majah qmang aih kan loq waq da Boc Plình khoe pùc jàp ta manoh bèn xi Yiang Hadròeh ma khoe am ka bèn. **6** Joq qmang aih, jò bèn oe raq ùh nac canèn, tiaq troq dèh jò ma SaSt 17:5 SaSt 15:5 pajaq adroe, Christ khoe cachìt am ka mangai i yiniq lui. **7** Biaq ka i mangai chìuq cachìt am ka mangai taq atoq, dùnh dùnh ji loq i mangai cachìt am ka mangai lem. **8**

Mahaq Boc Plình mahno kan loq waq haq am ka bèn, jò bèn oe raq mangai i yiniq lui, aih Christ khoe cachìt am ka bèn. **9** Manðeq kô bèn khoe canòm ka mahim haq đòèq jah kan taq atoq, aih èh hadai canòm ka haq raq đòeq hu jah dèch claih khoe ka kan mahau kàn enh Boc Plình dàng leq hòm! **10** Majah qmang aih jò bèn oe raq tablêq ka Boc Plình, mahaq khoe jah hatroq hlài ka haq canòm ajang nòe kon haq khoe cachìt am ka bèn, loq ka manðeq kô jò khoe jah hatroq, bèn jah canòm kan rìh da Kon aih raq đòeq bèn jah dèch dàng leq hòm! **11** Ùh xài toq aih hi dìq, mahaq enh dalam ka Chuaq Jesus Christ bèn jah catèh raðeh ta Boc Plình, canòm ka haq aih bèn khoe jah hatroq ka Boc Plình. **12** Qmang aih, taiq mòeq ngai raq yiniq lui ma khoe mùt ta cröng taneh kô, taiq yiniq lui majah i kan cachìt, hadai qmang aih kan cachìt khoe trùh ta rìm ngai, majah qmang aih taiq rìm ngai dìq khoe i yiniq lui. **13** Majah qmang aih, adroe ka i ranenh, yiniq lui khoe i ta cröng taneh kô, mahaq qnhòq i ranenh, dài aih yiniq lui hadai qnhòq taqmòq ka cabô. **14** Hnoq anoe qmang aih, patep enh Aðam trùh ta Môise, rìm ngai dìq khoe oe enh qneq ka cwiang da kan cachìt, hloe xam mangai ùh broq đeh yiniq lui tiah ka yiniq lui da Aðam, aih mangai ma broq dua đòèq ka Mangai hu padon trùh. **15** Mahaq yiniq lui crài ka kan tabàih dech. Majah qmang aih, tàng joq taiq mòeq ngai raq ma broq yiniq lui mahaq mangai qnoeq ep cachìt ataq, loq ka kan loq waq da Boc Plình xam kan am dech da haq canòm ajang moèq ngai Chuaq Jesus khoe ùc bình halùih ka rìm ngai! **16** Èh hòm, kan am dech kô haq crài ka bìac loh enh

mòeq ngai ma broq yiniq lui: Mòeq yiniq lui raq, mahaq kan hadrah khoe taqmòq kan cachìt, mahaq da kan am dech aih: atìq ka jò yiniq lui khoe bac aih cadoe aràng am ka bèn kan taq atoq. **17** Majah qmang aih, tàng joq taiq yiniq lui da mòeq ngai raq kan cachìt khoe jah wèq cwìang enh mangai aih, loq ka bài mangai jah ùh dìq ùh dài kan tabàih enh Boc Plình xam kan am dech da kan taq atoq, wì haq jah canòm ka mòeq ngai Chuaq Jesus Christ đòeq jah cwìang ta kan rìh yeo hnau ka aih hòm! **18** Qmang aih, taiq mòeq yiniq lui raq kan hadrah baxa khoe taqmòq ka rìm ngai qmang leq, hadai qmang aih mòeq ngai raq broq taq atoq, kan taq atoq aih am kan rìh hadai jàp ka rìm ngai. **19** Majah qmang aih, taiq kan ùh iu da moèq raq, dài mangai qnoeq dìq loh döng đeh mangai i tuiq, hadai qmang aih diq, taiq kan loq iu da mòeq ngai raq dài mangai qnoeq dìq loh döng mangai taq atoq. **20** Ranenh khoe plah rađeh taqne, dôq yiniq lui èh rai bac, mahaq taleq yiniq lui khoe rai bac, ta aih kan tabàih dech bac yeo hnau hòm, **21** qmang aih, yiniq lui wèq cwìang ta kan cahìt qmang leq, kan tabàih dech wèq cwìang ta kan taq atoq hanoh qmang aih đòeq hu am kan rìh halinh mòeq đòe enh dalam ka Jesus Christ aih Chuaq bèn. (aiōnios g166)

6 Qmang aih bèn oe anoe qmang leq hòm? Ajoq bèn oe catàm yôt ta yiniq lui dôq kan tabàih dech jah ùh dìq ùh dài qmòh? **2** Ùh lòm qmang aih, bèn khoe cachìt ka yiniq lui, ji laiq bèn ma oe rìh ta yiniq lui hòm? **3** Ahiaq oh daq ùh qnì, dìq döng ka bèn khoe jah baptém enh dalam ka Chuaq Jesus Christ, aih baptém enh dalam kan cachìt da

haq qmòh? **4** Bèn khoe jah catùh ti haq xi baptem enh dalam kan cachìt haq, đòeq tìah ka Chuaq Jesus Christ canòm kan ranhòm enh nòe Baq jah rìh hlài enh kan cachìt qmang leq, bèn hadai jah rìh hlài ta kan rìh maneo qmang aih. **5** Tàng joq bèn khoe pajùm mòeq ti haq ta kan cachìt qmang ka haq, aih èh joq qnàng bèn hadai jah pajùm mòeq ti haq ta kan rìh hlài tìah qmang ka haq: **6** majah qmang aih bèn loq kon mangai dùnh da bèn khoe jah tiang talong pagat ti haq, dôq chac ma patìh ka yiniq lui kô jah lùch đac döng, aih èh bèn pi ep broq hapöng ka yiniq lui hòm. **7** Majah qmang aih, mangai leq khoe cachìt haq aih khoe jah claih ka yiniq lui. **8** Manoèq kô, tàng joq bèn khoe cachìt ti Christ, bèn loq aih èh rađeh hadai jah rìh hlài ti haq, **9** majah qmang aih bèn loq, pang jò Chuaq Jesus Christ khoe rìh hlài enh kan cachìt, haq pi cachìt hòm, kan cachìt pi i cwìang cleq enh qnhèq ka haq hòm. **10** Haq cachìt aih cachìt ka yiniq lui, cachìt moèq yàng am ka dìq döng, mahaq manòeq kô haq rìh aih rìh ka Boc Plình. **11** Hadai qmang aih diq, oh daq drah ngan rađeh hadai khoe cachìt ka yiniq lui mahaq rìh ka Boc Plình enh dalam ka Chuaq Jesus Christ. **12** Apaq dôq yiniq lui oe i cwìang cleq ta chac hamac ma loq cachìt da oh daq, apaq tiaq trong haq ma ònh. **13** Apaq dèch chac hamac cla am ka yiniq lui, đòèq broq ranac patìh ka kan dù, mahaq drah dèch chac cla oh daq ka Boc Plình qmang ka mangai khoe cachìt mahaq manòeq kô khoe rìh hlài, dèch rìm yiniq ta chac cla am ka Boc Plình đòèq broq ranac patìh am ka kan taq atoq. **14** Majah qmang aih yiniq lui ùh i cwìang cleq ta oh daq; taiq oh daq pi i

oe enh qneq ka ranenh mahaq oe enh qneq kan tabàih dech. **15** Khoe aih qmang leq! Taiq bèn pi oe enh qneq ka ranenh, mahaq oe enh qneq ka kan tabàih dech aih èh bèn khòh broq yiniq lui qmòh? Ùh qmang aih! **16** Oh daq ma ùh loq! tàng joq oh daq khoe dèch cla rađeh đoèq hu iu tiaq cabô, aih axài broq dìc mangai bèn ma iu, broq dìc da yiniq lui ajèn trùh ta kan cachìt loq broq dìc da kan loq iu đoèq hujah kan taq atoq? **17** Mahaq manè apôi Boc Plinh, majah qmang aih atìq ka oh daq broq dìc ka yiniq lui, mahaq manòeq kô khoe dìq ka manoh wìh hlài iu tiaq Trong ma khoe hnài đòeq broq maneh ka rađeh! **18** Qmang aih oh daq khoe claih enh yiniq lui, khoe jah wìa hapöng kan taq atoq. **19** Au anoe troeq bàu wì maloq doe, majah qmang aih kon mangai da oh daq ùh i nèn cleq. Qmang aih oh daq khoe hmaq đoèq dèh chac hamac broq hapöng dìc kan amùa ratauq broq dù qmang leq, manòeq kô oh daq hadai dèch dèh chac broq hapöng kan taq atoq qmang aih diq. **20** Jò oh daq oe raq broq dìc ka yiniq lui, oh daq ùh i tawac cleq ka trong taq atoq. **21** Aih oh daq jah cleq? Ajoq manòeq kô oh daq jah toq kan camaih, majah qmang aih pulùch da bài yiniq aih xài kan cachìt. **22** Mahaq manòeq kô oh daq khoe jah claih enh yiniq lui khoe jah wìa hapöng Boc plinh, aih oh daq jah yōc ka rađeh kan hadròeh đòeq pulùch èh jah kan rìh halinh moèq đòe. (aiōnios g166) **23** Majah qmang kan baha da yiniq lui aih kan cachìt, mahaq kan am dech enh Boc Plinh aih kan rìh halinh enh dalam ka Chuaq Jesus Christ, Chuaq da bèn. (aiōnios g166)

7 Oh daq ma ùh loq (Au doe ka mangai ma loq ka ranenh)
ranenh i cwìang toq jò mangai oe rìh qmòh? **2** Tìah ka
gucadrì i ǒng, waq toq ǒng haq oe rìh pang leq, ranenh
panan haq tiaq deh ǒng pang aih, mahaq tàng ǒng haq
cachìt haq jah claih enh ranenh ma khoe kàt haq ti ǒng.
3 Qmang aih, tàng joq ǒng haq oe rìh, mai haq lam yōc
mangai qnoeq, aih ep creo ka haq mangai gucadrì tango,
mahaq tàng joq ǒng haq khoe cachìt, aih haq khoe claih
ka ranenh, yac ka haq yōc mangai qnoeq, haq ùh xài
mangai tango. **4** Yôiq oh daq da au! oh daq hanoh qmang
aih, xam chac da Christ oh daq hadai khoe cachìt ka
ranenh, đòeq hu jah yōc mangai qnoeq, aih mangai ma
khoe rìh hlài enh kan cachìt, dôq bèn jah loh plì ka Boc
Plình. **5** Majah qmang aih jò bèn oe rìh tiaq kan loq
ònhanh da xech akia nèh, ranenh khoe parèu bài kan qmèq
tabroq ta chac bèn dôq loh plì ta kan cachìt. **6** Mahaq
manðeq kô tiaq ranenh ma xan rùp padràng yôt bèn, bèn
khoe cachìt, bèn khoe jah claih khoe ka ranenh, đòeq hu
patìh ka Boc Plình tiaq trong neo da Yiang Hadròeh, pi
oe tiaq trong dùnh da bàu achìh. **7** Qmang aih bèn oe
anoe cleq hòm? Ranenh aih ìq yiniq lui qmòh? Joq ùh
lòm i qmang aih! Mahaq taiq ranenh au men jah loq dèh
ka yiniq lui, tàng joq ranenh ùh doe: “Ìh ùh khòh daiq”,
aih au khoe ùh qnì ka kan daiq. **8** Aih ìq, yiniq lui khoe
dahôiq ajang ranenh đòeq xêh qnoh bài kan loq ònh daiq
ta cliac au: Ùh hìaq i ranenh, aih yiniq lui cachìt. **9** Nèh
haq, qnhòq i ranenh aih au rìh, yàng jò ranenh hi trùh
aih yiniq lui rìh, au loh ka cachìt glòq hòm. **10** Au ma hi
hnoq, lêh gêh haq ranenh đòeq broq ka au rìh, cadoe tìc

aràng au trùh ta kan cachìt. **11** Majah qmang aih yiniq lui khoe dahôn yōc ranenh đoèq hu padô au, ti ajang aih raq au majah cachìt. **12** Qmang aih, ranenh aih hadròeh, bàu thê hanoh hadròeh, dìq lem rai taq atoq. **13** Wùih kan lem qmang aih khoe loh nen dôq au cachìt qmòh? Ùh lòm i qmang aih! Mahaq yiniq lui ma khoe broq ka au cachìt, haq yōc kan lem broq au cachìt, đòeq haq jah patô rađeh aih yiniq lui, aih ìq yiniq lui cachàt ajang ranenh majah loh ka xòc dìq jaq. **14** Bèn loq ranenh aih yiang, mahaq manoh da au kô aih xech akia, khoe tech đoèq broq dìc ka yiniq lui. **15** Majah qmang aih, au ùh qnì đeh broq cleq: Au ùh lòm broq trong cla ma enh, mahaq broq toq trong cla ma git. **16** Mahaq tàng au broq trong au ma git, aih au canau loq ranenh joq qnàng lem. **17** Jò aih au mahi loq, ùh xài au broq bài yiniq aih, mahaq yiniq lui rìh oe enh dalam ka au. **18** Au loq kan lem ùh oe ta au, aih ìq rameh: haq ùh oe ta manoh au, majah qmang aih au enh broq trong lem mahaq ùh hlàt broq ka gêh; **19** au ùh broq trong lem au ma enh, mahaq broq trong qmèq cla ma ùh enh. **20** Manòeq kô tàng joq au broq trong au ùh enh, aih pi xài au broq mahaq yiniq lui ma rìh oe enh dalam ka au ma broq trong aih. **21** Qmang aih au hnoq i ranenh kô enh dalam ka au: Jò au enh broq trong lem, kan qmèq hatiaq hloe au jò aih raq. **22** Majah qmang aih tiaq kon mangai enh dalam, au lem bùi ka ranenh Boc Plinh; **23** mahaq au loq dèh ta chac i mòeq ranenh qnoeq tablêq ka ranenh ta gàu au, panan thê au broq hapõng ranenh da yiniq lui, aih ranenh ma qnang tabroq ta chac au. **24** Joq habô ka au! Cabô mahu dèch au claih khoe ka chac hamac

loq cachìt kô èh? **25** Manè apôi Boc Plình, canòm ka Chuaq Jesus Christ, aih Chuaq da bèn! Qmang aih, cla au yōc dèh gàu ngoc patìh ka ranenh da Boc Plình, mahaq xech akia au broq hapõng dìc ka ranenh da yiniq lui.

8 Qmang aih, manòeq kô khoe pi i kan hadrah ka mangai oe ta Chuaq Jesus Christ; **2** majah qmang aih ranenh da Yiang Hadròeh kan rìh khoe canòm ka Chuaq Jesus Christ đòeq caqnaih au loh khoe ka ranenh da yiniq lui xam kan cachìt. **3** Majah qmang aih yiniq cleq ranenh ma ùh hlàt broq, taiq xech akia broq ka ranenh loh ka pi nèn, aih Boc Plình khoe broq: Taiq yiniq lui haq majah khoe thê dèh kon yōc xech akia qmang ka xech akia yiniq lui da bèn, èh khoe hadrah yiniq lui ta xech akia aih, **4** dôq kan taq atoq da ranenh ma panan broq jah gêh enh dalam bèn, aih la bài mangai ma ùh tiaq dua da xech akia mahaq tiaq dua da Yiang Hadròeh. **5** Mangai rìh tiaq xech akia gàu ngoc wì haq haqmiang chaq toq trong xech akia ma enh, mangai rìh tiaq Yiang Hadròeh manoh haq haqmiang chaq toq trong da Yiang Hadròeh. **6** Chaq toq trong da xech akia enh aih èh loh kan cachìt, chaq trong Yiang Ha droèh aih èh loh kan rìh xam kan catèm. **7** Majah qmang aih haqmiang chaq toq trong da xech akia aih tablêq hlài ka Boc Plình, majah qmang aih haq ùh tiaq ranenh da Boc Plình, yeo hnau ka aih hòm haq tiaq ùh jah. **8** Bài mangai rìh tiaq xech akia, ùh jò leq lem ka manoh Boc Plình. **9** Hnoq anoe qmang aih, tàng joq Yiang Hadròeh da Boc Plình rìh oe enh dalam oh daq, oh daq ùh rìh tiaq xech akia hòm mahaq rìh tiaq Yiang Hadròeh, tàng cabô ùh i ka Yiang Hadròeh da Christ, aih

ùh xài mangai da haq. **10** Qmang aih, tàng joq Christ oe enh dalam oh daq, yac ka chac oh daq cachìt ka yiniq lui, mahaq yiang aih rìh taiq kan taq atoq. **11** Èh hòm, tàng joq Yiang da Boc Plình ma khoe broq ka Chuaq Jesus rìh hlài enh kan cachìt oe ti oh daq. Haq ma broq ka Chuaq Jesus rìh hlài enh kan cachìt aih hadai canòm ka Yiang da haq ma oe ta dalam oh daq đòèq broq ka chac mac ma loq cachìt da oh daq jah rìh hlài. **12** Qmang aih, dìq ka oh daq bèn pi oe pòq doèh xech akia đòeq hu rìh tiaq haq. **13** Joq qmang aih, tàng joq oh daq rìh tiaq xech akia, aih èh ep cachìt, mahaq tàng canòm ka Yiang Hadroèh đòeq haq broq cachìt döng bài kan qmèq da chac hamac aih èh oh daq rìh. **14** Majah qmang aih, dìq döng mangai leq i Yiang Hadròeh da Boc Plình qnung trong, aih dìq kon Boc Plình. **15** Yiang Hadròeh oh daq ma khoe jah aih ùh dôq oh daq broq hapõng dìc đòeq rìh ta kan yùq crè hòm, mahaq khoe am ka oh daq jah i manoh da kon ban, canòm ajang aih bèn mahi jah creo: “Aba- Baq!” **16** Yiang Hadròeh raq ma khoe panhìn ta manoh bèn loq đeh kô kon Boc Plình. **17** Manoèq kô, tàng joq bèn kon Boc Plình, aih bèn hadai mangai wiang jah kùng hang. Mangai wiang jah kùng hang enh Boc Plình, mangai wiang jah kùng hang ti Christ, waq toq bèn hadai wiang nanxa ti haq, aih èh bèn hadai wiang jah kan ranhòm ti haq. **18** Au hèm, kan nanxa manòeq kô ùh tajì đòèq hu tawêh ti kan ranhòm padon trùh ta bla èh, aih la bài kan ranhòm hu padon qnoph am ka bèn. **19** Joq qnàng qmang aih, rìm yiniq dìq toq tangèh gòm hnoq bài kon Boc Plình jah paqnoh. **20** Majah qmang aih, rìm yiniq

Boc Plình broq loh dìq khoe oe enh qneq ka kan cachìt lùch, ùh xài cla enh qmang aih mahaq enh Mangai ma broq loh bài yiniq aih. **21** Rìm yiniq khoe jah broq loh aih hadai tangèh ka rađeh jah dèch claih khoe ka kan cachìt lùch, đoèq hu hanoh jah oe ta kan ranhòm ti kon Boc Plình. **22** Bèn loq rìm yiniq hadai toq hràng xalep trùh manđeq; **23** ùh xài toq bài ngè khoe jah broq loh aih, mahaq xam bài bèn aih bài mangai ma i plì ramua da Yiang Hadròeh, hadai hràng ta manoh cliac, jò bèn qnang gòm đòeq hu jah broq kon ban, aih la kan baxon hlài chac hamac bèn. **24** Ta kan tangèh gòm kô raq bèn ma khoe jah dèch, jò wì khoe jah trong rađeh ma tangèh gòm, aih ma oe tangèh cleq hòm, bèn khoe jah hnoq aih oe tangèh gòm dèh hòm? **25** Mahaq tàng bèn tangèh yiniq đeh qnhòq hnoq, aih ajoq bèn gòm qmòe rai àt, **26** Hadai qmang aih, Yiang Hadròeh wiang da bèn trong ma ùh nèn. Bèn ùh qnì ka rađeh ep bòch cleq đòeq waiq khàn ka hatroq, mahaq Yiang Hadròeh yōc kan pi atêh hràng enh bèn đòeq hu waiq khàn am ka bèn. **27** Mangai ma sreo ta manoh mangai loq ka manoh Yiang Hadroèh, aih la tiaq manoh Boc Plình enh haq ma waiq khàn am ka bài kon da Boc Plình. **28** Bèn loq rìm yiniq Boc Plình ma broq aih dìq đoèq jah lòeq ka bài mangai loq waq ka haq, aih bài mangai haq ma khoe dì dèh adroe. **29** Majah qmang aih, mangai haq ma khoe loq dèh adroe, haq khoe ta qmroq đoèq hu jah tìah ka Kon Haq, dôq Kon aih jah broq Kon ramua oe taqne oh daq; **30** mangai haq ma khoe ta qmroq dèh adroe, aih haq khoe creo, mangai haq khoe creo, aih haq khoe doe dèh mangai taq atoq, mangai haq khoe doe

dèh taq atoq aih haq khoe broq dôq jah kan ranhòm. **31**
Khoe qmang aih bèn doe qmang leq? Tàng joq Boc Plình
wiang ti bèn, oe i cabô hu tablêq ka bèn? **32** Haq khoe ùh
adênh dèh Kon cla, mahaq khoe am dõng ka bèn, oe i
cleq hòm haq ma ùh am hloe ka bèn ajang Kon aih? **33**
Cabô ma aràng kan tah hadrah ka mangai Boc Plình ma
khoe ràih dèh? Boc Plình aih Mangai ma doe dèh wì aih
jah kan taq atoq. **34** Cabô ma taqmòq yiniq lui ka wì aih?
Ùh i ka cabô. Chuaq Jesus Christ aih Mangai khoe cachìt,
manoeq khoe rìh hlài, haq qnang haqngui enh qma Boc
Plình đòeq waiq khàn ka bèn. **35** Cabô jah lah bèn loh
khoe kan loq waq da Christ? Kan mangò, kan nanxa, kan
canàt rùp, pangot hräh, hyah hyai, kan yat, chang jaoq
ùh xài? **36** Qmang ka bàu khoe achìh: “Tiaq ìh, nhèn glàm
kan cachìt xèq ka hì, Wì ngan nhèn bu dàng trìu đòèq
xah jam”. **37** Mahaq ùh xài, ta rìm yiniq aih bèn canòm
ka Mangai ma loq waq ka bèn Thi Tv 44:22, đòeq jah blêq
yeo hnau ka aih hòm. **38** Au cajap manoh rameh: Yac ka
kan cachìt, kan rìh, yac ka bình plình, yac ka kiac dù, yac
ka mangai i cwìang, yac ka manòeq, yac ka yiniq padon
trùh ta bla èh, **39** kan haqnhèq kan jrùq, ùh i cleq jah lah
bèn loh khoe ka kan loq waq Boc Plình khoe am ka bèn
oe enh dalam ka Chuaq Jesus Christ, aih Chuaq da bèn.

9 Enh dalam ka Christ, au ùh qnùt, manoh cliac au hadai
wiang panhìn ka au xam Yiang Hadròeh: **2** Au mangò pi
cajaq, manoh au jò leq ma ùh jìq. **3** Au khoe hmaq ngèh
dôq au chìuq dìq kan wì git, dôq au kô dahlêh khoe ka
Christ thai ka oh daq ma pajùm mahim jan ka au, **4** aih
la mangai Isorali, aih bài mangai jah broq kon ban da

Boc Plình, jah kan ranhòm, bàu tajao, ranenh, jah kùh waiq xam bàu khoe tèu am; **5** aih bài mangai ha-uang loh enh wì kan cadraq tiaq mahim jan aih raq nang noe ha-uang qnöh Christ, aih Mangai enh qnhèq dìq döng rìm ka yiniq, aih raq Boc Plình ma khòh manè apôi mòeq đòe Amen. **(aiōn g165)** **6** Aih ùh xài bàu Boc Plình khoe loh ka qngwan qngwaiq. Majah qmang aih ùh xài mangai leq ha-uang loh enh nang noe Isorali aih dìq mangai Isorali. **7** Èh ùh xài hi loh enh nang noe da Apraham aih dìq kon haq, mahaq i bàu achìh: “Enh Ysac aih èh ìh men i mòeq nang noe creo tiaq yiniq ìh”; **8** bàu aih rameh: Kon kaiq enh xech akia aih ùh xài kon Boc Plình, mahaq kon da bàu haq khoe tèu đòeq dèh adroe aih men joq kon da Apraham. **9** Kô raq bàu ma khoe chônh doe đòeq adroe: “Kô èh jah mòeq hanam, Au hi wìh hlài tacô, èh Sara hi i kon calô”. **10** Ma xài toq aih hi dìq, da Rêbeca hòm jò haq hadràp kon camia, kon da Ysac kan cadraq bèn, hanoh qmang aih. **11** Majah qmang aih, jò wa kon qnhòq ha-uang loh, qnhòq i broq trong lem trong dù dôq hu jah cajap tiaq manoh Boc Plình ma khoe dì adroe tiaq manoh cla haq enh (ùh xài tiaq yiniq broq, mahaq tiaq manoh Mangai ma creo) **12** aih khoe i bàu doe ka miq wa kon qyoh: “Mangai ma daq ep broq hapõng dèh oh”; **13** qmang ka bàu khoe achìh: “Au ha-och ka Jacôp, mahaq git ka Êsau”. **14** Qmang aih bèn anoe qmang leq? Ahìaq i kan ùh taq atoq ta Boc Plình? Ùh i qmang aih! **15** Majah qmang aih, haq doe ka Môise: “Au ha-och deh ka mangai au loq waq, Au ùh manaq deh ka mangai au ma ha-och”. **16** Trong aih ma xài cabô hi tangèh hi àu hi jah, mahaq

oe ajang kan loq waq da Boc Plình. **17** Ta Hset Hadroèh hadai i doe ka Pharaôn: “Hagleq au majah khoe dèch paqnàng ìh, ðoèq ajang aih hujah patô qnôh cwìang itai au, dôq yiniq au jah anoe jàp crõng taneh”. **18** Qmang aih, Haq ha-och deh ka mangai haq enh ha-och, enh broq cadoq manoh bô haq broq. **19** Qmang aih ìh bòch au: Hagleq Boc Plình oe cwò dèh ka nhèn? Oe i cabô hlàt tablêq ka manoh haq enh qmòh?... **20** Mahaq ìh qmat cabô, ìh ma hùa rahen ka Boc Plình? Abôq taneh wìa ka tarahen ka mangai broq loh abôq: “hagleq ìh majah broq loh au qmang kô? **21** Mangai thòq môt taneh ma ùh xài haq i cwìang yeo hnau ka taneh, hadai taneh aih qnah haq broq loh abôq lem ðoèq hu tah hang canaq, qnah haq broq ðòeq hu tah dahwèq hwòt hwat qmòh?

22 Tàng joq Boc Plình enh am hnoq deh kan nòeh rai broq ðòeq hnoq kan cwìang itai haq, mahaq haq àt deh manoh khoe dùnh am ka bài abôq ma troq toq ka nòeh troq ka raliang cađac, **23** haq broq qmang kô am ka bài abôq haq ma loq waq, haq ma khoe palauq ðòeq ka wì jah hnoq kan padrõng ranhòm da haq, aih bèn oe jah anoe tam cleq hòm? **24** Aih au anoe trùh bèn, bài mangai haq khoe creo deh, ùh xài toq ta mangai Juđa, mahaq hloe xam bài mangai diac wì. **25** Qmang ka haq anoe ta hset Ôse: “Mangai ùh xài da au, au creo deh mangai da au, Mangai au ùh ha-och, au doe deh mangai au ha-och;” **26** Èh hòm, tanoè haq ma doe ka wì: “Pì ùh xài mangai da au, Hadai ta aih raq wì ma hi jah creo kon Boc Plình halinh mòeq ðòeq”. **27** Da Êsai jò haq ràu trùh mangai Isorali, haq creo rai hmoe cadêh: “Yac ka mangai Isorali

bàc tìah ka braih diac rasixq, mahaq toq rah ròp da haq majah dèch; **28** majah qmang aih Boc Plình haqnan ka broq dôq xìt rìm bàu haq ta crõng taneh. **29** Èh hòm Êsai khoe doe: “Tàng Boc Plình dìq jaq haqnhèq, ùh rong ðoèq ka nang noe bèn mòeq toq hamõng, Aih bèn hadai khoe tìah ka Sôđôm tìah ka Gômôro diq”. **30** Aih èh bèn doe cleq hòm? Mangai diac wì ùh chaq kan taq atoq, aih khoe jah kan taq atoq, mahaq kan taq atoq loh enh manoh lùi; **31** mangai Isorali chaq ranenh da kan taq atoq, dìq khoe capòch ka ranenh aih. **32** Hagleq? Taiq wì haq ùh chaq xi manoh lùi, mahaq chaq xi yiniq broq. Wì haq khoe catoeh ka hmo, **33** qmang ka bàu khoe achìh: “Kô! Au ðòeq ta Siôn mòeq toq hmo, aih hmo kàn broq ka wì catoeh, mangai leq lùi haq, ùh hìaq ep camaih.

10 Wùih dìq ka oh daq, kan tangèh ta manoh au hloe xam bàu au waiq khàn ka Boc Plình, au waiq khàn deh ka oh daq au, aih la mangai Isorali ðoèq dìq ka wì jah dèch. **2** Au wiang capoch panhìn wì haq joq i manoh nhet joq qnàng trong da Boc Plình mahaq kan nhet aih ùh tiaq manoh rabiaq. **3** Majah qmang aih, wì haq ùh canau kan taq atoq da Boc Plình wì haq àu chaq ònh ðeh trong qnoeq ðoèq broq ka raðeh jah taq atoq, ùh iu tiaq kan taq atoq da Boc Plình; **4** majah qmang aih, Christ aih kan atìq lùch da ranenh, ðòeq dìq ka mangai lùi hujah kan taq atoq. **5** Anoe trùh kan taq atoq loh enh ranenh, Môise achìh qmang kô: “Bài mangai leq ma broq tiaq trong aih, canòm dèh aih raq ðoèq hujah rìh”. **6** Mahaq kan taq atoq da manoh lùi, aih achìh rameh: “Manoh ïh apaq capoch qmang kô: Cabô ma tõc ta Plình? ðòeq hu qnoh

Christ loh; **7** tàng ùh aih: Cabô ma hu loh ta hwin jrùq
đòeq hu dèch atč Christ enh kan cahìt”? (*Abyssos g12*) **8**

Mahaq doe qmang leq? Bäu oe ten ka ìh, oe ta hacùng ìh,
oe ta manoh ìh. Aih raq bäu da manoh lùi nhèn qnang
anoe hnài. **9** Qmang aih tàng joq hacùng ìh anoe qnoh
Chuaq Jesus Christ, manoh ìh lùi Boc Plinh khoe broq ka
haq rìh hlài enh kan cachìt, aih èh ìh jah dèch; **10** majah
qmang aih, lùi ta manoh aih jah kan taq atoq, mahaq
anoe qnoh ajang hacùng bäu aih èh jah dèch. **11** Qmang
ka Hset Hadròeh anoe: “Mangai leq ma lùi haq, aih ùh
hìaq xep. **12** Majah qmang aih yac ka mangai Juđa yac ka
mangai Gorec ùh i cleq crài ka dabau. Wì hanoh i pajùm
mòeq Chuaq bình halùih xôq ramot ka mangai creo dang
haq. **13** Majah qmang aih, mangai leq creo dang yiniq
Chuaq, aih hi jah dèch.” **14** Mahaq, wì qnhòq lùi haq, aih
wì creo dang qmang leq majah? Qnhòq lah i cabô anoe
trùh haq aih broq qmang leq wì ma lùi? Èh broq qmang
leq wì ma hìa tàng joq ùh i cabô lam doe ka wì? **15** Mahaq
tàng ùh i ka mangai ma khoe jah thê loh lam, aih èh hnài
qmang leq? Tìah ka bäu ma khoe achìh: “Capiang jènh
da bái mangai aràng Bäu lem, aih lem i jaq clceq”. **16**
Mahaq ùh xài rìm ngai dìq lùi Bäu lem, majah qmang
aih Êsai khoe doe: “Waiq Chuaq! cabô ma lùi bäu nhèn
anoe?” **17** Qmang aih, manoh lùi trùh, jò wì hi jah tàng,
wì jah tamàng jò bäu da Christ jah anoe hnài. **18** Mahaq
au bòch: Ahìaq wì qnhòq tàng? Majoq qnàng wì khoe
tàng: “Bäu wì anoe khoe trùh rìm cròng, Bäu wì khoe jàp
cròng taneh”. **19** Au bòch hòm: “Tàng qmang aih mangai
Isorali ùh lòm qnì cleq qmòh? Môise khoe doe: “Au broq

ka pì tagrinh ka mangai diac wì; Au broq ka pì plöh nòeh ka mangai ùh qnì qmoè cleq”. **20** Êsai khoe ùh yùq ka anoe: “Bài mangai ma ùh chaq au, aih khoe hnoq au, Au mahno rađeh ka mangai ma ùh lah bòch trùh au”. **21** Ràu trùh mangai Isorali aih haq doe: “Au khoe hnhu tì xèq ka hì tangèa ta nang noe ma cadoq manoh loq capoch gôpla”.

11 “Khoe aih au bòch hòm: Boc Plinh i cađac dèh mangai da haq? Ùh i, majah qmang aih; au hadai mangai Isorali, kon xau Apraham, nang noe da Bêngamin. **2** Boc Plinh qnhòq hmaq cađac dèh mangai haq ma khoe loq deh adroe. Oh daq ma ùh qnì ajang noe Hset Hadròeh ma achih trùh Êli? Jò haq àu bòch waq ka Boc Plinh tabroq ka mangai Isorali, haq doe: **3** Waiq Chuaq! wì khoe jêh đac döng da ìh pajàu, raliang caqnih đac da ìh prang tadreo; oe mòeq ngai au raq, dua wì chaq jêh đac hloe”. **4** Mahaq Boc Plinh tèu qmang leq? “Au khoe padon đòeq ka rađeh tapèh mùan mangai gucalô ùh hacùn cràng enh ngèa ka Ba-an. **5** Manđeq hadai, i mòeq qnah oe xrong hlài tiaq kan tabàih ma ràih dèh. **6** Mahaq tàng joq hi tiaq kan tabàih dech aih pi tiaq trong yiniq broq hòm, ùh qmeh kan tabàih ma oe xài kan tabàih hòm? **7** Aih qmang leq? Aih iq mangai Isorali chaq ùh jah trong wì haq ma chaq, mahaq mangai majah ràih aih khoe jah, mangai ma qnoeq aih loh ka cadoq manoh, **8** qmang ka bàu ma khoe achih: “Boc Plinh khoe broq ka wì loh ka clam cluiq, Mat ùh xau hnoq, don ùh xau tàng, Trùh hloe manđeq”. **9** Đawit hanoh doe: “Xoeq diq, yiniang yinàng da wì haq wìa jroh wìa hlàp, Wìa kan catoeh đòeq hu

patem chau ka wì haq; **10** Xoeq diq mat wì haq loh ka clam cluiq, dôq wì haq ùh xau hnoq, Cröng wì haq kōc hloe mòeq đòe”! **11** Au bòch hòm: Mangai Isorali catoeh qmang aih ahìaq đòeq hu cro hloe ùh xài? Ùh xài qmang aih! Mahaq taiq yiniq lui wì haq kan dèch majah khoe trùh ka mangai diac wì, đòeq broq ka wì haq tagrinh. **12** Mahaq tàng yiniq lui wì haq khoe broq ka cröng taneh jah kan padröng, kan capòch da wì haq khoe broq ka mangai diac wì jah padröng kan, loq ka kan padröng da wì haq! **13** Au anoe ka pì oh daq mangai diac wì: Enh nèh trùh manðeq, au broq mangai Tiaq Cla am ka mangai diac wì, au àu broq dôq trong au ma patih jah ranhòm, **14** đòeq ka manoh cliac oh daq mangai diac cla nhèn tajênh, dôq wì loq ran đeh diq, đòeq i đeh moeq qnah ngai ta wì haq jah dèch. **15** Tàng joq kan hlêh đac da wì haq khoe broq ka phu cròng jah hatroq, aih èh jò wì haq wìh hlài ta kan tabàih dech, aih ma ùh xài rìh hlài enh kan cachìt qmòh? **16** Tàng plì gòu mùà hadròeh, aih dìq ka dùng hanoh hadròeh, tàng riah haq hadroèh, aih dìq ka hanenh hanoh hadròeh. **17** Tàng i mòeq baiq hamenh ma khoe sri đac, aih èh ìh qmat long ôliu gàng khoe jah srep qmùt ajang bài teu hamenh aih đòeq jah pajùm đeh ka jan, đeh ka riah da long ôliu, **18** apaq catèh rađeh kô yeo loe ka bài hamenh aih. Tàng joq loq enh catèh, ìh ep hèm qmang kô: Ùh xài ìh tagah lep ka riah, ma joq qnàng riah ma tagah lep ka ìh. **19** Aih èh ìh hi doe: Bài hamenh qnoeq khoe sri đac đòeq ka au jah srep qmùt ajang teu bài aih. **20** Joq qmang aih, bài hamenh aih khoe sri cađac taiq wì haq ùh lùi, ìh canòm ka manoh lùi majah

keo oe, apaq catèh rađeh mahaq thê ìh loq iu yùq. **21**
Majah qmang aih tàng joq Boc Plình khoe ùh adênh ka
bài hamenh cla long aih, aih èh haq hadai ùh i adênh cleq
ka ìh. **22** Qmang aih, ngan beq, ngan kan loq hanò xam
kan ùh jah blìa da Boc Plình: Kan ùh jah blìa ka wì aih bài
mangai khoe tacro, kan loq hanò am ka ìh, waq toq ìh
loq wèq rađeh ta kan loq waq da haq, ùh meh ìh hadai
ep sri cađac. **23** Da wì aih, tàng wì ùh hìaq catàm yôt ta
kan ùh lùi, aih èh wì hadai jah srep qmùt majah qmang
aih Boc Plình i cwìang srep qmùt wì haq. **24** Mahaq tàng
ìh khoe jah pot enh long ôliu gàng đòeq hu srep qmùt
talong ôliu lem, aih loq ka bài wì aih hamenh da cla long
ma ùh jah srep qmùt ta xèm cla qmòh! **25** Qmang aih,
au ùh enh ka oh daq ùh qnì kan hlèp kô, yùq èh oh daq
loq doe đeh kô rabiaq: Aih ìq, mòeq qnah raq mangai
Isorali ma khoe loh ka cadoq manoh, gòm trùh jò leq
mangai diac wì khoe jah qmùt dôq haq tôm òeq; **26** khoe
aih èh dìq ka mangai Isorali hi jah dèch, qmang ka bàu
khoe achìh: “Mangai paclaih loh enh Si-ôn, Dèch đac kan
ngang dù loh khoe ka Jacôp; **27** Aih kan tajao au broq ka
wì, Jò au dèch cađac ka hangai yiniq lui wì haq”. **28** Tàng
hatùang trùh Bàu lem, wì aih khoe loh mangai tagit ka
pì, mahaq tàng hatuàng trùh kan ràih enh plình wì haq
aih raq mangai jah kan loq waq taiq ajang boc yaq, **29**
majah qmang aih bài bìac Boc Plình ma am xam bàu creo
da haq ùh jò leq tablòq. **30** Qmang ka enh adroe nèh oh
daq khoe ùh iu Boc Plình, yàng manòeq kô taiq kan ùh
iu da wì aih oh daq ma khoe loh ka jah kan ha-och, **31**
hanoh qmang aih, manòeq kô wì haq khoe ùh iu, đòeq hu

hadai jah kan ha-och troeq kan ha-och khoe am da oh daq. **32** Majah qmang aih, Boc Plình khoe clêh dìq dǒng ta kan ùh qmì iu đòeq hu ha-och dìq dǒng rìm ngai. (eleesē g1653) **33** Wùih! joq jrùq qnàng kan padrõng, kan rabiaq, kan loq da Boc Plình! Kan hadrah da haq cabô ma hlàt tem, trong da haq cabô ma hlàt qnhro! **34** Aleq i cabô loq ka manoh da Chuaq? Cabô ma khoe wiang hatinh ti haq? **35** Cabô khoe am ka haq cleq adroe đòeq hu jah haq padreo hlài? **36** Majah qmang aih rìm yiniq dìq loh enh haq, canòm ka haq, tangèa dìq ta haq. Kan ranhòm mòeq đòe ùh lùch oe dìq dǒng ta haq! Amen. (aiōn g165)

12 Qmang aih, au yōc kan loq waq da Boc Plình, pariaq dìq ka pì oh daq dèch qmòe chac cla pì đòeq broq ramènh rìh, hadròeh lem ka manoh Boc Plình, aih raq kan kùh waiq ma troq da oh daq. **2** Apaq top dua qnhòng kô, mahaq wìh wìa tiaq manoh oh daq ma khoe jah paneo, đòeq hujah qnhro loq trong lem manoh xam kan geo gùa da Boc Plình aih qmang leq cadèh. (aiōn g165) **3** Qmang aih, tiaq kan tabàih dech ma khoe am ka au, au anoe ka tang ngai oh daq apaq hèm rađeh kô haqnhèq hrìn, mahaq ep i manoh hèm bu qnang lem tiaq maneh kan lùi Boc Plình ma khoe am ka tang ngai. **4** Majah qmang aih, tìah ka mòeq toq chac raq mahaq ta aih i bàc yiniq, bài yiniq aih i deh hra trong abroq crài ka dabau; **5** hadai qmang aih, enh dalam ka Christ bèn kô bàc ngai mahaq khoe loh mòeq chac, bài bèn kô aih hamenh da dabau. **6** Majah qmang aih bèn i bài kan tabàih crài ka dabau, tiaq kan tabàih dech khoe am ka tang ngai, mangai leq jah am tapoch pajàu, aih asràm tapoch hatiaq dèh manoh lùi; **7**

cabô jah creo hu broq mangai patîh, aih ep kât racop
rađeh ti bìac patîh, cabô broq mangai hnài, aih ep hnài; **8**
cabô broq mangai pariaq, aih pariaq, cabô broq mangai ti
tabàih am, aih tabòeh am majoq qnàng haq, cabô broq
mangai qnung ngoe, panim haq đòeq hu qnung ngoe,
cabô broq mangai loq ha-och, drah lem bùi ka broq. **9**
Kan loq waq ep ma joq qnàng haq. Ep git ka trong dù bêh
trong lem. **10** Drah yōc kan loq waq laq alàng đòeq ha-
och ka dabau tìah ka oh daq, ngan wì qnoeq ùh hnau ka
cla rađeh. **11** Drah panim apaq aroh, ep i manoh loq nhet:
ep patîh ka Chuaq. **12** Drah loq bùi ta kan tangèh, loq
àt ta kan nanxa, cajap manoh đòeq hu waiq khàn. **13**
Drah lah axong dahwèq am ka mangai da Boc Plình jò
wì haq i đeh yiniq nhet ka waq, dìq ka manoh loq đìh
tamoe; **14** waiq am xôq ramot ka mangai rùp oh daq,
waiq am xôq ramot ùh dùh hanip. **15** Wiang lem bùi ti
mangai lem bùi, crò ti mangai crò. **16** Oh daq ep acaq oe
ma hatroq ti dabau, apaq enh toq ka rahù rahòm, mahaq
loq haqmuhan rađeh. Apaq doe đeh rabiqaq. **17** Apaq yōc
kan dù đòeq hu patem chau ka cabô, mahaq enh ngèa
rìm ngai, ep hèm ngan trong leq malem. **18** Tàng jah, yōc
dìq dèh ka padren hiwa đòeq àu hatroq ka rìm ngai. **19**
Yôi yôiq oh daq da au, cla pì apaq patem chau ka cabô,
mahaq dôq daiq ka kan nòeh da Boc Plình, majah qmang
aih i bàu khoe achìh: “Kan patem chau aih oe ta au, i au
tabroq chau.” **20** Qmang aih tàng joq mangai tagit ka pì
haq hrah, qmi haq acaq, tàng joq haq croh ranöng, drah
am haq ôq, broq qmang aih tìah ka pì tah ngia ùnh tagàu

wì". **21** Apaq dôq trong dù blêq pì, mahaq dôq trong lem blêq trong dù.

13 Rìm ngai ep iu tiaq mangai wèq cwìang enh qnhèq ka rađeh, majah qmang aih ùh i ka cwìang leq ma ùh trùh enh Boc Plình, bài cwìang aih dìq Boc Plình thê. **2** Qmang aih, cabô tatblêq hlài ka mangai wèq cwìang, aih haq tatblêq hlài ka bàu Boc Plình khoe thê, mangai tatblêq qmang aih haq taqmac yōc ka rađeh kan hadrah. **3** Majah qmang aih, mangai wèq cwìang ùh xài dôq ka mangai broq lem crè mahaq đòeq ka mangai broq dù crè. ìh ngèh ka ùh hìaq ep yùq crè ka mangai i cwìang ajoq? Aih drah broq trong lem beq đòeq hujah wì haq manè baha ìh; **4** majah qmang aih wì haq aih hapōng Boc Plình đòeq i lòeq ka pì. Mahaq tàng ìh broq trong qmèq, aih khòh lèt, majah qmang aih mangai wê chang ùh lah wê waiq ùh i ka yiniq, wì haq aih ranac da Boc Plình đòeq hadrah mangai broq dù. **5** Aih ìq dài majah ep iu, ùh xài crè toq ka loq phöc hi hêq, mahaq hadai taiq deh manoh cliac. **6** Aih ìq raq oh daq majah ep caqnaih thèq, majah qmang aih mangai wèq cwìang aih hapōng Boc Plình đòeq hu broq trong kô. **7** Ep caqnaih da rìm ngai dòeh oh daq ma khoe pòq: Caqnaih thèq ka mangai ìh ep thèq, wiang tagop ka mangai khòh wiang gop, crè ka mangai khòh crè, ta iu ka mangai khòh ta iu. **8** Apaq pòq dòeh bô yac ka yiniq cleq, enh gùng kan loq waq ka dabau, majah qmang aih cabô loq waq dèh ka mangai ma haten hatia aih haq khoe broq gêh ranenh. **9** Hacô bài ranenh aih qmang kô: ìh apaq tango, apaq jêh đac mangai, apaq atùng, apaq daiq plai hloe xam bài ranenh qnoeq, yac ka

ranenh leq dìq yùp ta mòeq bàu kô: lìh ep loq waq ka mangai haten hatia tìah ka cla ìh. **10** Kan loq waq ùh broq habo ka mangai ten tìa. Qmang aih kan loq waq broq gêh geo ranenh. **11** Drah acaq oe qmang aih, majah qmang aih bèn loq manðeq: Khoe ten trùh jò, oh daq ma kùi rìu beq, majah qmang aih kan dèch da bèn trùh khoe ten, ùh hnau ka jò bèn ma baxèm lùi. **12** Mang khoe jrùq, hì khoe ten trùh, qmang aih bèn drah lêh caðac bài yiniq broq da kan clam cluiq đòeq hu taqmac wê ranac da kan qngah qngai. **13** Drah cadiang lam ma qnhrang qmang ka dahì. Apaq dôq raðeh tacro catàm ta kan ôq bù haqnhròch, talìq talàn xam kan tajênh; **14** mahaq caxùnh yõc Chuaq Jesus Christ rai apaq hèm đòeq chaq trong hu patìh bài biac xech akia ma rahènh. XuXh 20:13-17 PhuDnl 5:17-21

14 Drah lem manoh đòeq hu đìh wì oh daq manoh lùi ma yeo hamoq đeh, ùh dùh rahlen dèh trong haq ma qnhòq dai lùi. **2** Mangai kô lùi rìm yiniq dìq khòh acaq, mangai manoh lùi ma yeo biaq tau acaq đeh toq cachiq. **3** Mangai acaq apaq jù dèh ka mangai ùh acaq, mangai ùh acaq apaq ti hadrah dèh ka mangai ma acaq, majah qmang aih Boc Plình khoe đìh yõc dèh haq. **4** lìh qmat ìq cabô gleq ma hùa hadrah hapõng da mangai qnoeq? Haq yòng qnì haq cro qnì aih mac da cla craq haq mahaq haq yòng, majah qmang aih Chuaq i cwìang am ka haq qnhrang. **5** Managai kô hèm hi kô ùh hnau ka hì qnoeq, mangai tau hèm yac ka hì leq hanoh daq adàng, mangai leq mangai meh lùi cajap dèh ta gàu ngoc. **6** Mangai ma wèq hì aih, dài Chuaq haq majah wèq, mangai ma acaq aih dài Chuaq haq men acaq, majah qmang aih wì

haq manè apôi Boc Plình, mangai ma ùh acaq aih hanoh dài Chuaq wì haq majah ùh acaq, wì haq hanoh manè apôi Boc Plình. **7** Majah qmang aih taqne bèn kô ùh i mangai leq rìh toq ka rađeh, èh hòm taqne bèn hanoh ùh i mangai leq ma cachìt ka rađeh, **8** tàng bèn rìh aih rìh ka Chuaq, tàng bèn cachìt aih cachìt ka Chuaq. Qmang aih yac ka bèn rìh yac ka bèn cachìt, aih dìq ta Chuaq. **9** Christ khoe cachìt mahaq khoe rìh hlài aih đòeq hu broq Chuaq da mangai cachìt xam mangai rìh. **10** Mahaq gleq ìh majah hadrah dèh oh daq? Da ìh hòm, hagleq ìh loq jù đac dèh oh daq? Majah qmang aih, bèn kô èh dìq ep yòng enh ngèa ka gèq Boc Plình haqngui hadrah bèn. **11** Majah qmang aih i bàu khoe achìh rameh: “Chuaq doe: Joq qnàng troeq au kô rìh halình, rìm toq cràng dìq ep hacùn enh ngèa au, rìm toq rapet jah manè apôi Boc Plình”. **12** Aih èh, ajang ngèa Boc Plình bèn dìq ep taqmon hlài rìm yiniq bèn ma khoe broq. **13** Qmang aih bèn pi dùh ti hadrah dèh ka dabau, yac ka qmang leq dua bèn ùh roh hmo ti qngèa oh daq, ùh broq ka wì haq tacro. **14** Au loq rai lùi joq qnàng ta Chuaq Jesus ùh i cleq ma ùh hruah, toq rameh raq cabô hèm dahwèq kô ùh hruah aih haq ùh hruah toq ka mangai aih. **15** Tàng joq mòeq dahwèq acaq ìh broq ka oh daq ep mangò, qmang aih ìh pi oe broq tiaq kan loq waq hòm. Ùh dùh đòeq dahwèq acaq da ìh broq raliang đac mangai Christ ma khoe cachìt am. **16** Qmang aih apaq dôq i yiniq cleq ìh loq haq lem mahaq loh nen đòeq ka wì capoch qmèq. **17** Majah qmang aih diac Boc Plình aih ùh xài ajang nòe acaq ôq mahaq ajang kan taq atoq, catèm, lem bùi trùh enh Yiang Hadròeh. **18** Mangai

leq tiaq trong aih đòeq patih ka Christ aih jah lem manoh Boc Plinh, jah wì manè. **19** Qmang aih, bèn drah chaq trong broq qmang leq hujah hatroq ti dabau ma đòeq broq dua qngah ka dabau. **20** Ùh dùh đòeq trong acaq raliang đac biac Boc Plinh ma broq. Rìm dahwèq acaq aih dìq hruah, bèn acaq mahaq broq ka mangai qnoeq catoeh ataq, aih raq kan dù. **21** Ma yeo lem, aih ùh acaq jam, ùh ôq alac rai ùh broq qmòe cleq dôq ka oh daq bèn catoeh cro. **22** Bì trung kô, iìh i dèh manoh lùi pang leq, iìh wèq ka rađeh pang aih enh ngèa ka Boc Plinh. Xôq ramot ka mangai leq ma ùh taqmac yiniq lui ka rađeh tiaq trong cla haq ma khoe dì dèh. **23** Mahaq mangai leq oe raq i manoh qnhòq dai tùt ka dahwèq đeh ma acaq aih haq khoe taqmòq ka rađeh yiniq lui, majah qmang aih haq ùh acaq tiaq manoh lùi, yac ka broq cleq mahaq ùh tiaq manoh lùi aih raq yiniq lui.

15 Qmang aih bèn mangai ma tadêh, ep wiang pòq blòh kan trap ka mangai ma ùh i đeh ka padren, apaq broq waq ka lem toq ka manoh deh cla. **2** Rìm ngai bèn ep broq lem manoh ka mangai haten hatia bèn, đòeq i loèq ka wì hu broq dua lem ka wì. **3** Majah qmang aih, yac ka Christ hadai ùh broq lem toq manoh dèh cla, qmang ka bàu khoe achih: “Bàu bì mangai capoch qmèq khoe ta ùc enh qnhèq ta chac au”. **4** Majah qmang aih, rìm yiniq enh nèh khoe achih hlài đòeq hnài bèn, dôq enh kan loq àt xam kan alòng da Hset Hadròeh hnài, bèn jah i kan tangèh. **5** Waiq Boc Plinh aih xèm da kan loq àt xam kan alòng am ka oh daq jah mòeq manoh oe ti dabau qmang ka Chuaq Jesus Christ. **6** Đòeq ka oh daq jah mòeq manoh

mòeq bàu ti dabau hu manè apôi Boc Plình, aih Baq da Chuaq Jesus Christ bèn. **7** Qmang aih, oh daq drah đìh dabau, qmang ka Christ khoe đìh EsIs 45:23 oh daq, dôq Boc Plình jah kan ranhòm. **8** Majah qmang aih au anoe ka oh daq, Chuaq Jesus Christ khoe broq mangai patìh tanèò bài mangai kat akia, đòeq hu patô qnöh Boc Plình ùh gôpla, rai broq ka cajap bàu ma khoe tèu am ka kan cadraq bèn; **9** qnah hòm dôq mangai diac wì jah manè apôi Boc Plình taiq kan loq waq haq, tìah ka bàu ma khoe achìh: “Aih raq, au majah manè apôi Boc Plình taqne mangai diac wì, Calêu padèch yiniq haq”. **10** Èh i achìh hòm: “Dìq ka mangai diac wì, lem bùi ti mangai da Chuaq beq. **11** Èh hòm: “Dìq ka mangai diac wì, Drah manè apôi Chuaq, rìm ngai khòh manè haq”. **12** Èsai hanoh doe: “Enh rangàu riah da Jêse, jah plôh loh hamenh Moèq ngai ma hu yòng wèq dìq ka mangai diac wì, Mangai diac wì jah tangèh đeh ta haq aih”. **13** Waiq Boc Plình da kan tangèh, broq ka oh daq jah lem bùi rìm trong xam rìm kan catèm ta kan lùi, đòeq ka oh daq canòm ka cwìang itai da Yiang Hadròeh jah bình bauq kan canòm. **14** Dìq döng oh daq da au, au lùi oh daq i bình kan loq hanò, bình kan rabiaq, èh loq hnài dabau. **15** Joq au khoe yōc dìq dèh ka manoh ùh hòq ka achìh jàiq đòeq anoe ka oh daq trong kô trong tau, aih đòeq broq ka oh daq hmàng, kan tabàih Boc Plình khoe am ka au **16** jah wìa mangai patìh da Chuaq Jesus Christ am ka mangai diac wì, broq pajàu Bàu lem da Boc Plình, đòeq mangai diac wì jah wìa ramènh lem ka manoh Boc Plình, jah kan hruah enh Yiang Hadròeh. **17** Aih èh enh da lam ka Jesus au i nen hu

catèh rađeh ti ajang nòe au ma khoe patìh ka Boc Plình.

18 Majah qmang aih, au ùh hùa capoch cleq yeo loe ka bài trong Christ ma khoe thê au broq dôq mangai diac wì jah iu tiaq haq, enh bàu capoch trùh yiniq broq, **19** enh noè cwìang itai xam kan halac, tiaq kan itai enh Yiang Hadròeh da Boc Plình, patep enh Jérusalem xam bài gùng dudan aih trùh hloe tagùng I-lyri, au aràng Bàu lem da Christ lam jàp jìa. **20** Manoh da au toq enh anoe trong Bàu lem tanòe leq yiniq Chuaq Jesus Christ qnhòq lah i cabô ràu trùh, dôq au ùh hìaq broq hnim enh qnhèq ka xàn hnim wì qnoeq, **21** qmang ka bàu khoe achìh: “Bài mangai qnhòq lah hìa trùh haq, aih jah hnoq haq, Bài mangai qnhòq lah tàng anoe trùh haq, aih jah loq ka haq”. **22** Kô ìq raq kan khech tát, broq ka au khoe bac yang ùh jah trùh hmàih ka oh daq. **23** Mahaq manòeq kô pi oe i cleq tát padràng au oe ta bài gùng kô, qnah hòm khoe toq leq hanam, au toq ngèh ka jah trùh ti oh daq; **24** qmang aih tàng au jah lam tagùng Ypha-nho, au diq enh troq trong hu hmàih hloe ka oh daq, khoe ka jah oe lem bùi ti oh daq au hadai enh canòm ka oh daq qnung au lam. **25** Hnoq anoe qmang aih, manòeq kô au qnang ti trong trùh ta Jérusalem đòeq hu patìh ka bài mangai hadròeh ta aih. **26** Majah qmang aih mangai ta Maxêđoan xam mangai tagùng Achai khoe lem bùi ta manoh wiang tagop bac jèn hu tabàih ka ба mangai hadròeh da Chuaq ta Jérusalem ma qnang hamoq. **27** Wì lem manoh broq qmang aih, majoq qnàng wì pòq đòeh mangai Juđa, tàng joq mangai diac wì khoe jah wiang pajùm xôq ramot ti mangai Juđa, aih wì haq ep yōc dèh kùng hang qnhòng

kô đòeq hu wiang am ka mangai Juđa. **28** Qmang aih, gòm jò au broq gêh ka bìac kô, jò au loq ka joq qnàng wì khoe jah bài dahwèq aih, au hi lam hmàih ka oh daq, èh au hi lam ta Ypha-nho. **29** Jò au trùh ti oh daq, au aràng bình halùih xôq ramot da Christ ka oh daq. **30** Qmang aih, canòm ka Chuaq Jesus Christ da bèn xam kan loq waq loh enh Yiang Hadròeh, au enh oh daq wiang pajùm ti au trong bàu waiq khàn am ka au enh ngèa Boc Plình. **31** Dôq au jah claih enh ti kǒng bài mangai ùh lùi tagùng Juđê, đòeq bài dahwèq au ma wê aràng kô wì oh daq hadròeh ta Jérusalem jah dì yōc. **32** Aih èh, au hi jah lem bùi đòeq hu trùh ta oh daq, canòm tiaq manoh Boc Plình enh, èh dìq ka bèn hadai jah padài ti dabau. **33** Waiq Boc Plình kan catèm oe ti oh daq! Amen.

16 Au thê mòeq ngai gucadri yiniq haq Phêbê trùh ta pì, aih hanoh oh daq bèn, haq aih mangai wiang patìh ti tagop oe ta Sencorê. **2** Qmang aih, enh dalam ka Chuaq pì đìh haq ma tajì qmang ka mangai hadròeh rai am ka haq bài dahwèq haq ma i đeh yiniq nhet ka waq, majah qmang aih haq hanoh khoe loq wiang am ka bàc ngai qnoeq ta aih hadai i hloe xam au. **3** Au bòch hmàih Bêritsin xam Aquila, wa aih mangai hadai wiang patìh ka Chuaq Jesus Christ ti au. **4** Wa khoe tamùa cla rađeh đòeq hu dǒng kan rìh au, ùh xài moèq ngai au manè wa mahaq xam Tagop Ha dròeh da mangai diac wì. **5** Hadai bòch hmàih trùh ka Tagop Hadròeh ma tagop ta hním wa aih. Bòch hmàih ka Êbai-net, aih bua ma dìq jaq haten hatìa ka au, oe tagùng Asi, haq aih mangai ma baxèm tawìh tiaq Christ. **6** Au bòch hmàih ka Mari, mangai ma khoe

xalep ka oh daq. **7** Au bòch hmàih ka Antrô-nica xam Juni-a, mangai mòeq gùng ti au, mangai hadai oe tu ti au. Taqne bài mangai Tiaq cla, wa aih mangai i tiang i bang, wa aih oe ta Chuaq adroe ka au. **8** Bòch hmàih ka Amlì-a, bua au oe ta Chuaq. **9** Bòch hmàih ka Uroban, mangai abroq ti au oe ta Chuaq xam Étachi, bua lem da au. **10** Bòch hmàih ka Abêlo, mangai khoe lem manoh Christ. Bòch hmàih ka oh daq oe ta hnìm Arit-tôbu. **11** Bòch hmàih trùh Herôđi-ôn, mangai mòeq gùng ka au. Bòch hmàih ka oh daq oe ta hnìm Naxit, aih bài mangai oe ta Chuaq. **12** Bòch màih trùh Triphêno xam Triphôso, aih bài mangai gucadri abroq patih ka Chuaq. Bòch hmaih ka Betsidô, aih bua au mangai khoe broq bac biac ka Chuaq. **13** Bòch hmàih ka Ruphu, mangai Chuaq khoe ràih dèh, xam miq haq mangai hadai khoe wia miq au diq. **14** Bòch hmàih ka Asincôrich, Pholêgon, Het me, xam oh daq oe ti wì aih. **15** Bòch hmàih ka Philo-Lojô xam Juli, Nêre xam daq cadrì haq, Ôlim xam dìq döng mangai hadròeh ma oe ti wì haq. **16** Dìq ka oh daq yoc kan hìp lem hadròeh đòeq hmàih ka dabau. Dìq döng ka Tagop Hadròeh da Chuaq tanap bàu bòch hmàih trùh oh daq. **17** Manòeq kô au pariaq dìq ka pì oh daq khòh hamang ka bài mangai ma loq ti jrôq chiu waq oh daq talah ka dabau, broq dua qmèq, crài ka bàu oh daq ma khoe jah hòc. Drah wia ma hangai ka wì aih. **18** Majah qmang aih wì haq ùh i patih ka Christ, Chuaq da bèn, mahaq patih dèh ka trom hòng, yoc bàu rangot tiyah ka diac cadrot đòeq aluàn padô manoh cliac mangai ma ùh qnì đeh cleq. **19** Kan loq iu da oh daq, mangai leq mangai meh khoe loq deh hra, aih iq

dài au majah manè oh daq, mahaq au toq ngèh ka oh daq rabiaq ka trong lem, ùh rabiaq ka trong dù. **20** Boc Plinh kan catèm kô èh rênj jôiq padit Satan enh caqnàm jènh oh daq. Waiq kan loq waq da Chuaq Jesus bèn oe ti oh daq! **21** Timôthê, mangai hadai patih ti au bòch hmàih trùh oh daq, Lusi-ut, Jasôn xam Sobatê, aih hadai mangai Juđa troeq ka au bòch hmàih trùh oh daq. **22** Au kô Tec-tiu mangai ma achìh jàiq kô, bòch hmàih ka oh daq enh dalam ka Chuaq. **23** Gai-ut mangai khoe đìh au xam Tagop Hadròeh, bòch hmàih oh daq. **24** Êrat mangai aih cwan wèq kho bac ta phôq xam Karôtu, oh daq bèn hadai i bàu bòch hmàih trùh ohdaq. **25** Manè apôi Boc Plinh ma i cwìang broq ka oh daq cajap manoh qmang ka Bäu Lem au ma anoe xam bàu da Chuaq Jesus Christ ma khoe hnài, tiaq kan mahnu bài kan hlèp ma khoe cadoc enh qnhòng calah nèh, (aiōnios g166) **26** manòeq kô khoe jah patô qnoh, tiaq bàu Boc Plinh rìh halinh thê, canòm ka bài hset pajàu pèh am ka rìm ngai diac wì jah loq đòeq hu ajènh aràng wì haq trùh ajang kan loq iu da manoh lùi, (aiōnios g166) **27** ajang Chuaq Jesus Christ, waiq kan ranhòm hlài dìq ta Boc Plinh toq haq raq ma rabiaq, halinh mòeq đòe! Amen. (aiōn g165)

I CORINHTO

1 Phaulo, tiaq manoh Boc Plinh khoe jah creo broq mangai Tiaq cla da Jesus Christ, pajum ka Sothen oh daq bèn, **2** achìh am ka Tagop Hadròeh da Boc Plinh oe ta Corinto, aih boè mangai khoe jah basròeh enh dalam ka Jesus Christ, khoe jah creo mangai hadròeh, sam ka rìm ngai creo dang yiniq Jesus Christ, aih Chuaq da bèn sam da wì aih yac ka wì oe taleq. **3** Waiq ka oh daq jah kan tabòeh dech sam kan catèm enh Boc Plinh, Baq bèn, sam Jesus Christ. **4** Au ùh hêq ka manè apôi Boc Plinh, majah qmang aih kan tabòeh dech Haq khoe am ka oh daq enh dalam ka Jesus Christ, **5** majah qmang aih enh dalam ka Haq oh daq khoe jah padròng rìm trong, enh bàu capoch trùh kan rabiliaq, **6** qmang ka bàu nhèn anoe trùh Christ khoe jah cajap taqne oh daq. **7** Oh daq ùh i blat qmòe mòeq kan tabòeh leq enh Yiang Hadròeh jò oh daq qnang ngèh gòm Jesus Christ bèn trùh. **8** Haq aih ma broq ka oh daq jah cajap manoh trùh lùch trùh gêh, dôq trùh hì Jesus Chirst da bèn oh daq ùh hìaq i qmòe ajang leq ma ep cwò. **9** Boc Plinh aih ùh tablòq manoh, Haq khoe creo ka oh daq jah taqmùt ti Jesus Christ kon Haq, aih raq Chuaq da bèn. **10** Au canòm ka yiniq Jesus Chuaq da bèn, đòeq hu pariaq dìq ka oh daq ep pajum mòeq bàu, apaq lah đac dabau mahaq ep mòeq manoh mòeq cliac ka dabau. **11** Majah qmang aih, enh boè mangai oe ta hnìm Ko-lo-ê, au i hìa bàu doe taqne oh daq i kan tagrinh ka dabau. **12** Au enh doe taqne oh daq i mangai doe qmang kô: “Au tiaq Phaulo”; qnah ngai qnoeq doe: “Au tiaq Abo-lo”; mangai qnoeq doe: “Au tiaq Sepha”,

maqnoeq hòm doe: “Au tiaq Christ”. **13** Aleq Christ khoe pah broq baiq qmòh? Ahìaq Phaulo khoe chìuq tiang đình talong pagat am ka oh daq, tàng ùh meh oh daq khoe canòm ka yiniq Phaulo đòeq broq baptem ajoq? **14** Au manè apôi Boc Plình majah qmang aih enh gùng ka Korit-bu sam Gai-ut, taqne oh daq au qnhòq lah broq baptem am ka cabô, **15** dôq ùh hìaq i cabô doe oh daq khoe yōc yiniq au đòeq broq baptem. **16** Joq au i broq baptem ka mangai ta hñim Sepha-na, enh gùng ka hñim aih au pi hmàng đeh khoe broq batpem am ka cabô hòm. **17** Majah qmang aih Christ thê au trùh ùh xài đòeq hu broq baptem, mahaq đòeq hu anoe hnài Bàu lem, hadai ùh hnài sam hacùng bàu rabiaq da kon mangai, dôq kan i cwiang itai long pagat da Jesus Christ ùh hìa hnhung đac. **18** Majah qmang aih, bòe mangai ma hnhung lùch wì doe bàu ma hnài trùh long pagat aih kan ratùt, mahaq da bèn mangai ma khoe jah dèch aih raq cwiang itai da Boc Plình. **19** Majah qmang aih i bàu khoe achìh: “Au raliang đac kan rabiaq da mangai rabiaq, Au palùng đac kan loq da mangai loq”. **20** Mangai rabiaq oe taleq? Mangai hnài ranenh taleq? Mangai rabiaq ka hadrah qnhòng kô oe taleq? Ajoq Boc Plình khoe broq kan rabiaq da cröng taneh kô loh ka ratùt ùh? (aiōn g165) **21** Majah qmang aih taiq cröng taneh kô canòm dèh kan rabiaq cla, ùh canòm kan rabiaq da Boc Plình đòeq hu canau ka Boc Plình, dài Haq majah lem bùi dèch bòe mangai i manoh lùi ajang bàu hnài da mangai blùng qmang ka nhèn. **22** Jò mangai Judà bòch toq kan halac, mangai Gorec chaq toq kan rabiaq, **23** mahaq nhèn anoe toq Christ tiang đình talong

pagat, aih kan catoeh ka mangai Juđa, mangai diac wì doe aih kan blùng; **24** mahaq da bèn mangai ma khoe jah creo yac ka mangai Juđa yac ka mangai Gorec Christ aih kan itai sam kan rabiaq da Boc Plình. **25** Majah qmang aih kan blùng da Boc Plình aih rabiaq yeo hnau kan rabiaq da mangai, kan ùh nèn da Boc Plình aih yeo dêh ka padren mangai. **26** Hèm beq! taqne pì oh daq ma khoe jah creo, tiaq qnhòng kô pì ùh i bàc ngai rabiaq, ùh bàc ngai i cwìlang, ùh bàc ngai rahù ranhòm. **27** Mahaq Boc Plình khoe yōc kan blùng ta crōng taneh đòeq broq ka mangai rabiaq camaih, Boc Plình yōc kan ùh nèn ta crōng taneh đòeq baxep ka mangai tadêh. **28** Boc Plình khoe yōc kan ùh cra, kan wì ma jù lê cađac, sam bòe yiniq ùh i hnoq, đòeq broq bòe yiniq xau hnoq loh ka pi i hnoq, **29** dôq ùh i mangai leq jah padèch rađeh enh ngèa Boc Plình. **30** Qmang aih, canòm ka Haq oh daq ma khoe jah oe ta Jesus Christ aih Mangai Boc Plình ma khoe broq Haq wìa kan rabiaq, kan taq atoq, kan hadròeh sam kan dèch dìq ka bèn; **31** đòeq tìah ka bàu ma khoe achìh: “Cabô catèh rađeh, ep catèh enh dalam ka Chuaq”.

2 Jò au trùh ti pì, au ùh yōc bàu haqnheq bàu rabiaq đòeq hu hnài oh daq, dôq oh daq jah loq trong da Boc Plình ma khoe dì. **2** Majah qmang aih, au khoe qnac đòeq dèh ta manoh: oe taqne oh daq, au ùh qnì cleq loe enh gùng ka Jesus Christ, èh Jesus Christ khoe tiang đình talong pagat. **3** Jò oe taqne oh daq, au joq pi nac canèn, yùq crè rai tarìt. **4** Enh bàu ta hatuàng trùh bàu hnài da au ùh xài loh enh kan rabiaq ka padô, mahaq loh enh kan mahno da Yiang Hadròeh sam cwìlang itai; **5** dôq oh

daq ùh hìaq đòeq dèh manoh lùi ajang kan rabiaq kon mangai, mahaq ajang kan itai da Boc Plình. **6** Hnoq anoe qmang aih, nhèn hnài kan rabiaq am ka bòe mangai khoe gêh mangai, mahaq ùh xài enh kan rabiaq ta qnhòng kô, ùh xài kan rabiaq enh mangai wèq qnhòng kô, aih bòe mangai padon raliang hnhung. **(aiōn g165)** **7** Nhèn hnài kan rabiaq da Boc Plình, aih raq kan hlèp ma khoe cadōc enh bòe qnhòng adroe, Boc Plình ma khoe palauq đòeq am da kan ranhòm bèn. **(aiōn g165)** **8** Mangai ma wèq cwìang ta qnhòng kô ùh i moèq ngai leq ma loq trong aih, majah qmang aih tàng joq wì loq wì khoe ùh tiang đình Chuaq ranhòm talong pagat. **(aiōn g165)** **9** Mahaq i bàu achìh rameh: “Aih bòe yiniq mat qnhòq hnoq, don qnhòq tàng, Manoh mangai hadai qnhòq hèm trùh. Mahaq Boc Plình khoe padon qmòe bòe yiniq aih, đòeq am dèh ka mangai loq waq ka Haq”. **10** Boc Plình khoe canòm ka Yiang Hadròeh đòeq mahno ka bèn bòe yiniq aih, majah qmang aih Yiang Hadròeh sreo loq dǒng rìm yiniq, loq sam bòe kan hlèp ta manoh Boc Plình. **11** Majah qmang aih, tàng joq ùh xài yiang oe ta cliac manoh mangai, aih cabô ma loq ta manoh cliac mangai qmang leq? Hanoh qmang aih, ùh i cabô loq ka manoh Boc Plình enh gùng ka Yiang Hadròeh da Boc Plình. **12** Yiang bèn ma khoe jah manòeq kô ùh xài loh enh cröng taneh, mahaq bèn khoe jah yōc enh Yiang Hadroèh da Boc Plnh, đòeq bèn loq canau ka bòe kan tabòeh bèn ma jah enh Boc Plình; **13** anoe trùh kan tabòeh aih, nhèn ùh yōc kan rabiaq kon mangai đòeq hu hnài trong aih, mahaq canòm kan rabiaq enh Yiang Hadròeh, yōc bàu yiang anoe hnài trong

iang. **14** Mangai ùh i ka Yiang Hadròeh ùh lùi bòe yiniq trùh enh Yiang Hadròeh, majah qmang aih haq aih hnoq trong aih budàng kan ranhùa, ùh hlàt loq majah qmang aih ep hadro ngan tiaq trong yiang. **15** Mahaq mangai i yiang aih haq hadro ngan rìm yiniq, cla haq hadai ùh hìaq ep dèh ka cabô hadrah ka rađeh. **16** Majah qmang aih, mangai leq ma khoe loq ta manoh Boc Plình, đòeq hu hnài Haq? Mahaq da bèn aih i manoh da Christ.

3 Qmang aih, oh daq cadrì sam oh daq calô, au enh capoch tuàng ka pì qmang ka mangai rìh tiaq Yiang Hadròeh mahaq ùh jah, mahaq qmang ka mangai oe raq xech akia, tìah ka kon hin enh dalam ka Christ. **2** Au yōc diac tōh qmi oh daq, ùh qmi sam dahwèq cadoq, majah qmang aih oh daq ùh hlàt acaq, trùh manòeq dua qnhòq hlàt, majah qmang aih oh daq oe raq qnhòq waq. **3** Joq, enh dalam pì oh daq oe raq i kan tagit, talech aih ma ùh joq oh daq oe raq ta xech akia rìh tìah ka mangai crōng taneh kô qmòh? **4** I qnah ngai doe: “Au tiaq Phaulo, qnah ngai doe: Au tiaq Abolo, qmang aih pì i crài cleq ka mangai qnoeq qmòh? **5** Abolo aih cabô? Èh Phaulo aih cabô? Aih bòe mangai hapōng, enh wa aih oh daq khoe jah lùi, wa mangai broq dèh hra trong Chuaq khoe thê. **6** Au khoe pìt, Abolo khoe pùc mahaq Boc Plình ma broq ka yòng kèn. **7** Qmang aih, mangai pìt mangai pùc dìq ùh loh cleq, mahaq Boc Plình ma broq ka yòng kèn. **8** Mangai pìt sam mangai pùc dìq daq adàng ka dabau, mangai jah dèh hra kan baha mac deh wa ma khoe broq pang leq. **9** Nhèn kô hanoh mòeq bua wiang patih ka Boc Plình, oh daq aih rùang da Boc Plình abèq, hnim da Boc

Plình broq. **10** Tiaq kan tabòeh Boc Plình am, au khoe tàc xàn hnim qmang ka mangai thòq rabiaq, i mangai qnoeq trùh broq enh qnhèq ka aih, mahaq mangai leq mangai meh ep rabiaq đeh hra yiniq leq wì ma broq enh qnhèq ka xàn aih. **11** Majah qmang aih, ùh i cabô jah broq ònh xàn qnoeq enh gùng ka xàn ma khoe tàc: aih Jesus Christ. **12** Tàng i cabô yōc wang, bac, hmo ngōc, long, nhat croh, hri croh đòèq broq enh qnhèq ka xan aih. **13** Yiniq broq da tang ngai thòq dìq jah paqnoh hnoq dōng. Majah qmang aih hi trùh Hì bòe yiniq broq aih hi jah qnoh dōng taqngah, haq jah paqnoh ta ùnh, ùnh èh ma qnhro ngan yiniq broq da tang ngai. **14** Tàng yiniq broq da cabô khoe broq enh qnhèq ka xàn aih ùnh ùh hìa cheo, aih èh haq hi jah đèh kan baha. **15** Tàng yiniq wì haq khoe broq ùnh cheo dōng, aih pi jah baha cleq. Cla haq aih èh jah đèch, mahaq tìah ka bu clech ka ùnh. **16** Oh daq ma ùh qnì rađeh raq hnim kùh waiq Boc Plình, Yiang Hadròeh da Boc Plình oe enh dalam ka oh daq qmòh? **17** Tàng i cabô raliang đac hnim kùh waiq da Boc Plình, aih èh Boc Plình raliang đac mangai aih. Majah qmang aih, hnim kùh waiq da Boc Plình aih hadròeh, oh daq raq hnim kùh waiq. **18** Ngan oq, apaq qnùt đèh rađeh: Taqne oh daq tàng loq i mangai leq xoh đèh rabiaq top dua qnhòng kô, thê drah wìa mangai ùh qnì đòeq hu jah rabiaq, (aiōn g165) **19** majah qmang aih rabiaq tiaq top dua qnhòng kô, enh ngèa Boc Plình aih kan blùng. Qmang ka bàu khoe achìh: “Chuaq rùp mangai rabiaq ta kan rabiaq cla wì”. **20** Èh hòm: “Chuaq loq ka manoh mangai rabiaq, Haq loq trong wì hèm aih dìq ùh loh cleq”. **21** Qmang aih, pi dùh catèh

cabô broq mangai qnong ngoe pì hòm! Rìm yiniq oe dìq ta oh daq. **22** Yac ka Phaulo, yac ka Abolo, yac ka Sepha yac ka crõng taneh kô, yac ka kan cachít, yac ka yiniq manðeq kô, yac ka bòe yiniq tabla kô èh; aih dìq da oh daq, **23** oh daq aih da Christ, Christ aih da Boc Plinh.

4 Dìq dõng ka oh daq, thê pì ngan nhèn qmang ka hapõng da Chirst, mangai wèq kan hlèp da Boc Plinh. **2** Manðeq kô, wì ma ngèh mangai wèq kan hlèp aih ep ùh hìaq loq gópla. **3** Cla au manðeq kô yac ka oh daq tah hadrah ka au, yac ka hñim hadrah da kon manai hadrah au, dua au ùh lèt cleq, cla au hadai ùh hadrah raðeh. **4** Majah qmang aih au ùh i hnoq raðeh i yiniq lui cleq, mahaq au ùh canòm ajang aih ðòeq hu jah taq atoq: Chuaq aih Mangai ma hadrah au. **5** Qmang aih, yac ka i yiniq cleq apaq rênh hadrah hrinh thê gòm Chuaq trùh, Haq jah paqnoh taqngah yiniq wì ma cadoc ta clam, mahnu trong wi ma qnac ta manoh, jò aih èh cleq ma troq ka manè, tang ngai hi jah dèh hra enh Boc Plinh. **6** Dìq ka oh daq cadrì oh daq calô, manðe au majah anoe trùh cla au sam Abolo aih taiq oh daq, waq ka oh daq ngan dua ma: “Apaq cadiang loe ka bàu khoe achih”, èh apaq i manoh loq cateh, tiaq mangai kô hu tajraq ka mangai qnoeq. **7** Majah qmang aih, cabô ma khoe lah ìh yeo crài ka mangai qnoeq. I yiniq cleq ìh ma qnhòq jah yõc deh qmòh? Tàng joq ìh khoe jah yõc dõng deh, meh ìh oe raq cateh tìah ka raðeh qnhòq hmaq jah qmòe cleq? **8** Oh daq khoe tàu rìm yiniq, khoe jah panàc, padrõng, ùh i canòm ka nhèn, oh daq khoe wìa tìah ka bùa, joq ngèh ka oh daq jah wìa bùa dôq nhèn hadai jah wìa bùa tì oh daq! **9** Majah qmang aih au

hèm Boc Plình khoe yōc qnoh ma broq mangai Tiaq cla
atìq dōng ka mangai qnoeq, tìah ka mangai i tuiq wì rùp
clēh gồm toq hì cachìt, tìah kan racaih ka crōng taneh kô,
đòeq ka bình plình sam kon mangai wiang ngan hnoq. **10**
Nhèn blùng dèh ka Christ, mahaq oh daq jah rabiqaq enh
dalam ka Christ, nhèn ùh nèn oh daq jah tadêh, oh daq
wìa gucraq nhèn loh ka hamoq. **11** Trùh manđeq nhèn oe
raq pangot hrah croh ranđong, hyah hyai, wì tep da nhèn
tabōc, gäu nhèn ùh i mòeq toq kùa po đòeq ha nhàng. **12**
Nhèn yōc deh tì kōng hu patih abroq, jò wì ra òh hamaiq
ka nhèn, nhèn caxoeq sôq ramot ka wì, jò wì ti rùp nhèn
chìuq àt, **13** jò wì tapcoch dech ka nhèn, nhèn tèu lem laq
alàng, trùh manđeq nhèn tiah taiq ka kan padùih tìah
taiq ka cràc ta crōng taneh. **14** Au achìh qmang kô ùh xài
waq ka oh daq camaih mahaq đòeq pariaq oh daq qmang
ka kon cla au ma ha-och dèh. **15** Majah qmang aih, yac
ka enh dalam ka Christ oh daq i mòeq jàt mùan mangai
hnài, mahaq oh daq ùh i bàc ngai baq, majah qmang aih
au khoe yōc Bàu lem đòeq hauang oh daq ta dalam ka
Jesus Christ. **16** Au yōc yiniq aih pariaq oh daq: Drah top
dua au”. **17** Aih ìq, au majah khoe thê Timothe, haq aih
mangai au loq waq deh, mangai kon dìq ka manoh ti au ta
Chuaq, trùh ti oh daq, đòeq bahmàng hlài ka oh daq loq
trong da au enh dalam ka Christ, hloe sam bàu au khoe
hnài qmang leq roc Tagop Hadròeh oe jàp jìa. **18** I boè
mangai enh dèch ka hnhè rađeh, hèm dèh au loq pi trùh
ta oh daq hòm. **19** Mahaq tàng lem ka manoh Chuaq, au
rênh trùh ti oh daq, đòeq ngan waq ka loq, ùh xài ngan
toq bàu capoch bòe mangai loq ka hnhè aih, mahaq đòeq

ngan padren wì haq dàng leq cadèh. **20** Majah qmang aih, diac Boc Plình ùh xài toq ajang bàu capoch mahaq oe ajang paren. **21** Oh daq enh maleq? Enh au wê long dùi trùh ti oh daq loq au qnàng kan loq waq sam manoh lem hu trùh ti pì?

5 Au i hìa bàu anoe jàp jìa, wì doe taqne oh daq i kan tango anang, tango qmang aih yac ka wì mangai enh gùng ji ùh lòh: Aih taqne oh daq i ngai tango ka cadrì dèh baq. **2** Aih cadoe oh daq oe ka hnhè rađeh! Oh daq ùh i ha-on mangò, dôq jah hnan qnoh đac mangai tango aih loh ma khoe ka oh daq! **3** Au kô, yac cadoe chac au hangai mahaq oe ti yiang au oe ti pì. Au khoe dèch taqmòq tuiq ka mangai broq qmang aih tìah ka au hadai oe ti pì, **4** qmang aih jò pì tagop ti dabau enh dalam ka yiniq Jesus Chuaq bèn, yiang au pajùm ti pì, cwìang itai Jesus Chuaq bèn oe ta aih **5** canòm ka cwìang aih, bèn jao mangai kô ka Satan raliang đac chac haq, dôq trùh hì da Chuaq mahua yiang mangai kô jah dèch. **6** Oh daq ka hnhè rađeh ùh i lem cleq! Oh daq ma ùh loq toq criah blo broq bình ka cađap dàc rèu dǒng qmòh? **7** Drah broq ka rađeh hreo ka blo dùnh beq, đoeq oh daq jah tìah ka dàc neo ùh hìa q tah blo qmang ka oh daq aih benh ùh i blo. Majah qmang aih, Christ aih kon trùu ramènh Pancwa da bèn, wì khoe jêh. **8** Qmang aih bèn wèq ramènh, apaq wê blo dùnh, blo ngang dù mahaq sam bênh ùh tah blo, bênh da trong lem jang sam trong joq qnàng. **9** Ta jàiq yàng adroe au achìh ka oh daq i tanap apaq taqmùt ka mangai loq tango, **10** aih ùh xài au anoe pajùm hloe sam angai loq tango anang, mangai daiq plai, mangai loq lùac sam mangai

kùh waiq kiac qmù ta qnhòng kô. Tàng joq qmang aih ajoq oh daq ep cađac crõng taneh kô. **11** Mahaq au achìh đoeq doe ka oh daq apaq broq bua ti mangai doe hadai bèn, mahaq tango, daiq plai, kùh waiq kiac qmù, xoc hanip, bù bia, loq lùac đac mangai qnoeq, ùh acaq pajùm ti mangai qmang aih. **12** Mangai enh gùng aih ep cleq ka au ti hadrah? Ma ùh joq oh daq ep hadrah mangai enh dalam qmòh? **13** Mangai enh gùng i Boc Plình hadrah wì haq. Drah qnöh đac mangai dù loh khoe ka oh daq.

6 Jò oh daq loh yiniq ti dabau, gleq majah hùa qnöh ka mangai ùh taq atoq hadrah, ma ùh đoeq ka mangai hadròeh hadrah. **2** Oh daq ma ùh loq bòe mangai hadròeh kô èh ma hu hadrah đìq crõng taneh qmòh? **3** Oh daq ma ùh qnì bèn kô èh hadrah bòe bình plình qmòh? Loq ka bòe yiniq qnhòng kô. **4** Qmang aih, jò oh daq loh bàu ka dabau tiaq bòe yiniq ta qnhòng kô, hagleq majah yōc bòe mangai rìh ùh loh qmòe cleq enh ngèa Tagop Hadròeh broq mangai hadrah! **5** Au doe qmang aih doq oh daq camaih. Enh dalam ka oh daq ma ùh i ka mangai yeo rabiaq đoeq hadrah taqne oh daq bèn qmòh? **6** Mahaq jò oh daq loh yiniq, cadoe qnöh enh ngèa ka mangai ùh lùi! **7** Joq qmang aih, oh daq tah hadrah ka dabau aih khoe pi blêq. Hagleq ma ùh waq àt, aih xài yeo lem? Hagleq ùh waq da haq dôq wì hnen rađeh aih xài yi hnau! **8** Mahaq cla oh daq raq broq ùh troq trong, ti habo đac ka wì, khoe aih tah hadrah glòq ka oh daq. **9** Oh daq ma ùh qnì bòe mangai ùh taq atoq i ka jò leq jah diac Boc Plình? **10** Cla apaq qnùt rađeh: Mangai loq rùp tango, kùh waiq dua qmù, mangai taqnong ka wì, mangai gucalô

waq ka hadai gucalô, mangai gucadri waq hadai gucadri, mangai atung, mangai daiq plai, mangai bù bia, mangai toq hanip, mangai loq ta atam, dìq döng ùh maleq jah diac Boc Plinh. **11** Nèh haq, taqne oh daq hadai i qnah ngai rìh qmang aih, mahaq canom ka yiniq Jesus sam Yiang Hadroeh da Boc Plinh bèn, oh daq khoe jah qnheo hreо, jah hadròeh, khoe jah creo mangai taq atoq. **12** Pi doe “Rìm yiniq au dìq jah broq”, mahaq ùh xài rìm yiniq diq i lòeq; “Au jah broq dìq rìm yiniq”, mahaq au ùh dôq yiniq cleq jah panan au. **13** Dahwèq acaq đòeq ka cliac, cliac đòeq ka dahlwèq acaq, mahaq èh Boc Plinh raliang đac dìq baiq. Mahaq chac hamac ùh xài palauq đòeq ka tango anang, mahaq đòeq ka Chuaq, èh Chuaq đòeq ka chac hamac. **14** Boc Plinh khoe broq ka Chuaq rìh hlài, èh Haq yōc deh cwìang aih raq đòeq broq ka bèn hadai rìh hlài. **15** Oh daq ma ùh qnì chac hamac bèn aih xài jènh tì da Chirst qmòh? Qmang aih bèn akhòh yōc jènh tì da Christ đòeq taqmùt broq mòeq ti mangai broq đì ùh? Ùh jò leq! **16** Oh daq ma ùh qnì cabô taqmùt ti mangai broq đì, aih khoe wìa mòeq xech ti haq? Majah qmang aih khoe i bàu doe rameh: “Wa jah wìa moeq xech akia”. **17** Mangai leq taqmùt pajùm ti Chuaq aih èh haq jah wìa moeq manoh yiang ti Haq. **18** Drah wia ka trong tango anang, yac ka wì broq yiniq lui cleq, aih dìq enh gùng ka chac hamac cla, mahaq cabô caqnìh rađeh ta kan tango anang aih i tuiq ka chac cla. **19** Oh daq ma ùh qnì deh ka chac hamac aih raq hnim kùh waiq da Yiang Hadròeh, Yiang qnang oe enh dalam ka oh daq, Yiang oh daq ma khoe jah enh Boc Plinh? Chac oh daq pi oe xài

da cla hòm? **20** Oh daq khoe jah baxon yōc hlài dìq jaq canaq. Qmang aih, yōc chac hamac oh daq đòeq dèch kan ranhòm ka Boc Plinh beq.

7 Anoe trùh bòe yiniq oh daq khoe achìh jàiq bòch au, au hèm gecalô ùh yōc mai aih yeo lem. **2** Mahaq waq ka jah wia ka rìm trong tango anang, mangai gecalô ep yoc mai, mangai cadrì ep yoc ong. **3** Gecalô ep gêh yiniq ong mai deh ka cadrì, cadrì haq hadai qmang aih. **4** Mangai mai ùh i ka cwiang cleq ta chac cla radeh, mahaq đòeq dèh ka ong. Hadai qmang aih, mangai broq ong hanoh ùh i ka cwiang cleq ta chac cla radeh mahaq dôq dèh ka mai. **5** Apaq blah yoc da dabau cwiang aih, enh gùng ka jò cla wa baiq ngai khoe mòeq manoh ti dabau oe đò hòeq, đòeq hu waiq khàn, khoe aih drah tawìh hlài ti dabau, yùq èh Satan loq padô qnùt jò oh daq wèq radeh ùh jah. **6** Au caqnaih qmang aih, ùh xai au thê broq. **7** Au ma enh aih rìm ngai jah tìah qmang ka au, mahaq Boc Plinh khoe am dèh hra tang ngai, mangai kô qmang kô, mangai tai qmang tau. **8** Qmang aih, au anoe ka mangai qnhòq yoc ong mai sam mangai hadrô: aih yeo lem ka pì tàng jah oe qmang ka au. **9** Mahaq tàng wèq radeh ùh jah, pì khòh yoc ong mai beq, aih ùh hnau ka đòeq kan enh tachac bùh pì qmang ka ùnh. **10** Anoe truh mangai koe yoc ong mai, aih au, mahaq uh xài au, ma joq aih Chuaq, thê mai ùh jah cađac ong, **11** (mahaq tàng khoe cađac, haq khòh oe qmang aih raq, apaq yoc ònh ong qnoeq, ùh meh ep hatroq hlài dè h ti ong) yac ka ong hadai ùh khòh cađac deh mai. **12** Mangai ma qnoeq hòm, uh xài Chuaq, mahaq au ma doe: Tàng cabô leq i mai ùh pajùm

manoh lùi tioh daq, mahaq chìuq rìh pajùm trùh lùch ka qnhòng ti rađeh, aih ùh jah cađac. **13** Gucadri hadai qmang aih, i ong ùh pajùm mòeq manoh lùi ti rađeh mahaq chìuq rìh pajùm lùch ka qnhòng ti rađeh, aih èh mai hadai ùh jah cađac ong. **14** Majahq qmang aih, ong ùh lùi Chuaq mahaq haq jah hadròeh hatiaq dèh mai, mai ùh lùi Chuaq mahaq haq jah hadròeh hatiaq deh ong, ùh qmang aih dèh, boè kon oh daq nèh ùh i hadròeh, yàng manđeq dìq khoe hadròeh. **15** Tàng mangai ùh lùi enh ta cađac, aih hi dôq haq cađac: Jò aih yac ka oh daq calô, oh daq cadrì ùh ep tawac cleq. Boc Plình khoe creo ka oh daq rìh ka catèm. **16** Mangai broq mai, ìh maloq broq braiq ìh jah dèch deh ong? Mangai broq ong, ìh maloq broq braiq ìh jah dèch dèh mai? **17** Hnoq anoe qmang aih, rìm ngai dìq ep rìh qmang ka Chuaq khoe am kac dađeh, tiaq qmang ka Boc Plình khoe creo. Aih bàu au ma khoe hnai dìq dong rìm Tagop Hadròeh. **18** I mangai leq khoe broq ranenh kat akia, atìq ka aih jah Chuaq creo? wèq deh qmang aih raq. I ka mangai leq qnhòq broq ranenh kat akia mahaq jah creo? Ùh dùh broq ranenh kat akia. **19** Kat akia ùh i hagleq, yac ka ùh kat akia hadai ùh i hagleq, trong ma khòh nhet aih wèq ranenh da Boc Plình thê. **20** Mangai leq jò majah creo nèh haq oe caloeh leq, ep oe dèh caloeh aih raq. **21** ìh jah creo jò ìh qnang broq hapong ùh xài? Apaq lèt dèh, mahaq tàng i dua jah claih ka broq dìc, aih apaq batrò. **22** Majah qmang aih, mangai qnang broq hapong jah Chuaq creo, aih Chuaq khoe caqnaih haq, hadai qmang aih diq, mangai qnang oe ùh i tawac cleq mahaq jah creo, aih haq

ep broq hapong da Christ. **23** Oh daq khoe jah rot hlài diq jah canaq, apaq broq hapong cabô hòm. **24** Jò jah creo oh daq oe caloeh leq, oh daq ep oe qmang aih raq enh ngèa Boc Plinh. **25** Anoe trùh mangai ùh yoc ong yoc mai, au ùh i jah bàu leq enh Chuaq thê; mahaq canòm ka kan loq waq enh Haq, au khoe wia mangai ùh ngwan ka lùi, dài au majah i bàu hnài. **26** Taiq kan nansa padon trùh, au hèm mangai gucalô oe deh qmang aih raq ma yeo troq. **27** Ih khoe yoc mai ajoq? Apaq ti chaq trong hu cađac, ih qnhq yoc mai ajoq? Apaq chaq mai. **28** Mahaq tàng ih yoc mai, ùh i troq cleq, tàng mangai gucadri sriu yoc ong hadai uh troq cleq. Mahaq manai yoc ong mai i kan salep ta chac, au enh oh daq claih trong aih. **29** Au enh anoe ka oh daq qmang kô, bèn oe crong taneh ùh dùnh. Pang kô ta èh magai i mai khòh ka mangai ùh i ka mai; **30** mangai qnang hmoe khòh tìah mangai ùh hmoe, mangai qnang bùi, khòh tìah ka magai ùh bùi, mangai qnang rot khòh qmang ka mangai ùh rot jah cleq; **31** managai i kùng hang ta crong taneh khòh qmang ka mangai ùh i cleq, majah qmanga aih crong taneh bèn ma hnoq kô èh hi hnhung. **32** Au enh dìq ka oh daq ùh bakènh tawac qmè cleq. Mangai leq ùh yoc mai aih haq jah patih toq ka Chuaq, chaq trong broq lem manoh Chuaq. **33** Mangai leq khoe yoc mai aih èh haq patih ka yiniq broq ta qnhòng kô, chaq trong broq lem manoh deh mai. **34** Mangai gucadri i ong sam mangai sriu hadai crài ka dabau: Mangai ùh yoc ong, aih haq jah patih toq ka Chuaq, mahaq da mangai ma i ong aih haq patih toq boè yiniq broq ta qnhòng kô, waq ka lem manoh deh ong. **35** Au anoe qmang aih đoèq i

lòeq ka oh daq, ùh xài au khech tát pì, mahaq đòeq yong oh daq tiaq trong matroq dôq oh daq ùh hìaq rangòt ta manoh jò patìh ka Chuaq. **36** Tàng joq i mangai leq hèm đeh kô ùh troq, khoe dôq ka mangai òq bàu yoc dabau ep gòm rađeh loh qmòe ka craq hadrang, manòeq ko haq enh yoc deh mangai aih, aih dôq wa yoc dabau, qmang aih troq. Haq ùh i ka tuiq cleq. **37** Mahaq tàng mangai aih khoe qnac ta manoh blinh ùh yoc mai majah qmang aih haq blêq dèh chac, qnah hòm haq hèm brì ùh yoc mangai đeh ma khoe tèu bàu, haq aih broq troq. **38** Mangai yoc gucadri aih broq troq mahaq mangai ma ùh yoc gucadri aih broq yeo troq hòm. **39** Ong oe rìh pang leq, cadrì haq ep tiaq dèh ong pang aih, tàng ong cachìt, cadrì haq pi tawac cleq, waq toq hatroq ka manoh Chuaq, haq enh yoc cabô ùh loe. **40** Mahaq, tiaq manoh da au, tàng majah haq oe qmang aih raq yeo hlàu. Au loq jò au anoe qmang kô i Yiang Hadròeh da Boc Plình ta au.

8 Ta anoe trùh dahwèq tadreo kan kiac, bèn doe đeh kô dìq mangai loq. Mahaq kan loq broq ka mangai loq ka hnhè rađeh, yàng da kan loq waq aih ma broq dua lem. **2** Tàng i cabô doe đeh kô mangai loq, joq qnàng mangai aih qnhòq loq qmang ka rađeh khòh loq. **3** Mahaq tàng i mangai leq loq waq ka Boc Plình, Boc Plình loq ka mangai aih. **4** Qmang aih, anoe trùh trong acaq dahwèq khoe tadreo ka kiac qmù, bèn loq kiac qmù ta crong taneh kô aih dech do, i toq Boc Plình raq, enh gùng ka aih ùh i kiac leq hòm. **5** Joq wì doe i bàc kiac, qnah oe ta troc qnah oe ta haqneq (aih dài wì majah tadreo bàc kiac), **6** da bèn ma loq, i mòeq Boc Plình raq, aih Baq bèn, rìm yiniq loh

dìq enh Haq, bèn dìq rìh enh Haq, èh hòm i mòeq Chuaq
raq, aih Jesus Christ, rìm yiniq loh dìq enh Haq, bèn dìq
rìh enh Haq. **7** Mahaq ùh xài rìm ngai dìq loq qmang
aih. I qnah ngai oe raq hèm i kan kiac, dài jò wì acaq
dahwèq tadreo; kan ùh dràng aih broq ka manoh wì haq
loh ka pi hadròeh. **8** Mahaq ùh xài dahwèq acaq broq bèn
jah lem ka manoh Boc Plình, tàng bèn acaq dua ùh jah
cleq, ùh dua ùh hnhung cleq. **9** Rabiaq haq, apaq dôq kan
ùh tawac da bèn broq ka mangai ùh dràng catoeh ataq.
10 Majah qmang aih, mangai ma ùh dràng hnoq oh daq
mangai ma i kan loq haqngui cacaq ta hnim tadreo kan
kiac, aih wì ùh top dua acaq đeh diq qmòh? **11** Aih ajoq ih
yoc đèh kan loq, broq raliang đac mangai ùh dràng, aih
bòe oh daq Jesus Christ ma khoe cachìt am ka wì. **12** Jò pì
broq yiniq luiq đèh ka oh daq qmang aih, manoh wì haq
khoe ùh nèn loh ka habau tam, aih pì khoe broq yiniq lui
ka Christ. **13** Dài haq, tàng joq dahwèq acaq broq ka oh
daq au tacro, blinh au ùh acaq jam, đòeq au ùh hìaq wìa
nen ka oh daq catoeh. (aiōn g165)

9 Au ma ùh i cwìang cleq qmoh? Au ma ùh xài mangai
Tiaq cla? Au ma qnhòq hmaq hnoq Jesus Chuaq bèn ùh
xài? Oh daq ma ùh xai yiniq broq da au enh dalam ka
Chuaq qmòh? **2** Patiah đac haq, tàng joq au ùh broq
mangai Tiaq cla am ka mangai qnoeq, dua au broq mangai
Tiaq cla ka oh daq, majaq qmang aih oh daq raq teo abroq
da au enh dalam ka Chuaq. **3** Aih bàu au capoch cwaih
rađeh enh ngèa mangai enh tah hadrah ka au. **4** Nhèn
ma ùh i cwìang acaq ôq? **5** Nhèn ma ùh khòh qnong
mòeq ngai gucadri broq mai hu lam ti nhèn qmang ka

bòe mangai Tiaq cla qnoeq, qmang ka oh daq ta Chuaq, qmang ka Sepha khoe broq loq ùh xài? **6** Ahìaq toq au sam Banaba raq ma ep abroq hu jah acaq? **7** Alah i cabô acaq pua enh hnim cla hu lam tajêh? Alah i cabô pìt wùan nho mahaq ùh jah acaq plì. Alah i cabô ban triù mahaq ùh yoc diac tôh haq hu ban rađeh. **8** Au anoe qmang aih, ma xài qmang ka wì ma loq capoch yôt? Hset Ranenh ma uh anoe qmang aih? **9** Majah qmang aih ta Ranenh Moise i achìh: “Ìh apaq srôp mong bo qnang len qmau”. Boc Plình lèt ka bo ùh xài? **10** Haq anoe bàu aih ka bèn loq ùh xài? Joq! Qmang ka ma khoe achìh ka bèn rameh: “Mangai cai ta rùang ep jah tangèh men cai, mangai len qmau, ngèh ka jah đeh diq men len”. **11** Tàng nhèn khoe rai ka oh daq adrech trong mahua yiang, nhèn gat hlài dahwèq enh pì, aih i cleq ma ùh troq? **12** Mangai qnoeq khòh broq qmang aih enh qnhèq ka oh daq, loq ka nhèn? Hnoq anoe qmang aih, nhèn ùh yoc cwiang kô, xan cla nhèn raq chìuq xalep rìm trong, đòeq uh hìaq i cleq khech tát Bàu lem da Christ. **13** Oh daq ma ùh qnì, cabô patìh ta hnim kùh waiq, aih haq acaq ra mènh wì ma dèch ta hnim kùh waiq qmòh? Cabô patìh ajang prang tadreo, aih ajoq haq wiang jah axong enh aih qmòh? **14** Hadai qmang aih, Chuaq i doe: “Mangai leq hnài Bàu lem, aih haq jah ban rađeh sam Bàu lem”. **15** Mahaq au qnhòh lah yoc cwiang aih hu thê oh daq, au achìh jàiq kô ùh xài đòeq bòch cwiang aih, kô raq nen au jah catèh deh, au chìuq cahìt kan au ùh đòeq ka cabô blah yoc da au. **16** Majah qmang aih, jò au lam anoe Bàu lem, au ùh i ka nen jang leq đòeq hu catèh. Aih raq yiniq au au ep broq, ùh

anoe Bàu lem aih majeq kan habo ka au. **17** Tàng joq au lem bùi broq yiniq aih, au jah waq baha, tàng joq au uh enh broq, aih dua khoe thê au. **18** Aih èh au jah baha au cleq? Qmang kô! Au ùh yoc cwiang au ma khoe i qmang ka mangai anoe Bàu lem qnoeq, mahaq jò au anoe Bàu lem, au anoe qmòe dech ùh yoc baha. **19** Au ùh tawac ùh ep broq tiaq bàu cabô, mahaq au khoe broq rađeh wìa hapong rìm ngai, đòeq hu jah tam yeo bac ngai. **20** Oe ti mangai Juđa, au tìah ka mangai Juđa, waq ka jah mangai Juđa, ti mangai enh qneq ka ranenh, (hiloq ka au ùh oe enh qneq ka ranenh) au hadai tìah ka mangai enh qneq ka ranenh, đòeq au hujah mangai enh qneq ka ranenh; **21** oe ti mangai ùh i ranenh, (Yac ka enh ngèa Boc Plinh au ùh xài mangai ùh i ranenh, majah qmang aih au oe enh qneq ka ranenh da Christ), mahaq au hadai oe tìah ka mangai ùh i tiaq ranenh, đòeq hu jah mangai ùh tiaq ranenh. **22** Oe ti mangai ùh nèn, au hadai ùh nèn, đòeq hujah mangai ùh nèn, au khoe wìa rìm trong am ka rìm ngai, đòeq hujah dèch yac ka toq biaq ngai broq qmang leq dua au lènh. **23** Au broq rìm yiniq kô aih dìq broq ka Bàu Lem, đòeq au hadai wiang jah ta axong sôq ramot ta aih. **24** Oh daq ma ùh loq, tanòe wì ta cadàu cadêh, dìq ka wì cadàu, mahaq toq biaq ngai raq majah waq baha qmòh? Qmang aih, oh daq cadàu qmang leq đòeq hujah waq baha oq. **25** Dìq ka mangai ta cadàu cadêh aih, wì haq dênh ka rađeh bac trong, wì broq qmang aih đòeq jah kui cadoh riang loq om. Mahaq da bèn đòeq hujah kui cadoh riang ùh jò leq om. **26** Aih ìq, dài au ùh cadàu talìq, au jêh ùh xài au jêh cayeo; **27** mahaq au tabroq dèh ka

chac cla au ùh palap cleq, thê haq broq hapong au, ùh qmang aih broq braiq atìq ka au hnài wì qnoeq, yàng cla au aih cađac rađeh qmòh.

10 Majah qmang aih, au ùh enh dôq ka oh daq ùh qnì kan cadraq bèn dìq khoe oe enh qneq ka yùc, dìq ka wì khoe lam pagat ka diac raxìq, **2** đòeq Môise broq baptem ka wì haq enh dalam ka yùc xam enh qneq ka diac raxìq. **3** dìq ka wì khoe acaq dahwèq yiang, **4** rai ôq diac yiang, majah qmang aih wì haq ôq enh nòe hmo yiang ma tiaq wì haq, hmo aih aih raq Christ. **5** Mahaq taqne wì haq ja ka mangai ùh lem manoh Boc Plình, dài bac ngai wì haq majah khoe tacro cachìt tanòe braih kèn. **6** Bòe yiniq kô khoe loh qmang aih, đòeq broq dua hu hnài bèn, dôq bèn ùh hìaq ònh tiaq trong dù qmang ka wì aih khoe broq. **7** Èh hadai pi dùh kùh waiq radua qmù kiac qmang ka wì aih hòm, tìah ka bàu khoe achìh: “Wì haqngui acaq ôq, khoe aih padinh yòng pagôq racaih”. **8** Bèn apaq ti taqnong tango qmang ka wì aih ma khoe broq, taiq aih raq mòeq hì majah i baiq jàt piq mùan mangai cachìt. **9** Bèn hadai apaq qnhro Christ qmang ka wì ma khoe qnhro, taiq aih raq wì haq majah cachìt ka bìh kap. **10** Èh hadai apaq mamùc tìah ka wì khoe mamùc, taiq aih raq wì haq majah ep cachìt enh tì kòng tòinh plình palùng. **11** Bài yiniq kô khoe loh ka wì qmang aih đòeq broq dua am ka bèn, khoe achìh hlài đòeq hu pariaq bèn aih bài mangai ma rìh ta bài qnhòng atìq pulùch (**aiōn g165**) **12** Qmang aih, cabô loq xoh rađeh kô yòng cajap, rabiaq haq oq loq tacro. **13** Bài kan padô qnùt trùh ka oh daq, ùh i ka yiniq leq ma yi dôch ka padren kon mangai. Boc Plình

ùh tablòq manoh, haq ùh dôq ka oh daq glàm kan padô qnùt yeo loe ka padren oh daq, mahaq ta kan padô aih haq pèch trong ka oh daq hu jah loh, đòeq oh daq hlàt dràng. **14** Qmang aih oh daq da au, drah wia ka hangai trong kùh waiq radua qmù. **15** Au anoe ka oh daq aih au anoe ka bài mangai i manoh rabiaq, pì boq bàu au anoe kô: **16** Chrõng xôq ramot bèn manè apôi kô ma ùh xài khoe pajùm ti mahim da Christ qmòh? Bênh bèn ma goh kô aih ma ùh joq pajùm ka chac da Christ qmòh? **17** Majah qmang aih dìq deh mòeq toq bênh raq, dài bèn yac ka bàc ngai dua mòeq chac raq majah qmang aih bèn dìq pajùm ta mòeq toq bênh raq. **18** Ngan mangai Isorali beq! Bài mangai acaq jam tadreo aih ma ùh alùh pajùm ti prang tadreo qmòh? **19** Au anoe qmang aih au anoe cleq? Dahwèq ma dèch tadreo am ka qmù kiac aih i loh ranenh cleq, radua qmù kiac aih i loh cleq ùh? **20** Blinh ka ùh, mahaq dahwèq mangai enh gùng tadreo aih wì tadreo ka kiac chõc, ma xài wì tadreo ka Boc Plình. Qmang aih au ùh enh oh daq wiang taqmùt ti kiac chõc. **21** Oh daq ùh jah ôq doe chrõng da Chuaq khoe aih ôq doe chrõng da kan kiac, oh daq ùh jah acaq pajùm aniang ti Chuaq rai pajùm aniang ti kan kiac. **22** Ahìaq bèn enh broq ka Chuaq tarènh? Bèn ma yeo dêh ka haq? **23** Pì doe “Rìm yiniq au dìq khòh broq”, mahaq ùh xài rìm yiniq dìq i lòeq; “Rìm yiniq au diq khòh broq”, mahaq ùh xài rìm yiniq dìq broq dua lem. **24** Apaq i cabô hèm jah toq ka rađeh, mahaq mangai leq mangai meh hadai ep hèm ka mangai qnoeq diq. **25** Rìm dahwèq atech tanoe tech jam, dìq khòh rot acaq dõng, apaq tàng đeh yùq ta manoh

đòeq bòch dèh; **26** majah qmang aih, crǒng taneh kô xam rìm yiniq ta aih dìq da Chuaq. **27** Tàng loq i mangai ùh lùi akhen ka oh daq, oh daq enh lam, aih yac ka wì padon qnoh cleq, oh daq acaq cameh, apaq tàng đeh yùq ta manoh đòeq hu bòch dèh. **28** Mahaq tàng i mangai doe ka oh daq: “Ma kô khoe tadreo”, aih apaq acaq, đòeq lem ka manoh cla oh daq xam mangai ma khoe doe ka oh daq: **29** Au ùh anoe trùh manoh oh daq, mahaq anoe trùh manoh mangai tau. Wìa ka trong au loq đeh khòh broq mahaq dôq ka manoh mangai qnoeq ep hadrah ataq? **30** Tàng khoe manè apôi au men acaq, aih ji laiq dàng mòeq nà acaq au ma dôq ka wì qnoeq cwò ka rađeh? **31** Qmang aih, oh daq yac ka acaq, yac ka ôq, yac ka broq cleq, dìq broq đòeq Boc Plình jah ranhòm. **32** Apaq roh ka cabô kan catoeh, yac ka mangai Juđa, mangai Gorec, yac ka Tagop Hadròeh da Boc Plình; **33** drah qmang ka au kô, àu broq rìm trong dôq jah lem ka manoh bàc ngai, ùh chaq trong lem toq ka cla rađeh mahaq chaq trong lem am ka mangai qnoeq, đòeq wì haq hadai jah dèch.

11 Drah tiaq dua au, qmang ka cla au tiaq dua Christ. **2** Au manè oh daq loq hmàng ka au rìm trong, loq wèq bàu au ma khoe hnài oh daq. **3** Mahaq au enh oh daq loq Christ aih gàu da rìm ngai gucalô, mangai gucalô aih gàu da mangai cadrì, Boc Plình aih gàu da Chirst. **4** Rìm ngai guca lô yac ka wì haq waiq khàn, yac ka capoch bàu pajàu tàng wì haq paclùm dèh gàu, aih wì haq baxep dèh gàu. **5** Mahaq mangai gucadrì yac ka haq waiq khàn, yac ka haq capoch bàu pajàu, tàng haq ùh yōc mù paclùm dèh gàu, aih haq baxep dèh gàu: ùh i crài cleq ka haq khoe got gàu

ta nguah. **6** Tàng mangai gucadri ùh yōc mù paclùm dèh gàu, aih drah got ta nguah dōng beq. mahaq tàng gucadri hnoq got xàc gàu aih loq camaih, aih ep baclùm gàu. **7** Mangai gucalô ùh dùh yōc mù paclùm gàu majah qmang aih, haq aih qmù da Boc Plinh, kan ranhòm da Boc Plinh. **8** Majah qmang aih gucalô ùh loh enh gucadri, mahaq gucadri ma loh enh gucalô. **9** Èh hadai ùh xài taiq gucadri majah broq loh gucalô, mahaq gucadri aih ka gucalô. **10** Aih iq, taiq bòe bình plinh, dài haq gucadri majah ep waq ka i teo tagàu đòeq hu hadro cwiang rađeh ma canòm. **11** Mahaq enh dalam ka Chuaq, gucadri ùh xài enh gùng ka gucalô, gucalô ùh xài enh gùng ka gucadri. **12** Qmang ka gucadri khoe loh enh gucalô, aih gucalô hadai hauang loh enh gucadri, dìq baiq loh enh Boc Plinh. **13** Cla pì oh daq boq qmang kô beq: Gucadri waiq khàn ka Boc Plinh mahaq ùh waq yōc mù baclùm gàu aih atroq? **14** Ùh xài bèn khoe loq đeh: Tàng mangai gucalô rong xàc yōh aih ajoq kan camaih? **15** Mahaq, tàng mangai gucadri rong xàc yōh aih ma ùh xài kan ranhòm da haq? Majah qmang aih khoe am ka haq xàc yōh, bu dàng mù clùm gàu diq. **16** Tàng loq i cabô tarahen trong kô, nhèn ùh hmaq qmang aih, Tagop Hadròeh da Boc Plinh hadai ùh hmaq qmang aih. **17** Au anoe ka oh daq bàu kô, ùh xài đòeq manè oh daq, majah qmang aih jò oh daq tagop ti dabau, ùh i lòm broq ka pì yeo lem tam mahaq kiang broq ka pì yeo hamoq tam. **18** Angoe aih, au i tàng jò oh daq Tagop, i kan loq ti lah đac dabau, au di broq ka lùi bàu aih. **19** Majah qmang aih, taqne oh daq hi loq ka i kan loq ti lah đac dabau, aih đòeq hu canau ka mangai leq

ma joq qnàng dìq ka manoh. **20** Aih ìq, jò oh daq tagop oe mòeq nòe ti dabau, aih pi oe xài acaq Pua Hadròeh da Chuaq hòm. **21** Majah qmang aih, jò haqngui acaq mangai dahuiq acaq dèh hra, qnah ngai pangot đeh, qnah ngai panàc loh ka bù bia. **22** Oh daq ma ùh i dèh hním hu acaq? Ahìaq pì dù đac Tagop Hadròeh Boc Plình, enh broq ka mangai ma ùh i đeh ep camaih ka rađeh? Au anoe ka pì qmang leq kô? Au i khòh manè pì loq ùh? Trong kô joq au ùh lòm manè oh daq! **23** Majah qmang aih au khoe jah enh Chuaq trong au ma hnài oh daq: Chuaq Jesus mang wì ma blòq đac haq, yōc bênh, **24** jò haq khoe manè apôi, haq goh bênh aih rai doe: “Kô chac au, chac ma khoe am ka pì, broq qmang kô đòeq hu hmàng trùh au” **25** Hadai qmang aih, khoe ka acaq di xèq, Haq dèch doe chröng rai doe: “Chröng kô aih tajao maneo oe ta ma him au, jò pì ôq broq qmang kô đòeq hu hmàng trùh au. **26** Aih ìq jò leq oh daq acaq bênh kô, ôq doe chröng kô, pì anoe kan cachìt da Chuaq trùh hloe hì haq wìh hlài. **27** Qmang aih mangai leq ùh tajì ka acaq bênh ùh tajì ka ôq chröng da Chuaq, aih èh haq ep pòq yiniq lui ka chac ka ma him Chuaq. **28** Aih ìq rìm ngai majah ep ngan hlài rađeh adroe ka acaq bênh kô, ôq chröng kô; **29** majah qmang aih, mangai leq pi qnì canau ka chac Chuaq mahaq dua acaq bênh rai ôq chröng aih, aih haq acaq ôq kan hadrah ka rađeh. **30** Aih raq, dài taqne oh daq majah i bàc ngai ùh hröc yiniq, xam bàc ngai cachìt. **31** Mahaq tàng bèn loq tiboq hlài rađeh, aih bèn khoe ùh ep pòq kan hadrah. **32** Mahaq jò Chuaq hadrah bèn, aih haq ɓat bèn, đòeq bèn ùh hìaq pòq yiniq lui pajùm ka

mangai ta crōng taneh kô. **33** Qmang aih, oh daq da au jò pì tagop dabau hu acaq pajùm, ep gòm dabau. **34** Tàng i cabô pangot, aih haq chônh acaq dèh ta hnim, dôq oh daq ùh hìaq tagop dabau đòeq hu pòq wê kan hadrah. Yiniq qnoeq èh, jò au trùh au hi taqmroq hlài.

12 Manòeq kô, au ùh enh ka oh daq ùh qnì qmòe cleq ajang kan tabàih yiang. **2** Oh daq loq jò bèn oe raq mangai enh gùng, yac ka trong leq dìq khoe tìu tiaq radua qmù làu, mac maiq ka wì enh qnong taleq tameh. **3** Aih raq dài au majah anoe ka oh daq, ùh i cabô i Yiang Hadròeh Boc Plình ma ti doe: “Chua Jesus troq ka ra-òh, hamaiq”. Tàng joq ùh i ka Yiang Hadròeh hadai ùh i cabô doe ka Jesus aih Chuaq. **4** I bac kan tabàih crài ka dabau, mahaq dua mòeq Yiang Hadroèh raq. **5** I bac yiniq patìh crài ka dabau, mahaq hadai mòeq Chuaq raq. **6** I bac trong abroq crài ka dabau, mahaq dua mòeq Boc Plình, aih raq Mangai broq rìm yiniq oe enh dalam ka rìm ngai. **7** Yiang Hadròeh patô am enh dalam rìm ngai, đòeq mangai leq mangai meh hadai jah lòeq pajùm. **8** Mangai kô canòm ka Yiang Hadròeh haq jah màiq bàu rabiaq, mangai meh hadai canòm ka Yiang Hadròeh aih jah màiq bàu capoch i kan loq. **9** Enh Yiang Hadròeh, mangai kô jah manoh lùi, hadai enh Yiang Hadròeh aih mangai tau jah màiq broq brêh ka mangai yinìq. **10** Qnah ngai jah màiq broq kan halac, qnah ngai jah capoch bàu pajàu, qnah ngai loq hadro bài kiac, qnah ngai jah tapoch bài bàu craq crài ka dabau, qnah ngai jah màiq loq anoe hlài bàu aih. **11** Bài yiniq aih dìq loh enh mòeq Yiang Hadròeh, tiaq dèh manoh haq enh lah axong am ka tang ngai. **12** Tìah ka

chac aih mòeq raq, mahaq i bàc hamenh, tìah ka hamenh ta chac yac ka bàc mahaq dua wìa pajùm mòeq chac raq. Christ i crài cleq qmang aih. **13** Majah qmang aih bèn yac ka mangai Juđa, yac ka mangai Gorec, yac ka mangai broq hapđong, yac ka mangai broq dìc cabô, dìq khoe ɓaptem pajùm ta mòeq Yiang Hadròeh đòeq wìa mòeq chac raq, èh hòm bèn dìq hadai khoe ôq pajùm mòeq Yiang Hadròeh. **14** Chac hadai ùh xài i palap mòeq hamenh, mahaq bàc hamenh. **15** Tàng jènh doe: “Au ùh xài tì dài au majah ùh i pajùm cleq ka chac”, ma xài taiq nen aih haq ma ùh hatop ka chac. **16** Tàng don doe: “Au ùh xài mat, dài au ùh wiang pajùm cleq ta chac”, ma xài taiq nen aih haq majah pi pajùm ta chac. **17** Tàng chac aih dìq mat döng, aih èh bèn tàng xi cleq? Tàng dìq ta chac aih toq don, aih èh bèn xua xi cleq? **18** Mahaq manòeq kô Boc Plình khoe taqmroq bài hamenh ta chac bèn, am mòeq yiniq oe dèh mòeq nòe, qmang ka cla haq hnoq dèh lem tiaq manoh haq khoe dì. **19** Tàng mòeq hamenh raq aih èh chac oe ajang leq? **20** Qmang aih yac ka bàc hamenh mahaq dua mòeq chac raq. **21** Mat ùh khòh doe ka capiang tì: “Au ùh i ep cleq ka gè”. Gàu ùh khòh doe ka jènh “Au ùh i ep cleq ka pì”. **22** Majoq qnàng aih, yiniq cleq ta chac bèn hnoq haq ma yeo ùh nèn đeh, ma aih raq ma yeo khòh nhet. **23** Ta chac bèn hamenh leq bèn hèm haq ma yi ùh cra, ma aih raq bèn ma yeo khòh ngan, maleq ma ùh lem, ma aih raq bèn ma palàng. **24** Maleq ma khoe lem, ma aih ma oe ep palauq cadèh. Mahaq Boc Plình ma khoe taqmroq ta chac mangai bèn, hamenh leq ma yi hamoq aih đòeq haq jah caqmùh caqmàm, **25**

đòeq ta chac ùh hìaq i kan talah đac ka dabau, mahaq maleq ma meh loq wiang hèm ka dabau. **26** I maleq ta chac bèn ma jìq, aih ma qnoeq hadai wiang jìq, maleq majah caqmùh caqmàm aih èh maqnoeq hadai wiang lem bùi. **27** Manòeq kô, oh daq aih raq chac da Christ, oh daq aih la hamenh ta chac, mangai leq mangai meh i dèh hra nòe. **28** Boc Plình khoe broq ta Tagop Hadròeh, adroe aih mangai Tiaq cla, atìq aih mangai pajàu, khoe aih mangai hnài, tìa aih mangai broq kan halac, èh hòm mangai i màiq broq brêh ka mangai yinìq, mangai loq hanò, mangai đòeq ti ranenh, mangai capoch bài bàu craq crài. **29** Rìm ngai aih dìq mangai tiaq cla döng qmòh? Rìm ngai aih dìq pajàu döng qmòh? Rìm ngai aih dìq mangai hnài döng qmòh? Rìm ngai dìq broq kan halac döng qmòh? **30** Rìm ngai dìq i màiq broq brêh kamangai yinìq qmòh? Rìm ngai dìq capoch bài halac qmòh? Rìm ngai dìq loq anoe hlài bài halac aih doe cleq qmòh? **31** Drah tangèh đòèq jah kan tabàih ma yi kèn döng. Manòeq kô èh, au padon patô ka oh daq trong ma yeo lem hòm.

13 Yac ka au loq tapoch dìq döng ka bài kon mangai xam bài bình plình, mahaq ùh i kan loq waq, aih au bu dàng chình ja atêh, qmang ka hatùq gõc lòe bài. **2** Yac ka au i màiq loq capoch pajàu, yac ka loq dìq döng ka kan hlèp, loq dìq kan rabiaq, yac ka au i manoh lùi jah qnhac hloe bui wang, mahaq ùh ka kan loq waq, aih dua au ùh loh cleq. **3** Yac ka au axong döng dèh kèng hang đòeq hu ban mangai pa, yac ka chac cla au dôq hloe wì bùh, mahaq tàng ùh i kan loq waq, bài yiniq aih dua ùh i broq ka au jah lòeq cleq. **4** Kan loq waq loq dràng àt, kan loq

waq loq hanò, kan loq waq ùh tajênh, ùh catèh rađeh, 5
ùh broq trong ùh troq, ùh chaq jah lòeq toq ka rađeh ùh
rênh nòeh, ùh hèm qmèq ka cabô, 6 ùh bùi ka trong ùh
taq atoq, mahaq bùi ta trong joq qnàng. 7 Kan loq waq
loq grom gri rìm trong, lùi rìm trong, loq tangèh rìm
trong, loq àt rìm trong. 8 Kan loq waq ùh jò leq hnhung
lùch. Bàu pajàu èh dìq, bìac am màiq tapoch bàu halac èh
lùch, kan rabiaq loq èh hadai pi i. 9 Majah qmang aih kan
loq da bèn qnhòq gêh geo, capoch pajàu dua qnhòq gêh
geo. 10 Mahaq jò kan gêh geo hi trùh, jò aih èh bài yiniq
leq ma qnhòq gêh geo hi cađac. 11 Jò au oe raq kon qyoh,
au tapoch tìah ka wì qyoh, manoh hèm tìah ka wì qyoh,
boq ngan tìah ka wì qyoh, jò au khoe wìa mangai kàn, au
hi cađac bài trong da wì qyoh. 12 Manòeq kô tìah ka bèn
ngan ta gùang, hnoq bu badrèh badrah, trùh hì bèn hi
jah hnoq baiq hadrò tangèa ti dabau, hì kô au loq qnhòq
jàp. Trùh jò aih èh, au hi jah loq qmang ka Chuaq khoe
loq ka au. 13 Dài haq manòeq oe i piq yiniq kô: Manoh
lùi, kan tangèh, kan loq waq, mahaq oe ta piq yiniq aih,
kan loq waq aih ma yeo kàn döng.

14 Drah ti tiaq chaq kan loq waq. Hadai drah tangèh ka
bài kan tabàih enh Yiang, ta aih màiq capoch pajàu aih
joq yeo nhet. 2 Majah qmang aih cabô capoch bàu halac,
aih ùh xài haq capoch ka kon mangai mahaq haq capoch
ka Boc Plình, ma joq qnàng aih ùh i cabô qnì tàng (majah
qmang aih enh dalam ka Yiang mangai aih capoch bàu
hlèp); 3 da mangai capoch pajàu aih haq capoch ka kon
mangai đòeq broq wì jah ka cajap, hu pariaq rai ti alòng.
4 Mangai capoch bàu halac, aih haq broq ka cla rađeh jah

cajap, yàng da mangai capoch pajàu aih haq paqnhrang Tagop Hadròeh. **5** Au ngèh ka oh daq dìq capoch bàu halac, mahaq au ma yeo ngèh aih oh daq capoch pajàu. Mangai capoch pajàu aih yeo kàn ka mangai capoch bàu halac mahaq ùh i ka cabô anoe hlài dôq Tagop Hadròeh jah loq tàng đòeq hu jah qnhrang. **6** Manðeq kô, dìq ka oh daq, tàng joq au trùh ti oh daq, au capoch bài bàu halac, mahaq bàu aih ùh i paqnhoh am ka oh daq loq kan hlèp, ùh i kan rabiaq, ùh i bàu pajàu, ùh i hnài oh daq loq qmòe cleq, aih ajah cleq ka oh daq? **7** Yac ka ranac croh pi i kan rìh mahaq loh atêh qmang ka taliaq, qmang ka broc, tàng ùh i bàu ma crài ka dabau đòeq hu hadro aih broq qmang leq ma canau ka taliaq hlui cleq, broc rawêh cleq? **8** Tàng ken hlui ma nhài aih èh cabô ma hu padon lam tajêh? **9** Oh daq hanoh qmang aih, tàng joq ùh yōc rapet tapoch ma hloh dôq wì tàng, broq qmang leq wì maloq oh daq anoe cleq? Aih oh daq capoch ka cayeo. **10** Oe crõng taneh i bàc bàu capoch, ùh i bàu leq ma ùh i ka ranenh. **11** Qmang aih, tàng au ùh qnì tàng qmòe ranenh bàu mangai ma qnang anoe, ajoq mangai aih ngan au budàng mangai diac wì, au hanoh hnoq haq qmang ka mangai diac wì diq. **12** Qmang aih oh daq drah ngèh drah ti chaq bài kan tabàih da Yiang Hadròeh. Chaq ma yeo bàc đòeq hu paqnhrang Tagop Hadròeh. **13** Dài aih, mangai capoch bàu halac, drah waiq khàn đòeq hu jah anoe hlài dôq wì loq bàu aih. **14** Majah qmang aih, tàng au waiq khàn xi bàu halac, aih yiang da au waiq khàn mahaq gàu ngoc au ùh qnì cleq. **15** Aih èh au broq qmang leq? Au waiq khàn tiaq yiang, mahaq au hanoh waiq khàn tiaq

gàu ngoc. Au calêu tiaq yiang, mahaq hadai calêu tiaq gàu ngoc. **16** Ùh qmang aih, tàng ìh toq manè apôi tiaq yiang, èh mangai ma ùh qnì haq haqngui tamàng, ùh qnì ìh capoch cleq, broq qmang leq haq maloq tiaq bàu manè aih đòeq hu doe “Amen”? **17** Hi loq ka bàu manè apôi da ìh aih joq lem, mahaq mangai qnoeq ùh jah canòm ka bàu aih đòeq hujah qnhrang đeh diq. **18** Au manè apôi Boc Plình, au khoe jah capoch bàu halac yeo bàc dõng ka pì oh daq, **19** mahaq oe ta hnim Tagop Hadròeh, au enh yõc padam nà bàu ma loq tàng đòeq hu jah hnài mangai qnoeq aih yeo hnau ka yõc mòeq mùan bàu halac. **20** Pì oh daq pi dùh hèm tìah ka manoh kon qyoh hòm. mahaq trong dù aih ma khòh tìah ka kon qyoh. Trong rabiaq loq drah tìah ka mangai khoe gêh mangai. **21** Ta hset ranenh i achìh: Chuaq doe “Au canòm ka mangai capoch bàu halac xam hacùng bàu mangai diac wì, đòeq hu tapoch ka bài mangai kô; Mahaq qmang aih dua wì ùh tamàng au”. **22** Qmang aih, bài bàu capoch aih teo, ùh xài ka mangai lùi mahaq đòeq ka mangai ma ùh lùi Chuaq. Yàng da bàu pajàu aih teo, ùh xài ka mangai ùh lùi, mahaq đòeq ka mangai lùi Chuaq. **23** Qmang aih jò Tagop Hadròeh tagop ti dabau, tàng rìm mangai tapoch đeh hra bàu halac, yàng i mangai ùh qnì đeh cleq, èh i mangai ùh lùi Chuaq mùt diq, aih wì ma ùh hìaq doe ka pì ranhùa qmòh? **24** Mahaq tàng i mangai ùh lùi Chuaq i mangai ùh qnì cleq mùt, wì tàng rìm ngai pì qnang tapoch bàu pajàu, bàu aih tabroq ta manoh, bàu aih hadrah ka wì haq, **25** bòe kan hlèp ta manoh wì haq khoe jah paqnoh loh, aih èh wì ma ùh bla-op dèh hadrò ta taneh đòeq kùh waiq Boc

Plình, rai doe: Joq qnàng i Boc Plình oe taqne oh daq!

26 Atìq ka aih bèn anoe qmang leq hòm oh daq? Jò oh daq tagop ti dabau, enh dalam pì, tàng mangai leq i bai calêu hadròeh, i bàu hnài, i kan mahnu, tàng i mangai tapoch bàu halac, tàng loq i mangai anoe hlài bàu aih. Rìm yiniq aih ep broq ma gêh döng đòeq rìm ngai dìq jah paqnhrang. **27** Tàng loq i mangai tapoch bàu halac, aih baiq piq ngai tapoch raq hêq, mahaq ep tagòm dabau, ep waq ka i mangai anoe hlài. **28** Tàng ùh i ka mangai anoe hlài, mangai aih ep oe hatinh ta hnim Tagop, cla tapoch deh ka cla xam ka Boc Plình. **29** Mangai capoch bàu pajàu hadai palap baiq piq ngai raq hêq, mangai qnoeq hèm rai boq ka bàu aih. **30** Mahaq tàng i mangai leq qnang hangui ta aih hnoq kan mahnu, aih èh mangai ma adroe ep hatinh. **31** Majah qmang aih dìq ka oh daq khoe ka maleq trùh maleq dìq jah capoch bàu pajàu, đòeq rìm ngai jah hòc jah alòng. **32** Yiang da pajàu iu tiaq mangai pajàu. **33** Majah qmang aih Boc Plình aih ùh xài Boc Plình da kan manhài, mahaq Boc Plình da kan catèm. Drah broq tìah dìq ka bài Tagop Hadròeh da mangai hadròeh, **34** gucadri ep oe ma hatinh ta hnim tagop, wì haq ùh jah capoch ta aih, mahaq ep iu tiaq qmang ka bàu hset ranenh hnài. **35** Tàng wì haq loq i yiniq enh bòch waq ka loq, wì haq ep bòch dèh ống jò wì oe ta hnim, majah qmang aih gucadri capoch ta hnim tagop aih raq kan camaih. **36** Ahìaq bàu Boc Plình loh enh oh daq, tàng ùh meh haq trùh toq ta oh daq raq ùh xài? **37** Tàng loq i cabô hèm đeh kô pajàu, đeh kô jah kan loq enh Yiang Hadròeh sreo am, mangai aih khòh loq rameh: Rìm yiniq

au achìh ka pì kô dìq bàu Boc Plình thê. **38** Tàng mangai leq ùh enh tamàng aih mac da wì haq! **39** Qmang aih, oh daq drah ngèh chaq màiq capoch bàu pajàu, èh hadai apaq tát trong capoch bàu halac. **40** Mahaq rìm yiniq ep broq troq dèh bè rai waq ka i atìq adroe.

15 Manòeq kô, au enh bahmàng hlài ka oh daq Bàu lem au ma khoe hnài, oh daq ma khoe jah yōc, ma khoe jah yòng cajap ta bàu aih, **2** canòm ka bàu aih raq oh daq ma khoe jah dèch, waq toq oh daq wèq wop qmang ka bàu au khoe hnài, tàng ùh qmang aih qngwan ka oh daq khoe lùi. **3** Adroe dìq dōng, au khoe hnài oh daq bàu cla au ma khoe jah, aih ìq Christ khoe cachìt ka yiniq lui da bèn tiaq bàu Hset Hadròeh. **4** Wì khoe catùh haq, trùh hì piq, haq rìh hlài tiaq bàu Hset Hadròeh; **5** Haq khoe mahnu rađeh dôq Sêpha hnoq, atìq ka aih haq am ka wì Mòeq jàt baiq ngai hnoq haq. **6** Khoe aih, ta mòeq yàng haq mahnu rađeh am ka loe padam hrinh ngai hnoq, ta aih bàc ngai manòeq kô oe rìh, i biaq ngai khoe kùi. **7** Atìq ka aih haq mahnu rađeh am ka Jaco, khoe aih ka mangai tiaq cla haq. **8** Atìq dōng ka wì aih, haq hadai mahnu rađeh am ka au, bu diang am ka kon hin. **9** Majah qmang aih, taqne wì mangai tiaq cla, au kô joq yeo hamoq dōng, ùh ta jì đòeq hu jah creo mangai tiaq cla, majah qmang aih au khoe ti tát rùp baxa Tagop Hadròeh da Boc Plình. **10** Yàng manòeq kô au jah qmang kô, aih dìq canòm ka kan tabàih enh Boc Plình, kan tabàih haq am ka au aih joq ùh hìaq qngwan. Au patìh yeo bàc dōng ka mangai qnoeq, ma joq qnàng ùh xài au mahaq kan tabàih da Boc Plình khoe oe ti au. **11** Qmang aih, yac ka nhèn, yac ka

wì qnoeq, aih raq bài yiniq nhèn hnài, aih raq trong oh daq khoe lùi. **12** Tàng anoe hnài Christ khoe rìh hlài enh kan cachìt, meh hagleq taqne oh daq majah i qnah ngai doe mangai cachìt ùh rìh hlài? **13** Tàng mangai cachìt ùh rìh hlài, aih Christ hadai khoe ùh rìh hlài. **14** Tàng joq Christ khoe ùh rìh hlài, aih ajoq bàu nhèn hnài aih hi qngwan qngwaiq, èh manoh lùi da oh daq hadai qngwan diq. **15** Èh hòm, tàng joq qnàng mangai cachìt ùh rìh hlài, aih Boc Plình khoe ùh broq ka Christ rìh hlài, qmang aih nhèn khoe wiang capoch lìq ka Boc Plình jò nhèn doe haq khoe broq ka Christ rìh hlài, lêh gêh haq nhèn capoch amòng ka Boc Plình. **16** Majah qmang aih, tàng joq mangai cachìt ùh rìh hlài, aih Christ hadai khoe ùh rìh hlài. **17** Èh hòm tàng joq Christ khoe ùh rìh hlài, kan lùi da oh daq loh ka qngwan, oh daq oe raq deh ta kan yiniq lui cla. **18** Qmang aih, mangai ma kùi ta Christ hadai hnhung lùch hloe mòeq đòe. **19** Tàng joq bèn tangèh ka Christ qmòe toq ka qnhòng kô, aih ta cröng taneh kô joq dìq toq bèn raq mangai ma yeo jiàng ka ha-och đeh. **20** Mahaq manòeq kô, Christ khoe rìh hlài enh mangai cachìt, haq aih plì ramua da bài mangai ma kùi. **21** Majah qmang aih, taiq mòeq ngai majah i kan cachìt, èh hadai taiq mòeq ngai majah hi i kan rìh hlài da mangai cachìt. **22** Tìah ka enh dalam ka Adam rìm ngai dìq ep cachìt, hadai qmang aih, enh dalam ka Christ rìm ngai èh dìq jah rìh hlài, **23** mahaq rìm ngai ep tiaq đèh atìq adroe: Christ aih plì ramua, hì haq ma hi trùh, bài mangai da haq hi rìh hlài. **24** Khoe aih èh kan lùch men trùh, jò haq ma hi đèch diac am hlài da Baq aih Boc Plình, atìq ka haq

khoe raliang dǒng bàì diac padrǒng kan, bàì mangai i
cwìang xam rìm padren, **25** majah qmang aih haq ep wèq
cwìang trùh jò khoe roh dǒng bàì mangai ma tablēq ka
haq enh caqnàm jènh haq. **26** Mangai haq ma palùng đac
atìq dǒng aih kan cachìt. **27** Majah qmang aih: “Boc Plình
khoe đòeq rìm yiniq enh caqnàm jènh haq”. Jò doe “rìm
yiniq dìq oe enh caqnàm haq”, aih khoe anoe ka hloh ta
aih ùh xài i hloe xam cla Boc Plình aih Mangai ma khoe
đòeq rìm yiniq dìq enh qneq ka Christ. **28** Jò rìm yiniq dìq
khoe iu haq, jò aih èh cla Kon hadai iu tiaq Mangai ma
khoe đòeq rìm yiniq dìq oe enh qneq ka rađeh, dôq Boc
Plình broq rìm yiniq oe enh dalam rìm yiniq. **29** Manđeq
kô tàng joq ùh i kan rìh hlài, mangai broq baptem thai
ka mangai cachìt wì ngèh cleq? Joq mangai cachìt ùh
rìh hlài hagleq wì ma broq baptem thai ka wì aih? **30** Èh
nhèn hadai qmang aih, hagleq nhèn jò leq dua toq tamùa
rađeh ta kan yat? **31** Wùih oh daq! au taqnòq ka kan
cachìt hi rìm hì, joq qnàng tìah ka au ma xan catèh dèh
pì oh daq enh dalam ka Jesus Christ aih Chuaq da bèn. **32**
Tàng au tiaq dua kon mangai qnhòng kô đòeq tajêh ka
bàì kiac dù ta gùng Êpheso, aih au khoe jah cleq? Tàng
joq mangai cachìt ùh rìh hlài: “Bèn chaq acaq beq, chaq
ôq beq, majah qmang aih hì da èh bèn hi cachìt!” **33** Apaq
dôq wì qnùt rađeh: “Bàì bua qmèq broq raliang manoh da
mangai lem”. **34** Drah hamang đòeq hu canau tiaq trong
taq atoq, pi dùh broq yiniq lui hòm, majah qmang aih i
mangai pi lòm qnìq qmòe ka Boc Plình, au anoe qmang
aih dôq oh daq loq hèm ka camaih. **35** Mahaq i mangai
ma doe: Mangai cachìt aih rìh hlài qmang leq? Yoc chac

leq đòeq rìh hlài? **36** Wùih mangai ma blùng tau, adrech pì ma rai, tàng joq haq ùh cachìt adroe hòeq, aih haq majah hon? **37** Adrech pì ma rai aih ma xài chac ma hu wìa ònh, aih bu dàng pliang adrech, qmang ka pliang qmau, qmang ka pliang adrech qnoeq. **38** Boc Plình am ka haq chac hamac lem tiaq troq manoh cla Boc Plình ma khoe dì dèh adroe, rìm pliang adrech dìq i dèh hra chac hamac. **39** Ùh xài xech akia leq dìq ta hatìah döng ka dabau, xech akia da mangai i dèh crài, xech akia da jam gùng i dèh crài, da chìm i dèh crài, ka hanoh i dèh crài. **40** Èh i chac da diac plình, i chac da cröng taneh, mahaq kan ranhòm chac hamac da diac plình, da cröng tanheh crài ka dabau. **41** Kan qngah da mahì crài, qngah da mat khê crài, da halöng crài, qngah da halöng kô xam halöng qnoeq hadai crài ka dabau. **42** Kan rìh hlài da mangai cachìt hadai qmang aih. Chac hamac ma rai qnoh kô loq hech hnhung, mahaq hi rìh hlài aih pi hech hnhung; **43** jò ma rai qnoh aih rai ta kan xep, mahaq jò ma rìh hlài aih ta kan ranhòm; jò ma rai qnoh aih hamoq, mahaq jò rìh hlài aih dêh; **44** jò ma rai aih xech akia mahaq, jò rìh hlài aih chac yiang. Tàng khoe i chac hamac xam xech akia, èh hanoh i chac hamac xam yiang; **45** tìah ka bàu ma khoe achìh: “Mangai ma adroe aih Adam khoe wìa mangai rìh i mahua rìh, Adam ma atìq aih Mangai am kan rìh”. **46** Mahaq ùh xài chac hamac yiang i adroe, mahaq chac xech akia adroe khoe aih chac hamac yiang trùh atìq. **47** Mangai adroe loh enh taneh aih da taneh, mangai ma atìq aih loh enh plình. **48** Mangai da taneh qmang leq aih èh bàì mangai da taneh dìq hadai qmang

aih diq, mangai da plình qmang leq, aih èh bài mangai da plình hadai qmang aih diq. **49** Qmang ka bèn khoe wê qmù dua kon mangai da taneh, aih èh bèn hadai jah wê qmù dua da kon mangai da plình. **50** Manoeq kô au doe ka pì oh daq: Xech akia xam mahim ùh jah mùt ta diac Boc Plình, kan loq hech hnhung ùh jah waq ka kan ùh qnì hech hnhung. **51** Kô au paqnoh ka pì loq kan ma dìq jaq hlèp: Dìq ka bèn kô èh ùh i kùi döng, mahaq dìq döng ka bèn jah wìh wìa ma qnoeq. **52** Ta mòeq rahiàc raq, mòeq caqmlàih mat, jò bàu ken ma atìq lùch. Majah qmang aih bàu ken jah hlui, mangai cachìt hi rìh hlài, jah kan pi hìaq hech hnhung hòm, aih èh dìq ka bèn jah wìh wìa chac maneo. **53** Majah qmang aih chac ma loq hech hnhung kô ep caxùnh yōc kan ùh hech hnhung, chac ma loq cachìt kô ep caxùnh kan ùh qnì cachìt. **54** Jò leq chac maloq hech hnhung jah caxùnh yōc kan ùh hech hnhung, chac loq cachìt kô caxùnh yōc kan ùh cachìt, aih èh jah xít qmang ka bàu Hset Hadròeh ma doe rameh: “Kan blêq khoe lonh kan cachìt”. **55** “Kan cachìt! aleq da gè kan blêq? Aleq nōc da gè?” (**Hadēs g86**) **56** Nōc da kan cachìt aih yiniq lui, kan dêh da yiniq lui aih ranenh. **57** Mahaq manè apôi Boc Plình khoe am ka bèn kan blêq enh dalam ka Chuaq Jesus Christ, Chuaq da bèn. **58** Qmang aih oh daq da au, yòng ma cajap haq, apaq dalàc, drah patìh ka Chuaq ma bac haq, majah qmang aih bèn loq kan xalep da pì oh daq enh dalam ka Chuaq aih ùh qngwan.

16 Manoeq kô, anoe trùh trong tagop bac jèn đòeq wiang am ka mangai hadròeh ma qnang nan, aih oh daq broq qmang ka au ma khoe anoe ka bài Tagop Hadròeh

oe ta Galati. **2** Oe ta hi gàu tuàng, rìm ngai oh daq tiaq dađeh bu hlàt tagop jah pang leq, đòeq qmòe dèh ta hnim raq, dôq ùh hìaq ep gòm jò nhèn trùh men ti tagop ònh. **3** Jò au trùh, au hi thê bài mangai oh daq ma khoe ràih wê jàiq au ma achìh xam bac oh daq ma tagop aràng ta Jerusalem. **4** Tàng troq ka au lam, wì aih hi lam ti au. **5** Atìq ka au lam khoe ka Maxê-đoan, au hi trùh hmàih ka oh daq, majah qmang aih au ep thia ta Maxê-đoan. **6** Canau au loq oe ti oh daq ùh dùnh, tàng ùh meh clech ka ralìm, đòeq oh daq jah ajèn aràng au lam tanoè au enh lam. **7** Yàng kô ùh xài au toq enh glàm oh daq hi hêq, mahaq tàng Chuaq lòh, au ngèh jah oe ti oh daq. **8** Mahaq yàng kô au oe ta Êpheso trùh ramènh Hì padam jàt, **9** majah qmang aih, ta aih i mòeq toq qmang kàn khoe pèch đòeq ka au hu abroq, mahaq hadai i bàc ngai enh tablêq ka au. **10** Tàng Timothê trùh hmàih ka oh daq, pì hmàng ngan apaq đòeq haq i cleq ma ep crè jò haq oe ti pì: Majah qmang aih haq hanoh patìh ka Chuaq tìah ka au diq. **11** Apaq i cabô jù đac haq, ahlài haq ma catèm, đòeq haq jah trùh ta au, majah qmang aih au qnang gòm haq hloe xam oh daq qnoeq. **12** Yàng manòeq kô, Abolô aih oh daq da bèn, au bàc yàng àu thê haq lam tiaq wì oh daq kô đòeq lam trùh ta oh daq, mahaq haq qnhòq lap lam. Mahaq haq lam jò leq haq hi dòh. **13** Oh daq hmàng hamang, yòng cajap manoh lùi, ma hagau, ma tadêh haq oq. **14** Rìm yiniq oh daq broq, đìq broq ta kan loq waq. **15** Manoeq kô, oe i moeq bàu tanap hòm: Oh daq loq hnim Sêphana aih plì ma ramua ta gùng Achai, pì diq loq mangai ta hnim aih đìq ka manoh patìh ka

mangai da Chuaq. **16** Khòh loq ta iu bài mangai qmang aih, khòh ta iu dìq dǒng bài mangai hanoh patìh xalep ti bèn. **17** Sêphana, Photu-na xam Achaico trùh ta kô, au bùi haraya, wì aih khoe aràng am ka au bài dahwèq oh daq ùh i aràng. **18** Wì aih khoe broq ka manoh au xam manoh oh daq jah blinh hlài. Khòh padèch bài mangai qmang aih. **19** Bài Tagop Hadròeh oe ta gùng Asi bòch hmàih trùh pì, enh dalam ka Chuaq, Aquila xam Bêritsin tanap bàu hmàih trùh pì, Tagop Hadròeh oe ta hním wa aih hanoh. **20** Dìq dǒng oh daq ta kô bòch hmàih ka pì. Drah yōc kan hìp hadròeh đòeq hmàih da bau. **21** Au kô Phaulo, tì kōng cla au achìh jàiq kô bòch hmàih oh daq. **22** Tàng mangai leq ùh ta iu ka Chuaq, mangai aih ep pòq kan “Anathem”! Maranatha! **23** Waiq kan tabàih da Chuaq oe ti pì oh daq! **24** Kan loq waq da au oe ti rìm ngai oh daq enh dalam yiniq Chuaq Jesus Christ.

II CORINHTO

1 Au kô Phaulô, tiaq manoh Boc Plình jah broq mangai tiaq cla da Chuaq Jesus Christ, xam Timôthê aih oh daq da bèn, achìh am kaTagop Hadròeh oe ta Côrintô xam dìq ka mangai hadròeh oe jàp tagùng Achai: **2** Waiq ka oh daq jah kan tabàih xam kan catèm enh Boc Plình, Baq bèn, hloe xam enh Chuaq Jesus Christ. **3** Manè apôi Boc Plình, aih Baq da Chuaq Jesus Christ bèn, aih Baq ma loq tamèt, aih Boc Plình am rìm kan alòng. **4** Haq alòng nhèn ta kan nanxa, dôq kan alòng haq ma khoe alòng nhèn, aih èh nhèn hadai jah alòng mangai qnoeq jò wì haq glàm kan nanxa! **5** Qmang ka nhèn khoe wiang pòq wê kan jìq da Chuaq Jesus Christ qmang leq, aih èh kan alòng da nhèn loh enh Chuaq Jesus Christ hadai bình qmang aih. **6** Tàng nhèn glàm kan mangò aih đòeq ka oh daq jah alòng jah dèch, yac ka nhèn jah kan alòng aih đòeq ka oh daq jah alòng, kan alòng aih jah hnoq jò oh daq ùh tagah lep ta kan nanxa qmang ka da nhèn. **7** Nhèn cajap manoh ngèh ta oh daq, majah qmang aih nhèn loq oh daq khoe jah wiang nanxa, aih èh oh daq hanoh wiang jah kan alòng. **8** Nhèn ùh enh đòeq ka oh daq ùh qnì dèh cleq kan nanxa khoe trùh ka nhèn ta cròng Asi, wì khoe qmet hrìn nhèn, joq yeo loe ka padren nhèn, nhèn ma oe tangèh ka đeh rìh. **9** Joq qmang aih, nhèn tìah ka mangai wì ma khoe taqmac ka nhèn kan cachìt, dôq nhèn pi canòm dèh cla, mahaq canòm ka Boc Plình aih Mangai broq ka mangai cachìt rìh hlài. **10** Haq khoe dèch nhèn claih ka kan cachìt kàn qmang aih, èh oe raq dèch hòm, joq, nhèn oe tangèh ka haq dèch nhèn hòm. **11** Qmang

ka cla oh daq yōc deh bàu waiq khàn đòeq hu wiang ti nhèn, dōq bac ngai wiang waiq khàn aih èh nhèn hu jah xôq ramot, đòeq nhèn wia nen am ka bac ngai jah manè apôi Boc Plinh am ka nhèn. **12** Manđeq kô yiniq ma broq ka nhèn jah catèh rađeh aih manoh cliac nhèn wiang panhìn nhèn khoe yōc kan hadrđeh xam manoh lem jang loh enh Boc Plinh đòeq hu acaq oe ta crđong taneh kô ti pì oh daq, kiang ma ùh hnau ka aih hòm nhèn ùh tiaq kan rabiaq da xech akia mahaq canòm kan tabàih enh Boc Plinh. **13** Majah qmang aih nhèn ùh achìh ka oh daq þài yiniq cleq broq ka oh daq ùh hlàt đđc, ùh hlàt tàng. Au toq ngeh qmang aih, **14** tìah ka oh daq khoe jah loq đeh ka nhèn toq biaq, èh oh daq jah loq qmòe ka lêh gêh rameh hòm aih nhèn broq ka oh daq jah ranhòm, qmang ka oh daq broq ka nhèn jah kan ranhòm oe ta hì da Chuaq Jesus. **15** Au lùi dèh joq qnàng trong aih, adroe kô nèh au khoe enh trùh hmàih ka oh daq, đòeq broq ka oh daq jah lòeq yeo hnau tam ka aih. **16** Au ma enh jò au lam ta Maxêđoan, au thia ta oh daq adroe, èh enh Maxêđoan au wìh hlài ta oh daq, enh aih oh daq qnong au lam ta gùng Jiuđê; **17** jò au qnac dèh ta manoh qmang aih au kô ahìaq mangai taleq ùh lênh? Ùh meh ahìaq au tiaq deh xech akia đòeq hu hatinh ka rađeh, dài au majah i jò: “Òq òq, i jò ùh ùh”? **18** Mahaq qmang ka Boc Plinh ma ùh tablòq manoh, bàu da nhèn anoe ka oh daq hadai ùh xài i jò troq i jò ùh. **19** Kon da Boc Plinh aih Chuaq Jesus Christ, dìq ka nhèn, ta aih i au xam Sinwan xam Timôthê ma khoe anoe hnài ka pì, aih ùh xài: “I joq i ùh”. Mahaq ta Haq aih toq joq raq. **20** Majah qmang aih dìq ka

bàu Boc Plình ma khoe tèu enh da lam ka haq aih joq
dìq dǒng, èh enh dalam ka haq nhèn majah doe: “Amen”
đòeq broq qngah yiniq Boc Plình. **21** Manòeq kô Boc Plình
aih Mangai ma khoe broq ka nhèn xam oh daq jah yòng
cajap enh dalam ka Christ, khoe xùt dàu am ka nhèn; **22**
Haq khoe yōc dèh teo hadro đòeq pateo ka nhèn rai am
ka nhèn hang panhìn aih Yiang Hadròeh oe ta dalam
nhèn. **23** Au creo dang Boc Plình ngan hnoq ta manoh au,
taiq au camaih ka pì dài au ma qnhòq wìh hlài ta Côrintô,
24 ùh xài nhèn enh broq gàu manoh lùi da oh daq, mahaq
nhèn enh wiang dôq kan lem bùi da oh daq jah rai èh rai
bàc tam, majah qmang aih oh daq khoe cajap manoh lùi.

2 Aih iq dài au ma khoe qnac ta manoh ùh wìh hlài ta oh
daq, aih blinh ùh xài đòeq hu broq ka oh daq mangò;
2 majah qmang aih tàng au broq ka pì mangò aih èh
broq qmang leq au ma oe tangèh jah kan lem bùi enh
bài mangai au khoe broq ka wì haq mangò? **3** Au khoe
achìh ka oh daq qmang aih đòeq jò au trùh, au ùh hìaq
ep mangò ka pì oh daq aih bài mangai broq ka au jah lem
bùi. Au lùi dìq dǒng ka oh daq, mangai leq mangai meh
dìq yōc kan bùi au đòeq broq kan lem bùi ka rađeh. **4** Aih,
wop ta jò nanxa hlàc hlai, catech cliac clèm, diac mat da
dahràc, au achìh ka oh daq, ùh xài dôq ka oh daq mangò,
mahaq đòeq ka oh daq loq manoh da au ha-och ka oh daq
dàng leq. Mangai i lui jah caqnaih **5** Tàng i mangai leq
broq kan mangò aih ùh xài haq broq toq ka au mangò,
mahaq broq dìq ka oh daq mangò đeh hra yac ka bàc
biaq, au ùh i enh tapoch hrìn broq cleq, **6** taqne oh daq
khoe i bàc ngai cwò lech ka haq, toq aih raq brì ka khoe

lap. 7 Hêq manðeq kô oh daq caðac pi dùh dayo, rai padô alòng ðòeq haq ùh hìaq mangò hrìn loh hloe ka tacro. 8 Qmang aih, au cali calo ka oh daq paqnoh dèh kan loq waq pì ka mangai aih. 9 Aih ìq raq au majah achìh ka oh daq, ðòeq hu qnhro ngan rìm trong oh daq i iu loq ùh. 10 Oh daq khoe caqnaih da mangai leq yiniq lui, au hadai caqnaih. Tàng au caqnaih, aih enh ngèa ka Christ taiq oh daq au majah caqnaih; 11 dôq Satan ùh hìaq jah blêq bèn, majah qmang aih ùh xài bèn ùh loq ka manoh da haq. 12 Manðeq kô jò au khoe trùh ta Trô-ach ðòeq anoe Bàu lem da Christ, yac ka ta aih Chuaq khoe pèh ka au qmang, 13 mahaq dua au ùh catèm ta manoh, majah qmang aih, ta aih au qnhòq hnoq Tit aih oh daq au. Aih ìq, dài au majah hangah ka oh daq gùng aih ðòeq hu lam ta Maxêðoan. 14 Mahaq manè apôi Boc Plình, haq broq ka nhèn jah blêq hloe hloe enh dalam ka Chirst, èh haq yōc nhèn ðòeq hu rai kan xua thùm trong canau loq ka haq rìm nòe. 15 Majah qmang aih enh ngèa Boc Plình, nhèn kô kan xua thùm da Chuaq Jesus Christ, oe ta adreo mangai jah dèch xam mangai hnhung lùch: 16 Am ka mangai kô xua kan cachìt broq ka cachìt, am ka mangai tau xua kan rìh broq ka rìh. Cabô ma tajì ðòeq hu broq bài yiniq kô? 17 Nhèn ùh ti lam padro bàu Boc Plình hu chaq acaq tìah ka wì qnoeq. Mahaq nhèn yōc dèh manoh joq qnàng, bàu loh enh Boc Plình qmang leq, oe enh dalam ka Christ nhèn anoe hlài qmang aih enh ngèa Boc Plình.

3 Ahìaq nhèn khoe wìa mangai loq pliang raðeh? Hìaq khoe tìah ka wì qnoeq ep waq ka i mangai achìh jàiq tanap ka oh daq, ùh meh canðom ka jàiq enh oh daq anoe

trùh nhèn qmòh? 2 Cla pì oh daq qmat raq thò tanap da nhèn, achìh ta cliac manoh nhèn, rìm ngai jah loq, jah đõc. 3 Joq qnàng oh daq qmat thò da Christ, nhèn kô ma achìh, ùh xài achìh xi mùc mahaq achìh xi Yiang da Boc Plình rìh halinh, ùh xài achìh ta capiac hmo mahaq ta capiac xech akia, aih ta manoh da oh daq. 4 Canòm ka Christ nhèn cajap manoh lùi qmang aih enh ngèa ka Boc Plình. 5 Ùh xài cla nhèn hlàt hèm loh yiniq cleq đòeq hu broq, mahaq kan hlàt da nhèn dìq loh enh Boc Plình. 6 Haq khoe am ka nhèn kan hlàt đòeq nhèn hu patìh ka tajao maneo, ùh xài tajao da chù achìh, mahaq tajao da Yiang Hadròeh, majah qmang aih da chù achìh broq ka cachìt, yàng da Yiang Hadròeh broq ka rìh. 7 Tàng joq mangai patìh ka tajao da kan cachìt, achìh chù ta cachèn hmo, aih ji khoe jah ranhòm raya, jaq mangai Isorali loh qmòe ka pi jah chri hadrò Môise, majah qmang aih i kan canhia ta hadrò haq, yac ka doe kan canhia kô rên dìq. 8 Loq ka mangai patìh da Yiang Hadròeh ma ùh ranhòm yeo hnau ka aih! 9 Qmang aih, patìh ka trong ti taqmòq yiniq lui aih xôq khoe jah kan ranhòm, loq ka patìh trong aràng kan taq atoq aih èh jah kan ranhòm dàng leq hòm! 10 Majah qmang aih, kan ranhòm da tajao ma adroe khoe hnhung ta kan ranhòm yeo hnau da tajao ma atìq, 11 tàng yiniq ma ep hnhung lùch aih ji i jò jah kan ranhòm, loq ka yiniq ma cajap mòeq đòe aih èh jah ranhòm dàng leq hòm! 12 Nhèn i kan tangèh qmang aih, dài nhèn majah ùh hòq qmòe cleq. 13 Nhèn ùh broq qmang ka Môise, yòc bai prình dèh hadrò, dôq mangai Isorali ùh hìaq hnoq jò kan qngah dìq lùch. 14 Mahaq manoh wì haq khoe cadoq,

dài trùh manòeq, jò wì đoxic tajao dùnh, bai prinh aih oe
raq qnhòq taclìh, majah qmang aih enh dalam ka Christ
bai prinh aih men hnhung. **15** Dài aih, trùh hì kô, jò wì
đoxic ta hset Môise bai aih oe raq ta manoh wì haq. **16** Jò
leq wì haq wìh hlài ta Chuaq, aih èh bai aih ma hi taclìh.
17 Manòeq kô Chuaq aih Yiang Hadròeh, Yiang Hadròeh
da Chuaq oe taleq, kan paclaih oe ta aih. **18** Dìq döng bèn
jah yōc dèh hadrò ralênh đòeq hu ngan kan ranhòm da
Chuaq qmang ka ta giùang, aih èh bèn jah wìh wìa mòeq
dua tìah ka haq, enh kan ranhòm trùh ta kan ranhòm,
qmang ka Chuaq aih Yiang Hadròeh.

4 Majah qmang aih, canòm kan loq waq khoe am, nhèn
men jah broq mangai patìh qmang kô, dài aih nhèn majah
ùh cro manoh, **2** Ùh hnau ka aih hòm, nhèn cađac döng
rìm bìac jìang ka camaih cadoc hlèp. Nhèn ùh tiaq kan
padô qnùt, hadai ùh ti gùt bàt bàu Boc Plình, mahaq
nhèn patô qnoh bàu joq qnàng, đòeq jah bàu manè apôi
enh manoh cliac oh daq enh ngèa ka Boc Plình. **3** Tàng
Bàu lem da nhèn oe i kan gahnàp, aih gahnàp toq ka bài
mangai ma hu hnhung lùch; **4** craq kiac da qnhòng kô
khoe bàng manoh cliac bài mangai ma ùh lùi, dài wì haq
majah pi hnoq kan ranhòm qngah qngai ta Bàu lem da
Christ aih la qmù dua da Boc Plình. (**aiōn g165**) **5** Qmang aih,
nhèn ùh ràu trùh cla rađeh, mahaq nhèn anoe trùh Jesus
Christ aih Chuaq da bèn, taiq kan loq waq enh haq aih
nhèn majah doe rađeh kô hapōng oh daq. **6** Majah qmang
aih, Boc Plình i doe: “Kan qngah ep sreo loh enh qnòe
clam!” Haq khoe broq kan qngah haq jah qngah qngai ta
manoh nhèn am nhèn loq kan ranhòm haq sreo qngah

ta hadrò da Christ. **7** Mahaq nhèn khoe don đòeq hang canaq kô ta abôq taneh, đòeq hu mahnu qnoh cwìang itai kàn aih dìq loh enh Boc Plình, ùh xài loh enh nhèn. **8** Wì khoe padit nhèn bac trong, mahaq ùh hìaq hech, glàm kan tagah lep mahaq nhèn ùh tacro manoh. **9** Wì rùp canàt nhèn mahaq Boc Plình ùh cađac nhèn lac lai, wì jêh nhèn khoe tacro mahaq ùh hìaq cachìt. **10** Nhèn xan pòq wê kan cachìt da Chuaq Jesus Christ ta chac nhèn, đòeq kan rìh da haq hadai jah hnoq ta chac nhèn. **11** Qmang aih, nhèn kô mangai oe raq rìh mahaq khoe tah am ta kan cachìt, đòeq hujah lòeq ka Chuaq Jesus, dôq kan rìh haq hadai jah paqnoh enh chac hamac ma loq cachìt da nhèn. **12** Qmang aih, kan cachìt abroq enh dalam nhèn, kan rìh abroq ta oh daq. **13** Pàng nhèn ma khoe pajùm mòeq manoh lùi, wop qmang ka bàu Hset Hadròeh doe: “Au khoe lùi dài au majah noe”. Hanoh qmang aih diq, nhèn lùi dài nhèn majah noe, **14** majah qmang aih, nhèn loq Mangai ma broq ka Christ rìh hlài aih èh hanoh broq ka nhèn rìh hlài ti Chuaq Jesus, broq ka nhèn xam oh daq jah yòng enh ngèa ka haq. **15** Rìm yiniq kô aih dìq đòeq ka oh daq jah lòeq, dôq kan tabàih jah rai èh rai bac, èh rai bac ngai jah manè apôi, đòeq hutam ka Boc Plình kan ranhòm. **16** Aih ìq dài nhèn majah ùh tagah lep manoh, yac ka hnoq mangai enh gùng rai èh rai pi nèn, mahaq kon mangai enh dalam rai èh rai wìh wìa maneo. **17** Majah qmang aih, kan xalep đò, bu hwòt hwat da bèn kô broq ka bèn jah kan ranhòm ranhìn mòeq đòeq oe i jaq cleq, (aiōnios g166) **18** qmang aih, bèn ùh ngan chaq yiniq ma hnoq xi mat, mahaq haqmiang chaq yiniq ma

ùh xau hnoq, majah qmang aih yiniq ma hnoq xi mat kô
mòeq rahyàc raq, yàng yiniq da mat ma ùh hnoq ma aih
ma mòeq đòeq. (aiōnios g166)

5 Majah qmang aih bèn loq, tàng joq hnim bèn oe đò ta
crõng taneh kô haq loh ka bùc raliang, aih èh bèn i hnim
mòeq đòe oe ta plình, Boc Plình ma broq, ùh xài broq loh
enh tì kõng kon mngai. (aiōnios g166) **2** Manòeq kô joq bèn
qnang hràng ta hnim oe đò kô, bèn dìq jaq ngèh ka jah
caxùnh yõc hnim da bèn oe ta plình, **3** majah qmang aih
jò bèn khoe jah caxùnh pi hìaq oe hnoq bèn rahòng. **4** Jò
bèn oe ta hnim oe đò kô, bèn hràng enh qneq ka kan
trap da haq, bèn ùh ngèh loh ka ralênh, mahaq bèn ngèh
ka jah caxùnh yõc hlài hnim oe ta plình, đòeq bài yiniq
maloq cachìt ta chac bèn jah kan rìh lonh đac. **5** Manòeq
kô, Mangai ma padon palauq ka bèn jah bài yiniq kô aih
la Boc Plình, khoe am ka bèn Yiang Hadròeh đòeq hu
broq hang pacap ajang aih. **6** Aih ìq raq, yac ka jò leq dua
bèn lùi rai canòm, majah qmang aih bèn loq jò bèn qnang
oe ta chac kô aih bèn hangai ka Chuaq, **7** majah qmang
aih bèn cadiang lam xi manoh lùi, ùh xài bèn cadiang
lam xi mat hnoq. **8** Bèn bình manoh lùi qmang aih dài au
majah doe: loh khoe ka chac kô đòeq hujah oe pajùm ti
Chuaq, ma aih ma yeo enh. **9** Qmang aih, dài bèn yac ka
oe, yac ka bèn loh enh chac kô, dua bèn àu dìq ka padren
waq ka jah lem manoh Chuaq. **10** Majah qmang aih, kô èh
bèn rìm ngai dìq ep yòng enh ngèa gèq hadrah da Chirst,
đòeq rìm ngai jah waq deh hra tiaq trong lem trong qmèq
bèn ma khoe broq jò bèn oe raq ta xech akia kô. **11** Pang
aih, nhèn i manoh loq iu yùq ka Chuaq, nhèn àu ti chaq

trong đòeq hu broq ka mangai qnoeq dìq lùi, Boc Plình
loq ka nhèn, nhèn hadai ngèh ta manoh cliac oh daq loq
ka nhèn. **12** Nhèn ùh capoch manè rađeh enh ngèa oh
daq hòm, mahaq nhèn enh am ka pì oh daq jah nen hu
capoch manè nhèn, đòeq oh daq jah hatèu ka bài mangai
ma ti catèh biac lem toq enh gùng, mahaq enh dalam aih
dech do. **13** Tàng joq nhèn loh ka ranhùa (qmang ka bàu
qnah ngai ma doe), aih nhèn ranhùa ka Boc Plình, tàng
nhèn clang, aih clang ka oh daq. **14** Majah qmang aih kan
loq waq da Christ tamèt ta manoh nhèn, nhèn hèm haiq
tàng joq i mòeq ngai cachìt am ka rìm ngai, aih èh rìm
ngai hanoh cachìt. **15** Chuaq khoe cachìt am rìm ngai,
dôq mangai ma oe rìh pi xài rìh toq ka rađeh hòm mahaq
rìh am ka Mangai khoe cachìt èh khoe rìh hlài ka rađeh.
16 Qmang aih, pang kô ta èh, nhèn pi top dua crõng taneh
kô đòeq hu canau loq ka cabô hòm, yac ka adroe kô
nèh nhèn hmaq tiaq dua crõng taneh đòeq hu canau ka
Christ, manòeq kô nhèn pi ngan haq qmang aih hòm. **17**
Qmang aih, tàng cabô oe enh dalam ka Christ, haq aih
mangai khoe jah paneo hlài, bài yiniq ma dùnh khoe dìq,
manòeq rìm yiniq dìq jah paneo. **18** Rìm yiniq aih dìq loh
enh Boc Plình, haq khoe broq ka bèn jah canòm ka Christ
đoèq hujah hatroq hlài ti haq, èh haq khoe am nhèn wìa
mangai anoe hnài trong ta hatroq aih. **19** Majah qmang
aih, enh dalam ka Chirst, Boc Plình khoe broq ka kon
mangai jah hatroq hlài ti cla haq, pi taqmòq yiniq lui ka
wì hòm, haq khoe thê nhèn anoe hnài trong hatroq aih.
20 Nhèn kô mangai da Christ thê, tiah ka Boc Plình hadai
ajang nhèn hu bahmàng oh daq. Nhèn canòm yiniq da

Christ đòeq pariaq oh daq: Drah hatroq ka Boc Plình. **21**
Taiq bèn, Boc Plình majah khoe broq ka Mangai ùh lòm i
qmòe yiniq lui, loh ka pòq dõng yiniq lui, dôq bèn canòm
ka haq aih, đòeq hujah kan taq atoq da Boc Plình.

6 Manòeq, nhèn kô mangai abroq pajùm ti Chuaq, dài
nhèn àu anoe ka oh daq ma khoe jah kan tabàih enh Boc
Plình apaq dôq haq loh đac ka qngwan. **2** Majah qmang
aih haq doe: “Au khoe tamàng bàu pì jò troq dèh jò, Au
khoe wiang ka pì oe ta hì dech paclaih. Au doe ka pì
manòeq kô raq jò troq dèh jò, manòeq kô raq hì dèch
paclaih!” **3** Nhèn ùh broq kan catoeh ka cabô, dôq ùh
hìaq i mòeq nà bàu leq capoch qmèq trong nhèn ma
patih. **4** Mahaq rìm trong nhèn broq ka rađeh jah tajì ka
mangai hapõng Boc Plình: Nhèn chìuq àt jaq cajoq: ta
kan nan tùng, kan pangot hrah, kan xalep; **5** jò wì jêh, jò
wì clêh, jò loh ka manhài, jò tagah lep, qngah ka mang ùh
jah kùi, cliac pangot; **6** ta kan hliang lem, kan qnì loq, ta
kan loq àt, ta kan loq hanò, ta Yiang Hadròeh, ta kan loq
waq joq qnàng. **7** Ta manoh hnhol jang, ta cwìang itai da
Boc Plình, oe ta tì kõng pah qma pah qngeo, nhèn cadop
wê ranac da kan taq atoq. **8** Yac ka jah nhòm, yac ka pòq
bàu qmèq, yac ka jah bàu lem, **9** hnoq tìah gleq ùh cabô
loq mahaq bàc ngai loq, hnoq tìah gleq ten cachìt mahaq
oe rìh trùh manòeq, hnoq tìah ka mangai wì baxa mahaq
ùh hìaq jêh đac; **10** hnoq tìah gleq mangò mahaq jah yôt
kan lem bùi, hnoq tìah gleq pa mahaq broq ka bàc ngai
jah padrõng, tìah gleq ùh i qmòe cleq mahaq i rìm yiniq.
11 Yôiq yôiq mangai Côrintô, hacùng bàu nhèn anoe jang,
manoh nhèn pèch rùng ka oh daq. **12** Ùh xài nhèn canit

ka pì mahaq cliac manoh cla pì khoe broq ka rađeh loh ka canit. **13** Drah i chau manoh ka nhèn qmang aih diq, aih nhèn anoe ka pì tìah ka kon cla mhèn. **14** Apaq pajùm long ech ti mangai ùh lùi. Majah qmang aih, kan taq atoq xam kan dù i jah pajùm ti dabau? Kan qngah xam kan clam wìa ka jah taqmùt ka dabau? **15** Christ xam Bêlian wa i pajùm cleq ka dabau, mangai lùi i wiang jah cleq ti mangai ùh lùi? **16** Hnim kùh waiq Boc Plình awìa ka pajùm ti radua qmù kan kiac? Majah qmang aih bèn kô raq hnim kùh waiq da Boc Plình rìh halinh, qmang ka Boc Plình doe: “Au oe ti wì haq, lam hlài taqne wì haq. Au broq Boc Plình wì haq, wì haq broq mangai da au”. **17** Dài aih, Boc Plình majah doe: “Drah loh ma khoe enh wì haq beq, rai lah đeh crài ka wì haq, Apaq poh ta dahwèq ùh sròeh, Aih èh au hi đìh yōc pì”: **18** Khoe èh, Au broq Baq pì, Pì jah broq kon calô, kon cadrì da au, Chuaq i cwìang itai rìm trong doe qmang aih”.

7 Manđeq kô, dìq dōng ka oh daq da au, patep pang jò bèn khoe jah bài bàu tèu qmang aih, drah broq ka rađeh hreо dìq ka kan amùa enh chac cla xam ta mahua yiang, yōc manoh loq iu yùq ka Boc Plình đđeq kan hadròeh bèn rai èh rai jah pageo. **2** Drah pèh manoh oh daq am ka nhèn: Nhèn ùh i broq hađo ka cabô, nhèn ùh i qnùt cabô, ùh i blah acaq da cabô cleq. **3** Au anoe qmang aih, ùh xài đđeq hu taqmòq yiniq lui ka oh daq, majah qmang aih adroe ka aih au khoe doe oh daq oe ta manoh cliac nhèn, yac ka cachìt yac ka rìh dìq hanoh qmang aih. **4** Au ùh i camaih cleq ka anoe ka oh daq, ta oh daq au i bàc yiniq đđeq jah catèh rađeh, qne kan nanxa au jah bàc kan

alòng, jah kan lem bùi haraya. **5** Majah qmang aih, jò nhèn trùh tagùng Maxêđoan, chac hamac nhèn ùh dùh ka jah padài. Nhèn nanxa bac trong: Enh gùng glàm toq kan tablah tablêq, enh dalam glàm toq kan yùq crè. **6** Mahaq Boc Plình aih Mangai alòng mangai tagah manoh, khoe alòng au majah qmang aih Tit khoe jah trùh ta aih; **7** ùh xài toq cla haq trùh, mahaq hloe xam kan alòng haq khoe jah enh oh daq. Haq anoe ka nhèn loq oh daq toq tangèh, crò hmoe, manoh oh daq joq loq nhet trùh au joq qnàng, aih ìq dài au majah lem bùi yeo hnau hòm. **8** Hi loq tajàiq au ma achìh ka oh daq, khoe broq ka oh daq mangò, mahaq au ùh i rawòe cleq, (tàng adroe ka aih au i rawòe, majah qmang aih au hnoq ta jàiq aih au i broq ka oh daq mangò toq biaq), **9** mahaq manđeq kô au lem bùi, ùh xài lem bùi ka oh daq khoe ep mangò, mahaq lem bùi majah qmang aih kan mangò da oh daq broq ka oh daq i manoh loq raxach. Joq qnàng, oh daq khoe mangò tiaq manoh Boc Plình enh, qmang aih nhèn ma i habo ka oh daq cleq. **10** LeLv 26:12; XuXh 29:45; Exe Ed 37:27; Gie Gr 31:1 Majah qmang aih kan mangò tiaq manoh Boc Plình broq ka bèn loq raxach, kan raxach aràng bèn trùh kan dèch claih mahua yiang, trong aih ùh broq ka bèn ep rawòe, yàng kan mangò tiaq da crõng taneh kô qnung bèn trùh ajang kan cachìt. **11** Ngan beq, kan mangò tiaq manoh Boc Plình khoe broq ka oh daq jah kan alàng dàng leq, kan enh broq hreо ka rađeh, mangò noèh, loq yùq crè kan loq nhet, loq haqnan. Oh daq khoe am mangai hnoq đeh hra đìq dõng ta bài yiniq aih oh daq joq hreо hliang. **12** Qmang aih tàng joq au khoe achìh jàiq ka oh

daq, aih ùh xài achìh ka mangai ma broq ùh troq, hadai ùh xài ka mangai khoe pòq đeh kan haño, mahaq dôq ka manoh da oh daq ma loq waq ka nhèn jah bac ngai hnoq enh ngèa Boc Plinh, **13** bài yiniq aih khoe alòng dìq ka nhèn. Nhèn bùi yeo loe ka aih hòm jò nhèn jah hnoq kan lem bùi da Tit, majah qmang aih dìq ka pì khoe broq ka mahua yiang haq jah blinh hlài. **14** Au khoe catèh ka Tit loq trùh pì oh daq, ùh i cleq au ma ep xep, EsIs 52:11majah qmang aih bàu nhèn ma anoe aih dìq joq qnàng, dài haq bàu nhèn ma capoch manè oh daq ka Tit aih dìq bàu joq qnàng. **15** Jò haq hmàng trùh kan loq iu da oh daq, oh daq khoe đìh haq dìq ka manoh, rai loq iu loq yùq, aih èh manoh loq waq haq am ka oh daq kiang rai bac tam. **16** Au dìq jaq lem bùi, majah qmang aih rìm trong au dìq khoe khòh lùi oh daq.

8 Manòeq kô, nhèn enh anoe ka oh daq loq xôq ramot Boc Plinh khoe am ka bac Tagop Hadròeh oe tagung Maxêđoan: **2** Wop jò bac kan ranac kàn trùh đòeq hu qnhro wì haq, aih manoh cliac da wì haq dua lem bùi pi cajaq, yac ka wì haq pa hamoq mahaq manoh cliac da wì haq dua loq hamah. **3** Kô au anoe ka oh daq loq: Cla wì aih khoe creo adràc dabau wiang tagop bac jèn tiaq deh padren hlàt pang leq, qnah ngai loe deh ka padren, **4** khoe aih cali calo àu bòch nhèn am wì haq jah wiang đeh moeq qnah đòeq tabàih ka mangai da Chuaq qnang nanxa. **5** Wì haq broq yeo loe ka manoh nhèn ma ngèh, adroe aih cla wì haq khoe đèch radeh ka Chuaq, khoe aih ka nhèn, tiaq manoh Boc Plinh ma enh. **6** Aih ìq dài nhèn majah hi thê Tit aràng ka wì oh daq, đòeq hu pagêh

trong lem kô, qmang ka haq khoe patep broq enh adroe.

7 Manðeq kô, bac trong oh daq khoe jah yeo loe: aih trong manoh lùi, bàu tapoch, trong loq iu, trong loq nhet, kan loq waq ka nhèn, aih èh pì hadai khòh ngan khòh nhet ka broq ma yeo loe trong yiniq broq lem qmang kô. **8** Anoe aih ùh xài au toq ti thê pì, mahaq wì qnoeq khoe broq dua lem, aih au hadai enh qnhro ngan kan loq waq da oh daq haq joq pang leq. **9** Majah qmang aih, oh daq loq kan tabàih dech enh Chuaq Jesus Christ bèn, haq aih padrõng, mahaq taiq oh daq haq majah broq ka raðeh loh ka pa, ðoèq canòm kan pa da haq, oh daq jah padrõng. **10** Au achoh bàu ka oh daq qmang aih, trong aih jah ka pì raq, majah qmang aih bac hanam adroe, oh daq raq mangai ma qnong ngoe, ùh xài toq broq yiniq lem qmang kô mahaq pì broq qmòe rai lem bùi. **11** Qmang aih manðeq kô, oh daq broq dôq haq gêh trong aih beq, qmang ka oh daq khoe padon hanìuq deh ta manoh qmang leq, hi broq tiaq dèh padren pang aih. **12** Majah qmang aih, tàng joq bèn yđc manoh lem ðòeq hnhu am, dahwèq aih men jah dì, haq jah dì tiaq dahwèq bèn i, ùh xài dì tiaq dahwèq wì ma ùh i. **13** Au ùh thê oh daq chìuq pangot hrah ðòeq i dahwèq hu tabàih am ka mangai qnoeq, mahaq au enh i kan taq atoq. **14** Qmang ka manðeq kô, oh daq i rah aih tah am ka mangai ma capòch ðeh, ðòeq jò wì haq loq i rah èh hadai tah hlài ka oh daq jò oh daq ma capòch diq, qmang aih hi jah taq atoq, **15** tiaq qmang ka bàu khoe achìh: “Mangai jah ma bac, aih hadai ùh i ka rah, mangai jah ðeh biaq, aih hadai ùh hìaq hamoq.” **16** Manè apôi Boc Plinh khoe broq Tit dìq manoh ka pì oh daq, tìah ka

au dìq manoh ka oh daq; **17** majah qmang aih, haq khoe broq tiaq bàu au hnài, haq hadai i manoh loq nhet, dài haq ma lam hmàih đeh ka oh daq. **18** Nhèn i thê tam mòeq ngai oh daq wiang lam ti haq, bàc Tagop Hadròeh i bàu manè mangai aih, majah qmang aih mangai aih khoe broq bàc yiniq lem ka Bàu lem. **19** Qnah hòm Tagop Hadròeh khoe dì haq aih, broq bua lam ti nhèn đòeq hu wiang wê bài dahwèq tabàih kô, nhèn broq waq ka gêh đòeq hu patô qnoph kan qngah qngai da Chuaq, khoe aih đòeq hu patô qnoph manoh lem da cla nhèn. **20** Dôq ajang aih nhèn hujah claih ka bàu qmèq jò nhèn wê bac jèn oh daq wiang tagop bàc qmang kô; **21** majah qmang aih, ùh xài nhèn chaq trong đòeq lem toq enh ngèa Chuaq mahaq chaq lem xam enh ngèa kon mangai. **22** Nhèn i yđc mòeq ngai oh daq oe taqne cla nhèn hu lam tam ti wì aih, haq aih hadai i manoh loq nhet haraya, bàc yàng bàc trong nhèn khoe qnhro ngan, hnoq haq aih broq cleq dua dìq dèh manoh, yàng kô haq hadai yeo nhet ka enh lam ta oh daq majah qmang aih joq haq lùi dèh pì joq qnàng. **23** Qmang aih, anoe trùh Tit, aih bua au, mangai abroq pajùm ti au taqne pì, anoe trùh wa baiq ngai tau, wa aih mangai wê bàu da Tagop Hadròeh, aih raq kan ranhòm da Christ. **24** Qmang aih, enh ngèa bài wì kô oh daq drah paqnoh deh manoh loq waq beq, patô qnoph hloe bài nen nhèn ma khoe hùa catèh dèh pì oh daq enh ngèa bàc Tagop Hadròeh.

9 Qnah hòm, biac ti tabàih am ka mangai da Chuaq, aih au pi ep achìh cleq tam ka oh daq. **2** Majah qmang aih au loq oh daq khoe padon qmòe deh ta manoh, au khoe

catèh dèh pì oh daq enh ngèa mangai Maxêđoan, au doe:
Mangai Achai khoe padon đòeq dahwèq hu tabàih enh
hanam adroe raq, manoh loq nhet da oh daq khoe jah
parông manoh cliac bac ngai. **3** Mahaq au khoe thê bài
oh daq tau trùh ti pì, đòeq ùh hìa qngwan ka bàu au ma
manè oh daq, waq ka pì chônh padon đòeq qmang ka bàu
au khoe anoe. **4** Au hòq èh mangai Maxêđoan trùh ti au
yàng aih hnoq oh daq qnhòq i padon qmòe dahwèq cleq,
aih èh kan wì haq ma lùi wìh wìa kan camaih ka nhèn, oh
daq aih pi anoe hòm majah qmang aih taiq nhèn khoe lùi
oh daq. **5** Dài aih au majah hèm ep pariaq oh daq tau
chônh lam trùh ta pì adroe ka nhèn, hu palauq adroe
dahwèq pì ma khoe tèu am, dôq bài dahwèq aih khoe jah
padon đòeq adroe tiaq deh manoh oh daq ma i deh joq
qnàng, ùh xài ep pa àu. **6** Hmàng qmang kô oq: Mangai
leq rai biaq aih gat biaq, mangai leq rai bac aih jah gat
bac. **7** Rìm ngai ep tiaq deh manoh ma khoe qnac deh
adroe đòeq hu am, ùh xài am ka ùh wìa hadai ùh xài
taiq i bô panan, majah qmang aih Boc Plình loq waq ka
mangai tabàih am ta kan lem bùi ta manoh. **8** Boc Plình
i cwiang am ka oh daq xôq ramot ùh đìq ùh dài đòeq
oh daq ùh hìa capòch qmòe cleq, mahaq loh qmoè ka
i rah đòeq oh daq hu broq trong lem, **9** qmang ka bàu
khoe achìh: “Mangai khoe rai dèh kùng hang, khoe am ka
mangai pa, Kan taq atoq da haq oe hloe mòeq đòe”. (aiōn
g165) **10** Boc Plình ma am adrech ka mangai rai adrech
xam bênh đòeq broq dahwèq acaq, aih èh haq hadai am
ka oh daq pliang adrech rai broq dôq adrech aih chèch
lòe tam yeo bac hòm. Haq tam plì kan taq atoq da oh daq

jah yeo bac hòm. **11** Qmang aih rìm trong oh daq dìq jah padrōng, đòeq jah broq bac trong lem, èh mangai ma jah dahwèq da pì oh daq enh tì kōng nhèn wì haq jah manè apôi Boc Plình. **12** Kùng hang oh daq ma tabàih aih, ùh xài broq toq ka mangai da Chuaq yiyeo đeh ka nan, mahaq haq broq ka bac ngai i tam manoh loq manè apôi Boc Plình. **13** Ajang yiniq broq kô wì haq hnoq manoh oh daq joq loq hamah, aih èh wì ma hijah manè apôi Boc Plình majah qmang aih hnoq oh daq khoe iu tiaq Bàu lem da Christ, manoh oh daq loq waq ka wì haq hloe xam ka rìm ngai. **14** Jò wì haq waiq khàn ka pì, manoh wì haq bêh ta pì oh daq, majah qmang aih xôq ramot Boc Plình am ka oh daq joq bac haraya. **15** Manè apôi Boc Plình majah qmang aih kan tabàih da haq rèn ùh dìq.

10 Tiaq kan loq hamon xam kan laq alàng da Christ au doe ka oh daq, au kô Phaulô joq mangai hamoq đeh qnàng jò yòng enh ngèa ka pì, hnoq jò arù ka oh daq au broq đeh tìah gleq ma tanoq raya! **2** Au cali calo ka pì oh daq apaq đòeq jò au trùh ti pì, au ep broq nhang ka pì qmang ka au ma padon broq ka bài mangai ma xoh nhèn loq rìh tiaq dua crōng taneh kô. **3** Majah qmang aih yac ka nhèn oe rìh ta crōng taneh kô, mahaq nhèn ùh tablêq ùh tablah qmang ka wì ta crōng taneh kô. **4** Ranac da nhèn đòeq hu tablêq aih ùh xài ranac da kon mangai, mahaq loh enh padren da Boc Plình cwiang itai, đòeq hu qnhroh qnìh đac dōng bài đôn wì ma cachàt. **5** Canòm ka bài ranac aih nhèn goh dōng bàu rahen da bài mangai loq padèch rađeh đòeq hu enh tablêq ka kan rabiaq da Boc Plình, nhèn khech rùp rìm manoh hèm dôq wì haq

broq dǒng hapǒng ka Christ. **6** Jò pì oh daq dìq khoe iu tiaq bàu, nhèn hadai yōc ranac aih raq đòeq hu tabroq ka bài mangai ma ùh iu tiaq bàu. **7** Oh daq ngan toq enh gùng qmòh? Tàng i mangai leq doe đeh kô mangai da Christ, nhèn kô hadai mangai da Christ. **8** Yac ka i jò au loq capoch catèh cla rađeh toq biaq trong cwìang itai Chuaq am ka nhèn đòeq hu grom gri oh daq, ùh xài đòeq broq ka raliang dài au ma blinh ùh camaih cleq; **9** au ùh enh taqnhùq pì oh daq xi jàiq au ma achìh kô. **10** I mangai doe: “Jò ma achìh jàiq Phaulô capoch nhang raya mahaq trùh jò i cla aih, haq ùh i lênh nèn cleq, bàu haq capoch hanoh ùh loh cleq”. **11** Mangai capoch qmang aih khòh hèm: Jò nhèn arù bàu tajàiq qmang leq, jò i cla, nhèn hanoh broq qmang aih. **12** Joq nhèn ùh hùa daq adàng ka cabô, ùh enh wêh rađeh ti bài mangai loq pliang rađeh. Mahaq cla wì wêh dèh cla, cla wì ngan deh ajang cla, qmang aih cla wì raq patô rađeh ùh lênh i kan rabiaq. **13** Da nhèn hòm, nhèn ùh catèh rađeh yeo loe ka acang ma pajaq, tiaq pang aniang Boc Plình khoe pajaq am ka nhèn, tiaq acang pajaq aih nhèn majah trùh ta oh daq. **14** Nhèn ùh cadiang loe dèh ka acang jò nhèn trùh ta pì oh daq, majah qmang aih oh daq oe ta acang aih. Joq nhèn raq ma khoe aràng Bàu lem da Christ trùh tanòe pì adroe dǒng. **15** Nhèn ùh pajìang hrìn rađeh, hadai ùh catèh ataq yiniq da mangai qnoeq ma broq, mahaq nhèn ngèh ka manoh lùi da oh daq èh rai tóc tam, aih dôq bìac nhèn ma patìh taqne oh daq hujah yòng kàn diq, tiaq acang ma khoe pajaq am ka nhèn; **16** qmang aih èh đòeq nhèn jah aràng Bàu lem yeo hangai ka gùng da

pì oh daq, majah qmang aih nhèn ùh enh catèh rađeh tanòe acang taneh da mangai mangai qnoeq abroq oe toq hi gêh. **17** Mahaq tàng cabô catèh rađeh, drah catèh rađeh enh dalam ka Chuaq. **18** Majah qmang aih, ùh xài mangai leq pliang rađeh aih dìq khòh jah manè, mahaq toq mangai da Chuaq ma thê dèh raq.

11 Joq qnàng! Au ngèh đeh pì oh daq àt chùuq da au kan blùng toq biaq! Ma joq qnàng, oh daq khòh àt chùuq. **2** Au qnang tarènh ka pì tìaq kan tarènh enh plinh, majah qmang aih au khoe capoch ka pì mòeq ngai ǒng raq, đòeq au jah patô pì oh daq qmang ka mangai gu adrùh hliang sriu đòeq dèch am ka Christ. **3** Mahaq au yùq qmang ka calah nèhbih ma khoe padô Êva qmang leq, èh manoh cliac da oh daq hadai loq loh ka pi wìa, hnhung đac kan hliang lem ka Christ qmang aih diq. **4** Majah qmang aih tàng loq i mangai qnoeq trùh hnài ònh ka oh daq mòeq Jesus ma qnoeq, crài ka Chuaq Jesus nhèn ma khoe hnài, mòeq yiang ma qnoeq crài ka Yang Hadròeh pì ma khoe jah, ùh meh mòeq Bàu lem qnoeq crài ka Bàu lem oh daq ma khoe jah, aih èh canau pì waq! **5** Mahaq au hèm yac ka bài mangai tìaq cla aih loq haqn hèq dàng leq, au dua ùh yi hamoq ka wì aih yac ka toq biaq hnha! **6** Trong bàu tapoch, au ùh rabiaq, mahaq au i kan loq, nhèn khoe patô ka oh daq jah hnoq trong aih rìm hì. **7** Au anoe hnài Bàu lem da Boc Plinh ka pì, au hnài đeh dech, au caqnìh rađeh ka haqneq đòeq oh daq jah dèch ka haqn hèq. Qmang aih, au ahìaq i yiniq lui cleq loq ùh? **8** Au khoe yōc baha, hatùh hatah dahwèq enh Tagop Hadròeh qnoeq đòeq hu wiang patìh ka pì. **9** Jò oe ti pì oh daq, glàm kan nanxa,

au ùh pangài ka cabô, majah qmang aih oh daq enh gùng Maxêđoan trùh, khoe aràng ka au dahwèq au ma nhet ka i yiniq waq. Au khoe wèq rađeh đòeq au ùh hìaq wìa kan trap ka oh daq. Tangèa kô èh dua qmang aih raq.

10 Kan joq qnàng da Christ oe enh dalam ka au, dài aih tagùng Achai ùh i mangai leq jah tát da au kan catèh aih.

11 Hagleq qmang aih? Ahìaq au ùh qnì waq ka pì oh daq ùh xài? Khoe i Boc Plình loq! **12** Mahaq trong au khoe broq, dua au oe raq broq, majah qmang aih au ùh enh dôq wì tau jah nen hu catèh, wì doe yiniq broq da wì haq hadai daq adàng ka da nhèn. **13** Majah qmang aih bài mangai qmang aih, ùh xài mangai tiaq cla joq qnàng, wì haq patìh ka kan qnùt, ti patìah đeh broq mangai tiaq cla da Christ. **14** I cleq ep hamàih, cla Satan ji patìah đeh broq bình plình qngah qngai. **15** Qmang aih, bài mangai patìh ka haq ti patìah đeh broq mangai patìh ka kan taq atoq, ùh i cleq ma ep hamàih, mahaq kan pulùch da wì haq jah tajì wop tiaq yiniq wì haq ma khoe broq. **16** Au anoe tam: Apaq i cabô ngan au qmang ka mangai blùng. Mahaq tàng loq i mangai leq hèm qmang aih, pì dôq au blùng beq, aih raq au hujah catèh rađeh toq biaq. **17** Bàu au ma anoe kô, aih au anoe tiaq deh cla au loq ka rađeh, ùh xài anoe tiaq da Chuaq, mahaq qmang ka da mangai blùng. **18** Bác ngai tiaq xech akia đòeq hu catèh rađeh, au hanoh catèh đeh diq. **19** Majah qmang aih, oh daq aih mangai rabiaq mahaq lem bùi ka tamàng mangai blùng.

20 Joq, oh daq xan dôq yôt wì rùp rađeh broq dìc hapõng, dôq hloe wì lonh apom, dôq wì blah yõc da oh daq, dôq wì padèch rađeh đòeq hu halê rai tep ta tabõc oh daq. **21**

Au broq ka nhèn kan camaih jò anoe bàu kô, nhèn joq khoe ùh hùa trong aih. Mahaq tàng cabô i yiniq cleq hùa catèh rađeh, au anoe troeq mangai blùng: Au hanoh hùa.

22 Wì haq mangai Hêbru ùh xài? Au hadai. Wì haq mangai Isorali ùh xài? Au hadai. Wì haq nang noe Apraham ùh xài? Au hadai. **23** Wì haq mangai patìh ka Christ ùh xài? (capoch qmang ka mangai ùh qnì) Òq! Au kiang ma yi loe! Au khoe xalep yi hnau ka wì, oe tù yi bac, wì blai yi bac. Bac yàng au hwaq cachìt, **24** padam yàng mangai Juđa hwat au xi long roe, rìm yàng tam moeq qmang blai hòm hi bình pôn jàt. **25** Piq yàng wì tong xi long dùi, moeq yàng wì đàp xi hmo, piq yàng cram boang. Au khoe đòng mòeq hì mòeq mang ta diac raxìq. **26** Bac yàng au lam ti trong, yat ti cròng diac, yat ka mangai atùng, yat qne hadai mangai Juđa, yat ka mangai diac wì, yat ta plài, yat tanòe hawit, yat ta diac raxìq, yat ka oh daq ma loq ti gôpla. **27** Au khoe abroq xalep, bac yàng rìu qngah ka mang, pangot croh ranǒng, ja ka oe rôn, au khoe hmaq tanget hmaq oe chac dech. **28** Qnhòq rèn yiniq qnoeq hòm, aih rìm hì au dìq ep lèt ka rìm Tagop Hadròeh. **29** I cabô ùh nèn, au ma ùh tàng tìah qmòe cla au ùh nèn? Cabô tacro au ma ùh tàng tìah gleq i ùnh bùh ta cliac clèm au qmòh? **30** Tàng joq ep catèh au enh catèh toq dèh kan hamoq da au. **31** Boc Plình aih Baq da Chuaq Jesus Christ, haq aih ma khòh manè apôi mòeq đòe mòeq tui, haq loq ka au ùh capoch qnùt. (aiōn g165) **32** Oe ta Đamat, cwan kàn da bùa Arêta thê wì rap ta aih hu rùp au. **33** I oh daq yōc rajōng cadrai qnoh au enh ti

qmōc gāu tiaq haqmai panàt canàng plài aih, meh au hi
claih enh tì kōng haq aih.

12 Au ep catèh rađeh yac ka ùh jah cleq. Au anoe trùh
bài yiniq au hnoq ta kan mahnu enh Chuaq. **2** Au loq
mòeq ngai da Christ, adreo kô khoe mòeq jàt pôn hanam
adroe, khoe jah dèch atōc caloeh trōc ma piq (ta chac
cla haq, qnì enh gùng ka chac cla haq, au ùh loq, i Boc
Plình loq). **3** Au loq mangai aih (ùh qnì ta chac haq, qnì
enh gùng ka chac haq, au ùh loq, i Boc Plình loq); **4** jah
atōc ta Baradī, ta aih tàng bàu mahaq ùh jah doe hlài,
hadai ùh lòh ka cabô capoch qnoh. **5** Au jah catèh trùh
mangai aih, mahaq da cla au, au ùh catèh, catèh dèh toq
kan ùh nèn raq hêq. **6** Yac ka au enh catèh rađeh, au
dua ùh xài mangai ratùt, majah qmang aih au anoe joq
qnàng, mahaq au ùh anoe dôq ùh hìaq i cabô doe au
capoch yeo dôch ka yiniq wì ma hnoq au broq xam bàu
wì ma tàng ajang au. **7** Qmang aih, yùq au loq padèch
hrìn rađeh ajang nòe đeh hnoq mahnu kàn kaiq qmang
kô, dài majah khoe thê mòeq toq yila padom ta xech akia
au, aih mangai da Satan, đòeq hu jêh au, đòeq broq ka
au apaq dèch rađeh; **8** khoe piq yàng au waiq khàn ka
Chuaq thê yiniq aih loh hangai enh chac au. **9** Mahaq
Chuaq padreo bàu doe: “kan tabàih dech Au am ka ìh
khoe lap, majah qmang aih padren da Au jah geo ta kan
hamoq ìh”. Aih ìq dài au majah lem bùi enh toq catèh
dèh kan ùh nèn, dôq kan dêh da Christ oe enh dalam ka
au. **10** Qmang aih, đòeq jah lòeq Christ dài au majah bùi
ka oe ta kan ùh nèn, ta bàu capoch qmèq, xalep, khech
rùp, nanxa. Majah qmang aih, jò au ùh nèn aih raq jò au

tadêh. **11** Au majah khoe blùng aih pàng oh daq panan au, oh daq manè au aih ma troq, yac ka au ùh loh cleq, au ma i yeo hamoq cleq ka bài mangai tiaq cla ma kàn tau. **12** Jò au oe taqne pì, au khoe paqnoh dôq pì hnoq au kô joq qnàng mangai tiaq cla da Christ, ajang kan au loq kèm rìm trong, hloe xam teo hamàih xam kan halac. **13** Manðeq kô, enh gùng ka au ma ùh pangài ka pì oh daq, aih oe i yiniq cleq pì ma ùh diang Tagop Hadròeh qnoeq? Ajang kan ùh taq atoq aih, pì apaq tamrua ka au oq! **14** Yàng kô aih yàng piq, au padon lam ta oh daq, au ùh pangài cleq ka pì, majah qmang aih ùh xài au chaq da pì dahwèq, mahaq chaq qmòe cla pì qmat raq, joq ùh xài kon ep atech đòeq dahwèq ka miq baq, mahaq miq baq ma atech đòeq am deh ka kon, ma aih ùh hnau hòm; **15** da au hòm, au toq enh am deh kùng hang am hloe xam cla au ka mahua yiang oh daq, tàng au loq waq ka pì rai èh rai bàc qmang aih, wìa ka pì loq waq ka au rai èh rai biaq qmòh? **16** Mahaq i mangai doe, yac ka au qnhòq lah pangài ka pì cleq, mahaq au kô magai tai cliac khoe yōc deh kan rabiaq đòeq rùp padràng pì. **17** Au alah thê cabô lam padô alùan yōc da oh daq cleq ùh? **18** Yàng adroe nèh au khoe thê Tit lam hmàih ka oh daq, yōc tam mòeq ngai taqne nhèn đòeq wiang lam ti haq. Ahìaq Tit khoe padô yōc da pì cleq ùh? Ma ùh xài nhèn hadai canòm mòeq Yiang Hadròeh đòeq hadai cadiang tiaq mòeq teo jènh raq qmòh? **19** Enh nèh trùh manðeq, pì toq hèm nhèn chaq trong đòeq aclai ka rađeh enh ngèa pì oh daq. Mahaq enh dalam ka Christ, oe enh ngèa Boc Plình, nhèn doe bài bàu kô, rìm yiniq kô dìq đòeq ka oh daq jah dêh

qnhrang. **20** Majah qmang aih, au hòq jò au trùh ta oh daq au ùh hnoq tiah ka manoh ma ngèh, oh daq hadai hnoq au ùh tiah ka manoh pì enh. Au yùq taqne oh daq loq oe i kan talech, tagrinh, tanòeh, ùh hatroq, capoch dech, capoch qmèq ka dabau, catèh xam kan manhài. **21** Au yùq hòm, jò au trùh ta oh daq, Boc plinh au loq broq ka au ep camaih xep enh ngèa pì oh daq, èh au ep crò hmoe ka mangai khoe broq yiniq lui enh nèh trùh mandeq mahaq ùh dùh qmòe ka loq raxach trong amùa, tango taqnung, xam trong talìq talàn tiah wì haq ma khoe broq.

13 Kô èh yàng piq au padon trùh ta oh daq. Rìm yiniq jah dì tiaq bàu baiq piq ngai ma wiang panhìn. **2** Jò au trùh hmàih ka oh daq yàng baiq nèh, au khoe doe ka mangai adroe kô nèh ma khoe broq yiniq lui hloe xam ka mangai qmoeq, mandeq kô au yac ka au arù, mahaq dua au chônh doe hòm: Jò au trùh au pi oe taqnhùa cleq ka cabô hòm. **3** Patep pang jò oh daq bòch waq ka loq i nen cleq đòeq hu panhìn joq Christ i capoch hnài ajang au. Haq aih ùh xài mangai ùh loh cleq taqne pì, mahaq dêh haraya. **4** Majah qmang aih, haq khoe tiang đình talong pagat ta kan ùh nèn, mahaq haq khoe rìh ta cwiang i tai Boc Plinh, hanoh qmang aih, nhèn ùh nèn enh dalam ka haq, mahaq nhèn rìh ti haq enh dalam cwiang itai da Boc Plinh, đòeq hu abroq taqne oh daq. **5** Cla pì oh daq ngan hlài deh chiac beq, đòèq hu loq đeh i manoh lùi loq ùh? Nhro ngan rađeh beq, oh daq ma ùh hnoq i Chuaq Jesus Christ oe enh dalam ka oh daq ùh? Waq toq oh daq ùh hìaq khoe troq ka cađac. **6** Nhèn ngèh ka oh daq canau hnoq nhèn kô ùh xài mangai troq ka

cađac. **7** Manđeq kô nhèn waiq khàn ka Boc Plình dôq oh daq ùh broq trong qmèq, ùh xài đòeq ka wì loq nhèn kô mangai khoe qnhrang ta kan qnhro, mahaq dôq pì oh daq jah broq trong lem, yac ka hnoq nhèn tìah gleq mangai khoe troq ka qnoph đac. **8** Majah qmang aih, nhèn ùh jah broq cleq ma pagau hlài ka bàu joq qnàng, mahaq toq hatroq tiaq bàu joq qnàng. **9** Yac ka nhèn ùh nac canèn, mahaq waq toq oh daq jah tadêh aih nhèn khoe lem bùi raya, bàu nhèn waiq khàn aih waq ka oh daq jah gêh geo rìm trong. **10** Aih ìq dài jò arù, au majah achìh ka oh daq bài trong kô, đòeq jò i mat au taqmat, au ùh hìaq ep broq nhang tiaq cwìang Chuaq ma am ka au, aih cwìang đòeq hu dèch paqnhrang ùh xài đòeq hu raliang đac. **11** Pulùch, oh daq drah bùi beq, drah hnan tiaq kan gêh geo, alòng dabau, pajùm mòeq manoh oe ma hatroq ti dabau, aih èh Boc Plình da kan loq waq xam kan catèm oe ti pì. **12** Yōc nà hìp hadroèh đòeq hu hmàih dabau. **13** Dìq dǒng mangai da Boc Plình tagùng kô i bàu bòch hmàih ka oh daq. **14** Waiq kan tabàih dech da Chuaq Jesus Christ, kan loq waq da Boc Plình, kan taqmùt da Yiang Hadròeh oe dìq ti oh daq.

GALATI

1 Phaulô broq mangai Tiaq cla da Christ ùh xài enh kon mangai, hadai ùh i canòm qmòe ka cabô thê, mahaq enh cla Chuaq Jesus Christ xam Boc Plình aih Baq, Mangai ma broq ka Chuaq Jesus khoe rìh hlài enh mangai cachìt. **2** Xam dìq döng oh daq oe pajùm ti au, achìh am ka bài Tagop Hadròeh oe gùng Galati. **3** Waiq ka oh daq jah kan catèm xam kan tabàih dech enh Boc Plình aih Baq xam enh Chuaq Jeus Christ aih Chuaq da bèn. **4** Haq aih mangai khoe cachìt am ka yiniq lui bèn, đòeq hu dèch bèn jah claih enh qnhòng ngang dù kô, wop qmang ka manoh Boc Plình, aih Baq bèn, (aiōn g165) **5** Kan ranhòm mòeq đòe ùh lùch jah dìq ta haq! Amen. (aiōn g165) **6** Au hamàih ka oh daq ma rênh ka cađac mangai ma creo ka oh daq trùh rìh ta kan tabàih dech da Christ, đòeq hu cadàu tiaq bàu lem ma qnoeq. **7** Joq qnàng ùh i ka bàu lem ma qnoeq, mahaq i toq bài mangai enh broq ka oh daq loh ka manhài ta manoh, rai enh raliang đac Bàu lem da Christ. **8** Mahaq tàng i cabô, yac ka cla nhèn, yac ka bìn plình oe ta plình, hnài ka oh daq bàu lem ma qnoeq crài ka Bàu lem da nhèn ma khoe hnài oh daq, mangai aih khoe khòh ka Anathem. **9** Au khoe doe, kô au anoe hòm: Tàng joq loq i cabô hnài ka oh daq bàu lem ma qnoeq crài ka Bàu lem oh daq ma khoe jah, mangai khòh ka Anathem đac hloe! **10** Manòeq kô, au àu đòeq yōc manoh kon mangai, loq đòeq jah manoh Boc Plình? Tàng joq au oe raq enh broq lem manoh kon mangai, au pi xài hapōng da Christ. **11** Manòeq kô au anoe dôq pì oh daq loq rameh: Bàu lem au khoe hnài, aih ùh xài loh enh

kon mangai; **12** majah qmang aih au ùh i tàng, ùh i yǒc
Bàu lem aih enh cabô, mahaq au khoe jah qmòe enh cla
Chuaq Jesus Christ mahnu am ka au. **13** Majah qmang aih,
oh daq hmaq tàng adroe nèh au tiaq trong da mangai
Juđa, au rìh acaq qmang leq cadèh, au ti khech rùp rai ti
raliang đac Tagop Hadròeh da Boc Plình oe palap cleq; **14**
hadai nhèn mangai mòeq lòp mòeq diac ma hanoh tiaq
trong da mangai Juđa au yi loe dǒng ka wì qnoeq, au nhet
pi cajaq trong wèq tiaq bàu boc yaq nhèn ma qmon enh
nèh. **15** Mahaq apang jò Boc Plình haq ma khoe ràih đòeq
au enh jò au oe raq ta cliac miq, yǒc kan tabàih dech đòeq
creo ka au. **16** Haq khoe lem manoh đòeq mahnu dèh kon
haq am ka au, đòeq au jah anoe Kon aih am ka mangai
diac wì, tajòe qmòe au pi gồm hatinh ka wa xech wa akia.
17 Au hadai ùh tōc ta Jerusalem, đòeq glàm bài mangai
Tiaq cla ma adroe ka au, mahaq au lam tagùng Arabi, atìq
ka aih au hlài ta Đamat. **18** Khoe èh piq hanam atìq ka aih,
au tōc ta Jerusalem, đòeq ta canau ka Sêpha, au oe ti haq
mòeq jàt padam hì, **19** mahaq au ùh hnoq qmòe mangai
qnoeq enh gùng ka Jaco aih oh da Chuaq. **20** Joq qnàng
enh ngèa Boc Plình, rìm yiniq au achìh ka oh daq kô au
ùh qnùt. **21** Khoe aih au lam ta cròng Siri xam gùng Silisi,
22 jò aih bài Tagop Hadròeh da Christ tagùng Juđê qnhòq
lòm canau ka au. **23** Wì haq toq hìa tàng doe: Mangai ma
toq ti chaq rùp bèn adroe kô nèh, manòeq kô haq aih
qnang hnài trong haq ma àu raliang đac nèh haq. **24** Aih
ìq, nen ajang au wì haq majah toq manè apôi Boc Plình.
2 Khoe aih, moèq jàt pôn hanam, au tōc hòm ta Jerusalem
ti Banaba, i qnong Tit lam tiaq ma. **2** Au iu tiaq bàu

mahnu, tōc ta aih đòeq taqmon hlài Bàu Lem au khoe hnài ka mangai diac wì dôq oh daq jah loq, mahaq au taqmon hlài toq ka wì ma broq gàu Tagop Hadròeh, majah qmang aih au waq ka jah panhìn đòeq bìac cadàu da au enh nèh trùh mamòeq ùh hìaq ngwan. **3** Yac kaTit, mangai ma lam tiaq au aih mangai Gorec, mahaq dua ùh hìaq ep broq ramènh kat akia. **4** Nhèn majah broq qmang aih, taiq i biaq ngai patìah đeh hanoh broq oh daq, mùt taqne nhèn hu ti achop rinh ngan cwìang da nhèn jah enh dalam ka Chuaq Jesus Christ, đòeq rùp nhèn broq dìc broq hapõng. **5** Nhèn ùh talùi ka wì haq yac ka toq xit hnha, blinh qmòe nhèn ùh oe enh qneq ka cwìang da wì haq, đòeq kan joq qnàng da Bàu lem jah hagau taqne oh daq. **6** Anoe trùh mangai ma i bang tiang ma haqn hèq wì ma iu camaih dèh raya (yac ka enh nèh wì haq mangai qmang leq, aih dua ùh ep cleq ka au, Boc Plình ùh i yi loq waq ka cabô) wì aih hanoh ùh tam mòeq nà bàu cleq ta bàu hnài da au. **7** Majoq qnàng aih, wì haq hnoq bìac hnài Bàu lem ka mangai ùh broq ramènh kat akia Chuaq khoe thê au, tìah ka bìac hnài Bàu Lem ka mangai broq ramènh kat akia ma khoe thê Phiero diq **8** Majah qmang aih, Boc Plình ma khoe broq ta manoh cliac Phiero, đòeq thê haq broq mangai tiaq cla am ka mangai kat akia hadai broq ta manoh cliac đòeq thê au broq mangai tiaq cla am ka mangai diac wì **9** jò Jaco, Sêpha, Jon, aih bìai mangai wì ma ngan tìah dèh ka long jrang kàn, wì canau kan tabàih dech khoe jah am ka au, wì hnhu kõng pah qma hu carùp tì ka ma Banaba, đòeq ma lam trùh ta mangai diac wì, wì haq aih lam trùh ta mangai khoe broq ramènh kat

akia. **10** Wì aih toq tanap ka au ep hmàng trùh mangai pa, trong aih au hadai khoe nhet ka broq haraya. **11** Mahaq jò Sêpha trùh ta Antiôt, au i tagàih enh ngèa ka haq, majah qmang aih haq broq joq khoe ùh troq. **12** Jò mangai Jaco thê lam qnhòq i trùh, aih haq acaq pajùm ti mangai diac wì, yàng jò wì bu trùh haq padinh yòng lah đeh oe crài, majah qmang aih haq yùq ka bài mangai khoe broq ramènh kat akia. **13** Bài mangai Juđa qnoeq hadai top dua ùh wìa qmang aih, jaq Banaba hadai loh qmòe ka broq tiaq kan ùh wìa da bài aih. **14** Mahaq jò au hnoq wì haq lam ùh jang tiaq kan joq qnàng da Bàu lem, enh ngèa bàc ngai, au doe ka Sêpha: “Tàng ìh kô mangai Juđa, mahaq acaq oe hadai hatìah ka mangai diac wì, ùh tiaq ranenh da mangai Juđa, aih hagleq ìh majah thê mangai diac wì tiaq ranenh da mangai Juđa? **15** Nhèn kô jò ha-uang loh aih khoe mangai Juđa, ùh xài mangai i yiniq lui loh enh mangai diac wì. **16** Yac ka qmang aih, bèn loq kon mangai jah kan taq atoq, ùh xài canòm ka broq tiaq trong ranenh thê, mahaq canòm ka manoh lùi enh dalam ka Christ, dài haq nhèn majah khoe lùi Chuaq Jesus Christ, đòeq hujah wìa mangai taq atoq tiaq manoh lùi enh dalam Christ, ùh xài canòm ka broq tiaq trong ranenh thê, majah qmang aih ùh i cabô broq tiaq trong ranenh thê ma jah kan taq atoq. **17** Mahaq, tàng joq nhèn qnang chaq broq qmang leq hujah kan taq atoq enh dalam ka Christ, yàng wì doe nhèn mangai i yiniq lui, tàng qmang aih Christ aih ma hapõng da yiniq lui qmòh? Ùh lòm qmang aih! **18** Joq, tàng au dèch paqnàng hlài yiniq au ma khoe raliang đac, aih ajoq cla au raq doe

đeh kô khoe ùh troq ka ranenh. **19** Majah qmang aih, tiaq ranenh, au khoe cachìt am ka ranenh, đòeq hu rìh ka Boc Plình. **20** Au khoe tiang đình pajùm ti Christ ta long pagat, manðeq kô au rìh, aih pi xài au rìh hòm, mahaq Christ rìh oe enh dalam ka au, manðeq au rìh ta xech akia kô, aih au rìh ta mannoh lùi kon Boc Plình, haq ma loq waq ka au, chìuq cađac rađeh hu cachìt am ka au. **21** Au ùh enh dôq kan tabàih dech da Boc Plình loh đac ka qngwan, tàng broq tiaq ranenh men jah kan taq atoq, qmang aih Christ cachìt hi qngwan qngwaiq.

3 Wùih! mangai Galati ma blùng tau, cabô khoe tah ka pì canàih, bài mangai adroe kô nèh loq ka Jeus Christ khoe tiang đình talong pagat tìah gleq hnoq qmòe ajang mat? **2** Au bòch pì moèq bàu qmang kô: Aih ìq canòm ka broq tiaq trong ranenh thê, loq canòm ka ande tàng èh lùi oh daq ma khoe jah Yiang Hadròeh? **3** Gleq oh daq majah blùng hrìn qmang aih? Adroe aih khoe canòm ka Yiang Hadròeh hagleq manðeq kô aih ma hi loh ka canòm ka xech akia đòeq hu pagêh? **4** Oh daq chìuq bàc xalep qmang aih đòeq hu dech do qmòh? Tàng qmang aih joq hi qngwan! **5** Boc Plình am Yiang Hadròeh rai broq bàc kan halac qne oh daq, aih tiaq trong ranenh thê loq taiq oh daq lùi bàu oh daq ma khoe tàng? **6** Tìah ka Apraham lùi Boc Plình, aih hi jah creo ka haq mangai taq atoq. **7** Qmang aih oh daq khòh loq rameh: Bài mangai leq i manoh lùi, aih ma joq kon xau joq qnàng da Apraham. **8** Hset Hadròeh khoe loq adroe Boc Plình hanoh creo ka mangai diac qnoeq jah kan taq atoq tiaq manoh lùi, dài haq majah chônh doe ka Apraham Bàu lem kô: “Rìm

taneh diac dìq canòm ka ìh hujah xôq ramot”. **9** Qmang aih, waq toq cabô lùi, haq hi wiang jah xôq ramot ti Apraham aih mangai i manoh lùi. **10** Majah qmang aih, rìm ngai ma canòm ka bìac broq da ranenh, aih dìq oe enh qneq ka kan hamaiq, majah qmang aih i bàu achìh rameh: “Joq ra-òh hamaiq qnàng ka bài mangai ma ùh cajap manoh ta rìm yiniq khoe achìh ta hset ranenh đòeq broq tiaq bài yiniq aih”. **11** Joq qnàng ùh i ka cabô broq tiaq ranenh mahaq jah kan taq atoq enh ngèa Boc Plinh, trong aih joq wop, majah qmang aih mangai taq atoq rìh tiaq manoh lùi. **12** Ranenh ùh pajùm ti manoh lùi, mahaq ranenh achìh rameh: “Mangai leq iu tiaq ranenh hi rìh canòm tiaq dèh aih raq”. **13** Christ khoe baxon ahlài bèn claih enh kan hamaiq da ranenh, majah qmang aih Haq khoe wìa kan ra-òh hamaiq am ka bèn majah qmang aih i bàu achìh: “Joq ra-òh hamaiq qnàng ka mangai wì ma atua tòc talong.” **14** Dôq xôq ramot ma am ka Apraham canòm ka Chuaq Jesus Christ jah ta ùc jàp jìa ka mangai diac qnoeq, qnah hòm đòeq bèn canòm ka manoh lùi hujah yōc Yiang Hadròeh, ma khoe tèu am. **15** Yôiq oh daq, au capoch tiaq bàu kon mangai ma loq doe: Jò wì khoe gêh ka jàiq tajao, pi i bô oe jah raliang, oe jah tah tam cleq ta aih hòm. **16** Manòeq kô, bài bàu tèu am khoe jah am ka Apraham xam nang noe haq. Hset Hadròeh ùh xài doe: “am ka bài nang noe kon mangai”; tìah am ka bàc mangai, mahaq doe: “am ka nang noe da ìh”, qmang ka anoe trùh mòeq ngai raq, aih Chuaq Jesus Christ. **17** Qmang aih au doe aih rameh: Pôn hrinh piq jàt hanam atìq men i hset ranenh, dài ma ùh jah raliang đac Bàu

tajao Boc Plinh broq khoe gêh deh adroe ka aih, ranenh hadai ùh broq ka bàu tèu am loh đac ka qngwan qngwaiq.

18 Majah qmang aih, tàng joq tiaq ranenh bèn jah kùng hang, aih pi oe tiaq bàu ma tèu am. Mahaq Boc Plinh am ka Apraham kùng hang tiaq bàu Haq khoe tèu deh adroe. **19** Tàng qmang aih ranenh đòeq broq cleq hòm? Ranenh neo qnoh ònh atìq, taiq kon mangai broq toq yiniq lui, gòm jò Kon da nang noe jah trùh, aih Mangai ma khoe i bàu tèu deh adroe, ranenh khoe jah qnoh am enh bài bình plinh èh jah anoe hlài xi moèq ngai oe taqne. **20** Mangai taqne aih ùh xài taqne ka mòeq apah raq, mahaq Boc Plinh aih i mòeq raq. **21** Tàng qmang aih, ranenh pagau hlài ka bàu Boc Plinh ma tèu am qmòh? Ùh lòm qmang aih! Tàng joq khoe qnoh am ranenh hlàt dèch kon mangai jah kan rìh, aih èh kan taq atoq hadai loh enh ranenh. **22** Mahaq Hset Hadròeh khoe clêh rìm yiniq oe enh qneq ka yiniq lui, dôq bàu ma khoe tèu, enh dalam ka Christ jah am ka mangai lùi. **23** Jò kan lùi qnhòq trùh, bèn dìq oe enh qneq ka ranenh, hu gòm kan lùi jah paqnoh. **24** Qmang aih ranenh tìah ka mangai hnài đòeq hu ajèn aràng bèn trùh ta Christ, đòeq canòm ka manoh lùi bèn jah wìa kan taq atoq. **25** Qmang aih jò manoh lùi khoe trùh, bèn pi ep oe enh qneq ka cwiang da mangai hnài aih hòm. **26** Aih ìq, enh dalam ka Chuaq Jesus Christ, bèn dìq jah broq kon Boc Plinh. **27** Oh daq dìq khoe jah baptem enh dalam ka Christ, dìq khoe jah caxùnh yōc Chuaq Jesus Christ. **28** Qmang aih, pi i ka mangai Juđa, pi i ka mangai Gorec hòm, pi i mangai broq dìc, pi i mangai broq dèh cla hòm, pi i gucalô gucadri hòm, majah qmang

aih enh dalam Christ oh daq wìa mòeq raq. **29** Tàng joq oh daq joq qnàng mangai da Christ, oh daq aih nang noe da Apraham, aih bài mangai wiang jah hang tiaq bàu ma khoe tèu am.

4 Manòeq kô au doe rameh, mangai wiang jah kùng hang yac ka haq broq craq dìq döng kùng hang aih jò haq oe raq qyoh ùh i crài cleq ka hapõng. **2** Haq ep oe enh qneq ka cwìang mangai ma ranenh am, trùh jò baq haq ma khoe pajaq đòeq adroe. **3** Bèn hanoh qmang aih, jò oe raq kon qyoh, ep iu tiaq ranenh da crõng taneh. **4** Yàng jò ma pajaq khoe jah gêh. Boc Plình thê dèh Kon haq ha-uang loh enh mòeq ngai gucadri, ha-uang loh enh qneq ka ranenh, **5** hu baxon yõc bài mangai oe enh qneq ka ranenh, am bèn jah broq kon ban da haq. **6** Taiq oh daq aih kon haq, dài Boc Plình majah khoe thê Yiang Hadròeh da Kon haq müt ta manoh cliac bèn, Yiang aih creo: Aba! Baq! **7** Qmang aih oh daq pi xài hapõng dìc hòm, mahaq khoe wìa kon, tàng khoe wìa kon, aih èh hadai wìh wìa mangai jah kùng hang canòm enh kan tabàih dech da Boc Plình. **8** Nèh haq, ùh qnì ka Boc Plình, oh daq broq dìc bài kiac mahaq ùh xài kan kiac. **9** Yàng manòeq kô khoe jah loq ka Boc Plình, Boc Plình hadai loq ka oh daq, aih hagleq majah oe tawìh hlài hu broq dìc, iu tiaq bài ranenh ùh loh cleq aih? **10** Oh daq oe raq wèq ranenh hì, khê, jò, hanam qmòh? **11** Au loq yùq am ka pì, au yùq qngwan ka au khoe abroq xalep taqne pì. **12** Au cali calo ka pì oh daq, thê pì tìah ka au, majah qmang aih au hadai tìah ka pì. Oh daq ùh i broq habo cleq ka au. **13** Oh daq loq jò chac au ma dìq jaq ùh nèn au khoe aràng Bàu lem

ka oh daq yàng baxèm, **14** pàng chac hamac au ùh nèn dài majah khoe tìah ka nen hu qnhro oh daq, yac ka oh daq ùh i jù lê au, ùh chàih cađac au, mahaq đìh au tìah ka bình plình da Boc Plình, tìah qmòe cla Jesus Christ. **15** Manòeq aih, kan lem bùi da oh daq nèh khoe taleq? Au anoe ka oh daq loq, nèh haq oh daq loq waq ka au, tàng majah aih oh daq chìuq bōc dèh clong mat am ka au. **16** Au yōc bàu joq qnàng anoe hnài oh daq, hagleq au majah loh mangai tablêq hlài ka oh daq? **17** Bìai wì aih, hnoq wì ma nhet ka oh daq, aih ùh xài wì lem manoh cleq ka pì, mahaq wì enh oh daq talah ka nhèn, dôq oh daq nhet ka wì haq. **18** I mannoh loq nhet ka bìac lem aih troq, jò leq hadai qmang aih, ùh xài toq jò i mat au. **19** Yôiq wì kon, taiq pì kon au majah chìuq kan jìq da mangai ha-uang, trùh jò leq Christ jah gêh ta dalam oh daq, **20** Au ngèh manòeq kô, chop au jah oe ti pì đòeq hujah hatuàng ka pì majah qmang aih pì broq ka au joq xa ka hèm qnàng. **21** Anoe ka au beq, pì oh daq mangai ma enh rìh enh qneq ka ranenh, pì ùh qnì tàng ranenh anoe cleq qmòh? **22** Majah qmang aih i bàu achìh rameh Apraham i baiq ngai kon calô: Mòeq aih kon da mangai gucadri broq đeh hapõng, mòeq aih da mangai gucadri broq dèh cla. **23** Mahaq kon da mangai broq hapõng aih ha-uang tiaq xech akia, kon da mangai gucadri broq dèh cla aih ha-uang tiaq bàu Boc Plình khoe tèu am adroe. **24** Dìq baiq đòeq alìah rameh: Baiq ngai gucadri aih baiq bàu tajao, mòeq aih bàu tajao ta wang Sina-i, ha-uang kon đòeq hu broq dìc hapõng, aih da Aga. **25** Manòeq kô, Aga aih wang Sina-i, oe tagùng Arabi, ùh i crài cleq ka Jêrusalem

manðeq, plài aih xam kon da haq dìq broq dìc. **26** Mahaq Jérusalem enh qnhèq aih ùh broq dìc cabô, haq aih miq da bèn. **27** Majah qmang aih i bàu achìh: “Yôiq gucadri ma xon tau, ìh mangai ma ùh dùh đeh ka ha-uang, drah lem bùi beq; ìh mangai qnhòq lah hmaq jìq ha-uang, drah dìq manoh lem bùi drah do ma dêh haq, Majah qmang aih, kon da mangai cadrì wì ma khoe cađac, jah yeo bàc ùh hnau ka da mangai cadrì ma i õng”. **28** Manðeq kô oh daq, bèn tìah ka Ysac, aih kon da bàu khoe tèu am. **29** Mahaq qmang ka calah nèh, mangai ha-uang loh tiaq xech akia ti khech rùp mangai ha-uang loh tiaq cwìang da Yiang Hadròeh qmang leq, yac ka manðeq kô hadai qmang aih. **30** Mahaq Hset Hadròeh anoe cleq? Drah hnan qnoh đac mangai gucadri ma broq dìc qmat hloe xam kon da haq, majah qmang aih kon calô da mangai broq dìc ùh jah wiang pajùm kùng hang ti kon da mangai cadrì broq dèh cla. **31** Qmang aih, dìq ka oh daq bèn ùh xài kon da mangai gucadri ma broq hapõng mahaq bèn kô kon da mangai gucadri ùh i broq hapõng cabô.

5 Christ khoe paclaih đøèq bèn pi broq dìc, qmang aih drah yòng ma cajap, apaq dôq rađeh oe enh qneq ka long ech hapõng dìc hòm. **2** Au kô Phaulô au doe ka pì oh daq, tàng oh daq broq ramènh kat akia, aih èh Christ ùh i lòeq cleq ka pì hòm. **3** Au doe ka mangai ma broq ramènh kat akia, wì haq ep wèq dìq dõng ka ranenh. **4** Tàng pì dìq enh canòm ka ranenh đøeq hujah kan taq atoq, qmang aih oh daq khoe talah enh gùng ka Christ, khoe hnhung kan tabàih. **5** Da nhèn aih, canòm manoh lùi xam Yiang Hadròeh nhèn men jah tangèh gòm kan

taq atoq. **6** Majah qmang aih, enh dalam ka Chuaq Jesus Christ, yac kat akia, yac ka ùh, dìq baiq ùh i loh cleq, toq manoh lùi abroq enh dalam kan loq waq ma aih ma joq i loèq joq qnàng. **7** Oh daq rabiaq ka cadàu, cabô khoe khech tát ùh am oh daq iu tiaq trong joq qnàng? **8** Kan baxrùq aih ùh loh enh Mangai ma creo ka oh daq. **9** Toq xit blo broq rèu döng ka cađap dàc. **10** Enh dalam ka Chuaq, manoh au lùi qmang kô, oh daq ùh baiq manoh, mahaq mangai ma broq ka oh daq loh ka rawè, ùh dèh ka cabô, haq aih jah pòq dèh kan baxa aih. **11** Wùih oh daq, tàng joq au oe raq hnài trong ramènh kat akia, hagleq wì ma oe ti chaq rùp au? Tàng joq qmang aih, long pagat ma oe xài kan catoeh? **12** Au ngèh dìq döng bài mangai ma rai kan rawè taqne oh daq, wì haq pot đac rađeh aih yi ùh hnau hòm! **13** Dìq ka pì oh daq da au, khoe jah creo trùh ta kan pi tawac, mahaq apaq yōc kan pi tawac aih hu broq nen đòeq hu rìh tiaq xech akia, mahaq drah yōc manoh cliac loq waq đòeq broq hapōng dabau. **14** Majah qmang aih, dìq döng ka ranenh yùp hlài ta mòeq bàu kô “Ìh ep loq waq ka mangai haten hatia qmang ka cla. **15** Mahaq tàng oh daq hit qnhah dabau, ep ngan oq, yùq èh mangai kô loq cachìt ka mangai tau. **16** Aih au majah doe: Drah cadiang tiaq Yiang Hadròeh, apaq pagêh tiaq trong xech akia ma enh. **17** Majah qmang aih, xech akia i dèh manoh enh crài ka trong Yiang Hadròeh enh, Yiang Hadròeh enh trong crài ka trong xech akia enh, wa tablòq ka dabau qmang aih, dài oh daq majah ùh khòh broq tiaq trong đeh enh broq. **18** Mahaq tàng oh daq canòm ka Yiang Hadròeh ajèn qnung, aih ùh hìaq oe enh

qneq ka ranenh. **19** Yiniq broq da xech akia aih hnoq qmòe a mat: Taqnong tango, trong ùh sròeh, kan manhài, **20** kùh waiq radua qmù, wê canàih, tagit, tablêq, tarènh, tanòeh, talech, ùh hatroq ka dabau, lah đac dabau, **21** da khwàiq, bù bia, plai toq ka acaq xam bàc yiniq qnoeq hatiàh qmang aih. Au anoe adroe ka oh daq qmang ka au ma khoe doe: Mangai leq broq bòe yiniq qmang aih, haq aih ùh jah waq diac Boc Plình. **22** Mahaq plì da Yiang Hadròeh aih: Loq waq, lem bùi, catèm, loq kèm, laq alàng, khun khauq, ùh tabòq manoh, tabat, loq amàn. **23** Ùh i ranenh leq ma ùh lòh bài trong aih. **24** Bài mangai oe ti Chuaq Jesus Christ khoe tiang đình dèh xech akia xam kan tango anang talong pagat. **25** Tàng bèn rìh canòm ka Yiang Hadròeh, aih hadai ep cadiang tiaq Yiang Hadròeh. **26** Apaq cadàu chaq bang tiang ùh loh cleq ta qnhòng kô đòeq hu dakhwàiq rai tagit dabau.

6 Wì oh daq! Tàng loq i cabô troq broq yiniq lui cleq, oh daq aih mangai ma i Yiang Hadròeh, drah yōc manoh tabat đòeq hu bàt hlài wì haq, cla oh daq hadai ep wèq rađeh diq, yùq oh daq hadai loq cìh ta kan padô qnùt. **2** Drah wiang blòh kan trap ka dabau, qmang aih oh daq jah broq gêh ka ranenh da Christ. **3** Majah qmang aih, tàng loq i mangai ùh loh cleq, mahaq xoh rađeh kô canau gau gìn, aih mangai qnùt dèh cla. **4** Rìm ngai ep ngan hlài deh yiniq broq, aih hi hnoq kan catèh aih ajoq taiq cla, ùh xài taiq mangai qnoeq. **5** Majah qmang aih mangai ep gênh dèh hra. **6** Mangai leq jah wì hnài ka rađeh Bàu Chuaq, ep yōc rìm ta kùng hang đeh ma i đòeq hu lah axong ka mangai hnài aih. **7** Apaq qnùt rađeh, Boc Plình

ùh jah blìa racaih, majah qmang aih cabô rai adrech cleq ep gat dèh adrech aih. **8** Mangai rai ka xech akia, enh xech akia aih haq jah gat kan om hech. Mahaq mangai leq rai ka Yiang Hadròeh, enh Yiang Hadròeh haq gat kan rìh halinh mòeq đòe. (aiōnios g166) **9** Apaq tagah ka broq bìac lem, majah qmang aih tàng joq bèn ùh hìaq patrò, waq toq hi trùh jò bèn hi jah gat. **10** Qmang aih, jò bu taglàm, drah broq yiniq lem ka rìm ngai, adroe aih am ka oh daq bèn ma hadai pajùm ta manoh lùi. **11** Ngan tacô tì kōng cla au achìh am ka oh daq, pliang chù joq gròq qnàng. **12** Dìq dōng bàì wì ma enh broq đòeq lem manoh kon mangai tiaq trong da xech kia, wì haq panan oh daq kat akia, đòeq ùh hìaq taiq long pagat da Christ i mangai ti rùp wì haq. **13** Majah qmang aih, yac cla wì haq khoe kat akia dua wì haq ùh i wèq tiaq ranenh taleq, mahaq wì enh oh daq kat akia đòeq wì haq jah catèh rađeh ta chac oh daq. **14** Da au kô hòm, au ùh catèh rađeh enh gùng ka catèh toq long pagat da Chuaq Jesus Christ bèn, taiq long pagat aih, crōng taneh kô au hnoq bu dàng khoe tiang đinh, crōng taneh kô hnoq au hadai bu dàng aih! **15** Majah qmang aih trong ma yeo nhet aih ùh xài taiq kat akia loq ùh kat akia, wìh wìa kon mangai maneo aih trong ma yeo nhet. **16** Waiq kan catèm, kan loq waq trùh ti oh daq aih bàì mangai broq tiaq bàu kô, trùh hloe ti Isorali aih mangai da Boc Plình. **17** Pang kô ta èh, au ngèh apaq i cabô broq ka au ep hèm hòm, majah qmang aih ta chac au khoe pòq wê teo da Chuaq Jesus Christ. **18** Waiq kan tabàih dech da Chuaq JesusChrist bèn oe ti mahua yiang oh daq! Amen.

ÊPHÊSÔ

1 Phaulô, tiaq manoh Boc Plình thê, broq mangai tiaq clada Chuaq Jesus Christ, achìh ka mangai hadròeh da Boc Plình oe ta Êphêsth, ka mangai ma ùh tablòq manoh enh dalam ka Chuaq Jesus Christ. **2** Waiq kan tabàih dech xam kan catèm enh Boc Plình, Baq bèn xam enh Chuaq Jesus Christ jah am ka oh daq. **3** Manè apôi Boc Plình, Baq da Chuaq Jesus Christ bèn, enh dalam ka Christ, haq khoe ùc qnoh rìm xôq ramot yiang enh plình am ka bèn, **4** adroe ka broq plình cröng taneh, haq khoe ràih bèn enh dalam ka Christ, đòeq hu broq bèn wìa kan hadròeh pi i qmòe ajang leq hu cwò enh ngèa ka Boc Plình, **5** majah qmang aih kan loq waq haq khoe taqmroq adroe dôq bèn jah wìa kon ban da haq enh dalam Chuaq Jesus Christ, tiaq manoh lem cla haq, **6** đòeq hu manè apôi kan ranhòm da kan tabàih haq khoe am dech ka bèn enh dalam Kon cla haq ma loq waq dèh. **7** Enh dalam ka Christ, bèn jah dèch jah rot hlài xi mahim haq, jah caqnaih da bèn yiniq lui, tiaq kan tabàih dech ùh dìq ùh dài da Boc Plình. **8** Haq khoe ùc bình bui ka bèn rìm kan rabiaq xam kan qnì loq, **9** dôq bèn jah loq kan hlèp ta manoh haq, tiaq manoh cla haq khoe padon deh adroe ta kan loq waq haq **10** đòeq broq trong haq ma khoe padon deh adroe aih ta jò atìq lùch tagop dìq döng rìm yiniq hlài ta dalam ka Christ, hloe xam yiniq oe ta tröc xam ta taneh. **11** Aih, enh dalam ka Christ bèn hadai khoe jah ràih đòeq wìa mangai wiang jah kùng hang, ma khoe palauq qmòe adroe tiaq manoh Boc Plình aih Mangai broq gêh rìm yiniq tiaq manoh cla enh. **12** Đòeq bèn kô mangai ma adroe döng khoe canòm

ka Christ jah calêu manè apôi kan ranhòm da haq. **13**
Hadai enh dalam ka haq, oh daq khoe jah tàng trong joq
qnàng, aih raq Bàu lem hu dèch oh daq, jò oh daq khoe
lùi haq oh daq jah pateo xi Yiang Hadròeh ma khoe tèu
am, **14** Yiang aih broq ka cajap kùng hang da bèn, trùh
jò baxon hlài bài mangai haq khoe jah hu manè apôi
kan ranhòm haq. **15** Taiq qmang aih, jò au khoe tàng
manoh lùi da oh daq enh dalam ka Chuaq Jesus Christ
xam manoh oh daq loq waq ka mangai da Boc Plình, **16**
au ùh hêq ka manè apôi oh daq, jò waiq khàn au ràu trùh
yôt oh daq. **17** Au waiq Boc Plình da Chuaq Jesus Christ
bèn aih Baq qngah qngai, am ka oh daq Yiang da kan
rabiaq xam kan mahnu ka oh daq đòeq pì canau loq ka
haq. **18** Khoe aih sreo qngah mat ta manoh cliac oh daq,
đòeq hu loq trong bèn ma tangèh canòm aih qmang leq,
kan padrõng haq am ka bài mangai hadròeh aih dàng leq,
19 èh loq ka cwiang itai pi cajaq da haq am ka bèn mangai
ma lùi aih kàn dàng leq, tiaq cwiang itai aih. **20** Haq khoe
paqnoh ta Christ, jò broq ka Christ rìh hlài enh mangai
cachìt rai am haqngui pah qma rađeh oe tanòe Plình,
21 Yeo haqnhèq dìq dõng ka bài cla craq, bài i cwiang,
bài padren, bài bùa xam bài i bang i tiang, ùh xài toq
ta qnhòng kô, mahaq hloe xam qnhòng atìq hòm. (aiōn
g165) **22** Haq khoe roh rìm yiniq oe dìq enh qneq ka jènh
da Christ, rai am ka Christ broq gäu Tagop Hadròeh, **23**
Tagop Hadròeh aih chac da Christ, aih la kan bình halùih
da Mangai ma broq bình rìm yiniq oe ta rìm trong.

2 Adroe nèh oh daq khoe cachìt ta yiniq lui xam kan
ngang dù da cla, **2** aih dìq bài yiniq oh daq khoe top dua

crōng taneh kô, iu tiaq bùa ma wèq cwìang ta caqnàm plình, aih raq kiac qnang tabroq enh dalam manoh bài mangai ma ùh iu. (aiōn g165) **3** Ta aih hadai i bèn, nèh haq rìh tiaq dèh trong xech akia ma ònh, cadàu tiaq rìm yiniq xech akia xam manoh cla ma enh, qmang aih hi wìa kon da kan mahau qmang ka wì qnoeq. **4** Mahaq Boc Plình haq aih padrōng manoh loq waq, haq khoe yōc deh manoh loq waq kàn đòeq ha-och ka bèn, **5** dài haq jò bèn qnang cachìt dèh ta yiniq lui, haq broq ka bèn jah rìh pajùm ti Christ – aih dìq canòm ka kan tabàih dech oh daq ma khoe jah dèch. **6** Haq broq ka bèn jah rìh hlài jah haqngui pajùm ta Plình enh dalam ka Chuaq Jesus Christ. **7** Dôq ta bài qnhòng atìq èh, haq jah paqnoh đòeq ka wì hnoq kan tabàih dech ùh dìq ùh dài da haq, enh manoh loq waq haq khoe ha-och ka bèn enh dalam ka Chuaq Jesus Christ. (aiōn g165) **8** Qmang aih canòm kan tabàih dech, canòm manoh lùi oh daq ma khoe jah dèch, yiniq aih ùh xài loh enh oh daq, mahaq loh enh kan am dech da Boc Plình. **9** Aih ùh xài loh enh bài yiniq broq cla bèn, đòeq ùh hìaq i cabô padèch rađeh; **10** majah qmang aih, bèn kô bìac broq loh enh tì haq, khoe jah paqnàng enh dalam Chuaq Jesus Chirst đòeq broq trong lem Boc Plình ma khoe palauq adroe dôq bèn hu broq tiaq. **11** Qmang aih, hmàng hlài enh adroe, tiaq xech akia pì oh daq aih mangai diac qnoeq, wì ma kat akia enh tì kōng kon mangai creo đac ka pì la bài mangai ùh kat akia. **12** Jò aih nèh oh daq ùh i ka Christ, ùh jah pajùm cwìang ti mangai Isorali, ùh pajùm bàu tajao ma khoe chônh tèu am, oe ta crōng taneh kô ùh i kan canòm, ùh i ka Boc

Plinh. **13** Mahaq enh dalam ka Chuaq Jesus Christ, oh daq aih mangai nèh haq hangai, yàng manòeq kô canòm ka mahim da Christ khoe jah haten. **14** Majah qmang aih, haq raq kan hatroq da bèn, khoe broq ka baiq apah jah wìa pajùm mòeq, raliang qnìh đac panàt ma hagan, **15** aih la kan tagit ka dabau majah qmang aih, haq khoe yōc deh chac cla hu raliang cađac bài bàu hnài ma khoe achìh wìa ranenh. Qmang aih jò broq ka wa hatroq ti dabau, haq enh yōc dìq baiq đòeq broq loh mòeq ngai maneo enh dalam ka haq, **16** hadai taiq long pagat haq khoe bahnhung đac kan tagit kan ùh hatroq, canòm long pagat aih haq broq ka wa wìh wìa mòeq chac đòeq hu hatroq ti Boc Plinh. **17** Haq khoe trùh anoe hnài kan catèm ka pì oh daq aih mangai ma oe đeh hangai, xam kan catèm ka mangai oe haten, **18** canòm ka haq dìq baiq ka bèn jah thia haten ka Baq, hadai pajùm enh dalam mòeq Yiang Hadròeh raq. **19** Qmang aih, oh daq pi oe xài mangai enh gùng hòm, hadai pi xài tamoe ùh canau hòm, mahaq pajùm mòeq diac ti mangai da Boc Plinh, mangai hnim da Boc Plinh. **20** Oh daq khoe jah đèch paqnàng enh qnhèq ka xàn hnim aih la bài mangai tiaq cla xam bài pajàu, cla Chuaq Jesus Christ aih raq hmo mùm hnim. **21** Dìq ka hnim jah đèch paqnàng enh qnhèq ka hmo aih, ta carùp ka dabau, đòeq broq loh mòeq toq hnim kùh waiq hadròeh enh dalam ka Christ. **22** Qmang aih, hadai canòm ka haq oh daq men jah taqmùt đeh diq ta hnim aih, đoèq hu wìa hnim da Boc Plinh enh dalam ka Yiang Haròeh.

3 Ajang aih raq, au kô Phaulô, taiq oh daq aih mangai diac wì dài au majah ep broq mangai oe tù ka Chuaq Jesus

Christ... **2** Oh daq hìa loq Boc Plình thê au, aih kan tabàih dech haq jao ka au đòeq anoe ka oh daq, **3** aih la kan hlèp khoe jah mahnu am au loq, tìah ka au khoe achìh biaq nà ka pì oh daq. **4** Đốc jàiq aih, aih èh, pì men canau au khoe jah loq kan hlèp da Christ, **5** aih la kan hlèp enh qnhòng nèh qnhòq hmaq am ka cabô loq, yàng manðeq kô jah Yiang Hadròeh khoe paqnoh am ka bìài mangai tiaq cla hadròeh xam bòe pajàu da haq. **6** Kan hlèp aih rameh: Canòm ka Bàu Lem, mangai diac wì hadai wiang jah kùng hang ti mangai Isorali, aih hadai hamenh ta mòeq chac, hanoh wiang jah waq bàu ma khoe tèu adroe ti bèn enh dalam ka Chuaq Jesus Christ. **7** Au khoe wìa mangai patìh da Bàu Lem kô, tiaq kan tabàih dech da Boc Plình, canòm ka ajang bìac broq da cwiang itai haq. **8** Joq, kan tabàih aih khoe am ka au aih mangai ma yeo qyoh döng đeh ka mangai hadròeh qnoeq, đòeq au anoe ka mangai diac qnoeq loq kan padröng raya rayùc da Christ, **9** hu sreo am ka rìm ngai jah hnoq kan dìq jaq hlèp enh qnhòng baxèm calah nèh ma khoe cadoc hlèp enh dalam Boc Plình aih Mangai broq loh rìm yiniq ta plình cröng taneh. **(aiōn g165)** **10** Qmang aih, manðeq kô, kan rabiaq loq rìm trong da Boc Plình ajang Tagop Hadròeh jah paqnoh am bìài mangai broq gàu, xam bìài wèq cwiang ta tröc. **11** Tiaq manoh cla haq khoe qnac dèh enh baxèm nèh, manðeq khoe jah broq gêh enh dalam ka Chuaq Jesus Christ, aih Chuaq da bèn, **(aiōn g165)** **12** enh dalam ka haq, bèn canòm ka manoh lùi trùh haq đòeq pi hìaq i kan tawac, đòeq jah kan cajap manoh hu thia haten ka Boc Plình. **13** Au hadai cali calo ka oh daq apaq hnoq au

qnang glàm nanxa ma loh ka cro manoh, xài aih raq kan ranhòm ka oh daq. **14** Taiq aih ìq raq dài au majah hacùn cràng enh ngèa Baq, **15** canòm ka haq rìm toq hnim oe ta plìn xam ta haqneq ma khoe jah yiniq am, **16** au waiq khàn mac tiaq kan padrõng ranhòm da haq broq ka oh daq jah cwìang itai enh Yiang Hadròeh đòeq jah tadêh ta manoh cliac; **17** qmang aih Christ jah oe ta manoh oh daq ajang manoh lùi. Èh au waiq khàn dôq oh daq jah plôh riah cajap manoh ta kan loq waq; **18** jah pajùm ti bài mangai hadròeh đòeq hu loq ka dang gat, dang yôh, dang haqnhèq, dang jrùq da kan loq waq aih, **19** rai jah hnoq kan loq waq da Christ, aih yeo loe dìq dõng ka kan loq maqnoeq, dôq oh daq jah bình halùih kan ùh dìq ùh dài da Boc Plìn. **20** Manòeq kô, Boc Plìn tiaq dèh cwìang itai haq, tabroq ta manoh bèn yeo loe ka yiniq bèn ma bòch, ma hèm. **21** Đòeq Haq jah kan ranhòm tanòe Tagop Hadròeh, xam enh dalam ka Chuaq Jesus Christ, hloe ta rìm qnhòng, mòeq đòe, ùh dìq ùh lùch! Amen. (**aiôn g165**)

4 Dài ajang aih, au kô mangai oe tù da Christ, pariaq pì oh daq ep rìh acaq qmang leq dôq haq tajì ka bàu creo pì ma khoe jah. **2** Rìh ep dìq jaq loq hamon radeh, dìq jaq laq alàng, loq kèm, yôc kan loq waq đòeq hu yong dabau, **3** yôc hadrang caxi catèm đòeq hu àu wèq kan pajùm mòeq da Yiang Hadròeh. **4** I mòeq toq chac, mòeq Yiang Hadròeh raq, qmang ka oh daq khoe jah creo trùh mòeq kan tangèh raq, **5** i mòeq Chuaq, mòeq manoh lùi raq, mòeq ramènh baptém. **6** Mòeq Boc Plìn aih Baq da rìm ngai, haq aih enh qnhèq dìq dõng rìm ngai, taqne rìm ngai, oe enh dalam rìm ngai. **7** Mahaq kan tabàih khoe

am ka bèn tiaq maneh da Christ am. **8** Aih ìq majah i bàu doe: “Haq khoe tōc tanèo haqnhèq, qnung haraya mangai wì ma rùp clêh, Haq tabàih am ka mangai da haq”. **9** Manðeq kô: “Haq khoe tōc” bàu aih doe cleq, aih ma ùh xài doe haq hadai khoe loh nòe haqneq ta crōng taneh qmòh? **10** Haq ma khoe loh aih raq haq ma khoe tōc tanèo ma haqnhèq dìq jaq ta trōc, đòeq hu broq bình rìm yiniq. **11** Cla Haq aih raq ma khoe am ka mangai kô broq mangai tiaq cla, mangai tau broq pajàu, mangai qnoeq broq mangai anoe Bàu lem, mangai qnoeq hòm broq mangai wèq tagop xam mangai hnài, **12** đòeq bài mangai hadròeh jah geo gua ta yiniq abroq patìh, dôq chac da Christ jah èh rai kàn, **13** gòm trùh jò bèn hi jah pajùm mòeq ta manoh lùi xam ta kan canau loq Kon Boc Plinh, jah wìa mangai gêh mangai, jah chac hamac geo gua qmang da Christ. **14** Haq enh ka bèn pi hìaq tìah kon qyoh hòm, cađac wì qnùt rađeh, dôq wì padô đac rađeh loh ka tablòq manoh đòeq cadàu tiaq trong ùh troq, **15** mahaq enh ka bèn yōc manoh loq waq hu anoe qnoh bàu joq qnàng, dôq yac ka trong leq dua bèn jah yòng kàn tam enh dalam ka Christ aih Mangai ma broq gàu Tagop. **16** Canòm ka haq aih dìq dōng ta chac bèn jah ta carùp cajap ti dabau xam ɓòe atap ɓòe caxi qngwen, broq ka tang yiniq tiaq deh hra padren jah taqmùt ti dabau hu broq ka chac jah rai èh rai kàn hu ta paqnhrang ta kan loq waq. **17** Kô bàu au doe, bàu au canòm ka yiniq Chuaq hu anoe ka oh daq, pì pi dùh rìh acaq tìah ka wì enh gùng hòm, wì haq tiaq trong ùh loh cleq enh manoh cla, **18** majah qmang aih kan blùng oe enh dalam wì haq, taiq

manoh wì gang got dài haq gàu wì majah khoe loh ka
clam cluiq, hangai ka kan rìh da Boc Plình. **19** Wì haq
khoe pi qnì kan camaih aih qmang leq, cađac rađeh rìh ta
kan manħài, manoh ònh pi hēq ta kan amùa. **20** Mahaq
oh daq hōc đđoeq huloq trùh Christ aih ùh xài qmang
aih, **21** majah qmang aih oh daq khoe jah tàng Trong
da Haq, khoe jah hnài enh dalam ka Haq, wop qmang
ka bàu joq qnàng enh dalam ka Chuaq Jesus Christ aih
Chuaq da bèn, **22** aih oh daq ep cađac trong rìh acaq enh
calah qnèh, cađac kon mangai dùnh aih kon mangai khoe
pi wìa taiq manoh cla loq ònh, **23** ep broq neo hlài ta
gàu ngoc cla, **24** caxùnh yōc kon mangai neo, aih raq
mangai khoe jah broq dōq hatiāh ka Boc Plình ta kan
taq atoq xam kan sròeh da bàu joq qnàng. **25** Qmang
aih, rìm ngai oh daq ep cađac kan loq capoch amòng, ep
capoch jang ka mangai haten hatiā, majah qmang aih
bèn kô dìq hamenh ta mòeq chac raq. **26** Tàng joq oh daq
qnang nòeh, aih apaq broq yiniq lui, apaq panòeh trùh
mahì clìh, **27** apaq am ka Satan jah dahôn. **28** Mangai loq
atùng pi dùh atùng hòm, mahaq ran abroq, yōc tì kōng
cla patiħ trong ma lem, đđoeq i dahwèq hu wiang tabàih
am ka mangai pa, aih ma yeo troq. **29** Apaq i mòeq nà
bàu qmèq hloh enh hacùng oh daq, mahaq jò ma troq ka
capoch, aih capoch biaq nà bàu rangot đđoeq hu wiang i
lòeq ka mangai tamàng. **30** Oh daq apaq broq mangò ka
Yiang Hadròeh da Boc Plình, majah qmang aih canòm ka
haq oh daq men jah panhìn trùh ta hì baxon dèch. **31** Ep
cađac kan tapagau, tamahau, kan tanòeh, talech, dahnap
hloe xam trong dù ma qnoeq. **32** Acaq oe ti dabau ma

laq alàng haq, bình kan loq ha-och, caqnaih yiniq kui ka dabau qmang ka Boc Plình khoe caqanaih yiniq lui ka oh daq enh dalam ka Christ.

5 Qmang aih oh daq drah wìa mangai loq top dua Boc Plình qmang ka kon loq waq da haq; **2** drah cadiang lam ta kan loq waq, qmang ka Christ khoe loq waq ka bèn, taiq bèn haq majah chìuq yōc chac rađeh đòeq hu broq ramènh tadreo i kan xua thùm rahùt dèch ka Boc Plình. **3** Kan taqnung tango, ùh hadròeh, kan daiq plai, hadai apaq ràu trùh cadèh taqne oh daq, dôq haq jah tajì ka bài mangai hadròeh. **4** Apaq capoch brùaq, capoch blùng, capoch blìa hrinh hrai, aih dìq trong ùh troq, mahaq manè apôi Chuaq ma aih yi hnau. **5** Majah qmang aih, pì ep loq rameh: Mangai tanung tango, ùh hadròeh, mangai daiq plai, aih raq mangai kùh waiq radua qmù kiac, wì aih ùh i cabô jah waq diac da Christ xam da Boc Plình. **6** Apaq đòeq mangai jiàng bàu padô qnùt oh daq, taiq bài yiniq kô raq dài haq kan panòeh da Boc Plình majah hrôq ta nang noe ùh qnì iu. **7** Qmang aih, ùh dùh taqmùt dèh ti wì haq yac ka trong leq. **8** Nèh haq, oh daq oe raq ta kan clam cluiq, mahaq manòeq kô khoe wìa mangai qngah qngai enh dalam ka Chuaq. Drah cadiang lam tìah kon da kan qngah; **9** majah qmang aih, plì da kan qngah aih oe ajang noè: broq trong lem, taq atoq xam kan joq qnàng. **10** Ti boq chaq trong leq ma lem ka manoh Chuaq. **11** Apaq taqmùt dèh yiniq broq ùh loh cleq da kan clam, mahaq xan ma anoe patô qnöh bài yiniq aih ma aih yi lem; **12** majah qmang aih toq ràu trùh bìac wì ma broq ta clam, aih ji khoe camaih pi cajaq. **13** Mahaq rìm yiniq

khoe jah anoe paqnoh ta qngah, aih dìq khoe jah wìa kan qngah. **14** Dài haq majah khoe i bàu achìh: “Mangai ma qnang kùi, drah rìu beq drah padinh yòng enh taqne bài mangai cachìt aih èh Christ hi sreo qngah ka ìh.” **15** Qmang aih, khòh wèq ma rabiaq haq trong rìh acaq da oh daq, apaq broq đeh tìah ka mangai blùng, mahaq tìah qmang mangai rabiaq. **16** Drah haqnan rìm jò ma taqnàih, majah qmang aih bài hì aih dìq qmèq. **17** Qmang aih apaq wìa mangai blùng, mahaq ep loq manoh Chuaq ma enh. **18** Apaq bù ka alac, majah qmang aih alac broq ka pi wìa rìm trong, mahaq ep bình Yiang Hadròeh. **19** Hatèu ti dabau xi bàu calêu plình, calêu hadròeh, xam bàu calêu enh Yiang Hadròeh, rai dìq ka manoh hu calêu manè apôi Chuaq. **20** Rìm trong dìq ep canòm ka yiniq Chuaq Jesus Christ aih Chuaq da bèn, đòeq manè apôi Boc Plình, aih Baq bèn. **21** Drah iu crè ka Christ đòeq hu ta-iu dabau. **22** Mangai broq cadri, ep iu tiaq deh ống qmang ka iu Chuaq, **23** majah qmang aih, ống aih gàu mai haq, i crài cleq ka Chuaq aih gàu da Tagop Hadròeh, Tagop Haròeh aih chac da haq, èh haq aih Mangai ma dèch tagop hadòeh. **24** Qmang aih, tagop hadròeh iu enh qneq ka Christ qmang leq, rìm trong gucadri hadai ep iu tiaq deh ống qmang aih. **25** Mangai broq ống, drah loq ha-och deh ka cadri, tìah ka Christ khoe ha-och ka tagop hadròeh, cađac qmòe cla rađeh am ka tagop aih, **26** đòeq broq ka tagop jah hadròeh, jò khoe yōc diac qnheo, haq yōc bàu broq ka tagop jah hliang hreо, **27** đòeq hu paqnoh kan qngah qngai da tagop hadròeh, ùh i ka xìt, ùh i ka habau, ùh i cleq ma hatiàh qmang aih, mahaq hliang hadròeh pi i

qmòe nòe hu cwò enh ngèa cla haq. **28** Hanoh qmang aih, ɔng ep loq waq deh ka mai qmang ka chac cla. Cabô loq waq dèh ka mai aih budàng loq waq deh ka cla diq. **29** Majah qmang aih, ùh lah i cabô git dèh chac cla, mahaq qmi palàng haq tìah ka Chirst broq ka tagop hadròeh diq, **30** majah qmang aih bèn kô dìq hamenh oe ta chac haq. **31** Taiq ajang aih, gucalô majah ep talah deh ka miq baq đòeq hu hatop deh ti mai, wa baiq ngai loh mòeq xech. **32** Kan hlèp aih kàn haraya, mahaq aih au anoe trùh Christ xam tagop hadròeh. **33** Qmang aih rìm ngai oh daq ep ha-och dèh ka mai, mangai broq mai ep loq iu dèh ɔng.

6 Mangai broq kon! Ep iu tiaq bàu miq baq enh dalam ka Chuaq, aih trong matroq. **2** Ep i manoh loq ta-iu tamèt dèh miq baq (aih ranenh ma adroe, i bàu tèu baha hatiaq ka aih), **3** đòeq ka ìh jah xôq ramot, jah rìh halinh ta crõng taneh. **4** Mangai broq baq! Apaq da khwàiq waq ka kon loh nòeh, mahaq ep yōc kan loq hnài, loq bàt enh Chuaq đòeq hu wèq ban wì haq. **5** Mangai broq hapõng, ep loq crè, ep yōc manoh hnhol jang đòeq iu mangai ma broq cla craq rađeh oe ta crõng taneh qmang ka iu tiaq Chuaq diq, **6** ùh xài iu toq enh ngèa haq, tìah ka wì chaq toq trong aluàn yōc manoh mangai qnoeq, mahaq ep tìah ka hapõng da Christ, yōc manoh lem hu broq tiaq manoh Boc Plinh enh. **7** Yōc deh manoh loq camet đòeq hu patìh dèh ka wì craq, tìah ka patìh ka Chuaq, ùh xài qmang ka patìh ka mangai, **8** majah qmang aih yac ka mangai broq hapõng, mangai broq cla craq, mangai jah deh hra enh Chuaq tiaq tang yiniq đeh ma khoe broq. **9** Oh daq ma broq cla craq, pì hadai ep ngan deh hapõng qmang

aih diq, apaq ti hacam ka wì haq, majah qmang aih loq
rađeh kô xam wì haq hanoh pajùm mòeq ngai Cla craq oe
ta plinh. Haq aih ùh loq waq tang ngai. **10** Pulùch aih,
oh daq ep broq ka rađeh jah hagau enh dalam ka Chuaq
canòm ka padren xam cwìang itai da haq. **11** Drah padon
wê bài ranac da Boc Plinh, đòeq yòng ka cajap hu tablêq
ka bài kan kiac. **12** Majah qmang aih, ùh xài bèn tablêq ka
xech akia xam mahim, mahaq tablêq ka bài wèq cwìang,
ka bài padren ùh xau hnoq xam cla craq da crõng taneh
clam cluiq kô hloe bài kiac ngang dù ta caqnàm plinh.
(aiōn g165) **13** Qmang aih, drah yōc bài ranac da Boc Plinh
đòeq ta hì clam cluiq, oh daq hlàt tablêq, trùh jò khoe
blêq rìm yiniq, oh daq jah yòng cajap. **14** Drah yòng ma
hagau, yōc Bàu Joq qnàng broq caxi caqnam, caxùnh kan
taq atoq broq eo cadàm, **15** yōc kan catèm da Bàu lem ma
palauq qmòe đòeq hu broq jai. **16** Ep yōc tam manoh lùi
đòeq broq khian, đòeq oh daq jah plah đac bài rang ùnh
da kiac dù. **17** Yōc kan dèch claih broq cadoh, rai cadop
wê chang da Yiang Hadròeh aih bàu Boc Plinh. **18** Yac ka
jò leq dua canòm ka Yiang Hadròeh hu waiq khàn hu
creo dang ka rìm trong, rìm yiniq. Yōc kan ùh tagah lep
đòeq hu hamang trùh trong aih, rai hmàng waiq khàn am
dìq dõng ka bài mangai hadròeh. **19** Hadai hmàng trùh au
hu waiq khàn ka au diq, đòeq jò au anoe, Chuaq am ka au
bàu capoch dôq au ùh hìaq yùq crè jò au anoe qnoh kan
hlèp da Bàu lem, **20** taiq aih raq au ma jah wìa mangai
wê bàu taqne caxi datoeq, đòeq au jah capoch ka hagau
haginh qmang ka au ep capoch. **21** Kô aih, enh dôq ka pì
oh daq jah loq manòeq kô au qmang leq, qnang broq

cleq, i Tichico, oh daq ma haten hatia, mangai hapoing
dìq manoh ka Chuaq, haq aih èh hi taqmon hlài ka pì rìm
yiniq. **22** Au khoe thê haq lam, waq ka oh daq loq nhèn
manðeq kô qmang leq cadèh, đòeq hu alòng oh daq. **23**
Waiq ka oh daq jah kan catèm, kan loq waq, jah manoh
lùi enh Boc Plinh aih Baq, enh Jesus Christ aih Chuaq
bèn. **24** Kan tabàih dech oe dìq ti oh daq aih bài mangai
ma khoe yoc manoh ùh taclah đòeq loq waq ka Chuaq
Jesus Christ aih Chuaq bèn!

PHILIP

1 Phaulô xam Timôthê, hapöng da Chuaq Jesus Christ, achìh ka dìq döng mangai hadròeh da Chuaq Jesus Christ oe ta Philip, hloe xam ka mangai wèq tagop xam bài mangai patih: **2** waiq oh daq jah kan catèm jah kan tabàih dech enh Boc Plinh aih Baq bèn hloe xam enh dalam ka Chuaq Jesus Christ! **3** Jò hmàng trùh oh daq, au hi manè apôi Boc Plinh au, **4** èh rìm yàng leq waiq khàn ka oh daq, au toq waiq khàn xi manoh lem bùi, **5** majah qmang ai enh baxèm trùh manòeq, oh daq khoe jah pajùm ta kan yòng kèn da Bäu lem enh aih trùh manòeq; **6** au loq qmòe rameh: Mangai ma khoe broq yiniq lem enh dalam oh daq, aih èh haq broq waq ka gêh trùh ta hì da Chuaq Jesus Christ. **7** Au hèm trùh dìq döng oh daq, qmang aih troq, majah qmang aih oh daq oe ta manoh cliac au, yac ka oe taqne caxi datoeq wì ma kàt au, yac ka jò au capoch cwaih rađeh rai anoe Bäu lem, aih oh daq hadai i pajùm ta kan tabàih dech Boc Plinh ma am ka au. **8** Boc Plinh wiang panhìn au yōc manoh loq waq da Chuaq Jesus Christ đòeq hu loq waq ka oh daq. **9** Qnah hòm, bìac au creo dang jò waiq khàn, aih broq qmang leq manoh loq waq da oh daq rai èh rai bac oe enh dalam kan rabiaq xam kan hèm loq, **10** đòeq hu loq hadro ngan trong leq ma yeo lem, đòeq oh daq jah hliang hreò pi i qmòe ka nòe leq hu cwò ta hì da Christ, **11** jah bình bauq plì taq atoq loh enh Chuaq Jesus Christ, đòeq hu broq qngah rai manè apôi Boc Plinh. **12** Manòeq kô, au enh pì oh daq loq, bìac au qnang glàm manòeq kô khoe wiang broq ka Bäu lem jah chàc yi hangai. **13** Jaq dìq

dǒng bāi lình ma wèq ta hnim hadrah xam wì qnoeq dìq
jah loq au tiaq Christ dài wì ma jah yōc caxi datoeq kàt
au qmang kô. **14** Bàc ngai ta oh daq hnoq jò au qnang oe
qne caxi datoeq qmang kô, kiang wì haq i tam manoh lùi
yeo bàc hòm enh dalam ka Christ, hùa lam anoe trong
da Boc Plình ùh lòm yùq qmòe cleq. **15** Joq, i qnah ngai
taiq manoh tajênh tagrìn dài wì haq majah lam anoe
hnài mangai qnoeq loq ka Christ, mahaq hadai i mangai
yōc manoh lem đòeq hu lam anoe. **16** Bài mangai ma
atiq kô broq xam manoh loq waq, wì loq Boc Plình khoe
dì au đòeq hu wiang paqnhrang Bàu lem. **17** Da bài wì
ma adroe tau, taiq kan plai, kan amùc toq ka rađeh, ùh
dìq ka manoh, xoh dèh canau tam ka au kan xalep. **18**
Mahaq ùh troq cleq! Yac ka qmang leq, yac ka patìah,
yac ka joq qnàng, yiniq da Christ dua khoe jah lam anoe,
aih ìq dài manòeq kô au qnang lem bùi, khoe aih oe raq
lem bùi hòm. **19** Majah qmang aih au loq, canòm ka oh
daq waiq khàn xam canòm ka Yiang Hadròeh da Chuaq
Jesus Christ wiang ti au, bìac aih èh broq ka au rênjhah
caqnaih. **20** Au cajap manoh lùi qmang aih, yac ka trong
leq dua au ùh i camaih cleq, mahaq jò leq tìah ka jò leq,
rìm trong au ùh i crè cleq ka anoe, qmang aih, yac ka au
rìh yac ka au cachìt, dua Christ jah qngah ta chac au. **21**
Majah qmang aih, Christ aih kan rìh da au, cachìt aih
kiang yeo troq ka au. **22** Patìah haq, au oe rìh yôt ta chac
kô, aih i lòeq tam ka yiniq au broq, dài au ùh qnì ràih
trong leq. **23** Au rahnhua taqne, enh lam oe ti Christ, aih
ma yeo troq, **24** mahaq au oe raq ta chac kô aih nhet ka
pì. **25** Au lùi qmang aih, au loq rađeh kô èh oe raq ti pì oh

daq, đòèq wiang broq ka oh daq jah lem bùi, jah kàn tam manoh lùi; **26** dôq jò leq au trùh hòm ti pì oh daq, pì oh daq jah yōc au hu broq nen đòeq jah catèh rađeh yōt enh dalam ka Chuaq Jesus Christ. **27** Toq rameh raq, oh daq ep acaq oe ma tajì ka Bàu lem da Christ, đòeq yac ka jò au trùh hmàih ka oh daq, yac ka jò au arù, dua au jah loq oh daq moèq manoh yòng cajap ti dabau, moèq manoh đòeq hadai wiang paqnhrang manoh lùi da Bàu lem, yac ka trong leq dua apaq đòeq ka mangai ma tablêq ka oh daq taqnhùq rađeh: **28** Aih raq nòe hu patô wì aih èh hnhung lùch, mahaq oh daq jah dèch, bài yiniq aih trùh enh Boc Plình, **29** enh dalam ka Christ, Boc Plình am ka oh daq xôq ramot, ùh xài đòeq toq hu lùi haq hi dìq mahaq đòeq oh daq wiang chùuq xalep ti haq, **30** aih èh pì oh daq hadai ep wiang chùuq kan tabroq tablêq qmang ka pì ma qnang hnoq, qnang hìa ajang au manoèq.

2 Qmang aih, enh dalam ka Christ tàng loq i cleq hu alòng dabau, tàng enh manoh loq waq loq i cleq đòeq wiang dèch dabau, loq i cleq axong ka dabau enh dalam Yiang Hadròeh, tàng loq i manoh loq ha-och xam kan tamèt, **2** pì oh daq khòh mòeq bàu ti dabau, hadai qmòeq kan loq waq, hadai pajùm mòeq ta Yiang Hadròeh, qmang aih broq ka au jah lem bùi hi gêh. **3** Apaq broq cleq enh manoh tajênh, toq bang tiang ùh loh cleq, mahaq loq hamon rađeh, ngan mangai qnoeq yeo haqnhèq ka rađeh. **4** Rìm ngai ta oh daq apaq enh jah toq ka rađeh mahaq ep ngan lòeq ka wì qnoeq diq. **5** Drah hadai i mòeq manoh tiàh ka Christ ma khoe i, **6** Haq daq adàng ka Boc Plình enh baxèm raq, mahaq ùh ngan kan daq adàng ka Boc

Plình aih bìac ep rùp ka cajap, **7** cla haq raq khoe cađac
rađeh, yōc chac da mangai hapōng, đđoeq wìa kon mangai.
8 Haq khoe rìh tìah ka mangai, haq paqnoh rađeh ka
haqneq, iu bàu trùh ma cachìt, mech cachìt qmòe talong
pagat. **9** Dài aih raq, Boc Plình majah khoe dèch haq ka
haqnhèq, am ka haq yiniq yeo haqnhèq dōng ka yiniq ma
qnoeq, **10** waq toq hi tàng yiniq Chuaq Jesus, rìm toq
cràng ta trōc, ta taneh, enh qneq ka taneh, dìq dōng ep
hacùn, **11** rìm toq rapet dìq creo ka Chuaq Jesus Christ
aih Chuaq, rai dèch kan ranhòm ka Boc Plình aih Baq **12**
Qmang aih, yōiq oh daq da au ma loq waq deh, tìah ka
pì khoe iu yôt bàu au, ùh xài toq jò au i mat ta qmat,
mahaq manđeq kô jò au arù, thê ùh hnau ka aih hòm, yōc
manoh yùq crè tarìt đđoeq hu broq kan dèch claih ka cla.
13 Majah qmang aih Boc Plình tamèt ta manoh cliac oh
daq rai enh rai broq tiaq manoh lem haq. **14** Yac ka broq
cleq apaq rangòt rai mumùc, **15** đđoeq oh daq rìh taqne
nang noe ngang dù kô, jah wìa kon da Boc Plình, ùh i ka
xìt, ùh i habau, ùh i nòe leq đđoeq hu cwò, taqne nang noe
aih, oh daq wèq Trong kan rìh, sreo qngah tìah ka hadreo
ta crōng taneh; **16** đđoeq trùh hì da Christ, au jah catèh
khoe ùh hìaq qngwan ka rađeh ma cadàu, ùh qngwan ka
đeh ma xalep. **17** Yac ka mahim au, ep pùc enh qnhèq ka
ramènhd tadreo xam bài dahwèq enh manoh lùi da oh
daq, dua manoh au lem bùi, rai lem bùi pajùm ti oh daq.
18 Oh daq hanoh lem bùi trong aih, rai lem bùiti au. **19** Au
ngèh enh dalam ka Chuaq Jesus, drah thê Timôthê rêngh
lam ta oh daq, đđoeq au jah loq pì oh daq qmang leq, dôq
manoh au jah catèm. **20** Joq qnàng, au ùh i ka cabô ma

tiah ka haq aih mòeq manoh ti au đòeq dìq ka manoh
wiang patìh ka pì oh daq; **21** mangai leq mangai meh,
chaq waq ka jah toq ka rađeh, ùh chaq ka Chuaq Jesus
Christ. **22** Mahaq oh daq loq haq aih mangai ùh tablòq
manoh, haq khoe pajùm manoh wiang patìh ka Bàu lem
ti au, tiah qmòe kon oe deh ti baq. **23** Aih ìq, au majah
enh rênth thê haq lam ta oh daq, jò au bu loq ka rađeh
kô èh qmang leq; **24** enh dalam ka Chuaq cla au lùi dèh
qmang kô hòm: cla au hadai jah rênth trùh. **25** Mahaq
manòeq kô, au hèm au ep thê Êpha-Phôđit hlài ta oh daq,
haq aih hadai oh daq au, mangai abroq pajùm ti au, mòeq
bua ka au haq aih mangai wê bàu, mangai oh daq khoe
thê haq trùh hu patìh am yiniq cleq au qnang nan. **26**
Majah qmang aih, haq toq tangèh jah glàm dìq döng ka
pì oh daq, haq toq mangò, majah qmang aih haq tàng
doe pì oh daq khoe loq ka haq ùh hròc. **27** Joq qnàng haq
ùh hròc ten cachìt, mahaq Boc Plinh khoe ha-och ka haq,
èh ùh xài toq ka haq mahaq hloe xam ka au, đòeq au ùh
hìaq khoe mangò loh tam ka mangò hòm. **28** Qmang aih
au khoe thê haq drah lam, dôq oh daq hnoq haq oh daq
hujah manè, au hadai jah yeo ka mangò. **29** Qmang aih oh
daq khòh yōc dìq ka manoh lem bùi, hu đìh mangai ta
Chuaq, thê pì i manoh loq ta-iu ka bài mangai qmang aih;
30 majah qmang aih, taiq patìh ka Christ dài haq majah
hwaq cachìt, haq pi dèh dèm qmòe dèh kan rìh, đòeq hu
akop hlài bài yiniq oh daq ma khoe ùh jah wiang ka au.

3 Yeo loe ka aih hòm, oh daq drah lem bùi enh dalam ka
Chuaq, au ùh i cleq ma ep hòq jò achìh tam bài yiniq
kô ka pì oh daq, majah qmang aih đòeq wèq dôq pì jah

catèm. **2** Ep ngan loq i bài koq, ep ngan loq i bài mangai patìh ngang dù, ep ngan ramènh kat akia patìah. **3** Majah qmang aih, bèn kô mangai broq ramènh kat akia joq qnàng, aih taiq bèn canòm ka Yiang Haròeh da Boc Plình đòeq hu patìh ka Boc Plình, catèh dađeh toq enh dalam ka Chuaq Jesus Christ, qnhòq lah hmaq canòm ka xech akia jò leq. **4** Qmang aih, ùh xài au ùh i ka nòe hu catèh rađeh ta xech akia kô. Tàng joq mangai qnoeq xoh radeh kô i nen hu catèh tiaq xech akia kô, au kiang ma yiloe ka aih! **5** Ha-uang bu rahem hì au khoe broq ramènh kat akia, au kô mangai Isorali, nang noe da Bêñjamin, mangai Hêbru, kon da mangai Hêbru, tiaq ranenh, au mòeq bua ka mangai Pharisi; **6** tiaq kan panim nhet, au kô mangai ti rùp Tagop Hadròeh, tiaq trong ranenh au kô taq atoq ùh i ka nòe cwò. **7** Mahaq, taiq Christ au ngan trong i lòeq aih, budàng kan qngwan diq. **8** Au hadai ngan rìm yiniq, budiang kan qngwan, majah qmang aih, jah loq ka Chuaq Jesus Christ aih ùh hnau döng ka yiniq qnoeq, Haq aih Chuaq au, au hadai pi adênh rìm trong ma i lòeq aih, đòeq hu tiaq haq. Joq, au hnoq bài yiniq aih budàng bài aròm, đòeq au jah Chuaq Jesus Christ **9** hujah oe enh dalam ka haq, jah qmang aih ùh xài canòm kan taq atoq cla au jah enh ranenh, mahaq taiq au lùi Chuaq Jesus Christ, aih kan taq atoq enh Boc Plình khoe jah paqnàng enh qnhèq ka manoh lùi; **10** dôq au jah loq ka haq, loq cwìang itai kan rìh hlài da haq, jah pajùm kan xalep ti haq, broq ka au jah tìah ka haq ta kan cachìt haq, **11** au ngèh rađeh jah rìh hlài enh mangai cachìt. **12** Anoe aih ùh xài au khoe jah bài yiniq kô, hanoh ùh xài au khoe

trùh ta kan gêh geo, mahaq au qnang cadàu waq ka jah
bài yiniq aih, majah qmang aih, cla au kô khoe jah Chuaq
Jesus Christ dùng yōc. **13** Au anoe ka pì oh daq, cla au kô,
au ùh hèm đeh khoe jah clech trùh nòe, **14** mahaq dua au
broq deh mòeq trong raq: hèt đac dōng bài yiniq enh rù,
đòeq cadàu tiaq yiniq enh ngèa, dôq hujah yōc kan baha
enh Boc Plinh oe ta plinh khoe creo ka au enh dalam ka
Chuaq Jesus Christ. **15** Qmang aih, dìq ka bèn mangai ma
khoe kàn gêh, ep i manoh aih, tàng joq oh daq hèm trong
qnoeq, dua Boc Plinh yōc trong kô raq đòeq sreo qngah
ka oh daq. **16** Toq rameh raq: bèn khoe jah pang maneh
leq, bèn hadai ep lam qmang aih. **17** Manòeq kô pì oh
daq, drah top dua au rai ngan bài mangai rìh acaq tiaq
dua oh daq ma hnoq taqne nhèn. **18** Majah qmang aih, au
khoe anoe yôt ka oh daq, manòeq kô au rai hmoe rai
anoe hòm: bac ngai rìh tìah qmòe ka mangai tagit ka
long pagat da Christ. **19** Atìq pulùch da wì haq aih cachìt
hnhung, wì yōc dèh cliac broq bùa cla wì haq, yōc deh
kan camaih broq kan rahù, hèm toq trong ta cröng taneh
kô. **20** Mahaq bèn kô mangai da diac plinh, enh aih bèn
ma tangèh gòm dèh Mangai dèch bèn aih Chuaq Jesus
Christ, **21** Haq broq ka chac mac ùh nèn da bèn wìh wìa
tìah ka chac mac ranhòm da haq, wop tiaq cwìang itai da
haq khoe i đòeq broq rìm yiniq ep iu tiaq.

4 Manòeq kô, dìq dōng pì oh daq, aih bài mangai au dìq
jaq loq waq dèh enh nèh, pì aih kan lem bùi da au, cadoh
ranhòm da au, pì ep yòng ma cajap enh dalam ka Chuaq
oq. **2** Au pariaq Êvôđi xam Sinticô ep mòeq manoh ta
Chuaq. **3** Joq au anoe dèh ka ìh, mangai bua joq qnàng da

au, ìh wiang ti wa baiq ngai gucadṛì aih diq, majah qmang aih wa aih hanoh khoe wiang xalep ka Bàu lem ti au xam Côleman, xam bài bua bèn maqnoeq, aih la bài mangai yiniq wì haq khoe jah achìh ta hset kan rìh. **4** Drah lem bùi yôt ta Chuaq. Au anoe hòm: drah lem bùi beq! **5** Dôq rìm ngai jah hnoq kan loq bùi da oh daq. Chuaq khoe haten. **6** Ùh dùh lèt dèh, mahaq tarìm trong yōc bàu waiq khàn, creo dang, xam kan manè apôi đòeq hu dèch bài yiniq rađeh ma enh waiq dang Boc Plình. **7** Kan catèm da Boc Plình yeo haqn hèq ka rìm trong bèn ma loq, jah wèq cliac manoh oh daq enh dalam ka Chuaq Jesus Christ. **8** Pulùch aih, yôi yôiq dìq dǒng ka oh daq, trong leq ma joq qnàng, trong leq khòh padèch, trong leq khòh manè, trong leq taq atoq, trong leq lem hreo, trong leq khòh waq, trong leq i bàu lem, trong leq ma tajì, aih pì oh daq ep hèm trùh. **9** Trong leq oh daq khoe hōc khoe jah, khoe tàng, khoe hnoq ajang au, broq beq, aih èh Boc Plình da kan catèm hi oe ti oh daq. **10** Enh dalam ka Chuaq au jah lem bùi haraya, majah qmang aih manđeq kô oh daq khoe hmàng trùh au hòm, trong aih dua oh daq khoe hèm trùh yôt, mahaq qnhòq glàm jò hu paqnoh. **11** Ùh xài au enh anoe đèh qnang nan, majah qmang aih, au khoe axràm yac ka glàm qmang leq, manoh au dua lem bùi. **12** Au loq rìh jò ma dahênh, hadai loq rìh jò ma tàu tìa. Rìm trong, rìm nòe au dìq axràm, yac ka panàc yac ka pangot, yac ka i rah yac ka ùh, dua ùh troq cleq. **13** Au broq jah rìm yiniq aih canòm ka Chuaq tam padren ka au. **14** Mahaq oh daq khoe wiang hanò ka au jò nan no, aih raq khoe broq biàc lem. **15** Dìq ka oh daq oe ta Philip, pì hadai loq

jò au baxèm hnài Bàu lem, jò au loh khoe ka Maxêđoan,
enh gùng ka Tagop Hadròeh da pì, aih ùh i Tagop leq waq
taqmùt ti au, đòeq hu wiang hnhu am qmòeq cleq; **16**
majah qmang aih, jò au oe raq ta Têsalônica, oh daq khoe
mòeq baiq yàng gòe aràng dahwèq au ma qnang nan. **17**
Anoe aih, ùh xài au ngèh ka dahwèq, mahaq au ngèh enh
dahwèq aih oh daq jah loh plì yeo bac hòm. **18** Qmang
aih, manòeq kô au khoe jah tôm taih, qnang ùh dìq ùh
dài, au khoe tàu tià, majah qmang aih au khoe jah dǒng
dahwèq pì gòe aràng ka au ajang Êpbaphôđit tìah qmòe
kan xua thùm, aih la ramènh Boc Plình ma khoe dì rai
lem manoh. **19** Èh Boc Plình da au, broq ka oh daq jah
tàu tià rìm yiniq oh daq ma nhet ka waq wop tiaq kan
padrõng da haq oe tanòe ranhòm enh dalam ka Chuaq
Jesus Christ. **20** Waiq kan ranhòm hlài dìq ta Boc Plình,
aih Baq da bèn mòeq đòeq ùh lùch! Amen. (aiōn g165) **21**
Au i bàu hmàih ka dìq dǒng mangai hadròeh da Chuaq
Jesus Christ, oh daq qnang oe pajùm ti au hadai tanap
bàu hmàih trùh oh daq. **22** Dìq dǒng mangai hadròeh
gùng kô hadai i bàu hmàih ka oh daq, bài mangai oe ta
hnim Sêsa aih kiang ma yeo nhet. **23** Waiq kan tabàih da
Chuaq Jesus Christ jah oe ta dalam oh daq.

CÔLOSE

1 Phaulô tiaq manoh da Boc Plình enh, jah creo broq mangai tiaq cla da Chuaq Jesus Christ xam Timothê aih oh daq bèn, **2** achìh ka oh daq bèn ma oe ta Côlose aih ka bài mangai hadròeh rai ùh tablòq manoh ta Chríst, waiq kan tabòeh dech xam kan catèm enh Boc pl ình aih Baq bèn trùh ta oh daq **3** Jò waiq khàn am ka oh daq, nhèn ùh hêq ka manè apôi Boc plình aih Baq da Chuaq Jesus Christ bèn. **4** Majah qmang aih nhèn khoe hìa trùh manoh lùi da oh daq ta Chuaq Jesus Christ xam manoh oh daq loq waq ka mangai da Boc plình, **5** manoh xam kan loq waq aih plôh loh enh kan tangèh ma khoe padon đòeq ka oh daq ta plình, aih la bài yiniq enh adroe kô nèh oh daq khoe canòm ka trong Bàu lem joq qnàng đòeq canau loq. **6** Trong Bàu lem aih khoe trùh ta oh daq, hanoh qmang aih diq trong Bàu lem khoe caqmon loh plì rai yòng kèn jàp ta crõng taneh. Patep pang hì oh daq khoe jah tàng kan tabàih dech da Boc Plình rai hõc waq ka jah loq qmòe ka joq qnàng kan tabòeh dech aih. **7** Wop qmang ka Êphapra aih mangai abroq qmoeq qmang ma haten hatià ti nhèn khoe hnài oh daq, haq wiang ka nhèn qmang ka mangai patih ùh tablòq manoh ka Christ. **8** Haq hadai khoe anoe ka nhèn loq manoh loq waq da oh daq ma khoe chìuq enh Yiang Hadròeh. **9** Aih ìq, nhèn hanoh qmang aih, patep pang hì nhèn hìa trùh oh daq, nhèn ùh hêq ka waiq khàn am ka pì. Nhèn waiq Boc Plình ùc bình ka oh daq kan rabiaq loq trong manoh haq ma enh, tiaq ajang kan rabiaq kan loq da Yiang Hadròeh am. **10** Đòeq oh daq rìh acaq ma tajì ka Chuaq, jah lem manoh

haq rìm trong, loh rìm yiniq broq lem, èh rai yòng kàn ta kan loq ka Boc Plình, **11** canòm kan i cwiàng itai ranhòm da haq, jah padren rìm trong, đòeq oh daq i kan loq kèm dràng àt bàc trong. **12** Rai dèch kan manè apôi am ka Baq, aih mangai ma khoe broq ka oh daq tajì ka jah kùng hang ti bài mangai hadròeh ta diac qngah qngai. **13** Haq khoe paclaih bèn loh khoe ka cwiàng da kan clam cluiq, broq ka bèn jah qnhac atđc ta diac Kon haq ma đìq jaq loq waq dèh, **14** enh dalam Kon aih bèn i kan baxon dèch, aih la kan caqnaih yiniq lui. **15** Haq aih raq dua qmù da Boc Plình ùh jah hnoq, aih la Mangai i adroe dǒng ka rìm yiniq ma khoe jah broq loh. **16** Majah qmang aih rìm yiniq đìq khoe jah broq loh enh dalam ka haq, yac ka ta tröc yac ka ta taneh, ngè xau hnoq ngè ùh xau hnoq, yac ka bùa, yac ka bài cla craq, bài wèq cwiàng, rìm yiniq đìq khoe jah broq loh enh dalam ka haq rai đòeq ka haq. **17** Haq i adroe ka rìm yiniq èh rìm yiniq yòng cajap enh dalam ka haq. **18** Èh hadai Haq aih raq gàu da chac hamac, aih la gàu da Tagop Hadròeh. Haq la baxèm la kon ramua da bài mangai rìh hlài enh kan cachìt, đòeq ta rìm yiniq haq yòng qmòe adroe. **19** Majah qmang aih Boc Plình khoe bùi manoh broq rìm yiniq ma bình bauq ta rađeh jah oe ta haq, **20** èh xi mahim haq talong pagat, khoe jah broq loh kan hatroq, đòeq rìm yiniq ta taneh ta troc đìq canòm ka haq đòeq jah hatroq ka cla Boc Plình. **21** Da oh daq hòm hì adroe nèh hangai ka Boc Plình, manoh tablêq hlài ka haq ajang nòe trong dù da rađeh ma broq, **22** mahaq manòeq kô Boc Plình khoe canòm kan cachìt da Kon haq ma khoe chìuq ta chac hamac

xech akia đòeq broq oh daq hatroq, đòeq broq oh daq jah hadròeh yòng enh ngeà haq, ùh i ka xìt, ùh i ka nòe hu cwò; **23** waq toq oh daq cajap manoh lùi Chuaq ùh talùi ùh talic enh kan tangèh khoe jah anoe qnoph xi trong Bàu lem oh daq ma khoe jah tàng, aih la trong khoe jah anoe qnoph taqne rìm yiniq jah broq loh ta caqnàm plinh, hloé xam au, Phaulô, la mangai patih ka trong aih. **24** Manđeq kô au lem bùi ta kan xalep đeh ma khoe jah patih ka oh daq, pàng Tagop Hadròeh aih la chac da Christ, dài au majah yđc deh chac hamac đòeq pòq wê rìm yiniq ma oe i ta kan xalep da haq. **25** Au broq mangai patih ka Tagop Hadroèh aih tiaq bàu Boc plinh ma khoe taqmroq axong, aih la Mangai khoe thê au anoe hnài trong Chuaq ka oh daq ma gêh geo, **26** aih la kan hlèp ma khoe cadoc enh qnhòng calah nèh, yàng manđeq kô khoe jah paqnoh ka mangai da Boc plinh. (aiōn g165) **27** Majah qmang aih Boc Plinh khoe ràih wì haq đòeq broq ka mangai diac wì jah loq kan padrōng ranhòm da kan hlèp aih. Aih la Christ oe qne oh daq, aih raq kan tangèh trùh ta kan ranhòm. **28** Haq aih raq nhèn ma anoe, yđc rìm kan rabiaq đòeq pariaq rìm ngai, hnài rìm ngai, đòeq paqnoh rìm ngai jah geo lem enh dalam ka Christ enh ngèa Boc Plinh. **29** Aih iq raq dài au ma abroq, canòm ka padren haq wiang đòeq hu tablêq aih la padren qnang abroq i cwìang ta au.

2 Au enh oh daq loq dàng leq cadèh au khoe đìq jaq tablêq am ka oh daq, ka mangai ma oe ta laođixê xam ka wì oh daq ma ùh hnoq hadrò au, **2** dôq manoh wì aih jah prarōng hujah pajùm mòeq ta kan loq waq, đòeq tangeà trùh ta kan qnì loq tôm taih ùh đìq ùh dài ka cajap

cajinh, loh qmòe ka jah loq kan hlèp da Boc Plinh, aih la Christ, **3** enh dalam haq khoe cadoc hlèp rìm hang ma canaq da kan rabiaq, qnì loq. **4** Au doe qmang aih, dôq ùh hìaq i cabô yōc bàu padô đòeq hu qnùt oh daq. **5** Majah qmang aih yac ka chac au hangai, mahaq mahua yiang au dua oe ti oh daq, hnoq oh daq oe ti dabau i xèm goe rai cajap manoh lùi trùh Christ, aih joq au bùi raya. **6** Oh daq khoe lùi Chuaq Jesus Christ qmang leq, drah cadiang lam enh dalam ka haq qmang aih; **7** drah grap riah rai bùn xèm enh dalam ka haq, yōc manoh lùi broq ka cajap, tiaq qmang ka oh daq ma khoe jah hnài rai ùh dìq ùh dài ta kan manè apôi. **8** Ngan oq, apaq dôq wì yōc bàu atac rabiaq xam bàu dech, tiaq bàu taqmon da kon mangai, ranenh da qnhòng kô, ùh tiaq trong da Christ, đòeq rùp oh daq iu tiaq. **9** Majah qmang aih enh dalam ka Christ khoe tôm yiang da Boc Plinh tìah gleq i qmòe chac. **10** Èh hòm enh canòm ka Christ oh daq khoe jah trùh ta kan tàu tìa, majah qmang aih haq aih raq gàu da rìm cwìang xam rìm padren dêh. **11** Oh daq hadai chìuq kat akia enh dalam haq, ùh xài kat akia enh tì kǒng kon mangai, mahaq ramènh kat akia da Christ, aih la lêh cađac kon mangai dùnh. **12** Oh daq khoe jah catùh ti haq xi ramènh ɓaptem, aih hadai jah rìh hlài ti haq xi manoh lùi ta cwìang itai Boc Plinh, aih la mangai khoe broq ka haq rìh hlài enh kan cachìt. **13** Jò oh daq khoe cachìt dèh ka yiniq lui rađeh xam xech akia ma ùh kat akia, aih Boc plinh khoe broq ka oh daq jah rìh hlài ti Christ, majah qmang aih khoe lêh caqnaih dōng da bèn yiniq lui. **14** Haq khoe xùt đac jàiq dòeh achìh đòeq hu tablêq ka bèn

xam bòe ranenh ma pagau ka bèn, hit hloe jàiq dòeh aih rai tiang đình talong pagat. **15** Haq khoe caqnìh đac bòe cwìang ma broq gàu, xam bòe padren dêh, yǒc long pagat đòeq blêq wì aih rai patô qnoh dôq ka mangai hnoq đeh hra ta phù cròng. **16** Qmang aih paq i cabô hadrah oh daq trong acaq ôq, tàng ùh meh hì ramènh, hì khê neo, hì Sabat, **17** aih dìq qmù da yiniq ma padon trùh, chac aih oe ta Christ. **18** Apaq đòeq bòe wì tau atùng yǒc da oh daq kan baha, aih la bài mangai enh patìah đeh kô ùh qnhèq qneq mahaq enh kùh waiq bình plình. Wì haq tiaq bài trong đeh hnoq, xam kan daiq da xech akia wì haq loh ka padèch rađeh ùh loh cleq, **19** ùh i hatop ka gàu, canòm ka gàu aih dìq ka chac men jah taqmroq hatop xi bài atap, jah kan yòng kèn enh Boc Plình. **20** Tàng joq oh daq hadai cachìt ti Christ khoe jah claih ka ranenh da kon mangai, aih hagleq majah oe dôq bài yiniq kô panan rađeh tìah taiq ka oh daq oe rìh tiaq crồng taneh kô. **21** Ùh khòh wê, ùh khòh liah, ùh khòh bèq? **22** Dìq ka bài yiniq aih waq toq hi troq aih hi loh ka raliang tiaq bàu da kon mangai ma hnài, **23** yac ka enh gùng aih hnoq tìah gleq rabiaq, aih la kùh waiq tiaq deh manoh cla, ùh qnhèq qneq rai baxa dèh chac hamac, yàng ùh i jah cleq đòeq hu tablêq ka trong xech akia ma enh.

3 Qmang aih tàng joq oh daq jah rìh hlài ti Christ, drah chaq bài yiniq oe ta plình, aih noè Christ haqngui enh qma Boc Plình. **2** Drah tangèa manoh ta bài yiniq oe ta plình, apaq ngèa manoh ta bài yiniq oe ta crồng taneh, **3** majah qmang aih oh daq khoe cachìt kan rìh dadeh khoe jah cadoc ti Christ oe ta dalam Boc Plình. **4** Jò leq Christ

aih kan rìh da oh daq hi trùh, jò aih èh oh daq hadai jah
trùh ti haq ta kan ranhòm. **5** Qmang aih, drah broq dôq
haq cachìt bài yiniq da cröng taneh kô oe ta chac oh daq,
aih la trong taqnung tango, ùh hruah, manoh loq ònh,
enh trong qmèq, daiq plai, daiq plai ùh crài cleq ka kùh
waiq radua qmù: **6** taiq bài yiniq aih Boc Plình majah
caqnìh kan nòeh ka wì kon ma ùh iu; **7** adroe nèh oh daq
rìh ta bài kan qmèq aih rai acaq oe qmang aih. **8** Mahaq
manðeq kô ep caðac döng bòe yiniq aih, aih la kan nòeh,
kan mahau xam kan dù. Apaq capoch troq cabô, ùh dùh i
mòeq nà brùaq loh enh bàu oh daq. **9** Apaq qnùt dabau
majah qmang aih khoe lêh ðac kon mangai dùnh xam
yineq broq da haq, **10** ðòeq caxùnh yōc mangai neo aih
la mangai qnang wìh wìa neo tiaq dua da Mangai ma
broq loh haq aih, ðòeq hujah trùh ta kan loq gêh geo. **11**
Tacô pi i ka mangai Gorec, mangai Juða, mangai khoe
kat akia, mangai dù, mangai Sythe, mangai broq hapõng
dìc, mangai broq cla, mahaq Christ aih rìm yiniq ta rìm
yiniq. **12** Qmang aih oh daq la mangai khoe jah ràih da
Boc Plình, mangai hadròeh haq ma dìq jaq loq waq dèh,
thê i manoh loq ha-och. Drah sràp yōc kan loq waq, kan
alàng, loq hamuan, khun khauq, **13** tàng cabô taqne oh
daq i cleq ùh troq ka dabau, aih thê taqnìhùa ka dabau rai
lêh caqnaih yiniq lui ka dabau: Tìah ka Chuaq ma khoe
lêh caqnaih yiniq lui ka oh daq qmang leq, oh daq hadai
caqnaih yiniq lui ka dabau qmang aih diq. **14** Mahaq enh
qnhèq dìq döng ka bài yiniq aih, ep caxùnh yōc kan loq
waq, aih la caxi achauq bài kan lem geo. **15** Drah ðòeq
kan catèm da Christ wèq ta manoh oh daq, oh daq hadai

khoe jah creo trùh ta kan catèm aih oe ta mòeq chac, drah paqnoh manoh loq manè apôi. **16** Drah đòeq bàu da Christ bình bauq taqne oh daq dôq oh daq ùh dìq ùh dài ta kan rabiaq. Drah yōc calêu plình, bài calêu hadròeh, calêu enh Yiang Hadròeh đòeq hnài rai pariaq dabau, pàng khoe jah bình kan tabàih dech enh haq dài oh daq majah ep dìq ka manoh calêu manè apôi Boc Plình. **17** Yac ka oh daq capoch yac ka oh daq abroq, dìq ep canòm ka yiniq Chuaq Jesus đòeq hu broq rìm trong, canòm ka haq đòeq manè pôi Boc Plình, aih la Baq. **18** Bài mangai broq mai, drah iu tiaq deh ǒng, qmang aih tajì troq ta Chuaq. **19** Bài mangai broq ǒng, ep loq waq deh ka mai, apaq hadrùq hadriang ka wì haq. **20** Bài mangai broq kon, rìm trong ep iu tiaq miq baq, majah qmang aih trong aih lem ka manoh Chuaq. **21** Mangai broq baq ùh dùh jrôq chiu dôq deh kon nòeh, yùq èh wì haq loq tagah tagôi ta manoh. **22** Bài mangai broq hapǒng, ta rìm trong ep loq iu tiaq bàu dèh cla craq ta qnhòng kô, ùh xài patìh toq enh ngèa wì haq qmang ka mangai enh aluàn yōc manoh wì, mahaq jao manoh iu yùq ka Chuaq, ep patìh xi manoh hnhuh jang. **23** Yac ka broq cleq dua ep dìq ka manoh hu broq, tìah broq ka Chuaq ùh xài broq ka kon mangai, **24** majah qmang aih ep loq rameh đeh kô èh jah kùng hang baha enh Chuaq. Oh daq qnang broq hapǒng ka Christ aih Chuaq. **25** Majah qmang aih cabô broq trong qmèq haq aih jah patem hlài trong qmèq đeh ma khoe broq, ùh rong cabô.

4 Bài mangai ma broq cla craq, drah aràng am kan taq atoq hnhuh jang dèh ka bài hapǒng, majah qmang aih oh

daq loq đeh hadai i mòeq ngai Cla craq oe ta plình. **2** Ep cajap manoh rai loq hmàng trong waiq khàn rai ep tam kan manè apôi. **3** Hadai waiq khàn am ka nhèn, đòeq Boc Plình pèch qmang ka trong bàu nhèn anoe hnài, qmang aih nhèn jah anoe qnoh kan hlèp da Christ, jao aih raq au majah oe qne caxi datoeq. **4** Waiq khàn đòeq au jah anoe ka hloh kan hlèp aih, troeq au ep anoe. **5** Ep rabiaq ta trong pì acaq oe ti wì enh gùng, waq toq jò bu taqnàih. **6** Bàu da oh daq ma capoch tuàng jò leq xu ep bình kan la alàng, ep tah tam boh, đòeq oh daq loq cabè padreo bàu ka tang ngai qmang leq cadèh. **7** Tichicô aih la oh daq nhèn dìq jaq loq waq deh, mangai hapõng ùh taclah manoh da Chuaq, bua abroq ti au. Haq jah patìn ka oh daq loq rìm yiniq da au. **8** Au thê haq trùh ta oh daq, dôq pì loq nhèn mandeq kô qmang leq, đòeq haq jah alòng manoh cliac pì. **9** Haq lam ti Ônesim aih la mangai ùh taclah manoh nhèn ma loq waq dèh qnàng, haq aih mangai mòeq gùng ka pì. Wa aih jah doe ka pì rìm yiniq qnang loh tacô. **10** Aritac aih bua hanoh oe tù ti au, i bàu hmàih ka oh daq, Mõc aih kon oh kon daq ka Banaba hadai, (oh daq khoe jah bàu tanap trùh haq, tàng haq trùh ta oh daq, pì ep đìh haq ka alàng). **11** Jêsu wì ma creo Juctu hadai i bàu hmàih ka oh daq. Taqne wì ma kat akia, toq wì piq ngai aih raq ma wiang patìh ka diac Boc Plình ti au, wì haq aih raq kan alòng manoh au. **12** Ephapra, mangai mòeq gùng ka oh daq, hapõng da Chuaq Jesus Christ i bàu hmàih oh daq, haq ùh hêq ka tabàt am ka oh daq jò waiq khàn, dôq oh daq jah geo gua rai dìq manoh iu tiaq manoh Boc Plình ma enh. **13** Au anoe

đòeq pì loq haq aih khoe abroq xalep ka pì oh daq xam
ka mangai Laođixê hloe xam ka mangai Hi-êrabôli. **14**
Luca, bua da bèn haq aih băcsi xam Đêma bòch hmàih
oh daq **15** Au tanap bàu hmàih trùh oh daq ta Laođixê
xam Nimpha hloe xam Tagop Hadròeh ma tagop ta hnim
haq. **16** Oh daq đõc jàiq kô khoe èh am ka Tagop Hadròeh
Laođixê đõc diq, oh daq hadai ep đõc jàiq enh Laođixê
gòe trùh diq. **17** Doe ka Achip rameh: Ep rabiaq trong
patih haq ma khoe canòm ka yiniq Chuaq đòeq nhàn
yõc, đòeq hubroq ka gêh geo. **18** Tì kõng cla au, Phaulô,
achih hmàih ka oh daq. Hmàng trùh caxi datoeq da au
diqu. Waiq kan tabàih dech oe ti pì.

I TÊSALÔNICA

1 Phau lô, Timôthê xam Sila, achìh ka Tagop Hadròeh oe ta Têsalônica, Tagop oe enh dalam Boc Plinh aih Baq, xam enh dalam ka Jesus Christ aih Chuaq da bèn, waiq kan tabàih xam kan catèm trùh ti oh daq. **2** Nhèn toq manè apôi Boc Plinh am ka oh daq, jò waiq khàn nhèn ùh hêq ka ràu trùh oh daq, **3** majah qmang aih enh ngèa Boc Plinh, aih Baq, nhèn hmàng yôt yiniq broq loh enh manoh lùi da oh daq, kan xalep ta manoh loq waq da oh daq xam kan oh daq khoe cajap manoh ngèh gòm ta Chuaq Jesus Christ bèn. **4** Nhèn loq, Boc Plinh khoe loq waq ka oh daq, haq khoe ràih pì. **5** Majah qmang aih, Bàu lem nhèn khoe anoe ka pì ùh xài toq xi bàu dech, mahaq xam cwìang itai, xam Yiang Hadròeh xam kan cajap da manoh lùi hòm. Majah qmang aih oh daq loq taqne pì nhèn rìh qmang leq, manoh nhèn loq waq ka oh daq dàng leq. **6** Oh daq khoe tiaq dua nhèn, tiaq dua da Chuaq, jò oe qne kan nan no, oh daq yōc kan lem bùi da Yiang Hadròeh đòeq đìh yōc bàu hnài, **7** oh daq khoe wìa dua lem ka mangai lùi oe tagùng Maxêđoan xam Achai. **8** Majah qmang aih bàu da Chuaq enh nòe oh daq ùh xài haq trùh palap pang gùng Maxêđoan xam Achai hi đìq, mahaq manoh lùi da oh daq i enh dalam ka Boc Plinh khoe jah anoe jàp jìa, jaq nhèn loh ka pi ep anoe tam cleq hòm. **9** Majaq qmang aih cla wì ta aih raq anoe hlài ka nhèn loq oh daq khoe đìh nhèn qmang leq, khoe tawìh hlài ti Boc Plinh qmang leq cadèh, khoe cađac radua qmù đòeq hu kùh waiq Boc Plinh ma joq qnàng, **10** đòeq hu gòm Kon da haq enh plinh, aih Chuaq Jesus mangai haq

ma khoe broq rìh hlài enh kan cachìt, aih raq Mangai hu
dèch bèn claih ka kan panòeh hì atìq.

2 Majah qmang aih cla pì oh daq raq ma loq dèh, nhèn khoe trùh ta pì oh daq, aih joq ùh hìa qngwan; **2** atìq ka nhèn glàm kan nanxa xam kan camaih xep ta Philip, qmang ka oh daq ma khoe loq, mahaq dua nhèn canòm ka Boc Plình, nhèn ùh hòq ka anoe am ka pì Bàu lem da Boc Plình yac ka nhèn tajraq ka kan ranàc kàn. **3** Majah qmang aih, bàu nhèn anoe hnài ùh xài loh trong lìq làn, ùh xài loh enh manoh ùh hliang lem, hadai ùh i kan padô qnùt. **4** Mahaq pàng Boc Plình ma khoe qnhro ngan, hnoq nhèn kô tajì đòeq haq thê nhèn lam anoe Bàu lem, aih ìq dài nhèn majah hùa anoe, ùh xài hu lem ka manoh kon mangai, mahaq đòeq lem ka manoh Boc Plình, aih Mangai ma khoe qnhro ngan da nhèn manoh. **5** Oh daq loq, nhèn ùh lòm yōc bàu hu pajìang hadai ùh i ka manoh hèm waq ka jah toq ka rađeh, ma aih i Boc Plình loq. **6** Yac ka nhèn i cwìang thê pì iu nhèn, majah qmang aih nhèn kô mangai tiaq cla da Christ, mahaq nhèn ùh chaq kan ranhòm enh kon mangai, yac ka enh pì oh daq yac ka enh wì qnoeq. **7** Mahaq taqne oh daq nhèn khoe qmang ka kon qyoh, tìah ka mangai miq wèq ban dèh kon laq alàng. **8** Majah qmang aih, pàng manoh cliac nhèn loq waq hrìn ka oh daq, dài nhèn majah enh axong am ka pì ùh xài toq Bàu lem da Boc Plình, mahaq hloe xam kan rìh da cla nhèn, majah qmang aih pì khoe wìa manngai moèq cliac mòeq clèm ti nhèn. **9** Joq qnàng, pì oh daq oe raq hmàng kan xalep nhèn, jò nhèn ma anoe hnài Bàu lem ka oh daq, aih nhèn khoe patih abroq xam dahì xam damang,

đoèq ùh hìaq ep pangài qmòe ka cabô taqne pì oh daq. **10**
Oh daq hnoq, Boc Plình hadai wiang hnoq trong nhèn
acaq oe ti pì oh daq aih bài mangai ma i manoh lùi, joq
hliang lem, taq atoq, ùh i ajang leq oe jah cwò. **11** Oh daq
hadai loq nhèn rìh ti rìm ngai taqne pì tìah ka baq rìh
dèh ti kon, **12** toq ti pariaq, alòng, ti àu dôq pì jah rìh
acaq ma tajì ka Boc Plình, aih Mangai ma creo ka oh daq
trùh ta diac haq xam ta kan ranhòm haq. **13** Aih ìq, dài
nhèn majah ùh hêq ka manè apôi Boc Plình, jò pì khoe dì
yōc bàu Boc Plình loh enh nhèn, pì ùh ngan aih bàu loh
enh kon mangai, mahaq ngan aih bàu Boc Plình, joq bàu
da Boc Plình hadai abroq ta oh daq ma i manoh lùi. **14**
Majah qmang aih, oh daq joq khoe wìa mangai loq tiaq
dua bài Tagop da Boc Plình oe tagùng Jiuđê, aih bài Tagop
Hadròeh enh dalam Chuaq Jesus Christ, majah qmang aih
pì khoe chìuq xalep enh tì kǒng mangai gùng cla, tìah ka
bài Tagop aih hadai khoe chìuq xalep enh tì kǒng mangai
Juđa, **15** aih bài mangai ma khoe jêh đac Chuaq Jesus xam
bài pajàu, khoe ti hnan rùp nhèn, wì haq broq ùh troq
tiaq manoh Boc Plình rai enh tablêq ka rìm ngai, **16** wì
aih toq ti khech tát ùh am nhèn anoe hnài bài mangai
diac qnoeq dôq wì aih jah dèch đeh diq, qmang aih wì
haq qmìn tam dèh yiniq lui dôq haq bình halùih. Mahaq
pulùch èh kan nòeh da Boc Plình khoe trùh ta wì haq. **17**
Mahaq oh daq! Yac ka hnoq bla kô nèh nhèn khoe talah
hangai ka pì toq biaq, (chac talah manoh ùh talah), aih
kiang nhèn enh toq broq qmang leq hudrah jah hnoq
hadrò oh daq đòeq brêh kan hmàng. **18** Aih ìq, dài haq
khoe baiq yàng, đìq ka nhèn, (ta aih nhang qmòe au)

enh trùh hmàih ka oh daq, mahaq kiac Satan khoe khech
tàt nhèn. **19** Majah qmang aih, kan tangèh, kan lem bùi
xam cadoh diac plình ranhòm da nhèn aih cleq, aih ma
ùh xài oh daq jah yòng cajap enh ngèa Chuaq Jesus aih
Chuaq bèn jò haq trùh qmòh? **20** Joq! pì oh daq aih raq
kan ranhòm xam kan lem bùi da nhèn.

3 Qmang aih, pi oe dòh gòm dài nhèn majah dôq cla oe
hlài ta Athêñ, **2** nhèn thê Timôthê, aih bua nhèn, haq aih
hapöng da Boc Plình, mangai patìh ka Bàu lem da Christ,
lam ta oh daq, đòèq broq ka oh daq jah cajap rai wiang
paröng manoh lùi ta oh daq, **3** đòèq ta bàikan nanxa
qmang aih ùh hìaq i mangai leq dalàc, majah qmang aih
cla oh daq hanoh loq trong aih khoe tèu đòèq adroe ka
bèn. **4** Ma joq qnàng aih, jò oe ti oh daq, nhèn khoe doe:
kô èh ep chìuq bàc kan nanxa, bài trong aih manòeq kô
khoe trùh, oh daq khoe hnoq. **5** Qmang aih pi dòh gòm
hòm, au majah thê Timôthê lam, đòèq huloq ka tình
manoh lùi da oh daq qmang leq, au yùq mangai padô
qnùt loq khoe padô oh daq, aih èh qngwan qngwaiq ka
nhèn khoe abroq xalep đeh. **6** Mahaq Timôthê hlài enh
nòe oh daq i anoe ka nhèn loq bài tình lem da manoh
lùi xam manoh loq waq da oh daq. Haq i anoe oh daq
hmàng yôt trùh nhèn, toq ngèh ka jah glàm nhèn, hadai
qmang ka nhèn ngèh ka jah glàm oh daq. **7** Qmang aih,
oe taqne kan xalep khech rùp da nhèn, nhèn khoe jah
kan alòng enh manoh lùi oh daq. **8** Majah qmang aih,
manòeq kô nhèn rìh aih taiq oh daq yòng cajap ta Chuaq.
9 Qmang aih, broq qmang leq nhèn ma tôm bàu đòèq hu
manè apôi Boc Plình ka oh daq, xam dìq bài kan lem bùi

nhèn jah enh oh daq ajang ngèa Boc Plình nhèn? **10** Dahì damang, nhèn àu waiq dang haq caqnaih am nhèn jah glàm hòm oh daq, rai qmìn tam ajang leq manoh lùi da pì oe raq capòch. **11** Waiq cla Boc Plình, aih Baq bèn, xam Jesus Chuaq bèn qnung aràng nhèn jah trùh ta oh daq! **12** Waiq Chuaq broq kan loq waq da pì tadèch tam rai bình halùih kan loq waq ka dabau, ka rìm ngai, tìah qmang kan loq waq da nhèn am ka oh daq, **13** dôq manoh oh daq jah cajap, jah hadròeh lem ùh i ka nòe cwò enh ngèa Boc Plình, aih Baq bèn, jò Chuaq Jesus bèn xam dìq döng mangai hadròeh haq trùh.

4 Qmang aih, oh daq khoe hòc dua enh nhèn ep rìh qmang leq đòeq jah lem manoh Boc Plình, trong aih oh daq khoe broq, manòeq nhèn canòm ka yiniq Chuaq Jesus đòeq cali calo oh daq ep tiaq yôt trong aih yi hnao hòm. **2** Majah qmang aih oh daq loq, bài ranenh nhèn ma hnài oh daq aih dìq döng nhèn canòm ka Chuaq Jesus. **3** Majah qmang aih manoh Boc Plình enh broq ka oh daq jah hadròeh: Aih oh daq ep wia hangai trong tango anang, **4** rìm ngai ep loq wèq dèh chac hamac jah hadròeh troq ka manè, **5** apaq cro tiaq trong tango taqnung qmang ka wì enh gùng, aih bài mangai ùh qnì ka Boc Plình. **6** Trong kô ùh cabô khòh broq, hadai ùh khòh patùt habo cadèh ka oh daq qnoeq, majah qmang aih Chuaq, haq patem chau ka bài mangai broq trong aih, tìah ka nhèn ma khoe anoe pariaq qmòe adroe. **7** Majah qmang aih Boc Plình ùh creo ka bèn trùh ta kan amùa, mahaq trùh ta kan hadròeh. **8** Qmang aih mangai leq ùh tamàng bàu nhèn anoe kô aih ùh xài haq jù đac kon mangai mahaq

jù đac Boc Plình aih Mangai ma am deh Yiang Hadròeh ka oh daq. **9** Anoe trùh trong oh daq loq waq ka dabau, trong aih nhèn pi ep achìh cleq tam ka pì hòm, majah qmang aih cla oh daq khoe hòc enh nòe Boc Plình ep loq waq ka dabau. **10** Ma joq qnàng haq, trong aih pì khoe broq am dìq döng ka oh daq oe tagùng Maxêđoan. Mahaq dua nhèn panhet tam oh daq broq rai èh rai yeo loe ka aih hòm. **11** Àu axràm rìh acaq ma hatinh haq, panim trong yiniq broq da cla, yōc tì kōng cla patìh, qmang ka nhèn khoe tanap thê oh daq, **12** qmang aih pì jah rìh laq alàng enh ngèa ka wì enh gùng, èh pì ùh hìaq ep nan qmòe cleq. **13** Manòeq kô nhèn ùh enh dôq oh daq ùh qnì bìac mangai ma khoe kùi, đòeq oh daq ùh hìaq mangò hrìn tìah ka mangai ma ùh i nòe canòm. **14** Majah qmang aih, tàng joq bèn lùi Chuaq Jesus khoe cachìt èh khoe rìh hlài, aih hadai qmang aih, Boc Plình jah aràng bài mangai kùi ta Chuaq Jesus trùh ti haq. **15** Majah qmang aih, tiaq bàu Boc Plình, nhèn anoe ka pì loq bèn mangai ma rìh, oe raq gòm hì Chuaq trùh, aih bèn ùh tōc adroe ka mangai khoe kùi. **16** Majah qmang aih, jò i bàu creo dêh enh bình plình kàn xam bàu ken da Boc Plình, aih èh cla Chuaq hi loh enh plình, jò aih bài mangai cachìt enh dalam ka Christ, jah rìh hlài adroe dìq döng. **17** Khoe aih bèn mangai ma rìh, ma oe raq, èh hadai jah dèch atōc pajùm ti wì aih qne yùc ta tròc đòeq hu glàm Chuaq, aih èh bèn hi jah oe hloe ti Chuaq. **18** Qmang aih, oh daq khòh yōc bàu kô đòeq hu alòng dabau.

5 Manòeq kô, anoe trùh jò xam qnhòng leq, nhèn ùh ep achìh dèh ka pì oh daq hòm; **2** majah qmang aih, cla pì oh

daq khoe loq deh joq qnàng hì da Chuaq trùh tìah taiq ka mangai atùng jò damang. **3** Jò wì doe: “Catèm rai ùh troq cleq”, aih èh kan raliang trùh traiq qmang ka gucadri wê cliac aih èh ùh cabô claih taleq. **4** Mahaq oh daq, aih ùh xài mangai oe ta clam, dài hì aih majah ùh hìaq trùh traiq qmang ka mangai atùng. **5** Oh daq aih dìq kon da kan qngah, kon da dahì. Bèn ùh xài da damang, hadai ùh xài da kan clam cluiq. **6** Qmang aih, bèn apaq kùi caniù qmang ka wì qnoeq mahaq ep loq hmàng rai loq hamang. **7** Majah qmang aih mangai kùi aih kùi damang, mangai bù aih bù damang. **8** Yàng bèn aih mangai da dahì, dài majah loq hamang, yōc manoh lùi xam kan loq waq broq eo cađàm, yōc kan ngèh ka jah dèch broq cadoh. **9** Majah qmang aih, Boc Plình ùh i tèu đòeq ka bèn cìh ta kan panòeh, mahaq waq ka bèn jah kan dèch claih enh Chuaq Jesus Christ aih Chuaq dabèn. **10** Haq mangai khoe cachìt am ka bèn, dôq bèn yac ka mangai ma oe rìu yac ka mangai khoe kùi, dìq jah rìh pajùm ti haq. **11** Qmang aih, oh daq drah hnài dabau, paqnhrang dabau, qmang ka oh daq hmaq broq yôt. **12** Manòeq kô, nhèn thê pì oh daq i manoh loq ta-iu ka mangai ma patìh xalep đeh taqne pì, aih mangai ma iu tiaq bàu Chuaq đòeq hu qnung trong rai ti hnài pì oh daq. **13** Thê dìq jaq loq waq ka wì haq taiq yiniq wì haq khoe broq. Thê pì oe acaq ma hatroq ti dabau. **14** Mahaq, nhèn pariaq pì oh daq ep anoe hnài bài mangai ma aroh, alòng mangai ma loq yùq crè, paqnhrang mangai ma ùh nèn, apaq hònh ka cabô. **15** Ngan oq, apaq yōc kan dù đòeq patem chau ka trong dù, mahaq thê ti chaq toq trong lem ka dabau yac

ka taqne oh daq yac ka ti wì qnoeq. **16** Ep loq lem bùi yôt,
17 ùh hêq ka waiq khàn, **18** yac ka glàm trong leq dua ep
manè apôi Chuaq, majah qmang aih, enh dalam ka Chuaq
Jesus Christ, manoh Boc Plình enh ka pì oh daq qmang
aih raq. **19** Apaq plah đac Yiang Hadròeh; **20** ùh dùh
halê đac bài bàu pajàu; **21** mahaq ti boq ngan rìm trong,
trong leq lem aih wèq tiaq. **22** Yiniq cleq hnoq tìah gleq
dù, aih ep wia ma hangai. **23** Waiq Boc Plình kan catèm
broq ka oh daq jah hadròeh rìm trong, đòeq enh manoh,
mahua yiang trùh chac hamac oh daq pi i canòe hu cwò,
jò Chuaq Jesus Christ bèn trùh! **24** Mangai ma khoe creo
ka oh daq aih mangai ùh tablòq manoh, cla haq aih èh
ma broq dèh trong aih. **25** Oh daq waiq khàn am ka nhèn
diq. **26** Thê pì yōc manoh hliang lem đòeq hìp hmàih ka
dabau. **27** Au canòm ka yiniq Chuaq Jesus Christ bèn, thê
pì đōc jàiq kô đòeq rìm ngai dìq jah tàng. **28** Waiq kan
tabàih enh Jesus Christ aih Chuaq da bèn, oe ti pì oh daq.

II TÊSALÔNICA

1 Phaulô, Siwan xam Timôthê achìh ka Tagop Hadroèh oe ta Têsalônica, aih Tagop oe enh dalam Boc Plinh, Baq da bèn, xam enh dalam ka Jesus Christ aih Chuaq bèn: **2** waiq ka oh daq jah kan tabaih dech xam kan catèm enh nòe Boc Plinh, Baq bèn xam enh nòe Chuaq Jesus Christ. **3** Nhèn ep manè apôi yôt Boc Plinh am ka oh daq, trong aih troq, majah qmang aih manoh lùi da oh daq rai èh rai tadèch, kan oh daq loq waq ka dabau rai èh rai bac. **4** Qmang aih, oe qne Tagop ma qnoeq da Boc Plinh nhèn hadai jah catèh dèh pì oh daq, khoe cajap manoh, khoe qnhrang kan lùi oe qne kan ranac pì qnang glàm manoeq. **5** Aih khoe tôm ka yiniq đòeq panhìn kan tah hadarah da Boc Plinh aih troq. Haq enh broq dôq ka oh daq jah tajì ka diac da haq, taiq diac aih oh daq majah ep xalep. **6** Tiaq kan taq atoq da Boc Plinh, aih èh haq yoc kan nanxa đòeq patem hlài ka mangai ma baxa oh daq, **7** khoe aih am ka pì oh daq mangai qnang xalep jah padai ti nhèn, jò Chuaq Jesus Christ loh enh plinh taqne ùnh ma adrènh xam bài bình plinh i cwìang itai da haq, **8** baxa chau bài mangai ma ùh canau ka Boc Plinh, ùh iu tiaq Bàu lem da Chuaq Jesus Christ aih Chuaq da bèn. **9** Wì aih ep chìuq kan raliang hnhung mòeq đòe, hangai ka hadrò Chuaq xam kan ranhòm da kan itai haq, (aiōnios g166) **10** Aih la hì haq trùh đòeq jah kan ranhòm oe taqne bài mangai hadròeh, đòeq jah bàu manè apôi da rìm ngai ma lùi, ta aih i oh daq, majah qmang aih pàng oh daq khoe lùi bàu nhèn anoe. **11** Aih iq, dài nhèn majah ùh hêq ka waiq khàn am ka oh daq, đòeq Boc Plinh bèn broq ka oh daq jah tajì ka

bàu haq khoe creo, đòeq haq yōc dèh padren hu broq gēh ta oh daq rìm kan loq tamèt oe ta manoh loq waq da haq hloe xam bài yiniq broq loh enh manoh lùi; **12** qmang aih èh, yiniq Jesus Christ Chuaq da bèn jah qngah qngai tanèo oh daq, oh daq oe enh dalam haq, tiaq kan tabàih dech enh Boc Plinh bèn xam da Chuaq Jesus Christ bèn.

2 Hatuàng trùh hì Jesus Christ Chuaq da bèn trùh, hloe xam jò bèn jah tagop pajùm ti haq, **2** aih nhèn doe ka oh daq, apaq rênh ka rawè rênh ka lèt yac ka i bàu cabô doe đeh kô i kiac mahno, yac ka loh enh bàu hnài, yac ka loh enh jàiq achih tiah ka da nhèn doe hì da Chuaq ten trùh. **3** Yac ka wì broq qmang leq broq, apaq dôq wì qnùt pì. Majah qmang aih, ep waq ka loh kan manhài adroe, èh magai da kan ngang dù, aih kon da kan raliang hnhung trùh òeq, **4** aih la mangai ma tablêq rai padèch rađeh enh qnhèq dìq dōng rìm yiniq kon mangai ma kùh waiq ma creo dèh kiac, haq mùt haqngui qne hnim kùh waiq Boc Plinh, cla haq doe đeh kô raq Boc Plinh. **5** Oh daq ma ùh hmàng jò oe ti oh daq, ajoq au khoe anoe trùh trong kô? **6** Manòeq kô oh daq loq bìac cleq qnang tát padràng haq, aih iq waq haq loh troq dèh jò! **7** Majah qmang aih manòeq kô kan hlèp da cwìang ngang dù khoe tabroq. Mahaq Mangai ma tát padràng oe raq pagàt haq, mahaq Mangai aih èh ep loh lam. **8** Aih èh mangai ma tabêq hlài ka ranenh tau hi loh, Chuaq Jesus hi yōc dèh hi hèm enh hacùng đòeq hu jêh đac mangai aih, yōc dèh kan qngah qngai jò haq trùh đòeq palùng đac hloe mangai aih. **9** Mangai aih yōc cwìang enh Satan đòeq hu trùh, broq bàc kan halac, kan hamàih xam kan qnùt, **10** yōc

bàc trong ùh taq atoq hu padô bài mangai ma raliang hnhung, majah qmang aih wì aih khoe ùh yōc ka rađeh kan loq waq da bàu joq qnàng đòeq hu jah dèch. **11** Aih ìq dài Boc Plình majah dôq wì haq hlech ta kan lìq làn, aih trong ma broq ka wì haq lùi kan padô aluàn, **12** đòeq dìq dōng ka mangai ma ùh lùi bàu joq qnàng, mahaq enh toq trong ùh taq atoq, dìq ep oe enh qneq ka kan hadrah da haq. **13** Mahaq pì oh daq aih mangai Chuaq ma loq waq, nhèn toq manè apôi Boc Plình am ka pì, dài majah qmang aih Boc Plình khoe rài qmoè pì enh jò baxèm đòeq hu am ka pì kan dèch claih, đòeq hu basròeh pì xi Yiang Hadròeh xam manoh lùi bàu joq qnàng. **14** Aih ìq dài haq majah yōc Bàu lem da nhèn hu creo ka pì oh daq, đòeq pì oh daq jah kan ranhòm enh Chuaq Jesus Christ bèn. **15** Qmang aih, pì oh daq, ep yòng ma cajap, ep wèq tiaq bài trong nhèn ma khoe hnài, yac ka xam bàu xam jàiq nhèn ma achìh am ka pì. **16** Waiq cla Jesus Christ aih Chuaq da bèn, xam Boc Plình, Baq bèn aih Mangai ma khoe loq waq ka bèn, khoe yōc dèh kan tabàih enh haq đòeq hu am ka bèn kan alòng mòeq đòe xam kan tangèh lem lình, (**aiōnios g166**) **17** alòng manoh oh daq broq ka oh daq jah cajap ta rìm trong lem xam bàu tapoch lem.

3 Atìq hòm, oh daq hmàng waiq khàn am ka nhèn diq, dôq trong da Chuaq rênjhah anoe aràng jàp jìa, jah qngah qngai tìah ka taqne pì oh daq, **2** waiq khàn dôq nhèn jah claih enh tì kōng mangai ngang dù, majah qmang aih ùh xài rìm ngai diq i manoh lùi. **3** Mahaq Chuaq ùh tablòq manoh, haq aih ma hi broq ka oh daq jah cajap hagau rai wèq oh daq claih ka Mangai dù. **4** Enh dalam ka Chuaq,

joq nhèn i dèh kan lùi rameh: manòeq kô oh daq qnang broq, tangèa èh dua pì oe broq hòm trong nhèn ma khoe tanap thê. **5** Waiq Chuaq sreo aràng manoh pì oh daq trùh ta kan loq waq da Boc Plình xam kan loq kèm da Christ. **6** Canòm ka yiniq Chuaq Jesus Christ bèn, nhèn pariaq pì oh daq ep wia ka hangai mangai leq khoe lùi mahaq aroh, rìh manhài trài ùh lam tiaq bàu hnài pì ma khoe jah enh nhèn. **7** Cla pì oh daq loq dèh trong leq rađeh ma ep broq đòeq hu tiaq dua nhèn, majah qmang aih jò nhèn oe ti pì nhèn ùh i oe dech, **8** qnhòq hmaq acaq dech da cabô cleq, mahaq dahì damang nhèn abroq xalep, đòeq ùh hìaq broq kan trap qmòe ka cabô taqne pì oh daq. **9** Aih ùh xài nhèn ùh i cwìang aih, mahaq nhèn enh broq dua ka oh daq hnoq, đòeq oh daq tiaq dua nhèn. **10** Jò nhèn oe ti pì oh daq nhèn khoe doe ka pì: Mangai leq ùh abroq, aih apaq acaq. **11** Majah qmang aih nhèn hìa, taqne pì oh daq i mangai aroh, ùh dùh qmòe ka abroq, toq ti halang chaq yiniq da wì qnoeq. **12** Canòm yiniq Chuaq Jesus Christ, nhèn thê rai pariaq mangai aih ep oe ma hatinh haq, chaq abroq đòeq hu jah acaq dèh dahlwèq enh cla broq loh. **13** Mahaq pì oh daq apaq tagah lep ka broq trong lem. **14** Tàng loq i mangai leq ùh iu tiaq bàu nhèn achìh ta jàiq kô, aih pì hmàng oq! Apaq taqmùt ti wì aih, dôq wì haq loq hmàng ka camaih. **15** Mahaq apaq ngan wì aih tìah ka mangai tagit, mahaq ti àu pariaq hnài wì aih qmang ka oh daq cla. **16** Manòeq kô waiq Chuaq da kan catèm, am ka oh daq kan catèm rìm hì, rìm trong! Waiq Chuaq oe dìq döng ti pì oh daq. **17** Au kô Phaulô, tì kòng cla au ma achìh bàu hmàih kô ka

pì, ta rìm araq jàiq da au ma achìh, au diq achìh qmang
aih, đòeq broq teu hadro ka pì canau ka au. **18** Waiq kan
tabàih da Chuaq Jesus Christ bèn oe ti oh daq!

I TIMÔTHÊ

1 Phau lô, iu tiaq bàu Boc Plinh aih Chuaq da bèn thê, xam Chua Jesus Christ aih kan tangèh da bèn, broq mangai Tiaq cla da Chuaq Jesus Christ, **2** achìh am ka Timôthê, aih joq kon da au oe ta manoh lùi: waiq ka kon jah kan tabàih dech, kan tamèt hloe xam kan catèm loh enh Boc Plinh, Baq da bèn hloe xam enh nòe Chuaq Jesus Christ, Chuaq da bèn. **3** Manòeq kô au bahmàng hlài bàu au ma khoe pariaq kon, jò au ma lam tagùng Maxêdoan, kon ep oe hlài ta Êphêsô, đòeq hu doe ka bài mangai tau apaq hnài ònh trong ma qnoeq, **4** apaq tamàng dèh ka bàu qmon lìq làn xam bàu taþoe caxy noe ùh qnì lùch, aih raq bài yiniq loq loh kan tarahen, ùh lòm wiang broq ka trong Boc Plinh thê jah tapèch, aih la trong jah broq gêh xi manoh lùi. **5** Nen kon majah ep hnài aih taiq kan loq waq loh enh kan hliang hreo, enh manoh lem xam manoh lùi joq qnàng. **6** I toq biaq ngai khoe caðac nen aih, ti tangèa chaq ònh bàu ùh loh qmòe ranenh; **7** wì haq enh broq mangai hnài ranenh mahaq ùh qnì qmòe raðeh qnang capoch cleq hadai ùh loq ma joq qnàng aih raðeh kô aih qnang lùi trong leq. **8** Mahaq bèn loq ranenh aih dìq lem tàng mangai leq broq ma troq, **9** bèn hadai loq ranenh aih ùh xài đòeq ka mangai taq atoq, mahaq đòeq ka bài mangai ùh broq tiaq ranenh, ka mangai enh tablêq, majah qmang aih bài mangai ùh lùi, broq yiniq lui, mangai ùh hadròeh, capoch qmèq ka Chuaq mangai jêh đac deh miq baq, mangai jêh mangai, **10** majah qmang aih bài mangai loq tango, mangai hatiaq hadai kon calô, mangai tech dìc, mangai loq amòng, loq

ti capoch haño xam rìm yiniq pagau ka trong lem. **11**
Aih raq bài bàic da Bầu lem ranhòm enh Boc Plinh xôq
ramot hnài, bài yiniq aih haq khoe jao ka au đòeq hu
hnài hlài. **12** Au manè apôi Jesus Christ aih Chuaq da
bèn aih Mangai khoe tam padren ka au, haq khoe hnoq
au kô dìq ka manoh ka haq, dèch au jah broq mangai
patih; **13** yac ka enh adroe kô nèh au mangai capoch
ùh hòq ka Boc Plinh, loq ti rùp, loq ngang dù, mahaq
haq khoe loq waq ka au majah qmang aih au broq bài
yiniq aih jò au oe raq blùng qnhòq i manoh lùi. **14** Kan
tabàih dech da Chuaq bèn khoe bình halùih enh dalam ka
au, xam manoh lùi xam kan loq waq oe ta dalam Chuaq
Jesus Christ. **15** Chuaq Jesus Christ khoe trùh ta crõng
taneh đòeq hu dèch mangai pòq yiniq lui, aih raq bàu joq
qnàng, khòh yōc manoh gēh geo hu lùi, oe ta qne wì aih
au kô gào. **16** Mahaq taiq aih raq dài au khoe jah kan loq
waq, dôq Chuaq Jesus Christ jah mahnu dèh kan loq kèm
da haq enh dalam ka au, aih mangai ma bàc yiniq lui yeo
hnau dōng ka mangai qnoeq, yōc au đòeq broq dua ka bài
mangai lùi haq hujah kan rìh halinh mòeq đòe. (**aiōnios**
g166) **17** Waiq kan rahù ranhòm hlài dìq ta Bùa ma halinh
mòeq đòe, ùh raliang hnhung, ùh xau hnoq aih Boc Plinh
i mòeq raq! Amen. (**aiōn g165**) **18** Timôthê, kon da au, au am
ka kon bàu pariaq hnài kô, tiaq bài bàu pajàu ma khoe
anoe trùh kon, aih kon ep canòm ka bài bàu aih đòeq hu
tajêh ka geo gua, **19** wèq dèh kan lùi xam manoh cliac
lem. Bài mangai ma khoe cađac manoh cliac aih, manoh
lùi da wì haq khoe cram: **20** ta aih i Himê-nê, xam Alec-

sandō, au khoe phùq ka kiac Satan, dôq wì haq jah hōc
đòeq pi hìaq capoch ùh hòq hòm.

2 Qmang aih, adroe dìq dōng ka rìm yiniq qnoeq au tanap ka kon ep dìq jaq waiq khàn, waiq khàn am ka rìm ngai, manè apôi Boc Plình am ka rìm ngai, **2** am ka bài bùa, am ka dìq dōng mangai i cwìang, đòeq bèn hujah rìh ka catèm, ka hatinh tiaq trong iu yùq ka Chuaq ta kan hadòreh. **3** Aih raq kan lem troq ka manoh Boc Plình, aih Chuaq dèch bèn. **4** Haq enh ka rìm ngai jah dèch rai jah loq ka bàu joq qnàng. **5** Majah qmang aih i mòeq Boc Plình xam mòeq Ngai ma taqne raq, oe ta adreo Boc Plình xam kon mangai, aih raq Chuaq Jesus Christ, aih la mangai, **6** Haq khoe phùq chac cla haq broq maneh hu baxon yōc hlài rìm ngai. Aih đòeq hu patô hnoq Boc Plình enh ka rìm ngai dìq jah dèch. **7** (Au anoe joq qnàng, ùh qnùt) qmang aih raq dài au ma khoe jah dì đòeq broq mangai hnài, broq mangai Tiaq cla am ka mangai diac wì đòeq hu hnài wì haq loq trong manoh lùi xam bàu joq qnàng. **8** Qmang aih, au ngèh ka gucadrì oe rìm nòe dèch tì hadròeh đòeq waiq khàn, ùh dùh nòeh, ùh dùh talech. **9** Au hadai enh dìq ka gucadrì caxùnh atàc ma laq alàng haq, anì qnang lem bu hatroq tiaq ka cla rađeh, ùh dùh broq hrìn xàc, asràng wang, ngõc, apaq caxùnh cwàn eo canaq bac. **10** Mahaq broq trong lem, dôq hatroq tiaq qmang ka mangai gucadrì ma doe đeh kô loq iu yùq ka Chuaq. **11** Gucadrì ep oe hatinh tamàng hnài, èh hòm ep loq iu tiaq rìm trong. **12** Au ùh lòh mangai gucadrì hnài, hadai ùh jah i cwìang enh qnhèq ka gucalô, mahaq haq ep oe hatinh **13** Majah qmang aih Adam mangai jah

broq loh adroe, khoe aih men trùh Êva. **14** Èh hòm ùh xài Adam ma bìq padô qnùt adroe, mahaq gucadri ma bìq padô qnùt ma tacro ta yiniq lui. **15** Mahaq gucadri jah dèch jò haq ha-uang kon – waq toq haq loq wèq rađeh cajap ta manoh lùi, ta kan loq waq, xam ta kan hadròeh.

3 Tàng i cabô enh ngèh ka jah broq mangai wèq Tagop, enh qmang aih lem joq qnàng. **2** Qmang aih mangai wèq Tagop ep geo ùh i qmoè ka nòe hu cwò, haq aih ống mòeq ngai mai raq, loq wèq rađeh, i kan rabiaq, i kan tajì, loq đìh tamoe loq ti hnài. **3** Ùh dùh ònh ka alac, hadai apaq ngang dù, mahaq ep khun khauq, èh hadai ùh ònh trong hliac jèn; **4** ep rabiaq ka wèq dèh ta hnim cla, wèq dèh wì kon loq iu rai rìh gêh geo jang lem; **5** majah qmang aih tàng i mangai ùh qnì wèq dèh hnim cla, aih èh broq qmang leq ma loq wèq Tagop Hadròeh da Boc Plình? **6** Mangai neo lùi, ùh jah broq mangai wèq Tagop, majah qmang aih haq loq hnhè rađeh èh taclìh ta kan hadrah qmang ka kiac jròng. **7** Mangai wèq Tagop hadai waq ka i bàu wì enh gùng wiang capoch lem ka haq, aih èh haq ùh hìaq ep camaih xep, ùh hìaq hlech rajoiq kiac jròng **8** Bì mangai patih hadai ep gêh geo, ùh capoch baiq bàu, ùh jah ònh ka alac, ùh jah plai ka kùng hang ma ùh troq trong, **9** mahaq ep yđc manoh cliac hliang lem wèq tiaq kan joq qnàng da manoh lùi. **10** Bì wì aih hadai ep jah qnhro adroe ðeq, tàng geo pi ka nòe cwò aih èh men wìa broq mangai patih. **11** Cadrì da mangai patih hadai ep laq alàng, ùh khòh loq capoch qmèq, hadai loq ràih bàu capoch, yac ka trong leq dua đìq dèh ka manoh. **12** Bì mangai patih hadai broq ống mòeq ngai mai raq,

loq wèq dèh wì kon xam hnim cla. **13** Mangai leq rabiaq geo trong đeh ma patìh jah wì manè iu xam kan hagau manoh lùi enh dalam ka Chuaq Jesus Christ. **14** Au ngèh ka jah rênh trùh hmàih ta kon mahaq au achìh jàiq kô, **15** yùq au loq xòe trùh aih dôq kon hu loq đeh ep broq qmang leq oe ta hnim Boc Plình, aih la Tagop Hadròeh da Boc Plình rìh halinh, aih raq jrang xam nòe cachàt da bàu joq qnàng. **16** Rìm ngai doe kan halac da manoh lùi aih kèn joq qnàng: Haq khoe jah paqnoh ta xech akia, Khoe jah Yiang Hadròeh creo ka haq mangai taq atoq, Jah bình plình ngan hnoq, Jah anoe ka mangai rìm diac, Jah dìq ka phù cròng canòm lùi, Jah dèch atoč ta kan ranhòm.

4 Yiang Hadròeh anoe hloh, taqnhòng atiq èh, i bài mangai cađac manoh lùi đòeq cadàu tiaq bài kiac qnùt xam trong da kiac dù, **2** lam hwang tiaq kan patìah toq enh gùng da thài paqnùt, mahaq aih la bài mangai khoe tagôi ta manoh cliac, **3** wì haq ùh lòh trong yốc ống mai, thê dênh ka acaq bài dahwèq Boc Plình ma khoe broq am ka mangai i manoh lùi, mangai loq ka bàutrong joq qnàng, loq manè apôi đòeq hu acaq. **4** Rìm yiniq Boc Plình broq loh aih dìq lem, ùh i cleq ma ep cađac, waq toq bèn acaq xi manoh manè apôi; **5** majah qmang aih canòm ka bàu Boc Plình xam bàu waiq khàn dahwèq aih majah loh ka hadròeh. **6** Kon anoe hnài ka wì oh daq loq trong aih, broq qmang aih kon men joq qnàng wìa mangai patìh hnhoh lem da Chuaq Jesus Christ, jah ban xi bàu joq qnàng da manoh lùi xam trong lem kon ma tiaq hòc enh nèh. **7** Bài bàu capoch talìq talàn tìah ka bàu bài yaq craq ti poch hwang, aih cađac, ti axràm ka

rađeh trong loq iu yùq. **8** Majah qmang aih axràm wèq dèh chac hamac ùh i jah taq atam cleq pang leq, mahaq trong loq iu yùq aih jah lòeq rìm trong, majah qmang aih khoe i bàu tèu đòeq taqnhòng kô hloe xam taqnhòng atìq hòm. **9** Aih la bàu cajap joq qnàng, khòh dìq ka manoh lùi hu rùp yōc. **10** Aih ìq dài bèn majah ep xalep hu blah yōc, taiq bèn khoe đòeq dèh mannoh lùi ta dalam Boc Plình rìh halinh, haq aih Chuaq dèch da rìm ngai, yiloe hòm, ka mangai ma lùi. **11** Aih bài trong kon ma ep anoe hnài. **12** Apaq dôq wì jù đac kon oe raq qyoh neo, mahaq ep yōc bàu capoch, yiniq broq, kan loq waq, manoh lùi xam kan hliang lem đòeq broq dua ka mangai lùi. **13** Panim ka ngan hset, ka pariaq, ti hnài trùh hì au trùh taqmat. **14** Apaq hèt kan tabàih dech khoe am ka kon, aih kan tabàih kon ma khoe jah tiaq bàu pajàu jò wì gucraq Tagop Hadròeh yōc tì roh ta chac kon hu waiq khàn. **15** Ep panim ti ngan wèq bài trong aih, dôq dìq phù cròng jah hnoq kon, đòeq wì hnoq kon rai èh rai yòng kàn. **16** Wèq rađeh hloe xam bài bàu kon hnài ma jaq cajoq, rìm trong apaq tagah lep manoh, broq qmang aih xam cla kon hloe xam mangai tamàng kon dìq jah dèch.

5 Apaq capoch grèh ka mangai craq, mahaq ep alòng hnài tìah dèh ka baq, ti gu qyoh aih tìah ka oh daq, **2** gucadrì bac hanam aih tìah dèh ka miq, gucadrì adrùh tìah dèh ka oh daq cadrì, manoh ep qngah hliang joq qnàng. **3** Ep loq ta-iu mangai gucadrì hadrô craq ma hadrô đeh joq qnàng. **4** Mahaq tàng mangai cadrì craq hadrô aih i kon xau, adroe dìq dōng wì aih ep loq i manoh broq trong lem dèh ka mangai ta hnim cla, i manoh broq trong lem dèh

ka miq baq yaq boc, majah qmang aih trong aih lem ka manoh Boc Plình. **5** Mangai hadrô ma nan đeh joq qnàng, rìh đeh mòeq ngai, haq khoe dìq ka manoh canòm toq ka Boc Plình, dahì damang cajap manoh waiq khàn creo dang. **6** Mahaq da mangai hadrô ma oe raq ònh ka rìh tiaq trong bùi hyòq ta qnhòng kô, ma aih yac oe rìh tìah gleq khoe cachìt. **7** Ep anoe bahmàng hlài bài trong aih, dôq wì gêh geo pi i qmòe ajang leq hu cwò. **8** Tàng cabô ùh qnì hanò dèh ka hadròng hadrech, yeo hnau ka aih hòm, ùh hanò qmòe dèh mangai ta hnim cla, aih mangai khoe cađac deh manoh lùi, yeo qmèq hnau ka mangai ma qnhòq lùi. **9** Đòeq hu jah achìh qmùt yiniq ta hset mangai craq hadrô, mangai cadrì ep jah tadràu jàt hanam, enh nèh dua mòeq ngai ống raq, **10** èh waq ka i bàu wì manè bài trong lem haq ma khoe broq: qmang ka khoe rabiaq ka ban kon, loq đìh tamoe ùh, qnheo jènh bài mangai ma tiaq Chuaq, loq hanò ka mangai pa ma hamoq đeh, rai broq bàc trong lem qnoeq hòm. **11** Mahaq apaq achìh qmùt yiniq mangai hadrô ma oe raq qyoh hanam, majah qmang aih jò chac hamac wì troq hyòq, loq qnung wì hangai ka Chuaq, wì loh ka enh yōc ống, **12** cađac dèh bàu ma adroe, taqmòq yōc ka rađeh kan tah hadrah. **13** Majah qmang aih, taiq wì haq hmòt oe ùh i ka yiniq toq ti lam ha-ìa enh hnim kô trùh hnim tau, ma xài toq oe pagôq dech, wì haq toq ti bàc bàu lìq làn enh toq anoe trùh trong ma ùh khòh. **14** Qmang aih au enh thê bài gucadri hadrô oe raq qyoh hanam yōc ống, ha-uang kon, wèq ngan deh ta hnim cla, dôq ùh hìaq broq nen ka mangai ma tagit jah nòe hu tapoch qmèq. **15** Majah qmang aih

khoe i qnah ngai cadrì hadrô tawìh tiaq Satan. **16** Tàng cabô leq i mangai cadrì craq hadrô oe deh ta hnim, aih èh ep wèq ban haq, đòeq ùh hìaq ep ka Tagop Hadròeh, dôq Tagop Hadroèh jah wèq ban toq mangai ma hadrô đeh joq qnàng. **17** Bài wì craq ma rabiaq ka wèq Tagop Hadròeh aih bèn ep loq iu camaih ka wì haq yeo bac, mangai ma anoe hnài bàu Chuaq aih kiang yeo bac hòm. **18** Majah qmang aih Hset Hadròeh i achìh rameh: ìh apaq srôp mung bo qnang len qmau, èh hòm mangai ma patìh aih troq ka jah kùng baha. **19** Apaq dì jàiq ma achìh đòeq hu tah hadrah ka mòeq ngai gucraq leq tàng joq ùh i ka baiq piq ngai panhìn. **20** Mangai ma broq yiniq lui, ep cwò lech ka haq haq enh ngèa bac ngai, đòeq broq ka wì qnoeq hu loq yùq. **21** Enh ngèa Boc Plình, enh ngèa Chuaq Jesus Christ xam enh ngèa bình plình jah ràih, au thê kon ep wèq bòe bàu hnài kô, yac ka broq cleq dua apaq gen kan, paq loq waq ka apah. **22** Apaq rênh roh tì enh qnhèq ka cabô, apaq wiang poh ta yiniq lui cabô, ep wèq rađeh jah hliang lem. **23** Apaq ôq toq diac dech, mahaq ep ôq toq biaq alac, majah qmang aih gòu padùc kon ùh nèn, kon xan loq xa ka oe. **24** I ngai aih yiniq lui haq rênh jah paqnoh qmòe adroe ka hì haq ma ep chìuq kan hadrah, i qnah ngai atìq ka hadrah aih men hnoq. **25** Bài yiniq broq lem hanoh qmang aih: i qnah jah paqnoh qmòe, i mòeq qnah aih ùh paqnoh qmòe, mahaq atìq èh yac ka cadoc dua ùh hlèp.

6 Dìq dòng mangai broq đeh hapõng ep loq hèm ka camaih iu dèh ka wì craq rìm trong, dôq yiniq Boc Plình xam bàu nhèn ma hnài ùh hìaq i cabô jah capoch racaih.

2 Cabô ma i cla craq tiaq Chuaq, aih apaq yōc nen hadai
oh daq đòeq ùh iu camaih ka haq, mahaq kiang ep patih
yeo bac hòm, majah qmang aih mangai ma jah da bèn
padren aih mangai tiaq Chuaq, mangai ten tia ka bèn. Aih
trong kon ma ep pariaq hnài wì. 3 Tàng loq i mangai hnài
trong qnoeq, ùh tiaq bàu da Chuq Jeus Christ bèn ma
hnài, aih bàu hnài dôq bèn loq iu yùq ka Boc Plinh. 4
Mangai aih dèch catèh rađeh, ùh i qnì cleq, mahaq haq
khoe dòeh enh toq tarahen, toq ti goh bàu capoch, dài
aih majah loh kan tagit, tajênh, capoch patah, hèm qmèq
ka dabau, 5 xam bài bàu tarahen ùh loh qmòe cleq da bài
mangai i manoh qmèq, ùh dùh đeh ka i kan joq qnàng,
wì ngan trong iu yùq ka Chuaq aih bu dàng trong chaq
acaq diq. 6 Mahaq kan iu yùq xam manoh lem bùi, aih
raq hang kàn. 7 Majah qmang aih bèn cìlh enh cliac ùh i
wê cleq, bèn cachìt hadai ùh jah aràng cleq. 8 Qmang
aih waq toq bu lap ka acaq, lap ka atàc, aih ep lem bùi
manoh, 9 da mangai ma enh toq ka padrōng kan, ùh
khoe ka taclìh ta kan padô qnùt, hlech rajôiq, cro ta kan
plai daiq ùh troq qmòe trong, aih raq bài yiniq broq ka
kon mangai cram ta kan lùng pac cachìt lùch. 10 Majah
qmang aih kan plai ka bac jèn aih raq tagùq riah plôh loh
bài trong dù, i ngai cadàu tiaq bac jèn dài majah loh ka
cadac dèh manoh lùi, taqmòq yōc ka rađeh kan xalep
mangò. 11 Mahaq kon, aih mangai da Boc Plinh, drah wia
bài trong aih, đòeq chaq trong taq atoq, iu yùq, manoh
lùi, loq waq, loq kèm, kan laq alàng. 12 Yōc manoh lùi hu
tablêq qmòe ka lem, carùp yōc kan rìh halinh mòeq đòe,
aih raq dài kon ma khoe jah creo, dài kon majah khoe

paqnoh dèh chiac enh ngeà bac ngai wiang hnoq. (aiōnios g166) 13 Enh ngeà ka Boc Plinh aih Mangai am kan rìh ka rìm yiniq, xam enh ngèa Chuaq Jesus Christ aih Mangai jah i bàu lem ajang Bônso-Philat, au pariaq kon, 14 ep wèq tiaq ranenh kô, acaq oe apaq loh xít habau, dôq pi i qmòe ajang leq hu cwò, gòm hì Chuaq Jesus Christ da bèn trùh, 15 Haq trùh wop troq dèh jò Boc Plinh ma khoe qnac đòeq, Boc Plinh aih Cla Craq xôq ramot, i mòeq raq, aih Bùa enh qnhèq ka rìm bùa, Craq enh qnhèq rìm craq. 16 Mòeq ngai haq raq ma ùh cachìt, oe ta kan qngah ùh jah thia haten, qnhòq i cabô hmaq hnoq haq, hadai ùh i mangai leq jah hnoq haq, kan ranhòm kan itai mòeq đòe oe dìq ta haq! Amen. (aiōnios g166) 17 Drah hnài bài mangai ma kan padrōng ta qnhòng kô, apaq loq dèch rađeh, èh hadai paq i manoh canòm ka kùng hang ùh cajap, mahaq canòm ka Boc Plinh, aih Mangai ma rìm hì am ka bèn jah dahuwèq ùh dìq ùh dài. (aiōn g165) 18 Hnài thê wì haq broq trong lem, broq ma bac yiniq lem, loq axong dahuwèq đeh ma i, 19 qmang aih wì haq chàu đòeq ka rađeh mòeq hapom hang canaq lem, broq đòeq ka rađeh nòe cachàt hagau haginh bla èh, đòeq jah kan rìh joq qnàng. 20 Timôthê, kon ep wèq rìm yiniq au ma khoe thê kon, wia ma hangai ka bài bàu taphò taphuàng, bàu tarahen broq đeh lech loq mahaq ùh loq cleq. 21 Taiq enh axràm bài bàu aih, dài majah i mangai cađac dèh manoh lùi. Waiq kan tabàih dech enh Boc Plinh oe ti oh daq.

II TIMÔTHÊ

1 Au kô Phaulô, tiaq manoh Boc Plình thê broq mangai
Tiaq cla da Chuaq Jesus Christ, đòeq hu lam anoe bàu kan
rìh ma khoe tèu am enh dalam ka Chuaq Jesus Christ,
2 achìh ka Timôthê, aih kon au ma ha-och dèh dìq jaq:
Waiq dôq kon jah kan tabàih dech, kan loq waq, kan
catèm enh Boc Plình, aih Baq, xam enh Jesus Christ aih
Chuaq da bèn. **3** Au manè apôi dèh Boc Plình au ma patìh
xi manoh hliang lem qmang ka qnhòng boc yaq au khoe
broq, xam dahì xam damang au ùh hêq ka hmàng trùh
kon jò au waiq khàn. **4** Majah qmang aih au hmàng qmòe
ka diac mat kon, enh toq lam hmàih ka kon, đòeq manoh
cliac au jah lem bùi. **5** Au hadai hmàng trùh manoh lùi
joq qnàng da kon, aih manoh lùi nèh haq khoe oe ta Lo-
it, yaq apah miq da kon xam enh dalam Ônit, aih miq da
kon, au loq manòeq kô joq qnàng haq hadai oe ta dalam
kon. **6** Taiq aih au majah pariaq kon trùt hlài bài kan
tabàih Boc Plình khoe am, kon ma khoe jah jò canòm ka
au roh tì enh qnhèq chac kon. **7** Majah qmang aih Boc
Plình ùh i am ka bèn manoh toq crè camaih ka rađeh,
mahaq am ka bèn manoh hagau haginh, kan loq waq,
kan loq bàt rađeh. **8** Qmang aih, kon apaq camaih ka ep
anoe trùh Chuaq, hadai apaq yōc nen wì khoe rùp clêh au
hu camaih, mahaq ep canòm ka cwìang itai Boc Plình
đòeq hu wiang chìuq xalep ti Bàu lem. **9** Boc Plình khoe
dèch bèn, khoe yōc kan hadròeh hu creo ka bèn, ùh xài
tiaq bài biac broq da bèn, mahaq tiaq manoh cla haq ma
khoe dì dèh, tiaq kan tabàih haq khoe am ka bèn enh
dalam ka Chuaq Jesus Christ enh calah calinh nèh raq,

(aiōnios g166) 10 trùh manðeq kô men ja paqnoh canòm ajang Jesus Christ aih Chuaq dèch bèn loh crōng taneh, haq khoe raliang đac kan cachìt, yōc Bàu lem hu aràng kan rìh xam kan ùh cachìt hòm loh taqngah. 11 Taiq Bàu lem aih au ma khoe jah dì đòeq broq mangai lam bahìa, mangai Tiaq cla, hloe xam mangai hnài, 12 aih ìq dài au majah chìuq xalep. Mahaq au ùh xep, majah qmang aih au loq đeh khoe lùi cabô, au loq đeh joq qnàng haq aih i cwìlang wèq dìq dōng rìm yiniq au ma khoe jao trùh ta hì aih. 13 Drah ep yōc manoh lùi xam kan loq waq enh dalam ka Chuaq Jesus Christ đòeq hu wèq tiaq dua bài bàu hnài joq qnàng, kon khoe jah tamàng enh au. 14 Ep canòm ka Yiang Hadròeh qnang oe enh dalam bèn đòeq wèq bài yiniq lem ma khoe jao ka kon. 15 Kon loq wì ma oe ta cròng Asia khoe cädac au, ta aih i Phigen xam Hetmôghen. 16 Waiq Chuaq tamèt ka hnìm da Ônêsi-phôro, majah qmang aih haq khoe bàc yàng alòng au, ùh hìaç camaih yac ka hnoq wì rùp kàt au. 17 Èh hòm, jò bu trùh ta Rôma, haq khoe drah chaq waq qmòe ka hnoq au. 18 Waiq Chuaq am ka haq jah hnoq kan tamèt da Chuaq ta hì aih èh! Kon loq ùh hnau ka mangai qnoeq, jò oe ta Ephêô haq aih khoe patìh ka au rìm yiniq.

2 Qmang aih, kon ep canòm kan tabàih enh dalam ka Chuaq Jesus Christ đòeq broq ka rađeh tadêh. 2 Bài yiniq cleq kon khoe tàng ajang au enh ngèa bàc ngai wiang hnoq, kon jao hlài ka bài mangai ùh ta blòq manoh cliac, hadai rabiaq ka loq hnài mangai qnoeq. 3 Drah wiang chìuq xalep ti au qmang ka mangai lình ma tanoq da Chuaq Jesus Christ. 4 Jò mangai lình lam tajêh, aih pi dôq

bài yiniq ta qnhòng kô broq ka rađeh tawac, haq broq qmang aih đòeq lem manoh mangai ma creo ka rađeh. 5 Hanoh qmang aih, mangai cadàu tacadêh tanđe cadàu, ep cadàu troq tiaq dèh ranenh aih èh men jah waq cadoh da mangai blêq. 6 Mangai abèq ruàng ep xalep adroe ðeq, men jah gat. 7 Ep hèm ma tem bàu au ma anoe ka kon, èh cla Chuaq men am ka kon kan rabiaq ta rìm yiniq. 8 Ep hmàng rameh Chuaq Jesus Christ, ha-uang loh enh nang noe bùa Đawit, khoe rìh hlài enh mangai cachìt, tiaq Bàu lem da au ma hnài. 9 Taiq Bàu lem aih dài au majah ep xalep, ra-ùng haq wì kàt au tìah qmòe ka mangai broq trong dù, mahaq bàu da Boc Plình ùh i cabô jah kàt. 10 Aih ìq dài au majah chìuq dõng rìm yiniq am ka bài mangai ma khoe jah ràih, dôq wì haq hadai jah dèch enh dalam ka Chuaq Jesus Christ hloe xam kan ranhòm mòeq đòe. (aiōnios g166) 11 Bàu kô cajap joq qnàng: “Tàng joq bèn cachìt ti haq, Aih èh bèn hadai rìh ti haq. 12 Tàng joq bèn hlàt chìuq qnhro Aih èh bèn hadai jah wèq cwiang ti haq, Tàng bèn hangah đac ka haq Aih èh Haq hadai hangah đac chau ka bèn. 13 Tàng bèn loq tablòq manoh Haq dua ùh tablòq manoh, majah qmang aih haq aclai ka rađeh ùh jah.” 14 Kô bài yiniq kon ma ep bahmàng rai hnài enh ngèa Boc Plình: ep wia ka hangai kan tarahen trong bàu capoch, trong aih ùh i jah cleq, hađo toq ka mangai ma tàng đeh. 15 Drah dìq jaq loq àu đòeq hujah lem ka manoh Boc Plình qmang ka mangai patìh lem geo, yōc manoh hnihu jang hu hnài bàu joq qnàng. 16 Mahaq ep cadac bài bàu capoch lech loq, majah qmang aih bài mangai capoch trong aih rai èh

rai pi qnì iu yùq Boc Plình, **17** bàu wì haq lênh tìah ka ra-om habau. Ta aih i Himênh xam Philêt, **18** wì khoe cadac trong joq qnàng, wì doe kan rìh hlài khoe trùh, wì haq raliang đac manoh lùi da qnah ngai qmang aih. **19** Mahaq xèm cajap da Boc Plình ma broq dèh dua oe raq ùh i tachriah, i bàu parìt qmang kô: “Chuaq loq dèh mangai da haq”, qnah hòm: “Mangai leq ma creo dang ka Chuaq, ep wia ka trong dù.” **20** Oe ta hnim kàn, ùh xài i toq bài cabi wang cabi bac, mahaq hadai i tang qnah broq xi long xi taneh, qnah aih palauq hu tah hang canaq, qnah aih palauq hu tah hang hwòt hwat. **21** Aih èh cabô loq wèq rađeh claih ka bài trong qmèq qmang aih, haq jah tìah qmang ka cabi lem, jah basròeh, i lòeq ka cla wì craq, jò leq jò meh toq padon broq yiniq lem. **22** Hadai ep wia trong mangai radam ma enh, đòeq hu ti chaq trong taq atoq, manoh lùi, loq waq, ti chaq hatroq ti bài mangai yđc manoh hliang creo dang ka Chuaq. **23** Apaq taqmùt ka bàu tarahen blùng ratùt, majah qmang aih haq loh toq kan talech. **24** Mangai hapöng da Chuaq apaq enh ka trong tajênh: mahaq ep acaq oe ma laq alàng ti rìm ngai, loq hnài, ùh hìaq loq hòn, **25** yđc kan tabat đòeq hu bàt hnài bài mangai ma enh tablêq, ngèh ka Boc Plình am ka wì haq kan loq raxach đòeq canau loq trong joq qnàng, **26** èh wì jah clang đòeq hu doeh rađeh claih ka hlàm kan kiac, majah qmang aih kiac khoe rùp padit đòeq thê wì broq tiaq manoh haq.

3 Mahaq ep loq qmang kô, oe ta hì atìq lùch kô èh i bac jò nanxa. **2** Majah qmang aih kon mangai wì loq waq toq ka rađeh, loq waq toq ka bac jènh, toq panhòm, ratauq,

capoch qmèq, ùh iu miq baq, ùh qnì manè cabô, ùh rìh tiaq manoh Boc Plình, 3 ùh ha-och, xa ka hatroq, capoch cheo, ùh loq palap, ngang dù, git ka mangai broq lem, 4 gôpla, loq nòeh, padèch toq rađeh, enh toq trong pagôq ta qnhòng kô yi hnao ka loq waq ka Boc Plình, 5 enh gùng aih broq deh wèq tiaq trong lem, yàng enh dalam aih wì cađac cwìang itai da trong lem aih. Bài mangai qmang aih kon wia ma hangai haq. 6 Ta wì aih i ngai ti achop mùt da wì ta hnim, ti padô alùan bài mangai gucadri ùh wìa cleq bài mangai ma bình bauq toq yiniq lui, bài mangai khoe dôq kan qmèq qnung rađeh, 7 yac ka hōc yôt mahaq dua ùh loq ka bàu joq qnàng. 8 Calah nèh Ja-net, xam Jambe tablêq ka Môise dàng leq, bài wì kô hadai tablêq ka bàu joq qnàng dàng aih: gàu ngoc wì haq khoe om ech, manoh lùi wì haq khoe pi dràng qnhro. 9 Mahaq wì pi broq jah tam pang leq hòm, majah qmang aih kô èh kan ratùt da wì haq rìm ngai jah hnoq dōng tìah ka da wa tau diq. 10 Mahaq da kon aih, kon khoe tiaq dua bàu au hnài, tiaq dua rìh acaq, manoh enh, manoh lùi, loq kèm, ùh tagah lep ka trong loq ha-och da au, 11 bài kan khech rùp, nanxa ma khoe trùh ka au ta Antiôt ta Ycôni ta Lit-tro. Bài kan khech rùp aih au chìuq dìq dōng mahaq Chuaq khoe dèch paclaih au yôt. 12 Ma joq qnàng aih, rìm ngai enh rìh lem alàng enh dalam ka Chuaq Jesus Christ, dìq ep glàm kan khech rùp baxa. 13 Mahaq bài mangai ngang, mangai patìah toq enh gùng kiang rai èh rai cram ta kan dù, ti qnùt mangai qnoeq èh qnùt hloe xam cla. 14 Da kon hòm, ep yòng ma cajap ta bài yiniq kon ma khoe hōc, ma khoe lùi dèh joq qnàng,

majah qmang aih kon loq đeh khoe hốc bài yiniq aih
ajang cabô, **15** qnah hòm, patep enh oe nga kon khoe loq
ka Hset Hadròeh jah broq ka kon rabiaq đòeq jah dèch
claih xi manoh lùi enh dalam ka Chuaq Jesus Christ. **16**
Dìq ka Hset Hadròeh aih dìq jah Boc Plình hi hèm qmùt, i
lòeq đòeq hu hnài, gùt bàt, ti palauq, hnài mangai trong
taq atoq. **17** Dôq mangai da Boc Plình jah geo gua, jah
padon đòeq hu broq bài yiniq lem.

4 Au yòng enh ngèa ka Boc Plình xam Chuaq Jesus Christ
aih Mangai ma hu hadrah mangai rìh xam mangai cachìt,
jò haq trùh xam diac da haq, au tanap thê kon: **2** Ep anoe
hnài bàu Chuaq, ti àu pariaq, yac ka glàm jò yac ka ùh
glàm jò, yoc manoh kèm đòeq hu gùt bàt, ti padô along,
tagàih lech, apaq hêq ka hnài. **3** Majah qmang aih i jò
wì ma ùh enh tamàng trong lem, mahaq wì enh toq ti
tamàng bàu jìang ka tàng, tiaq kan ònh dèh cla đòeq hu ti
tagop bài mangài hnài dudan ka rađeh, **4** bàng don ùh
tamàng bàu joq qnàng, mahaq ti tamàng bàu ùh i qmòe
ka rinh. **5** Mahaq kon ep loq palap rìm trong, chìuq xalep
đòeq broq bìac da mangai hnài Bàu lem, rìm yiniq kon
ma patìh kon ep broq waq ka gêh geo. **6** Majah qmang
aih au khoe ten ta-ùc broq diac lõc, hì cachìt da au trùh
khoe ten. **7** Au tajêh khoe geo, au cadàu khoe gêh, khoe
wèq dèh manoh lùi. **8** Manđeq kô cadoh da kan taq atoq
khoe taqmroq đòeq ka au, Chuaq aih mangai hadrah taq
atoq hì aih èh hi am ka au, ùh xài toq ka au hi hêq mahaq
hadai am ka bài mangai ma khoe dìq ka manoh ngèh
gòm haq trùh. **9** Drah haqnan trùh ta au ma rênhaq, **10**
majah qmang aih Đêma khoe cađac au, taiq haq ònh ka

qnhòng kô, haq khoe lam ta Têsalônica. Coretxen khoe lam ta Galati, Tit khoe lam tagùng Đamat. (aiôn g165) 11

Toq Luca raq ma oe ti au. Ajèn Mõc lam ti kon, majah qmang aih haq aih i lõeq ka au haq jah wiang patih ka au bac trong. 12 Au khoe thê Tichico tõc ta Ephêsô. 13 Jò kon trùh hmàng wê da au eo ma caxùnh enh gùng, au ma ðòeq ta hñim Cabut oe ta Trô-ach, hloe xam bài hset, ta aih bài hset broq xi akia aih yeo nhet. 14 Alecxando, thòq đùng, haq aih ti broq habo ka au bac joq qnàng, mahaq tiaq tang yiniq haq khoe broq, i Chuaq patem hlài da haq. 15 Kon hadai ep hmàng hamang ngan haq aih, majah qmang aih mangai aih dìq cajaq enh tablêq ka bèn. 16 Jò au capoch cwaih rađeh yàng ma adroe, ùh i mangai leq wiang ti au, wì cađac dõng au. Waiq bài yiniq lui aih apaq ta-ùc ka wì haq! 17 Mahaq Chuaq khoe yòng ti au rai tah tam ka au padren, ðòeq canòm ajang aih raq Bäu lem hu jah anoe ka gêh ðòeq mangai diac wì dìq jah tàng, au hadai khoe jah claih enh kiang baco. 18 Chuaq hadai jah doeh au claih ka trong dù rai dèch au tõc ta diac plinh da haq. Waiq kan ranhòm hlài dìq ta Chuaq mòeq ðòe ùh lùch! Amen. (aiôn g165) 19 Au tanap bàu hangah hmàih ka Bôrica xam Aquila, hloe xam bài mangai oe ta hñim Ônêsiphôra. 20 Êrat haq oe hlài Côrintô, Trôphim qnang ùh hrõc au dôq haq oe ta hlài ta Milê. 21 Kon àu dìq qmòe cajaq ðòeq jah trùh tacô adroe ka ralim oq! Ôbulu, Buđen, Linut, Claudiá xam oh daq dìq tanap bàu hmàih trùh kon. 22 Waiq Chuaq oe ti mahua yiang kon! Waiq kan tabàih oe dìq ti oh daq!

TIT

1 Au kô Phaulô, hapõng da Boc Plinh, broq mangai Tiaq cla da Chuaq Jesus Christ, hu qnung bài mangai Boc Plinh ma khoe raih, đõeq wì haq i manoh lùi rai loq bàu joq qnàng, aih trong ajèn wì trùh ta kan loq iu yùq, **2** hu tangèh gồm kan rìh halinh, aih kan rìh da Boc Plinh Mangai ma ùh jò leq capoch qnùt, khoe tèu am enh qnhòng calah baxèm. (aiōnios g166) **3** Trùh jò ma khoe pajaq, Boc Plinh qnol dèh bàu loh ta qngah ajang bàu hnài aih la bìac ma khoe jao am ka au tiaq bàu thê da Boc Plinh aih Chuaq dèch bèn. **4** Au achìh jàiq kô ka Tit, aih joq kon da au oe ta manoh lùi pajùm: waiq kan tabàih xam kan catèm trùh enh Boc Plinh, aih Baq, xam enh Jesus Christ, aih Chuaq dèch bèn. **5** Au đõeq kon oe ta Coret, đõeq hu palauq hlài bài yiniq ma qnhòq jah taqmroq, tiaq bài bàu au khoe hnài kon đõeq dèch paqnàng bài gucraq ta rìm phôq. **6** Rìm ngai gucraq ep geo ùh i qmòe ajang leq hu cwò, aih ǒng da mòeq ngai mai raq, wì kon haq ep lùi Chuaq, ùh i cabô trùh doe wì haq rìh ùh lem, ùh iu. **7** Majah qmang aih, mangai wèq oh daq aih mangai wèq ta hñim Boc Plinh haq ep ùh i qmòe ajang leq hu cwò. Ùh khòh catèh, nòeh, bù bia, ngang dù, ònh ka bac jènh, **8** mahaq ep panim ka đìh tamoe, broq bua ti mangai khun khauq, rabiaq, taq atoq, hadròeh, i kan amàn, **9** Haq wèq cajap yôt trong joq qnàng qmang ka haq khoe jah tamàng, đõeq haq jah boe tiaq trong lem đõeq hu pariaq alòng mangai qnoeq rai loq hatèu hlài bài mangai ma enh tablêq. **10** Majah qmang aih i bac ngai, ta aih ma yi hlòm aih bài mangai ma tiaq ranenh kat

akia, wì haq ùh waq iu, ja capoch lìq làn rai toq ti padô qnùt, troq ka ep bàng đac hacùng wì haq aih. **11** Pàng wì haq daiq toq ka trong bac jènh dài majah hnài trong ùh khòh hnài, ti raliang đac hnim mangai qnoeq. **12** Taqne wì aih i mòeq ngai, haq aih mangai pajàu da wì aih, doe rameh: Mangai Coret loq amòng, aih bài tìah ka ngè plai toq ka acaq mahaq aroh. **13** Bàu anoe aih troq. Qmang aih ep lech ka wì haq ja cajoq, dôq wì haq jah i manoh lùi ma joq qnàng, **14** apaq tamàng dèh bàu ùh i xèm goe da mangai Juđa, xam ranenh da bài mangai ma ùh waq tiaq bàu joq qnàng. **15** Rìm yiniq dìq lem hreо ka mangai lem hreо, mahaq ka bài mangai ma amùa ma ùh lùi, aih ùh i cleq ma hadròeh, majah qmang aih gòu ngoc xam manoh cliac wì haq khoe amùa. **16** Wì doe đeh loq ka Boc Plình, mahaq tiaq bìac broq aih dìq chàih cađac haq, joq jiāng toq ka git, ùh qnì iu, pi jah broq qmòe yiniq cleq ma lem.

2 Mahaq kon ep hnài trong ma hatroq tiaq trong lem. **2** Pariaq mangai craq loq amàn, rìh laq alàng, rabiaq, i manoh lùi, i manoh loq waq, loq kèm rìm trong. **3** Bài craq cadrì hanoh qmang aih, ep rìh ma hatroq tiaq kan hadròeh, apaq capoch qmèq, apaq ôq hrìn alac, ep yōc kan rabiaq đòeq hu ti hnài trong leq ma lem, **4** aih èh wì haq jah pariaq bài gucadrì oe raq qyoh hanam loq waq dèh ka ǒng ka kon, **5** loq wèq rađeh, i manoh hliang lem, loq wèq ngan bài yiniq ta hnim, acaq oe khun khauq, loq iu dèh ǒng, đòeq trong da Boc Plình ùh hìaq i mòeq nà bàu capoch qmèq. **6** Hadai ep pariaq hnài mangai radam acaq oe i kan amàn. **7** Yōc qmòe cla kon xam manoh hnhoh jang, laq alàng đòeq broq dua lem ka wì, **8**

capoch bàu loq hèm, dôq ùh hìaq i ajang leq hu cwò, đòeq mangai ma tagit ka bèn loh ka xep, dôq wì ùh jah capoch qmèq qmòe ka bèn yac ka trong leq. **9** Hnài bài mangai broq hapõng ep iu dèh cla craq, rìm yiniq ep broq lem manoh wì craq, apaq rahen, **10** apaq atùng da wì cleq, mahaq ep paqnoh yôt đeh kô dìq ka manoh jang lem, đòeq broq ka qngah trong da Boc Plinh, aih dèch Chuaq da bèn, oe ta rìm trong. **11** Majah qmang aih, kan tabàih da Boc Plinh đòeq dèch rìm ngai khoe jah trùh. **12** Kan tabàih aih hnài bèn ep loq cađac trong ùh iu yùq ka Boc Plinh xam trong crõng taneh kô ma ònh, rìh taqnhòng kô ep loq wèq rađeh, taq atoq, loq hanò, (aiōn g165) **13** jò qnang tangèh gồm xôq ramot da bèn xam kan ranhòm da Boc Plinh haqhèq xam Dèch Chuaq da bèn aih Chuaq Jesus Chirst trùh. **14** Haq aih Mangai khoe cađac rađeh đòeq baxon ahlài bèn claih enh yiniq lui rai broq ka bèn jah hreо, yōc bèn hu broq moeq nang noe crài da haq, aih nang noe i manoh nhet ka broq trong lem. **15** Drah hnài bài yiniq aih, yōc dìq dèh ka cwìang đòeq pariaq, tagàih. Apaq cađac cabô jù halê kon.

3 Ep bahnàng ka bài oh daq ep iu bài mangai i cwìang, mangai broq gàu, ep tamàng bàu wì aih, yac ka jò leq dua padon rađeh đòeq hu broq trong lem, **2** apaq capoch qmèq ka cabô, apaq tajênh, ùh taqmrua, ep i manoh laq alàng ka rìm ngai, **3** Majah qmang aih, enh nèh bèn hadai blùng, ùh qnì iu, cađac wì qnùt đac rađeh, broq dìc ka bàc trong đeh ma enh, rìh tiaq kan dù, tajì ka wì ma git, yac ka cla bèn hanoh tagit ka dabau. **4** Mahaq pang jò kan laq alàng da Boc Plinh, aih dèch Chuaq bèn xam kan

loq ha-och da haq, khoe jah paqnoh am ka bèn, aih haq
hi dèch bèn, 5 ùh xài tiaq kan taq atoq cla bèn khoe broq,
mahaq tiaq deh kan loq waq da haq. Haq dèch bèn ajang
kan qnheo hreо rai ha-uang hlài bèn, paneo hlài bèn xi
Yiang Hadròeh 6 Haq ma khoe ùc qnoph ka bèn ùh dìq ùh
dài, xam Jesus Christ, aih Dèch Chuaq da bèn; 7 đòeq
bèn canòm kan tabàih haq đòeq hujah broq mangai taq
atoq, wìa kon hatia hu wiang jah tangèh kan rìh halinh
mòeq đòe. (aiōnios g166) 8 Bàu kô joq qnàng, au enh kon
anoe parit yiniq kô, đòeq bài mangai ma khoe lùi Boc
Plinh panim ka broq lem. Bài yiniq kô dìq lem rai jah
lòeq ka rìm ngai. 9 Mahaq ep wia ka hangai kan tarahen
blùng ratùt, kan taboe nang noe, tarahen trong ranenh,
majah qmang aih bài yiniq aih dìq lùch lùa ùh i jah cleq.
10 Jò bèn khoe cwò ka mangai ma broq kan talah jah
mòeq yàng baiq yàng, khoe ka aih chaq wia ka hangai, 11
bèn loq bài mangai qmang aih khoe pi hnhoh jang, broq
toq yiniq lui, cla taqmòq ka rađeh kan hadrah. 12 Trùh
jò au thê Atêma tàng ùh meh Tichicô lam ta kon, kon
haqnan ka tòc tagùng Nicôbôli ti au, majah qmang aih au
khoe ùac ka oe ta aih clech ka ralim. 13 Drah ti àu padon
palauq ka Xêma aih mangai hnài ranenh xam Aôlô,
apaq đòeq wa aih nan ka dahuwèq cleq jò wa aih loh lam.
14 Mangai tiaq trong da bèn ep dìq ka manoh hòc broq
trong lem, đòeq wiang tabàih am ka mangai qnoeq jò wì
nan đeh, đòeq wì ùh hìaq rìh mahaq ùh loh plì. 15 Dìq
dõng wì ma oe ti au tanap bàu hmàih trùh kon. Bòch
hmàih bài mangai ma loq waq ka bèn ta manoh lùi. Waiq
kan tabàih oe ti oh daq!

PHILÊMÔN

1 Phaulô mangai tù da Chuaq Jesus Christ, xam Timôthê, oh daq bèn achìh ka Philêmôn, mangai bua ma haten hatià, mangai ma hadai abroq dèh mòeq qmang ti bèn, **2** hloe ka Apbi, aih mangai oh daq cadrì da bèn, Achip aih mangai bua da bèn ma hadai wiang tajêh, xam ka Tagop Hadròeh ma tagop ta hñim ìh: **3** waiq dôq ìh jah kan tabàih xam kan catèm enh Boc Plình, aih Baq da bèn, hloe xam enh nòe Chuaq Jesus Christ! **4** Au xan manè apôi yôt dèh Boc Plình, jò au hmàng trùh ìh tabàu waiq khàn, **5** majah qmang aih au hìa tàng manoh lùi xam kan ìh loq waq ka bài mangai hadròeh. **6** Au waiq khàn dôq ìh jah pajùm manoh lùi ti nhèn đòeq broq ka ìh jah loq tam yeo bac hòm bài xôq ramot enh dalam ka Chuaq Jesus Christ. **7** Kan loq waq ìh khoe broq ka au jah lem bùi kàn xam kan alòng, majah qmang aih canòm ka ìh, manoh bài mangai hadròeh da Chuaq khoe jah blinh hlài. **8** Qmang aih enh dalam ka Christ, yac ka au i cwiang thê ìh broq trong ìh ma ep broq, **9** mahaq jao kan loq waq da ìh dài au majah enh cali calo ka ìh, broq qmang aih ma yeo lem Au kô Phaulô, khoe craq, yàng manòeq kô taiq Chuaq Jesus Christ loh tam ka oe tù hòm, **10** au cali calo deh ka kon aih Ônêsim, mangai khoe wìa kon au jò au oe qne rawiang caxi datoeq; **11** enh nèh, haq ùh i lòeq cleq ka ìh, yàng manòeq kô lòeq ka ìh bac trong lòeq hloe xam ka au: au thê haq hlài ta ìh, **12** haq tìah ka cliac clèm au diq. **13** Au enh padràng haq oe hlài tacô ti au, đòeq hu blòh ìh patìh ka au jò au qnang oe taqne rawiang caxi datoeq taiq Bàu lem. **14** Mahaq au ùh enh broq qmòe

yac ka yiniq cleq jò qnhòq jah bàu ìh, dôq trong lem ìh
ma broq aih ùh xài taiq kan panan, mahaq dìq loh enh
manoh hnhol jang. **15** Canau haq khoe talah ðò ka ìh toq
biaq ðòeq ìh jah hlài haq hloe hloe, (aiōnios g166) **16** pi hìaq
ngan haq qmang ka hapōng dìc hòm, mahaq ngan haq
ùh hnau ka hapōng dìc, tìah ka oh daq ma haten hatìa,
ma yeo loe aih haten hatìa ka au, loq ka ìh aih kiang ma
yeo hnau, enh chac hamac trùh enh dalam ka Chuaq. **17**
Qmang aih tàng joq ìh ngan au tìah dèh ka bua ìh, ìh ðìh
yōc haq tìah ka cla au diq. **18** Tàng joq haq i broq cleq
habo ka ìh, i pòq dòeh ìh cleq, ìh taqmòq dōng ka au
beq. **19** Au kô Phaulô, tì kōng cla au achìh ka ìh bàu kô: I
au caqnaih da ìh da ìh hòm ìh pòq dòeh au qmòe chac
cla ìh raq, mahaq ma aih ùh ràu dèh. **20** Joq ê daq, au
toq tangèh jah kan lem bùi kô ajang ìh oe enh dalam ka
Chuaq, enh dalam ka Christ ìh drah broq ka au jah tìah
dèh ka manoh enh beq. **21** Au achìh jàiq kô ka ìh, au khoe
lùi joq ìh loq iu bàu, au loq ìh broq ùh hnau ka bàu au ma
anoe kô. **22** Èh tam mòeq yiniq hòm, ìh ngan padon ðòeq
ka au hñim padài, majah qmang aih au lùi rameh canòm
ka bàu oh daq waiq khàn, au jah hlài ti oh daq. **23** Èphap-
ra, aih bua oe tù ti au enh dalam ka Chuaq Jesus Christ,
tanap bàu bòch hmàih ka ìh, **24** Mõc, Aritac, Đêma xam
Luca bua abroq pajùm ti au hanoh qmang aih. **25** Waiq
kan tabàih dech enh Jesus Christ aih Chuaq bèn oe ti
mahua yiang pì!

HÊBRU

1 Calah nèh, Boc Plình khoe yōc bài pajàu đòeq hu hnài bài boc yaq bèn bac yàng bac trong, **2** khoe aih trùh ta bài hi atiq kô, haq hnài bèn xi kon cla haq, aih Kon, haq ma khoe dèch paqnàng hujah dōng rìm yiniq, èh hadai ajang Kon aih raq haq ma khoe broq loh Plình crōng taneh; **(aiōn g165)** **3** Kon aih la kan qngah qngai da Boc Plình, aih raq radua qmù da haq, yōc bàu i cwìang itai haq đòeq dèch paqnhrang rìm yiniq, jò Kon khoe broq hreо dōng yiniq lui, jah haqngui enh qma Boc Plình, oe tanđe dìq jah haqnhèq, **4** qmang aih yiniq haq jah yi haqnhèq dōng ka yiniq bình plình dàng leq aih èh haq jah yeo haqnhèq dōng ka wì dàng aih diq. **5** Majah qmang aih Boc Plình alah doe ka bình plình leq rameh: “Ìh kô Kon au, Hì kô au khoe ha-uang qnoh ìh? Alah i jò leq Haq doe: “Kô èh au broq baq ìh, ìh broq kon au”? **6** Mahaq jò Boc Plình qmùt dèh Kon ramua ta crōng taneh, aih haq doe rameh: “Dìq dōng bình plình da Boc Plình ep kùh waiq Kon”. **7** Ràu trùh bình plình haq doe: “Boc Plình broq ka bình plình da haq tìah ka cayeo, Broq ka hapōng da haq tìah ka pla ùnh”. **8** Mahaq anoe trùh deh Kon, haq doe: “Boc Plình ôi, gèq bùa da ìh oe yôt enh qnhòng kô trùh qnhòng tau, Cwìang diac da ìh aih cwìang da kan taq atoq. **(aiōn g165)** **9** Ìh enh trong taq atoq, git trong dù; Aih iq, Chuaq ôi, Boc Plình da ìh yōc dàu lem bùi xùt ka ìh, Broq ka ìh yeo qnhèq dōng ka bua ìh. **10** Boc Plình doe hòm: “Chuaq ôi, adroe dìq dōng ìh khoe broq xèm taneh, Trōc hadai loh enh tì kōng ìh. **11** Plình crōng taneh èh raliang lùch, mahaq ìh oe yôt; Plinh crōng taneh èh kùn tìah ka

ahyah eo; **12** ìh canua haq bu dàng blah eo yôh, Khoe aih plînh crõng taneh hi tablòq, Mahaq ìh dua mòeq jaq, Bâi hanam da ìh ùh lùch. **13** Boc Plînh alah doe ka bînh plînh leq rameh: “Haqngui enh qma ka au, Trùh jò au roh bâi mangai ma tagit broq radua enh qneq ka jènh ìh? **14** Dìq ka bînh plînh aih ma ùh xài bâi yiang patîh ka Boc Plînh, khoe jah thê loh ta crõng taneh đòeq patîh ka bâi mangai ma padon jah kan dèch qmòh?

2 Qmang aih, kiang bèn ep wèq ka cajap trong bèn khoe jah tàng, dôq ùh hìaq hìu đac taqnoeq. **2** Majah qmang aih, tàng joq bàu da bînh plînh anoe aih khoe cajap cajinh, cabô ùh iu ùh tiaq bàu aih khoe jah hnoq kan patem qmòe amat, **3** tàng bèn toq patrò kan dèch kàn kaiq qmang aih, broq qmang leq bèn ma claih? kan dèch kô Chuaq anoe qnoh adroe, i mangai ma tàng, anoe panhìn hlài ka nhèn. **4** Boc Plînh hadai yõc bac trong bac kan halac, yõc kan tabâih dech enh Yiang Hadròeh axong tiaq manoh cla haq enh, đòeq hu panhìn ka wì aih. Jesus broq rađeh wìa kon mangai **5** Qmang aih, crõng taneh ma padon trùh nhèn ma qnang anoe kô, Boc Plînh ùh đòeq haq oe enh qneq ka cwiang bînh plînh. **6** Mahaq i ngai khoe doe rameh: “Kon mangai kô ìq cleq, Chuaq ma hmàng trùh? Kon mangai kô ìq cabô, Chuaq ma palàng? **7** Chuaq khoe đòeq haq yi qneq ka bînh plînh toq biaq, Pa kui am ka haq kui cadoh plînh ranhòm lem **8** Chuaq roh đòeq rìm yiniq enh qneq ka jènh haq”. Boc Plînh broq ka rìm yiniq dìq ep oe enh qneq ka Chuaq Jesus, qmang aih dôq ùh i mòeq cleq ùh iu haq, yàng manđeq kô bèn qnhòq hnoq rìm yiniq dìq iu haq. **9** Mahaq Chuaq

Jesus kô, ma khoe oe qneq ka bìnhanh plình toq biaq, bèn hnoq haq manðeq kô khoe jah pacui cadoh diac plình lem ranhòm, pàng haq khoe chìuq cachìt. Qmang aih, taiq kan tabàih da Boc plình, Chuaq Jesus majah khoe cachìt am rìm ngai. **10** Joq Boc plình la mangai ma rìm yiniq ngeà diq ta haq rai canòm ka haq, pàng enh aràng bac ngai kon trùh ta kan qngah qngai, aih haq broq joq khoe troq jò haq broq ka Chuaq Jesus aih xèm kan dèch da wì kon aih, jah gêh geo ajang kan chìuq xalep. **11** Qmang aih, Mangai ma broq ka hadròeh xam mangai jah hadròeh, aih dìq loh enh mòeq Baq raq. Aih ìq, Chuaq Jesus majah ùh camaih ka creo ka wì aih oh daq, **12** jò Haq doe: “Au jah anoe yiniq ìh ka oh daq au, Oe taqne Tagop au calêu manè ìh”. **13** Haq doe hòm: “Au hataq raðeh ka Chuaq. Èh hòm: “Kô au xam bâi kon Boc Plình ma khoe am ka au” **14** Qmang aih, taiq wì kon i xech i mahim dài cla Chuaq Jesus majah hadai waq ka i qmang aih diq, ðòeq jò cachìt, haq jah raliang ðac mangai ma wèq cwìang kan cachìt aih Satan, **15** rai paclaih am ka rìm ngai taiq crè ka kan cachìt dài majah ep broq ðeh hapõng lùch ka qnhòng. **16** Joq qnàng, haq trùh ùh xài ðòeq hu wiang ka bâi bìnhanh plình, mahaq ðòeq hu wiang ka nang noe da Apraham, **17** Aih ìq, dài rìm trong haq majah ep broq tìah dèh ka oh daq, ðòeq enh ngèa Boc Plình jah wìa Pajàu haqnhèq, loq ha-och, ùh tablòq manoh, ðòeq cachìt ka yiniq lui da kon mangai. **18** Pàng cla haq khoe chìuq nanxa ta kan padô qnùt, dài haq majah i cwìang dèch bâi mangai jò wì glàm kan padô qnùt.

3 Qmang aih, ôi oh daq hadròeh, aih bài mangai hadai
jah bàu creo enh plình, drah hèm trùh Mangai wê bàu,
Mangai pajàu haqnhèq bèn ma khoe lùi tiaq, aih Chuaq
Jesus. **2** Haq ùh tablòq manoh dèh ka Mangai ma thê haq,
tìah ka Môise ùh tablòq manoh ka hním Chuaq. **3** Majah
qmang aih, Chuaq Jesus khoe jah ranhòm jah haqnhèq
ùh hnau ka Môise, tìah ka mangai broq hním ranhòm ùh
hnau ka chac hním. **4** Majah qmang aih, rìm toq hním
dìq i mangai broq loh; mahaq Mangai ma broq loh rìm
yiniq aih Boc Plình. **5** Môise, haq ùh tablòq manoh ta
hnim Chuaq tìah ka mangai hapõng khoe jah creo đòeq
hu panhìn ka bài bàu Boc Plình ma anoe ta hì atìq kô èh.
6 Mahaq Christ aih ùh tablòq manoh qmang ka cla kon
calô wèq cwìang ta hním Boc plình; yàng aih bèn kô raq
hnim Boc plình, waq toq bèn cajap manoh lùi xam kan
canòm trùh lùch, yõc bìac aih raq broq deh kan ranhòm
ka bèn. **7** Aih ìq, qmang ka Yiang Hadròeh i doe: “Hì kô
tàng pì tàng bàu haq, **8** Aih apaq cadoq manoh qmang
ka pì khoe broq jò àu yòng tablêq ka haq, Aih hì pì ma
qnhro Boc Plình tanoè braih kàn. **9** Aih nòe boc yaq pì
khoe hnoq yiniq au broq ta pôn jàt hanam, Mahaq dua oe
raq enh ti qnhro ngan au! **10** Qmang aih, Au majah nòeh
ka nang noe aih, Au doe: Manoh da wì haq toq lam lìq,
Qnhòq lah qnì ka trong da au. **11** Kô bàu au hapah ta kan
panòeh: wì haq blinh ùh jah mùt ta kan padài da au”. **12**
Oh daq rabiaq oq, đòeq qne oh daq ùh hìaq mangai leq i
manoh dù rai ùh lùi, loh qmòe ka cađac Boc Plình halinh
qmòh. **13** Mahaq rìm hì ep ti pariaq dabau, jò ma oe raq
jah creo: “Hì kô” đòeq dìq dõng oh daq ùh hìaq i mangai

leq cađac yiniq lui padô rađeh loh ka cadoq manoh. **14**
Majah qmang aih, bèn khoe wiang jah pajùm ti Christ,
waq toq bèn wèq deh manoh lùi enh jò baxèm cajap trùh
lùch, **15** jò oe raq doe: “Hì kô tàng pì tàng bàu haq, apaq
cadoq manoh, Qmang ka pì khoe broq, jò àu yòng talêq
ka haq”. **16** Qmang aih, cabô tàng bàu haq khoe èh hi àu
yòng tablêq hlài, aih ma ùh xài bài mangai ma canòm ka
Môise qnung wì haq loh enh gùng Êjip qmòh? **17** Boc
Plinh khoe panòeh ka cabô ta pôn jàt hanam aih? Ajoq
nòeh ka bài mangai ma broq yiniq lui, hanang wì haq ma
khoe tacro ta nòe braih kàn qmòh? **18** Haq hapah ka cabô
jò ma doe: Blinh wì ùh jah müt tanòe padài da haq? Ajoq
ka bài mangai ma ùh iu bàu? **19** Qmang aih, bèn hnoq dài
wì aih ma ùh jah müt, aih taiq wì haq ùh lùi.

4 Qmang aih, qnang jò oe raq i bàu tèu am jah müt ta kan
padài da Chuaq, bèn drah loq crè, tabeq loq i mangai leq
taqne oh daq loq ùh jah müt qmòh. **2** Majah qmang aih
Bàu lem kô khoe jah anoe am ka bèn hadai tìah qmang ka
wì aih; bài bàu wì haq ma khoe tàng aih ùh i lòeq cleq,
majah qmang aih jò tamàng, wì ùh yōc manoh lùi đòeq
hujah bàu aih ka rađeh. **3** Yàng da bèn aih bài mangai ma
khoe lùi, aih jah müt ta kan padài, wop qmang ka Boc
Plinh khoe doe: “Kô bàu au hapah ta kan panòeh, Wì haq
blinh ùh jah müt ta kan padài da au”. Hnoq anoe qmang
aih, bìac broq da haq khoe gêh qmòe enh jò baxèm broq
plinh crõng taneh. **4** Majah qmang aih, anoe trùh hì ma
tapèh, i bàu achìh rameh: “Hì tapèh Boc Plinh padài dõng
ka yiniq broq”. **5** Ajang qnoeq hòm, achìh rameh: “Wì
haq blinh ùh jah müt ta kan padài da au”. **6** Qmang aih,

khoe palauq đòeq ka qnah ngai jah mùt ta kan padài aih, mahaq bài mangai ma khoe tàng Bàu lem aih angoe nèh khoe ùh jah mùt taiq wì haq ùh iu, 7 khoe aih dùnh haraya, ta bàu calêu da Đawit, Chuaq i pajaq ònh mòeq hì qnoeq hòm hadai creo “Hì kô” tìah ka bàu ma taþoe enh ngoe ìq: “Hì kô tàng pì tàng bàu haq, apaq cadoq manoh”. 8 Tàng joq Jôsuê khoe am wì kan padài, atìq ka aih Boc Plình ma oe ràu trùh mòeq hì ma qnoeq hòm. 9 Qmang aih oe i mòeq hì padài ka mangai da Boc Plình. 10 Majah qmang aih cabô mùt ta kan padài da Boc Plình, mangai aih jah padài dèh ka yiniq broq, qmang ka Boc Plình padài deh ka yiniq broq. 11 Qmang aih, bèn ep àu dìq ka padren đòeq jah mùt ta kan padài aih, dôq ùh hìaq i cabô taqne bèn cro tiaq dua bài mangai ma ùh iu tau. 12 Majah qmang aih bàu da Boc Plình aih bàu rìh, bàu xít, hin ùh hnau ka chang baiq mòn, pàc jrùq ta bèn, loh qmòe ka jah ralah mahua, yiang, atap, tangau, chèh ngan ta gàu ngõc xam yiniq khoe qnac ta manoh cliac. 13 Ùh i cleq jah cadoc hlèp enh ngèa ka Boc plình, dìq dõng ep paqnoh ralênh enh ngèa haq, aih Mangai bèn ma ep taqmon hlài rìm yiniq bèn ma khoe broq. 14 Qmang aih, pàng bèn i mòeq ngai Pajàu haqnhèq khoe tòc ta plình, aih la Chuaq Jesus Christ kon da Boc Plình, dài bèn majah ep wèq ka cajap trong bèn ma khoe lùi tiaq. 15 Majah qmang aih, bèn ùh i ka pajàu haqnhèq ma ùh dùh qmòe ka ha-och kan ùh nèn da bèn, mahaq bèn i mangai Pajàu khoe chìuq qnhro ta rìm yiniq qmang ka bèn, mahaq ùh jò leq broq yiniq lui. 16 Qmang aih bèn drah cajap manoh thia haten rangàu xôq ramot, đòeq hujah kan tamèt rai

chaq jah kan tabàih dech đòeq hu wiang ti bèn jò bèn ma
i yiniq nhet đeh ka waq.

5 Rìm ngai pajàu haqnhèq, ma khoe jah ràih enh kon mangai, wì dèch haq aih đòeq broq mangai patìh am ka wì enh ngeà ka Boc Plình, đòeq dèch ngè tadreo xam ramènh cachìt am ka yiniq lui. **2** Haq aih hadai ùh nèn rìm trong, dài haq majah loq ha-och ka mangai ma lam hwang ùh qnì đeh cleq. **3** Taiq kan ùh nèn aih dài haq majah ep dèch ngè tadreo ka rađeh, hloe xam yiniq lui da mangai qnoeq. **4** Èh hòm, ùh i mangai leq jah blah yōc kan ranhòm aih ka rađeh; mahaq waq ka jah Boc Plình creo tìah ka Arôn nèh. **5** Hadai qmang aih, Christ ùh padèch đeh broq Pajàu haqnhèq; Mahaq Boc Plình khoe doe ka haq: “Ìh kô Kon au, Au khoe ha-uang ìh hì kô”. **6** Ajang qnoeq hòm i doe ka haq rameh: “Ìh broq pajàu mòeq đòe, Tiaq apah da Menchixêđec”. (aiōn g165) **7**
Jò Chuaq Jesus Christ oe raq rìh ta crōng taneh, haq khoe dêh bàu crò hmoe đòeq dèch bàu waiq khàn àu bòch Mangai ma i cwìang dèch haq jah claih ka cachìt, bàu haq khoe jah tamàng. **8** Majah qmang aih, yac ka haq aih Kon, mahaq khoe hōc yōc kan loq iu enh bài kan xalep đeh ma glàm, **9** jò khoe jah gêh geo, hi wìa rangàu da kan dèch claih mòeq đòe ka mangai iu bàu haq, (aiōnios g166) **10**
èh i Boc Plình doe haq broq Pajàu haqnhèq tiaq apah da Menchi-xêđec. **11** Anoe trùh trong aih, bèn i bàc yiniq hu anoe, mahaq ùh hlàu cleq ka anoe dôq oh daq jah loq ka hlöh, majah qmang aih oh daq khoe loh ka pi dai qnì tang. **12** Majoq aih oh daq broq mangai hnài khoe dùnh, yàng manđeq kô aih oe raq waq ka i mangai yōc bài yiniq

bu hwang hwòt enh baxèm da bàu Boc Plình hu hnài oh daq, oh daq oe raq ôq diac tôh, qnhòq hlàt acaq dahwèq cadoq. **13** Qmang aih, mangai leq rìh canòm toq ka diac tôh, haq ùh qnì ka trong taq atoq, majah qmang aih haq oe raq kon hin. **14** Mahaq dahwèq acaq ma gang cadoq aih đòeq ka mangai dang kàn, am ka mangai loq i manoh àu axràm đòeq canau ka trong lem xam trong dù.

6 Qmang aih, bèn ep clech enh tau ka bài bàu hnài baxèm Bàu lem da Chirst, đòeq trùh ta kan gêh geo, pi dùh tâc hlài xàn hnim hòm, aih ìq rameh: cađac bài bìac cachìt, lùi Boc Plình, **2** trong hnài ramènh baptem, trong roh tì ta chac wì, trong mangai cachìt rìh hlài, trong hadrah mòeq đòe. (aiōnios g166) **3** Tàng joq Boc Plình lòh, aih èh bèn hi broq bài trong aih. **4** Majah qmang aih, bài mangai ma khoe jah sreo qngah mòeq yàng, khoe hmaq loq kan am dech enh plình, hadai khoe wiang jah Yiang Hadròeh, **5** loq kan nhim da bàu Boc Plình xam kan itai ta qnhòng atìq, (aiōn g165) **6** tàng oe tacro, aih pi oe jah broq ka wì haq raxach hlài hòm, majah qmang aih wì haq khoe tiang đình Kon Boc Plình talong pagat ka rađeh mòeq yàng hòm, rai baxep haq dôq mangai hnoq đeh hra. **7** Majah qmang aih, taneh i diac mè yôt men loh long loh nhat, i lòeq ka mangai ma abèq, taneh aih jah xôq ramot enh Boc Plình. **8** Mahaq taneh leq ma hon toq yila, toq cađê, taneh aih èh wì cađac, jah toq bàu ra-đòh hamaiq, pulùch èh ep bùh đac. **9** Hnoq nhèn doe qmang aih, yôiq wì oh daq da au, dua nhèn oe tangèh gồm yiniq ma yeo lem ta pì, aih bài yiniq aràng pì trùh ta kan jah dèch. **10** Boc Plình ma i ùh taq atoq, haq ùh hèt yiniq broq xam manoh

loq waq da oh daq khoe paqnoh ka yiniq haq jò oh daq patih am ka mangai da haq, trùh manòeq kô dua pì oe raq patih. **11** Mahaq nhèn ngèh rìm ngai tapì dìq i manoh loq nhet qmang aih đòeq kan tangèh da oh daq jah broq gêh trùh lùch. **12** Qmang aih oh daq ùh hìaq loh ka rà-deq, mahaq top dua bài mangai i manoh lùi xam kan loq kèm men khoe jah waq kùng hang tiaq bàu Chuaq ma khoe tèu am. **13** Jò Boc Plình tèu bàu ka Apraham, pàng pi i qmòe cabô ma yeo haqnhèq loe, dài haq majah patô cla rađeh đòeq hapah ka Apraham. **14** Haq doe rameh: Kô èh Au am ka ìh xôq ramot bàc joq qnàng rai broq ka xinoe ìh jah ha-uang tam ka bàc. **15** Qmang aih, Apraham chìuq àt chìuq gòm, aih men jah bàu ma khoe tèu am ka rađeh. **16** Kon mangai wì yōc yiniq mangai ma yeo kàn ka rađeh đòeq hu hapah, tàng loq i yiniq tarahen, wì yōc bàu hapah aih đòeq hu panhìn ka cajap. **17** Boc Plình hadai qmang aih, enh broq ka bài mangai majah waq bàu haq ma tèu am loq ka haq ùh tablòq manoh, dài aih haq majah yōc bàu hapah; **18** đòeq canòm ka baiq yiniq ma ùh jò leq tablòq aih, baiq yiniq aih Boc Plình dìq ùh capoch qnùt, bèn chaq jah kan alòng kàn, bèn aih mangai khoe cadàu tùh tanèe hanhàng, jah cadop yōc kan tangèh ma khoe đòeq enh ngèa bèn. **19** Bèn wèq kan tangèh aih tìah ka long tanàp da mahua yiang, cajap cajinh mùt trùh enh tau ka bai prình, **20** aih nòe hadròeh, Chuaq Jesus tìah ka Mangai pèh trong khoe lam adroe ka bèn, majah qmang aih haq khoe broq Pajàu haqnhèq mòeq đòe tiaq apah da

Mêñchixêđec. (aiōn g165)

7 Mêncixêdec aih bùa da Salem, pajàu kàn da Boc Plinh
ma dìq jaq haqnhèq, khoe loh đìh Apraham rai waiq am
xôq ramot jò haq tawih hlài enh nòe haq tajêh khoe blêq
bài bùa; **2** Apraham yōc mòeq ta mòeq jàt phàn kùng
hang rađeh đòeq dèch ka bùa. Mêncixêdec ngìah ma
adroe aih la: bùa da kan taq atoq, ngìah atìq ka aih hòm
bùa da Salem aih bùa da kan catèm; **3** haq ùh i ka baq ka
miq, ùh i ka nang noe, ùh i ka hì baxèm ha-uang, ùh i ka
hì cachìt, qmang ka Kon Boc Plinh broq pajàu mòeq đòe.
4 Hèm beq, jaq cla Apraham aih kan cadraq bèn khoe
yōc mòeq ta mòeq jàt phàn ma dìq jaq lem tabài dahwèq
haq khoe jah blah yōc đòeq dèch ka bùa, aih bùa aih haq
haqnhèq dàng leq. **5** Tiaq ranenh bài xinoe Lêwi ma broq
pajàu, i cwìang tigop yōc mòeq ta mòeq jàt phàn enh
mangai jàn, aih la enh hadròng cla majah qmang aih cla
wì haq hadai loh enh Apraham. **6** Yac ka Mêncixêdec ùh
xài xinoe da Lêwi, mahaq haq jah yōc mòeq ta mòeq jàt
phàn da Apraham rai waiq xôq ramot ka mangai ma jah
waq bàu tèu am da Boc Plinh. **7** Manòeq kô mangai ma
yeo haqnhèq waiq xôq ramot ka mangai ma yeo haqneq,
trong aih pi ep rahen dèh. **8** Loq ka ajang kô, bài mangai
ma tigop yōc mòeq ta mòeq jàt aih dìq bài mangai loq
cachìt: yàng ajang tau hòm, aih mangai ma i bàu panhìn
doe haq qnang rìh. **9** Qmang aih bèn jah doe qmang kô:
Lêwi aih mangai tigop yōc mòeq ta mòeq jàt phàn, cla
haq hadai khoe dèch mòeq phàn mòeq jàt tiaq ajang
Apraham; **10** majah qmang aih, jò Mêncixêdec loh đìh
Apraham, jò aih Lêwi oe raq ta chac Apraham. **11** Tàng
ma loq jah kan lem geo canòm ka mangai Lêwi broq

pajàu (majah qmang aih Ranenh khoe jah am ka kon mangai jò wì haq oe raq enh qneq ka cwiang da pajàu), aih hagleq ma oe waq ka padèch ònh mòeq ngai pajàu qnoeq, tiaq apah da Mêncixêdec, ùh tiaq xinoe da Arôn?

12 Qmang aih, khoe halih pajàu aih èh ranenh hadai ep waq ka halih diq. **13** Mangai bài bàu aih ma anoe trùh, oe ta xinoe qnoeq, xinoe aih qnhòq hmaq i cabô patih nòe prang tadreo. **14** Majah qmang aih, Chuaq da bèn loh enh xinoe Jiuđa, xinoe aih Môise ùh i ràu trùh trong broq pajàu. **15** Trong aih yeo ro hòm, jò bèn hnoq i mòeq ngai pajàu qnoeq jah dèch paqnàng, tiaq ka Mêncixêdec, **16** dèch paqnàng ùh tiaq ranenh da kon mangai, mahaq tiaq cwiang itai da kan rìh halinh ùh jò leq hnhung lùch. **17** Hacô bàu panhìn ka haq: “Kon broq pajàu mòeq đòe. Tiaq apah da Mêncixêdec”. (aiôn g165) **18** Qmang aih, ranenh ma adroe nèh ùh i ka cwiang ùh i ka lòeq cleq dài majah khoe cađac; **19** majah qmang aih, ranenh ùh broq gêh qmòe cleq, èh hòm i moèq kan canòm qnoeq, ma yeo lem aràng am ka bèn, kan canòm kô ma broq ka bèn jah haten ka Boc Plinh. **20** Yeo hnau ka aih hòm i bàu hapah, wì ma qnoeq broq pajàu ùh i ka bàu hapah, **21** yàng haq khoe jah dèch paqnàng xi bàu hapah, jò Boc Plinh doe ka haq: “Chuaq khoe hapah, èh pi jò leq haq tablòq manoh, Kon broq pajàu mòeq đòe”. (aiôn g165) **22** Qmang aih, Chuaq Jesus khoe wìa Mangai broq ka cajap bàu tajao maneo lem yeo hnau ka ma dùnh. **23** Èh hòm, bài mangai broq pajàu aih bac, mahaq kan cachít khech tàt dài wì haq ma ùh jah broq hloe. **24** Yàng Chuaq Jesus aih halinh yôt, dài haq jah broq pajàu mòeq đòe. (aiôn g165) **25** Qmang aih,

haq majah i cwìang dèch dìq döng bàì mangai canòm ka haq đòeq hu thia ten ka Boc Plình, majah qmang aih haq rìh halinh đòeq waiq khàn am ka wì aih. **26** Aih ma joq pajàu haqnhèq ma troq ka bèn, hadròeh, ùh i ka yiniq lui, hliang lem, lah đeh crài ka mangai i tuiq, jah dèch atōc yeo haqnhèq ka tröc: **27** ùh tìah ka bàì pajàu haqnhèq ma qnoeq, ep dèch ramènh tadreo rìm hì, angoe aih ka yiniq lui da cla, atìq aih ka yiniq lui mangai qnoeq; Haq dèch ramènh mòeq yàng raq khoe gêh geo hloe, dèch chac cla haq broq ramènh tadreo. **28** Majah qmang aih, ranenh yōc bàì mangai ma ùh nèn dèh dùnh broq pajàu haqnhèq; mahaq bàu hapah ma i atìq ka hset ranenh aih dì cla Kon, aih Mangai ma gêh geo mòeq đòe. (aiōn g165)

8 Bàì yiniq nhèn maneo anoe kô, ma palênh aih rameh: Bèn i mòeq ngai Pajàu haqnhèq, haqngui enh qma gèq Bùa Haqnhèq ta diac plình, **2** qnang broq Mangai patìh tanòe hadròeh xam ta hnim ranòh joq qnàng, broq loh enh tì kōng Chuaq ùh xài loh enh tì kōng kon mangai. **3** Rìm ngai ma khoe jah dèch tōc broq pajàu haqnhèq aih đòeq dèch ramènh xam ngè tadreo, qmang aih haq kô ep dèch ramènh cleq. **4** Tàng haq oe raq ta cröng taneh, aih haq ùh xài pajàu haqnhèq, majah qmang aih ta cröng taneh i bàc ngai pajàu dèch ramènh tadreo tiaq bàu ranenh thê, **5** wì patìh ta hnim kùh waiq, mahaq hnim kùh waiq aih broq dua qmù da bàì yiniq oe ta plình, tìah ka jò Môise padon broq hnim ranòh, Boc Plình i pariaq haq: “Rabiaq oq, broq rìm yiniq troq tiaq dua au khoe patô ka ìh ta bui wang”. **6** Yàng manòeq kô, yiniq broq da Chuaq Jesus khoe yeo haqnhèq ka da wì qnoeq,

majah qmang aih haq aih mangai taqne da tajao ma yeo lem, tajao aih loh enh bàu tèu am ma yeo lem. **7** Majah qmang aih, tàng joq tajao ma adroe ùh hìaq thìuq qmòe cleq, aih ma i ka nòe hu broq tajao ma atìq. **8** Mahaq Boc Plình cwò ka mangai Jiuđa, haq doe: “Chuaq doe, taḅài hì ma padon trùh kô èh, Aih jò au pagêh tajao maneo ka hnìm Isorali xam hnìm Jiuđa, **9** Ùh tìah ka tajao au ma broq ti bōc yaq wì haq, Aih hì au ma cadop kōng wì haq, ajèn wì loh enh diac Êdip. Pàng wì haq ùh cajap manoh wèq tajao da au, Dài au majah ùh blèch ngan wì, aih bàu Chuaq doe”. **10** Chuaq doe hòm: “Kô bàu tajao au am ka hnìm Isorali, Atìq ka hì aih: Au đòeq ranenh da au ta gáu wì; Achìh qmùt ta cliac wì haq, Au broq Boc Plình wì, Wì haq jah broq mangai da au. **11** Taqne wì haq, pi i ka cabô oe ep hnài dèh mangai haten hatìa, Xam oh daq da cla rameh: Drah canau loq ka Chuaq; Majah qmang aih dìq dōng ka wì haq; Enh mangai ma dìq jaq hamoq trùh mangai ma dìq jaq kàn dìq jah loq ka au, **12** Majah qmang aih, au caqnaih dōng kan dù wì haq, Pi hmàng trùh yiniq lui wì haq hòm”. **13** Creo ka ma kô aih “tajao maneo”, qmang aih haq khoe broq ka tajao ma adroe khoe wìa ma dùnh, qmang aih yiniq cleq ma khoe dùnh, khoe tagôi, aih èh hi padon hnhung lùch đeh.

9 Tajao adroe nèh hadai i bài ranenh kùh waiq xam moeq nòe hadròeh oe ta crōng taneh. **2** Qmang aih, mòeq toq hnìm ranòh kùh waiq khoe jah broq, hagan adroe creo dèh nòe hadroèh, i jènh đen, cabōng xam bênh padon ta aih, **3** khoe aih trùh hagan enh dalam ka bai prìn, aih nòe dìq jaq hadròeh, **4** ta aih i prang kùh waiq broq xi wang,

xam hom tajao, dìq jah glom xi wang. Ta hom aih i mòeq toq cabi broq xi wang ta aih tah bình mana, mòeq toq long dùi da Arôn, baiq capiac hmo tajao, **5** enh crõng calàp hom i baiq chêrubim qngah qngai hlìa panan, qmù haq yàp dìq tanèo baxon yiniq lui. Mahaq kô aih ùh xài jò arèn taqmon ka hloh bài trong aih. **6** Rìm yiniq khoe jah taqmroq qmang aih, rìm hì bài pajàu mùt ta hagan ma adroe ta hnim kùh waiq đòeq pagêh trong ramènh kùh waiq; **7** mahaq, ta hagan baiq, aih mòeq hanam mòeq yàng, mòeq ngai cla pajàu haqnhèq raq ma jah mùt, ùh jò leq ma ùh wê mahim hu dèch ramènh ka yiniq lui cla xam yiniq lui dìq ka mangai. **8** Yiang Hadròeh yōc ajang aih đòeq mahnu: waq toq oe raq i hnim ranòh kùh waiq ma adroe, aih èh trong mùt tanèo dìq jaq hadròeh qnhòq jah pèch. **9** Aih đòeq hu aliah ka bèn qnhòng manđeq, đòeq hu patô bài trong kùh waiq xam ramènh tadreo aih ùh broq ka manoh mangai kùh waiq jah geo lem. **10** Aih xài bài ranenh da chac hamac. Ta aih toq bài dahnèq acaq xam dahnèq ôq xam bài ranenh qnheo crái ka dabau. Gòm trùh hì broq ònh tajao maneo. **11** Mahaq jò Christ khoe trùh broq pajàu haqnhèq da bài kan lem ma atìq kô; Haq khoe mùt ta hnim ranòh kùh waiq ma yi kàn, ma yi geo, ùh xài broq loh enh tì kõng kon mangai, hadai ùh xài taqnhòng kô. **12** Haq khoe mùt tanèo dìq jaq hadròeh mòeq yàng raq khoe laph am ka dìq dõng, ùh wê mahim bubi xam mahim kon bo, mahaq yōc qmòe mahim cla, đòeq hujah baxon hlài yiniq lui mòeq đòe. (aiōnios g166) **13** Tàng joq mahim bubi calô, bo calô xam loc bo adrùh wì ma yōc chùi ta chac mangai ma ùh

sròeh aih xôq jah broq ka xech akia wì jah hadròeh, **14**
loq ka mahim da Christ, aih Mangai ma canòm ka Yiang
Hadròeh halinh mòeq đòe, yōc chac cla rađeh ma ùh i
qmòe ka xít ka habau dèch am ka Boc Plinh, qnheo hreo
manoh cliac bèn pi hìaq oe patìh ka kan cachìt hòm,
đòeq hujah patìh ka Boc Plinh ma rìh halinh, aih dàng
leq! (**aiōnios g166**) **15** Ajang aih raq, Haq aih mangai taqne
da tajao maneo, dôq jò haq khoe chìuq cachìt haq jah
baxon bài yiniq lui ma khoe broq jò oe enh qneq ka tajao
ma dùnh, aih èh mangai ma jah creo jah trùh yōc kùng
hang mòeq đòe ma khoe tèu am ka rađeh. (**aiōnios g166**) **16**

Majah qmang aih jò khoe achìh jàiq tanap, aih èh ep gòm
mangai ma tanap cachìt hòeq. **17** Jàiq tanap aih i cwìang
atiq ka jò mangai tanap cachìt, majah qmang aih waq toq
mangai tanap oe rìh, jàiq aih ùh i cwìang cleq. **18** Qmang
aih tajao ma adroe hadai yōc mahim hu broq. **19** Jò Môise
khoe anoe dìq dōng bài bàu ranenh thê am dìq ka mangai
tamàng, haq i yōc mahim kon bo xam mahim bubi calô,
pajùm xam diac, haq yōc caxy capaih gòh xam hamenh
cachiq xônh da arat ta hset xam dìq dōng ka mangai, **20**
haq doe: Kô mahim tajao Boc Plinh ma khoe thê pì wèq
tiaq. **21** Khoe aih haq yōc mahim aih da arat ta hñim
ramòh kùh waiq xam rìm yiniq oe ta aih. **22** Tiaq ranenh:
rìm yiniq dìq canòm ka mahim men jah hadròeh, ùh ta-
ùc mahim ùh i kan paclaih yiniq lui. **23** Qmang aih, tàng
joq rìm radua qmù đòeq patìah ka bài yiniq ma oe ta
plinh ep qmang aih men jah basroèh, aih èh chac bài
yiniq ma oe ta plinh kiang ma ep canòm ka ramènh ma
yeo lem men jah hadròeh. **24** Majah qmang aih Christ ùh

mùt tanèo hadròeh loh enh tì kǒng kon mangai ma broq tiaq dua da nòe hadròeh joq qnàng, mahaq mùt qmòe ta plình, đòeq manđeq kô haq yòng am ka bèn enh ngèa Boc Plình. **25** Aih ùh xài haq mùt ta aih đòeq dèch rađeh broq ramènh tadreo bàc yàng tìah ka bài pajàu haqnhèq mòeq hanam mòeq yàng mùt tanèo dìq jaq hadròeh đòeq hu dèch mahim mahaq ùh xài mahim cla; **26** tàng ùh qmang aih, enh jò baxèm broq plình crõng taneh trùh manđeq, haq khoe ep xalep bàc yàng. Mahaq manđeq kô ta qnhòng ma atìq lùch, haq khoe loh qmòeq yàng raq, yốc cla rađeh broq ramènh tadreo đòeq hu paclaih döng bài yiniq lui. (aiôn g165) **27** Tìah ka ma khoe pajaq, kon mangai ep cachìt mòeq yàng, khoe aih ep chìuq kan hadrah, **28** hanoh qmang aih, Christ khoe dèch rađeh broq ramènh tadreo mòeq yàng raq đòeq dèch yiniq lui da bàc ngai; Haq hadai trùh hòm yàng baiq, ùh xài đòeq dèch yiniq lui hòm, mahaq đòeq am kan dèch paclaih ka mangai ma gòm haq.

10 Ranenh aih qmù da biac lem hì atìq, ùh i ka chac joq qnàng, dài ma canòm ka ramènh tadreo rìm hanam qmang aih, ùh jò leq broq ka mangai ma thia haten ka Boc Plình jah lem geo. **2** Tàng loq jah, aih bài mangai kùh waiq mòeq yàng raq khoe jah hreо manoh cliac wì haq ma oe qnì ka yiniq lui hòm, ajang aih ajoq wì khoe hêq ka dèch ramènh tadreo qmòh? **3** Majooq qnàng, bài ramènh tadreo rìm hanam aih đòeq bahmàng da wì haq yiniq lui. **4** Majah qmang aih, mahim bo calô xam mahim bubi calô ùh jah lêh caqnaih yiniq lui. **5** Dài qmang aih, jò Christ loh ta crõng taneh kô, haq i doe: “Boc Plình

ùh enh bài kùng hang xam ramènhdadre. Mahaq khoe
palauq đòeq ka au mòeq toq chac. **6** Boc Plình ùh waq,
Yac ka tadreo bùh, tadreo baxon. **7** Khoe aih, au hi doe:
Hacô au khoe trùh, ta hset i achìh trùh au – Au trùh
đòeq broq tiaq manoh ìh ma enh, ôi Boc Plình da au”. **8**
Adroe haq khoe doe: “Boc Plình ùh enh, ùh waq yac ka
tadreo rìh, tadreo bùh, tadreo baxon, aih bài yiniq ma ep
broq tiaq bàu ranenh thê; Atìq aih haq doe: “Hacô au
khoe trùh đòeq broq tiaq manoh ìh ma enh.” **9** Qmang
aih, Chuaq khoe cađac yiniq ma adroe, dì tiaq yiniq ma
atìq. **10** Tiaq manoh haq enh qmang aih, dài bèn majah
hadròeh canòm Chuaq Jesus Christ dèch deh chac broq
ramènhdòeq yàng raq khoe lap am ka dìq dǒng. **11** Bài
pajàu maqnoeq rìm hì yòng patìh rai dèch hlài mòeq
ramènhdahatìah, aih ramènhdahatìah ma ùh jò leq jah dèch đac
yiniq lui, **12** yàng da Pajàu kô, taiq dìq dǒng yiniq lui haq
dèch ramènhdòeq yàng raq, khoe aih hi haqngui mòeq
đòe enh qma Boc Plình, **13** pang aih ta atìq, gồm toq trùh
hì bài mangai ma tablêq ka haq ep jah roh broq radua
enh qneq ka jènhdahatìah. **14** Canòm ka ramènhdadre dèch
mòeq yàng aih raq, Chuaq broq ka mangai ma lùi haq
jah hadròeh gêh geo mòeq đòe. **15** Yiang Hadròeh hadai
wiang panhìn ka bèn; majah qmang aih atìq ka bàu doe:
16 Chuaq doe: “Kô tajao au broq ka wì haq, Atìq ka bài hì
aih èh, Au đòeq ranenh da au ta cliac wì haq Achìh đòeq
ta gàu wì haq.” **17** Èh doe hòm: “Au pi hmàng trùh yiniq
lui ngang dù da wì haq hòm.” **18** Manòeq kô, nòe leq
yiniq lui khoe jah caqnaih, aih pi ep dèch ramènhdadre
ka yiniq lui hòm. **19** Qmang aih, oh daq da au, taiq bèn

khoe canòm ka mahim Chuaq Jesus, dài ma pi hòq ka mùt tanèo dìq jaq hadròeh, **20** tiaq trong neo, trong rìh haq ma khoe pèch pagat enh tau ka bai prìn, aih la pagat ka hanang cla Haq, **21** qnah hòm, bèn i mòeq ngai Pajàu kèn khoe jah dèch paqnàng broq mangai wèq hnim Boc Plình, **22** dài bèn majah ep drah yōc kan lem jang, manoh lùi cajap cajinh, xam manoh cliac khoe jah qnhreo hreο ka trong qmèq, chac mac jah qnheo xi diac hliang, đòeq hu thia haten ka Chuaq. **23** Bèn hadai ep wèq cajap ùh dalàc dèh bàu bèn ma khoe anoe qnoph deh kan tangèh, majah qmang aih Mangai ma khoe tèu bàu am ka bèn aih ùh tablòq manoh. **24** Mangai leq mangai meh ep hmàng ngan dabau đòeq hu pariaq dabau trong manoh loq waq xam trong broq yiniq lem; **25** apaq cađac bìac tagop ti dabau tìah ka bài mangai ma khoe hmòt broq, mahaq ep alòng dabau, oh daq hnoq hì aih khoe haqnap dàng leq kiang oh daq ep nhet dàng aih. **26** Majah qmang aih tàng bèn khoe loq ka bàu joq qnàng, yàng oe raq to broq yiniq lui, aih èh pi i ka ramènh leq đòeq hu baxon hlài yiniq lui hòm, **27** mahaq rap gòm toq kan ramòt ta hì hadrah xam ùnh khàng dra adrènh bùh cheo mangai ma enh tablêq ka Boc Plình. **28** Mangai leq broq ùh troq ka ranenh Môise, tàng i baiq piq ngai wiang panhìn, aih èh ep jêh đac ka cachít ùh adênh, **29** loq ka mangai ma jôiq padit Kon da Boc Plình, ngan mahim tajao, aih mahim đeh ma canòm đòeq hu jah hadròeh, capoch halê đac ka Yiang Hadròeh ma am kan tabàih dech, oh daq ma xoh mangai aih claih ka kan hadrah baxa yi hnau qmòh? **30** Majah qmang aih bèn loq Mangai ma doe: “Kan patem dìq oe ta au, brì ka

au patem chau". Èh doe hòm: "Chuaq hadrah bài mangai da haq". **31** Taclìh ta tì kòng Boc Plình rìh halinh aih joq ramòt qnàng! **32** Drah hmàng hlài jò baxèm, aih atìq ka pì khoe jah kan qngah, aih hi i kan tablah nanxa kàn; **33** tang qnah aih chìuq kan camaih, kan baxa budàng broq kan racaih ka phù cròng ngan, i jò aih wiang chìuq kan xalep ka bài oh daq qnang hadai glàm trong qmang aih. **34** Oh daq khoe ha-och ka mangai ma wì ma rùp clêh, manoh oh daq dua lem bùi jò wì ma blah yōc da pì kùng hang, majah qmang aih oh daq loq rađeh i kùng hang ma yeo lem, ùh dìq ùh hnhung. **35** Qmang aih apaq cađac manoh cajap cajinh da rađeh, majah qmang aih i kan baha kàn khoe palauq đòeq ka oh daq. **36** Oh daq ep chìuq àt, đòeq jò khoe jah broq tiaq trong manoh Boc Plình, aih èh oh daq hi jah waq bàu haq ma khoe tèu am. **37** Majah qmang aih: "Oe toq biaq hòm, joq toq biaq hòm, Mangai ma padon trùh hi trùh; Haq ùh patrò. **38** Mangai taq atoq da au rìh xi manoh lùi, Tàng loq talùi, aih èh mahua yiang au joq ùh bùi ka haq". **39** Yàng da bèn kô, ùh xài mangai talùi đòeq hu hnhung lùch mahaq mangai wèq deh manoh lùi đòeq mahua yiang jah dèch claih.

11 Manòeq kô, manoh lùi aih la kan loq deh joq qnàng ta bài bèn qnang ngèh, aih kan panhìn da bài yiniq bèn ma qnhòq hnoq. **2** Canòm ka manoh lùi dài wì craq dùnh calah nèh ma khoe jah bàu manè enh. **3** Xam manoh lùi, bèn loq cröng taneh khoe jah broq loh enh bàu Boc Plình, qmang aih bài yiniq xau hnoq dìq loh enh yiniq ùh xau hnoq. (aiōn g165) **4** Xi manoh lùi, Abên khoe dèch ka Boc Plình mòeq ramènh tadreo yeo lem da Ca-in. Ajang aih

majah creo ka haq mangai taq atoq, jò Boc Plình capoch manè enh rai dì yōc ramènh da haq, canòm ka manoh lùi yac ka khoe cachìt dua haq oe raq capoch. **5** Xi manoh lùi, Hēnoc jah dèch atōc, ùh hìaq hnoq kan cachìt; pi i cabô oe hnoq haq taleq hòm, majah qmang aih Boc Plình khoe đìh atōc haq. Majah qmang aih adroe ka jah dèch atōc, khoe i bàu manè haq aih mangai rìh lem ka manoh Boc Plình. **6** Ùh i manoh lùi ùh broq qmang leq majah lem ka manoh Boc Plình; majah qmang aih mangai thia haten ka Boc Plình ep lùi i Boc Plình, èh hòm haq aih mangai loq baha ka cabô ti chaq haq. **7** Xi manoh lùi, Nô-ê jah Boc Plình patìn ka haq loq bài yiniq qnhòq i hnoq; haq aih mangai đìq ka manoh iu yùq, broq mòeq toq boang kàn đòeq hu dèch deh hnim cla; haq patô qnöh yiniq lui da crōng taneh, qmang aih haq jah wìa mangai taq atoq trùh enh manoh lùi. **8** Xi manoh lùi, Apraham iu bàu Chuaq creo lam tagùng haq hujah đòeq broq deh kùng hang: Haq lam mahaq ùh qnì đeh lam taleq. **9** Xi manoh lùi haq rìh tagùng ma khoe tèu am ka haq, tìah taiq ka mangai ma oe đeh ta diac wì, rìh đeh roc hnim ranòh tìah ka Ysac tìah ka Jacôp, aih la bài mangai hadai jah bàu tèu am tìah ka haq. **10** Majah qmang aih haq gồm mòeq toq plài i xèm cajap Boc Plình ma khoe broq loh. **11** Hadai xi manoh lùi, Sara yac ka khoe bàc hanam, mahaq dua i padren ha-uang kon, majah qmang aih haq loq Mangai ma tèu bàu ka rađeh, haq aih ùh tablòq manoh. **12** Qmang aih, enh mòeq ngai craq khoe ten cachìt, jah ha-uang loh kon xau ma raya, cràm tìah ka halōng ta trōc, bàc qmang ka braih diac raxìq, pi đìq rèn. **13** Wì aih

dìq cachìt ta manoh lùi, qnhòq jah waq yiniq ma khoe tèu
am ka wì haq, toq hnoq rai prônh đeh enh hangai, doe
đeh kô tamoe hangai, mangai lam clòh ta crõng taneh. **14**
Bài mangai ma anoe qmang aih, aih wì doe đeh kô qnang
ti chaq dèh gùng. **15** Tàng wì hèm trùh deh gùng, aih nòe
wì haq ma khoe loh enh aih, aih èh i hì wì tawìh hlài, **16**
mahaq wì bêh mòeq toq gùng ma yeo lem, aih gùng ma
oe ta plình; aih ìq dài Boc Plình ma ùh camaih ka doe đeh
kô Boc Plình da wì aih, majah qmang aih Boc Plình khoe
padon đòeq ka wì haq mòeq toq plài. **17** Xi mnoh lùi jò
Boc Plình qnhro Apraham, haq dèch Ysac aih kon mòeq
da haq broq ramènh tadreo: aih kon haq ma khoe jah
enh bàu tèu am. **18** kon aih raq Boc Plình ma i doe: “Enh
dalam Ysac kô èh men i mòeq nang noe wê yiniq ìh”.
19 Haq hèm deh ta manoh Boc Plình i cwìang broq ka
mangai cachìt rìh hlài; qmang aih i crài cleq ka haq jah
hlài dèh kon enh mangai cachìt. **20** Xi manoh lùi, Ysac
waiq xôq ramot am ka Jacôp xam Êsau ta bài yiniq padon
trùh tangèa kô èh. **21** Xi manoh lùi Jacôp jò ten cachìt,
waiq xôq ramot ka baiq ngai kon da Jôsep. Khoe aih haq
rai cachàt dèh ajang long canhra rai kùh waiq. **22** Xam
manoh lùi, jò ten cachìt Jôsep haq anoe trùh bìac mangai
Isorali jah loh enh Êjip rai tanap ka wì trùh bìac catùh
caxènh da haq. **23** Xi manoh lùi, jò Môise bu ha-uang,
miq baq haq cadõc haq piq khê, majah qmang aih wa
hnoq kon aih lem alàng, wa pi yùq qmòe ka bùa loq nòeh.
24 Xi manoh lùi, Môise jò khoe radam, pi dôq wì creo ka
rađeh kô kon calô da kon cadri da Phara-ôn, **25** wiang
nan xa pajùm ti mangai da Boc Plình aih haq yi lènh

ùh hnau ka lem bùi hyòq mòeq rahiယàc ta trong yiniq lui: **26** haq ngan kan chìuq xep ka Christ aih yeo khòh ùh hnau ka hang canaq da Ёjip, majah qmang aih mat haq haqmiang gòm yôt dèh kan baha. **27** Xi manoh lùi haq cađac gùng Ёdip ùh crè ka bùa nòeh, majah qmang aih haq yòng cajap tìah gleq hnoq qmòe Mangai ma ùh xau hnoq. **28** Xi manoh lùi, haq wèq ramènh Pancwa rai broq ramènh pùc mahim, dôq kiac palùng ùh hìaq jêh đac kon ramua da mangai Isorali. **29** Xi manoh lùi, mangai Isorali lam pagat diac Rasìq gòh tìah ka lam ta taneh croh, yàng mangai Ёdip àu lam diq, hi cram döng ta aih. **30** Xi manoh lùi, bài panàt plài Jêricô hrùq taclih döng, atìq ka wì khoe lam dudan ka haq tapèh hì. **31** Xi manoh lùi, Rahap (aih mangai gucadri tech rađeh) ùh cachìt pajùm ti bài mangai ùh lùi, majah qmang aih haq lem manoh đìh bài mangai ma lam rinh ta aih. **32** Au oe anoe cleq hòm? Majah qmang aih khoe pi tem tàng joq au enh anoe trùh Giđê-ôn, Barac, Jephthê, Đawit, Samu-ên xam bài pajàu qnoeq. **33** Wì aih, xi manoh lùi khoe jah blêq bài diac qnoeq, broq kan taq atoq, jah waq bài bàu tèu am, bàng hacùng baco, **34** plah pat pla ùnh khàng ma nga angèn, claih ka pla chang, tablêq ka yinìq, paqnoh dèh kan tanoq tanèo tajêh tablah, broq ka bài lình diac wì ep cadàu amot. **35** I mangai cadrì khoe jah deh mangai ta hñim cachìt rìh hlài, i ngai chìuq kan xa-ep dìq jaq, mahaq ùh dôq cabô paclaih rađeh, đòeq hujah waq kan rìh hlài ma yeo lem. **36** I ngai chìuq dôq wì do halê rađeh, chìuq blai, chìuq clang, chìuq clêh. **37** Chìuq dôq wì đàp rađeh xi hmo ka cachìt, pot loh baiq xi kùa, pàc xam

chang; pac lac jàp jia, caxùnh đeh bài akia trìu, akia bubi, ùh i đeh rìm ka yiniq, chùuq wì hnen glua, baxa padit. **38** Crõng taneh kô ùh tajì ka wì haq rìh, ep pac lac tagùng hawit, tawang, takòp, roc hàm ta taneh. **39** Dìq dõng wì aih khoe jah bàu capoch manè ka manoh lùi da wì haq, mahaq wì haq qnhòq lòm jah waq yiniq ma khoe tèu am ka rađeh. **40** Majah qmang aih Boc Plình i palauq đòeq bài yiniq ma yeo lem hu am ka bèn, dôq wì aih pajùm ti bèn đòeq hadai jah geo lem.

12 Qmang aih, pàng bèn jah bac ngai ngan hnoq qnang oe dudan bèn tiah ka cato yùc kàn, bèn hadai ep khwênh dõng bài kan trap xam yiniq lui ma loq tawac ka bèn, yõc manoh ùh tagah lep đòeq cadàu tiaq trong ma khoe padon am ka bèn, **2** mat bèn ngan toq dua Chuaq Jesus, aih mangai ma baxèm rai pagêh da bèn manoh lùi, pàng kan lem bùi khoe đòeq qmòe enh ngèa cla, haq chùuq cachít talong pagat, ùh dèh ka kan camaih, manòeq kô haqngui enh qma ka gèq Boc Plình. **3** Qmang aih, oh daq ep hèm trùh Mangai ma khoe chùuq kan tablêq enh bài mangai yiniq lui, đòeq oh daq ùh hìaq lep tagah manoh. Boc Plình hnài mangai da Haq **4** Oh daq tablêq ka yiniq lui qnhòq hìaq ep ta-ùc mahim; **5** oh daq ma khoe hèt dõng ka bàu ma pariaq oh daq tiah ka bàu baq ma hnài deh kon qmòh? bàu aih rameh: “Kon da au, apaq jù đac bàu hnài enh Chuaq, Èh jò Chuaq cwò, apaq talùi manoh; **6** Majah qmang aih Chuaq hnài dèh mangai haq maloq waq, Mangai leq Haq ma dì broq dèh kon aih haq blai xi long roe”. **7** Tàng oh daq chùuq kan hnài, aih Boc Plình ngan oh daq tiah dèh ka kon cla, majah qmang aih i kon

leq baq ma ùh lech hnài? **8** Mahaq tàng oh daq jah claih ka kan lech hnài mangai qnoeq ma chìuq đeh hra, oh daq aih la kon tango, ùh xài kon joq qnàng. **9** Baq ta taneh kô tiaq deh manoh cla lech hnài, aih diq bèn loq iu bàu, loq ka Baq da mahua yiang, aih ma ùh joq bèn khòh iu yùq ma yeo hnau hòm đòeq hujah kan rìh qmòh? **10** Baq ta taneh kô, tiaq trong wì haq ma hèm dèh lem đòeq hnài đò bèn ùh i dùnh, yàng Boc Plình gùt bàt bèn aih dôq jah lòeq ka bèn, đòeq bèn hujah kan hadroèh ti haq. **11** Joq qnàng kan gùt bàt jò baxèm aih hnoq tìah gleq broq nen ka bèn mangò, ùh xài kan lem bùi, mahaq atìq èh caqmon loh plì taq atoq, catèm am ka bài mangai ma khoe axràm qmang aih. **12** Qmang aih, oh daq drah dèch dèh capiang tì ma ùh nèn, hloe xam cràng ma khoe tabat. **13** Drah palauq trong đòeq jènh oh daq jah cadiang lam, dôq yac ka mangai cwê dua ùh hìaq lac trong mahaq jah kan broq brêh. **14** Drah àu rìh hatroq ti rìm ngai, rai chaq tiaq kan hadròeh, majah qmang aih tàng joq ùh wìh wìa hadròeh ùh cabô jah hnoq Boc Plình. **15** Ep rabiaq jaq cajoq, yùq loq i mangai capòch ka kan tabàih dech da Boc Plình, beq rayeq riah xang plôh loh, broq kan manhài xam kan ùh sròeh ka bàc ngai. **16** Ngan oq, taqne oh daq apaq i mangai loq tango taqnung, hadai paq i cabô loq blìa racaih qmang ka Êsau, mòeq nà acaq raq mahaq chìuq tech deh cwìang kon ramua. **17** Joq oh daq loq, atìq ka aih haq enh jah bài xôq ramot aih ka rađeh, yàng khoe pi jah; majah qmang aih yac ka haq crò hmoe creo dang, dua khoe pi jah blòq hlài manoh baq haq ma khoe dì. **18** Oh daq ùh i trùh haten ka bui wang kon mangai jah bèq,

hadai ùh trùh haten ka ùnh khàng ma adrènh, hadai ùh xài thia haten kan clam cluiq, ta yùc gam, tanòe cayeo kèn, **19** tanòe ken atêh bàu dêh, tanòe bàu ma cadròt, jaq mangai leq magai meh tàng bàu aih dìq cali calo ka bàu aih pi dùh capoch ka rađeh tàng hòm; **20** majah qmang aih wì haq ùh nui tàng bàu kô: “Yac ka bòe ngè rìh loq tadroq, tàng thia ten ka wang kô dìq ep yōc hmo đàp đac ka cachìt”. **21** Ta wang jò aih hnoq ramòt joq qnàng, jaq Môise loh qmòe ka doe: “Au crè joq qnàng, loh dōng ka tarìt”. **22** Mahaq oh daq khoe trùh haten ka Wang Si-ôn, ten ka plài da Boc Plình rìh halinh, aih la Jérusalem oe ta plình, haten ka nòe bình plình loe ka jàt muàn tagop ti dabau, **23** haten ka Tagop Hadròeh da bài kon ramua ma khoe jah achìh yiniq ta plình, haten ka Boc Plình, aih cwan hadrah da rìm ngai, haten mahua yiang da bài mangai lem taq atoq, **24** ten ka Chuaq Jesus, aih Mangai taqne da tajao maneo, haten ka mahim ma khoe pùc qnoh, mahim aih lem yeo hnau ka mahim da Abên. **25** Oh daq ep rabiaq haq oq! apaq tàih đac bàu Mangai ma qnang anoe ka dadeh; tàng joq bài wì tau tablêq hlài ka bàu Mangai ma anoe bàu pariaq ta cröng taneh, aih dìq khoe ùh claih, loq ka bèn, tàng joq bèn rahen ka Mangai anoe bàu enh plình, aih èh kiang ma ùh claih. **26** Jò aih nèh bàu Haq aih ralàng dìq ka cröng taneh, yàng manòeq kô hòm haq doe: “Oe mòeq yàng hòm, ùh xài au broq ka ralàng toq ta taneh, mahaq ralàng hloe xam ta tröc”. **27** Manòeq kô, bàu ma doe: “Oe tam mòeq yàng hòm” aih la rameh: bài yiniq ma loq dalàc, aih la bài yiniq ma khoe jah broq loh, aih èh ep doeh đac, đòeq toq bài yiniq ma

ùh hìaq dalàc jah oe hlài. **28** Qmang aih, pang jò bèn ma khoe jah waq Diac ma ùh dalàc, bèn khòh manè apôi dôq i manoh loq iu yùq hu patìh ka Boc Plình đòeq jah lem ka manoh haq. **29** majah qmang aih Boc Plình bèn aih ùnh loq ti bùh cheo.

13 Ep i manoh loq waq yôt ka dabau tìah ka oh daq. **2** Apaq hèt ka bìac đìh tamoe, i ngai broq bìac aih, mahaq ùh qnì rađeh khoe jah đìh bình plình. **3** Ep hmàng trùh ka oh daq wì ma qnang rùp clêh, tìah cla bèn hadai qnang wiang chìuq clêh clang ti wì haq, hadai ep hmàng trùh bài mangai ma qnang oe đeh ta kan baxa, majah qmang aih chac bèn hadai tìah ka chac da wì. **4** Rìm ngai ep loq ta-iu trong ống mai, ta aniang ống mai ùh jah i kan ùh sròeh, majah qmang aih Boc Plình tah hadrah ka mangai taqnung xam mangai tango. **5** Apaq daiq ka bac jènh, drah lem bùi ka bài yiniq đeh ma qnang i, majah qmang aih cla Boc Plình khoe doe: “Au ùh talah ka kon, au ùh cađac kon”. **6** Aih èh bèn jah cajap manoh lùi, hu doe: “Chuaq wiang ti au, au ùh yùq cleq. Kon mangai qnhòng kô broq cleq ka au jah?” **7** Ep hmàng trùh mangai ma ajèn qnung rađeh, khoe hnài ka radeh trong Boc Plình, boq ngan jò pulùch qnhòng da wì haq rìh, đòeq tiaq dua manoh lùi da wì haq. **8** Chuaq Jesus Christ hì nèh, hì kô, trùh hloe tabla èh dua ùh tablòq. (aiōn g165) **9** Oh daq apaq dôq bài bàu hnài lìq làn qnoeq padô rađeh; manoh loq canòm ka kan tabàih dech đòeq jah cajap aih lem, ùh xài canòm ka dahwèq acaq, aih bài yiniq ùh i jah taq atam cleq ka mangai broq qmang aih. **10** Bèn i mòeq toq caböng tadreo, bài mangai patìh ta hnim ranòh kùh

waiq ùh khòh yōc cleq enh aih hu acaq. **11** Mangai pajàu haqnhèq yōc mahim da ngè tadreo wê mùt tanèo dìq jaq hadròeh đòeq broq ramènh tadreo baxon yiniq lui, yàng chac haq aih bùh enh gùng ka traiq lình. **12** Chuaq Jesus hadai chùuq xalep enh gùng ka plài đòeq yōc deh mahim hu broq ka mangai jah hadròeh. **13** Bèn ep loh enh gùng ka traiq lình, đòeq lam trùh ta haq, đòeq hu wiang chùuq pajùm kan camaih. **14** Majah qmang aih ta crõng taneh kô, bèn ùh i ka plài ma cajap yôt mòeq đòe, mahaq bèn chaq plài ma padon trùh kô èh. **15** Qmang aih drah canòm ka Chuaq Jesus đòeq hu dèch yôt ramènh tadreo xam bàu manè apôi ka Boc Plình, aih la caqmon riang da hacùng bàu khoe anoe qnoph yiniq haq. **16** Paq hèt ka broq trong lem rai loq ti tabàih axong ka wì qnoeq diq, majah qmang aih, bài ramènh qmang aih lem ka manoh Boc Plình. **17** Ep loq iu bàu mangai qnung ajèn oh daq hadai ep enh qneq ka cwìang wì haq, majah qmang aih wì haq rìu ka mahua yiang oh daq, wì haq mangai ma ep anoe hlài bìac da pì oh daq ka Chuaq, đòeq wì lem bùi đeh ka patìh, ùh hìaq i cleq ep mangò, majah qmang aih trong aih ùh lòeq cleq ka oh daq. **18** Waiq khàn am ka nhèn diq, majah qmang aih nhèn loq manoh cliac nhèn kô lem enh acaq oe hnihu jang rìm trong. **19** Au cali calo ka oh daq waiq khàn beq, dôq au rênh jah trùh ti oh daq. **20** Waiq Boc Plình catèm, aih la Mangai taiq mahim tajao mòeq đòe khoe broq ka Chuaq Jesus aih Mangai ban trùu kàn jah rìh hlài enh kan cachìt, (aiōnios g166) **21** ajang nòe Jesus Christ, Haq broq ka oh daq jah geo ta rìm trong lem, đòeq broq gêh yiniq haq ma enh, broq loh kan lem manoh haq oe ta

taqne bèn, kan ranhòm troq ka hlài dìq ta haq mòeq đòe!

Amen. (aiōn g165) **22** Manòeq kô, au pariaq pì oh daq, drah lem bùi ka tiaq bàu hnài kô; au khoe achìh palap ka oh daq qmang aih raq. **23** Au enh pì loq mangai oh daq bèn aih Timôthê khoe jah caqnaih, tàng haq rênh trùh, aih èh ma hi lam hmàih ka oh daq. **24** Au tanap bàu hmàih trùh bài mangai broq craq tagop xam dìq dõng mangai da Chuaq. Wì oh daq ma oe ta Itali hadai tanap bàu hmàih trùh pì. **25** Waiq kan tabàih dech oe ti pì oh daq rìm ngai.

JACO

1 Jaco, hapǒng da Boc Plình xam da Chuaq Jesus Christ, achih ka mòeq jàt baiq xinoe oe paclac. Waiq kan catèm jah am ka oh daq. **2** Dìq dǒng ka oh daq, khòh ngan kan qnhro bac trong trùh ka pì oh daq aih bu dàng kan lem bùi gêh geo, **3** majah qmang aih bèn loq kan qnhro manoh lùi oh daq broq loh kan loq kùm. **4** Mahaq kan loq kùm hadai waq ka gêh dèh ka yiniq broq da haq, dôq oh daq hadai jah geo lem, ùh ta chriah qmòe ajang leq. **5** Tàng joq taqne oh daq i mangai ùh dai rabiaq đeh, haq drah creo dang Boc Plình aih Mangai ma am ùh dìq ùh dài ka rìm ngai, ùh lech ka cabô, aih èh haq aih hi jah. **6** Mahaq ep yōc manoh lùi hu creo dang, apaq rangòt, majah qmang aih mangai rangòt tìah ka lai laq diac raxìq cayeo hlui tacô tatau. **7** Mangai qmang aih apaq xoh đeh loq jah cleq enh Boc Plình: **8** aih mangai taleq ùh lênh, broq cleq dua ùh gêh. **9** Oh daq leq ma oe đeh tanòe haqneq hamoq, aih haq drah catèh dèh kan haqnhèq da haq beq, **10** mangai padrõng hadai catèh dèh kan haqmoq beq, majah qmang aih đeh kô èh hadai hnhung lùch tìah ka riang nhat. **11** Mat mahì tōc, tōq dèh, nhat croh, riang hadrùih, kan lem hnhung, mangai padrõng èh hadai croh qmang aih ta yiniq abroq haq. **12** Xôq ramot am ka mangai jò haq glàm đeh kan padô qnùt, majah qmang aih jò haq khoe jah dràng ta kan qnhro, aih èh haq jah waq cadoh kan rìh diac plình, Boc Plình ma khoe tèu am ka mangai ma loq iu yùq ka haq. **13** Jò qnang glàm kan padô qnùt, apaq i cabô doe: Kô Boc Plình padô au, majah qmang aih ùh i kan dù leq jah padô Boc Plình,

yac ka cla haq hadai ùh padô aluân cabô. **14** Mahaq rìm ngai glàm kan padô qnùt jò haq dôq dèh manoh cla patùt rađeh. **15** Jò manoh cla hadràp khoe trap, haq xêh loh yiniq lui, jò yiniq lui hi jah gêh, haq xêh loh kan cachìt. **16** Oh daq da au, apaq qnùt rađeh, **17** rìm kan tabàih lem geo aih dìq trùh enh qnhèq, loh enh nòe Baq qngah qngai, ta dalam haq ùh i kan tablòq, hadai ùh i ka wòch kan talìc. **18** Cla Haq khoe tiaq deh manoh, khoe yōc bàu joq qnàng hauang loh bèn đòeq bèn jah wìa plì ma ramua ta rìm yiniq haq ma broq loh. **19** Dìq ka oh daq da au, pì loq hmàng qmang kô: rìm ngai ep rênh ka tamàng mahaq adia ka capoch, adia ka nòeh; **20** majah qmang aih kan nòeh da kon mangai ùh broq loh kan taq atoq da Boc Plinh. **21** Qmang aih, ep cađac kan trùq amùa xam kan ngang dù ma oe raq i, pahaqneq dèh manoh hu đìh yōc bàu khoe pìt ta manoh oh daq, aih la bàu jah dèch mahua yiang oh daq. **22** Drah broq tiaq bàu aih, apaq toq tamàng dech huqnùt dèh cla. **23** Majah qmang aih, tàng i cabô tàng bàu mahaq ùh broq tiaq, aih i crài cleq ka mangai sreo dèh hadrò ta guàng, **24** khoe èh hi lam, hèt dèh ka hadrò qmang leq. **25** Mahaq mangai leq ma ngan qmòe ka ja cajoq ta ranenh geo lem, aih ranenh da kan paclaih, rai kèm ka hèm trùh, ùh xài toq tàng khoe hi hèt đac, mahaq dìq ka manoh wèq tiaq ranenh aih, mangai aih haq jah xôq ramot tiaq trong rađeh ma iu bàu. **26** Mahaq tàng loq i mangai leq hèm đeh kô mangai tiaq trong Chuaq mahaq ùh tát padràng dèh rapet toq ti qnùt dèh manoh cla, kan tiaq Chuaq qmang ka da wì aih hi qngwan qngwaiq. **27** Tiaq đaoq ma lem geo ùh i ka xít, ùh i ka habau enh ngèa

Boc Plình, Baq da bèn aih: thia hmàih ka mangai lac, ka mangai hadrô jò wì haq hadàc khoc, rai wèq cla rađeh claih ka kan amùa da crõng taneh.

2 Theo nguyên-boden tiếng Gờ-réc, trong câu này cũng nói “thứ thách” được như trong câu 2, vì chữ này trong tiếng Gờ-réc có hai ý Oh daq da au, oh daq khoe lùi Chuaq Jesus Christ, aih Chuaq ranhòm qngah qngai da bèn, aih apaq loq waq ka tang ngai. **2** Patiah đac, i mangai asràng wang, caxùnh eo cwàn lem, mùt tanđe tagop oh daq, èh i mòeq ngai caxùnh cwàn eo hyah hyai hadai mùt; **3** tang oh daq ngan mangai caxùnh eo lem, rai pachùh: Haqngui ajiang kô! nòe ma yeo lem, èh doe ka mangai ma pa: Yòng aqmat raq, ùh meh hangui ta haneq qmat ajiang jènh au, **4** qmang aih ajoq oh daq khoe lah đac dabau, khoe wìa cwan hadrah i manoh qmèq? **5** Oh daq da au, pì tamàng kô: Ma ùh xài Boc Plình khoe ràih bài mangai pa ta qnhòng kô đòeq broq wì haq jah wìa mangai padrõng kan ta manoh lùi, đòeq wì jah waq diac da haq ma tèu am ka mangai ma loq waq ka haq ùh xài? **6** Hagleq oh daq majah jù đac mangai pa! Ma ùh xài mangai padrõng raq ma khoe padit oh daq, hua qnöh oh daq trùh ta cwan hadrah? **7** Ma ùh joq wì haq raq ma capoch ùh hòq đac ka yiniq lem ma khoe yōc đòeq hu hiniq ka pì qmòh? **8** Tàng joq oh daq wèq ka geo lem ranenh da hñim Bùa tiaq bàu Hset Hadròeh hnài: Ep loq waq ka mangai haten hatià tìah ka cla, qmang aih oh daq acaq oe khoe lem. **9** Mahaq tang oh daq loq waq ka apah, aih khoe i tuiq, ranenh hi taqmòq yiniq lui ka oh daq tìah ka bài mangai broq ùh troq tiaq ranenh. **10** Majah qmang aih mangai leq

wèq dìq dǒng ta ranenh mahaq ùh troq moeq yiniq raq, aih hadai tìah gleq ùh troq dìq dǒng. **11** Majah qmang aih Mangai ma doe: “Ìh ùh khòh tango”, hadai i doe: “Ìh ùh khòh jêh đac mangai.” Tàng ìh ùh hìaq tango mahaq jêh đac mangai, qmang aih ìh ajoq mangai broq ùh troq tiaq ranenh. **12** Drah capoch rai broq tìah ka mangai ma padon chìuq ranenh hadrah ka rađeh, aih la ranenh da kan ùh tawac. **13** Kan hadrah ùh tamèt ka mangai ùh broq loh kan tamèt, mahaq kan loq ha-och jah blêq kan hadrah. **14** Maleq ma yeo lem, oh daq da au, tàng mòeq ngai doe đeh kô i manoh lùi mahaq ùh i ka yiniq broq? Manoh lùi qmang aih ajah dèch haq? **15** Patìah đac, i mòeq ngai oh daq calô qnì, oh daq cadrì qnì ùh i qmòe ka ahyah caxùnh, rìm hì ùh i ka dahwèq acaq, **16** mahaq taqne oh daq i mòeq ngai doe ka wì aih: Drah lam ka catèm, qnhìa ka hatôq rai acaq đeh ka panàc oq! Mahaq ùh i qnèp qmòe dahwèq cleq ka chac wì aih ma qnang nan, aih i jah cleq? **17** Manoh lùi hanoh qmang aih, tàng manoh lùi ùh loh yiniq broq aih èh haq cachìt. **18** Tàng ùh meh i mangai doe: Ìh i manoh lùi, au i yiniq broq. Patô manoh lùi ùh i ka yiniq broq da ìh am au ngan, khoe èh au hi patô ka ìh manoh lùi loh enh yiniq broq da au. **19** Ìh lùi i mòeq Boc Plình raq, ìh lùi khoe troq, kan kiac hadai lùi qmang aih, mahaq rai tarìt yùq. **20** Mahaq wùih! mangai blùng tau, ìh enh waq ka nhìn manoh lùi ùh i ka yiniq broq aih ajoq qngwan ùh xài? **21** Apraham, kan cadraq da bèn, jò haq dèch Ysac aih kon haq tóc ta prang tadreo, aih ma ùh joq haq canòm ka yiniq broq đòeq hu jah creo ka haq mangai taq atoq? **22** Qmang aih,

ìh i hnoq manoh lùi xam yiniq broq wa abroq pajùm ti dabau, canòm ka yiniq broq manoh lùi men jah gêh geo. **23** Qmang aih jah xít bàu Hset Hadròeh doe: “Apraham lùi Boc Plình, trong aih majah doe ka haq mangai taq atoq”; èh jah creo ka haq aih bua da Boc Plình. **24** Ajang aih oh daq jah loq kon mangai canòm ka yiniq broq men jah kan taq atoq, ùh xài canòm toq ka manoh lùi. **25** Hadai qmang aih, Rahap mangai gucadrà broq bac, haq cadoc bài mangai lam rinh, èh patô ka wì aih tiaq trong qnoeq đòeq hu hlài, aih ma ùh xài canòm ka yiniq broq men jah doe ka haq mangai taq atoq qmòh? **26** Majah qmang aih, chac ùh i ka mahua aih èh cachìt, manoh lùi ùh i ka yiniq broq hadai cachìt qmang aih.

3 Tapì oh daq ùh dùh i bàc ngai dèch đeh broq mangai hnài, majah qmang aih bèn loq rađeh ep pòq wê kan hadrah yeo nhang hòm. **2** Dìq ka bèn catoeh bàc trong. Tàng mangai leq ùh hìaq catoeh đèh trong hacùng bàu, aih raq mangai khoe geo, loq tát padràng rađeh. **3** Bèn qmùt mem ta kiang axêh, waq ka haq iu tiaq bèn, dài bèn men jah thê dìq ka chac haq iu tiaq bèn. **4** Ngan bài boang kàn: Yac ka haq kàn dàng leq kàn, yac ka cayeo qnung haq taleq ùh dèh, mòeq toq blênh wech qyoh dua khoe jah wech haq, tiaq manoh mangai wèq haq ma enh. **5** Hadai qmang aih, ta chac bèn rapet aih qyoh, mahaq jah catèh bài trong ma kàn. Ngan rôm wang yac ka kàn dàng leq, mahaq toq xit ngia ùnh dua hlàt bùh dôq haq cheo döng! **6** Rapet hadai tìah ka ùnh, aih raq nòe apùq dìq döng kan dù oe ta chac bèn, broq amùa dìq döng chac bèn, bùh cheo dìq ka qnhòng bèn, yac cla rapet hadai

ùnh ta hwin khoe bùh. (Geenna g1067) 7 Dìq dǒng bài ngè ta
gùng, bài chim, bài hadrùng, bài ngè rìh ta diac raxìq
dìq jah bùc, èh hòm kon mangai khoe bùc bài ngè aih; 8
mahaq rapet, ùh i cabô jah bùc haq, aih raq kan dù kon
mangai ma tát padràng ùh jah, haq bình bauq bài nốc
cachìt ka mangai. 9 Xi rapet bèn manè apôi Boc Plình,
Baq da bèn, hadai ajang rapet bèn ra-òh hamaiq ka kon
mangai ma khoe jah broq loh tiaq radua qmù Boc Plình.
10 Hadai mòeq toq hacùng aih raq mahaq loh bàu manè
xam bàu ra-òh hamaiq. Oh daq da au! ùh khòh qmang
aih. 11 Pajùm mòeq tamōc diac ma wìa ka loh diac nhim
xam diac xang qmòh? 12 Oh daq da au, long pōc wìa ka
jah loh plì ôliu, long nho loh plì pōc jah loq ùh? Tamōc
diac xang hadai ùh jah loh diac nhim. 13 Tapì oh daq
cabô ma i kan rabiaq? Drah yōc dèh trong rìh acaq lem
lindh đòeq hu mahnu dèh biac broq ma loh enh kan rabiaq
kan loq kèm. 14 Mahaq tàng joq oh daq i kan tagrình ta
pagau ka dabau xam kan tajênh ta manoh cla, aih apaq
padèch rađeh hadai apaq capoch amòng pagau ka bàu joq
qnàng. 15 Kan rabiaq qmang aih ùh xài loh enh qnhèq,
mahaq da taneh, da xech akia xam da kan kiac. 16 Majah
qmang aih taleq i kan tajìq tajênh, ta aih i kan manhài
xam rìm kan dù. 17 Mahaq kan rabiaq ma loh enh qnhèq
angoe aih hadròeh lem, atìq kan hatroq, loq amàn, loq
kèm, bình kan loq waq xam plì lem, taq atoq, hnhuh jang.
18 Mangai broq kan hatroq haq jah gat plì taq atoq ma
khoe rai ta kan hatroq

4 Bài kan loq tajênh tarahen taqne pì aih loh enh leq?
ma ùh xài loh enh kan loq ònh da manoh cla ma xan àu

tablêq yôt ta chac oh daq raq qmòh? **2** Oh daq ònh mahaq ùh jah trong đeh ma enh, oh daq jêh đac mangai, tarènh mahaq dua ùh jah cleq, oh daq i kan ta pagìq taqmiaq. Oh daq majah ùh jah cleq pàng oh daq ùh waiq bòch Boc Plình. **3** Oh daq waiq bòch mahaq ùh jah cleq, pàng pì bòch ùh troq trong, đòeq toq racaih tiaq manoh cla enh. **4** Wùih bài mangai ja tango tau! pì ma ùh qnì taqmùt ti crõng taneh kô aih pì tablêq hlài ka Boc Plình? Dài qmang aih, cabô enh broq bua ka crõng taneh kô, haq aih loh mangai tablêq ka Boc Plình. **5** Ahìaq pì hèm Hset Hadròeh capoch dech ùh loh lùa cleq qmòh? Yiang Hadròeh da Boc Plình ma thê oe ta manoh cliac bèn, haq bêh bèn loh qmòe ka tarènh, **6** mahaq Haq tam ka bèn kan tabàih yeo kèn hòm. Dài qmang aih Hset Hadròeh majah achìh: “Boc Plình tablêq ka mangai loq catèh rađeh, mahaq am xôq ramot ka mangai loq hamon rađeh.” **7** Qmang aih thê drah iu Boc Plình. Drah tablêq hlài kan kiac aih èh haq hi wia hangai ka oh daq. **8** Drah thia haten ka Boc Plình aih èh Haq hi thia haten ka oh daq. Mangai ma i yiniq lui drah qnheo hreо dèh ti kõng beq, cabô baiq manoh, drah broq hreо dèh manoh beq, **9** drah hnoq dèh kan habo, drah ta-oeh hmoe, drah halìh bàu do loh bàu crò hmoe, halìh kan lem bùi loh kan mangò. **10** Drah caqnìh rađeh enh ngèa Chuaq, aih èh haq hi dèch atōc oh daq. TT **11** Oh daq ùh dùh capoch qmèq ka dabau. Cabô capoch troq dèh oh daq qnì, ti hadrah dèh oh daq qnì, haq aih capoch qmèq ka ranenh, tah hadrah ka ranenh. Tàng pì hadrah hlài ka ranenh, aih pì ùh xài mangai iu tiaq ranenh, mahaq mangai hadrah ranenh. **12** Dìq dèh mòeq Ngai raq

broq loh ranenh, mòeq Ngai raq ma hadrah ranenh aih la
Mangai dèch di jah, jêh đac hadai jah. Mahaq ìh kô ìq
cabô, gleq majah hùa hadrah deh mangai haten hatia? **13**
Tamàng kô, ìh mangai ma doe: Hì kô tàng ùh meh hì da
èh, au lam ta gùng tau, oe ta aih mòeq hanam, ti padro hi
jah bac jènh, **14** mahaq hì da èh qmang leq, oh daq ma
loq! Majah qmang aih, qnhòng rìh da oh daq aih cleq?
Bu dàng diac ngom, i đeh mòeq hyàc raq hi hnhung. **15**
Oh daq khòh doe qmang kô ma troq: Tàng joq Chuaq
ma enh, tàng joq au ma oe rìh, aih èh au jah broq yiniq
kô, yinq tau. **16** Aih ìq, oh daq dèch bàu catèh đòeq hu
panhòm! Catèh panhòm qmang aih đìq qmèq. **17** Dài haq,
cabô loq trong lem mahaq ùh waq broq tiaq, aih i tuiq.

5 Manòeq tamàng kô, pì mangai ma padrõng kan! Drah
crò hmoe, breo ma dêh haq, majah qmang aih kan ranàc
kàn padon ta-ùc ka pì. **2** Kùng hang pì bùc om, eo yôh pì
catia kaq. **3** Wang bac pì loh ka axiang, axiang aih raq
kan panhìn đòeq tablêq hlài ka pì, jrêh chac pì tìah ka
ùnh cheo. Oh daq khoe don đòeq bac jènh ta hì atìq lùch!
4 Hatau, kùng baha da bình gat ta ruàng oh daq, oh daq
ma khoe yōc dech da wì, wì haq creo dang, bàu wì haq
khoe trùh ta don Chuaq i cwìang itai. **5** Oh daq rìh ta
crõng taneh kô khoe jah acaq ôq racaih ka lem bùi, oh
daq khoe broq bit cla rađeh ta hì broq jam; **6** oh daq khoe
wiang acop bàu taqmòq yiniq đòeq hu jêh cađac mangai
taq atoq, yac ka haq ùh i tablêq hlài ka pì. **7** Qmang aih,
oh daq ep cajap manoh gòm hì Chuaq trùh. Ngan mangai
ma abèq ruàng: wì haq cajap manoh gòm dahnwèq lem
loh enh taneh trùh qmòe jò khoe jah mè enh gàu jò gat

trùh dìq jò gat. **8** Oh daq hanoh qmang aih, hadai ep loq kèm rai cajap manoh, majah qmang aih hì da Chuaq trùh khoe haqnap. **9** Oh daq pi dùh ti padrùt ka dabau dôq ùh hìaq ep pòq kan hadrah, hatau, Mangai ma hadrah khoe yòng ajang qmang hnim! **10** Oh daq da au, pì ngan bài wì mangai pajàu ma khoe canòm ka yiniq Chuaq hu capoch, đòeq top dua trong chìuq xalep xam kan loq kèm ka rađeh. **11** Oh daq loq bài magai ma loq kèm jò nanxa, aih bèn doe wì haq jah xôq ramot. Oh daq hmaq tàng doe Jop khoe kèm dàng leq, rai khoe jah hnoq jò atìq lùch Chuaq taqmroq am ka haq, majah qmang aih Chuaq bình kan loq tamèt ha-och. **12** Adroe dìq döng, oh daq ùh dùh hapah dèh, apaq patô tröc, patô taneh, hadai apaq patô yiniq qnoeq đòeq hu hapah, tàng joq aih doe joq, ùh aih doe ùh, đòeq ùh hìaq ep pòq kan hadrah. **13** Taqne oh daq i cabô chìuq ka xalep qmòh? Mangai aih waiq khàn beq. Cabô i kan lem bùi qmòh? Drah calêu manè apôi beq. **14** Taqne oh daq i cabô yinìq ùh hröc qmòh? Drah akhen ka bài gucraq Tagop Hadröeh trùh, jò khoe canòm ka yiniq Chuaq đòeq xùt dàu ka mangai yinìq, khoe aih wì craq hi waiq khàn am ka haq. **15** Bàu waiq khàn xi manoh lùi jah broq brêh ka mangai yinìq. Chuaq jah dèch haq aih, tàng mangai yinìq loq i yiniq lui cleq, aih èh dua jah caqnaih. **16** Qmang aih, drah paqnoh deh yiniq lui ti dabau, dôq oh daq jah brêh ka yinìq: mangai taq atoq yöc manoh nhet đòeq waiq khàn aih joq xìt bàc. **17** Èli aih mangai hadai ùh nèn qmang ka bèn. Haq waiq khàn, cali calo dôq tröc apaq mè, aih tröc ùh mè ta cröng taneh piq hanam qne. **18** Khoe aih haq waiq khàn hlài, tröc hi mè,

aih taneh hi loh dahwèq. **19** Oh daq da au, taqne oh daq
loq i mangai leq lam hwang hangai ka trong joq qnàng,
yàng i mangai broq ka haq tawìh hlài, **20** haq khòh loq
rameh: mangai leq broq ka mangai i yiniq lui wìh hlài,
cađac dèh trong ùh troq, aih haq dèch da wì mahua yiang
claih ka cachìt, rai gahnàp đac bàc yiniq lui.

I PHIERÓ

1 Phiero mangai tiaq cla da Chauq Jesus Christ, achìh ka bài mangai rìh paclac tagùng Bong, Galati, Capbađoc, Asi xam gùng Bithini, aih bài mangai khoe jah ràih, **2** tiaq kan loq dèh adroe da Boc Plình, aih Baq, jah kan basròeh enh Yiang Hadròeh, hu iu tiaq Chuaq Jesus Christ đòeq jah hadai wiang rai mahim haq: waiq kan tabàih dech xam kan catèm jah rai èh rai bac ka oh daq. **3** Manè apôi Boc Plình, Baq da Jesus Christ aih Chuaq bèn, haq khoe yđc manoh loq waq kàn kaiq đòeq broq bèn jah ha-uang lauq, dôq bèn canòm kan rìh hlài enh mangai cachìt da Chuaq Jesus Christ đòeq hu jah kan tangèh rìh, **4** aih raq kùng hang ùh raliang hnhung, ùh axiang, ùh lùch khoe padon ta plình đòeq am ka oh daq, **5** aih bài mangai i manoh lùi canòm ka cwiang itai da Boc Plình wèq am, đòeq hu jah kan dèch claih, ma khoe ten loh ta hì atìq lùch. **6** Oh daq lem bùi ka bìac aih, yac ka manđeq kô oh daq glàm kan qnhro bac trong broq ka oh daq ep mangò đeh toq biaq, **7** bài kan qnhro aih broq ka manoh lùi da oh daq jah yeo lem ùh hnau ka wang aih hang ma loq om hech yac ka khoe bùh xi ùnh, dôq oh daq jah bàu manè, jah padèch ta kan qngah qngai jò Chuaq Jesus Christ loh ta crđng taneh. **8** Haq aih Mangai oh daq ùh hnoq mahaq camet, yac ka manđeq kô oh daq qnhòq hnoq haq, mahaq oh daq lùi haq, rai lem bùi pi cajaq ta kan ranhòm: **9** jah kan baha ka manoh lùi da oh daq aih la kan dèch mahua yiang oh daq. **10** Anoe trùh kan dèch aih, bài mangai pajàu khoe ti hamrìh ti boq chaq, khoe capoch bàu pajàu trùh kan tabàih ma khoe taqmroq đòeq ka oh daq: **11** aih

wì chaq waq ka jah loq qnhòng leq, qmang leq cadèh
Yiang Hadròeh da Christ ma oe ta wì haq khoe mahnu, jò
chônh anoe panhìn kan xalep da Christ xam kan ranhòm
tiaq atìq ka aih. **12** Wì aih, khoe loq ùh xài wì haq patìh
ka cla rađeh mahaq ka oh daq, aih bài biac manòeq kô ma
khoe anoe qnoph ka oh daq, loh enh bài mangai ma canòm
ka Yiang Hadròeh enh plình, đòeq hnài Bàu Lem am ka
pì; bài bình plình hadai tangèh jah hnoq bài yiniq kô. **13**
Qmang aih, oh daq ep cachang đòeq ta gäu ngoc tìah ka
rìt caqnam, loq amàn, yōc dìq ka manoh ngèh đòeq gòm
kan tabàih jah am ka rađeh jò Chuaq Jesus Christ trùh. **14**
Oh daq khoe wìa wì kon ma loq iu bàu, aih apaq broq tiaq
kan dù enh nèh, jò pì oe raq qnhòq qnì cleq. **15** Mahaq
tìah ka Mangai ma creo ka oh daq aih hadròeh, aih èh ta
rìm trong acaq oe, oh daq hadai ep hadròeh, **16** majah
qmang aih i bàu achìh rameh: “Ep hadròeh, majah qmang
aih au kô hadròeh”. **17** Tàng oh daq creo ka Mangai ma
ùh hìaq loq waq ka apah, mahaq hadrah ka tang ngai tiaq
tang yiniq wì haq ma broq, aih Baq, qmang aih drah yōc
manoh loq iu yùq đòeq hu rìh acaq taqnhòng rìh đò kô,
18 majah qmang aih, bèn loq ùh xài canòm bài dahwèq
ma loq om loq bùc qmang ka bac ka wang oh daq ma
khoe jah baxon claih ka trong rìh acaq ùh loh cleq da kan
cadraq ma khoe đòeq hlài ka bèn, **19** mahaq xi mahim
canaq da Christ, tìah ka mahim kon trùi ùh i ka xít ùh i ka
habau, **20** ma khoe padon qmòe enh adroe ka broq plình
cröng taneh, khoe jah paqnoh taqnhòng atìq lùch kô am
ka oh daq, **21** aih bài mangai khoe canòm ajang Chuaq
Jesus Christ đòeq lùi Boc Plình, aih Mangai ma khoe broq

ka Chuaq Jesus Christ enh mangai cachìt rìh hlài rai am ka haq kan ranhòm, đòeq manoh lùi xam kan tangèh da oh daq canòm dìq ka Boc Plình. **22** Manòeq kô oh daq khoe canòm ka bàu joq qnàng đòeq broq hreo dèh mahua yiang, đòeq i manoh loq waq ka dabau joq qnàng, loq ha- och ka dabau dìq ka manoh; **23** oh daq khoe jah hauang lauq, ùh xài xi adrech loq om hech, mahaq xi adrech ùh om ùh hech, aih xi bàu kan rìh cajap cajinh da Boc Plình.

(aiōn g165) **24** Majah qmang aih: Rìm xech akia bu diang nhat, Kan nhòm da haq bu diang riang nhat. Nhat croh, riang hadrùih. **25** Mahaq bàu da Chuaq oe mòeq đòe. Aih raq Bàu lem khoe anoe qnoh ka oh daq. (aiōn g165)

2 Qmang aih, oh daq khoe cadelac rìm trong ngang dù, kan loq qnùt, kan ti patiah, manoh loq tajênh xam bàu capoch troq, **2** aih drah bêh diac tôh yiang, tiah ka kon qyoh neo hauang, dôq oh daq canòm ajang aih hu jah yòng kàn đòeq jah dèch dèh mahua yiang, **3** tàng oh daq khoe loq Chuaq Jesus aih lem. **4** Drah thia ten ka haq, aih hmo rìh mahaq tì kông kon mangai khoe khwênh đac, mahaq khoe jah ràih jah dì wìa hmo canaq enh ngèa Boc Plình, **5** oh daq hadai tiah ka hmu rìh, jah broq hnim yiang, broq pajàu hadròeh, đòeq hu dèch ramènh yiang, canòm ka Chuaq Jesus Christ đòeq jah lem ka manoh Boc Plình. **6** Majah qmang aih ta Hset Hadròeh i achìh rameh: “Ngan kô! Au đòeq ta Siôn, mòeq toq hmo mùm hnim canaq khoe jah ràih, cabô lùi Haq aih, ùh jò leq ep camaih”. **7** Qmang aih, ka oh daq ma khoe lùi, aih hmo canaq, mahaq ka mangai ma ùh lùi, aih hmo thòq broq hnim khoe tèm đac, Mahaq khoe wìa hmo mùm

hnim, aih hmo: “broq ka mangai kan catoeh, hmo broq ka tacro”; **8** wì catoeh ka hmo aih taiq wì ùh iu tiaq Bàu, trong aih khoe tèu đòeq ka wì haq enh adroe. **9** Mahaq oh daq aih adrech ma khoe jah ràih, aih la pajàu da hnim bùa, aih xinoe hadròeh, aih mangai da Boc Plình, đòeq ka oh daq lam anoe kan loq waq da Boc Plình aih Mangai ma khoe creo ka oh daq loh enh noè clam cluiq, trùh ta kan đìq jaq qngah qngai da haq; **10** oh daq nèh haq ùh xài mòeq xinoe, yàng manòeq kô aih xinoe da Boc Plình, nèh haq ùh jah kan loq waq, yàng manòeq kô jah ka loq waq. **11** Yôi yôiq oh daq da au, oh daq bu dàng mangai enh diac qnoeq, mangai lam ka trong, au pariaq oh daq ep wia ka hangai bài yiniq xech akia ma ònh, aih bài yiniq ma tablêq hlài ka mahua yiang pì. **12** Ep rìh lem jang taqne mangai diac wì, dôq wì haq aih mangai ma toq capoch qmèq đac ka oh daq tìah taiq ka mangai ngang dù, hnoq yiniq broq lem da oh daq, aih èh hì Chuaq ma trùh hmàih ka bèn, wì haq jah manè apôi Boc Plình. **13** Taiq Chuaq, pì majah ep iu tiaq ranenh kon mangai paqnoh, yac ka bùa, aih mangai i cwìang haqnhèq, **14** yac ka bài cwan, aih mangai bùa ma thê haq trùh đòeq baxa mangai ma broq dù, đòeq manè mangai broq lem. **15** Majah qmang aih, manoh Boc Plình ma enh aih oh daq broq trong lem đòeq bàt hacùng bàu bài mangai blùng ratùt. **16** Drah rìh tìah ka mangai ma pi tawac, mahaq apaq yōc kan ùh tawac aih hu broq bai prình kan dù, ep ngan rađeh kô hapōng dìc da Boc Plình. **17** Khòh loq ta-iu ka rìm ngai, loq waq ka oh daq, iu yùq ka Boc Plình, loq iu bùa. **18** Mangai hapōng, ep yōc manoh đìq jah loq iu yùq ka Boc Plình đòeq iu

tiaq dèh cla craq, ùh xài toq ka cla craq ma khun khauq loq hèm ka oh daq, mahaq hloe xam cla craq ma ùh taq atoq. **19** Majah qmang aih joq khòh manè, tàng cabô taiq manoh loq yùq ka Boc Plình dài haq majah ep chìuq đeh kan xalep ta kan ùh taq atoq. **20** Tàng oh daq broq qmèq, oh daq chìuq àt jò wì jêh, aih i cleq hu catèh? Mahaq tàng oh daq broq lem, yàng ep chìuq kan xalep, aih raq xôq ramot enh ngèa Boc Plình. **21** Oh daq khoe jah creo trùh jang aih, majah qmang aih Christ khoe chìuq xalep ka oh daq, đòeq broq dua ka oh daq hnoq, dôq oh daq hu tiaq teo jènh haq; **22** Haq qnhòq i broq qmòe yiniq lui cleq, ta hacùng haq ùh i mòeq nà bàu paqnùt; **23** Jò wì hnap hnuq, haq ùh da hnap hlài, chìuq nanxa haq ùh hacam hlài ka wì, mahaq phùq rađeh ka Boc Plình aih Mangai hadrah taq atoq; **24** Haq pòq wê dǒng yiniq lui bèn ta chac haq tanè long pagat, dôq bèn mangai khoe cachìt ta yiniq lui, jah rìh ka kan taq atoq; canòm ka teo rabàn ta chac haq bèn jah brêh ka yinìq. **25** Majah qmang aih oh daq tìah ka trùu lac, yàng manòeq khoe jah hlài ti Mangai ban trùu xam Mangai wèq mahua yang pì.

3 Hadai qmang aih, mangai broq mai ep iu tiaq deh ống, đòeq tàng loq i mangai ống leq ùh tiaq trong Chuaq, yac ka ùh anoe xi bàu, yàng hnoq trong mai haq rìh acaq, aih èh haq hi tiaq diq, **2** majah qmang aih, haq hnoq trong acaq oe da pì aih hliang lem loq iu. **3** Ùh dùh chaq dahuwèq đòeq anì toq enh gùng, qmang ka broq xác, asràng wang, atàc toq eo cwàn lem canaq; **4** mahaq ti chaq kan palàng enh dalam, aih kan hliang lem ùh hnhung lùch ùh atêh atong da manoh laq alàng, aih trong

lem enh ngèa Boc Plinh. **5** Majah qmang aih bài gucadri
hadròeh calah nèh, tangèh canòm ka Boc Plinh, chìuq
iu tiaq deh ống, dìq palàng rađeh qmang aih; **6** qmang
ka Sara iu tiaq Apraham, creo ka Apraham aih craq da
rađeh, tàng pì broq trong lem, ùh i yiniq cleq broq ka pì
ep yùq crè ta manoh, aih èh pì hi wìa kon adrùh da Sara.
7 Hanoh qmang aih, mangai broq ống, drah mahnu dèh
kan rabiaq ta trong rìh acaq dèh ti cadrì, ep loq hèm ka
wì haq, majah qmang aih wì haq yeo ùh nèn đeh, qnah
hòm wì haq hadai wiang jah xôq ramot kan rìh ti oh daq,
dài majah ep ta-iu ka wì, dôq ùh hìaq i yiniq cleq broq
ka pì manhài jò waiq khàn. Chìuq xa-ep jò broq trong
lem **8** Pulùch, dìq döng oh daq ep mòeq manoh bình kan
loq tamèt xam kan loq waq ka dabau, i manoh loq hanò
rai loq hacom hamon rađeh. **9** Apaq yōc kan dù đòeq
patem chau kan dù, apaq yōc bàu qmèq hu patem ka bàu
qmèq, mahaq ep waiq xôq ramot ka wì, taiq ajang aih
raq oh daq ma khoe jah creo đòeq hu jah xôq ramot. **10**
Èh hòm, Mangai leq bêh kan rìh, Enh jah hnoq hì lem.
Haq aih ep wèq dèh hacùng bàu, Apaq capoch trong dù
xam bàu loq qnùt; **11** Ep wia ka trong dù, broq trong lem,
Chaq kan catèm đòeq hnan tiaq, **12** Majah qmang aih mat
da Chuaq haqmiang ngan mangai taq atoq, Don Haq ti
tamàng bàu waiq khàn da wì aih, Mahaq hadrò Chuaq
tablêq hlài ka mangai broq dù. **13** Tàng oh daq nhet ka
broq lem, aih ma i cabô ma broq qmèq đòeq habo hlài ka
oh daq? **14** Tàng oh daq broq troq mahaq ep chìuq kan
xalep, aih oh daq jah xôq ramot. Apaq yùq ka bàu wì
hacam, hadai apaq hlè ta manoh; **15** mahaq ta manoh oh

daq ep padèch Christ broq Cla craq rađeh. Yac ka jò leq
dua padon đòeq hu padreo bàu ka mangai ma bòch trùh
kan tangèh da oh daq, mahaq ep khun khauq rai loq ta-
iu, **16** ep i manoh hliang lem, dôq bài mangai ma halê
trong rìh acaq lem lình da oh daq ta dalam ka Christ,
ep camaih dèh ka bàu wì haq ma capoch troq oh daq;
17 tàng manoh Boc Plình khoe enh dèh qmang aih, òq,
bèn chìuq xalep jò broq trong lem aih yeo lem ka chìuq
xalep ka broq trong qmèq. **18** Majah qmang aih Christ
hadai khoe chìuq cachìt ka yiniq lui mòeq yàng, haq aih
kan taq atoq am ka mangai ùh taq atoq đòeq aràng bèn
trùh ti Boc Plình, yac ka chac hamac da haq khoe cachìt,
mahaq mahua yiang da haq oe rìh. **19** Xi mahua yiang
aih haq lam anoe ka bài mahua yiang ma qnang oe tù,
20 aih bài mangai enh qnhòng nèh khoe ùh iu tiaq Boc
Plình, ta qnhòng da Nô-ê, aih jò Boc Plình khoe chìuq àt
chìuq gòm trùh jò boang jah broq gêh, i toq biaq ngai
raq jah dèch claih khoe ka diac kèn, ta aih rahem ngai
dech do. **21** Diac hanam aih, broq qmù ramènh ɓaptem
manòeq kô đòeq dèch oh daq, ramènh aih ùh xài đòeq
qnheo hreо kan amùa da chac hamac, mahaq tìah ka bàu
hatèu lem hloh enh manoh qngah hliang da oh daq am
ka Boc Plình, canòm ajang kan rìh hlài da Chuaq Jesus
Christ, **22** aih Mangai ma khoe hlài ta plình, manòeq kô
qnang haqngui enh qma Boc Plình, bài ɓình plình, bài
bùa, xam bài wèq cwìang dìq enh qneq ka Haq.

4 Qmang aih, tìah ka chac hamac da Christ khoe chìuq
xa chìuq jìq, oh daq hadai padon dèh manoh qmang aih
diq, majah qmang aih mangai leq chìuq jìq chìuq xalep ta

chac hamac aih khoe jah claih ka yiniq lui, **2** waq toq oe
rìh ta chac kô pang leq, aih pi dùh tiaq cadèh hòm trong
kon mangai ta crõng taneh kô ma ònh, mahaq ep tiaq
manoh Boc Plình enh. **3** Nèh haq oh daq khoe rìh tiaq
kan qmèq da wì enh gùng: tuàng buàng, enh toq trong
mèq, bù bia, acaq ôq pi palap, pagôq racaih, kùh waiq kiac
qmù. **4** Wì hnoq oh daq ùh broq tiaq wì haq trong tango
anang, aih wì loh ka hamàih rai jù lê oh daq. **5** Mahaq wì
haq ep taqmon hlài ka Mangai ma padon hadrah mangai
rìh xam mangai cachìt. **6** Taiq aih raq, Bàu Lem majah
khoe ep anoe ka mangai cachìt, đòeq atìq ka jò wì haq
khoe ep pòq kan hadrah tiaq chac da kon mangai, mahua
yiang wì haq jah rìh ti Boc Plình. **7** Kan atìq lùch da rìm
yiniq khoe haqnap, ep rabiaq rai loq hamang đòeq waiq
khàn. **8** Adroe aih, rìm ngai ep i manoh nhet ka loq waq
ka dabau joq qnàng, majah qmang aih kan loq waq jah
gahnàp bàc yiniq lui. **9** Mangai kô xam mangai tau ep đìh
dabau ma laq alàng apaq mamùc. **10** Rìm ngai ep yốc dèh
kan tabàih đeh ma khoe jah đòeq wiang hanò ka dabau,
tìah ka mangai wèq kùng hang ma ùh tablòq manoh, wèq
bài kan tabàih dech crài ka dabau da Boc Plình. **11** Tàng
loq i cabô broq mangai hnài, aih ep capoch wop qmang
ka bàu ma loh enh Boc Plình; tàng loq i cabô patìh trong
leq, haq ep patìh xi padren Boc Plình tah am, đòeq yiniq
Boc Plình jah qngah rìm trong ajang Chuaq Jesus Christ;
aih Mangai jah kan ranhòm, cwìang itai mòeq đòe ùh
lùch. Amen. (aiōn g165) **12** Oh daq da au, jò pì oe ta tanùh
ùnh kan qnhro, apaq hamàih tìah taiq ka rađeh glàm bài
kan lah halac. **13** Mahaq oh daq wiang jah nanxa ti Christ

pang leq, aih drah lem bùi pang aih, đòeq hì ranhòm da Christ trùh, oh daq hadai wiang jah kan lem bùi dìq jaq. **14** Tàng joq taiq yiniq Chuaq Jesus Christ wì jù lê capoch qmèq đac ka oh daq, aih pì jah xôq, majah qmang aih kan ranhòm xam Yiang Hadròeh da Boc Plình jràp enh qnhèq ka pì. **15** Taqne oh daq apaq i cabô chìuq xa tìah ka mangai jêh đac mangai, tìah ka mangai atùng, tìah ka mangai ratauq, tìah ka mangai ti chaq baxrùq yiniq mangai qnoeq. **16** Mahaq cabô chìuq xa taiq đeh tiaq Chuaq, aih apaq camaih, mahaq drah manè apôi Boc Plình taiq rađeh khoe jah pòq wê yiniq haq aih. **17** Majah qmang aih khoe trùh jò, aih jò kan hadrah jah baxèm qmòe enh hnim Boc Plình, tàng baxèm enh bèn, kan pulùch da bài mangai ma ùh iu tiaq Bàu Lem da Boc Plình aih èh qmang leq cadèh? **18** Tàng joq mangai taq atoq ùh i hlàu cleq ka jah dèch, aih èh bài mangai ùh i ka Boc Plình, bài mangai i yiniq lui qmang leq cadèh? **19** Qmang aih bài mangai chìuq xalep tiaq manoh Boc Plình enh, apaq tagah ka broq trong lem đòeq phùq dèh mahua yiang ka Mangai broq plình crõng taneh ma ùh jò leq tablòq manoh.

5 Au tanap bàu ka bài gucraq ma oe qne oh daq, au kô hadai gucraq qmang ka wì aih, au kô mangai ma khoe hnoq qmòe kan jìq kan xalep da Christ, mangai ma hadai wiang jah kan ranhòm ma padon trùh kô èh: **2** drah wèq ban tagop da Boc Plình ma khoe thê oh daq, broq yiniq aih ùh xài i cabô panan mahaq taiq kan lem bùi ta manoh, ùh xài đòeq hu yōc kùng baha ùh hadròeh, mahaq taiq dìq dèh manoh, **3** ùh xài đòeq hu broq bùa bài

kon triu enh qneq ka cwìang oh daq, mahaq đòeq broq
dua lem ka wì. **4** Jò Mangai ma broq gàu bài mangai ban
triu trùh, aih èh oh daq hi jah cadoh diac plình qngah
lem, ùh jò leq brôq croh. **5** Hadai qmang aih bài mangai
qyoh hanam, ep iu tiaq wì gucraq. Rìm ngai ep caxùnh
yōc kan loq hamon rađeh, majah qmang aih Boc Plình
tablêq ka mangai loq padèch rađeh, mahaq am xôq ramot
ka mangai loq hamon rađeh. **6** Qmang aih, drah qnöh
rađeh enh qneq ka tì kōng i cwìang itai da Boc Plình,
đòeq trùh jò dèh jò, haq hi dèch atōc oh daq. **7** Drah qnèp
dōng ka haq kan yùq crè ta manoh, majah qmang aih haq
mangai ma wèq ban pì. **8** Drah loq kèn rai loq clang ka
rađeh: Mangai mangai ma tagit ka pì tìah ka baco ka ùm,
ti lam dudan ka pì đòeq ti chaq ngan mangai leq haq jah
lonh. **9** Ep yòng cajap ta manoh lùi đòeq hu tablêq ka
haq, majah qmang aih bèn loq oh daq bèn jàp jià ta crōng
taneh kô hadai glàm nan no tìah ka bèn. **10** Boc Plình aih
xèm da rìm kan tabàih khoe creo ka oh daq trùh ta kan
ranhòm mòeq đòe da haq enh dalam ka Jesus Christ, jò
oh daq khoe chìuq xalep đò toq biaq, aih èh cla haq raq
broq ka oh daq jah gêh geo, hagau haginh rai tah tam
paden ka oh daq. (**aiōnios g166**) **11** Waiq kan i cwìang itai
hlài dìq ta haq, mòeq đòe ùh dìq ùh lùch! Amen. (**aiōn**
g165) **12** Au canòm ka Sinwan, mangai oh daq ùh tablòq
manoh, au achìh toq biaq nà kô đòeq hu pariaq oh daq,
hu panhìn ka oh daq loq aih joq kan tabàih dech enh Boc
Plình, oh daq ep yòng cajap ta aih. **13** Tagop Hadròeh da
bài mangai jah ràih oe ta Babylôn, i bàu hmàih ka oh daq,
kon da au aih Môc hanoh qmang aih. **14** Oh daq ep yōc

kan loq waq đòeq hìp hmàih ka dabau. Waiq kan catèm
oe dìq ti oh daq ma oe ta Chuaq Jesus Christ!

II PHIERO

1 Simôn Phiero, mangai hapōng xam mangai Tiaq cla da Chuaq Jesus Christ, achìh am ka bâi mangai ma hadai khoe jah manoh lùi lem lình qmang ka da nhèn, canòm ajang kan taq atoq da Boc Plình xam da Chuaq Jesus Christ, aih Chuaq dèch bèn: **2** waiq kan tabàih dech xam kan catèm jah am tam ka oh daq rai èh rai bac, majah qmang aih pàng manòeq kô oh daq khoe loq ka Boc Plình xam Chuaq Jesus Christ, aih Chuaq da bèn. **3** Cwìang itai da Boc Plình khoe am rìm yiniq bèn ma waq ka i ta kan rìh loq iu yùq. Broq bèn loq ka Mangai yōc kan ranhòm xam kan loq hanò đòeq creo ka bèn, **4** èh hadai taiq kan ranhòm xam kan loq hanò aih haq am tam bàu tèu hòm ka bèn ta'bài yiniq ma dìq jaq kàn dìq jaq lem, canòm ajang aih đòeq bèn jah claih ka kan om ech loh enh manoh cla ma loq ònh, đòeq wìa mangai i kan rìh da Boc Plình. **5** Aih ìq, dài oh daq majah ep àu dìq ka padren đòeq tam ka manoh lùi kan lem manoh, tam ka kan lem manoh kan hōc loq, **6** tam ka kan hōc loq kan amàn, tam ka kan amàn kan loq kèm, tam ka kan loq kèm kan loq iu yùq, **7** tam ka kan loq iu yùq kan loq waq ka oh daq, tam ka kan loq waq oh daq kan alàng. **8** Tàng joq rìm yiniq kô tōm taih ùh dìq ùh dài ta oh daq, bâi yiniq kô blinh ùh đòeq ka oh daq oe dech ùh loh plì ta kan canau loq ka Chuaq Jesus Christ bèn. **9** Mahaq tàng cabô ùh i ka bâi yiniq kô, haq loh mangai hnoq ùh hangai, loh mangai ùh xau, hèt ka rađeh khoe jah broq hreо dèh ka yiniq lui enh nèh. **10** Qmang aih, oh daq ep àu đòeq broq ka cajap trong Chuaq ma khoe creo khoe ràih pì. Tàng oh daq

broq bài yiniq kô, aih èh oh daq ùh hìaq catoeh cro; **11** aih èh, oh daq jah đìh qmoè ka laq alàng mùt ta diac halinh moèq đòe da Jesus Christ aih Chuaq da bèn, aih Mangai dèch bèn. (aiōnios g166) **12** Qmang aih, yac ka oh daq khoe loq khoe cajap deh trong joq qnàng kô, mahaq dua au ùh hêq ka bahmàng hlài bài bìac kô ka oh daq. **13** Mahaq waq toq au oe raq ta hnim ranòh kô pang leq, au ngan trong au ma yōc bàu anoe đòeq hu pariaq oh daq aih trong au ep broq; **14** majah qmang aih au loq rađeh ep rên loh khoe ka hnim ranòh kô, wop tìah qmang ka Jesus Christ aih Chuaq da bèn khoe doe ka au. **15** Au àu broq đìq dèh ka padren đòeq atìq ka jò au khoe loh lam, oh daq ùh hèt ka bài yiniq au khoe anoe kô. **16** Qmang aih, jò nhèn broq ka oh daq loq cwìang itai xam bìac Chuaq Jesus Christ bèn trùh, aih ùh xài nhèn rabiaq ka qmon liq, mahaq mat cla nhèn khoe hnoq qmòe kan ranhòm haq. **17** Majah qmang aih Haq khoe jah kan ranhòm xam kan qngah qngai enh Boc Plình, aih Baq da haq, jò Boc Plình ma đìq jaq haqn hèq doe ka haq: “Kô Kon au ma loq waq dèh, lem manoh au rìm trong.” **18** Cla nhèn hadai tàng qmòe bàu aih loh enh plình, jò nhèn ma oe ti haq ta wang hadròeh. **19** Aih ìq, kiang nhèn lùi tam bàu bài pajàu ùh hnau hòm, oh daq khòh hmàng ka bàu aih, tìah ka hadreo sreo tanòe clam cluiq, trùh jò dahì hi loh, trùh jò halõng sroq tòc ta manoh pì. **20** Adroe đìq dõng oh daq ep loq rameh, ùh i bàu pajàu leq ta hset Hadròeh kô bèn jah yōc manoh da cla đòeq hu anoe hnài. **21** Majah qmang aih, ùh i ka bàu pajàu leq ma loh enh manoh cla kon mangai, mahaq aih

jao Yiang Hadròeh mahnu ta manoh wì haq, dài wì ma khoe capoch qnoh bàu Boc Plinh.

2 Yac ka qmang aih, enh nèh raq khoe i bài mangai pajàu patìah oe taqne oh daq, aih èh hadai i mangai hnài patìah oe taqne oh daq, wì haq hnài trong patìah đòeq ti habo, cadac Chuaq ma khoe baxon hlài rađeh, taqmac yōc ka rađeh kan raliang ùh tem hnoq. **2** I bac ngai top dua wì haq ta trong rìh acaq ma jiāng ka camaih, jao bài aih dài wì majah halê patah đac trong joq qnàng. **3** Wì haq tiaq deh kan plai ta manoh, yōc bàu pajìang đòeq aluàn oh daq đòeq hujah lòeq, mahaq kan tah hadrah gòm đòeq wì haq khoe dùnh, kan raliang da wì haq ùh i panoc. **4** Majah qmang aih, tàng joq Boc Plinh khoe ùh adênh ka bài bình plinh broq yiniq lui, mahaq khwênh caqnìh bài aih ta hwin jrùq, yōc kaxi datoeq kàt đòeq bài aih tanòe clam cluiq đòeq gòm kan hadrah; (*Tartaroō g5020*) **5** tàng joq Haq khoe ùh adênh ka crōng taneh calah nèh. jò haq ma thê diac kàn trùh glua dōng bài mangai ma ngang dù aih, rong đòeq toq No-ê aih mangai hnài trong taq atoq, xam tapèh ngai qnoeq hòm; **6** tàng joq Haq khoe hadrah gùng Sodđom xam gùng Gomôro, bùh đac gùng aih loh dōng loc, đòeq broq dua ka mangai ngang dù taqnhòng atìq hu hnoq; **7** tàng joq Haq khoe paclaih Lot aih mangai taq atoq, mangai ma toq mangò đeh ka trong rìh acaq ùh lem da bài mangai ngang dù tau, **8** (majah mangai taq atoq kô rìh taqne wì aih, don tàng, mat hnoq kan ùh wìa da wì aih, manoh cliac taq atoq da haq jìq qmòe rìm hì), **9** qmang aih, Chuaq dèch mangai ma loq iu yùq ka haq claih enh kan padô qnùt, rai baxa bài mangai ùh taq

atoq, clêh padràng wì aih đòeq gòm trùh hì tah hadrah,
10 ta aih kiang bài mangai ma iu tiaq deh manoh cla ònh
toq kan ùh wìa, jù đac cwìang enh qnhèq. Bài aih ùh yùq
ka catèh rađeh, ùh hòq ka capoch qmèq ka wì craq, **11**
yac ka bìn h plinh aih bài yiang ma dêh padren i cwìang
itai yeo hnau ka wì haq dua ùh hùa i mòeq nà bàu capoch
brùaq jò hadrah ka wì craq enh ngèa ka Chuaq. **12** Bài aih
toq ti jù halê đac trong đeh ma ùh qnì, wì haq budàng
ngè wì ma ban ta hnim ùh i ka manoh loq hèm cleq, xêh
loh đòeq toq hu rùp broq jam, wì aih hadai cachìt lùch
qmang ka bài ngè aih diq, qmang aih wì haq jah baha tiaq
dèh trong dù wì haq khoe broq. **13** Wì haq yōc trong acaq
ôq bùbia dahì broq kan hyòq bùi, wì haq aih bài habau
qmèq bài kan amùa, enh toq ti amòng jò haqngui acaq
yiniang ti oh daq; **14** mat da wì haq bìn h toq kan tango,
wì haq ùh hêq ka broq yiniq lui, padô aluàn mangai ma
ùh qnhrang manoh, wì haq hmòt toq trong daiq plai, bài
aih troq toq ka ra-òh hamaiq đac raq. **15** Wì haq khoe
cadac trong ma hnhuh jang đòeq lam hwang tiaq trong
da Bala-am, kon calô da Bôso, aih mangai daiq ka kùng
baha enh kan dù, mahaq, haq aih khoe ep tàng bàu cwò
jò haq broq trong dù, **16** aih bàu loh enh hacùng kon lùa
aih ngè lùu jah capoch bàu mangai, đòeq tát padràng kan
ranhùa ratùt da pajàu aih. **17** Bài aih tìah ka thòng ùh i
ka diac, tìah ka yùc glàm cayeo dêh hlui đac, èh kan clam
cluiq khoe rap đòeq wì haq. **18** Wì haq yōc toq bàu catèh
pajìang dech raq, yōc deh kan ònh da xech akia xam
trong tango anang đòeq padô bài mangai maneo claih
enh trong ùh troq aih. **19** wì haq tèu am kan paclaih, yàng

cla wì haq aih broq dìc ka kan om ech, majah qmang aih i yiniq cleq ma khoe blêq kon mangai, aih èh kon mangai ep broq dìc ka yiniq aih. **20** Majah qmang aih, tàng wì haq khoe canòm ka Chuaq dèch bèn aih la Jesus Christ đòeq claih kan amùa da crõng taneh kô, yàng tawìh hlài hu broq dìc bài trong aih hòm, hì atìq da wì haq aih èh yeo hamoq loe ka jò baxèm hòm. **21** Wì haq khoe loq ka trong taq atoq, yàng èh talùi đac ka bàu hadròeh ma khoe hnài radéh, qmang aih ùh qnì dõng aih yeo lem hòm. **22** Wì haq joq khoe wop qmang ka bàu alìah: Koq liah hlài dèh hac, chùa khoe dahùm èh catàm hlài ta tráp. ChCn 26:11

3 Yôi oh daq da au, kô aih yàng baiq au achìh jàiq ka oh daq. Ta jàiq kô xam jàiq ma adroe, au àu chaq trong đòeq bahmàng rai pariaq manoh lem da oh daq, **2** au enh pì hmàng hlài dìq ka bàu pajàu hadròeh khoe anoe calah nèh xam bàu thê da Chuaq, aih la Chuaq dèch bèn haq khoe thê bài mangai tiaq cla da haq khoe anoe hnài. **3** Angoe aih ep loq rameh, taqnòng atìq lùch èh i bàc ngai loq halê patah, yõc bàu do racaih, rìh tiaq dèh kan loq ònh da manoh cla, **4** trùh doe: Aleq bàu Chuaq ma doe haq trùh hlài, bàu aih taleq? Majah qmang aih enh qnhòng bài boc yaq nhèn cachìt enh nèh trùh manòeq, rìm yiniq dua oe raq qmang ka jò baxèm i plình crõng taneh? **5** Wì haq to ùh hmàng, canòm ka bàu Boc Plình men i plình i crõng taneh, taneh wìa enh diac, khoe loh enh qne diac, **6** crõng taneh qnhòng aih hadai khoe raliang ka diac aih, haq khoe cram ka diac kàn. **7** Mahaq plình crõng taneh qnhòng aih hadai canòm ka bàu aih men oe trùh mamòeq, hu đòeq padon am ka ùnh, ùnh jah

baxù cađac haq ta hì tah hadrah đòeq raliang đac mangai dù. **8** Mahaq oh daq da au, apaq hèt mòeq yiniq kô, enh ngèa Chuaq mòeq hì budiang mòeq muàn hanam, mòeq muàn hanam budàng mòeq hì. **9** Chuaq ùh batrò dèh bàu haq ma khoe anoe qmang ka wì tau ma xoh, mahaq Haq khoe chìuq àt ka oh daq, ùh enh mòeq ngai leq cachìt hnhung, mahaq enh ka rìm ngai loq raxach wìh hlài. **10** Mahaq hì da Chuaq tìah ka mangai atùng. Jò aih èh, i atêh gruàng mòeq qmang ka dêh, èh bìe caqnàm plình hi hnhung dǒng, rìm yiniq ta aih ùnh bùh dǒng, taneh xam rìm yiniq enh crõng taneh hadai ùnh bùh dìq dǒng. **11** Rìm yiniq dìq ep palùng cađac qmang aih, ha oh daq kô èh ep rìh qmang leq? Oh daq kiang ep rìh hadròeh rai iu yùq Boc Plình, **12** jò oh daq qnang tangèh gòm hì da Boc Plình rên trùh, aih hì ùnh ma bùh đac dìq dǒng caqnàm plình xam rìm yiniq ta aih dìq cheo wiac dǒng. **13** Mahaq tiaq bàu Haq ma khoe tèu, bèn tangèh gòm trõc neo, taneh neo, aih nòe da kan taq atoq rìh oe. **14** Qmang aih, dìq ka oh daq da au, aih raq yiniq oh daq ma tangèh gòm, dài oh daq majah ep dìq ka padren wèq rađeh, đòeq Chuaq hnoq oh daq rìh acaq catèm ùh hìaq i xìt i habau, ùh i ajang leq ep cwò. **15** Khoe aih, ep ngan loq rameh Chuaq da bèn chìuq àt ka dùnh aih đòeq hu jah dèch oh daq, tìah ka Phaulô, oh daq ma haten hatià da bèn, khoe yõc kan rabiaq Boc Plình am ka rađeh hu achìh jàiq ka oh daq. **16** Ta rìm yàng achìh ka oh daq, haq hadai ràu trùh bìe trong aih, ta aih i tang nòe xa ka loq tàng, dài bìe mangai ma blùng ùh cajap manoh lùi, wì yõc jang aih đòeq capoch patah đac taqnoeq, tìah ka wì haq khoe

capoch lìq ajang noeq oe ta hset Hadròeh diq, taqmac yōc
ka rađeh kan raliang hnhung. **17** Qmang aih, oh daq da
au, pàng oh daq khoe jah loq adroe, oh daq ep wèq rađeh
ma rabiaq haq oq, yùq èh tabeq oh daq troq kan camìt
enh bài mangai dù aih padô. Cađac hnhung kan cajap da
rađeh. **18** Drah rai kàn ta kan tabàih dech xam ta kan loq
ka Chuaq xam Chuaq dèch bèn, aih la Chuaq Jesus Christ.
Waiq kan ranhòm hlài dìq ta Chuaq enh qnhòng manđeq
trùh hloe ta calah mòeq đòe! Amen. (**aiōn g165**)

I JON

1 Yiniq ma khoe i dèh enh adroe dìq döng, aih yiniq nhèn ma khoe tàng, yiniq mat nhèn ma khoe hnoq, yiniq nhèn ma khoe hamrìh ngan èh tì kǒng nhèn khoe jah bèq: aih nhèn anoe trùh Bäu kan rìh; **2** majah qmang aih kan rìh khoe jah mahnu qnoh, nhèn i hnoq, èh nhèn qnang anoe hlài dôq pì loq, nhèn bahìa ka oh daq loq kan rìh halinh mòeq đòe ma oe dèh ti Baq mahaq khoe jah patô am nhèn hnoq; (**aiōnios g166**) **3** nhèn yōc yiniq nhèn ma khoe hnoq hu bahìa ka oh daq đòeq oh daq jah taqmùt pajùm ti nhèn. Joq qnàng nhèn i kan taqmùt pajùm ti Boc Plình aih Baq xam Kon da haq aih Chuaq Jesus Christ. **4** Nhèn achìh bài yiniq kô ka oh daq, đòeq kan lem bùi nhèn jah gêh geo. **5** Kô raq bàu hnài nhèn ma khoe tàng enh cla haq, nhèn anoe hlài ka oh daq loq: Boc Plình aih kan qngah, enh dalam haq ùh i ka kan clam. **6** Tàng joq bèn doe đeh kô taqmùt pajùm ka haq, mahaq oe raq cadiang lam ta kan clam cluiq, aih bèn capoch qnùt, ùh broq tiaq trong joq qnàng. **7** Mahaq tàng bèn lam ta qngah tìah ka cla haq oe ta qngah, aih bèn taqmùt pajùm ka dabau, mahim Chuaq Jesus Christ kon da haq broq hreо dìq döng yiniq lui bèn. **8** Tàng bèn doe đeh kô ùh lòm i ka yiniq lui cleq, aih bèn qnùt cla rađeh, kan joq qnàng ùh oe enh dalam ka bèn. **9** Tàng bèn paqnoh deh yiniq lui. Haq aih la mangai ùh tablòq manoh mangai taq atoq đòeq lêh caqnaih yiniq lui bèn rai broq bèn hreо dìq döng kan ùh taq atoq da bèn. **10** Tàng bèn doe đeh qnhòq lah broq cleq i yiniq lui, aih bèn broq ka haq wìa mangai loq amòng, bàu haq ùh oe ta bèn.

2 Yôiq wì kon yoh da au, au achìh bài yiniq kô ka pì, đòeq pì ùh hìaq broq yiniq lui. Tàng loq i cabô broq yiniq lui, aih bèn i Mangai waiq khàn am ka bèn ajang Boc Plình, aih Chuaq Jesus Christ aih la Mangai taq atoq. **2** Haq aih broq ramènh đòeq hu baxon hlài da bèn yiniq lui, ùh xài toq da bèn hi hêq mahaq xam dìq ka yiniq lui da cröng taneh kô. Wèq bàu Boc Plình hnài **3** Kô hagleq bèn majah loq ka rađeh khoe loq ka Haq, aih pàng bèn khoe wèq ranenh da haq! **4** Cabô doe: Au loq ka Haq, mahaq ùh wèq ranenh haq, aih mangai loq qnùt, kan joq qnàng blinh ùh oe ta mangai aih. **5** Mahaq tàng mangai leq wèq bàu haq, aih èh kan loq waq da Boc Plình joq gêh geo ta mangai aih. Aih èh, bèn men loq ka rađeh oe ta haq. **6** Cabô doe đeh oe enh dalam haq, hadai ep broq tìah ka haq khoe broq. **7** Yôiq bài oh daq au ma loq waq deh, kô ùh xài ranenh au neo achìh ònh ka oh daq, mahaq ranenh dùnh oh daq ma khoe jah enh jò baxèm nèh raq, ranenh dùnh kô aih raq bàu oh daq ma khoe jah tàng. **8** Mahaq au hadai achìh ka oh daq ranenh neo, aih trong joq qnàng enh dalam ka Chuaq xam ta oh daq, majah qmang aih kan clam cluiq khoe pi i, èh kan qngah joq qnàng khoe sreo qngah. **9** Mangai leq doe đeh oe ta kan qngah, mahaq git dèh ka oh daq, haq aih oe raq ta clam. **10** Mangai leq ha-och dèh ka oh daq, haq aih oe ta kan qngah, enh dalam haq aih ùh i ka yiniq cleq ma broq ka wì qnoeq kan catoeh. **11** Mahaq, cabô tagit dèh ka oh daq, aih haq oe ta nòe clam, broq toq kan clam cluiq rai ùh qnì ka rađeh qnang lam taleq, majah qmang aih kan clam khoe broq ka mat haq pi xau hnoq. **12** Yôiq bài kon

qyoh da au, au achìh ka pì kon, majah qmang aih yiniq lui da pì kon canòm ka yiniq Chuaq khoe jah caqnaih. **13** Bì mangai ma broq baq, au achìh ka pì, majah qmang aih pì khoe loq ka Mangai ma i qmòe dèh enh jò baxèm. Bì mangai adrùh radam, au achìh ka pì, majah qmang aih pì khoe tablêq kan kiac dù. **14** Yôiq kon qyoh da au, au achìh ka pì kon, majah qmang aih pì khoe loq ka Baq. Yôiq bì mangai ma broq baq, au khoe achìh ka pì majah qmang aih pì khoe loq ka Mangai ma khoe i qmòe dèh enh jò baxèm. Yôiq bì mangai radam, au achìh ka pì majah qmang aih pì aih mangai i padren, bàu Boc Plinh oe enh dalam pì, èh pì hadai khe tablêq kan kiac dù. **15** Apaq bêh cröng taneh kô, hadai apaq bêh bì dahwèq ta cröng taneh kô, majah qmang aih cabô bêh cröng taneh kô, aih èh kan loq iu yùq ka Boc Plinh ùh oe ta mangai aih. **16** Majah qmang aih rìm yiniq ta cröng taneh kô: Trong xech akia ma enh, trong mat ma ònh xam trong loq catèh da qnhòng kô, dìq ùh xài loh enh Baq, mahaq loh enh cröng taneh. **17** Cröng taneh kô xam kan plai da haq kô èh hnhung dìq döng mahaq mangai maleq ma broq tiaq trong manoh Boc Plinh enh, ma aih èh ma oe mòeq đòe.

(aiôn g165) **18** Yôiq wì kon da au, kô raq jò atìq lùch, pì kon khoe tàng doe mangai tablêq hlài ka Christ ep trùh. Wop manòeq kô i bac ngai tablêq hlài ka Christ khoe trùh, ajang aih, bèn hu loq aih raq jò atìq lùch. **19** Wì haq khoe loh enh taqne bèn, mahaq wì haq ùh mòeq bua ka bèn, majah qmang aih tàng joq wì haq mòeq bua ti bèn, aih wì khoe oe ti bèn, mahaq khoe i qmang aih đòeq hu jah patô qnoh wì haq ùh mòeq bua ka bèn. **20** Mahaq da pì kon,

khoe jah kan xùt dàu enh Mangai Hadròeh, aih khoe jah loq rìm yiniq. **21** Au achìh ka pì kon aih ùh xài pì ùh qnì kan joq qnàng, mahaq taiq pì loq kan joq qnàng, pì loq ùh i ka kan patìah loh enh kan joq qnàng. **22** Cabô ma capoch qnùt? aih ma ùh xài bài mangai ma doe Jesus aih ùh xài Christ? Aih raq Mangai ma tablêq hlài ka Christ, aih bài mangai ma doe ùh i ka Baq, ùh i ka Kon! **23** Cabô ma hangah đac Kon, mangai aih ùh i ka Baq, mangai leq doe đeh loq ka Kon mangai aih hadai loq ka Baq. **24** Da pì kon, trong pì ma khoe tàng enh jò baxèm ep oe yôt enh dalam ka pì. Tàng joq yiniq pì kon ma khoe tàng qmòe enh jò baxèm oe yôt ta pì, aih èh pì kon hadai jah oe ta Kon xam ta Baq. **25** Bàu cla Haq ma khoe tèu am ka bèn, aih raq kan rìh halinh mòeq đòe. (aiōnios g166) **26** Au achìh ka pì kon bài yiniq kô aih đòeq anoe trùh bài mangai ma loq qnùt pì kon. **27** Da pì kon manòeq kô, dàu pì ma khoe jah xùt enh Chuaq dua oe raq enh dalam pì, qmang aih pi cabô ep hnài cleq hòm, mahaq kan xùt dàu da haq jah hnài pì rìm trong, kan xùt dàu aih joq qnàng ùh xài kan paqnùt, qmang aih thê pì oe ta dalam haq, tiaq qmang ka bài bàu hnài pì ma khoe jah tàng. **28** Qmang aih manòeq kô, yôiq wì kon qyoh da au, drah oe enh dalam ka haq, đòeq jò haq trùh, bèn jah bình kan cajap manoh, ùh hìaq ep crè xep ta kan camaih jò haq trùh. **29** Tàng pì loq haq aih kan taq atoq, aih hadai ep loq mangai leq broq tiaq kan taq atoq, aih mangai ma ha-uang loh enh haq.

3 Ngan beq, Boc Plinh khoe patô qnöh kan haq loq waq ka bèn bàc dàng leq, loh qmòe ka jah creo ka bèn aih kon da Boc Plinh, bèn joq kon da haq joq qnàng. Aih ìq dài

crōng taneh kô ùh loq ka bèn majah qmang aih wì qnhòq
lah qnì ka haq. **2** Yôiq oh daq au ma loq waq, manòeq kô
bèn kon da Boc Plìn, mahaq tabla èh bèn qmang leq
cadèh, trong aih qnhòq jah paqnoh. Bèn loq jò haq trùh,
bèn jah tìah wop qmang ka haq, majah qmang aih bèn
jah hnoq haq qmang ka cla haq. **3** Cabô i kan tangèh aih
ta manoh, ep broq ka rađeh jah hadròeh tìah ka haq.
4 Mangai leq ma broq yiniq lui, aih broq kan pagau ka
ranenh, majah qmang aih yiniq lui aih la kan pagau ka
ranenh. **5** Mahaq pì loq, Chuaq Jesus Christ khoe trùh
đòeq hu dèch đac yiniq lui, ta dalam haq ùh lòm i qmòe
ka yiniq lui cleq. **6** Cabô oe enh dalam haq mangai aih ùh
broq yiniq lui. Mangai leq ma broq yiniq lui, aih mangai
qnhòq lah hnoq ka haq, qnhòq hmaq loq ka haq. **7** Wì
kon qyoh da au, apaq đòeq cabô qnùt rađeh: Mangai broq
kan taq atoq aih mangai ma taq atoq, tìah ka cla Chuaq
aih taq atoq. **8** Mangai leq ma broq yiniq lui aih da kan
kiac dù, majah qmang aih kiac dù broq yiniq lui qmòe
enh jò baxèm. Kon da Boc Plìn khoe loh đòeq raliang
đac bìac broq da kan kiac. **9** Ùh i cabô ha-uang loh enh
Boc Plìn ma oe raq broq yiniq lui hòm, majah qmang
aih pliang adrech da Boc Plìn oe ta haq, haq pi oe jah
broq yiniq lui hòm, majah qmang aih haq khoe ha-uang
loh enh Boc Plìn. **10** Ajang aih, wì majah canau loq kon
da Boc Plìn xam kon da kiac dù: Cabô ùh broq kan taq
atoq aih ùh xài da Boc Plìn, mangai ma ùh qnì ha-och
dèh ka oh daq hadai qmang aih. **11** Majah qmang aih, kô
bàu pì kon ma khoe tàng qmòe enh jò baxèm: Bèn ep loq
waq ka dabau. **12** Apaq tìah ka Ca-in, mangai da kiac dù,

ma khoe jêh đac deh oh. Gleq haq ma jêh đac deh oh?
Majah qmang aih haq broq trong dù, da oh haq aih broq
trong taq atoq. **13** Qmang aih oh daq da au, pì ùh dùh
hamàih dèh tàng joq crõng tanh kô tagit ka pi. **14** Bèn
loq ka rađeh khoe clech ka kan cachìt đòeq trùh ta kan
rìh, majah qmang aih, bèn loq ha-och deh ka oh daq.
Mangai leq ùh qnì loq waq haq aih oe raq ta kan cachìt.
15 Cabô git dèh ka oh daq aih mangai jêh mangai, oh daq
loq ùh i mòeq ngai leq jêh đac mangai ma i kan rìh halinh
oe ta haq. (aiōnios g166) **16** Ajang kô bèn jah canau kan loq
waq: Chuaq Jesus khoe cađac dèh kan rìh am ka bèn, dài
bèn majah hadai ep cađac dèh kan rìh am ka oh daq. **17**
Tàng mangai leq i kùng hang ta qnhòng kô, haq hnoq
dèh oh daq qnang nanxa mahaq ùh lòm tamèt ha-och ka
wì, aih èh kan loq waq da Boc Plinh oe ta mangai qmang
leq majah! **18** Yôiq wì kon qyoh da au, bèn apaq loq waq
toq xi bàu dech ajang goe rapet, mahaq xam yiniq broq
tiaq manoh joq qnàng. **19** Aih èh, bèn loq ka rađeh joq oe
ti bàu joq qnàng, jah cajap manoh enh ngèa haq. **20** Tàng
joq manoh cliac bèn trech bèn, aih èh Boc Plinh kàn yeo
hnau ka manoh cliac bèn hòm, haq loq rìm ka yiniq. **21**
Yôiq oh daq da au, tàng joq manoh cliac bèn ùh hìaq
trech bèn, aih èh bèn jah cajap manoh đòeq hu thia ten
ka Boc Plinh, **22** aih èh yac ka bòch cleq, dua bèn jah,
majah qmang aih bèn wèq tiaq bàu haq thê rai broq lem
ka manoh haq. **23** Manòeq, kô bàu da haq thê: Bèn ep lùi
yiniq Kon da haq, aih Chuaq Jesus Christ, èh bèn hadai ep
loq waq ka dabau qmang ka bàu haq hnài bèn. **24** Mangai
leq iu tiaq bàu haq thê, aih jah oe ta dalam Boc Plinh, èh

Boc Plinh hadai oe ta mangai aih, bèn majah loq haq oe ti bèn, aih canòm ka Yiang Hadròeh da haq ma khoe am ka bèn.

4 Oh daq da au, apaq lùi döng rìm yiang, mahaq ep qnhro ngan hu canau rìm yiang aih ajoq trùh enh Boc Plinh, majah qmang aih i bac ngai pajau patiah khoe trùh ta cröng taneh kô. **2** Qmang kô döeq hu canau ka Yiang da Boc Plinh: Yiang leq ma doe Chuaq Jesus Christ yōc chac mangai döeq hauang loh ta cröng taneh kô, yiang aih trùh enh Boc Plinh. **3** yiang ma chàih cađac Christ, yiang aih ùh xài trùh enh Boc Plinh. Aih raq yiang da mangai ma tablêq hlài ka Christ, pì kon ma khoe tàng doe haq trùh ta ngèa kô èh, manòeq kô khoe oe ta wì phù cròng. **4** Yôiq wì kon da au, pì kô aih da Boc Plinh, khoe blêq wì aih, majah qmang aih Mangai ma oe ti pì aih yeo kàn dìq döng ka wì ma oe ta cröng taneh kô. **5** Wì haq aih da cröng taneh kô, capoch tìah ka cröng taneh dài wì phù cròng majah dì bàu wì haq. **6** Bèn aih da Boc Plinh: mangai leq loq ka Boc Plinh aih èh haq tamàng bèn, mangai leq ùh xài da Boc Plinh, aih èh haq ùh tamàng bèn. Aih bèn hu canau ka yiang bàu joq qnàng xam yiang paqnùt. **7** Oh daq da au, bèn drah loq waq ka dabau, majah qmang aih kan loq waq trùh enh Boc Plinh, mangai leq loq waq, mangai aih ha-uang loh enh Boc Plinh, loq ka Boc Plinh. **8** Mangai ùh qnì waq, aih haq ùh qnì ka Boc Plinh, majah qmang aih Boc Plinh aih kan loq waq. **9** Manoh Boc Plinh loq waq ka bèn khoe paqnoh ajang kô: Boc Plinh khoe thê dèh Kon mòeq da haq loh ta cröng taneh, dôq bèn canòm ka Kon aih đöeq hujah rìh.

10 Kan loq waq oe ajang kô: ùh xài bèn khoe loq waq ka Boc Plình, yàng haq ma khoe loq waq ka bèn, haq thê dèh Kon broq ramènh baxon hlài da bèn yiniq lui. **11** Yôiq oh daq au, tàng joq Boc Plình khoe loq waq ka bèn qmang aih, aih bèn hadai ep loq waq ka dabau. **12** Qnhòq i cabô lah hnoq Boc Plình, tàng bèn loq waq ka dabau, aih Boc Plình oe enh dalam bèn, èh kan loq waq haq jah gêh geo enh dalam ka bèn. **13** Ajang kô bèn loq đeh oe enh dalam ka haq èh haq hadai oe enh dalam ka bèn: Aih haq khoe am Yiang Hadròeh haq ka bèn. **14** Nhèn khoe hnoq rai khoe panhìn rameh: Boc Plình aih Baq khoe thê deh Kon trùh đòeq wìa Mangai dèch mangai ta crõng taneh kô. **15** Tàng i mangai leq doe: Chuaq Jesus aih Kon da Boc Plình, aih èh Boc Plình oe enh dalam wì aih, wì aih hadai oe ta dalam Boc Plình. **16** Bèn khoe loq rai lùi kan Boc Plình loq waq ka bèn. Boc Plình aih kan loq waq, mangai leq oe ta kan loq waq aih haq oe ta dalam Boc Plình, èh Boc Plình hadai oe ta haq aih. **17** Canòm ajang aih, kan loq waq men jah gêh geo ta bèn, đòeq manoh bèn jah cajap ta hì hadrah: majah qmang aih oe ta crõng taneh kô Chuaq Jesus qmang leq bèn hadai qmang aih. **18** Blinh ùh i kan yùq crè ta kan loq waq, mahaq kan loq waq gêh geo doeħ đac kan yùq crè, majah qmang aih kan yùq crè i kan baxa, mangai ma yùq crè ùh jò leq jah gêh geo ta kan loq waq. **19** Bèn loq waq, aih pàng Chuaq ma khoe loq waq ka bèn adroe. **20** Tàng i cabô doe đeh loq waq ka Boc Plình, mahaq tagit deh ka oh daq, aih mangai loq qnùt, majah qmang aih mangai ma ùh ha-och ka oh daq haq ma hnoq xi mat, aih ùh jò leq haq loq waq ka Boc Plình haq ma ùh

xau hnoq. **21** Bèn khoe jah enh haq bàu hnài kô: Cabô loq waq ka Boc Plình aih hadai ep loq waq dèh ka oh daq.

5 Cabô lùi Chuaq Jesus aih raq Christ, haq aih ha-uang loh enh Boc Plình, cabô loq waq ka Boc Plình aih èh hadai loq waq ka kon da haq. **2** Qmang kô bèn jah loq ka rađeh loq waq ka wì kon da Boc Plình, aih jò bèn loq waq ka Boc Plình rai wèq gêh ka ranenh da haq. **3** Kan loq waq ka Boc Plình aih rameh: wèq tiaq ranenh haq thê. Ranenh da haq aih ùh xài kan trap, **4** majah qmang aih mangai leq ma ha- uang loh enh Boc Plình, aih jah blêq cröng taneh kô, kan blêq cröng taneh kô aih la manoh lùi da bèn. **5** Cabô ma blêq cröng taneh kô, aih ma ùh xài mangai ma lùi Chuaq Jesus aih kon Boc Plình qmòh? **6** Chuaq Jesus aih Mangai ma khoe yōc diac xam mahim đòeq hu trùh, ùh xài toq xi diac hi hêq, mahaq xam diac xam mahim. **7** Yiang Hadròeh khoe panhìn qmang aih, majah qmang aih Yiang Hadròeh aih raq bàu joq qnàng. **8** Majah qmang aih, i piq kan panhìn qmang kô: Yiang Hadròeh, diac, èh xam mahim; piq aih broq mòeq. **9** Tàng bèn jah kan panhìn enh kon mangai mahaq kan panhìn da Boc Plình aih yeo haqnhèq hòm; majah qmang aih Haq panhìn dèh Kon haq. **10** Cabô lùi Kon da Boc Plình, haq i kan panhìn aih ta chac rađeh, mangai leq ma ùh lùi Boc Plình, aih haq doe Boc Plình loq amòng, majah qmang aih haq ùh lùi bàu Boc Plình ma khoe panhìn deh Kon. **11** Kan panhìn rameh: Boc Plình khoe am kan rìh halinh mòeq đòe ka bèn, kan rìh aih oe enh dalam Kon haq. (aiōnios g166) **12** Cabô i Kon, aih haq i kan rìh, cabô ma ùh i ka Kon Boc Plình, haq aih ùh i ka kan rìh. **13**

Au achìh bài bàu kô đòeq pì kon aih bài mangai ma lùi yiniq Kon da Boc Plình loq đeh i kan rìh halình mòeq đòe. (aiōnios g166) **14** Kô yiniq ma broq ka bèn cajap manoh đòeq hu thia haten ka Boc Plình: Tàng bèn waiq khàn tiaq manoh haq enh, aih yac ka bèn bòch cleq dua haq tamàng bèn. **15** Tàng bèn loq haq tamàng bèn yac ka bèn bòch cleq, aih bèn loq đeh khoe jah yiniq bèn ma bòch haq. **16** Tàng bèn hnoq oh daq broq yiniq lui, mahaq qnhòq troq ka cahìt, aih drah waiq khàn beq, aih èh Boc Plình am wì rìh, aih am ka bài mangai ma broq yiniq lui mahaq qnhòq troq ka cachìt. I diq yiniq lui ma troq ka cachìt, au ùh i thê pì waiq khàn ka yiniq lui qmang aih. **17** Rìm kan ùh taq atoq aih dìq yiniq lui; mahaq i yiniq lui qnhòq hìaq troq ka cachìt. **18** Bèn loq mangai leq ha-uang enh Boc Plình aih èh ùh hìaq broq yiniq lui; mahaq mangai ma ha-uang loh enh Boc Plình ep wèq cla rađeh, kiac dù ùh habo cleq ka haq jah. **19** Bèn loq đeh kô aih kon qyoh da Boc Plình, wì phù cròng ta cröng taneh dìq oe enh qneq ka cwiang da kiac dù. **20** Bèn loq Kon Boc Plình khoe trùh, haq am ka bèn kan loq đòeq bèn canau ka haq aih Boc plình joq qnàng, oe enh dalam Kon da haq aih la Chuaq Jesus Christ. Haq aih raq Boc Plình joq qnàng xam kan rìh halình mòeq đòe. (aiōnios g166) **21** Yôiq wì kon qyoh da au, wèq rađeh ma khoe ka radua qmù oq.

II JON

1 Gucraq Tagop Hadròeh achìh aràng ka yaq ma khoe jah ràih hloe xam kon da ìh aih mangai au ma loq waq deh joq qnàng; ùh xài toq au mahaq xam dìq ka mangai ma loq ka bàu joq qnàng; **2** majah qmang aih bàu joq qnàng aih rìh oe enh dalam bèn èh oe hloe ti bèn mòeq đòe: **(aiōn g165)** **3** waiq kan tabàih dech, kan catèm, trùh enh Boc Plình aih Baq, xam enh Chuaq Jesus Christ aih Kon da Baq, jah oe ti bèn ta bàu joq qnàng xam kan loq waq! **4** Manoh cliac au joq lem bùi qnàng jò hnoq bài kon da ìh i qnah ngai broq tiaq bàu joq qnàng, tìah ka ranenh Baq ma khoe thê bèn. **5** Manòeq kô yaq ôi, ìh mangai khoe ràih au pariaq ìh, ùh xài au achìh ka ìh ranenh maneo, mahaq bahmàng hlài yiniq bèn khoe jah yōc enh baxèm, aih bèn ep loq waq ka dabau. **6** Kan loq waq aih qmang kô: Bèn ep broq tiaq ranenh da Boc Plình. Aih la ranenh pì khoe jah tàng qmòe enh baxèm, đòeq hu broq tiaq. **7** Ta crõng taneh khoe i haraya bài mangai padô qnùt, aih bài mangai doe Chuaq Jesus Chirst ùh i yōc xech akia đòeq trùh: aih raq bài mangai padô qnùt, mangai tablêq ka Christ. **8** Cla pì ep hmàng wèq radeh, đòeq ùh hìaqcadac hnhung bài yiniq bèn ma khoe abroq jah dèh, đòeq jah kan baha tôm xrôm. **9** Cabô ma toq ti hawàt yi adroe adroe, ùh i oe hloe ta bàu da Christ ma hnài, aih mangai ùh i ka Boc Plình. Mangai leq cajap manoh tiaq bàu Christ hnài, mangai aih i xam Baq xam Kon. **10** Tàng cabô trùh ta pì mahaq ùh wê bàu hnài aih, apaq pachùh wì mùt ta hñim, hadai paq loh đìh wì aih. **11** Majah qmang aih, mangai leq đìh pachùh wì aih, haq khoe wiang pajùm

trong dù ti wì aih. **12** Au oe i bac yiniq enh achìh ka pì; au
ùh enh achìh toq xi jàiq xam mùc, mahaq au toq ngèh
jah trùh hmàih ka pì dôq bèn jah tangèa ti dabau, hu
tahatuàng, đòeq kan lem bùi bèn jah gêh geo. **13** Bìai kon
oh daq cadri da ìh, aih bìai mangai Boc Plìngh khoe ràih
tanap bàu hmàih trùh ìh.

III JON

1 Wì craq, achìh dèh ka Gai-ut, aih mangai au ma camet, ma loq waq dèh ta bàu joq qnàng. **2** È daq au ma loq waq deh, au waiq khàn ka ìh jah padrõng rìm trong, jah tadêh enh chac hamac tìah ka ìh khoe jah padrõng ta mahua yiang. **3** Au dìq jaq lem bùi jò wì oh daq trùh tacô anoe ìh loq camet ka bàu joq qnàng, ìh khoe broq tiaq bàu aih qmang leq cadèh. **4** Au pi i cleq bùi yeo loe ka jò au jah tàng dèh kon broq tiaq bàu joq qnàng. **5** Daq au ma loq waq dèh, ìh ùh tablòq manoh cliac ta rìm trong ìh ma patìh ka wì oh daq, yac ka wì haq aih tamoe trùh đeh enh hangai. **6** Wì haq khoe anoe hlài kan loq waq da ìh enh ngèa ka Tagop Hadròeh. Ìh broq qmòe ka geo jò ìh wiang hanò ka bìac lam trong da wì haq waq qmòe cajah tajì ka Boc plình ma aih lem joq qnàng. **7** Majah qmang aih wì haq loh lam ka yiniq Chuaq Jesus Chirst, wì haq ùh jah qmòe cleq enh wì mangai enh gùng. **8** Bèn khòh đìh yōc bài mangai qmang aih, dôq bèn xam wì haq hadai jah wiang patih ka bàu joq qnàng. **9** Au khoe achìh ka Tagop Hadròeh, mahaq Đìôtrep aih mangai enh yòng broq gàu Tagop Hadròeh ùh dì bàu nhèn. **10** Qmang aih èh jò au trùh, au anoe qnoh dōng bài kan qmèq haq khoe broq, aih haq yōc bàu ngang dù đòeq capoch tablêq ka nhèn. Ùh xài toq aih hi hêq, oh daq trùh haq ùh đìh, tàng i cabô enh đìh yōc oh daq, aih haq ùh lòh wì rai hnan qnoh đac wì aih loh enh gùng ka Tagop Hadròeh. **11** È daq da au ma loq waq deh, apaq top dua trong dù mahaq top dua trong lem. Cabô broq trong lem aih mangai da Boc Plình; mangai ma broq trong dù, ùh jò leq jah hnoq Boc Plình.

12 Rìm ngai dìq capoch lem ka Đêmêtriu, bàu joq qnàng hadai panhìn qmang aih, cla nhèn hadai wiang anoe lem ka haq, ìh loq bàu da nhèn aih joq qnàng. **13** Au oe i bàc yiniq enh achìh ka ìh, mahaq au ùh enh achìh xi long achìh xi mùc: **14** au toq ngèh ka rênh jah trùh hmàih ka ìh dôq ba jah tangèa hu hatuàng ti dabau. Waiq kan catèm jah oe ti ìh! Bài bua bèn tacô tanap bàu hmàih ka ìh. Tanap bàu hmàih tiaq qmòe yiniq oh daq tang ngai oq.

JUĐE

1 Juđe, hapōng da Chuq Jesus Christ, oh da Jaco, achìh am ka bài mangai ma khoe jah creo, jah Boc Plình aih Baq bèn loq waq, jah Chuaq Jesus Christ wèq ban: **2** waiq kan tamèt, kan catèm, kan loq waq rai èh rai bac ka oh daq! **3** Oh daq da au, au dìq jaq tangèh achìh ka oh daq trong bèn jah dèch claih pajùm ti dabau, yàng manòeq au hnoq rađeh ep achìh hu pariaq oh daq ep cajap manoh đòeq hu wiang tablêq ka manoh lùi da bèn, aih la manoh lùi khoe jah am ka mangai hadròeh mòeq yàng raq khoe tàu. **4** Majah qmang aih i bài wì tau ti achop mùt taqne oh daq bèn, wì haq aih la bàimangai khoe lah đòeq crài enh nèh raq đòeq padon pòq kan baxa, aih bài mangai ùh iu yùq Boc Plình, halih kan loq waq da Boc Plình wìh wìa kan dù, aih bài mangai ùh lùi Chuaq dèch bèn aih Jesus Christ, toq haq raq Chuaq bèn. **5** Yac ka oh daq khoe loq, mahaq dua au enh bahmàng hlài ka pì, calah nèh Chuaq paclaih mangai da haq loh khoe ka gùng Êjiptô, atìq aih haq palùng döng bài mangai ma ùh lùi; **6** èh bài bình plình ma ùh wèq deh caloeh rai cađac deh teo nòe, aih haq khoe yōc caxy datoeq kàt đòeq wì aih tanèe clam cluiq, gồm hì hadrah kàn. (aïdios g126) **7** Hadai qmang aih diq, gùng Sôđôm gùng Gômôro xam bài plài dudan aih hadai cađac rađeh ta kan tango lah halac, gucalô tango hadai gucalô, gucadri tango hadai gucadri. Manòeq kô wì aih qnang chìuq baxa ta ùnh ùh pat, đòeq broq dua am ka bèn hnoq. (aïōnios g166) **8** Hanoh qmang aih, bài mangai ma ùh iu yùq ka Boc Plình kô, toq ti apô broq amùa dèh ka chac cla, jù lê đac cwiang ma haqnhèq hùa ratauq bài

ka wì craq. **9** Jaq Michen aih cla craq bài bình plình jò haq tablêq ka Kiac dù hu blah yōc hanang Môise, aih dua haq ùh hùa i bàu hnap hnuq hadrah cleq; haq toq doe đeh rameh: Waiq Chuaq cwò ka ìh! **10** Yàng da wì kô aih, trong leq wì haq ma ùh qmì aih wì haq jù đac hloe; trong leq wì haq loq laiq đeh ka loq tìah ka ngè rìh ùh i ka manoh, wì yōc trong aih raq đòeq broq raliang cla rađeh. **11** Joq hađo ka wì haq qnàng, majah qmang aih wì haq tiaq trong da Ca-in, cadàu tiaq kan plai loh qmòe ka cađac rađeh clìh ta kan ùh troq da Bala-am; raliang hnhung tiaq kan gôpla da Côre. **12** Wì haq tìah ka habau ra-om oe taqne yiniang loq waq, qmang ka mangai ban trìu hèm toq ka ban rađeh ka panàc, ùh hèm yùq qmòe cleq; qmang ka yùc ùh i ka diac; cayeo tàih tacô tatau; qmang ka long prùng gäu ralìm, ùh loh plì, baiq yàng cachìt, tarèq riah; **13** qmang ka lai laq diac raxìq plôh dèh camùh amùa; tìah ka halõng lac lai, kan clam cluiq mòeq đòe khoe palauq đòeq ka wì haq! (aiōn g165) **14** Taiq wì kô raq, Hênoc aih xau tapèh qnhòng da Ađam, khoe capoch pajàu rameh: **15** Hacô, Chuaq trùh xam bình ka muàn mangai hadroèh đòeq hadrah dìq ka mangai, đòeq hu taqmòq yiniq lui ka mangai ma ùh lùi, tiaq rìm trong wì haq ma khoe ùh iu yùq, hloe xam tang nà bàu bài mangai aih khoe capoch tablêq hlài ka haq. **16** Aih la bài mangai loq mamùc ma-uàng, loq wech goh, cadàu tiaq dèh kan loq ònh da cla, enh toq ti catèh, toq ra raheq pajìang bàu ka mangai qnoeq, đòeq hu jah lòeq ka rađeh. **17** Mahaq oh daq da au, pì khòh hmàng bàu bòe mangai Tiaq cla Jesus Christ bèn ma khoe doe. **18** Wì aih i doe,

ta qnhòng pulùch kô èh i bac ngai loq do halê oh daq,
cadàu tiaq kan ònh dèh cla hu broq lìq làn. **19** Aih raq bòe
mangai basrùq oh daq talah ka dabau, bòe mangai rìh
tiaq xech akia, ùh i ka Yiang Hadròeh. **20** Mahaq pì aih oh
daq da au, pì ep broq dèh ka cajap enh qnhèq ka manoh
lùi ma dìq jaq hadròeh da cla, rai waiq khàn ta Yiang
Hadròeh, **21** drah loq wèq rađeh oe ta kan loq waq Boc
plinh, rai gòm kan ha-och enh nòe Chuaq Jesus Christ am
ka bèn kan rìh halinh mòeq đòe. (**aiōnios g166**) **22** Ep ha-och
ka wì kô aih bái mangai qnang raqngòt, **23** drah dèch
bái wì tau, hua qnoh wì haq claih ka ùnh, ka mangai ma
qnoeq hòm thê pì i manoh loq ha-och rai loq crè, git
trùh blah eo xech akia ma khoe broq ka haq loh đac ka
trùq traq. **24** Waiq Boc Plinh wèq oh daq ùh hìaq catoeh
tacro, broq ka oh daq jah yòng enh ngèa kan ranhòm
haq, dìq jaq lem bùi, pi i qmòe ka nòe hu cwò, **25** aih Boc
Plinh dìq dèh mòeq raq, aih Mangai ma dèch bèn, ajang
Jesus Christ aih Chuaq bèn, jah kan rahù ranhòm, jah
kan manè padèch, padren, cwìang itai oe dìq ta haq enh
jò baxèm nèh hloe ta manòeq trùh tabla èh mòeq đòe!
Amen. (**aiōn g165**)

MAHNO

1 Kan mahno da Chuaq Jesus Christ, Boc Plình ma khoe am deh ka haq đòeq hu paqnoh ka hapõng haq jah loq rìm yiniq ma rênh trùh tangèa kô èh, qmang aih haq khoe thê deh bình plình loh patinh ka Jon, aih hapõng da haq, **2** aih la mangai anoe hlài bàu Boc Plình xam kan panhìn da Jesus Christ, taboe hlài rìm yiniq đeh ma khoe hnoq. **3** Xôq ramot am ka mangai đõc xam mangai tamàng bàu pajàu kô, wèq tiaq rìm nà ma khoe achìh ta kô. Majah qmang aih khoe haqnap trùh dèh jò. **4** Jon achìh am ka tapèh Tagop Hadròeh oe ta Asia: Waiq kan tabòeh dech xam kan catèm am ka oh daq trùh enh Mangai qnang i, khoe i, i yôt mòeq đòe, xam enh tapèh yiang oe enh ngèa gèq da haq, **5** xam enh nòe Chuaq Jesus Christ aih Mangai panhìn ùh tablòq manoh, aih Kon ramua khoe rìh hlài enh kan cachìt đòeq broq cla craq bòe bùa ta crõng taneh. **6** Mangai loq waq ka bèn, khoe yõc deh mahim qnheo hreo yiniq lui bèn, broq kabèn wìa diac da haq, wìa pajàu Boc Plình aih Baq da haq, kan ranhòm, kan i cwìang itai oe dìq ta haq mòeq đòe! Amen.

(aiōn g165) **7** “Ngan kô, haq wìh hlài tacô xam yùc plình, rìm mat dìq jah hnoq, yac ka mangai ma bìt haq ji hadai, dìq dõng ka nang noe ta crõng taneh crò hmoe ka haq”. Joq qnàng qmang aih! Amen. **8** Chuaq aih Boc Plình, Mangai qnang i, khoe i èh i hloe moèq đòe aih Mangai i cwìang dìq dõng, doe: “Au kô Anpha xam Ômega”. **9** Au kô Jon, aih oh daq bèn, mangai mòeq bua ka pì ta kan ranàc, enh dalam ka Chuaq Jesus Christ hadai chìuq àt chìuq gòm diac plình, au khoe oe ta pleo Bat mô aih taiq

bàu Boc Plinh xam taiq anoe au panhìn ka Chuaq Jesus.

10 Wop hì da Chuaq, au jah Yiang Hadròeh qnung, au tàng dèh enh rù i bàu dêh tìah ka bàu ken, **11** doe rameh: “Achih qmùt ta hset bòe yiniq ìh ma hnoq, èh gòe aràng ka tapèh Tagop Hadròeh oe ta Êphêsthô, Simiacno, Betgam, Thia-tiro, Sađe, Phila-đenphi xam Laođi-sê. **12** Jò aih, au hwi enh rù đòeq hu ngan bàu capoch ka au aih iòq bàu cabô, **13** bu tawìh, au hnoq tapèh toq jènh đen broq xi wang, taqne bòe jènh đen aih i cabô meh tìah ka kon ngai, caxùnh eo yôh trùh ta jo, caxi qnam broq xi wang kàt ajang rada. **14** Xàc ta gàu haq taboc tìah ka xàc trìu, taboc qmang ka hiloc, mat haq qmang ka ùnh, **15** jènh chah qmang ka đùng khoe ram ta tanùh, bàu qmang ka bàu diac kàn. **16** Kõng pah haq qma cadop wê tapèh toq halõng, enh hacùng loh mòeq pla chang hin baiq mòn, hadrò qmang ka mat mahì jò ma qngah dìq jaq. **17** Bu hnoq, au tabùng cro ajang jènh haq tìah ka mangai cachìt; mahaq haq yõc tì pah qma bèq chac au, rai doe: “Apaq yùq cleq! Au kô Mangai ma adroe xam Mangai ma atìq dõng, **18** Au Mangai rìh, au khoe achìt mahaq manòeq kô ngan beq au rìh mòeq đòe, wèq gahlòng da kan cachìt xam nòe mangai cachìt oe. (aiōn g165, Hadës g86) **19** Qmang aih, drah achih rìm yiniq ìh ma khoe hnoq, bòe yiniq ma qnang i manòeq xam bòe yiniq padon trùh ta atìq kô èh, **20** aih la bòe kan bahlèp da tapèh toq halõng ìh khoe hnoq enh kõng pah qma au, xam da tapèh toq jènh đen wang. Tapèh toq halõng aih bình plinh da tapèh Tagop Hadròeh, tapèh toq jènh đen aih tapèh Tagop Hadròeh”.

2 Achìh ka bình plình da Tagop Hadròeh Êphêso rameh:
Kô bàu da Mangai kõng pah qma haq ma wê tapèh toq
halõng rai cadiang lam taqne tapèh toq jènh đen wang: **2**
Au loq yiniq broq da ìh, au ji loq kan xalep, kan loq kèm
da ìh; au loq ìh ùh jùh jùn ka mangai dù, au ji loq ìh khoe
qnhro bòe mangai ma doe đeh kô broq mangai tiaq cla,
ìh khoe jah hnoq joq qnàng aih bòe mangai ti patiah. **3**
ìh loq kèm rai chìuq xalep ka yiniq au, ùh hìaq tagah
lep. **4** Mahaq i yiniq kô au cwò ka ìh, aih ìh khoe cađac
kan loq waq jò baxèm. **5** Qmang aih, hmàng hlài beq đeh
khoe cro ajang leq, drah raxach rai boq hlài dèh yiniq ìh
ma khoe broq enh jò baxèm; ùh meh au trùh ta ìh, tàng
ìh ùh raxach aih èh au dèch đac da ìh đen khoe ka nòe
da haq. **6** Mahaq ìh i mòeq yiniq kô ma yi wìa, aih ìq ìh
git ka yiniq broq da bua Nicôla, yac ka au hadai git. **7**
Cabô i don, drah tamàng bàu Yiang Hadròeh anoe ka
bòe Tagop Hadròeh: Mangai leq blêq, au jah am wì haq
acaq plì long kan rìh oe ta Parađi da Boc Plình. **8** “Achìh
ka bình plình da Tagop Hadròeh Simìac-no rameh: Kô
bàu da Mangai ma adroe xam Mangai ma pulùch dõng,
Mangai khoe cachìt yàng mahaq khoe rìh hlài: **9** Au loq
kan xalep, kan pa hamoq da ìh, (yac ka ìh padrõng kan),
xam bòe bàu capoch patah, capoch qmèq enh bòe wì ma
doe đeh kô mangai Juđa, ma joq qnàng aih ùh xài, wì haq
aih mòeq bua ka tagop da Satan. **10** ìh apaq yùq ka rađeh
ep glàm kan nanxa. Au doe ka ìh loq, kô èh taqne pì qmat
Satan padon rùp clêh bac ngai ta hním cadrong, đòeq hu
qnhro ngan pì, pì glàm kan nanxa ta mòeq jàt hì. Ep wèq
manoh ùh tablòq trùh cachìt, aih èh au hi am ka pì cadoh

kan rìh da diac plình. **11** Cabô i don, drah tamàng bàu da Yiang Hadròeh anoe ka bòe Tagop Hadròeh: Cabô blêq, kan cachìt yàng atìq kô èh pi broq cleq ka haq aih jah. **12** Hadai achìh am ka bìnhanh plình da Tagop Hadròeh Becgam rameh: Kô bàu da Mangai i pla chang hin baiq mân: **13** Au loq nòe ìh qnang oe qmat gèq da satan; ìh khoe wèq cajap manoh ta yiniq au, ùh cađac manoh lùi ajang au; yac ka jò Antiba, aih mangai dìq ka manoh anoe panhìn ka au khoe cachìt đeh ka wì jêh đac tanđe pì, aih nòe Satan oe. **14** Mahaq i nòe au cwò ka ìh: Majah qmang aih, ta qmat pì i mangai tiaq trong da Bala-am, aih mangai ma hnài Balac roh hmo catoeh enh qngèa mangai Isorali, đòeq padô wì haq acaq jam tadreo kiac chöc rai ti adràc wì haq ti tango taqnung. **15** Ta ìh qmat hadai i mangai cadiang tiaq bàu trong da Nicôla. **16** Qmang aih, drah loq raxach beq, tàng ùh meh, au rênhanh trùh ta ìh, yöc deh chang enh hacùng đòeq hu tajêh ka wì haq. **17** Cabô i don, drah tamàng bàu Yiang Hadròeh doe ka rìm Tagop Hadròeh: Mangai leq blêq, au am ka haq mana ma qnang cadioc hlèp, au hadai am ka haq pliang raga taboc, ta ai i achìh mòeq toq yiniq neo, enh gùng ka cla mangai jah ùh i cabô loq. **18** Ìh hadai achìh ka bìnhanh plình da Tagop Thiatiro rameh: Kô bàu capoch da Kon Boc Plình, aih Mangai mat tìah ka ùnh, jènh tìah ka đùng ma chah dìq cajaq: **19** Au loq yiniq broq da ìh, kan loq waq da ìh, manoh lùi ìh, trong patìh dìq ka manoh da ìh, manoh loq kèm da ìh, bòe yiniq ìh broq ta atìq kô kiang èh kiang bàc yeo loe ka angoe. **20** Mahaq yiniq au ma cwò ka ìh, aih ì oe jùh jùn ka Jêsaben, mangai cadrì aih cla haq doe đeh kô pajàu,

toq ti hnài rai padô hapǒng au, đòeq hu aluàn wì ta kan tango anang, acaq jam tadreo. **21** Au khoe am ka haq i jò đòeq hu loq raxach, mahaq haq ùh raxach dèh kan tango aih. **22** Kô èh au khwênh haq ta juàng jìq hiang hloe xam bòe mangai wiang tango ka haq, tàng wì haq ùh raxach trong yiniq lui aih, au hadai khwênh caqnìh wì haq ta kan ranàc kàn. **23** Au jêh ka cachìt bòe kon da haq; aih èh rìm Tagop jah loq au kô Mangai loq ta manoh cliac kon mangai, èh au hi tiaq qmòe tang yiniq rìm ngai khoe broq đòeq hu patem chau ka wì haq. **24** Mahaq pì xam wì qnoeq ma hahdai oe ta Thia-tiro, ùh tiaq trong aih, qnhòq qnì đeh kan tai cliac Satan, qmang ka wì haq ma anoe dèh yôt, aih au tanap ka pì au ùh taqmòq tam ka pì kan trap qnoeq. **25** Toq pì ep wèq ka cajap bòe yiniq đeh ma khoe i, trùh jò au trùh. **26** Mangai leq blêq, broq tiaq manoh au trùh lùch trùh gêh, aih èh au am ka haq cwìang đòeq broq gàu bac diac: **27** haq wèq cwìang xi long dùi mem, tùq bahech bòe diac aih budàng abôq taneh, qmang ka au khoe jah cwìang aih enh nòe Baq au. **28** Au am ka haq aih halǒng sroq. **29** Cabô i don, drah tamàng bàu Yiang Hadròeh anoe ka bòe Tagop Hadròeh!

3 Ìh achìh ka bìnph plình da Tagop Hadròeh Sac-đe rameh: Kô bàu da Mangai carùp wê tapèh yiang da Boc Plình xam tapèh toq halǒng: Au loq yiniq broq da ìh, ìh i qmòe tiang doe rìh mahaq cachìt. **2** Drah rìu beq! drah broq ka cajap hlài bòe yiniq ma oe i, aih bòe yiniq ma oe toq hu cachìt, majah qmang aih, enh ngèa Boc Plình au ùh i hnoq ìh broq yiniq cleq ma gêh geo. **3** Qmang aih hmàng hlài beq! Ìh khoe jah yǒc khoe jah tàng qmang leq, thê cajap tiaq

qmang aih rai loq raxach beq. Tàng ìh ùh drah rìu, au trùh tìah taiq ka mangai lam atùng, ìh ma qnì jò leq au trùh rùp ìh. **4** Mahaq ta Sac-đe oe i biaq ngai qnhòq hìaq broq amùa deh ka eo yôh: Wì aih èh jah caxùnh eo taboc hu lam ti au, majah qmang aih wì haq tajì ka jah qmang aih. **5** Mangai leq blêq, jah caxùnh eo taboc qmang ka wì aih. Au ùh xùt đac yiniq mangai aih loh khoe ka hset kan rìh, mahaq au creo ràu yiniq haq aih enh ngèa Baq xam enh ngèa bòe bìn plìn da Haq. **6** Cabô i don, drah tamàng bàu Yiang Hadròeh anoe ka bòe Tagop Hadròeh. Achìh ka Tagop Hadròeh Phila-đenphi **7** ìh hadai achìh ka bìn plìn da Tagop Hadròeh Phila-đenphi rameh: Kô bàu da Mangai hadròeh, Mangai hnhuh jang, Mangai i khoaq da Đawit, Haq hi pèch pi i cabô oe jah clênh, Haq hi clênh pi i cabô oe jah pèch: **8** Au loq yiniq broq da ìh, au khoe pèch mòeq toq qmang enh ngèa ìh, ùh i cabô jah clênh; majah qmang aih au loq ìh biaq đeh padren, mahaq khoe wèq bàu au, ùh hangah đac ka yiniq au. **9** Au am ka ìh biaq ngai oe tagop Satan, wì haq doe radeh kô mangai Juđa, yàng ma joq qnàng aih ùh xài, wì haq capoch qnùt, kô èh au broq ka wì haq thia bla op đeh ta jènh pì, aih èh dôq wì haq loq au khoe loq waq dèh ka ìh. **10** Pàng ìh khoe dràng cajap wèq tiaq bàu thê da au, kèm manoh jò glàm nanxa, au hadai wèq ìh claih kan qnhro kàn padon trùh jàp ta cröng taneh aih la jò đòeq qnhro dìq döng ka mangai. **11** Au rêntrùh, drah wèq bòe yiniq ìh khoe i, đòeq ùh hìaq i cabô jah yoc da ìh cadoh lem diac plìn. **12** Cabô blêq, au jah am haq broq jrang ta hním kùh waiq Boc Plìn au, aih èh wì haq pi talah enh

aih hòm; au jah yōc yiniq Boc Plình au, xam yiniq plài Boc Plình, aih Jerusalem maneo, (Jerusalem ma loh enh plình, loh enh Boc Plình au) xam yiniq neo da au đòeq hu achìh ka wì haq. **13** Cabô i don, drah tamàng bàu Yiang Hadròeh anoe ka bòe Tagop Hadròeh. **14** ìh hadai achìh ka bìngh plình da Tagop Hadròeh Laođixê rameh: Kô bàu da Mangai Amen, aih Mangai panhìn ùh tablòq manoh joq qnàng, haq aih broq cla craq rìm yiniq Boc Plình ma broq loh enh jò baxèm: **15** Au loq yiniq broq da ìh, ìh ùh hangeo hadai ùh tòq, Au ngèh ka ìh hangeo tàng ùh meh tòq dōng aih yeo hnau hòm! **16** Mahaq ìh toq ha-onh, ùh tòq ùh hangeo, dài au majah laq qnöh đac ìh. **17** Cla ìh doe: Au padrōng, au khoe kan, pi oe nhet cleq hòm; yàng ìh ùh canau ka đeh kô hrah hrôm, nanxa, pa hamoq, lua mat rai ta talùch chac dech. **18** Au pariaq ìh drah rot enh au wang ma khoe bùh ta ùnh, đòeq ìh jah padrōng kan, rot bòe blah eo taboc đòeq hu caxùnh, qmang aih èh kan camaih kan rahòng ìh jah taqmàn cadoc, rot jreo đòeq xùt mat dôq ìh hujah xau hnoq. **19** Mangai leq au ma loq waq dèh aih au cwò au hnài; qmang aih drah i manoh loq nhet, loq raxach. **20** Hacô, au yòng enh gùng rai clôq qmang; tàng i cabô tàng au bàu rai loh pèh qmang ka au, aih èh au mùt pajùm ti haq, acaq ti haq, haq acaq ti au. **21** Mangai leq blêq, au am haq haqngui ti au ajang nòe gèq da au, tìah qmang ka au khoe blêq jah haqngui ti Baq au ta gèq haq. **22** Cabô i don, drah tamàng bàu da Yiang Hadròeh anoe ka bòe Tagop Hadròeh!

4 Khoe aih, au ngan hnoq, i mòeq toq qmang tapèch ta plình, bàu au tàng yàng ma baxèm haq ranòq tìah ka

bàu ken doe ka au: Drah tōc tacô, au hu am ìh hnoq rìm yiniq ma ep trùh atìq kô èh. **2** Tajòe qmòe jò aih Yang Hadròeh mùt ta au, au hnoq i mòeq toq gèq ta plinh, ta gèq aih i mòeq Ngai qnang haqngui ta aih. **3** Haq ma haqngui ta aih qngah qmang ka ngõc hmu lang xam ngõc mainau, i rawiang hađong qngah qmang ka ngõc nget gwian dudan ka gèq. **4** Dudan ka gèq i tam baiq jàt pôn toq gèq hòm, ta gèq aih au hnoq baiq jàt pôn ngai gucraq haqngui, caxùnh eo taboc gàu wì haq kui cadoh broq xi wang. **5** Enh gèq aih i bòe kan camlet xam bòe bàu cađah; xam tapèh toq đen bùh qngah qngai enh ngèa ka gèq: Aih raq tapèh yiang da Boc Plình. **6** Enh ngèa ka gèq i diac raxìq hliang qmang ka guàng, taqne xam dudan ka aih i pôn toq ngè rìh, enh ngèa, enh rù, ajang leq xôq i mat. **7** Ngè rìh ma baxèm tìah ka sutùh, ngè rìh ma hatìa tìah qmang ka bo calô, ngè rìh ma atìq hòm tìah ka hadrò mangai, ngè rìh ma pulùch tìah qmang ka cliang kèn qnang pan. **8** Pôn toq ngè rìh aih, rìm toq dìq i tadràu toq panan, dudan enh gùng xam enh dalam ka chac haq dìq i mat; dahì damang ùh jò leq hêq ka doe: “Hadròeh, Hadròeh, Hadròeh aih la Boc Plình i cwìang itai rìm trong. Adroe khoe i, manòeq qnang i, atìq èh dua i! **9** Jò pôn toq ngè rìh aih yōc bàu manè hu dèch kan ranhòm ka haq ma qnang haqngui ta gèq, aih Mangai ma rìh halinh mòeq đòe. (aiōn g165) **10** jò aih baiq jàt pôn ngai gucraq bla op enh ngèa ka Mangai ma qnang haqngui tagèq bùa, rai kùh waiq haq ma rìh halinh mòeq đòe; khoe aih doeh deh cadoh enh gàu đòeq ta haqneq enh ngèa ka gèq bùa rai doe: (aiōn g165) **11** “Waiq Boc Plình aih

Chuaq da nhèn, ìh tajì đòeq jah kan ranhòm, kan rahù xam cwìang itai, majah qmang aih ìh khoe broq loh rìm yiniq; tiaq deh manoh ìh enh, rìm yiniq men khoe i, men khoe jah broq loh”.

5 Khoe aih au hnoq, ta kõng pah qma Mangai ma haqngui tagèq bùa i mòeq toq hset achìh enh dalam xam enh gùng, hset kô khoe i tapèh toq teo nìm padràng. **2** Au hadai hnoq mòeq bình plình ma dêh padren crêu cadêh: Cabô ma tajì đòeq pèh hset kô èh rai doeh bòe nìm pateo kô? **3** Yac ka ta tröc ta taneh, hloe enh caqnàm taneh dua pi oe i bô jah pèh ngan, loq oe jah chri ngan enh dalam hset canua kô hòm. **4** Pàng ùh i qmòe ka cabô ma tajì ka jah pèch jah chri ngan enh dalam ka hset canua aih hòm, dài au majah toq hmoe diac mat loh da dahràc. **5** Jò aih i mòeq ngai taqne wì gucraq doe ka au: Pi dùh hmoe, hatau, sutùh da xinoe Juđa, aih hamöng da bùa Đawit, khoe blêq, Haq aih jah pèch hset qmat rai toeh tapèh toq nìm padràng qmat. **6** Khoe aih au hnoq, Kon Trìu yòng qne Gèq bùa, èh pôn toq ngè rìh xam bòe wì gucraq oe dudan haq; Kon Trìu qmang ka khoe cachìt ka wì jêh dac, Kon Trìu i tapèh toq haki xam tapèh toq mat, aih raq tapèh yiang da Boc Plình ma thê loh lam jàp cröng taneh. **7** Kon Trìu cadiang trùh, yōc hset ma oe ta tì pah qma da Mangai ma haqngui tagèq bùa. **8** Jò Haq yōc hset, pôn toq ngè rìh xam baiq jàt pôn ngai gucraq dìq bla op enh ngèa Kon Trìu, mòeq ngai wê mòeq toq broc xam bòe cabi wang ta aih tah bình gahnàu xua thùm; aih la bàu waiq khàn da bòe mangai da Boc Plình. **9** Wì haq calêu bœ maneо rameh: “ìh tajì ka yōc hset, rai doeh bòe

teo nìm; majah qmang aih ìh khoe chìuq cachìt, yōc deh mahim cla đòeq hu baxon ka Boc Plình, bòe mangai ta rìm xinoe, rìm bàu capoch, rìm adrech, rìm diac, **10** Haq broq wì aih wìa diac da bùa, wìa pajàu patìh ka Boc Plình bèn; wì aih jah broq mangai pagàu ta crōng taneh.” **11** Khoe aih, au ti ngan, au tàng haraya bàu da bình plình bình ka muàn ka jàt muàn. Wì dudan ka Gèq xam bòe ngè rìh xam bòe gu craq. **12** Pajùm ti dabau wì haq capoch cadêh: “Kon Trìu ma khoe chìuq cachìt, tajì đòeq jah kan itai, padrōng, rabiaq loq, jah padren dêh, jah padèch haqnhèq, jah ranhòm xam bàu manè!” **13** Atìq ka aih au tàng rìm yiniq ma khoe jah broq loh oe ta plình, ta crōng taneh, ta caqnàm taneh, ta diac raxìq, xam rìm yiniq ma oe ta aih dìq anoe rameh: “Waiq ka Mangai ma haqngui tagèq bùa xam Kon Trìu jah bàu manè enh, jah kan padèch haqnhèq, ranhòm xam kan i cwìang itai mòeq đòel!” (**aiōn g165**) **14** Pôn toq ngè rìh dìq doe: “Amen”. Èh bòe gucarq hi bla op ta haqneq đòeq kùh waiq.

6 Au ngan hnoq, jò Kon Trìu pèh nìm ma adroe ta tapèh toq nìm, au hnoq i mòeq ta pôn toq ngè rìh capoch bàu qmang ka atêh hilùng: “Trùh beq”! **2** Au ngan hnoq, i mòeq toq axêh mõng. Mangai haqngui enh crōng axêh i mòeq toq panenh; i mangai am ka haq mòeq toq cadoh bùa, èh haq lam tìah taiq ka mangai ma khoe blêq, lam pang leq blêq pang meh. **3** Jò Kon Trìu pèh nìm ma baiq, au tàng bàu ngè rìh ma baiq doe: “Trùh beq”. **4** Tajòe qmoè jò aih loh mòeq toq axêh gòh. Mangai haqngui ta crōng axêh i cwìang dèch đac kan catèm loh khoe ka crōng taneh, đòeq kon mangai wì tajêh đac dabau, èh i

mangai am ka haq mòeq pla chang kàn. **5** Jò Kon Trìu pèh nìm ma piq, au tàng ngè rìh ma piq doe: “Trùh beq”. Au ngan hnoq i mòeq toq axêh gam. Mangai haqngui cröng axêh tì haq wê mòeq toq kìq. **6** Au tàng taqne pôn toq ngè rìh loq tadroq i bàu doe: “Mòeq kìq qmau mì tech mòeq đoniê, piq kìq qmau mat nha tech mòeq đoniê, khoe ka aih dàu xam alac dôq haq apaq troq.” **7** Jò Kon Trìu pèh nìm ma pôn, au tàng ngè rìh ma pôn doe: “Trùh beq”. **8** Au hnoq loh mòeq toq axêh nget bah bah. Mangai haqngui ta cröng axêh, yiniq haq aih Kan cachìt, i hwinh clam tiaq gìt enh rù haq. Wì haq i cwìang mòeq phàn pôn ta cröng taneh, đòeq jêh đac kon mangai xi chang, xam kan pangot hrah, xam kan jìq dài, xam bòe ngè dù ta cröng taneh. (**Hadēs g86**) **9** Jò Kon Trìu pèh nìm padam, au hnoq ta caqnàm prang tadreo i bòe mahua da bòe mangai ma khoe cachìt taiq wì haq tiaq trong Boc Plinh xam bàu wì haq ma lam anoe. **10** Dìq ka wì haq crêu qmòe cadêh: “Waiq Chuaq nhèn, aih Mangai Hadròeh, Joq qnàng, iò oe taqnhùa gòm trùh jò leq hòm men hadrah rai patem chau bòe mangai ta cröng taneh ma khoe broq ta-ùc mahim nhèn?” **11** I mangai am ka wì haq mòeq ngai mòeq blah eo yôh taboc; èh i bàu doe ka wì haq ep gòm tam toq biaq hòm, trùh jò leq hi jah tôm bài mangai ma hadai wiang abroq, ma hadai ep cachìt qmang ka wì haq diq. **12** Au ngan hnoq, jò Kon Trìu pèh nìm tadràu, aih taneh loh kan ralàng kàn, mat mahì loh ka clam cluiq qmang ka caxop bai xàc gam, mat khê tìah ka mahim. **13** Bài halöng ta tröc cìh taqneq, tìah ka plì hra tagoe long hadrùih jò cayêu hlui dêh. **14** Tröc ka canua hlài

qmang ka wì canua hset broq xam akia, bài bui wang
xam bài pleo diac hadai haprah hangai deh ka nòe oe; **15**
bài bùa ta crõng taneh, bài cwan kàn, bài cla craq lình,
bài mangai padrõng, mangai i cwìang, mangai hapõng
dìc, mangai broq cla dìq cadàu lam amot roc ralùng, roc
kòp hmo kàn ta wang, **16** wì doe ka bui wang doe ka hmo
kàn: Thê clìh enh qnhèq ka nhèn kô beq, dôq nhèn jah
hlèp khoe ka hadrò Mangai ma haqngui tagèq bùa rai jah
claih ka kan nòeh da Kon Trìu! **17** Majah qmang aih hì
panuq kàn da haq khoe trùh, cabô ma oe dràng yòng?

7 Khoe ka aih, au hnoq i pôn bình plình yòng ajang pôn
toq mùm taneh, tì wì haq rùp padràng pôn qngèa cayeo,
dôq ùh hìaq i cayeo hlui ta taneh, ta diac raxìq, tagoe
long. **2** Au hnoq hòm i mòeq bình plình qnoeq, tòc enh
apah mat mahì loh, tì haq wê ngè pateo da Boc Plình
ma rìh halinh. Haq dêh bàu crêu rai doe ka pôn bình
plình ma khoe jah cwìang đòeq broq kan haþo ka taneh
xam diac raxìq. **3** “Apaq broq kan haþo ka taneh, ka diac
raxìq xam bài long trùh jò leq bèn khoe pateo hadro
ta ngòng bài hapõng da Boc Plình bèn. **4** Au tàng, bài
mangai majah pateo hadro aih jah: 144.000 ngai loh enh
bài xinoe Isorali; **5** Enh xinoe Juða jah: 12.000 ngai; Enh
xinoe Rubêñ jah: 12.000 ngai; Enh xinoe Gat jah 12.000
ngai; **6** Enh xinoe Ase jah 12.000 ngai; Enh xinoe Neptali
jah 12.000 ngai; Enh xinoe Manase jah 12.000 ngai; **7**
Enh xinoe Sime-ôn jah 12.000 ngai; Enh xinoe Lêwi jah
12.000 ngai; Enh xinoe Ysaca jah 12.000 ngai. **8** Enh xnoe
Sabulôn jah 12.000 ngai; Enh xinoe Jôsep jah 12.000 ngai;
Enh xinoe Bêñjamin jah 12.000 ngai jah pateo hadro. **9** Hi

khoe ka aih, au hnoq bài mangai haraya rayùc, pi bô oe
dìq rèn, loh enh rìm diac, rìm xinoe, rìm gùng, rìm bàu
capoch; wì haq yòng enh ngèa ka gèq bùa xam enh ngèa
Kon Trìu, caxùnh eo yôh taboc, tì wì haq wê hamenh hla
hanoc, **10** wì haq creo cadêh: “Kan dèch claih loh enh Boc
Plình bèn, aih Mangai ma haqngui tagèq bùa, Xam enh
Kon trìu”. **11** Dìq döng bình plình yòng dudan ka gèq bùa,
dudan ka bài gucraq hloe xam pôn toq ngè rìh, kùp deh
hadrò enh ngèa ka gèq bùa rai kùh waiq Boc Plình, **12** wì
doe: “Amen! Bàu manè enh, kan ranhòm, kan rabiaq, kan
manè apôi, kan tajì, kan itai xam padren dêh, hlài dìq ta
Boc Plình bèn mòeq đòeq ùh lùch! Amen”. (**aiōn g165**) **13**

Jò aih i mòeq ngai gucraq bòch au: “Dìq ka mangai ma
caxùnh eo yôh taboc qmat ìq cabô, wì haq trùh enh leq?
14 Au padreo bàu: “Wì craq! ìh loq trong aih”. Haq doe ka
au: “Wì haq qmat aih la bài mangai ma khoe loh enh
kan nanxa kèn, khoe rùh, khoe broq dèh eo jah taboc
ta mahim Kon Trìu. **15** Qmang aih, dài wì haq majah
haqngui enh ngèa ka gèq bùa Boc Plình, dahì damang jah
patih ta hnim kùh waiq da haq; Mangai ma haqngui tagèq
bùa jah wèq ban wì haq. **16** Wì haq pi pangot, pi croh
ranöng hòm; pi i ka mat mahì, pi i kan tòq enh leq oe
jraq wì haq. **17** Majah qmang aih Kon Trìu oe taqne gèq
bùa jah rai ban rai ajèn qnung wì haq trùh ta bài cròng
diac rìh; Boc Plình jah xùt dìq döng diac mat wì haq.

8 Jò Kon Trìu pèh nìm ma tapèh, ta tröc hatinh jah qnah
qne jò. **2** Au hnoq tapèh ngai bình plình yòng enh ngèa
Boc Plình, i mangai am ka wì haq tapèh toq ken. **3** Khoe
aih i mòeq bình plình qnoeq trùh yòng ajang prang kùh

waiq oe enh ngèa ka gèq bùa, haq wê abôq broq xi wang,
haq jah bac gahnàu, đòeq dèch atoc gahnàu aih taprang
kùh waiq broq xi wang enh ngèa ka gèq bùa pajùm ti
bàu waiq khàn da bòe mangai Boc Plinh. **4** Nhòe linh
gahnàu enh tì bình plinh aih, pajùm ti bàu waiq khàn
da bòe mangai da Boc Plinh pan toc trùh enh ngèa Boc
Plinh. **5** Khoe aih bình plinh wê abôq wang yoc ùnh enh
prang kùh waiq tah bình ta aih, khoe aih hwênh qnìh ta
cröng taneh: Tajòe qmòe jò aih i bòe atêh hilung dêh,
cađah, camlet xam kan taneh ralang. **6** Tapèh bình plinh
wê tapèh toq ken hi padon hlui. **7** Bình plinh ma adroe
hlui ken, tröc loh ka cılıh preo i xam ùnh clai pajùm ti
mahim dahrôq loh ta cröng taneh. Mòeq ta piq phàn
taneh loh ka ùnh cheo, mòeq ta piq phàn bài long, ùnh
cheo döng, rìm adrech nhat cheo dìq. **8** Bình plinh ma
baiq hlui ken: i kan cato kàn tiah taiq ka bui wang kàn xi
ùnh hwênh qnìh ta diac raxiq. Mòeq ta piq phàn diac wia
mahim, **9** mòeq ta piq phàn ngè rìh ta diac raxiq cachit
döng, mòeq phàn piq bài boang loh ka raliang. **10** Bình
plinh ma piq hlui ken, aih i mòeq toq halöng kàn cılıh enh
plinh, cheo loh qmòe pla ùnh qmang ka hiloe hadreo;
halöng aih cılıh ta mòeq phàn piq cròng diac xam goe
diac. **11** Yiniq halöng aih: Cachiq xang, mòeq phàn piq
cròng diac loh döng ka xua qmang ka cachiq xang, broq
ka bac ngai cachit, majah qmang aih diac khoe loh ka
xang. **12** Bình plinh ma pôn hlui ken, mòeq phàn piq mat
mahì pi qngah, mòeq pàn piq mat khê xam mòeq phàn
piq bài halöng hadai, dôq mòeq phàn piq bàikan qngah
aih loh döng ka clam, đòeq jò dahì hnhung mòeq phàn

piq kan qngah, damang hanoh. **13** Jò aih au ti ngan, au tàng bàu cliang kèn pan taqne tróc rai crêu cadêh: Haño qnàng! Haño qnàng! Haño qnàng! Ka bài mangaima rih ta cröng taneh, majah qmang aih oe i bàu ken da piq bình plinh qnoeq ma padon hlui hòm.

9 Bình plinh ma padam hlui ken, aih au hnoq mòeq toq halöng enh plinh clìh ta cröng taneh, khoe jah am ka halöng aih khwaq da hwinh jrùq ùh lùch, (**Abyssos g12**) **2** Halöng aih pèch hwin jrùq ùh lùch aih, i nhòe enh qneq pan ta atöc, tìah ka nhòe da tanùh kàn; mat mahì xam hòe cayêu loh döng ka clam ka nhòe enh hwin jrùq.

(**Abyssos g12**) **3** Enh nhòe aih prai loh bài lìp pan jàp ta cröng taneh; i mangai am ka wì haq cwìang tìah qmang ka agôt ta taneh. **4** I bàu ùh lòh wì haq apaq troq đac bài nhat oe ta cröng taneh, enh long qyoh trùh long kàn, mahaq jah troq đac toq bài mangai ta ngòng wì haq ma ùh i ka teo da Boc Plinh. **5** Èh am ka wì haq cwìang ùh xài đòeq hujêh đac, mahaq đòeq toq pani bài mangai aih ta padam khê, kan baxa aih tìah ka jò agôt kap. **6** Ta bài hì aih, kon mangai chaq kan cachít mahaq chaq ùh jah; wì tangèh ka jah cachít yàng kan cachít wia đac ka hangai. **7** Bài lìp aih tìah ka axêh khoe padon đòeq hu lam tajêh tablah: Tagàu wì haq i cadoh bùa tìah taiq ka wang, mùh mat haq qmang ka hadrò mangai; **8** haq i xàc qmang ka xàc gàu gucadri, hanenh haq qmang ka hapoh sutùh. **9** Haq i caqmoc qmang ka caqmoc mem, atêh panan da haq tìah ka atêh bac toq xê ma i bac toq axêh dùi tùh loh tanöe tajêh. **10** Tênh haq i nöc qmang ka agôt, haq yöc tênh aih ma baxa pani kon mangai ta padam khê. **11** Haq

i bùa pagàu, aih mangai da hwin jrùq, bàu Hêbru doe:

Abađôn, bàu Grec doe Abôliôn. (Abyssos g12) 12 Kan ranàc

ma adroe bu khoe; manđeq kô oe i tam baiq kan ranàc

trùh atìq ka aih hòm. 13 Bìnħ plinh ma tadràu hlui ken,

aih au tàng i bàu loh enh pôñ toq haki da prang kùh waiq

broq xi wang ma đoèq enh ngèa ka Boc Plinh. 14 Bàu

aih doe ka bìnħ plinh ma tadràu qnang wê ken: “Drah

caqnaih pôñ bìnħ plinh ma qnang bìq kàt đòeq ta cròng

diac kàn Ophorat beq”. 15 Pôñ bìnħ plinh aih khoe rap

gòm đòeq waq toq hi troq deh jò, hì, khê, hanam, jah

caqnaih hu lam jêh cađac mòeq ta piq phàn kon mangai.

16 Lình kòe axêh da bài lình aih rèn jah baiq hrinh trìuq;

aih sôq au ma khoe tàng. 17 Axêh xam mangai kòe axêh

au ma hnoq takan mahnò aih qmang kô: Bài wì aih dìq

caxùnh eo jop gòh qmang ka ùnh, mau nget gam, mau

drinh da liu hwinh; gaudi axêh tìah ka gaudi sutùh, hacùng

haq caprôh loh ùnh, loh nhòe xam liu hwinh. 18 Mòeq

phàn piq kon mangai cachìt ka piq kan ranàc kô aih: ùnh,

nhòe, xam liu hwinh loh enh hacùng axêh. 19 Majah

qmang aih cwìang itai da axêh aih oe jang hacùng xam

ajang tênh haq, bài tênh aih tìah qmang ka bìh, i gaudi, wì

haq yōc deh gaudi aih hu ti jōh mangai. 20 Bài mangai ma

oe rìh, aih bài mangai ma ùh hìaq cachìt ka bài kan ranàc

aih, dua ùh raxach hu cađac bài ngè tì kōng wì haq ma

broq loh, dua toq kùh waiq kiac chòc xam radua qmù

broq xi wang xam bac xam đùng, xam hmo, xam long aih

bài kan cato qmù ùh qnì hnoq, ùh xau tàng, ùh qnì lam.

21 Wì haq ùh raxach ka jêh mangai, ka blòeh blöng, ka

tango, atùng,

10 Khoe aih au hnoq mòeq bình plình ma qnoeq padren dêh raya, loh enh plình, i yùc dudanh ka haq. Tagàu haq i rawiang hadǒng; hadrò haq tìah ka mat mahì, jènh haq qmang ka jrang ùnh. **2** Tì haq wê mòeq toq hset qyoh khoe hlìa đòeq, jènh pah qma haq jôiq diac raxìq, jènh pah qngeo jôiq tagùng, **3** Haq creo mòeq nà cadêh qmang ka bàu sutùh ca-ùm; khoe ka bàu haq creo i tapèh qmang hilùng. **4** Jò i tapèh qmang hilùng aih, au enh achìh yōc, yàng au tàng i bàu enh plình doe: “Nìm padràng đòeq bàu da tapèh qmang hilùng aih doe cleq, ùh dùh achìh cadèh”. **5** Khoe aih, bình plình au ma hnoq haq yòng tadiac xam tagùng, dèch tì pah qma ta tröc, **6** haq patô Mangai ma rìh halinh mòeq đòe, aih Mangai ma broq loh plình xam rìm yiniq oe ta plình, broq loh taneh xam rìm yiniq ta taneh, broq loh diac raxìq xam rìm yiniq ta diac raxìq, đòeq hu hapah “Khoe dìq ka jò”; (**aiōn g165**) **7** mahaq trùh hì bình plình ma tapèh am tàng dèh bàu rai hlui ken, aih èh kan hlèp da Boc Plình jah gêh geo, wop qmang ka haq ma khoe doe deh ka bài hapõng haq aih la bài mangai pajàu. **8** Khoe aih bàu au ma khoe tàng enh plình doe hòm ka au: “Lam beq, yōc hset qyoh ma tapèch ajang tì bình plình ma qnang yòng ta diac raxìq xam ta taneh”. **9** Au hi lam trùh ajang bình plình, au bòch haq am ka au hset qyoh. Haq doe ka au: “Yōc beq khoe èh hi lõnh hset kô beq; ta cliac ìh haq xang, mahaq ta hacùng ìh nhim qmang ka diac xùt”. **10** Au yōc hset enh tì bình plình khoe au hi lõnh; ta hacùng au haq nhim qmang ka diac xùt, mahaq jò au khoe lõnh haq loh ka xang ta cliac.

11 I bàu doe ka au: “Ìh oe raq ep capoch bàu pajàu ka bàc xinoe, bàc diac, bàc toq bùa hèm”.

11 I mòeq ngai am ka au mòeq catoch triang niaq tìah ka long wêh maneh, rai thê au: “Yòng beq, wêh hnim kùh waiq da Boc Plình, prang tadreo, rèn xam bài mangai kùh waiq ta aih”. **2** Mahaq hamlang enh gùng ka hnim kùh waiq aih cađac, apaq wêh broq cleq majah qmang aih nòe aih khoe hataq ka mangai diac qnoeq, dôq wì jôiq padit plài hadròeh aih wop jah pôn jàt baiq khê. **3** Khoe èh au hi am cwìang itai deh ka wa baiq ngai ma lam anoe panhìn da au, wa aih caxùnh eo bai briang lam capoch bàu pajàu ta 1.260 hì. **4** Wa haq, aih raq baiq toq long ôliu, aih raq baiq toq jènh đen ma yòng enh ngèa ka Chuaq da crõng taneh. **5** Tàng cabô enh tabroq ka wa aih, aih èh i ùnh loh enh hacùng wa bùh đac mangai ma tagit ka wa: Mangai leq tabroq ka wa, ep cachìt qmang aih. **6** Wa aih i cwìang clênh qmang plình, đòeq trõc ùh mè ta bài hì wa capoch bàu pajàu; wa aih i cwìang thê diac wìh wìa mahim rai broq bàc kan ranàc ta crõng taneh, enh broq jò leq dua jah. **7** Jò wa aih khoe gêh ka lam anoe panhìn, aih i ngè rìh tõc enh hwinh jrùq, tajêh ka wa haq; ngè rìh aih blêq wa haq, khoe èh jêh đac wa. **(Abyssos g12)** **8** Hanang wa haq wì taqngùi đac ti trong lam da plài kàn, capoch aprìah aih raq Sôđôm xam Êdiptô, nòe Chuaq da wa haq ma khoe tiang đình talong pagat. **9** Mangai oe rìm nòe ta crõng taneh, rìm xinoe, rìm bàu capoch, rìm diac dìq jah hnoq hanang wa aih ta piq hì qne, wì ùh lòh catùh hanang aih ta ralùng. **10** Bài mangai ta crõng taneh lem bùi rahèh rahah acaq ôq, qnèp aràng

ka dabau dahwèq jò hnoq wa khoe cachìt, majah qmang aih baiq ngai pajàu Boc Plình kô khoe broq ka mangai ma rìh ta crõng taneh bac kan ranàc. **11** Mahaq atìq ka piq hì qne aih, i hi hèm rìh enh Boc Plình mùt ta wa baiq ngai aih: Wa aih padinh yòng qmòe ka jang, bài mangai ma hnoq wa dìq jaq cadròt crè. **12** Wa tàng i bàu enh plình creo ka wa: “Tõc tacô”! Wa tõc ta trõc enh dalam ka cato yùc kàn, rìm ngai ma tablêq ka wa dìq hnoq. **13** Wop jò aih taneh loh kan ralàng kàn, mòeq phàn mòeq jàt da plài kàn ralòeh dõng, tapèh muàn mangai cachìt ta kan ralàng aih, bài mangai ma oe rìh hnoq qmang aih loh ka cadròt, rai dèch bàu manè apôi Boc Plình ma oe ta plình. **14** “Ranàc” ma baiq bu khoe; kô “Ranàc” piq rên trùh! **15** Bình plình ma tapèh hlui ken, ta trõc i bài bàu dêh, anoe rameh: “Pang kô bài diac da crõng taneh kô hi wìa diac Boc Plình bèn xam Christ da haq, Haq broq bùa mòeq đòe”. (aiōn g165) **16** Baiq jàt pôn gucraq qnang haqngui dèh tagèq dudan ka Boc Plình, dìq kùp ta haqneq, kùh waiq Boc Plình, **17** Wì doe rameh: “Nhèn dèch bàu manè apôi lìh, Boc Plình ma i cwìang itai rìm trong, aih Mangai manòeq qnang i, enh nèh khoe i, majah qmang aih tì kõng lìh khoe wê cwìang dìq jaq haqnhèq, lìh khoe broq bùa. **18** Bài diac tacrõng taneh plôh nòeh, mahaq kan nòeh da lìh khoe trùh, Manòeq khoe trùh jò, aih jò đòeq hadrah mangai cachìt, hu baha ka hapõng da lìh aih bài pajàu, hu baha ka mangai da lìh xam bài mangai loq iu yùq yiniq lìh, baha ka mangai kàn xam mangai qyoh, đòeq raliang đac mangai ma khoe broq raliang crõng taneh”. **19** Jò aih hnìm kùh waiq Boc Plình ta plình hi tapèch, wì

hnoq Hom Tajao ta hnim kùh waiq Haq, khoe aih i bài
kan camlet, i atêh tagruàng, bàu cađah, i taneh ralàng
xam mè clìh cato preo kàn.

12 Khoe ka aih, ta tróc i mòeq kan halac kàn: Mòeq ngai
gucadrì i mahì oe dudan ka haq, enh jènh haq i mat khê,
tagàu haq i cadoh bùa broq xi mòeq jàt baiq toq halõng.
2 Haq aih oe jiang, crò hmoe xalep ka jìq hauang. 3 Ta
tróc hadai loh mòeq kan halac qnoeq hòm: Aih moeq
toq bìh kàn gòh tabrùng, haq i tapèh toq gàu, mòeq jàt
toq haki, tagàu haq i tapèh toq cadoh bùa. 4 Tênh haq
hua mòeq phàn piq halõng ta tróc, lam caqnìh ta crõng
taneh; bìh aih rap enh ngèa ka mangai gucadri qnang jìq
hauang, waq toq kon nga clìh enh cliac, haq hi lõnh. 5
Mangai gucadri aih hauang mòeq ngai kon calô, kon calô
aih yōc long dùi mem đòeq wèq cwiang enh qnhèq ka
rìm diac; kon calô aih jah đìh atōc ta Boc Plinh, ta gèq cla
haq. 6 Mangai gucadri ti amot tanèo hawit, ta aih haq
khoe i nòe Boc Plinh palauq qmòeq, đòeq haq ban rađeh
ta 1.260 hì. 7 Jò aih i kan tajêh ta plinh: Michen xam bài
bình plinh da haq tajêh ka bìh kàn, bìh kàn hadai xam bài
bình da haq hadai tajêh chau; 8 mahaq wì haq ùh blêq,
aih majah pi hnoq nòe da wì haq ta plinh hòm. 9 Bìh kàn
aih la bìh calah nèh, yiniq haq aih kan kiac, aih Satan, ma
ti lam padô dìq dõng ka phù cròng, khoe jah caqnìh đac
haq ta cròng taneh xam bua da haq hadai. 10 Au tàng
hòm ta tróc i bàu capoch dêh: “Manòeq kan dèch claih,
kan dêh, xam diac da Boc Plinh bèn, khoe trùh pajùm
xam cwiang itai Christ da Haq; majah qmang aih mangai
ma dahì xam damang toq ti enh tah hadrah ka haq enh

ngèa ka Boc Plinh, manðeq kô khoe jah caqnìh đac. **11** Wì khoe jah blêq haq xi mahim Kon trìu xam bàu panhìn da cla, wì ùh adênh đèh kan rìh trùh qmòe jò cachìt. **12** Qmang aih dìq ka plinh xam pì ma oe ta aih, drah lem bùi beq! Habo đèh ka taneh xam diac raxìq! Majah qmang aih kiac dù loq jò da haq oe pi pang leq hòm, dài haq majah trùh ta pì rai nòeh pi cajaq.” **13** Jò bìh hnoq rađeh khoe bìq khwênh caqnìh ta cröng taneh, haq drah qnat tiaq mangai gucacdrì ma khoe hauang kon calô. **14** Yàng khoe jah am ka gucadri aih panan cliang kàn, đòeq hu pan mùt tanèo hawit aih nòe Boc Plinh palauq đòeq ka haq amot; ta aih haq jah ban mòeq jò, bàc jò, qne jò, claih hangai ka bìh. **15** Jò aih bìh prôh diac enh hacùng haq tìah qmòe ka diac kàn hnan tiaq mangai gu cadri, đòeq hu qmoch đac haq ta diac. **16** Mahaq taneh đìh yöc gucadri; majah qmang aih taneh hah hacùng lönh diac bìh ma khoe capröh loh enh hacùng. **17** Bìh nòeh ka mangai gucadri, haq lam taблêq ataq wì kon maqnoeq da gucadri, aih bài mangai ma wèq tiaq ranenh Boc Plinh rai rùp cajap bàu panhìn da Jesus Christ.

13 Bìh yòng ta braih diac raxìq. Khoe aih, au hnoq enh diac tòc mòeq ngè rìh i mòeq jàt toq haki xam tapèh toq gàu, ta bài haki aih i moèq jàt toq cadoh bùa, rìm toq gàu dìq i achìh yiniq xam bàu capoch ùh hòq ka Boc Plinh. **2** Ngè rìh au ma hnoq aih tìah taiq ka þeo; jo haq tìah ka jo higàu, hacùng haq tìah ka hacùng sutùh. Bìh ròng yöc deh kan dêh, xam gèq am ka ngè rìh aih. **3** Ta bài gàu aih i moeq toq gàu habau tìah taiq ka khoe cachìt; yàng èh habau aih jah brêh, dìq ka cröng taneh loh ka

hamàih lam tiaq dǒng haq. **4** Kon mangai kùh waiqbih ròng majah qmang aih haq khoe yōc kan itai am ka ngè rìh aih; wì hadai kùh waiq hloe ngè rìh aih, wì doe: “Cabô diang ngè rìh kô, cabô hlàt tablêq ka haq?” **5** Khoe jah am ka ngè rìh aih hacùng xam bàu loq catèh, bàu capoch qmèq Boc Plình; haq i cwìang tabroq qmang aih ta pôn jàt baiq khê. **6** Ngè rìh aih hah hacùng capoch ùh hòq ka Boc Plình, capoch qmèq ka yiniq haq, ka hnim Ranòh kùh waiq haq, capoch troq hloe wì ma oe ta plình. **7** Khoe caqnaih ka haq i cwìang hu tajêh ka bài mangai hadròeh, haq jah blêq wì. Haq i cwìang broq gàu rìm nang noe, rìm ngai, rìm bàu capoch, rìm diac. **8** Dìq ka mangai oe ta crōng taneh ma kùh waiq haq, aih bài mangai ma ùh jah achih yiniq ta hset kan rìh da Kon Trìu ma khoe cachít qmèq enh jò baxèm broq plình crōng taneh. **9** Cabô i don, tamàng beq! **10** Tàng cabô rùp mangai broq dìc, aih èh cla haq ep broq dìc; tàng cabô jêh mangai xi chang, aih èh cla haq ep cachít xi chang. Kô raq kan chìuq àt xam manoh lùi da mangai hadròeh. **11** Khoe aih au hnoq enh taneh tōc mòeq toq ngè rìh maqnoeq hòm, i baiq toq haki qmang ka haki kon trìu, mahaq capoch bàu qmang ka kon ròng. **12** Haq hanoh yōc cwìang da ngè rìh ma adroe, enh ngèa ka ngè rìh aih, haq thê taneh xam mangai oe ta aih ep kùh waiq ngè rìh ma adroe, aih ngè rìh ma i habau ten cachít mahaq khoe jah brêh. **13** Haq broq bài kan halac kàn, loh qmèq ka thê ùnh enh trōc clìh ta taneh enh ngèa dìq ka mangai hnoq. **14** Haq ti qnùt bài mangai oe ta crōng taneh xi kan halac đeh jah broq enh ngèa ka ngè rìh ma adroe; haq thê wì broq radua qmù ka ngè rìh

ka adroe, aih la ngè rìh chang ma khoe broq ka haq loh ka habau hwaq cachìt, yàng èh jah rìh hlài. **15** Ngè rìh ma atìq kô i cwìang hlui qmùt hi hèm ka radua qmùt ngè rìh ma adroe đòeq ka radua qmùt aih jah capoch, hu broq ka rìm ngai ma ùh kùh waiq radua qmùt ngè rìh aih ep cachìt. **16** Haq hadai broq dìq döng ka mangai, yac ka mangai qyoh, mangai kàn, mangai padröng mangai pa, mangai broq dìc, mangai broq cla, dìq ep i teo hadro ta kòng pah qma, tàng ùh meh ta ngòng, **17** ùh i cabô jah rot, jah atech cleq tàng joq ùh i ka teo hadro aih, teo hadro aih raq yiniq xam sôq da ngè rìh aih. **18** Kan rabiaq oe ajang kô: Mangai leq ma loq, drah tình sôq da ngè rìh aih beq, majah qmang aih, sôq aih la sôq da mòeq ngai raq; sôq da haq aih la 666.

14 Au ngan hnoq, Kon Trìu yòng ta wang Siôn, i 144000 mangai yòng ti haq, dìq i yiniq Kon Trìu xam yiniq Baq achìh ta ngòng wì haq. **2** Au tàng i bàu loh enh plình, tìah qmang ka bàu diac kàn, qmang ka hilùng dêh; bàu au ma khoe tàng tìah ka bàu broc wì ma rawêh; **3** wì calêu boe calêu maneo enh ngèa ka Gèq bùa, enh ngèa ka pôn toq ngè rìh xam bài wì gucraq. Ùh i cabô loq ka boe calêu aih enh gùng ka 144000 mangai ma khoe jah baxon yōc hlài enh cröng taneh. **4** Bài wì aih qnhòq lah kùi oe ti gucadri, majah qmang wì haq dìq oe raq sriu. Kon Trìu lam pang leq wì kô tiaq pang aih. Bài wì aih khoe jah baxon yōc hlài enh qne kon mangai đòeq broq plì ramua hu dèch am ka Boc Plình xam Kon Trìu; **5** ùh i mòeq nà amòng ta bàu wì haq, ùh i nòe hu cwò. **6** Khoe aih, au hnoq bìn h plình maqnoeq pan qne tröc, i Bàu lem mòeq

đòeq hu bahìa am ka mangai rìh ta cröng taneh, ka rìm diac, rìm gùng, rìm nang noe, rìm bàu capoch. (aiōnios g166) 7 Haq capoch cadêh: “Khòh iu yùq ka Boc Plinh, rai broq qngah yiniq haq, majah qmang aih kan hadrah da haq khoe trùh; drah kùh waiq Mangai ma broq loh plinh taneh, diac raxìq xam bài goe diac.” 8 I mòeq bình plinh hatìa, tiaq atìq rai doe: “Babilôn kàn tau, khoe ralàih, khoe ralàih, majah qmang aih haq i am ka rìm diac ôq alac tango mahau da haq”. 9 I moeq bình lình qnoeq hòm, aih bình plinh ma piq, tiaq atìq, capoch dêh rameh: “Tàng cabô kùh waiq ngè rìh xam radua qmù haq, i teo hadro da haq ajang ngòng, ajang kōng, 10 mangai aih èh hadai jah ôq alac kan nòeh ùh clai da Boc Plinh ma hninh ta chröng mahau da haq; jah baxa ta ùnh liu hwìn oe enh ngèa bài bình plinh hadròeh xam enh ngèa Kon Trìu. 11 Nhòe da kan baxa wì haq pan tòc mòeq đòe. Bài mangai ma kùh waiq ngè rìh xam radua qmù haq, hloe xam bài mangai ma i teo hadro i yiniq da ngè rìh, aih èh xam dahì xam damang ùh i jò leq jah padài. (aiōn g165) 12 Kô kan cajap manoh da bài mangai hadròeh: Wì haq wèq ranenh da Boc Plinh rai dìq manoh lùi Chuaq Jesus Christ.” 13 Khoé ka aih au tàng bàu enh plinh doe: “Achìh beq! Pang kô xôq ramot am ka bài mangai cachìt aih la mangai ma cachìt enh dalam ka Chuaq!” Yiang Hadròeh doe: “Joq qnàng, majah qmang aih wì haq jah padài ka kan xalep, yiniq abroq da wì haq hanoh jah boe tiaq cla wì”. 14 Au ngan hnoq, i mòeq cato yùc taboc; haqngui enh qnhèq ka yùc aih i mòeq ngai tìah ka kon da mangai, tagàu i cadoh bùa broq xi wang ajang tì haq wê moeq pla haiq hin. 15

Mòeq bình plình qnoeq loh enh hnìm kùh waiq, yōc bàu dêh crêu ka haq ma haqngui ta yùc: “Drah caqnìh haiq hin ìh qmat đòeq hu gat; majah qmang aih khoe trùh jò gat, đùng ruàng ta taneh dùm khoe dìq”. **16** Mangai ma haqngui ta yùc caqnìh dèh pla haiq ta taneh, èh ta taneh jah gat dōng. **17** Mòeq bình plình qnoeq loh enh hnìm kùh waiq hadai wê haiq hin. **18** Èh mòeq bình plình qnoeq hòm i cwìang wèq ùnh, loh enh nòe prang kùh waiq, dêh bàu crêu ka bình plình wê haiq hin: “Caqnìh haiq hin da ìh qmat beq, hu gat bài raqnhi plì nho ta taneh majah qmang aih nho khoe dùm.” **19** Bình plình caqnìh pla haiq hin ta taneh, gat dōng plì nho ta taneh hwênh tah ta apau panòeh kàn da Boc Plình. **20** Apau aih ep len enh gùng ka plài kàn, i mahim ta-ùc loh enh apau aih, mahim aih hlèp qmòe ka qnhàng axêh, hìu clàng hangai jah mòeq muàn tadràu hrinh Ét-tađo.

15 Au hnoq ta tróc i mòeq kan halac maqnoeq, joq kàn joq ramòt qnàng: tapèh bình plình wê tapèh kan ranàc pulùch, majah qmang aih bài kan ranàc kô èh men jah broq ka Boc Plình brêh ka kan nòeh. **2** Au hnoq i cleq meh tìah ka diac raxìq hliang raplênh troeq guàng qngah pajùm ka ùnh, bài mangai ma khoe blêq ka ngè rìh xam radua qmù haq, hloe xam sôq yiniq da haq, yòng ti haqmai diac raxìq hliang qmang ka guàng aih. Wì haq wê broc da Boc Plình. **3** Wì calêu bàu calêu da Môise aih hapöng da Boc Plình xam bàu calêu da Kon Trìu: “Chuaq da nhèn aih Boc Plình dìq jaq i cwìang itai, yiniq broq da ìh joq kàn joq halac qnàng, waiq Bùa da rìm taneh diac! Trong da ìh aih dìq taq atoq, dìq joq qnàng, **4** Waiq Chuaq

nhèn, cabô ma ùh iu yùq, ma ùh dèch bàu manè yiniq
ìh? Majah qmang aih mòeq ngai ìh raq ma hadròeh, rìm
diac, dìq trùh hacùn cràng kùh waiq enh ngèa ìh, majah
qmang aih biac broq taq atoq da ìh, khoe jah paqnoh. 5
Khoe aih au ngan, hnoq ta tröc i nòe hadròeh da hním
ranòh tajao tapèch. 6 Tapèh bình plinh wê tapèh toq doe
chröng kan ranàc loh enh hním kùh waiq, caxùnh eo bai
briang hadròeh qngah qngai, kàt caxi caqnam broq xi
wang. 7 Mòeq ta pôn toq ngè rìh qnèp ka tapèh bình
plinh tapèh toq doe chröng broq xi wang, ta aih tah bình
kan nòeh da Boc Plinh aih Mangai rìh halinh mòeq đòe.
(aiôn g165) 8 Hním kùh waiq bình döng nhòe loh enh kan
ranhòm Boc Plinh xam cwìang itai haq; ùh i mangai leq
jah müt ta hním kùh waiq aih trùh jò leq tapèh kan ranàc
kàn da tapèh bình plinh jah broq gêh.

16 Khoe aih, au tàng bàu dêh loh enh hním kùh waiq
doe ka tapèh bình plinh: “Drah lam, ùc qnoh tapèh doe
chröng kan panòeh da Boc Plinh loh ta cröng taneh beq”.
2 Bình plinh ma adroe ùc deh doe chröng loh ta cröng
taneh, bài mangai ma kùh waiq radua qmù rai i teo hadro
da ngè rìh, loh döng ka pa-êh ra-om jìq. 3 Bình plinh
ma baiq, ùc doe chröng da haq ta diac raxìq, diac raxìq
wìh wìa mahim, tiah ka mahim mangai cachìt; rìm yiniq
ma rìh ta diac raxìq cachìt dìq döng. 4 Bình plinh ma
piq, ùc doe chröng da haq loh ta diac xam goe diac, diac
wìa döng mahim. 5 Au tàng bình plinh ma wèq diac doe:
“Chuaq joq taq atoq, ìh aih Mangai qnang i, khoe i enh
nèh, ìh Mangai hadròeh khoe hadrah cröng taneh kô;
6 majah qmang aih wì haq khoe broq dahrôq mahim

mangai hadròeh xam bài mangai pajàu, lìh khoe am wì haq ôq mahim: aih joq ra-òh qnàng”. **7** Au tàng enh prang kùh waiq i bàu doe: “Joq waiq Chuaq aih Boc Plình i cwìang itai rìm trong, bài kan hadrah da lìh dìq taq atoq, dìq joq qnàng”. **8** Bình plình ma pôn ùc deh doe chröng ta mat mahì, mat mahì jah cwìang bùh ca-et kon mangai. **9** Kan tòq broq ka kon mangai loh ka ca-et döng, wì haq capoch qmèq hloe ka yiniq Boc Plình aih Mangai ma i cwìang enh qnhèq döng ka bài kan ranàc aih, wì haq hadai ùh raxach đòeq hu dèch kan ranhòm ka Boc Plình. **10** Bình plình ma padam ùc deh doe chröng ta gèq da ngè rìh, diac da haq aih hi loh ka clam cluiq, ta kan jìq kon mangai loh ka ti kap deh rapet. **11** Ta kan jìq, kan pa-êh, wì haq ti capoch qmèq ka Boc Plình oe ta plình, wì haq dua ùh raxach dèh trong qmèq đeh ma khoe broq. **12** Bình plình ma tadràu ùc deh doe chröng ta cròng diac Ôphorat; diac aih loh ka xot croh, đòeq padon trong lam am ka bài bùa enh apah mat mahì tòc. **13** Khoe aih au hnoq enh hacùng bìh ròng, enh hacùng ngè rìh, enh hacùng pajàu qnùt loh piq toq kiac dù, tìah taiq ka bài kìt. **14** Aih raq kiac da Satan, broq bài kan halac, lam trùh ta bài bùa ta cròng taneh đòeq tagop ti dabau hu padon đòeq kan tajêh ta hì kàn da Boc Plình ma dìq jaq itai. **15** “Ngan oq! Au trùh tìah ka mangai atùng. Xôq ramot am ka mangai hmàng hamang rai wèq dèh eo, đòeq ùh lam chac dech dôq wì qnoeq ùh hìaq hnoq deh kan camaih”. **16** Wì tagop da bau oe mòeq nòe, tiaq bàu Hêbru ajang aih wì crêu Hamagêđôn. **17** Bình plình ma tapèh ùc deh doe chröng ta cayêu, aih i bàu

capoch dêh enh hnim kùh waiq, loh enh nòe gèq bùa doe: “Khoe gêh”. **18** Draq adrình hloe jò aih i kan camlet cađah, atêh hi gruàng, bàu hilùng xam kan ralàng dêh ta cröng taneh, taneh ralàng dêh dìq jaq enh jò baxèm i kon mangai trùh manđeq qnhòq lah i qmang aih. **19** Plài Kàn tapah loh piq, plài da diac wì ralàih clìh döng, Boc Plình hmàng trùh Babilôn kàn đòeq hu pangoc ka haq chröng panđeh. **20** Bài pleo diac amot döng, bài bui wang pi oe hnoq hòm. **21** Bài cato preo kàn, trap mòeq talàng, enh tröc clìh tuc kon mangai, taiq kan ranàc tröc clìh preo aih, kon mangai hi capoch qmèq ka Boc Plình, majah qmang aih kan ranàc aih ramòt joq qnàng.

17 Jò ta tapèh bìnħ plình ma wê doe chröng, aih i mòeq bìnħ plình thia haten doe ka au: “Lam ajang kô, au hu patô am ka ìh hnoq kan hadrah ka mangai gucadri tango kàn, haq ma haqngui enh qnhèq ka bài cròng diac kàn tau. **2** Bài bùa oe ta cròng taneh tango ka haq, mangai ma oe ta cròng taneh hadai bùbia ka alac tango haq.” **3** Khoe aih, bìnħ plình hi aràng au lam enh dalam ka Yiang Hadröeh haq qnung trùh tanoè hawit; au hnoqmangai gucadri haqngui enh cròng moèq toq ngè rìh gòh tabrùng, ta chac haq achìh toq yiniq bài bàu capoch ùh hòq ka Boc Plình, i tapèh toq gàu xam mòeq jàt toq haki. **4** Mangai gucadri aih caxùnh eo gòh ngùi. Anì toq bài wang, hmo canaq, ngòc, ajang tì haq wê moeq toq doe chröng wang bìnħ toq kan trùq, kan tango amùa. **5** Ajang ngòng achìh mòeq toq yiniq rameh: Kan hlèp da Babilôn kàn, aih miq bài mangai tango xam bài kan amùa trùq ta cròng taneh. **6** Au hnoq mangai gucadri aih bùbia ka mahim bài

mangai hadròeh xam mahim mangai cachìt ka Chuaq Jesus Christ; au hnoq loh ka hamàih. **7** Bình plình bòch au: “Gleq ìh majah hamàih? Kô au hu anoe ka ìh loq kan hlèp da mangai gucadrà xam ngè rìh ma chò haq, aih ngè rìh ma i tapèh toq gàu xam mòeq jàt toq haki. **8** Ngè rìh ìh ma khoe hnoq, adroe aih khoe i, yàng manòeq kô khoe pi i; kô èh haq jah tòc enh hwinh jrùq khoe aih lam trùh ta kan lùng pac; bài mangai oe ta taneh aih bài mangai ma ùh i achìh yiniq ta hset kan rìh enh jò broq plình cròng taneh, hnoq ngè rìh aih wì hamàih, majah qmang aih, nèh haq khoe i, manòeq kô pi i, yàng èh atìq aih ka doe haq jah trùh hòm. **(Abyssos g12)** **9** Ajang kô ep i manoh rabiaq ka hèm: Tapèh toq gàu aih tapèh toq bui wang gucadrà aih ma haqngui enh qnhèq. **10** Aih hadai tapèh toq bùa; padam ngai adroe khoe taclìh, mòeq ngai aih qnang i manòeq, mòeq ngai hòm qnhòq trùh; jò haq aih hi jah trùh, haq hadai ùh oe dùnh pang leq. **11** Ngè rìh ma khoe i adroe yàng manòeq pi i, aih raq bùa ma rahem; haq aih hadai mòeq bua ka tapèh bùa tau, haq hadai lam trùh ta kan lùng pac. **12** Mòeq jàt toq haki aih mòeq jàt toq bùa qnhòq jah waq deh diac; mahaq wì haq wiang broq bùa pajùm ti ngè rìh dù tau ta mòeq jò raq. **13** Wì haq pajùm moeq manoh đòeq jao döng deh cwìang am ka ngè rìh dù xòc. **14** Wì tajêh ka Kon Trìu, Kon Trìu blêq wì haq, majah qmang aih haq aih Chuaq da bài chuaq, Bùa da bài bùa; bài mangai ma khoe jah crêu, mangai khoe jah ràih xam bài mangai ma ùh tablòq manoh dìq jah oe pajùm ti Kon Trìu, hadai jah wiang blêq. **15** Khoe aih, bình plình doe hòm ka au: “Bài cròng diac ìh ma khoe

hnoq i mangai gucadri tango haqngui enh qnhèq, aih bài
nang noe, bài mangai bac, bài diac xam bài bàu capoch.

16 Cla ngè rìh xam mòeq jàt toq haki ìh ma khoe hnoq
atìq èh wì hi git ka gucadri tango, wì haq wìhlài raliang
đac rai broq ka haq loh ka talùch, nhah jam haq rai bùh
haq ta ùnh. **17** Majah qmang aih Boc Plình khoe dôq wì
aih broq tiaq manoh Haq ma enh, jò Haq broq ka wì aih
mòeq manoh ti dabau đòeq jao döng deh cwìang am ka
ngè rìh tau, trùh jò bàu da Boc Plình jah xìt. **18** Mangai
gucadri ìh ma khoe hnoq, aih raq plài kàn wèq cwìang
enh qnhèq ka bài bàu ta cröng taneh.

18 Atìq ka bài yiniq aih, au hnoq mòeq bình plình loh
enh plình, haq i cwìang kàn, kan ranhòm haq srêu qngah
qngiang ta cröng taneh. **2** Haq creo ka dêh “Babilôn kàn
khoe ralàih, khoe ralàih! Plài kàn aih khoe wìa nòe oe da
kan kiac, nòe trom nòe kòp da jròng, kòp da bài adrech
chìm qmèq qmac kon mangai ma cadròt ka hnoq, **3** majah
qmang aih rìm diac khoe bù ka alac tango anang da haq,
bài bàu ta cröng taneh khoe tango ti haq, bài mangai
padro ta cröng taneh khoe jah padröng kan enh kan loq
racaih da haq. **4** Au tàng i bàu qnoeq enh tröc doe rameh:
“Dìq ka mangai da Au, drah loh ma khoe ka Babilon,
Tabeq rayeq èh pì loq wiang poh yiniq lui ti haq, loq ep
wiang pòq kan ranàc ti haq. **5** majah qmang aih yiniq
lui da haq qmat haqnhèq khoe trùh ta plình, Boc Plình
khoe hmàng trùh kan dù da haq. **6** Pì broq hlài ka haq bài
yiniq haq ma khoe broq ka mangai qnoeq, patem chau ka
haq loe baiq yàng, clai ka haq loe baiq chröng haq ma
khoe clai ka mangai qnoeq. **7** Haq catèh rai hnhè rađeh

ta kan padrōng cla haq dàng leq, aih broq ka haq jìq xa chau dàng aih. Majah qmang aih tacliac haq doe “Au kô bùa cadrì haqngui dèh tagèq, ùh xài mangai hadrô, ùh jò leq au hnoq kan crò hmoe”. **8** Aih ìq dài majah ta mòeq hì raq, bìài kan ranàc kô majah caqnìh enh qnhèq ka haq, kan cachìt, kan crò hmoe, kan pangot hrah, xam ùnh bùh chac haq; majah qmang aih Boc Plình ma hadrah haq, aih Boc Plình I padren dêh haraya”. **9** Bìài bùa ta crōng tanèh ma khoe tango khoe wiang jah waq kan padrōng ti haq hnoq nhòe ùnh cheo haq aih èh wì toq crò hmoe. **10** Yùq loq ep wiang pòq kan xalep ti haq, wì toq yòng haqmiang enh hangai rai doe: “Hađo qnàng, hađo qnàng, Babilôn aih plài kàn, plài padrōng tau! Bu mòeq jò raq, kan hadrah gè khoe trùh”. **11** Bìài mangai padro ta crōng tanèh hadai mangò crò hmoe ka haq, majah qmang aih pi oe i cabô rot dahwèq rađeh hòm. **12** Dahwèq aih bìài: wang, bac, hmu lem, ngõc, bai habuàt, bai gòh, bai lùaq, bai drinh; bìài long xua thùm; bìài dahwèq broq xi bla roeh, long canaq, đùng, mem, hmo. **13** Cwèq, tiàu, dàu, janh xua thùm, gahnàu, alac, dàu oliu, bìài dàc lem, hmau phi, bìo, triù, axêh xam xê axêh, hapõng dìc, hloe xam mahua yiang kon mangai. **14** Wì doe “Bìài plì manoh ìh ma toq tangèh chaq hnhung khoe dìq, kan qngah padrōng rahù ìh khoe lùch, chaq ma oe hnoq”. **15** Bìài mangai padro aih canòm ka Babilôn khoe loh ka padrōng kan, dìq yòng enh hangai, wì yùq rađeh loq ep wiang xalep ti haq; wi crò hmoe rai mangò ka haq, wì doe: **16** “Hađo hrình, hađo hrình, ka plài kàn tau, khoe hmaq atàc toq bai habuàt gòh ngùi, gòh drinh, anì qngah qngiang toq

wang, toq ngoc, toq hmu canaql! Ta mòeq rahiယàc raq, kan padr။ng rahù ranhòm aih hn hung d။ng khoe d။q!” 17
Mangai w။q boang, mangai lam trong diac, xam mangai oe ta boang, ။b i mangai padro ta diac raxìq, d။q y။ng enh hangai, 18 j  w i hnoq nh e ဗn h cheo haq, w i cachech: “I pl i leq k n d ng pl i k !” 19 W i haq y။c blo raid deh tag u, cr  hmoe ad nh ka haq, w i doe: “Ha o hr nh, ha o hr nh qn ng! Haq k  khoe y။c kan padr။ng ra eh d eq broq ka r m mangai i boang ta diac raxìq jah padr။ng kan  eh diq, ta m eq rahiယàc raq khoe w a n e hawit. 20 “Diac Pl nh, ၃h dr h b i lem ka haq beq P i mangai hadr eh, lem b i beq Mangai paj u, ။b i mangai tiaq cla, b i beq Majah qmang aih j  Boc Pl nh hadrah gucad i aih. Haq khoe broq kan taq atoq am ka p i”. 21 Khoe ka aih, m eq  inh pl nh d h padren y။c m eq toq hmo qmang ka apau k n khw nh caqn h ta diac raxìq, haq doe “Pl i k n Babil n tau  h, hadai ep khw nh caqn h cad h qmang k   h diq, aih  h pi cab  oe hnoq haq h m. 22 Pi i cab  oe t ng b u raw h broc, b u hlui ken b u hlui taliaq enh n e haq h m. Ta ၃h k  yac ka padro cleq dua pi ka mangai pat h kaq k ng, b u ap h qmau dua pi t ng. 23 Qngah  en pi sreo ta ၃h h m, w i pi oe t ng b u  ng mai neo taqn p, majah qmang aih ။b i mangai padro ti ၃h aih d q ။b i gucraq ta cr ng taneh, Can h ၃h khoe paw  d ng mangai r m diac. 24 Tac  w i chaq hnoq mahim ။b i mangai paj u, mangai hadr eh xam d q d ng mangai ta cr ng taneh, ၃h khoe j h  ac ka cach t”.

19 Khoe ka ။b i yiniq k , au t ng i b u d h t ah ka b u da mangai b c haraya: “Al luja! Kan d ch claih, kan ranh m,

kan dêh padren dìq oe ta Boc Plình bèn. **2** Majah qmang aih kan hadrah da haq dìq taq atoq, dìq joq qnàng. Haq khoe hadrah mangai gucadrì tango kàn aih, Mangai ma khoe yōc deh kan tango broq raliang dōng ta crōng taneh, Haq khoe taþoe hlài mahim da bài hapōng haq khoe ta-ùc ajang tì kōng mangai gucadrì tango kàn aih”.

3 Wì calêu hòm yàng ma atìq: “Alêluja! Nhòe da haq pan tōc yôt mòeq đòe”. (aiōn g165) **4** Baiq jàt pôn ngai gucraq hacrùn cràng haqneq kùh waiq Boc Plình aih Mangai ma haqngui tagèq, wì doe: “Amen, Halêluja!” **5** Draq adrình hloe jò aih enh nòe gèq bùa i bàu doe: “Dìq dōng ka pì aih mangai hapōng Boc Plình, aih bài mangai ma loq iu yùq ka Haq, yac ka mangai qyoh mangai kàn hadai, drah calêu manè apôi Haq”. **6** Khoe aih, au tàng hòm bàu tìah ka bàu mangai bàc haraya, ùh i crài cleq ka bàu diac kàn, bàu cađah dêh, bàu aih doe rameh: “Halêluja! Chuaq aih Boc Plình bèn, aih Mangai i cwìang rìm trong, khoe broq bùa. **7** Beq bèn lem bùi, beq bèn apôi, padèch kan ranhòm ka Haq; Majah qmang aih hì taqnèp da Kon Trìu khoe trùh, mai da Haq hadai khoe palàng rađeh, **8** khoe jah caxùnh eo taboc chah ma raplênh broq xi bai habuàt” (bai taboc aih yiniq broq da bài mangai hadròeh). **9** Bình plình doe ka au: “Achìh beq, Joq xôq ramot qnàng ka mangai majah akhen trùh acaq yiniang taqnèp ống mai da Kon Trìu!” Haq anoe hòm: “Aih dìq bài bàu joq qnàng da Boc Plình”. **10** Au hacùn cràng ta haqneq ka jènh haq đòeq hu kùh waiq, mahaq haq doe ka au: “Apaq broq qmang kô, au hadai mangai hapōng tìah ka ìh, qmang ka bài oh daq ìh, hanoh wèq bàu đòeq lam anoe panhìn ka Jesus. ìh ep kùh

waiq Boc Plình. Majah qmang aih lam anoe panhìn ka Jesus aih la manoh cliac da bài bàu pajàu.” **11** Jò aih au hnoq plình tapèh, i moeq toq axêh taboc: Yiniq mangai kòe axêh aih: “Mangai ùh tablòq manoh xam Mangai capoch jang”. Haq yđc kan taq atoq đđeq hadrah rai đđeq tablêq. **12** Mat Haq tìah ka ùnh, gàu haq i bac toq cadoh bùa i achìh mòeq toq yiniq, enh gùng ka cla Haq ùh i cabô loq. **13** Haq caxùnh eo tàm ta mahim, yiniq da Haq aih bàu Boc Plình. **14** Bài lình plình dìq caxùnh eo habùat taboc, hreo lem, kòe axêh mõng lam tiaq Haq. **15** I mòeq pla chang hin loh enh hacùng Haq, Haq yđc chang aih hu tablêq ka bac diac ta taneh, Haq wèq wì aih xi mòeq toq long mem. Haq jôiq len plì nho ta apau, aih apau panòeh da Boc Plình itai rìm trong. **16** Ta cataih xam ta eo Haq achìh mòeq toq yiniq: “Bùa da bài bùa, Craq da bòe Craq”. **17** Au hnoq mòeq bình plình yòng ta mahì. Haq dèch bàu creo ka bài chìm pan ta tróc, rameh: “Trùh beq, pì tagop dabau trùh acaq yiniang kàn da Boc Plình, **18** Acaq jam bài bùa, jam bài cla craq, jam bài mangai tanoq, jam axêh xam mangai kòe axêh, jam da rìm ngai, mangai broq dìc jam mangai broq deh ka cla, enh jam mangai qyoh trùh jam mangai kàn”. **19** Au hnoq ngè xòc xam bài bùa ta crõng taneh xam bình lình wì haq tagop ti dabau hu tajêh ka Mangai kòe axêh xam lình da Haq. **20** Mahaq ngè xòc bìq rùp, bài pajàu qnùt aih mangai khoe broq kan halac enh ngèa ka ngè xòc, canòm ka haq đđeq ti qnùt bài mangai ma khoe i teo hadro da ngè xòc rai kùh waiq haq hadai bìq rùp, dìq baiq wa haq oe raq rìh mahaq bìq hwênh caqnìh tabau ùnh xam liu hwìn

cheo dra adrènh. (Limnē Pyr g3041 g4442) 21 Wì ma qnoeq dìq
cachìt ka chang maloh enh hacùng Mangai ma kòe axêh,
dìq dōng bài chìm jah panàc ka jam wì aih.

20 Atìq ka aih, au hnoq mòeq bình plình loh enh plình,
tì haq wê gahlòng da hwin jrùq xam mòeq hadrang caxi
datoeq kàn. (Abyssos g12) 2 Khoe aih haq rùp bìh kàn, aih
bìh dùnh calah nèh, aih kan kiac, aih Satan, clang kàt
đòeq haq ta mòeq mùan hanam. 3 Haq khwênh caqnìh
bìh aih ta hwin jrùq, clòng qmang hwin jrùq aih khoe èh
haq hi nìm padràng, dôq bìh aih pi oe jah lam qnùt bài
diac ta crōng taneh hòm, trùh jò leq hi khoe ka mòeq
mùan hanam. Khoe aih èh, Satan hadai ep jah caqnaih
mahaq ùh dùnh. (Abyssos g12) 4 Au hnoq bài gèq, bài
mangai haqngui tagèq jah cwìang đòeq hadrah. Khoe
aih au hnoq mahua bài mangai khoe ep cachìt ka wì pot
ranōng taiq wì haq lam anoe panhìn ka Chuaq Jesus xam
bàu da Boc Plình, mahua bài mangai ma ùh kùh waiq
ngè xòc xam radua qmù haq, ùh waq yōc teo hadro da
haq, yac ka tangòng ta kōng. Wì aih jah rìh hlài, jah
wèq cwìang pajùm ti Christ ta mòeq mùan hanam. 5 Bài
mangai cachìt ma qnoeq ùh jah rìh hlài jò qnhòq khoe ka
mòeq mùan hanam. Aih kan rìh hlài yàng ma baxèm. 6
Joq xôq ramot qnàng, joq hadròeh qnàng ka bài mangai
majah kan rìh hlài yàng ma baxèm! Kan cachìt yàng ma
atìq pi oe i cwìang cleq enh qnhèq ka wì haq; mahaq wì
aih jah broq pajàu da Boc Plình xam da Christ, jah hadai
broq bùa ti Haq ta mòeq mùan hanam. 7 Jò mòeq mùan
hanam hi dìq, Satan hi jah caqnaih, 8 loh enh gùng ka
nòe ma clêh, haq lam padô mangai oe jàp jìa ta crōng

taneh, mangai Got xam mangai Magot; haq gop ahlài wì oe mòeq nòe đòeq padon tajêh tablah, wì bac qmang ka braih diac raxìq... 9 Wì haq lam jàp ta taneh, ti dudanh nòe mangai da Boc Plình oe xam plài Haq ma loq waq deh. Mahaq i ùnh enh plình loh bùh wì haq cachìt döng.

10 Satan aih mangai ma ti padô wì haq aih èh jah caqnìh đac haq ta bau ùnh xam liu hwìn, ta aih khoe i ngè rìh xòc xam bài pajàu qnùt. Wì haq ep chìuq kan baxa xam dahì xam damang trùh hloe mòeq đòe. (aiōn g165, Limnē Pyr g3041 g4442) 11 Khoe aih au hnoq mòeq toq gèq taboc kàn

xam Mangai ma haqngui ta aih, enh ngèa Haq tròc taneh amot döng, pi hnoq nòe ajang leq đòeq ka wì haq hòm.

12 Au hnoq mangai cachìt xam kàn xam qyoh, dìq yòng enh ngèa ka nòe hadrah, bài hset dìq tapèch. Èh i mòeq toq hset qnoeq hòm, aih hset kan rìh; mangai cachìt jah hadrah tiaq deh trong wì haq ma broq, wop qmang

ka bàu achìh ta hset aih. 13 Diac raxìq padreo mangai cachìt ma oe ta haq; Kan cachìt xam Hwin hadai padreo hlài mangai cachìt oe ta haq. Rìm ngai wì aih chìuq jah hadrah tiaq trong đeh ma broq. (Hadēs g86) 14 Khoe ka aih, Kan cachìt xam Hwin, hadai jah caqnìh đac ta bau ùnh. Bau ùnh aih raq kan cachìt yàng ma atìq. (Hadēs g86, Limnē Pyr g3041 g4442) 15 Mangai leq ùh jah achìh yiniq ta hset kan

rìh, ep hwênh qnìh dìq ta bau ùnh. (Limnē Pyr g3041 g4442)

21 Khoe aih au hnoq tròc neo xam taneh neo, majah qmang aih tròc xam taneh ma adroe khoe hnhung, diac raxìq hadai pi i. 2 Au hadai hnoq Plài Hadròeh, aih la Jerusalem maneo enh plình, loh enh Boc Plình, khoe padon qmòe qmang ka mai neo taqnèp anì dèh ka ǒng. 3

Au tàng i bàu dêh loh enh nòe gèq doe rameh: “Hacô! Ranòh kùh waiq da Boc Plình oe qne kon mangai, Haq oe ti wì, wì jah broq mangai da Haq; cla Boc Plình jah oe ti wì. **4** Haq xùt hreo diac mat enh mat wì, pi oe i kan cachìt, kan mangò, bàu crò hmoe, kan jìq xa hòm, majah qmang aih bài yiniq ma adroe khoe pi i. **5** Mangai haqngui tagèq doe: “Au broq neo hlài rìm yiniq”. Haq doe hòm: “Achìh beq, majah qmang aih bài bàu kô dìq khòh lùi, dìq joq qnàng”. **6** Haq doe ka au: “Khoe gêh! Au kô Anpha xam Ômega, aih la baxèm xam pulùch. Cabô croh ranöng, Au yōc thòng diac kan rìh đòeq am dech ka haq. **7** Mangai leq blêq hi jah bài yiniq aih đòeq broq kùng hang, au jah broq Boc Plình da mangai aih, haq aih jah broq kon da au. **8** Bài mangai ma lèu, mangai ma ùh lùi, mangai jiàng ka ramòt, mangai jêh đac mangai, mangai tango anang, mangai ti pàih panàih blài blöng, mangai kùh waiq radua qmù, xam mangai capoch amòng, nòe da wì haq aih bau ùnh xam liu hwinh khàng ma adrènh: Aih raq kan cachìt yàng baiq.” (*Limnē Pyr g3041 g4442*) **9** Mòeq ta tapèh ngai bình plình ma khoe wê tapèh toq doe chröng kan ranàc, thia haten doe ka au: “Trùh ajang kô beq, đòeq au patô ka ìh hnoq kon mai, aih mai maneo ban da Kon Trùu”. **10** Khoe aih ta phàn yiang, bình plình aih qnung au lam tòc ta bui wang kàn haqnhèq, patô ka au hnoq Plài Hadròeh, aih la Jerusalem, enh plình, loh enh Boc Plình, **11** qngah qngiang kan ranhòm da Boc Plình. Kan ca-ah ca-iang da plài aih tìah qmang pliang hmu ngòc ma canaq bac, qmang ka ngòc hmu lang hliang ma raplênh. **12** Haq i panàt haqngchèq, i mòeq jàt baiq toq qmang, xam mòeq

jàt baiq bình plình ajang trong qmang, enh qnhèq ka qmang achìh yiniq da mòeq jàt baiq nang noe Isorali. **13** Panàt pah mat mahì tōc i piq toq qmang, enh pah qngeo i piq toq qmang, enh pah qma i piq toq qmang, enh pah mat mahì clìh i piq toq qmang. **14** Panàt plài aih i mòeq jàt baiq toq hmu xèm, ta aih achìh yiniq da mòeq jàt baiq ngai Tiaq cla da Kon Trìu. **15** Bình plình ma capoch ka au tì haq wê mòeq toq long maneh aih long triang niaq broq xi wang đòeq wêh plài aih, wêh bài qmang xam panàt plài. **16** Plài aih pôn bè daq adàng, dang gat dang yôh taq atoq ka dabau. Bình plình wêh plài aih xi catoch triang niaq: Plài aih jah mòeq jàt baiq mùan êtađo, dang yôh, dang gat, dang yàng đìq taq atoq. **17** Haq wêh panàt plài bè habàu jah: Mòeq hrinh pôn jàt pôn cuđê, aih maneh wêh da bình plình, hadai maneh wêh da kon mangai. **18** Panàt broq xam ngõc hmu lang, plài aih broq xam wang, hliang raplênh qmang ka guàng. **19** Jo xèm panàt plài aih broq toq xi hmu canaq. Xèm ma adroe aih xam hmu lang, xèm ma atìq aih xi hmu ngõc saphia, xèm ma piq aih xi hmu ngõc mainao, xèm ma pôn aih xam hmu ngõc nget, **20** xèm ma padam aih xi hmu mainao gòh drinh, xèm ma tadràu aih xi hmu rubi; xèm ma tapèh aih xi hmu ngõc ngèq ngèq, xèm ma rahem aih xi ngõc thìh thuàng, xèm ma hachìn aih xi ngõc gòh nget, xèm ma mòeq jàt aih xi ngõc xênh, xèm mòeq jàt mòeq aih xi hmu ngõc gòh, xèm mòeq jàt baiq aih xi hmu lang gam. **21** Mòeq jàt baiq toq qmang broq xi mòeq jàt baiq pliang ngõc, rìm toq qmang đìq broq enh cato ngõc. Trong lam ta plài đìq broq xam wang, hliang qmang ka guàng. **22** Ta aih au ùh i


hnoq mòeq toq hnim kùh waiq leq, majah qmang aih Boc
Plình i cwìang itai rìm trong xam Kon Trìu aih raq hnim
kùh waiq da plài aih. **23** Plài aih hanoh ùh hìaq ep waq
ka i mat mahì, mat khê đòeq sreo qngah; majah qmang
aih i kan ranhòm da Boc Plình sreo qngah qngiang, Kon
Trìu aih raq đen da plài aih. **24** Bài diac wì lam tiaq kan
qngah plài aih, bài bùa ta cröng taneh aràng deh kan
nhòm nhình qmùt ta aih. **25** Bài qmang ta plài aih dahì
ùh clênh majah qmang aih ta aih ùh i ka damang. **26**
Kan rahù ranhòm da bac diac jah aràng qmùt ta aih, **27**
mangai ùh hadròeh, mangai broq trong qmèq, mangai
loq qnùt blinh ùh jah mùt; mahaq đòeq toq ka bài mangai
ma khoe jah achìh yiniq ta hset kan rìh da Kon Trìu.

22 Bìnħ plình patô am au ngan cròng diac kan rìh,
hliang raplēnh qmang ka ngõc xênh, loh enh gèq da Boc
Plình xam da Kon Trìu. **2** Taqne plài xam baiq bè diac i
long kan rìh loh plì moeq jàt baiq yàng ta hanam, mòeq
khê mòeq yàng loh plì; bài hla da haq đòeq broq brêh ka
kon magai. **3** Pi oe bài capoch hanip hòm, gèq da Boc
Plình xam Kon Trìu oe qne plài, bài hapõng da Haq jah
patih dèh ka Haq; **4** wì haq jah hnoq hadrò deh Chuaq,
yiniq da Chuaq jah oe ajang ngòng wì haq, pi oe i ka
damang hòm, **5** yac ka qngah đen, qngah mahì dua wì
haq pi oe ep waq hòm, majah qmang aih i Boc Plình sreo
qngah am ka wì; wì haq jah broq bùa mòeq đòe. (aiōn g165)

6 Bìnħ plình doe ka au: “Bài bài kô dìq bài khòh lùi, bài
joq qnàng, Chuaq aih raq Boc Plình da yiang bài pajàu,
khoe thê deh bìnħ plình haq loh patô ka hapõng Haq
rìm yiniq ep drah rênħ trùh. **7** “Ngan kô Au rênħ trùh!

Xôq ramot am ka mangai leq wèq bài bàu pajàu oe ta hset kô”. **8** Au kô Jon, mangai ma khoe hnoq rai tàng bài yiniq kô. Jò au khoe tàng rai hnoq, au bla op rađeh ta haqneq ajang nòe jènħ bình plình ma khoe patô ka au bài yiniq kô, đòeq kùh waiq haq aih. **9** Mahaq bình plình aih doe ka au “apaq broq qmang qmat! Au kô hanoh hapõng qmang ka ìh xam oh daq ìh, aih bài mangai pajàu, xam bài mangai ma wèq bàu ta hset kô; Ep kùh waiq toq Boc Plình”. **10** Khoe aih haq doe hòm ka au: “Ùh dùh nìm padràng đòeq bài bàu pajàu ta hset kô, majah qmang aih jò khoe haqnap”. **11** Mangai ma broq trong ùh troq, dôq da haq broq kan ùh troq hòm, mangai ma amùa trùq dôq da haq rìh tiaq deh kan trùq amùa hòm, mangai ma broq trong taq atoq, đòeq haq broq trong taq atoq hòm, mangai leq hadròeh kiang haq rìh tiaq kan hadròeh hòm”. **12** “Ngan kô Au rênħ trùh rai wê kan baha lam ti au, đòeq baha tang ngai tiaq trong wì haq khoe broq. **13** Au kô Anpha xam Ômega, aih kan Adroe xam kan Atìq dõng, kan Baxèm xam kan Pulùch **14** Xôq ramot am ka mangai leq rùh deh eo đòeq jah tajì ka thia ajang long kan rìh, jah lam trong qmang đòeq mùt ta plài kàn! **15** Bài koq, bài mangai loq ti pàih panàih, mangai tango, mangai jêh mangai, mangai tadreo radua qmù kan kiac, mangai enh xam broq kan patiāh, oe dìq enh gùng”. **16** Au kô Jesus, khoe thê dèh bình plình trùh panhìn bài yiniq kô am ka pì enh ngèa ka bài Tagop Hadròeh. Au kô rangàu riah, xinoe da Đawit, Au kô raq halõng sroq qngah qngai”. **17** Yiang Hadròeh xam mai neo doe: “Trùh beq! Mangai leq ma tàng hanoh doe: Trùh beq! Cabô croh

ranǒng drah trùh. Cabô enh, drah trùh đòeq yǒc dech ka rađeh diac kan rìh.” **18** Au pariaq ka mangai leq ma tàng bàu pajàu ta hset kô: Tàng cabô tah tam cleq ta hset pajàu kô, aih èh Boc Plình dèch tam ka haq kan ranàc ma khoe achìh ta hset kô. **19** Mangai leq ma cađac đac qnah yiniq cleq ma khoe achìh ta hset pajàu kô, aih èh Boc Plình doeh đac hloe phàn da haq talong kan rìh xam ta plài hadròeh ma khoe achìh ta hset kô. **20** Mangai panhìn ka bài yiniq kô, doe rameh: “Joq qnàng, Au rên trùh”. Amen waiq Chuaq Jesus! Ìh rên trùh beq. **21** Waiq kan tabàih dech da Jesus Christ oe ti rìm ngai! Amen.



*Au hadai hnoq Plài Hadròeh, aih la Jerusalem maneo enh plinh, loh enh Boc Plinh, khoe
padon qmòe qmang ka mai neo taqnèp anì dèh ka ǒng. Au tàng i bàu dêh loh enh nòe gèq
doe rameh: "Hacôl! Ranòh kùh waiq da Boc Plinh oe qne kon mangai, Haq oe ti wì,
wì jah broq mangai da Haq; cla Boc Plinh jah oe ti wì."*

MAHNO 21:2-3

Reader's Guide

Hset at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Hset at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonomous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Hre---Hre-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

LUCA 8:31	BIAC YIANG HADRÖEH 3:21	I PHIERÖ 1:25
RÔMA 10:7	BIAC YIANG HADRÖEH 15:18	I PHIERÖ 4:11
MAHNO 9:1	RÔMA 1:25	I PHIERÖ 5:11
MAHNO 9:2	RÔMA 9:5	II PHIERÖ 3:18
MAHNO 9:11	RÔMA 11:36	I JON 2:17
MAHNO 11:7	RÔMA 12:2	II JON 1:2
MAHNO 17:8	RÔMA 16:27	JUDE 1:13
MAHNO 20:1	I CORINHTO 1:20	JUDE 1:25
MAHNO 20:3	I CORINHTO 2:6	MAHNO 1:6
	I CORINHTO 2:7	MAHNO 1:18
	I CORINHTO 2:8	MAHNO 4:9
	I CORINHTO 3:18	MAHNO 4:10

aïdios

RÔMA 1:20	I CORINHTO 8:13	MAHNO 5:13
JUDE 1:6	I CORINHTO 10:11	MAHNO 7:12

aiōn

MATHIÖ 12:32	II CORINHTO 11:31	MAHNO 14:11
MATHIÖ 13:22	GALATI 1:4	MAHNO 15:7
MATHIÖ 13:39	GALATI 1:5	MAHNO 19:3
MATHIÖ 13:40	ÊPHÉSÔ 1:21	MAHNO 20:10
MATHIÖ 13:49	ÊPHÉSÔ 2:2	MAHNO 22:5
MATHIÖ 21:19	ÊPHÉSÔ 2:7	
MATHIÖ 24:3	ÊPHÉSÔ 3:9	
MATHIÖ 28:20	ÊPHÉSÔ 3:11	
MÖC 3:29	ÊPHÉSÔ 3:21	MATHIÖ 18:8
MÖC 4:19	ÊPHÉSÔ 6:12	MATHIÖ 19:16
MÖC 10:30	PHILIP 4:20	MATHIÖ 19:29
MÖC 11:14	CÔLOSE 1:26	MATHIÖ 25:41
LUCA 1:33	I TIMÔTHÊ 1:17	MATHIÖ 25:46
LUCA 1:55	I TIMÔTHÊ 6:17	MÖC 3:29
LUCA 1:70	II TIMÔTHÊ 4:10	MÖC 10:17
LUCA 16:8	II TIMÔTHÊ 4:18	MÖC 10:30
LUCA 18:30	TIT 2:12	LUCA 10:25
LUCA 20:34	HÊBRU 1:2	LUCA 16:9
LUCA 20:35	HÊBRU 1:8	LUCA 18:18
JON 4:14	HÊBRU 5:6	LUCA 18:30
JON 6:51	HÊBRU 6:5	JON 3:15
JON 6:58	HÊBRU 6:20	JON 3:16
JON 8:35	HÊBRU 7:17	JON 3:36
JON 8:51	HÊBRU 7:21	JON 4:14
JON 8:52	HÊBRU 7:24	JON 4:36
JON 9:32	HÊBRU 7:28	JON 5:24
JON 10:28	HÊBRU 9:26	JON 5:39
JON 11:26	HÊBRU 11:3	JON 6:27
JON 12:34	HÊBRU 13:8	JON 6:40
JON 13:8	HÊBRU 13:21	JON 6:47
JON 14:16	I PHIERÖ 1:23	JON 6:54

aiōnios

MATHIÖ 18:8		
MATHIÖ 19:16		
MATHIÖ 19:29		
MATHIÖ 25:41		
MATHIÖ 25:46		
MÖC 3:29		
MÖC 10:17		
MÖC 10:30		
LUCA 10:25		
LUCA 16:9		
LUCA 18:18		
LUCA 18:30		
JON 3:15		
JON 3:16		
JON 3:36		
JON 4:14		
JON 4:36		
JON 5:24		
JON 5:39		
JON 6:27		
JON 6:40		
JON 6:47		
JON 6:54		
JON 6:68		

JON 10:28
JON 12:25
JON 12:50
JON 17:2
JON 17:3
BÌAC YIANG HADRÒEH 13:46
BÌAC YIANG HADRÒEH 13:48
RÔMA 2:7
RÔMA 5:21
RÔMA 6:22
RÔMA 6:23
RÔMA 16:25
RÔMA 16:26
II CORINHTO 4:17
II CORINHTO 4:18
II CORINHTO 5:1
GALATI 6:8
II TÊSALÔNICA 1:9
II TÊSALÔNICA 2:16
I TIMÔTHÊ 1:16
I TIMÔTHÊ 6:12
I TIMÔTHÊ 6:16
II TIMÔTHÊ 1:9
II TIMÔTHÊ 2:10
TIT 1:2
TIT 3:7
PHILÊMÔN 1:15
HÊBRU 5:9
HÊBRU 6:2
HÊBRU 9:12
HÊBRU 9:14
HÊBRU 9:15
HÊBRU 13:20
I PHIERO 5:10
II PHIERO 1:11
I JON 1:2
I JON 2:25
I JON 3:15
I JON 5:11
I JON 5:13
I JON 5:20
JUDE 1:7
JUDE 1:21
MAHNO 14:6

eleēsē
RÔMA 11:32

Geenna
MATHIO 5:22
MATHIO 5:29
MATHIO 5:30
MATHIO 10:28
MATHIO 18:9
MATHIO 23:15
MATHIO 23:33
MÖC 9:43

MÖC 9:45
MÖC 9:47
LUCA 12:5
JACO 3:6

Hades
MATHIO 11:23
MATHIO 16:18
LUCA 10:15
LUCA 16:23
BÌAC YIANG HADRÒEH 2:27
BÌAC YIANG HADRÒEH 2:31
I CORINHTO 15:55
MAHNO 1:18
MAHNO 6:8
MAHNO 20:13
MAHNO 20:14


Limnē Pyr
MAHNO 19:20
MAHNO 20:10
MAHNO 20:14
MAHNO 20:15
MAHNO 21:8

Sheol
Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Tartaroō
II PHIERO 2:4

Questioned
None yet noted

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48




Xi manoh lñi, Apraham iu bñau Chuaq creo lam tagñng haq hñijah dñeq broq deh kñng hang; Haq lam mahaq ùh qñi dñch lam taleq. - HÊBRU 11:8




"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17

Israel's Exodus



Majah qmang aih, Kon Mangat trùih lùh xài dòeq wì patih ka haq, mahaq dòeq haq patih għoq ka wi, rai cadac kan riħ radeh ddeq hu dèch baci ngai. - MōC 10:45



Phaulô hapđoing da Jesus Christ, khoejah creo broq mangai Tiaq cla, khoejah lah đoeq crâi hu anoe Bäu lem da Boc Phinh. - RÔMÀ 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophesies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

New Heavens and Earth

Christ returns for his people	1956
Jim Elliot martyr in Ecuador	1830
John Williams reaches Polynesia	1731
Zinzendorf leads Moravian mission	1614
Japanese kill 40,000 Christians	1572
Jesuits reach Mexico	1517
Martin Luther leads Reformation	1455
Gutenberg prints first Bible	1323
Franciscans reach Sumatra	1276
Ramon Llull trains missionaries	1100
Crusades tarnish the church	1054
The Great Schism	997
Adalbert martyr in Prussia	864
Bulgarian Prince Boris converts	716
Boniface reaches Germany	635
Alopen reaches China	569
Longinus reaches Alodia / Sudan	432
Saint Patrick reaches Ireland	397
Carthage ratifies Bible Canon	341
Ulfila reaches Goth / Romania	325
Niceae proclaims God is Trinity	250
Denis reaches Paris, France	197
Tertullian writes Christian literature	70
Titus destroys the Jewish Temple	61
Paul imprisoned in Rome, Italy	52
Thomas reaches Malabar, India	39
Peter reaches Gentile Cornelius	33
Holy Spirit empowers the Church	33

Jesus Christ born 4 B.C.
(The Annals of the World, James Usher)

Resurrected 33 A.D.

(Wikipedia, Timeline of Christian missions)

Where?

Who?

		When?							
		Innocence		Fallen		Glory			
		Eternity Past	4000 BC Creation	Fall to Sin No Law	1500 BC Moses' Law	Advent of Christ 0-33 AD	Church Age Kingdom Age	Great White Throne	New Heaven and Earth
God	Father	God's Perfect Fellowship	God's Perfect Fellowship with Adam in the Garden of Eden	Living in Unapproachable Light, 1 Timothy 6:16	Pre-Incarnate, John 8:58 Everywhere, Psalm 139:7	Incarnate, John 1:14 Indwelling Believers, John 14:17	Paradise, Luke 23:43 Serving the Savior or Satan on Earth, Ephesians 2:1-5	God's Perfectly Restored Fellowship with All Mankind in the Holy City	God's Perfectly Restored Fellowship with All Mankind in the Holy City
God	Son	John 10:30					Blessed in Paradise, Luke 16:22	Acts 3:21	Acts 3:21
God	Holy Spirit						Punished in Hades until the final judgment, Luke 16:23 and Rev 20:13	No Hades	No Hades
God	Living Mankind						Serving Mankind at God's Command, Hebrews 1:14	Rev 20:3	No Dead
God	Deceased Believing Mankind						Imprisoned in Tartarus, 2 Peter 2:4 and Jude 6		
God	Deceased Unbelieving Mankind						Thalaasa, Rev 20:13		
God	Holy Angels						Rebelling Against Christ		
God	Imprisoned Angels						No Unholy Angels Accusing Mankind		
God	Fugitive Angels						Revelation 19:20		
God	First Beast Demon						1 Peter 5:8 and Revelation 12:10	Abyss	
God	False Prophet Demon							Revelation 20:2	
God	Satan								Revelation 20:10
									Heb 2:16 No?

Destiny

Hset at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels.'*" Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. "*If the first fruit is holy, so is the lump*," Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Disciple All Nations

Qmang aih, drah lam jup crōng taneh đoeq broq ka mangai oe rìn diac wia dōng mangai tiaq hōc au, canōm ka hiniq Baq,
hiniq Kon, hiniq Yiang Hadriōch đoeq broq baptēm ka wi. - MATHIO 28:19